


# Gandja na Mbia



Mayogo: Gandja na Mbia (New Testament)

**Gandja na Mbia**  
**Mayogo: Gandja na Mbia (New Testament)**

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source files dated 29 Jan 2022  
6b4904fb-f8ce-5931-8218-7cee8914232c

## Contents

Matié . . . . .	1
Maloko . . . . .	51
Luka . . . . .	82
Djaa . . . . .	133
Kulu . . . . .	169
Loma . . . . .	217
1 Kolito . . . . .	241
2 Kolito . . . . .	264
Galate . . . . .	279
Efeso . . . . .	287
Filipoi . . . . .	295
Kolosai . . . . .	301
1 Tesalonike . . . . .	306
2 Tesalonike . . . . .	311
1 Timoté . . . . .	314
2 Timoté . . . . .	321
Tito . . . . .	326
Filemo . . . . .	329
OmaEbele . . . . .	331
Djaki . . . . .	348
1 Piele . . . . .	354
2 Piele . . . . .	361
1 Djaa . . . . .	365
2 Djaa . . . . .	371
3 Djaa . . . . .	372
Djude . . . . .	373
Apokalipisi . . . . .	375

**Bádha Ngali  
gba Yesu Kilisito maka li  
Matié  
aye lie ko  
Eli na kalanu**

Bádha Ngali inde li Matié aye e ngakpokpo me Yesu ne Mụkobho inde li Ebhe abhụ nani e-o. A ko kpála inde li Ebhe amene li pápá gba e ongú inde ani apa nani bhú Gandja na Didili-e me ni améne e pí okpála gba ni-o. Bádha Ngali ango-o bha bini pí opiga gba omaYuda ade inde u azu Yesu bhú e di ne bhe ani abhele bhú e-o. Engú bini, a la di pí ndu okpála na pía doto hana.

Bádha Ngali ango-o ngasuno Yesu maka 'ngbé mụsuno inde ne angu nambamba 'ta líli gba Ebhe, inde la di ngasuno pindji Nau gba Ebhe-o . Ongú na ngbengbengbe inde bhú nasuno gba ani-e a bhuluvue: (1) Nasuno a pí 'ta (alo 5-7). (2) Olíli pí omụkpata ndjikpa ne ká bhisi (alo 10). (3) Ogbitaku pindji Nau na abhúlá (alo 13). (4) Nadu mụkpata gba Yesu (alo 18). (5) Ekpí na soso (oalo 24-25).

**Ongbengbe ongú inde bhú bhuku inde-e ngae inde:**

Onguo ogbi Yesu Kilisito di ne nazu lie ka aní 1:1 - 2:23  
Kulu gba Djaa bhulụ nabatisa okpála 3:1-12  
Batisimo di ne nale inde li Djabulụ ale Yesu ne e-o 3:13 - 4:11  
Kulu inde li Yesu amene e bhú ká okpála na Galilaya 4:12 - 8:34  
Dhuku gba Yesu nayie bhú Galilaya ngú nanu abhú Yelusalema 9 - 20:34  
Oekpí na soso gba Yesu abhú Yelusalema 21:1 - 27:66  
Nakpi ne nazuku gba Yesu di ne nakoto ka aní li okpála 28:1-20

*Onguo ogbi Yesu Kilisito  
(Tsia bhú Luk. 3:23-38.)*

† 1:11 1:11 Tsia bhú 2 Ong. 24:12-16.

<sup>1</sup> A inde-e 'li onguo ogbi Yesu Kilisito , inde u azu e bhú piga gba 'ngbé ngámá Davidi, di ne bhú piga gba Abalahama-o.

<sup>2</sup> Abalahama azu Isaka,  
Isaka azu Yakobho,

Yakobho azu Yuda di ne ondaise e,

<sup>3</sup> Yuda azu Peledje ne Djala li Tamala,  
Peledje azu Esilome,

Esilome azu Lama,

<sup>4</sup> Lama azu Aminadaba,  
Aminadaba azu Nasone,

Nasone azu Salimona,

<sup>5</sup> Salimona azu Boadja li Laaba,

Boadja azu Obede li Luta,

Obede azu Yese,

<sup>6</sup> Yese azu 'ngbé ngámá Davidi.

Davidi azu Salomo li ełe gba Ulia,

<sup>7</sup> Salomo azu Loboama,

Loboama azu Abia,

Abia azu Asa,

<sup>8</sup> Asa azu Djodjafata,

Djodjafata azu Djolama,

Djolama azu Odjiasi,

<sup>9</sup> Odjiasi azu Djoatama,

Djoatama azu Akadji,

Akadji azu Edjekia,

<sup>10</sup> Edjekia azu Manasi,

Manasi azu Amosi,

Amosi azu Djodjiasi,

<sup>11</sup> Djodjiasi azu Djekonia di ne

ondaise e. Abhomu-o, u atsia abha

omafsalaele bhú bali abhú kuti na Babilona.†

<sup>12</sup> Pita nabha uo bhú bali bhú Babilona-

a,

Djekonia azu Salatiele,

Salatiele azu Djolobabele,

<sup>13</sup> Djolobabele azu Abiuda,

Abiuda azu Eliakime,

Eliakime azu Adjole,

<sup>14</sup> Adjole azu Sadoka,

Sadoka azu Akime,

Akime azu Eliude,

<sup>15</sup> Eliude azu Eleadjali,

Eleadjali azu Matana,

Matana azu Yakobho,

<sup>16</sup> Yakobho atsia azu Djodjefu 'ko Malia

inde azu Yesu, u 'i e me Masiya-o .

<sup>17</sup> Nako ndu opiga bhomu-o hana-a, nayie li Abalahama nakolo li Davidi-e, a ko opiga ndjikpa ne ká badha, nayie li

Davidi nakolo li namba omaɪsalaele bhú bali na Babilona-a, a ko opiga ndjikpa ne ká badha, nayie li nanu bhú bali abhú Babilona-a nakolo li nazu Masiya-a, a ko di opiga ndjikpa ne ká badha.

*Malia azu Yesu  
(Tsia bhú Luk. 2:1-7.)*

<sup>18</sup> A inde-e lele maka u azu Yesu Kilisito lie ko. Malia, 'hi ani-e adu adjeke kava gba o ne Djodjefu-o. Engú bini, kala me u mbila lio na elo ne bhoko-o, ani abí ebhi bhú angu gba Bu Bhobua .  
<sup>19</sup> Abhomu-o, 'ko ani Djodjefu inde adu nani kpála namanga Ebhe-e, du akunda naha nunu pi ani bhú ká djila okpála de. Ani atsia au ndjindji me ni tse ani bhú pepe. <sup>20</sup> Nedhinga ani adu abhundja lie mo-o, andjelu bini gba Ngámá akoto li ani bhú loto. Ani atsia apa pi ani me: «Djodjefu, ndili gba Davidi, mo okpé naha wala mu Malia de, anga ebhi inde ani nde ne e ayie ka Bu Bhobua. <sup>21</sup> Ani azú ndili na bhobhoko inde mo ogísila 'li e me Yesu,\* anga ani akóbho omaha e bhú osisiti 'ngú gba o-o.» <sup>22</sup> Ndu 'ngú bhomu-o hana amene lie ngubula me engú li Ebhe Ngámá apa nani e bhú 'li polofeta mene lie. Engú inde ani apa nani e me:

<sup>23</sup> «Tsia nga, elo inde i mbila nga 'ngú na bhoko de-e abí 'bhi, ani tsia zú ndili na bhobhoko inde u agísila 'li e me Imanueli.†»

(A akunda napa me: Ebhe bhú dabili bini ne ní.) <sup>24</sup> Li Djodjefu azuku lie, ani amene maka li andjelu gba Ngámá apa pi ani lie-o. Ani atsia aha Malia maka wala e. <sup>25</sup> Engú bini, u si ne ani pi polo bini maka elo ne bhoko de nakolo li 'kpí li Malia azu ndili na bhobhoko inde li Djodjefu agisila 'li e me Yesu-o lie-o.

## 2

*Obhulu imbilangu ago ngú nadhogo  
Yesu  
(Tsia bhú Luk. 2:8-20.)*

<sup>1</sup> U azu nani Yesu bhú Beteleme.\* Kutí bini na ndu doto na Yudaya, bhú

nedhinga gba 'ngbé ngámá Elode† me-e, obhulu imbilangu ayie ne andjongu, u akolo bhú Yelusalema. <sup>2</sup> U atsia ayi me: «'Ngbé ngámá gba omaYuda inde u azu e mbia inde-e su? Padhá de, anga ya au ikupala inde asuno me u azu ani-e akoto ne andjongu, abhomu-o, ya atsia ago ngú nadhogo ani.»

<sup>3</sup> Li Elode adje lie mo-o, mabhundja gba ani di ne bhe gba ndu okpála na Yelusalema hana angbingi. <sup>4</sup> Abhomu-o, ani apo bhúla ongbengbe odimandø gba Ebhe , di ne omusuno na líli gba Moidje-o . Ani atsia ayi uo me: «Bili inde a ayo me u zu Masiya li e ngae dho?» <sup>5</sup> U agie pi ani me: «Abhú Beteleme, bhú ndu doto na Yudaya, anga polofeta aye nani me:

<sup>6</sup> «Ngamu, Beteleme inde bhú ndu doto na Yudaya,  
mu mbomboye ane okuti koko na Yudaya mane ade.

Padhá de, anga ngámá inde alila okpála gba ma na Isalaele, akoto bhú mu.†»

<sup>7</sup> Abhomu-o, Elode a'i obhulu imbilangu-o bhú pepe. Ani ayi uo li kukulu nedhinga inde li ikupala ango-o akoto lie-o. <sup>8</sup> U agie 'ngú lie pi ani tété-e, ani atsia atima uo bhú Beteleme ne napa pi uo me: «Yi nunu, yi gili 'ngú pindji ndili-e na paká paká. Li yi u ani-e, yi de go pa mama, amba ngama di-e, ma nu dhogo ani.»

<sup>9</sup> Pita u adje engú li 'ngbé ngámá Elode apa e lie, u atsia aholo 'nú. Me-e, ikupala u au e andjongu-o adu adholo kala uo, a atsia anu alu pi bili inde li ndili-e adu li e-o. <sup>10</sup> U au matá ikupala-a lie me-e, u abedhe ne djali bedhe. <sup>11</sup> U ali abhú 'ti-o, u atsia au ndili-e ne 'hi e Malia . Abhomu-o, u akikita lipaku o kuto, u atsia adhogo ani. U abhulu okili gba o-o. U atsia aha apepe pi ani li olo, ne mungotsi, la di ne mungotsi koko na mase naali inde 'li e me mila . <sup>12</sup> Pipita-a, Ebhe atsia apa pi uo bhú loto me u agie matá lio agba Elode

\* **1:21** 1:21 Yesu: 'Hi inde me Yesu-o, a akunda napa me Ebhe ne mukobho gba okpála. † **1:23** 1:23 Tsia bhú Isa. 7:14. \* **2:1** 2:1 Beteleme: A ko kuti inde u azu nani 'ngbé ngámá Davidi bhú e-o. † **2:1** 2:1 Tsia bhú Mik. 5:1. † **2:6** 2:6 Tsia bhú Mik. 5:1.

de. Abhomu-o, u atsia agie lio agba o li kpadji koko.

*Malia ne Djodjefu akpe kpata bhú Edjipeto*

<sup>13</sup> Pita li obhulu imbilangu-o agbida lie, andjelu bini gba Ngámá-a akoto li Djodjefu bhú loto, ani atsia apa pi ani me: «Yie bhúlá, ha ndili-e ne 'hi e, amba mu kpe ne uo bhú Edjipeto. Du oo akólo li nedhinga inde ma agáma 'ngú pi mu lie-o. Padhá de, anga Elode agili ndili-e ngú nabholo ani.» <sup>14</sup> Sukpe-e, Djodjefu ayie bhúlá, ani aha ndili-e ne 'hi e, ani atsia akpe ne uo bhú Edjipeto. <sup>15</sup> Ani adu oo akolo li 'kpi li Elode akpi lie, ngubula me engú inde li Ebhe Ngámá apa nani e pi polofeta-a, amene lie. Ngámá apa nani pi opolofeta me: «Ma a'i ndili gba ma me ani koto bhú Edjipeto kokoto.†»

*Elode abhili ongisi na djedjedje*

<sup>16</sup> Li Elode au lie me obhulu imbilangu-o apite ni-e, ani abi 'gú naali. Abhomu-o, ani atsia aha líli me u nu bhú Beteleme di ne bhú ndu doto gba ni-e hana, amba u bhili ndu ongisi na djedjedje hana nayie bhú kalanga bhisi akò ne kuto. Ani aha líli bhomu-o nakpata lele kalanga inde li obhulu imbilangu-o aha e pi ani-o. <sup>17</sup> Abhomu-o, engú inde li polofeta Djelemi apa nani e, atsia amene lie. Djelemi apa nani me:

<sup>18</sup> «U adje eli bini bhú kuti na Lama, oegbá di ne omulopolo.

A ngaku 'gbá ongisi gba e bhomu-o Lasele. Ani kunda de me u yoko ni-e de, anga ndu ongisi gba ani-e hana amu.†»

*Djodjefu, ne Malia di ne Yesu agie lio bhú Nadjaleta*

*(Tsia bhú Luk. 2:39-40.)*

<sup>19</sup> Pita li Elode akpi lie-e, andjelu bini gba Ebhe Ngámá-a akoto li Djodjefu bhú loto bhú Edjipeto. <sup>20</sup> Ani atsia apa pi ani me: «Yie bhúlá, ha ndili-e ne 'hi e, yi holo kpadji, amba yi gie liyi ne uo bhú doto na Isalaele. Padhá de, anga okpála inde adu nako nakunda nabholo ndili-e

amu.» <sup>21</sup> Djodjefu ayie bhúlá, ani aha ndili-e ne 'hi e, ani atsia agie lie bhú doto na Isalaele. <sup>22</sup> Engú bini, ani adje la lie me Alikilausi ne 'ngbé ngámá bhú ndu doto na Yudaya bhú da 'dyi e Elode-e, ani atsia adje tsulu ngú nanu oo. Ebhe agbele matá 'dje ani bhú loto, ani atsia agie lie bhú ndu doto na Galilaya. <sup>23</sup> Ani anu asi kuti bhú gudhu na Nadjaleta, ngubula me engú inde li opolofeta apa nani e, amene lie. Opolofeta apa nani me: «U adú a'í ani me Kpála na Nadjaleta.»

### 3

*Djaa bhulu nabatisa okpála apa pi okpála me u dji bua o*

*(Tsia bhú Mlk. 1:2-6; ne bhú Luk. 3:1-6; di ne bhú Dja. 1:19-23.)*

<sup>1</sup> Bhú oekpi bhomu-o, Djaa bhulu nabatisa okpála akoto nani abhú mili bili na ndu doto na Yudaya. Ani adu atotobhila me: <sup>2</sup> «Yi dji bua yi, anga Nau na abhúlá akolo masikpe!» <sup>3</sup> Djaa nani ne kpála inde li polofeta Isaya akpokpo 'ngú gba e me:

«Kpála bini ngatotobhila bhú mili bili me: <Yi leke kpadji gba Ngámá-o.

Yi leke bua yi ngú nago ka ani-o.†»

<sup>4</sup> Djaa adu adyi bongo inde u adu e li su enu, ani adu agbite ekpu na kó 'nu ludu e. Ani atsia adu azu omakindolo di ne nadha eú. <sup>5</sup> Abhomu-o, okpála na Yelusalema di ne okpála na Yudaya libhomu ne obhende na ndu doto inde lingo ngade 'ngu na Djuludani libhomu adu ago nadje engú inde ani adu akpokpo e-o. <sup>6</sup> U adu ambamba ta osisiti 'ngú gba o-o kala ndu okpála hana. Djaa atsia adu abatisa uo bhú ngade 'ngu na Djuludani.

<sup>7</sup> Bhiti omuFalisai di ne oSadukai adu ago ngú nasia batisimo. Li Djaa au lie mo-o, ani atsia ayi uo me: «Ngayi opiga kpulu inde-e, a asuno pi yi da me yi kpe egú gba Ebhe inde ngago-o? <sup>8</sup> La-a, yi suno bhú okulu gba yi-e me yi adji bua yi adji, <sup>9</sup> amba yi 'o nabhundja li bhobua yi makpe me: <Engú li ya ade anga Abalahama ne ogbi ya.> Padhá de,

† 2:15 2:15 Tsia bhú Oz. 11:1. † 2:18 2:18 Tsia bhú Dglm. 31:15. † 3:3 3:3 Tsia bhú Isa. 40:3.

anga ma ngapa pi yi me, Ebhe ti da nagbe ongisi pi Abalahama bhú ká oteme yi ngau e inde-e mada yi. <sup>10</sup> 'E-e! Mbia inde-e, ngbakpa a'o lie bhú li 'dhú ondula-a ngubula nadodolo. Ndú ndula hana inde i li lílí na babadha de-e, u adé, u tsia bhíke bhú djua. <sup>11</sup> Ngama-a, ma ngabatisa yi bhú engu ngú nasuno me yi adjí bua yi adjí. Engú bini, kpála bhende i ngago pita ma-a, ane ma ne angu. Ma la ne mangua tetele kpála dho me ma gbe maləkə bhú 'dhú ani-e! Ngaani-e, ani abátisa yi ne Bu Bhobua di ne djua. <sup>12</sup> Ani aholo kakpa gba e sa 'kpa e ngú nape fufukudha bhú nguwa gba e amba ni bu nguwa bhú ngbokopi. Engú bini, fufukudha-a, ani atsúlu bhú djua inde na dūduma ne dūduma.»

*Yesu asia batisimo*

*(Tsia bhú Mlk. 1:9-11; ne bhú Luk. 3:21-22; di ne bhú Dja. 1:29-34.)*

<sup>13</sup> Abhomu-o, Yesu ayie bhú Galilaya, ani anu abhaka Djaa bhú ngade 'ngu na Djuludani ngú nasia batisimo ka ani. <sup>14</sup> Djaa di me yala. Ani atsia adu apa me: «Ma sia mangbo batisimo ka mu ngama. Mu ngago mata abhaka ma ngamu!» <sup>15</sup> Engú bini, Yesu atsia agie pi ani me: «Ziba me amene lie moko mbia inde. Padhá de, anga a ayo me ní mene ndu 'ngú hana inde li Ebhe ayo e ka ní-o.» Abhomu-o, Djaa atsia aziba me amene lie moko. <sup>16</sup> Li Yesu asia batisimo lie, ani atsia akoto bhú 'ngu-o. Me-e, kokpi abhulu lie. Ani atsia au Bu Bhobua gba Ebhe-e ngakə maka pidjo, a nde ngago pi ani. <sup>17</sup> Abhomu-o, eli bini atsia ayie abhúla ne napa me: «A inde-e ndili gba ma na mukunda-o. A ko kpukpu na bua ma.»

## 4

*Djabulu ale Yesu*

*(Tsia bhú Mlk. 1:12-13; di ne bhú Luk. 4:1-13.)*

<sup>1</sup> Abhomu-o, Bu Bhobua atsia amba bhúla Yesu abhú mili bili ngubula me djabulu le ani. <sup>2</sup> Pita namene ngbikpi

ndjikpa badha ne sukpe ndjikpa badha mandi nazu 'he-e, ani adje gumu. <sup>3</sup> Djabulu, kpála inde adjí ale ani-e atuto lie de ani. Ani atsia apa pi ani me: «I du me mu nde ne Ndili gba Ebhe-e, ha líli pi oteme inde-e me akolo mapa.» <sup>4</sup> Engú bini, Yesu agie me: «U aye bhú Bhuku me:

<Kpála kóbho bha bini ka ezú de, engú bini, ani akóbho ka ndu oeli hana inde i ngakoto bhú 'bhə Ebhe-o.†>»

<sup>5</sup> Abhomu-o, Djabulu aha ani, anu ne ani bhú Yelusalema, gudhu na bubu-o. Ani atsia a'o ani pi tulundji 'ngbé 'ti Ebhe gba omaYuda-o. <sup>6</sup> Do ani pi Yesu de me: «I du me mu nde ne ndili gba Ebhe-e, 'ulu mu kə kuto! Padhá de, anga u aye bhú Bhuku me:

<Ebhe ahá líli pi oandjelu gba e ngú mu.

U tsia bí mu sa 'kpa o

ngubula me mo otú 'dhú mu li teme bini de.†>»

<sup>7</sup> Yesu apa pi ani me: «U aye di bhú Bhuku gba Ebhe-e me: <Mo olé Ebhe, Ngámá gba mu-o de.†>» <sup>8</sup> Djabulu anu a'o mata ani pi 'ndjá eta na ndjándjá nane mane. Ani atsia apana pi ani ndu nau na doto hana bhú dabili bini ne sangu gba o-o. <sup>9</sup> Ani atsia apa pi ani me: «Ndu 'he inde-e hana, ma ahá pi mu i du me mu nde akikita lipuku mu kuto kala ma ngú nadhogə ma-o.» <sup>10</sup> Abhomu-o, Yesu atsia apa pi ani me: «Yie oo ko, Satana ! Padhá de, anga u aye bhú Bhuku me:

<Dhogə Ebhe 'ngbé Ngámá gba mu-o, amba mu yo la bhadi ani kpi e kpi.†>»

<sup>11</sup> Abhomu-o, Djabulu a'o ka ani. Me-e, oandjelu ago de ani, u atsia aholo nateteke ani.

*Yesu asuno bhú Galilaya*

*(Tsia bhú Mlk. 1:14-15; ne bhú Luk. 4:14-15; di ne bhú Dja. 4:1-3, 43-46.)*

<sup>12</sup> Li Yesu adje lie me u aholo Djaa-a,\* ani atsia agbe lie ne abhú ndu doto na Galilaya. <sup>13</sup> La-a, ani nu bhú kuti na Nadjaleta de, ani anu mangbo bhú Kapalanauma, denge ekpe na Galilaya,

† 4:4 4:4 Tsia bhú Det. 8:3. † 4:6 4:6 Tsia bhú Ets. 91:11-12. † 4:7 4:7 Tsia bhú Det. 6:16. † 4:10 4:10 Tsia bhú Det. 6:13. \* 4:12 4:12 Djaa: A ko Djaa bhende Bhulu nabatisa okpála-o.

bhú kúti gba okpála na Djabulona ne Nefitali. <sup>14</sup> Ani amene mo-o ngábula me engú nani li polofeta Isaya apa e amene lie. Engú nani ani apa e me:

<sup>15</sup> «Ngayi okpála na doto na Djabulona ne Nefitali,

ne yi okpála na kpadji na ekpø,

ne yi okpála na kúti inde ayi 'ngu na Djuludani,

inde akolo mbia inde-e okpála na Galilaya

inde li ogandji okpála ngadulú bhú e-e, yi dje nga engú inde!

<sup>16</sup> Ngayi okpála inde adúdu bhú biti má ndundulundu-o,

yi aú zi 'kpí na ngbéngbé na kuo kuo.

A akúnda napa me zi 'kpí ang-o akóto pi yi

okpála inde abedhe ndú 'kpí hana ne tsulú kuo-o.†»

<sup>17</sup> Nayie li nedhinga bhomu-o, Yesu aholo akpokpo mbámbá me: «Yi dji bua yi. Padhá de, anga Nau na abhúlá akolo masikpe.»

*Yesu a'i omukpata na gigena*

*(Tsia bhú Mlk. 1:16-20; ne bhú Luk. 5:1-11; di ne bhú Dja. 1:35-51.)*

<sup>18</sup> Li Yesu adu adhuku lie lingo ekpø na Galilaya-a, ani au obhosi bhisi me u nde ngagbe sungu. A adu ondaise. A adu Simo inde u agisila 'li e me Piele ne ndai e Andili. <sup>19</sup> Ani atsia apa pi uo me: «Yi go kpata ma, amba ma mene me yi du ibili nagili okpála pi Ebhe maka yi agbegbe osungu lie-o.» <sup>20</sup> Ma gala kolo me-e, u abala 'kpa li onado gba o-o, u atsia anu ne uo. <sup>21</sup> Yesu adyudyo matá lie ne kalanu, ani au obhosi koko bhisi, a adu Djaki ne uo ne ndai e Dja, ongisi gba Djebedayo-o. U adu bhú zabu gba o bhú dabili bini ne 'dyi o me u nde ngaleke onado gba o-o. Ani a'i uo me u go kpata ni. <sup>22</sup> Ma gala me-e, u a'o ka 'dyi o ne zabu gba o-o. U atsia anu ne uo.

*Yesu asuno pi okpála, ani atsia akobho di obhulu kuo*

*(Tsia bhú Mlk. 1:39; di ne bhú Luk. 4:44, 6:17-18.)*

† 4:16 4:15-16 Tsia bhú Isa. 8:23 - 9:1.

<sup>23</sup> Abhomu-o, Yesu adhuku bhú Galilaya libhому. Ani adu asuno bhú oeti nadje líli gba Moidje inde na ndu doto bhomu-o. Ani adu di akpokpo Bádha Ngali Nau na abhúlá-o. Ani atsia adu di akobho ndu okuo hana di ne ndu eze hana li okpála adu ne e-o. <sup>24</sup> Abhomu-o, ngali gba ani ayangba bhú ndu doto na Silia libhому. U atsia ago pi ani ne okpála inde adu ne okuo ngangá-a hana: obhende li ositi bua adu ato mbolo li o, obhende li kuo nagbulu magbulu adu amene o, ne obhende na eze. Ani atsia akobho uo. <sup>25</sup> Abhomu-o, okpála bhelé inde ayie bhú Galilaya, ne bhú ogudhu Ndjikpa, ne bhú Yelusalema, ne bhú Yudaya la di ne ayi 'ngu na Djuludani atsia akpata ani.

## 5

*Djali na kakulu*

*(Tsia bhú Mlk. 3:13; di ne bhú Luk. 6:12-13, 20-23.)*

<sup>1</sup> Li Yesu au bhiti okpála lie-e, ani a'u apí 'ta. Ani adu kuto, omukpata gba ani-e atsia adyudyo lio de ani. <sup>2</sup> Abhomu-o, ani aholo nasuno pi uo me:

<sup>3</sup> «A ko djali pi okpála inde ngau lio padhá kala Ebhe,

anga ngauo-o, Nau na abhúlá-a pi uo.

<sup>4</sup> A ko djali pi obhende ngaku 'gbá, anga ngauo-o, Ebhe akúo ngula sala uo ngae.

<sup>5</sup> A ko djali pi obhende na bhuku bua, anga ngauo-o, u agbógbo bhusu o li doto inde li Ebhe apana e pi uo-o.

<sup>6</sup> A ko djali pi obhende akúnda bha ndju namene ngbili 'ngú, anga ngauo-o, Ebhe améne me u du bedhe ngú namemene.

<sup>7</sup> A ko djali pi obhende ngadje ndjinga okpála koko, anga ngauo-o, Ebhe adjé ndjinga uo.

<sup>8</sup> A ko djali pi obhende bubu li bua o, anga ngauo-o, u aú Ebhe.

<sup>9</sup> A ko djali pi obhende ngato guo 'ngú sánda okpála, anga ngauo-o, u a'í uo me ongisi gba Ebhe.



10 A ko djali pi obhende u ngato mbolo li o ka anga u ngamene ngbili 'ngú, anga ngauo-o, Nau na abhúlá-a pi uo.  
 11 A ko djali pi yi i du me okpála nde ngasobho yi, u nde ngato mbolo li yi, u nde di ngapa ndu sisiti 'ngú li yi hana ne eu ka yi abhuka ma lie-o. 12 Yi mbila me, u ato bhadi nani mbolo li opolofeta na kalanu-o moko. Kaka-a, yi du bhú djali, amba yi du di bhú ndjili, anga makalá gba yi inde abhúlá-a adú ngbéngbé.»

*Yi ne ngutu di ne zi 'ke na píla doto*  
*(Tsia bhú Mlk. 9:50; di ne bhú Luk. 14:34-35.)*

13 «Ngayi-e, yi ne ngutu na píla doto. I du la me ngutu nde andapa-a, a akólo matá dédé lele pi? A matá li kulu ade. A ayo bha ibili nababala kilidjo, li okpála tsia dédele ne 'dhu o.

14 Ngayi-e, yi ne zi 'ke na píla doto. Gudhu inde ayiki lie pí eta-a, a awó lie belegu de bini. 15 U dhedhe eke-e, a ko ngú na'o'o asa lusa de. Engú bini, a ko ngú na'o'o apí misa ngubula me aziga ndu okpála inde abhú 'ti-e hana. 16 A bhadi pi yi moko. A ayo me zi yi suno lie bhú djila ndu okpála hana ngubula me u u babadha kulu gba yi-e, u de dhogé 'Dyi yi inde abhúlá-o.»

*Yesu go ngú nabhèlè líli gba Moidje-e de*

17 «Yi abhúndja de me ma ago ngú nabhèlè líli gba Moidje di ne me ma ago nabhèlè nasuno gba opolofeta-a\* de. Ma go ngú nabhèbhèlè de. Engú bini, ma ago mangbo ngubula nambamba tata hana. 18 Ma apa pi yi na paká me: abana li kokpí ne doto bhue bha pi-ie, ndu 'ngú hana inde bhú líli gba Moidje-e, améne lie. U búlu belegu mboye 'dhu balua, i du di-e mboye 'kpú balua bini bhúbhú de, nakolo bha li sokpí. 19 Kaka-a, kpála bhende i gumu mboye 'ngú bhú ká olíli gba Moidje-e, ani suno la di pi okpála koko namene mo-o, ani adú kpála na yeye bhú Nau na

abhúlá. Engú bini, kpála bhende i lila-a, ani nde di ngasusuno pi okpála koko-o, ani adú kpála na ngbéngbé bhú Nau na abhúlá. 20 Ma pa pi yi mo-o padhá de, anga li ngbili 'ngú gba yi-e du ngbéngbé nane bhende gba omusuno na líli gba Moidje ne omuFalisai-e mane de-e, yi ti da nali bhú Nau na abhúlá-a de.»

*Yesu asuno pindji nake 'ngú lío*  
*(Tsia bhú Mlk. 11:25; di ne bhú Luk. 12:57-59.)*

21 «Yi adje me u apa nani pi onguo ogbi yi me: <Mo obhólè kpála de. Kpála bhende i bhèlè kpála bhú gandji-e, a ayo me u gbe ani kala Libi okpála natsia 'kpí li 'ngú gba omaYuda .>† 22 Engú bini, ngama-a, ma ngapa pi yi me: kpála bhende i bi 'gú ne ndai e, a ayo me u gbe ani bhú tilibinale. Kpála bhende i pa pi ndai e me: <Mu ne ngingi>, a ayo nagbe ani kala Libi okpála natsia 'kpí li 'ngú gba omaYuda-o. Kpála bhende i sobho ndai e me: <Mu ne bhulu pele>, a ayo me u bhike ani bhú dé djua na duduma-o. 23 I du me mu nde adji naha makiso pi Ebhe li bili natsulu enu pi ani-e, i du la me mu nde abhundja me ni amene siti 'ngú li pabili gba ndai ni-e, 24 mu de 'o ka makiso gba mu-o kala bili natsulu enu-o oo, amba mu gie ngaiza limu nato guo 'ngú sunda yi ne ndai mu. Pipita la-a, mu go ha makiso gba mu-o pi Ebhe.

25 I du di me kpála nde akunda nagbe mu kala odjudji-e, yi de dje kolo liyi ne ani me yi nde nga bha li kpadji, ngubula nalila me kpála yi nde ne e bhú 'ngú-o agbe mu bhú tilibinale de, amba djudji a'í polisi de me ani to mu bhú tikpu-o de. 26 Ma apa pi mu na paká me, mu ti da nakoto oo padhá de i du me mu nde di mangimbo bhomu-o nakolo li senge na soso-o de ko.»

*Nasuno pindji nakunda bhoko, i du di-e elè koko*  
*(Tsia bhú Mat. 18:8-9; di ne bhú Mlk. 9:43, 47-48.)*

\* 5:17 5:17 Líli gba Moidje di ne onguú inde li opolofeta aye e, a ko Gandja na Didili-e libhomu. † 5:21 5:21 Tsia bhú Eki. 20:13; di ne bhú Det. 5:17. † 5:27 5:27 Tsia bhú Eki. 20:14; di ne bhú Det. 5:18.

<sup>27</sup> «Yi adje me u apa nani me: <Mo okúnda bhoko, i dɔ di-e ɔlɔ koko de.†>

<sup>28</sup> Engú bini, ngama-a, ma apa pi yi me: kpála bhende i tsia ɔlɔ koko ne gumu ani-e, kpála ango-o akúnda ɔlɔ ango-o li bhobua e akúnda.

<sup>29</sup> I dɔ me lí djila mu na kokpa nde ngato mu bhú siti 'ngú-o, mu de gbe, mu bhike de mu tsutsu. Padhá de, anga nakpi ka yá mu bini-e, a pi mu ndjindji ane me u bhike 'lá mu libhomu bhú djua na dɔdɔma. <sup>30</sup> I dɔ la di me 'kpa mu na kokpa nde ngato mu bhú siti 'ngú-o, mu de kodho, mu bhike de mu tsutsu. Padhá de, anga nakpi ka yá mu bini-e, a pi mu ndjindji ane me u bhike 'lá mu libhomu bhú djua na dɔdɔma.»

*Nasuno pindji nagbo bhusu o bhú kɔva*  
(Tsia bhú Mat. 19:7-9; ne bhú Mlk. 10:4-5; di ne bhú Luk. 16:18.)

<sup>31</sup> «U apa di nani me: <I dɔ me kpála bini nde agie wala e-e, a ayo me ani ye balua inde li ongámási adéle 'kpa o bhú e pi ani. Balua ango-o asúno ngae me ani atse ani atse.†> <sup>32</sup> Engú bini, ngama-a, ma apa pi yi me, kpála bhende i 'e wala e me ani nde holó ani ne bhoko koko de-e, ani ngakata ani bhú nakúnda bhoko koko. A akúnda napa me, kpála bhende i ha ɔlɔ inde li bhoko koko agie e, ani akúnda bhomu-o ɔlɔ gba kpála koko.»

*Nasuno pindji natu silika*

<sup>33</sup> «Yi adje matá nani me u apa pi onguo ogbi ní me: <Mo ogúlu silika mo otu e de. Engú bini, mene engú mo otu silika li e kala Ngámá-o.> <sup>34</sup> La ngama-a, ma apa pi yi me, yi atú silika belegu de bini: yi atú silika ne 'li kokpi de, anga a bhomu-o bili li Ebhe ngadu li e-o. <sup>35</sup> Yi atú silika ne 'li doto de, anga a ko bili inde ani nga'o 'dhu e li e ko. Yi atú silika ne 'li Yelusalema de, anga a ko gudhu gba Ebhe, 'Ngbé Ngámá. <sup>36</sup> Mo otú la di silika ne 'li 'ndji mu de, anga mu ti da nadjí lí sundjo mu bini de me akolo bubu, i dɔ di-e bibili-e de. <sup>37</sup> I dɔ me yi nde ngagama 'ngú-o, yi de pa bha me: <A moko>, di ne me <A mo-o ade.>

Padhá de, anga ndu ongu bhe pépé-e hana ayie ka Djabulu.»

*Nasuno pindji nagie siti pi siti*  
(Tsia bhú Luk. 6:29-30.)

<sup>38</sup> «Yi adje nani me u apa me: <Li kpála dɔ djila mu-o, mu de dɔ di djila ani>, u apa di me: <Li kpála gumu 'te mu-o, mu de gumu di 'te ani.†> <sup>39</sup> La ngama-a, ma apa pi yi me, i dɔ me kpála nde amene siti 'ngú li yi-e, yi agísila de. Engú bini, i dɔ me kpála bini nde asu pabhó mu na kokpa-a, mu de dji di pabhó mu na gali-e pi ani, amba ani su di. <sup>40</sup> I dɔ me kpála bini nde akúnda nagbe mu bhú ngbanga ngubula simisi gba mu-o, mu de 'o di ká koti gba mu-o pi ani. <sup>41</sup> I dɔ me kpála nde aholo mu ne kpéke me mu bi 'he gba ni-e ngubula kilometele bini-e, mu de bi bha ibili pi ani ngú kilometele bhisi. <sup>42</sup> I dɔ me kpála nde ayo 'he ka mu-o, mu de ha pi ani. I dɔ me kpála nde ayo bopulu ka mu-o, mu de ha pi ani. Mo oyála naha bopulu pi kpála inde akúnda nayoyo ka mu-o de.»

*Nasuno pindji nakúnda bhulu yala gba*  
O  
(Tsia bhú Luk. 6:27-28, 32-36.)

<sup>43</sup> «Yi adje me u apa nani me: <Kúnda kilí mu, amba mu yala bhulu yala gba mu-o.†> <sup>44</sup> Engú bini, ngama-a, ma apa pi yi me, yi kúnda obhulu yala gba yi ko. Yi yo Ebhe pi obhende ngato mbolo li yi-o. <sup>45</sup> Yi mene mo-o, yi dú ne kukulu ongisi gba 'Dyi yi inde abhúlá-o. Padhá de, anga ani ngagbe zindjila gba e pí osisiti okpála di ne pí obabadha okpála. Ani ngatuko ebha pí okpála na ngbingbili di ne pí obhende na ngbingbili ade ko. <sup>46</sup> Ma pa mo-o padhá de, anga i dɔ me yi nde ngakúnda bha obhende ngakúnda yi-e, yi asía tété mangua makalá dho? Ondombi na mandjandja bhadi ngamemene moko! <sup>47</sup> I dɔ la di me yi nde ngayi bha bini ondaise yi-e, yi ngamene bhomu-o mangua ngamba 'ngú dho? Omupagano bhadi ngamemene moko. <sup>48</sup> La ngayi-e, yi dɔ ngbingbili bhú ndu 'ngú hana maka li

† 5:31 5:31 Tsia bhú Det. 24:1. † 5:38 5:38 Tsia bhú Eki. 21:24; ne bhú Lev. 24:20; di ne bhú Det. 19:21.

† 5:43 5:43 Tsia bhú Lev. 19:18.

'Dyi yi inde abhúlá-a nde lie ngbingbili ko.»

## 6

*Nasuno pindji napu 'he pi obhulu ndibhili*

<sup>1</sup> «Yi lila liyi me yi améne bádha 'ngú gba yi-e kala okpála de me u u yi mau-o de. I du mo-o de-e, yi sía makalá ka 'Dyi yi inde abhúlá-a de. <sup>2</sup> Nedhinga inde mu ngapu 'he lie pi bhulu ndibhili-e, mo oméne de me ni bhi tété makpe maka li obhulu kali amemene lie bhú oti nadjé líli gba Moidje di ne li ohi kpadji-e de. U memene mo-o ngubula me okpála dhoge o. Ma apa pi yi na paká me u asia makalá gba o asia. <sup>3</sup> La pi mu-o, nedhinga mu ngapu 'he lie pi bhulu ndibhili-e, a ayo de me 'kpa mu na gali-e mbila ehe inde li 'kpa mu na kokpa ngamene e de. <sup>4</sup> A moko, a ayo me napu 'he gba mu-o tigala bhú pepe, amba 'Dyi mu inde ngau 'kpi bhú pepe-e gie pi mu ngae.»

*Nasuno pindji nayo Ebhe (Tsia bhú Luk. 11:2-4.)*

<sup>5</sup> «Nedhinga yi ngayo Ebhe lie, yi adú maka obhulu kali de. Padhá de, anga u kúkunda nayo Ebhe me u nde alu malu bhú oti nadjé líli gba Moidje di ne li odi-kpadji, amba okpála du au o mau. Ma apa pi yi na paká me u asia makalá gba o asia. <sup>6</sup> La pi mu-o, nedhinga mu ngayo Ebhe lie, a ayo me li bhú tina 'ti gba mu-o. Dho bhøbhø nganda mu madho, amba mu yo 'Dyi mu inde li bili na pepe bhomu-o. Abhomu-o, 'Dyi mu inde a uu 'kpi bhú pepe hana-a, tsia há makalá pi mu ngae. <sup>7</sup> Nedhinga yi ngayo Ebhe lie, yi agié liyi pí oeli bini bhutsibhutsi maka omupagano de. Padhá de, anga u ngabhundja me Ebhe adjé o i du me o nde ngakpokpo kambí oeli. <sup>8</sup> Yi améne maka uo de, anga 'Dyi yi mbila ehe yi nde ne gumu e hana kala me yi yo ka ani-o. <sup>9</sup> Ngayi-e, yi yoyo Ebhe me:

<'Dyi ya inde abhúlá,

a ayo me kpála ne kpála mbila me, mu ne Ebhe inde bubu.

<sup>10</sup> A ayo me mu go u ngamá píla doto.

A ayo me kpála ne kpála píla doto mene mukunda gba mu-o maka i ngamene lie lie abhúlá ko.

<sup>11</sup> Ha ezu inde ati ne ya li 'kpi na naki-e pi ya.

<sup>12</sup> 'E siti 'ngú gba ya inde ya amene e li pabili gba mu-o.

Padhá de, anga ngaya makpe ya ngambu di li obhende ngamene osisiti 'ngú li pabili gba ya-o.

<sup>13</sup> I du me ya nde ali bhú nale-e, mo o'ó de me ya mene siti 'ngú-o de. Engú bini, lila ya sakpa Djabulu malila.

[Padhá de, anga Nau ne angu la di ne sangu ,

a ko naamu 'he, duduma ne duduma. A adu moko.]>

<sup>14</sup> I du me yi nde ngambu li osisiti 'ngú gba okpála-a, 'Dyi yi inde abhúlá-a a'é bhadi osisiti 'ngú gba yi-e moko. <sup>15</sup> Engú bini, i du me yi nde mbu li osisiti 'ngú gba okpála de-e, 'Dyi yi 'é di osisiti 'ngú gba yi-e de.»

*Nasuno pindji natse 'zu ngú nayo Ebhe*

<sup>16</sup> «Nedhinga yi ngatse 'zu lie ngú nayo Ebhe-e, yi aná bhúla yi maka obhulu kali amemene lie de. U memene mo-o ngú nasuno pi okpála me o ngatse 'zu ngú nayo Ebhe. Ma apa pi yi na paká me u asia makalá gba o asia. <sup>17</sup> La pi mu-o, nedhinga mu ngatse 'zu lie ngú nayo Ebhe-e, vulu bhúla mu, amba mu pulu ne emu ndjindji, <sup>18</sup> amba okpála ambila de me mu ngatse 'zu-o de. 'Dyi mu inde ne ndu bili hana, abana bhú bili na pepe-e, mbila bha ngae kpi e kpi. Abhomu-o, 'Dyi mu inde a uu 'kpi bhú pepe hana-a, tsia há makalá pi mu ngae.»

*Yesu apa me yi po bhúla tia gba yi-e abhúlá*

*(Tsia bhú Luk. 12:33-34.)*

<sup>19</sup> «Yi apó bhúla tia pi yi píla doto inde-e de. Padhá de, anga yi po bhúla tia pi yi ei-e, opálanga ne mbelende síti, li obhulu 'zi dúdu pabu 'ti-e, u tsia zí. <sup>20</sup> Engú bini, yi po mangbo bhúla tia pi yi abhúlá. Padhá de, anga oo, opálanga ne mbelende ngú

nasisiti ade, obhulá 'zi di ngú nadudu pabu 'ti-e me u zi-e ade. <sup>21</sup> Padhá de, anga bili inde li tia gba mu nde lie, bua mu dú bhadi oko.»

*Djila kpála ne zi 'ké na kute ani  
(Tsia bhú Luk. 11:34-36.)*

<sup>22</sup> «Djila kpála ne zi 'ké na kute ani. I du me djila mu nde ndjindji-e, kute mu libhomu dú li zi 'kpí. <sup>23</sup> Engú bini, i du li djila mu ne kuo-o, kute mu libhomu dú bhú biti. I du me zi 'kpí inde mu ngabhundja me a bhú ni-e nde biti-e, biti ang-o né la matá dada mane.»

*Yi 'o bha nabhuka gba yi-e bhú Ebhe, yi a'ó bhú tia de  
(Tsia bhú Luk. 16:13.)*

<sup>24</sup> «Kpála bini ti da namene kulu pi ongámási bhisi de. A akúnda napa me, ani ú bhe bini-e padhá, ani tsia tsé ani, ani kúnda bhe koko-o, ani tsia dhíka li ani. Yi ti da nadu bali pi Ebhe ne pi tia\* bhú nedhinga bini de.

<sup>25</sup> Kaka-a, ma apa pi yi me, yi a'ó bua yi abhulá ngubula mukobho gba yi-e de. Yi adú akina liyi de me ya azú si ni, di ne me ya andjí si ni-ie de. Mukobho gba kpála ane ezú mane adi? Yi akina di liyi de me ya adyí si ni-ie de. Kute kpála ane bongo mane adi? <sup>26</sup> Yi tsia nga maka li odhu nde lie abhulá: u lulu 'dyi de, u gbegbe di nguwa abhiye de, u 'o'o la di 'he bhú ngbokopi de. Engú bini, 'Dyi yi inde abhulá-a ngaku uo! La ngayi-e, yi ane uo ne tata. <sup>27</sup> A ko da bhú ka yi ka nakina lie i ti da na'o mbo ekpí koko pi mukobho gba e?

<sup>28</sup> Ka ni la yi ngabhelo bua yi lie li 'ngú na bongo-o? Yi tsia nga maka li ofelele ngabhele lie abhiye: u memene kulu de, u dudu di bongo de. <sup>29</sup> Ma apa la pi yi me, abana 'ngbé ngámá Salomo bhú ká tia gba e hana-a, ani dyi belegu nani bongo maka suka uo de. <sup>30</sup> I du me Ebhe nde ngato bongo li ulu inde abhiye mo-o, ulu inde naki oo-o, inde u abhíke la mambi e bhú djua-a, ani méne pi yi ane mane di? Nabhuka gba yi-e yeye mo-o ka ni? <sup>31</sup> Ka

'ngú ang-o, yi akina liyi de me: <Ya azú ni? Ya andjí ni? Ya adyí li ya mangua bongo dho?> <sup>32</sup> Ndu ongú bhomu-o hana, omupagano ngagigili ngao. U gili ne ndala de. La-a, 'Dyi yi inde abhulá-a, mbila ndjindji me yi ne gumu ndu 'he bhomu-o hana. <sup>33</sup> Yi gili ngaiza Nau gba Ebhe-e bhú dabili bini ne namene ngbili 'ngú inde ani akúnda e-o. Pipita-a, li Ebhe tsia há di ndu oehe koko bhomu-o hana pi yi. <sup>34</sup> Kaka-a, bua yi angamba li 'ngú na mambi de. Mambi abhúndja 'ngú gba e ngae. A li ekpí bini ne bini ne likabhu inde ati ne e.»

## 7

*Yi akódho 'ngú gba okpála koko de  
(Tsia bhú Luk. 6:37-38, 41-42.)*

<sup>1</sup> «Yi akódho 'ngú gba okpála koko de, amba Ebhe akódho di engú gba yi-e de. <sup>2</sup> Padhá de, anga lele maka yi ngakodho 'ngú gba okpála koko lie, Ebhe akódho bhadi engú gba yi-e moko. La di-e, ani améne bhadi pi yi maka yi ngamemene lie pi okpála koko-o. <sup>3</sup> Ka ni mu ngau mboye ku musoli inde bhú djila ndai mu-o lie, mu nde u la pála ndula inde bhú djila mu-o de? <sup>4</sup> Lele pi mu ti da napa pi ndai mu lie me: <Djedjeke, ma go gbe ku musoli inde bhú djila mu bhomu-o>, me a nde bhú djila mu ne pála ndula-a? <sup>5</sup> Bhulá kali, gbe ngaiza pála ndula inde bhú djila mu-o, amba pipita-a, mu tsia ú la 'kpí ndjindji ngú nagbe mboye ku musoli inde bhú djila ndai mu ko.

<sup>6</sup> Yi ahá ehe na bubu gba Ebhe-e pi obulá de, anga i du mo-o de-e, u gó sisidha yi má tsue tsue! Yi abála omayaka gba yi na tia bhelé-e pi opame de, ngú nakpe me u anú adedele ne 'dhu o de.»

*Nazi 'ndji o bhú mayo  
(Tsia bhú Luk. 11:9-13.)*

<sup>7</sup> «Yi yo 'he, amba u ha pi yi. Yi gili 'he, amba yi sia. Yi bhi bhoti, amba u 'u pi yi. <sup>8</sup> Padhá de, anga kpála bhende ngayo 'he ngasisia. Kpála bhende ngagili 'he ngauu. Kpála bhende ngabhi bhoti-e, u nga'u'u pi

\* 6:24 6:24 Tia: Bhú eli na Giliki-e, u aye me «Mamo», a akúnda napa me na'o tia maka ebhe.

ani. <sup>9</sup> Bhú ká yi-e, a ko da inde i dũ me ndili gba ani-e nde ayo mapa ka ani-e, ani tsia há pi ani teme? <sup>10</sup> I dũ di-e me ndili nde ayo sungu ka 'dyi e, ani tsia há pi ani kpulu? <sup>11</sup> I dũ la me, ngayi okpála-kuti inde sisiti-e, yi nde ambila naha ohe na babadha pi ongisi gba yi-e, lele pi li 'Dyi yi inde abhúlá-a há ohe na babadha lie pi obhende ngayoyo ka ani-e de-e?»

*Líli na kúkulu*  
(*Tsia bhú Luk. 13:24.*)

<sup>12</sup> «Ndu 'ngú hana inde yi ngakunda me okpála mene e pi yi-e, yi mene di engú ang-o pi uo. A bhomu-o engú inde li líli gba Moidje apa e, la di ne ongú inde li opolofeta aye e-o.»

*Nasuno pindji okpadji bhisí kpikpiki*  
(*Tsia bhú Luk. 13:25-27.*)

<sup>13-14</sup> «Yi li li bhoti bhende na mbomboye ko! Padhá de, anga a ngato kpála bhú mukobho ngae. La-a, kpadji ang-o dada kpekpeke. Kaka-a, okpála ngali li kpadji ang-o bhelé ade. Yi alí li bhoti bhende na ngbéngbé-e de. Padhá de, anga a ngato kpála bhú ngita ngae. La-a, dada kpekpeke ade. Kaka-a, okpála bhelé ngagbida li kpadji ang-o-o.»

*Opolofeta na eu*  
(*Tsia bhú Luk. 6:43-44.*)

<sup>15</sup> «Yi lila liyi ka opolofeta na eu-o malila. Padhá de, anga u ngago agba yi me u nde adyi kó kandelø, engú bini, abhú uo-o, a ko onute. <sup>16</sup> Yi ambila uo li okulu gba o-o. U koko manga li ondula na eti de. U koko la di malibhombi li kobe de. <sup>17</sup> A moko, ndula na babadha ngali bhadi olílí na babadha. Engú bini, ndula na sisiti ngali bhadi olílí na sisiti. <sup>18</sup> Ndula na babadha ti da nali olílí na sisiti de, la di-e, ndula na sisiti ti da nali olílí na babadha de. <sup>19</sup> Ndu ndula hana inde i li líli na babadha de-e, u adé, u tsia bhike bhú djua. <sup>20</sup> A moko, yi ambila opolofeta na eu li okulu gba o-o.»

*Omukpata na kúkulu*  
(*Tsia bhú Luk. 13:25-27.*)

<sup>21</sup> «A ko de me okpála bhende ngapa muma me <Ngámá, Ngámá-a!> alí ndu o hana bhú Naũ na abhúlá-a de. Engú bini,

a alí bha bini ne obhende ngamene engú inde li 'Dyi ma inde abhúlá-a ngakunda e ko. <sup>22</sup> Li 'kpí nakodho 'ngú-o, okpála bhelé apá muma me: <Ngámá, Ngámá, ya mene nani kulu na polofeta ne 'li mu di? Ya pandja nani osisiti bua bhú okpála ne 'li mu di? Ya mene nani ongamba 'ngú bhelé ne 'li mu di?> <sup>23</sup> La-a, ma tsia gie pi uo me: <Ngayi obhulu namene siti 'ngú inde-e, ma mbila nani yi belegu de bini. Yi gbe liyi de ma tsutsu!>»

*Oeti bhisí*  
(*Tsia bhú Luk. 6:47-49.*)

<sup>24</sup> «A moko, ndu kpála hana inde adje eli inde ma apa e, ani atsia amene maka li eli ang-o apa lie, ani maka kpála na imbilangu inde a'o 'dhu 'ti gba e pí teme. <sup>25</sup> Ebha adhi, engu asi, anvi ago ne engu-o, a atsia atu lie li kute eti-o. La-a, eti-e ti de, anga odhudhu adu me a nde pí teme. <sup>26</sup> Engú bini, ndu kpála hana inde adje eli inde ma apa e, ani tsia mene maka li eli ang-o apa lie de-e, ani maka kpála bini na ngingi inde ayiki eti gba e pí sike. <sup>27</sup> Ebha adhi, engu asi, anvi ago ne engu-o, a atu lie li kute eti bhomu-o. Eti ang-o atuko kuto, a atsia atsambala hana!»

<sup>28</sup> Li Yesu andjia nakpo ongú bhomu-o lie, ndu okpála hana atsia angamba li nasuno gba ani-e naali. <sup>29</sup> Padhá de, anga ani dũ nasuno pi uo maka omusuno na líli gba uo-o de. Engú bini, ani adu asuno pi uo maka ngámá.

## 8

*Yesu akobho bhulu kába bini*  
(*Tsia bhú Mlk. 1:40-45; di ne bhú Luk. 5:12-16.*)

<sup>1</sup> Li Yesu akø eta-a lie, okpála bhelé atsia akpata ani. <sup>2</sup> Abhomu-o, bhulu kába bini adyudyo lie, ani atutu lipuku e kuto kala ani. Ani atsia apa me: «Ngámá, i dũ me mu nde akunda-a, mu ti da nakobho ma.» <sup>3</sup> Yesu ato 'kpa e, ani 'o li kute ani ne napa me: «Ma akunda moko, kokobho!» Ma 'li ma me-e, kába agulu bha kolo li ani hana. <sup>4</sup> Abhomu-o, Yesu atsia apa pi ani me: «Gbo dje mu, mo opa 'ngú inde-e pi kpála bini de. Engú bini, nu suno bha limu pi dimandø gba Ebhe, amba mu ha makiso

maka li líli gba Moidje apa lie ngubula nasuno pi okpála me mo okobho.\*»

*Yesu akobho kpála na kulu gba ngámá gba osudha na Loma (Tsia bhú Luk. 7:1-10; di ne bhú Dja. 4:43-54.)*

<sup>5</sup> Abhomu-o, Yesu ali bhú kúti na Kpalanauma. Aní adu ali lie oo, ngámá bini gba osudha na Loma† adyudyo lie de aní. Aní atsia akikiliki lie pi aní <sup>6</sup> me: «Ngámá, kpála na kulu gba ma-a asi kuto abhú 'ti. Aní agugumu kuto, aní ngadje likabhu na kuo kuo.» <sup>7</sup> Yesu apa pi aní me: «Ngama-a, ma adji akobho aní.» <sup>8</sup> Engú bini, ngámá gba osudha-a atsia agie me: «Ngámá, ma ne tetele kpála‡ ade, ngubula me mu li bhú 'ti gba ma-o. La-a, mu pa bha koli eli bini-e, li kpála na kulu gba ma-a kóbho. <sup>9</sup> Padhá de, anga ngama makpe-e, ma sa líli gba ngámá, ma la di ngaha líli pi osudha. Ma pa pi bhe bini-e me: «Nunu!» Aní nú. Ma pa pi bhe koko-o me: «Gogo!» Aní gó. Ma pa pi bali gba ma-a me: «Mene 'he inde!» Aní méne.»

<sup>10</sup> Li Yesu adje engú bhomu-o lie, aní angamba naali. Aní atsia apa pi okpála inde adu akpata aní-e me: «Ma apa pi yi na paká me, ma bhaka nga ngua nabhuka inde-e bhú kpála bini bhú ká omaɪsalaale de! <sup>11</sup> Ma atsia apa la di pi yi me: okpála bhelé ayie ne andjongu di ne akati, u tsia dúlu pí dabili na anokomia bhú dabili bini ne Abalahama, ne Isaka, la di ne Yakobho bhú Nau na abhúlá ko. <sup>12</sup> Engú la bini, obhende ayo nani me u sia dabili bhomu-o, u abála uo bhú biti akilidjo. Oo, u adu naku 'gbá di ne nazu tate o.» <sup>13</sup> Abhomu-o, Yesu atsia apa pi ngámá gba osudha-a me: «Gie limu agba mu! Maka mo obhuka lie, a ayo me amene lie pi mu moko.» Kpála na kulu-o atsia akobho bha bini li nedhinga ango-o ko.

\* **8:4** 8:4 Nasuno pi okpála me mo okobho: A ko nasuno me ni akpata líli gba Moidje ndjindji. Tsia bhú Lev. 14:2-32. † **8:5** 8:5 Ngámá bini gba osudha na Loma: Ngámá ango-o nani ne ngámá pí 'ndji osudha kámá bini. A adu nani maYuda de. ‡ **8:8** 8:8 Ngámá bhomu-o ambila nani ndjindji me líli gba omaYuda ziba de me maYuda bini li bhú 'ti gba kpála inde ne maYuda ade-e de. † **8:17** 8:17 Tsia bhú Isa. 53:4. § **8:22** 8:22 'O okpála koko u zi aní ngao: Bhú eli inde u aye nani Gandja na Mbia bhú e-e (eli gba oGiliki), u aye me: «'O okpála bhende amu-o, u zi okuo gba o-o.» A akunda napa me: «'O okpála bhende i bhuka nga de-e me u zi okpála bhende amu-o.»

*Yesu akobho 'hi wala Piele (Tsia bhú Mlk. 1:29-34; di ne bhú Luk. 4:38-41.)*

<sup>14</sup> Pipita-a, Yesu ali bhú 'ti gba Piele. Aní abhaka me 'hi wala aní nde asi kuto, kute aní nde kpákpá. <sup>15</sup> Yesu a'o 'kpa e li 'kpa aní, kute aní atsia aguo. Aní ayie bhúlá, aní atsia aholo nalu 'zu pi aní.

*Yesu akobho okpála bhelé*

<sup>16</sup> A akolo lie tagolo-o, u ago pi Yesu ne okpála bhelé inde li osisiti bua adu nadu bhú o-o. Aní apandja osisiti bua ango-o ne 'li e, aní atsia akobho di ndu okpála na kuo hana. <sup>17</sup> Aní amene mo-o ngubula me eli inde li polofeta Isaya apa nani e amene lie. Engú inde aní apa nani e me: «Aní abha ndu olikabhu gba ya hana, aní atsia abi ndu okuo gba ya hana li kute e.†»

*Líli pi okpála inde akunda nakpata Yesu*

*(Tsia bhú Luk. 9:57-62.)*

<sup>18</sup> Li Yesu au kambí okpála lie lingo e, aní atsia aha líli pi omukpata gba e me o kodho 'kpí ne ayi ekpe na Galilaya. <sup>19</sup> Abhomu-o, musuno bini na líli gba Moidje adyudyo lie, aní atsia apa pi Yesu me: «Musuno, ma akpáta mu li ndu bili mo onú li e hana.» <sup>20</sup> Yesu apa pi aní me: «A ka onekpø ne gudho u asisi bhú e, a di ka odhu ne 'ti o. Engú la bini, ngama Ndili gba kpála-a, dabili ka ma ngú nasi tété ngú naguo ade.» <sup>21</sup> Kpála koko inde adu di saka omukpata gba aní-e apa pi aní me: «Ngámá, ha kpadji muma, amba ma nu zi ngaiza 'dyi ma.» <sup>22</sup> Engú bini, Yesu apa pi aní me: «'O okpála koko u zi aní ngao.‡ La ngamu-o, go kpata ma.»

*Yesu ayoko anvi na kpekpeke*

*(Tsia bhú Mlk. 4:35-41; di ne bhú Luk. 8:22-25.)*

<sup>23</sup> Pipita-a, Yesu a'u bhú zabu, omukpata gba aní-e atsia a'u'u nganda

ani. <sup>24</sup> Ma gala kolo me-e, anvi bini na kpekpeke aholo nape pí ekpø-o masikpe de me zabu-o linda ka ngbo 'ngu-o. La ngaani Yesu-o, ani adu tila. <sup>25</sup> Abhomu-o, omukpata-a adyudyo lio de ani masikpe, u atsia azuku ani ne napa me: «Yaka! Ngamá, kobho ní, ní adjí amú!» <sup>26</sup> Yesu atsia agie pí uo me: «Yi ne tsulu mo-o ka ni? Nabhuka gba yi-e nga bha yeye!» Ani ayie bhúlá, ani ambe bhú 'ndji anvi di ne engu-o. Abhomu-o, ndundu hana atsia akolo guguo! <sup>27</sup> Okpála angamba, u atsia adu apa me: «Kpála inde-e, a ko mangua kpála dho ngubula me belegu anvi di ne engu du namanga ani-e!»

*Yesu akobho okpála bhisi li osisiti bua adu nadu bhú o-o*  
(Tsia bhú Mlk. 5:1-20; di ne bhú Luk. 8:26-39.)

<sup>28</sup> Li Yesu akolo lie ayi 'ngu, bhú doto gba okpála na Gadala-a,\* okpála bhisi ayie bhú ká olata, u atsia ago abhaka ani. A adu bhú okpála ango-o ne osisiti bua, u atsia adu azi 'gú naali. Kaka-a, okpála du apu li kpadji li pápá bhomu-o de. <sup>29</sup> Abhomu-o, u aholo nasusula me: «Mo okunda namene ngu ya pi, Ndili gba Ebhe? Mo ogo ei ngu nato mbolo li ya kalanu me nedhinga nakodho 'ngu-o nde kolo nga di?» <sup>30</sup> A abhaka me de bili ango-o, 'ngbé piga opame† nde oo, u nde ngazu 'he. <sup>31</sup> Osisiti bua adu nakikiliki lio pi Yesu me: «I du me mu nde akunda napandja ya-a, mba ya bhú piga opame inde.» <sup>32</sup> Ani apa pi uo me: «Yi nunu.» U aze bhú okpála bhomu, u atsia anu alili bhú opame-o. Me-e, ndu opame ango-o hana akø eta ne holo, u anu atuko bhú 'ngu má dhululu, ne namu ka o.

<sup>33</sup> Omulila gba uo atsi ne holo, u agbida bhú gudhu, u atsia akpokpo ndu 'ngu hana di ne engu inde akodho 'kpí li okpála bhisi inde adu ne osisiti bua bhú o-o. <sup>34</sup> Me-e, ndu okpála hana na gudhu ango-o anu ngu nabhaka Yesu. U au ani lie, u atsia akikiliki lio pi ani me ani yie bhú kuti gba o mayie.

\* **8:28** 8:28 Gadala: A ko nani gudhu ka omaYuda de. † **8:30** 8:30 Opame: Pi omaYuda-a, pame nani ne enu na sisiti. Kaka-a, u 'o nani uo de. A du bha nani na'o opame ne okpála inde naao ne omaYuda ade ko. Tsia bhú Mlk. 5:11.

## 9

*Yesu akobho kpála inde agugumu kuto*  
(Tsia bhú Mlk. 2:1-12; di ne bhú Luk. 5:17-26.)

<sup>1</sup> Pipita-a, Yesu a'u bhú zabu, ani agulu matá ekpø-o, ani atsia akolo bhú Kapalanauma, gudhu ani adu nadu bhú e-o. <sup>2</sup> Me-e, okpála ago pi ani ne bhoko bini inde agugumu kuto. U ago ne ani pí kalagba. Li Yesu au nabhuka gba uo lie, ani atsia apa pi kpála inde gugumu e bhomu-o me: «Atou, ndika ma, u a'e osisiti 'ngu gba mu-o a'e.» <sup>3</sup> Abhomu-o, omusuno koko na líli gba Moidje atsia apa li bua o me: «Kpála inde-e ngasobho Ebhe!»

<sup>4</sup> Li Yesu ambila mabhundja gba uo lie, ani atsia apa pi uo me: «Ka ni yi ngabhundja lie li bua yi sisiti mo-o? <sup>5</sup> Padhá de, anga ane ne bhuku ne bhedho? Ne napa me: <U a'e osisiti 'ngu gba mu a'e>, ne napa me: <yie bhúlá, dhudhuku?> <sup>6</sup> Ngu nasuno me ngama, Ndili gba kpála, ma ne angu píla doto ngu na'e osisiti 'ngu-o, a ayo me ma kobho bhoko inde.» Abhomu-o, ani atsia apa pi kpála inde agugumu-o me: «Yie bhúlá, ha kalagba gba mu, amba mu gie limu agba mu!» <sup>7</sup> Kpála ango-o ayie bhúlá, ani atsia atapa agba e. <sup>8</sup> Li okpála au 'ngu ango-o lie, a'o tsulu li uo naali, u adhogø Ebhe inde aha ngua angu bhomu-o pi okpálakuti-o.

*Yesu a'i Matié*  
(Tsia bhú Mlk. 2:13-17; di ne bhú Luk. 5:27-32.)

<sup>9</sup> Pipita-a, Yesu ayie oo. Ani adu akodho 'kpí lie, ani au kpála bini, a adu 'li ani me Matié. Ani adu me ani nde adu kuto bhú bilo inde u adu akala mandjandja bhú e-o. Ani apa pi ani me: «Kpata ma!» Matié ayie bhúlá, ani atsia akpata ani. <sup>10</sup> Pipita-a, Yesu anu nazu 'he abhú 'ti gba ani. Abhomu-o, bhiti ondombi na mandjandja di ne okpála koko na sisiti ago adulu nazu 'he bhú dabili bini ne Yesu di ne omukpata gba e-o. <sup>11</sup> Li omuFalaisai au

lie mo-o, u atsia ayi omukpata gba ani-e me: «Ka ni li musuno gba yi-e ngazũ 'he lie bhú dabili bini ne ondombi na mandjandja di ne okpála na sisiti-e?»<sup>12</sup> La-a, Yesu adje engú ango-o, ani atsia apa me: «Okpála bhende ne kuo ade-e, u ne gumu mutia ade. Engú bini, okpála bhende ne kuo mangbo ne gumu mutia ngao. <sup>13</sup> Kaka-a, yi nu gili ta 'ngú inde li Bhuku gba Ebhe-e apa e me: «Engú inde anga li ma naali-e, a ko nadjé ndjinga okpála koko, a ko naha makiso de.» Padhá de, anga ma go na'i okpála bhende apa me o ngbingbili-e de. Engú bini, ma ago mangbo na'i okpála bhende au lio me o ne osisiti okpála-o.†»

*Yesu apa me u amáta nasuno gba ni-e ne nasuno koko de*

*(Tsia bhú Mlk. 2:18-22; di ne bhú Luk. 5:33-39.)*

<sup>14</sup> Ekpí bini, omukpata gba Djaa bhulu nabatisa okpála adyudyo lio de Yesu, u atsia ayi ani me: «Ka ni li ngaya ne omuFalisai, ya ngatse 'zu lie gome ngú nayo Ebhe-e, la-a, omukpata gba mu-o ngamemene mo-o ade-e?»<sup>15</sup> Yesu atsia agie pi uo me: «Okpála bhende u a'i o bhú anokomia na kava ti da nayala nazũ 'he uu me 'ko elo-o nde ngabha bhú dabili bini ne uo-o? Engú bini, oekpi akólo makolo, ekpi inde u a'é 'ko elo-o lie bhú ká uo-o, li oekpi bhomu-o, u tsia tsé 'zu.»

<sup>16</sup> Kpála bini ti da nandu pála bongo na mbia li bhe na didili de. Padhá de, anga pápála bhende u a'o e pépé-e sídha bongo-o, li kaka-a tsia dú la matá sisiti naali.

<sup>17</sup> U 'o'o pandi na mbia bhú odidili dhudhu na kó 'nu de. I du mo-o, li odhudhu-o úpa, li pandi-e túko, li odhudhu-o tsia síti di. U 'o'o mangbo pandi na mbia bhú odhudhu na mbia. Abhomu-o, ndundu hana tsia líla lie ndjindji.»

*Yesu akobho elo bini, ani atsia azuku di ndili na eole gba Yailo*

*(Tsia bhú Mlk. 5:21-43; di ne bhú Luk. 8:40-56.)*

† 9:13 9:13 Tsia bhú Oz. 6:6.

<sup>18</sup> Li Yesu adu agie 'ngú pi omukpata gba Djaa lie, ngamá bini adyudyo lie de ani masikpe, ani atutu lipuku e kuto kala ani. Ani atsia apa pi ani me: «Ndili gba ma na eole-o andjili mbia inde. Engú bini, go 'o 'kpa mu pi ani, amba ani zuku.»<sup>19</sup> Abhomu-o Yesu ayie bhúla, ani atsia akpata ani bhú dabili bini ne omukpata gba e-o.

<sup>20</sup> Bha li nedhinga bhomu-o, elo bini inde li ngute adu natuko lie ngubula kalanga ndjikpa ne ká bhisi-e ago de Yesu ne akele ani, ani atsia abu 'kpa e li 'so bongo gba ani-o. <sup>21</sup> Padhá de, anga ani adu apa li bua e me: «I du bha me ma nde abu 'kpa ma li bongo gba ani-e, ma kóbho.»<sup>22</sup> Engú bini, Yesu adji lie, ani au ani, ani atsia apa me: «Atou, ndika ma! Nabhuka gba mu-o akobho mu akobho.» Bha li nedhinga bhomu-o, elo ango-o atsia akobho.

<sup>23</sup> Yesu akolo agba ngamá-o. Ani abhaka me okpála nde má dja dja dja ngú nanu azi kuo-o, omavulu mbála-a nde nga'u mbála. <sup>24</sup> Abhomu-o, ani atsia apa me: «Yi gbe liyi ne sidi, anga ndili na eole inde-e kpi de, engú bini, ani ngala.» Abhomu-o, u aholo namu ani. <sup>25</sup> Li u apandja ndu okpála hana lie kilidjo-o, Yesu ali abhú 'ti. Ani aha 'kpa ndili-o. Abhomu-o, ndili-e atsia ayie bhúla. <sup>26</sup> Ngali na engú ango-o atsia ayangba bhú ndu doto bhomu-o libhomu.

*Yesu akobho okpála bhisi inde i u 'kpi de*

<sup>27</sup> Li Yesu aholo 'nú lie, okpála bhisi inde i u 'kpi de-e, aholo akpata ani ne nasusula me: «Ndili gba Davidi, dje ndjinga ya!»<sup>28</sup> Ani ali lie abhú 'ti-e, okpála bhisi inde i u 'kpi de bhomu-o adyudyo lio de ani. Yesu atsia ayi uo me: «Yi abhuka me ma ti da nateteke yi?» U agie pi ani me: «Hení, Ngamá.»<sup>29</sup> Abhomu-o, ani abu 'kpa e li djila uo ne napa me: «A ayo me amene lie pi yi maka nabhuka gba yi-e nde lie ko.»<sup>30</sup> Abhomu-o, djila uo abhulu, Yesu atsia agbele 'dje uo kpekpeke me: «Yi gbo 'dje yi! A ayo de me kpála bini mbila engú inde-e de!»<sup>31</sup> Engú bini, bha



naze ka uo me-e, u apandjala ngali gba ani-e bhú ndu doto ango-o libhomu.

*Yesu akobho kpála bini inde i bhú 'ngú de*

<sup>32</sup> Nedhinga li okpála bhisi inde li Yesu akobho o bhomu-o adu nanu lie, bha li nedhinga bhomu-o, okpála ago pi Yesu ne kpála bini inde i bhú 'ngú de ka siti bua inde adu nadu bhú ani-o. <sup>33</sup> Li Yesu agbe siti bua ango-o lie bhú ani-e, kpála ango-o atsia aholo nagama 'ngú. Abhomu-o, kambì okpála angamba, u atsia adu napa me: «Nguwa 'ngú inde-e u nga lie bhú ká omafosalaele belegu de bini!» <sup>34</sup> La-a, omuFalisai adu napa me: «Ngámá gba osisiti bua ngaha angu pi ani ngú napandja osisiti bua ngae bha-a!»

*Yesu adje ndjinga kambì okpála*

<sup>35</sup> Abhomu-o, Yesu adu adholo bhú ndu ogudhu di ne bhú ndu okuti hana. Ani adu nasuno bhú oeti nadje líli gba Moidje . Ani adu akpokpo Bádha Ngali Nau gba Ebhe , ani atsia adu nakobho ndu kuo hana di ne ndu oeze hana. <sup>36</sup> Li ani au kambì okpála lie, ani adje ndjinga uo naali, anga u adu me u nde andala, angu uo nde la di andjia maka piga okandole inde li mulila nde ka o ade. <sup>37</sup> Abhomu-o, ani atsia apa pi omukpata gba e me: «Nguwa abhiye-e bhelé, engú la bini, okpála na kulu-o bhelé ade. <sup>38</sup> Yi yo ka bhulu 'dyi-e me ani tima okpála na kulu bhú edyi gba e ngú na'e nguwa-o.»

## 10

*Yesu atima omukpata ndjikpa ne ká bhisi gba e-o*

*(Tsia bhú Mlk. 3:13-19; di ne bhú Luk. 6:12-16.)*

<sup>1</sup> Pipita-a, Yesu a'i omukpata ndjikpa ne ká bhisi gba e-o. Ani aha angu pi uo ngú napandja osisiti bua bhú okpála, di ne nakobho ndu okuo hana, la di ne ndu oeze hana. <sup>2</sup> A inde-e 'li obhulu titima ndjikpa ne ká bhisi-o: kpála na kalanu-o, a ko Simo inde li Yesu agisila 'li e me Piele, ne uo ne ndai e Andili, a la di-e ongisi bhisi gba Djebedayo-o. A adu nani Djaki

ne uo ne ndai e Djaa , <sup>3</sup> a la di-e Filipo ne uo ne Batelemi; a la di-e Tuma ne uo ne Matié, ndombi na mandjandja-o; a la di-e Tade ne uo ne Djaki, ndili gba Alafayo-o; <sup>4</sup> a la di-e Simo kpála na Kanana ngauo ne Yuda Isikalote. Simo nani ne suka omaYuda inde adu agili ne kpéke me o ze bhú bali sa kpa okpála na Loma zeze-o. Yuda Isikalote nani ne kpála inde apú ngbángá Yesu pi obhulu yala-o.

<sup>5</sup> Abhomu-o, Yesu atima obhulu titima ndjikpa ne ká bhisi bhomu-o. Ani atsia aha olili inde-e pi uo me: «Yi adji-e, yi anú agba okpála inde ne omaYuda ade-e de. Yi alí di bhú ogudhu gba okpála na Samalia de. <sup>6</sup> Engú bini, yi nu mangbo agba omafosalaele. Padhá de, anga uo maka okandole inde angita. <sup>7</sup> Li kpadji-e, yi kpokpo Bádha Ngali gba Ebhe-o. Yi pa pi okpála me: «Nau na abhúlá akolo masikpe!» <sup>8</sup> Yi kobho okpála na kuo, yi zuku okpála inde amu, yi kobho obhulu kába, yi pandja osisiti bua bhú okpála. Yi asia padhá, yi ha bhadi pi okpála koko padhá.\* <sup>9</sup> Yi ahá belegu ku li falanga de bini. <sup>10</sup> Yi ahá gonia ngú enú-o de. Yi ahá bongo na mbulu bhisi de, yi nu bha ne koli maloké inde bhú 'dhu yi ko, yi ahá ndula de. Padhá de, anga okpála inde yi adji amene kulu bhú ká o-o abí mukobho gba yi-e ngao.

<sup>11</sup> Yi li bhú gudhu bini, i du di-e bhú kuti bini-e, yi de gili kpála inde bedhe ngú nasia yi, amba yi du gba kpála ango-o akólo bhú nayie ka yi ko. <sup>12</sup> Yi li bhú eti bini-e, yi de yi okpála inde bhú 'ti ango-o mayi. <sup>13</sup> I du me okpála na eti ango-o nde asia yi-e, guo 'ngú yi adhuku ne e de du ne uo. Engú bini, i du la me okpála ango-o nde sia yi de-e, guo 'ngú gba yi-e de gie lie pi yi. <sup>14</sup> I du me u nde sia yi de-e, u dje la di 'li yi de-e, nedhinga inde yi ngakoto lie bhú 'ti ango-o, i du di-e bhú gudhu ango-o, yi de dyiki ndju doto na 'dhu yi ngú nasuno pi uo me yi atse uo atse. <sup>15</sup> Ma apa pi yi na paká me, li 'kpi nakodho 'ngú-o, okpála na gudhu

\* **10:8** 10:8 Li bili inde-e, Yesu ngakpokpo 'ngú bhomu-o pindji angu inde ani aha e pi obhulu titima gba e ngubula nateteke okpála-o.

ango-o asía likabhū kpekpeke ané okpála na Sodomu ne Gomolo mane.»

*Okpekpeke da 'ngú inde akólo lí omukpata gba Yesu*

*(Tsia bhú Mlk. 13:9-13; di ne bhú Luk. 21:12-17.)*

<sup>16</sup> «Yi gbo nga 'dje yi! Ngama-a, ma ngatima yi maka okandələ bhú ká onute. 'E-e! Yi alá-a de, amba yi dū di ne bhuku bua maka opidjo. <sup>17</sup> Yi lila liyi ka okpála ndjindji. Padhá de, anga u ambá yi bhú otilibinali, u tsia bhí yi ne fimbo bhú oti gba o nadjé líli gba Moidje-o. <sup>18</sup> U anú ne yi kala ongámási na ndu doto di ne kala ongbengbe ongámási anga yi abhuka ma. A améne lie mo-o ngubula me yi kpokpo 'ngú gba ma-a kala uo di ne kala okpála inde ne omaYuda ade-o. <sup>19</sup> Nedhinga u anú ne yi lie kala okpála ango-o, yi akína liyi lí 'ngú inde yi apá e de, di ne lele maka yi ayípa 'ngú lí 'ngú ango-o lie de. Ongú inde a ayo me yi pa e, a ahá bha lie pi yi lí nedhinga ango-o. <sup>20</sup> Padhá de, anga engú inde yi agáma e yíe ka yi de. Engú bini, Bua gba 'Dyi yi-e agáma 'ngú bhú yi ngae.

<sup>21</sup> Okpála apú ondaise o me u bhili uo. 'Dyi ndili apú ndili gba e me u bhələ aní. Ongisi akólo ne kpekpeke 'ndji pi okpála inde azu o, u tsia pú okpála azu o me u bhili uo. <sup>22</sup> Ndu okpála hana ayála yi ka 'li ma. Engú bini, kpála bhende akíbila nakolo bha bini makolo alí soso-o, aní tsia kóbho. <sup>23</sup> U mene yi sisiti bhú gudhu bini-e, yi de kpe bhú gudhu koko. Ma apa la pi yi na paká me yi ndjía nadhuku bhú ogudhu na Isalaele hana de me Ndili gba kpála nde go de-e de.

<sup>24</sup> Yi mbila ndjindji me mukpata ne musuno gba e ne engbé de, kpála na kulu ne di ngámá na kulu gba e ne engbé de. <sup>25</sup> A ayo me mukpata kolo maka musuno gba e-o. A ayo di me kpála na kulu kolo maka ngámá na kulu gba e-o. † dū me u nde nga'í bhulu eti-e me Baladjebula-a,† u a'í la ibili okpála na eti gba aní-e pi!

<sup>26-27</sup> Kaka-a, yi akpé okpála inde améne yi sisiti-e de! Engú inde ma apa e pi yi bhú

biti-e, yi pa ibili ne ngbikpi. Engú inde u apa e pi yi bhú tūpele-e, yi totobhila ibili ne di apí ongbuti. Padhá de, anga ndu 'he inde awo lie mawo-o hana akóto bhú mbasu, la di-e, ndu 'he inde na pepe hana ambíla lie mambíla. <sup>28</sup> Yi akpé obhende ngabhələ kute yi, inde i ti da nabhələ bua yi de-e de. Yi kpe mangbo Ebhe inde i ti da nabhələ bua yi, la di ne kute yi libhomu bhú djua na duduama ko. <sup>29</sup> Li mu tsindji oindjilindjili bhisi-e, mo osía tété mangua tetele tia dho? La-a, suka uo bini kpí padhá de me 'Dyi yi Ebhe nde ziba de-e de. <sup>30</sup> La pi yi-e, Ebhe atanga belegu osundjo yi hana. <sup>31</sup> Kaka-a, yi akpé ehe bini de. Ngayi-e, abana u po bha bhúla oindjilindjili bhelé-e, yi ane uo ne tata.

<sup>32</sup> Li kpála bini pa bhú ká djila okpála me ni ne kpála ka ma-a, ngama-a, ma apá bhadi bhú djila 'Dyi ma inde abhúla-a me a ko naama kpála. <sup>33</sup> Engú bini, li kpála bini pa bhú ká djila okpála me ni ne kpála ka ma ade-e, ngama-a, ma apá bhadi bhú djila 'Dyi ma inde abhúla me a ko naama kpála de.»

*Yesu ago nato egú sūnda okpála*

*(Tsia bhú Luk. 12:51-53, 14:26-27.)*

<sup>34</sup> «Yi abhúndja de me ma ago ngú na'oguo 'ngú píla doto de. Ma go ngú na'oguo 'ngú de, engú bini, ma ago mangbo ngú nagbogbo bhusu okpála. <sup>35</sup> A moko, ma ago nagbogbo bhusu kpála ne 'dyi e. Ma ago nagbogbo bhusu ndili na əələ ne 'hi e.

Ma ago nagbogbo bhusu ələ gba ndili-e ne ogbi e na əələ.

<sup>36</sup> Kaka-a, obhulu yala gba kpála adú bha okpála na abhú 'ti gba aní ko.†

<sup>37</sup> Kpála bhende ngakunda 'dyi e, i dū di-e 'hi e ane ma mane-e, kpála ango-o ti ne ma de. La di-e, kpála bhende ngakunda ndili na bhobhoko gba e, i dū di-e ndili na əələ gba e ane ma mane-e, kpála ango-o ti ne ma de. <sup>38</sup> Kpála bhende i bi kulusi gba e‡ de, i tsia kpata ma de-e, kpála ango-o ti ne ma de. <sup>39</sup> Kpála bhende alíla mukobho gba e-e, aní kpí.

† 10:25 10:25 Baladjebula: A bhomu-o suka 'ili gba Djabulu. † 10:36 10:35-36 Tsia bhú Mik. 7:6. ‡ 10:38 10:38 Nabí kulusi gba e: A ko nazíba nazu likabhū di ne nakpi kabula Yesu.

Engú bini, kpála bhende atsé la mukobho gba e ngubula ma-a, ani sía mukobho na kukulu.»

*Makalá gba kpála inde asía omukpata gba Yesu*

*(Tsia bhú Mlk. 9:41.)*

<sup>40</sup> «Kpála bhende asia yi-e, ani asia bhomu-o ma. La di-e, kpála bhende asia ma-a, ani asia bhomu-o kpála bhende atima ma ko. <sup>41</sup> Kpála bhende asia polofeta anga a ko polofeta-a, ani asía makalá inde ati ne opolofeta. La di-e, kpála bhende asia kpála na ngbingbili anga a ko kpála na ngbingbili-e, ani asía makalá inde ati ne okpála na ngbingbili-o. <sup>42</sup> Ma apa pi yi na paká me kpála bhende ahá ngabha kópo kpina 'ngu bini pi suka okpála inde li okpála ngau o padhá inde-e anga a ko mukpata gba ma-a, kpála ango-o asía makalá gba e masia.»

## 11

<sup>1</sup> Li Yesu andjia naha olíli bhomu-o lie pi omukpata gba e ndjikpa ne ká bhisi-e, ani ayie oo. Ani atsia anu ngú nasuno di ne nakpokpo eli gba Ebhe-e bhú ogudhu na ndu doto na Galilaya.

*Djaa bhulu nabatisa okpála atima okpála nayi 'ngú pindji Yesu*

<sup>2</sup> Li Djaa bhulu nabatisa okpála adu lie bhú tikpu-o, ani adje ngali okulu li Kilisito adu amene e-o. Abhomu-o, ani atsia atima omukpata gba e <sup>3</sup> me u nu yi ani me: «Mu ne Masiya inde ayo me Ebhe tima e? Ne me ayo me ya adjeke kpála koko?» <sup>4</sup> Yesu agie pi uo me: «Yi nu kpokpo engú inde yi ngadje e ne bhende yi ngau e pi Djaa: <sup>5</sup> okpála i u 'kpí de-e ngau 'kpí, obhende ne eze li 'dhu o-o ngadhuku ndjindji, obhulu kába ngakobho, obhende i dje 'kpí de-e, la di ngadje 'kpí, obhende amu-o ngazuku, okpála bhende ngau lio padhá kala Ebhe-e la di ngadje Bádha Ngali . <sup>6</sup> A ko djali pi kpála inde li engú gba ma-a bhólo nabhuka gba e mabhelo de ko.»

† 11:10 11:10 Tsia bhú Mal. 3:1.

*Yesu akpokpo 'ngú pindji Djaa bhulu nabatisa okpála*

*(Tsia bhú Luk. 7:18-35.)*

<sup>7</sup> Li omukpata gba Djaa aholo 'nú lie, Yesu atsia aholo nakpokpo 'ngú li 'ngú gba Djaa pi kambí okpála inde adu oo me: «Yi anu igini natsia abhú mili bili-e ni? Yi anu igini natsia mbamba inde li anvi ngadyiki e? A mo-o ade. <sup>8</sup> I du mo-o de-e, yi anu nga igini natsia ni? Yi anu igini natsia kpála inde adyi babadha bongo-o? La-a, okpála bhende adyidi obabadha bongo-o, u dudu bhú oeti gba ongbengbe ongámási. <sup>9</sup> Yi anu nga la igini natsia ni? Yi anu igini natsia polofeta? A moko. Ma apa pi yi me, yi anu igini natsia kpála inde ane belegu polofeta mane. <sup>10</sup> Padhá de, anga a ko kpála inde li Bhuku gba Ebhe-e apa nani li 'ngú gba e me:

«Ebhe apa me, ma ngatima bhulu titima gba ma-a pi mu kalanu ngú naleke kpadji pi mu.»†

<sup>11</sup> Ngama-a, ma apa pi yi na paká me, bhú ká okpála-kuti-e, kpála bini inde akoto, inde ngbéngbé ane Djaa bhulu nabatisa okpála belegu ade bini. La-a, ndu okpála hana inde aziba Nau na abhúlá-a , abana ani du bha mbomboye pi-ie, ani ane Djaa ne engbé.

<sup>12-14</sup> Padhá de, anga ndu opolofeta hana di ne líli gba Moidje akpokpo ngali Nau na abhúlá nakolo makolo li nedhinga gba Djaa-o. I du me yi nde akunda naziba engú ma apa e, Djaa ne Eliya inde a ayo nani me ani go-o ngae. Nayie bhú nedhinga gba Djaa bhulu nabatisa okpála akolo pi mbia inde-e, Nau na abhúlá bhú gbene. La di-e, omangopu ngamene ne kpéke hana me o siti masiti. <sup>15</sup> A ayo me kpála inde li e ne djedje ngú nadjé 'kpí-e djedje!

<sup>16</sup> Ma tí da nasuno okpála na naki inde-e li da? Uo maka ongisi inde adulu bhú mbadhasu.

<sup>17</sup> Okoko nga'u mbálá na ebi pi obi o, engú bini, obhe u a'u mbálá ango-o pi o ayala nadho 'bi!

U ali matá etsi na da kuo pi uo,

engú bini, u ayala naku 'gbá!  
 18 Yi maka ongisi inde ayala nadho 'bi di ne naku 'gbá bhomu. Padhá de, anga a maka li Djaa ago nani lie-o. Aní ago maka kpála inde bhú dá kuo. Aní zu 'he de, aní ndji di vino de, yi atsia apa me: <A bhú aní ne siti bua !> 19 Ndili gba kpála ago di. Aní ago maka kpála inde bhú dá 'bi. Aní azu 'he, aní andji di vino, do yi de me: <Yi tsia nga kpála inde. Aní bha bini ngabhundja nazu 'he ne nandji vino! A ko olia ondombi na mandjandja, di ne okpála na sisiti!> Engú bini, bhú natsia nganda okulu gba Ebhe-e, a ngasuno pi yi me imbilangu gba aní-e ngbingbili.»

*Okpála na ogudhu gba omaYuda inde ayala nadi bua o*  
*(Tsia bhú Luk. 10:13-15.)*

20 Abhomu-o, Yesu aholo nagama 'ngú ne ndje djila pi okpála na ogudhu inde aní amene nani ongamba 'ngú gba e bhelé bhú e-o. Padhá de, anga okpála ango-o dji nani bua o de. 21 Aní adu apa me: «A ko likabhu pi yi, okpála na gudhu na Koladjina! A ko likabhu pi yi, okpála na gudhu na Betesaida! Padhá de, anga ma amene ongamba 'ngú bhelé bhú ogudhu gba yi-o. Engú bini, yi dji bua yi de. La-a, ma méne nani ongamba 'ngú bhomu-o bhú ogudhu na Tile ne Sidona-a,\* okpála na ogudhu ango-o de adyi nani gonia, u túko embi bhú 'ndji o didili naali, u tsia dji bua o. 22 A moko. Ma apa pi yi me, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Tile ne Sidona mane.

23 Ne yi di, okpála na gudhu na Kapalanauma, yi abhundja naayi me u a'é'e yi akolo abhúla-a? A mo-o ade. U aké yi ne kuto, akólo bha bini li bilí gba okpála inde amu. Padhá de, anga ma amene ongamba 'ngú bhelé bhú gudhu gba yi-o. Engú bini, yi dji bua yi de. La-a, ma méne nani ongamba 'ngú bhomu-o bhú gudhu na Sodomu-o, gudhu ango-o de nga bha bhúka, nakolo pi naki. 24 Kaka-a, ma apa pi yi me, li 'kpí li Ebhe akódho 'ngú gba

okpála lie, likabhu gba yi-e ané bhende gba okpála na Sodomu mane.»

*Ako djali pi okpála inde ngau lio padhá kala Ebhe*

*(Tsia bhú Luk. 10:21-22.)*

25 Bhú nedhinga bhomu-o, Yesu atsia apa me: «Ma ngadhogo mu, 'Dyi ma, Ngámá na abhúla ne Ngámá na doto. Padhá de, anga engú inde mo owo e pi okpála inde ngabhundja me a bhú 'ndji o ne imbilangu-o, mo ombamba tata pi obhende ngau lio me o ne okpála na padhá kala mu! 26 A moko, 'Dyi ma, anga bhú bádha bhú 'bu gba mu-o, mo okunda bha nani me a adu moko.

27 Yi mbila ndjindji me 'Dyi ma asuno ndu 'ngú hana mama. Kpála bini mbila Ndili-e de, bha bini 'Dyi Ndili-o. Kpála bini mbila la di 'Dyi Ndili-e de, bha bini Ndili gba aní-o, a la di-e kpála bhende li Ndili-e akunda nasuno aní pi e ko.

28 Yi andala ka okpekpeke líli di ne okpekpeke da 'ngú inde u ngabu e pí yi-o. Mbia inde-e, yi go bhaka ma, ma 'e pí yi ma'e, amba ma ha naguo pi yi. 29 Yi mene olíli gba ma-o, amba yi 'o me ma suno engú pi yi. Padhá de, anga ma súno pi yi ne bhuku bua di ne na'o lima ne kuto. Yi mene mo-o, yi tsia sía naguo pi yi makpe. 30 A moko, da namene ongú inde ma akunda e di ne olíli gba ma-a kpekpeke ade.»

## 12

*Yesu ne ngámá pí 'ndji ekpí naguo gba omaYuda*

*(Tsia bhú Mlk. 2:23-28; di ne bhú Luk. 6:1-5.)*

1 Bhú oekpí bhomu-o, Yesu ne omukpata gba e adu akodho 'kpí bhú ngu 'zu inde u a'i e me ngano. A adu ekpí naguo gba omaYuda-o . Omukpata gba aní adu ne gumu. Abhomu-o, u aholo nakodho 'ndji 'ndji, u atsia adu nazuzu. 2 Li omuFalisai au lie mo-o, u atsia apa pi Yesu me: «Ka ni li omukpata gba mu-o ngamene kulu lie bhú 'kpí naguo me líli gba ní-e nde ziba mo-o de-e?» 3 Yesu

\* 11:21 11:21 Tile ne Sidona nani ne ogudhu ka omaYuda ade. Tsia bhú Isa. 23, ne bhú Edj. 26-28, di ne bhú Ams. 1:9-19.

agie pi uo me: «Yi tanga nga engú inde li Davidi amene nani e di, nedhinga inde li ngaani makpe ne okpála gba e, u adu lie ne gumu-o? <sup>4</sup> Ani ali nani bhú 'ti Ebhe, ngaani ne okpála gba e, u atsia azu mapa inde u aha e pi Ebhe-o. A ayo la nani pi saka uo bini nazuzu de. Engú bini, a ayo bha nani me azu mapa ango-o ne odimandø gba Ebhe .

<sup>5</sup> Ne me engú inde bhú líli gba Moidje-e , yi tanga nga di? Líli gba Moidje apa me, li 'kpí nago gba omaYuda-a, odimandø inde ngamene kulu bhú 'ngbé 'ti Ebhe-e ngagumu bhomu-o líli na ekpí nago-o. La-a, u 'ó 'ngú pí uo kaka de! <sup>6</sup> Engú bini, ma apa la pi yi me kpála bini bhú ká yi si, ani ane 'ngbé 'ti Ebhe mane. <sup>7</sup> I dú me yi mbíla engú inde li Bhuku gba Ebhe-e apa e uu-o, yi de 'ó engú pí okpála bhomu-o de. Padhá de, anga Bhuku gba Ebhe apa me: «Engú inde a nga li ma naali-e, a ko nadje ndjinga okpála koko, a ko naha makiso de.†» <sup>8</sup> Yesu atsia abu tata-a me: «Ngama, Ndili gba kpála-a, ma ne ngámá pí 'ndji ekpí nago.»

<sup>9</sup> Pipita-a, Yesu ayie oo, ani atsia anu ali bhú eti gba uo nadje líli gba Moidje-o . <sup>10</sup> Bhú 'ti oo, kpála bini inde li 'kpa e andia adu oo. Omufalisai adu akunda na'o 'ngú pí Yesu. Kaka-a, u ayi ani me: «Líli gba ní-e aziba me u kobho kpála bhú 'kpí nago uu?» <sup>11</sup> Yesu agie pi uo me: «A ko da bhú ká yi inde i du ka e ne koli kandø bini-e, li kandø ango-o ti bhú 'dú li 'kpí nago, ani nú nagbe ani de-e? <sup>12</sup> La-a, kpála-kuti ane kandø bhutsibhutsi! Kaka-a, líli aziba namene bádha 'ngú bhú 'kpí nago.» <sup>13</sup> Abhomu-o, ani atsia apa pi kpála ango-o me: «Gbele 'kpa mu.» Kpála ango-o agbele 'kpa e, 'kpa ani atsia akolo ndjindji maka 'kpa ani bhe koko-o. <sup>14</sup> Pipita-a, omufalisai aze kilidjo. U apo bhúla o ngú nagili kpadji me o bhøle Yesu.

*Yesu ne kpála inde li Ebhe abhu e ngú kulu gba e-o*

<sup>15</sup> Li Yesu ambila lie me omufalisai ngagili nabhøle ni-e, ani ayie li bili ango-o. Bhati okpála akpata ani, ani atsia

akobho ndu obhende adu ne kuo hana. <sup>16</sup> Engú bini, ani agbele 'dje uo kpekpeke me u apa pi kpála bini de me ni ne da-ie de, <sup>17</sup> ngubula me engú inde li polofeta Isaya apa nani e amene lie. Polofeta Isaya apa nani me:

<sup>18</sup> «Ebhe apa me:

<Tsia nga bali gba ma inde ma abhu nani e-o,

ma kunda ani naali, engú gba ani-e nga li ma naali.

Ma a'ó Bu Bhobua gba ma-a pí ani, ani tsia kpókpo ngbili 'ngú pi ndu opiga hana.

<sup>19</sup> Ani bí bhaiki ne kpála bini de, ani gáma kpéke 'ngú de.

U djé 'li ani li okpadji de.

<sup>20</sup> Ani bú dú mbamba inde agumu-o de, ani búlu dhegu eke inde ngatsi-e de.

Ani améne mo-o akólo li 'kpí inde ani a'ó lie me ngbili 'ngú kolo angu e píla doto ko.

<sup>21</sup> Abhomu-o, li ndu opiga hana tsia 'ó nabhuka gba o-o bhú ani.†»

*Omufalisai apa me Yesu ngamene kulu ne angu*

*gba Baladjebula*

*(Tsia bhú Mlk. 3:22-30; di ne bhú Luk. 11:14-23.)*

<sup>22</sup> Abhomu-o, u ago pi Yesu ne kpála bini inde i u 'kpí de, i bu di 'ngú de, anga adu bhú kpála ango-o ne siti bua . Yesu akobho kpála ango-o, ani atsia aholo nagama 'ngú di ne nau 'kpí. <sup>23</sup> Bhati okpála hana angamba, u atsia aholo napa me: «A inde-e Ndili gba Davidi-e di?»

<sup>24</sup> Li omufalisai adje engú bhomu-o lie, u atsia apa me: «Kpála bhomu-o ngapandja osisiti bua padhá ade, Baladjebula, ngámá gba osisiti bua-a, ngaha angu pi ani ngae!»

<sup>25</sup> Engú bini, Yesu adu ambila mab-hundja gba uo hana. Abhomu-o, ani atsia apa pi uo me: «Ndu kuti hana, i du me okpála kpála nde dje lio de-e, kuti ango-o pílo me a nde akpødhøle. Okpála na gudhu bini, i du di-e piga bini, i du me u nde dje lio de-e, gudhu ango-o, i du di-e piga ango-o lú-u de. <sup>26</sup> I du me

† 12:7 12:7 Tsia bhú Oz. 6:6. † 12:21 12:18-21 Tsia bhú Isa. 42:1-4.

Satana nde ngabhike Satana-a, amba ani agbogbo bhomu-o bhusu e ngae makpe. I du la mo-o, kuti gba ani-e lu lele pi? <sup>27</sup> I du me ngama-a, ma nde ngapandja osisiti bua ka angu gba Beledjebula-a, omukpata gba yi-e ngapandja naao uo ka angu gba da? Kaka-a, omukpata gba yi-e akodho galikpe 'ngú gba yi-e ngao makpe. <sup>28</sup> Engú bini, i du la me ma nde ngapandja osisiti bua ka angu gba Bua gba Ebhe-e, bhobhomu-o asuno me Nau gba Ebhe-e akolo li yi akolo.

<sup>29</sup> Kpála bini ti da nali bhú 'ti gba kpéke kpála, ani tsia bhá ohe gba ani-e de. Ani kunda nali bhú 'ti gba ani ngú nabha ohe gba ani-e hana-a, ani gbíte ngaiza ani kalanu. Pipita-a, ani tsia lí bhú 'ti gba ani ngú nabha ohe gba ani-o. <sup>30</sup> Kpála bhende ne ma bhú dabili bini ade-e, a ko bhulu yala gba ma. Kpála bhende ngapo la di bhúla okpála bhú dabili bini ne ma ade-e, ani ngatsambala uo matsambala.

<sup>31</sup> Kaka-a, ma apa pi yi me, okpála asia mambu li ndu osisiti 'ngú di ne li ndu osobho inde li okpála ngasobho Ebhe ne e hana. Engú la bini, li kpála sobho Bu Bhobua-a, ani sia mambu de. <sup>32</sup> I du me kpála nde apa siti 'ngú li kute ma, ngama Ndili gba kpála-a, Ebhe mbu li ani tété. Engú la bini, i du me kpála nde asobho Bu Bhobua-a, Ebhe mbú li ani tété bhú nedhinga na naki inde-e de, ani mbú di li ani tété bhú nedhinga inde ngago-o de.»

*U mbimbila ndula li lí e  
(Tsia bhú Luk. 6:43-45.)*

<sup>33</sup> «I du me ndula nde ndjindji-e, lílí-e dú bhadi ndjindji. I du me a nde bhú ndula ne kuo-o, lílí-e dú sisiti. U mbimbila ndula li lí e.

<sup>34</sup> Ngayi opiga mbuma inde-e, yi ti da napa ongu na babadha lele pi, me yi nde ne okpála na sisiti-e? Padhá de, anga ebhe ngapa engú inde abedhe li bhobua mabedhe ko. <sup>35</sup> Kpála na babadha-a, ka bádha 'ngú inde li bhobua ani-e, ani apa bhadi bádha 'ngú. Engú bini, kpála na sisiti-e, ka siti 'ngú inde li bhobua ani-e, ani apa bhadi engú na sisiti. <sup>36</sup> Kaka-a, ma apa pi yi me, bhú nedhinga nakodho 'ngú

gba okpála-a, okpála apa ta oeli na padhá padhá inde li u apa e hana. <sup>37</sup> Padhá de, anga Ebhe akodho 'ngú gba mu-o li nakpata 'li mu. I du me mu nde apa oeli na babadha-a, ani 'ó mangimbo pí mu de, i du me mu nde apa oeli na sisiti-e, ani 'ó mangimbo pí mu.»

*Omusunu na líli gba Moidje ne omuFalisai ayo ngamba 'ngú ka Yesu  
(Tsia bhú Mlk. 8:11-12; di ne bhú Luk. 11:29-32.)*

<sup>38</sup> Abhomu-o, omusunu koko na líli gba Moidje di ne omuFalisai koko apa pi Yesu me: «Musunu, ya akunda me mene ehe bini pi ya inde asuno me mo oyie bha ndju agba Ebhe.» <sup>39</sup> Do ani pi uo me: «Okpála na naki inde-e sisiti, u bhuka la di Ebhe ne bua o bini de, u ngayo ngamba 'ngú. Engú bini, Ebhe méne ngamba 'ngú pi uo bini de, bha bini bhende ani amene nani e li polofeta Djonasi ko. <sup>40</sup> Padhá de, anga maka li Djonasi asi nani lie ekpi bata, di ne sukpe bata bhú 'bu 'ngbé sungu-o, ngama Ndili gba kpála-a, ma asi bhadi bhú lata ekpi bata di ne sukpe bata moko. <sup>41</sup> Li 'kpi li Ebhe akodho 'ngú gba okpála lie, okpála na Ninive akoto kala Ebhe bhú dabili bini ne okpála na naki inde, li okpála na Ninive tsia 'ó 'ngú pí okpála na naki-o. Padhá de, anga u adji nani bua o li nedhinga u adje ngali gba Ebhe inde li Djonasi adu akpokpo e-o. Yi mbila la ndjindji me, kpála bini si, ani ngbéngbé ane Djonasi mane!

<sup>42</sup> Matá di-e, li 'kpi li Ebhe akodho 'ngú gba okpála lie, 'ngbé ngamá na eole inde adu nani atsia 'kpi li ndu doto na Saba-a, akoto kala Ebhe bhú dabili bini ne okpála na naki inde. Ani tsia 'ó 'ngú pí uo, anga ani ayie nani tsutsu ngú nanu naje eli na imbilangba gba Salomo-o. Yi mbila la ndjindji me, kpála bini si, ani ngbéngbé ane Salomo mane! Engú bini, ngayi-e, yi dje ani de.»

*Gbitaku pindji nagie matá lie ka siti bua bhú kpála*

*(Tsia bhú Luk. 11:24-26.)*

<sup>43</sup> Abhomu-o, Yesu atsia apa matá gbitaku pi kambu okpála me: «Adu nani

bhú kpála bini ne siti bua. Nedhinga li siti bua akoto lie bhú ani-e, siti bua ango-o anu ne djakadha abhú obili inde li engu nde li e ade\* ngú nagili bili naguo ka e tété. Engú bini, ani u de. <sup>44</sup> Ani atsia apa li bua e me: «Ma gie nga lima bhú 'ti gba ma inde ma akoto nako bhú e-o.» Ani akolo oo, ani abhaka me a nde padhá, u nde apo mapo, u nde aleke ndjindji. <sup>45</sup> Abhomu-o, ani anu, ani abha osisiti bua koko mananika inde ane ani ne siti. U agie lio, u ali bhú 'ti-o, u atsia dula oo. Mukobho gba kpála ango-o atsia akolo la matá pipita-a sisiti naali ane bhende na kalanu-o mane. A adú bhadi pi osisiti okpála na naki inde-e moko.»

*'Hi Yesu ne ondaise Yesu ngao dho?*

*(Tsia bhú Mlk. 3:31; di ne bhú Luk. 8:19-21.)*

<sup>46</sup> Yesu adu ngabha nagama 'ngú pi kambí okpála-o. Me-e, 'hi ani di ne ondaise ani akolo. U alulu akilidjo, u adu agili me o gama 'ngú ne ani. [ <sup>47</sup> † ] <sup>48</sup> Yesu agie pi kpála inde apa 'ngú pi ani-e me: «'Hi ma ngae dho, ondaise ma la di ngao dho?» <sup>49</sup> Pipita-a, ani a'e 'kpa e, ani asuno omukpata gba e-o. Ani atsia apa me: «Yi tsitsia, 'hi ma ne ondaise ma ngao inde. <sup>50</sup> Padhá de, anga kpála inde ngamene engú li 'Dyi ma inde abhúlá-a ngakunda e, kpála ango-o, a ko ndai ma na bhobhoko, a ko ndai ma na eole, a ko la di 'hi ma-a ngae.»

## 13

*Gbitaku gba kpála nalu nguwa*

*(Tsia bhú Mlk. 4:1-9; di ne bhú Luk. 8:4-8.)*

<sup>1</sup> Bha li 'kpí ango-o, Yesu akoto kilidjo. Ani atsia anu adu kuto lingo ekpo. <sup>2</sup> Abhomu-o, bhiti okpála na bhibhiti ago apo bhúla o de ani. Kaka-a, ani anu a'u bhú zabu bini, ani atsia adu bhúbhú ngú nasuno pi uo. Bhiti okpála bhomu-o atsia alulu naao lingo 'ngu-o.

\* **12:43** 12:43 Bili li engu nde lie ade-e, a ko bili inde li kpála ti da nasi kuti li e de ka ndibhili engu. La pi omaYuda-a, a ko bili inde li osisiti bua ngadulu li e ko. † **12:47** 12:47 Lukuluku inde-e, a bhú obhuku koko na didili u aye e bhú eli na giliki ade. [Kpála bini apa pi ani me: «Tsia nga 'hi mu ne ondaise mu alulu akilidjo aoo. U ngagili nagama 'ngú ne mu.»]

<sup>3</sup> Ani atsia aholo nakpokpo 'ngú pi uo bhelé bhú ogbitaku. Ani adu apa pi uo me: «Ekpí bini, kpála bini nalu nguwa anu abhiye gba e ngú nabala nguwa. <sup>4</sup> Nedhinga ani adu ababala lie, té nguwa koko abala lingo 'hi kpadji. Odhu ago, u atsia ahopo nguwa ango-o hana má kpəkəbhə! <sup>5</sup> Olí nguwa koko abala li bili na teme, inde li doto du li e bhelé de. I nde lie me doto du sasa bhelé de-e, ezu-o akə má gala ka li doto akpa sasa lie-o. <sup>6</sup> Li ela akolo la lie kpekpeke-e, a atsulu ezu-o, ezu atsia a'ulu ka ndibhili sisie-o. <sup>7</sup> Olí nguwa koko abala li bili li lí oulu na eti adu lie. Oeti abhele, a atsia anguvo bhobhomu-o hana. <sup>8</sup> Olí nguwa koko abala bhú doto na dobho, a atsia ali lílí: bhe bini-e ali lílí kámá bini, koko-o ali lílí ndjikpa madhia, koko-o ali lílí ndjikpa bata.» <sup>9</sup> Yesu atsia apa matá me: «Yi dje ndjindji, i du me a nde li yi ne djedje ko!»

*Yesu adu akpo 'ngú pi okpála bhú ogbitaku ka ni?*

*(Tsia bhú Mlk. 4:10-12; di ne bhú Luk. 8:9-10.)*

<sup>10</sup> Abhomu-o, omukpata gba Yesu adyudyo lio de ani, u atsia ayi ani me: «Mu ngakpokpo 'ngú pi okpála bhú ogbitaku ka ni?» <sup>11</sup> Do ani de-e: «Ma ngakpo 'ngú pi uo bhú ogbitaku anga Ebhe ha nambila ngbadhu 'ngú na Nau na abhúlá-a pi uo de. Ani aha mangbo pi yi. <sup>12</sup> Padhá de, anga kpála inde ani aha ngbadhu 'ngú ango-o pi e-e, ani a'ó matá koko pi ani pépé. Kpála ango-o tsia dú ne di bhelé. Engú bini, kpála bhende ani ha pi e de-e, ani adhépe belegu dhegu bhende ka ani-o. <sup>13</sup> Ka 'ngú ango-o, ma ngakpo 'ngú pi uo bhú ogbitaku.

Padhá de, anga u ngatsia 'kpí, u u la 'kpí de,  
u ngagbo 'dje o, u dje la 'kpí de, u kə la di mboli 'ngú bini de.

<sup>14</sup> Abhomu-o, engú inde li polofeta Isaya apa e, a atsia amene lie pi uo, engú inde me:

«Ebhe apa me: Yi adú adje 'kpí, yi kó la mboli engú ango-o de.

Yi adú atsia 'kpí, yi ú la 'kpí de.»

15 «Padhá de, anga Ebhe apa me: okpála inde-e agbite bua o,

ngabula me o kó matá mboli 'ngú de.

U anini djila o,

amba o ou matá 'kpí de,

u anini 'dje o,

amba o odje matá 'kpí de.

U kúnda nani nadjí bua o de,

abhómú-o, ma tsia tí nani da nakobho uo de.†»

16 La pí yi-e, a ko djali pí yi anga djila yi ngau 'kpí, 'dje yi la di ngadje 'kpí. 17 Ma apa pí yi na paká me opolofeta bhelé, di ne okpála na ngbingbili bhelé adú nani ne gumú nau ongú yi ngau e inde, la-a, u tsia u de. U adú nani ne gumú nadjé ongú yi ngadje e inde, la-a, u tsia dje de.»

*Yesu ambamba ta gbitaku gba kpála nalu nguwa*

*(Tsia bhú Mlk. 4:13-20; di ne bhú Luk. 8:11-15.)*

18 Abhomú-o, Yesu atsia apa matá pí omukpata gba e me: «Ngayi-e, yi dje nga la ta gbitaku gba kpála nalu nguwa-o.

19 Obhende ngadje ngali na Nau gba Ebhe-e, i kó mbolimboli de-e, uo maka ngo 'hi kpadji inde lí nguwa ati lí e-o. Djabulú ngago, aní tsia dhépe 'li Ebhe inde u asia e lí bua o-o. 20 Okpála koko maka bíli na teme inde lí nguwa ati lí e-o. U ngadje eli-o, u tsia sía kolo ne djali. 21 Engú bini, u 'o de me eli-e toto sie e abhú o-o de. U ngaha lío ngánga bha ngabula nedhinga bedi. Abhomú-o, i dú me líkabhu, i dú di-e mbolo nde ago kabula eli gba Ebhe-e, u ngabala 'kpa lí nabhuka má gala!

22 Okpála koko maka bíli lí lí oulu na eti adú lie-o. U adje eli-o, engú bini, gumú 'he na doto inde bhú dabilí bini ne eu lí tia na doto inde-e ngapite uo ne e, nganguvo eli gba Ebhe-e bhú uo. Kaka-a, a tsia lí lí lí belegú de bini. 23 Engú bini, okpála koko maka doto na dobho. U ngadje eli-o, u la di ngaké mbolimboli. Kaka-a, kulu gba uo ngazu nguwa. Kulu gba okpála koko

ngazu nguwa kámá bini, bhe gba okoko ndjikpa madhia, bhe gba okoko ndjikpa bata.»

*Gbitaku pindji siti ulu*

24 Yesu atsia apa matá gbitaku koko pí okpála adú adje ani-e me: «Nau na abhúlá-a mana lie ne engú inde: bhoko bini alu nani bádha nguwa abhiye gba e. 25 Sukpe bini, nedhinga lí ndú okpála hana adú lie tila-a, bhulú yala gba ani-e ago. Aní atsia alu siti ulu bhú ká nguwa-o, aní atsia atapa. 26 Ezú-o aké, abhele, atsia aba lílí. Abhomú-o, siti ulu-o atsia akoto di. 27 Okpála na kulu gba bhulú edyi-e ago ayi aní me: «Ngámá, siti ulu inde-e ayie bhú bádha nguwa mo olu nako e bhú 'dyi gba mú-o su?» 28 Do aní pí uo me: «Bhulú yala amene engú bhómú-o ngae.» Abhomú-o, okpála na kulu-o atsia ayi aní me: «Mo okúnda me ya ná luko siti ulu ango-o?» 29 Aní agie pí uo me: «Yi alúko de, anga yi luko-o, yi nú lúko siti ulu bhómú-o ne ezú-o bhú dabilí bini. 30 Yi 'o me ndúndú bhisi hana bhele bhú dabilí bini akólo nedhinga na'e nguwa abhiye-o. Nedhinga na'e nguwa abhiye-e, ma apá pí okpála na'e nguwa-a me u 'e ngaiza siti ulu-o. U gbigbite 'i'i ngabula natsutsulu, amba pípíta-a, u 'o nguwa-a bhú ngbokopi gba ma-o.»»

*Gbitaku pindji lí mutadi*

*(Tsia bhú Mlk. 4:30-32; di ne bhú Luk. 13:18-19.)*

31 Yesu akpokpo matá gbitaku koko pí okpála adú adje ani-e pindji lí ndula inde u a'i e me mutadi.\* Aní pí uo me: «Nau na abhúlá-a mana lie ne lí mutadi. Kpála bini aha, aní atsia alu abhiye gba e. 32 A ko lí ndula na yeye ane mane bhú ká olí nguwa hana. Engú la bini, i dú me a nde aké-o, i né ndú ezú inde abhú 'dyi-e hana ne endjá, i kólo 'ngbé ndula da napa me odhu na abhúlá go nayiki 'tí o bhú oyáyá-o.»

*Gbitaku pindji levile*

*(Tsia bhú Luk. 13:20-21.)*

† 13:15 13:14-15 Tsia bhú Iša. 6:9-10. \* 13:31 13:31 Lí mutadi: A ko mboye lí ndula maka lí kúndju.



<sup>33</sup> Yesu akpokpo matá gbitaku koko pi okpála adu adje ani-e me: «Nau na abhúlá mana lie ne levile inde li òlò aha e, ani atsia akpòdholò ne bhiti fufú. Abhomu-o, fufú-o hana atsia afuka.»

*Yesu adu akpo 'ngú bhú ogbitaku ka ni? (Tsia bhú Mlk. 4:33-34.)*

<sup>34</sup> Yesu adu akpokpo ndu 'ngú bhomu-o hana pi bhiti okpála bhú ogbitaku. Ani kpo 'ngú pi uo mandí gbitaku belegu de bini. <sup>35</sup> Ani adu amene mo-o ngubula me engú inde nani li polofeta akpokpo e-e amene lie, engú inde me:

«Ma akpókpo 'ngú bhú ogbitaku.

Ma akpókpo 'ngú inde awo lie nayie maka u abho nani doto lie-o.†»

*Yesu ambamba ta gbitaku pindji siti ulu*

<sup>36</sup> Abhomu-o, Yesu a'o ká bhiti okpála inde ani adu akpo 'ngú pi o-o, ani atsia agie lie li bili ani adu nadu li e-o. Omukpata gba ani-e adyudyo lio de ani. U atsia apa pi ani me: «Kpokpo nga ta gbitaku pindji siti ulu inde abhiye-e pi ya.» <sup>37</sup> Yesu atsia agie pi uo me: «Kpála bhende i ngalu bádha nguwa-a, a ko ma Ndili gba kpála-o. <sup>38</sup> Edyi-e, a ko doto. Bádha nguwa-a, a ko okpála inde i ngaziba nadu sa líli na Nau na abhúlá-o. Siti ulu-o, a ko okpála bhende ngaziba nadu sa líli gba Djabulu-o. <sup>39</sup> Bhulu yala inde alu siti ulu-o, a ko Djabulu. Nedhinga na'e nguwa abhiye-e, a ko ekpi na soso-o. Obhulu na'e nguwa abhiye-e, a ko oandjelu . <sup>40</sup> Maka u akukuo siti ulu lie ngú nabubu bhú djua-a, a adú bhadi li sokpi-e moko. <sup>41</sup> Ndili gba kpála atíma oandjelu gba e, u tsia kúo ndu obhulu nato okpála bhú nale ne ndu obhulu namene siti 'ngú hana-a ngú napandja uo bhú ká omaha e mapandja. <sup>42</sup> Pipita-a, u tsia bála uo bhú dé djua. Oo, u adú aku 'gbá, u tsia dú di nazu tate o. <sup>43</sup> Abhomu-o, okpála bhe na ngbingbili-e adú nasu má ngbi ngbi ngbi maka ela bhú Nau gba 'Dyi o-o. Yi dje ndjindji, i du me a nde li yi ne djedje-o!»

† 13:35 13:35 Tsia bhú Ets. 78:2.

*Gbitaku pindji tia awo lie di ne pindji léké*

<sup>44</sup> «Nau na abhúlá-a mana lie ne tia inde li kpála awo e abhú 'dyi. Kpála bini akoto tété, ani atsia awo ne toto. Li djali abholò la ani lie má kusu-o, ani anu atcindji ndu 'he gba e hana, ani atsia ago akala edyi bhomu-o.

<sup>45</sup> Nau na abhúlá-a mana di matá lie ne kpála natsindji 'he inde ngagili nakala babadha léké. <sup>46</sup> Nedhinga ani au léké bini na kpéke mase lie, ani anu atcindji ndu 'he adu ka e hana. Ani atsia ago akala léké na kpéke mase-o.»

*Gbitaku pindji nado*

<sup>47</sup> «Nau na abhúlá-a mana matá lie ne nado inde u abhike e bhú 'ngu, inde i ngadhe ndu djua osungu hana. <sup>48</sup> Nedhinga abedhe lie, obhulu nagbe sungu-o gbéle lingo 'gò. Pipita-a, u dúlu, u bhá osungu na babadha-a bhú kili, u tsia bála obhende azi-o. <sup>49</sup> A adú bhadi li sokpi-e moko: oandjelu agó, u tsia gbógbo bhusu okpála na ngbingbili-e ne obhende na sisiti-o. <sup>50</sup> U tsia bála okpála na sisiti-e bhú dé djua. Oo, u adú aku 'gbá, u tsia dú di nazu tate o.»

<sup>51</sup> Yesu atsia ayi omukpata gba e me: «Yi akò mboli ndu ongu bhomu-o hana akò?» U agie me: «Hení.» <sup>52</sup> Abhomu-o, ani atsia apa pi uo me: «A moko, yi maka ndu omusuno na líli gba Moidje hana inde aziba engú pindji Nau na abhúlá-o. Yi maka obhulu 'ti. Yi ngalo bhú ká oehe inde bhú 'ti gba yi-e obhe na mbia, yi tsia ló di obhe na didili.»

*Okpála na Nadjaleta ziba Yesu de (Tsia bhú Mlk. 6:1-6; di ne bhú Luk. 4:16-30.)*

<sup>53</sup> Li Yesu andjia nakpokpo ogbitaku bhomu-o lie, ani ayie oo. <sup>54</sup> Ani atsia anu bhú Nadjaleta, kuti inde ani abhele bhú e-o. Ani aholo nasuno bhú 'ti nadije líli gba Moidje na kuti bhomu. Nasuno gba ani-e atsia adu nangamba okpála naali. Kaka-a, u atsia adu ayi lio me: «Ani asia ngua imbilangú inde-e su? A aha angu pi ani ngú namene ongamba 'ngú inde-e da? <sup>55</sup> A inde-e ndili gba salapaté-e di? A 'li

'hi ani me Malia adi? Djaki, ne Djodjefu , ne Simo la di ne Djude ne ondaise ani ngao adi? <sup>56</sup> Ondaïse ani na olisilisi-e, ndu uo hana gba ní sii adi? Ani ayie la ne ndu 'ngú bhomu-o hana su?» <sup>57</sup> Ka u ambila du ani lie ndjindji-e, u tsia kunda nabhuka ani de. Abhomu-o, Yesu atsia apa pi uo me: «U mamanga polofeta ne ndu bili hana, naneke bha bini bhú kuti u azu ani bhú e di ne bhú piga gba ani.» <sup>58</sup> Yesu atsia amene bha mbo oo ongamba 'ngú bedi ka u bhuka ani lie de-o.

## 14

*Elode aha líli me u bhøle Djaa bhulu nabatisa okpála*

*(Tsia bhú Mlk. 6:14-29; di ne bhú Luk. 9:7-9.)*

<sup>1</sup> Li nedhinga bhomu-o, Elode Atipasi inde adu ngámá na ndu doto na Galilaya adje engú gba Yesu-o. <sup>2</sup> Ani atsia apa pi omaha e me: «Kpála u ngakpo 'ngú gba e bhomu-o, a ko Djaa bhulu nabatisa okpála! Ani azuku bhú ká okpála amu-o bhomu ngae. Kaka-a, angu namene ongamba 'ngú bhú ani.» <sup>3</sup> Elode pa mo-o padhá de. Ani apa mo-o, anga ani aha nani líli me u holo Djaa, u gbigbite ani, amba u bhike ani bhú tikpu li 'ngú gba Elodiade, wala Filipo, ndai ani-o. <sup>4</sup> Ani aholo nani Djaa, anga Djaa adu apa pi ani me: «A ayo de me mu ha Elodiade maka wala mu-o de.» <sup>5</sup> Elode adu akunda nabhøle Djaa na paká. Engú bini, ani adu akpe okpála makpe. Padhá de, anga u adu au Djaa maka polofeta .

<sup>6</sup> La-a, li ekpi nakina nazu Elode-e, ndili na ølele gba Elodiade adho 'bi kala okpála u a'i o bhú 'bi-o. Ebi ango-o atsia anga li Elode naali. <sup>7</sup> Kaka-a, ani atsia atu silika me ni ahá pi ndili na ølele bhomu-o ndu 'he hana inde ani ayó e-o. <sup>8</sup> 'Hi ani atsia ato pi ani me ani yo 'ndji Djaa bhulu nabatisa okpála. Abhomu-o, ndili-e atsia anu apa pi ngámá Elode me: «Ha 'ndji Djaa, Bhulu nabatisa okpála mu ma mbia inde-e bhú tsakpa saani!» <sup>9</sup> Ngámá adje likabhu li bua e naali. La ka silika ani atu e di ne nakpe djila okpála ani a'i o bhú 'bi-e, ani atsia aha líli me u ha

'ndji Djaa pi ani haha. <sup>10</sup> Abhomu-o, ani atsia atima kpála bini me ani nu kodho ngulu Djaa bhú tikpu. <sup>11</sup> Kpála ango-o, anu. Ani akodho ngulu Djaa, ani atsia ago ne di bhú tsakpa saani. Ani atsia aha pi ndili na ølele bhomu-o. Abhomu-o, ndili na ølele ango-o atsia anu ne di pi 'hi e. <sup>12</sup> Omukpata gba Djaa anu aha kuo ani, u anu azi. U atsia anu akpokpo engú akodho 'kpi bhomu-o pi Yesu.

*Yesu aha 'zu pi okpála kutu bhuluvue (Tsia bhú Mlk. 6:30-44; ne bhú Luk. 9:10-17; di ne bhú Dja. 6:1-14.)*

<sup>13</sup> Li Yesu adje engú li omukpata gba Djaa akpokpo e pi ani-e lie, ani agbe lie li bili bhomu. Ani a'u ne omukpata gba e bhú zabu, u atsia anu adulu kpi o kpi li bili li kpála nde li e ade. Li okpála ambila lie, u aloko ne ogudhu ngangá, u aha 'nu ne 'dhu o lingo 'ngu-o ngú nanu nakpata ani. <sup>14</sup> Li Yesu akø lie bhú zabu-o, ani au bhiti okpála-o. Ani adje ndjinga uo, ani atsia akobho okpála na kuo inde adu bhú ká uo-o.

<sup>15</sup> A akolo lie tagolo-o, omukpata adyudyo lio de ani. U atsia apa pi ani me: «Ngámá, ekpi-e asegele, bili inde-e la di mimili, gie bhiti okpála inde-e, amba u nu kala ehe nazu mazu pi o bhú okuti.»

<sup>16</sup> Engú bini, Yesu agie pi uo me: «Tata li nagie lie ka uo ade. Yi ha ezu pi uo ngayi makpe.» <sup>17</sup> Abhomu-o, omukpata apa pi ani me: «A bha ka ya si ne koli mapa bhuluvue ne osungu bhisi má kpikili!» <sup>18</sup> Yesu agie pi uo me: «Yi go mu ma ne di ei.» <sup>19</sup> Pipita-a, ani aha líli pi bhiti okpála bhomu-o me u dulu kuto pi ulu-o. Ani atsia aha mapa bhuluvue ne osungu bhisi-o. Ani a'e djila e ne abhúla, ani agie heni pi Ebhe. Pipita-a, ani agugumu mapa-o, ani aha pi omukpata, omukpata-a atsia agapa li bhiti okpála me u zu zu. <sup>20</sup> U azu ndu o hana, u atsia a'u'u. U alo dudu bhe atigala-o, a atsia abebedhe okili ndjikpa ne ká bhisi. <sup>21</sup> Okpála hana inde azu-o, u adu masakpe de okpála kutu bhuluvue mandi natanga olisi ne ongisi.

*Yesu adholo pí 'ngu*

*(Tsia bhú Mlk. 6:45-52; di ne bhú Dja. 6:15-21.)*

<sup>22</sup> Pipita kolo me-e, Yesu akata omukpata gba e me u 'u' u bhú zabu, amba u gulu 'ngu pi ni kalanu bhú nedhinga ni nde nga lie ngaha kpadji pi bhiti okpála-o. <sup>23</sup> Pita ani aha kpadji pi bhiti okpála lie, ani a'u apí 'ta ngú nayo Ebhe. Ekpí abi li ani kpi e kpi me ani nde nga bha oo. <sup>24</sup> Li zabu li omukpata-a adu bhú e akolo lie mbo ne atu 'ngu-o, anvi aholo nape pí 'ngu-o, atsia adu nandi uo ne sidi. Zabu-o atsia adu adimba ka ngbo 'ngu-o.

<sup>25</sup> Bhú 'gbá 'ngu na bini-e, Yesu aholo nago ne li pápá ne apí uo me ani nde ngadholo pí 'ngu. <sup>26</sup> Li omukpata au ani lie ngadhuku pí 'ngu-o, tsulu aholo uo naali. U adu apa me: «A ko igbadyibhe!» U atsia aholo atu 'ue ka tsulu-o. <sup>27</sup> Engú bini, Yesu atsia apa kolo pi uo me: «A ko ma, yi adjé tsulu de. Yi gbite bua yi.»

<sup>28</sup> Abhomu-o, Piele atsia apa pi ani me: «Ngámá, i du me a nde mu na paká-a, ha líli me ma go bhaka mu me ma nde ngadhuku pí 'ngu.» <sup>29</sup> Do Yesu de-e: «Gogo.» Abhomu-o, Piele aké bhú zabu-o, ani aholo 'nú nabhaka Yesu me ani nde ngadholo pí 'ngu. <sup>30</sup> Engú bini, ani au lie me anvi-e ngape kpekpeke-e, ani adje tsulu. Abhomu-o, ani aholo nalinda bhú 'ngu. Ani atsia asula me: «Ngámá, kobho ma!» <sup>31</sup> Ma 'li ma me-e, Yesu ato 'kpa e, ani atsia aholo ani ne napa pi ani me: «Ngamu, kpála li nabhuka gba e nde yeye, mo osia bua na bhisi bhisi ka ni?» <sup>32</sup> Pipita-a, u a'u' u ndu o bhisi hana bhú zabu-o. Anvi atsia aguo. <sup>33</sup> Abhomu-o, omukpata bhe adu igini bhú zabu-o akikita lipuku o kuto kala Yesu. U atsia apa pi ani me: «A na paká me mu ne Ndili gba Ebhe!»

*Yesu akobho okpála na kuo bhú ndu doto na Genedjaleta*

*(Tsia bhú Mlk. 6:53-56.)*

<sup>34</sup> Pita li Yesu ne omukpata gba e agulu 'ngu-o lie, u akolo bhú ndu doto na Genedjaleta. <sup>35</sup> Okpála na kuti angoo ambila lie me a ko Yesu-o, u agapa ngali nago ka ani-e bhú ndu doto angoo libhomu. Okpála atsia ago pi ani ne ndu obhulu kuo hana. <sup>36</sup> U atsia adu akikiliki lio pi ani me ani 'o o me o bu nga bha mbo 'kpa o li 'so bongo gba ani-o. Abhomu-o, ndu obhende hana adu abu 'kpa o tété-e adu akobho.

## 15

*Kpekebhe pindji dasundu gba omuFalisai*

*(Tsia bhú Mlk. 7:1-13, 14-23.)*

<sup>1</sup> Abhomu-o, omuFalisai di ne omusuno na líli gba Moidje inde ayie bhú Yelusalema anu abhaka Yesu. U atsia ayi ani me: <sup>2</sup> «Omukpata gba mu-o ngagumu líli li onguo ogbi ya a'o nani e ka ni? Padhá de, anga u ngavulu 'kpa o kala nazu 'he maka lele li líli-e apa lie ade.» <sup>3</sup> Ani atsia agie pi uo me: «Ala yi-e, yi ngagumu líli gba Ebhe-e ne 'li dasundu gba yi-e ka ni? <sup>4</sup> Padhá de, anga Ebhe apa me: «Manga 'dyi mu ne 'hi mu mamanga.» Ani apa di matá me: «Kpála inde agbó nganda 'dyi e, i du di-e 'hi e, a ayo me u bhelè ani mabhelè.»† <sup>5</sup> Engú bini ngayi-e, yi ngapa me: «† du me kpála bini nde apa pi okpála inde azu ani-e me, tia inde a ayo igini me ni teteke uo ne e, ni a'o pi Ebhe-e, <sup>6</sup> kpála angoo matá ne engú namene mamene pi uo ade.» Yi ngagumu líli gba Ebhe-e li ongua okpadji bhomu ngú nakpata lele odasundu gba yi-o. <sup>7</sup> Yi ne obhulu kali! Polofeta Isaya pa nani li 'ngú gba yi-e tala me Ebhe apa me:

<sup>8</sup> «Opiga inde-e ngadhogè bha ma ne 'bhè-o, engú bini, bua uo de ma tsutsu.

<sup>9</sup> Mayo u ngayo ma lie, tata tété ade.

Padhá de, anga nasuno inde u ngasuno e, a ko bha ndu olíli li okpála ngagbe e ngao.†»

† 15:4 15:4 Tsia bhú Det. 5:16; ne bhú Eki. 20:12, 21:17; di ne bhú Lev. 20:9. † 15:9 15:8-9 Tsia bhú Isa. 29:13.

10 Pipita-a, Yesu a'i bhiti okpála inde adu oo me u dyudyo lio de ni masikpe, ani atsia apa pi uo me: «Yi djedje nga, amba yi ko di mboli engú inde ma adji apa e inde: 11 A ko de me oehe inde ngali bhú 'bhø kpála ngamene ngae me ani adú bubu kala Ebhe de-e de. Oehe bhe ngakoto bhú 'bhø kpála mangbo ngamene ngae me ani adú bubu kala Ebhe de.» 12 Abhomu-o, omukpata-a adyudyo lio de ani, u atsia apa pi ani me: «Musuno, mu mbila uu me engú mo opa e ake li bua omufalaisi make-e?» 13 Ani agie pi uo me: «Ndu 'he hana inde li 'Dyi ma inde abhúla-a lu e ngae de-e, u alúko maluko. 14 Yi 'o uo: a ko okpála i u 'kpi de inde aholo 'kpa obi o ngú nasuno kpadji pi uo. La-a, i du me kpála i u 'kpi de-e nde aholo 'kpa kilí e ngú nasuno kpadji pi ani-e, ndu uo bhisi hana bála bhú 'dú!»

15 Piele atsia apa pi ani me: «Kpokpo nga ta gbitaku bhomu-o pi ya.» 16 Do Yesu de-e: «Ngayi di-e, imbilangu nga bhú yi adi? 17 Yi mbila de me ndu 'he hana inde ngali bhú 'bhø kpála ngakodho 'kpi abhú 'bu, u tsia bhike bhú pedu-o di? 18 Engú bini, ndu 'he hana inde ngakoto bhú 'bhø kpála ngayie li bua ani. A la bhomu-o bhende i ngamene me ani adú bubu kala Ebhe de-o. 19 Padhá de, anga bua kpála ngamene ngae me ani du ne mabhundja na sisiti, ani bhø kpála bhú gandji, ani kunda ølø, i du di-e bhoko koko, ani kunda olisi, i du di-e obhosi ngangá, ani zi 'he, ani pa 'ngú li obi e ne eu, ani sobho la di kpála. 20 A bhomu-o ndu ongu inde ngamene me kpála adú bubu kala Ebhe de-o. A ko de me nazu 'he mandí navulu 'kpa o ngamene me kpála adú bubu kala Ebhe de-e de.»

*Yesu akobho ndili na ølø gba igba Kanana  
(Tsia bhú Mlk. 7:24-30.)*

21 Pipita-a, Yesu ne omukpata gba e ayie li bili bhomu, u atsia anu li pápá na ndu doto li ogudhu na Tile ne Sidona adu bhú e-o. 22 Ølø bini du nani nadu bhú ndu doto ango-o. A adu nani igba maYuda de, a ko nani naae igba Kanana. Me-e, ani ago abhaka Yesu ne nasusula me:

«Ngámá, ndili gba Davidi, dje nga bha-a mbo ndjinga ma! Siti bua ngato mbolo li ndili na ølø gba ma-a naali.» 23 Engú bini, Yesu gie engú pi ani belegu de bini. Omukpata gba ani adyudyo lio de ani, u atsia apa pi ani me: «Musuno, mu ti da namene engú ani ngayo e ka mu-o pi ani di, amba ani 'o nakpata ní ne tolo gba e bhomu-o?»

24 Yesu agie pi uo me: «Ebhe atima bha ma ngu nagili okpála na Isalaele inde maka okandøle inde angita-o.» 25 Engú bini, ølø ango-o ago atutu lipuku e kuto kala ani ne napa me: «Ngámá, go teteke nga bha mbo ma!» 26 Yesu agie pi ani bhú gbitaku me: «A ndjindji ade me u ha ezø gba ongisi-e, u bhike pi obulu-o de.» 27 Ølø ango-o agie me: «A ko paká Ngámá, la-a, obulu ngazu okulu 'zu inde ngabala sa misa gba omakulasi o-o.» 28 Abhomu-o, Yesu agie pi ani me: «'Hi ma-a, nabhuka gba mu-o ngebéngbé! A ayo me Ebhe ha ehe inde mo okunda e pi mu.» Abhomu-o, ndili gba ani-e atsia akobho bha li nedhinga bhomu.

*Yesu aha 'zu pi obhosi kutu badha  
(Tsia bhú Mlk. 8:1-10.)*

29 Abhomu-o, Yesu ayie oo, ani atapa lingo ekpe na Galilaya. Ani a'u apí 'ta, ani atsia adu kuto. 30 Okpála bhelé ago abhaka ani. U ago ne okpála adu ne eze li 'dhu o, ne okpála li djila o adudu, ne okpála li yá o apu, ne obhe i bhø 'ngú de, la di ne okpála koko bhelé inde adu li o ne kuo. U abu uo bhú li 'dhu Yesu, ani atsia akobho uo. 31 Okpála atsia adu angamba naali nedhinga u adu au okpála i bhø 'ngú de-e lie ngagama 'ngú-o, obhe li yá o apu adu lie akólo ne angu-o, nedhinga di li obhe adu ne eze li 'dhu o adu adholo lie ndjindji-o, ne nedhinga li obhe i u 'kpi de-e adu lie au 'kpi-o. U atsia aholo nadhøge Ebhe gba omaIsalaele-o.

32 Abhomu-o, Yesu a'i omukpata gba e-o. Ani atsia apa pi uo me: «Ma ngadje ndjinga bhiti okpála inde, anga akolo mbia inde-e 'kpi bata u bha ngadu de ma si, ehe nazu mazø la matá di ka uo ade. Ma kunda nagie uo gumu de, anga angu uo ti da nandjia li kpadji.»

<sup>33</sup> Omukpata atsia ayi ani me: «Ní ti da nasia mapa na tetele bhú mili bili inde e su, inde i ti da nale ne bhiti okpála inde-e?» <sup>34</sup> Yesu atsia ayi uo me: «A ka yi ne mapa madho?» U agie pi ani me: «A ka ya ne mapa mananika ne mbo odjedje sungu.» <sup>35</sup> Abhomu-o, Yesu apa pi bhiti okpála me, u dulú kuto. <sup>36</sup> Ani atsia aha mapa mananika ne osungu-o. Pita nagie heni pi Ebhe-e, ani agugumu, ani aha pi omukpata-o, u atsia agapa li bhiti okpála me u zuzú. <sup>37</sup> U azu ndu o hana, u atsia a'u'u. Omukpata apo bhúla dudu-o, atsia abebedhe okili mananika. <sup>38</sup> Okpála hana inde azu-o, adu obhosi kutu badha mandi nako olisi ne ongisi. <sup>39</sup> Pita li Yesu aha kpadji pi bhiti okpála lie, ani a'u bhú zabu, ani atsia atapa bhú ndu doto li gudhu na Magadana adu bhú e-o.

## 16

*Omufalisai ne oSadukai ayo ngamba 'ngú ka Yesu*

*(Tsia bhú Mlk. 8:11-13; di ne bhú Luk. 12:54-56.)*

<sup>1</sup> Abhomu-o, omufalisai ne oSadukai ago abhaka Yesu. U adu akunda nale ani. Kaka-a, u atsia ayo ka ani me ani mene nga bha ngamba 'ngú bini pi o inde asúno me Ebhe atima ani ngae. <sup>2</sup> Ani agie pi uo me: «I kolo tagolo-o, yi pá me: «Ekpí-e adú babadha, anga bhúla 'kpí-e akodho má ngbí, oikupala aze la di bhelé.» <sup>3</sup> I du di-e kəkpi-e, yi pá me: «Naki-e, ekpí-e adú sisiti, anga bhúla 'kpí-e mbembe, a la di ne biti.» Yi mbila hana me bhúla 'kpí-e du me-e, a akunda napa pi-ie. La-a, ongu inde ngakodho 'kpí bhú onedhinga inde-e, yi mbila de me akunda napa pi-ie de! <sup>4</sup> Okpála na naki inde-e sisiti, u bhuka la di Ebhe ne bua o bini de! U ngayo ngamba 'ngú. Engú bini, Ebhe méne ngamba 'ngú bini pi uo de, bha bini bhende ani amene nani e li polofeta Djonasi ko.» Pipita-a, Yesu a'o ka uo oo, ani atsia atapa.

*Yesu agbele 'dje omukpata gba e li 'ngú gba omufalisai ne oSadukai*

*(Tsia bhú Mlk. 8:14-21.)*

<sup>5</sup> Li Yesu ne omukpata gba e agulu ekpe na Galilaya lie, omukpata-a a'ili 'to o li naha mapa. <sup>6</sup> Yesu atsia apa pi uo me: «'E-e! Yi lila liyi ka levile gba omufalisai ne oSadukai-e malila!» <sup>7</sup> Abhomu-o, omukpata aholo napa sunda o me: «Ani ngapa mo-o, anga ní go ne mapa de.» <sup>8</sup> Engú bini, Yesu ambila engú ango-o, ani atsia apa pi uo me: «Nabhuka gba yi-e yeye. Ka ni yi ngapa lie sunda yi me, yi go ne mapa di-e? <sup>9</sup> Yi kə nga mboli engú bini di? Yi a'ili 'to yi li mapa bhuluvue inde ma agapa nako e li okpála kutu bhuluvue a'ili? Yi atsia a'ili la di 'to yi me o obebedhe nako okili madho-ie ne dudu-o?

<sup>10</sup> La di-e, yi a'ili 'to yi li mapa mananika inde ma agapa nako e li okpála kutu badha a'ili? Yi atsia a'ili la di 'to yi me o obebedhe nako okili madho-ie ne dudu-o? <sup>11</sup> Ma apa igini lie pi yi me yi lila liyi ka levile gba omufalisai ne oSadukai malila-a, ma pa igini bhomu-o engú na mapa de. Yi kə mbolimboli de ka ni?» <sup>12</sup> Abhomu-o, omukpata-a atsia akə la mboli 'ngú ango-o me ani pa engú nalila lie ka levile na mapa de, engú bini, a ko nalila lie ka nasuno gba omufalisai di ne oSadukai ko.

*Piele apa me Yesu ne da-ie*

*(Tsia bhú Mlk. 8:27-30; di ne bhú Luk. 9:18-21.)*

<sup>13</sup> Li Yesu ne omukpata gba e akolo lie bhú ndu doto li gudhu na Sedjale gba Filipo adu bhú e-e, ani ayi uo me: «Okpála ngapa me ngama Ndili gba kpála-a, ma ne da?» <sup>14</sup> U agie pi ani me: «Pi okpála koko-o, mu ne Djaa bhulu nabatisa okpála. Pi okoko-o, mu ne Eliya. Pi okoko matá-a, mu ne Djelemi, i du di-e saka opolofeta koko.» <sup>15</sup> Ani apa pi uo me: «A la yi-e, yi ngapa naayi me ma ne da?» <sup>16</sup> Simo Piele atsia agie pi ani me: «Mu ne Masiya , Ndili gba Ebhe inde uu-o.»

<sup>17</sup> Abhomu-o, Yesu atsia apa pi ani me: «A ko djali pi mu, Simo, ndili gba Djaa , anga ambamba ta engú na kukulu inde-e pi mu ne kpála de, engú bini, ambamba tata pi mu ne 'Dyi ma inde abhúla ko.

<sup>18</sup> Kaka-a, ma apa pi mu me a 'li mu

me Piele, m̄ maka teme. Piga gba ma-a alú pí teme ang-o.\* Angu kuo kólo tété de. <sup>19</sup> Ma ahá olifungula na Nā na abhúlá-a pí m̄. Ne angu inde ma aha e pí m̄ bhom̄-o, nd̄ 'he hana inde mo ogbíte e p̄la doto-o, agbíte bhadi lie abhúlá moko. Nd̄ 'he hana inde mo obhúlu e p̄la doto-o, abhúlu bhadi lie abhúlá moko.» <sup>20</sup> Abhom̄-o, Yesu atsia aha líli pí om̄kpata-a me u apá belegu pí kpála bini de me ni ne Masiya-a de.

*Yesu akpo 'ngú pindji nakpi ne nazuku ka e*  
(Tsia bhú Mlk. 8:31, 9:1; di ne bhú Luk. 9:22-27.)

<sup>21</sup> Nayie bhú nedhinga bhom̄-o, Yesu aholo nasuno pí om̄kpata gba e mbámbá me: «A ayo me ma n̄ bhú Yelusalema. Oo, ma djé likabhu naali sakpa obhelesi okpála, sakpa ongbengbe odimand̄ gba Ebhe, di ne sakpa om̄suno na líli gba Moidje-o. U abhél̄ ma. La-a, bhú 'kpí na bata-a, ma tsia zúku.» <sup>22</sup> Abhom̄-o, Piele agbele ani ne li ngongo, ani aholo naboyo ani ne napa pí ani me: «Ngámá, a ayo me Ebhe lila m̄! A mo-o ade, engú bhom̄-o kólo li m̄ de!» <sup>23</sup> Engú bini, Yesu adji lie, ani atsia apa pí Piele me: «Yie oo ko, Satana! M̄ ne ndjukudu li kpadji gba ma-o. Padhá de, anga omabhundja gba m̄-o, a ko bhende gba Ebhe-e de, engú bini, a ko bhende gba okpála.»

*A ayo namene ni 'ngú nakpata Yesu-o?*

<sup>24</sup> Abhom̄-o, Yesu atsia apa pí om̄kpata gba e me: «Í d̄ me kpála bini nde akunda bha nakpata ma na paká-a, a ayo me ani 'o nabhundja 'ngú gba e makpe. A ayo me ani bí kulusi gba† e-o, amba ani kpata ma. <sup>25</sup> Padhá de, anga í d̄ me kpála nde akunda nalila m̄kobho gba e, ani kpí. Í d̄ la me kpála nde atse 'kpa li m̄kobho gba e ngubula ma-a, ani sía m̄kobho na k̄k̄ul̄. <sup>26</sup> La di-e, í d̄ me kpála nde asia nd̄ 'he hana na doto, engú la bini, ngaani makpe ani kpi-e, ani asía bhúbhú mangua 'he dho? Kpála

ti da nakala m̄kobho gba e ka Ebhe ne mangua 'he dho? <sup>27</sup> Padhá de, anga Ndili gba kpála agó ne oandjelu gba e bhú sangu gba 'Dyi e-o. Abhom̄-o, kpála ne kpála tsia sía mbini kulu gba e sakpa ani nakpata lele kulu inde ani amene e-o. <sup>28</sup> Ma apa pí yi na paká me, okpála koko bhú ká obhende inde si-e, mú padhá de, u aú ngaiza nago gba Ndili gba kpála maka 'ngbé ngámá kalan̄.»

## 17

*Zi Ebhe asa Yesu ngbalina*

(Tsia bhú Mlk. 9:2-13; di ne bhú Luk. 9:28-36.)

<sup>1</sup> Pita ekpí madhia, Yesu aha Piele, ne Djaki ne ndai e Dja. Aní an̄ ne uo titi o apí 'ndjá 'ta. <sup>2</sup> Bha si me-e, ani adji lie kala uo kpi. Bhúla ani aholo nasu má ngbi ngbi ngbi maka zi 'ndji 'la! Obongo li kute ani-e, akolo bububu maka zi 'kpí. <sup>3</sup> Kolo me-e, Moidje ne Eliya aze li uo, u atsia aholo agama 'ngú ne ani. <sup>4</sup> Abhom̄-o, Piele atsia apa pí Yesu me: «Ngámá, a ndjindji me ní d̄ul̄ si. Í d̄ me m̄ nde akunda-a, ma yíki 'ti ngbangbali bata: bini pí m̄, bini pí Moidje, bini pí Eliya.»

<sup>5</sup> Nedhinga ani ad̄ nga bha lie nagama 'ngú-o, ndindi inde ad̄ li e ne zizi-e ago abuku uo hana. Me-e, eli akoto bhú ndindi ang-o atsia apa pí uo me: «Kpála inde-e ne Ndili gba ma na m̄kunda. Engú gba ani-e nga li ma naali. Yi dje ani!» <sup>6</sup> Li om̄kpata adje lie mo-o, u adje tsulu naali. Kaka-a, u atuko kuto, u atsia atutu bhúla o bhú doto. <sup>7</sup> Abhom̄-o Yesu adyudyo lie de uo, ani a'o 'kpa e li kute uo, ani atsia apa me: «Yi yie bhúlá! Yi adjé tsulu de!» <sup>8</sup> Na'e djila o ka uo me-e, u u kpála bini de, u au bha Yesu kpi e kpi. <sup>9</sup> Nedhinga u ad̄ nake eta-a lie, Yesu atsia aha líli inde-e pí uo me: «Yi apá engú inde yi au e pí kpála bini de, nakolo bha li nedhinga li ngama Ndili gba kpála ma azúku lie ko.»

<sup>10</sup> Abhom̄-o, om̄kpata ayi ani me: «Ka ni li om̄suno na líli gba Moidje

\* **16:18** 16:18 Piga gba ma-a alú pí teme bhom̄: A akunda napa me Piga gba Ebhe-e alu pí 'li Piele inde ani apa e me Yesu ne Masiya, Ndili gba Ebhe inde uu-o. Tsia bhú Mat. 16:16, di ne bhú Efe. 2:20. † **16:24** 16:24 Nabi kulusi gba e: A ko naziba naz̄ likabhu di ne nakpi kabula Yesu.

ngapa lie me, a ayo me Eliya go ngaiza kala me Masiya go-o?» <sup>11</sup> Aní agie me: «A moko, Eliya agó mago, aní tsia léke ndu 'ngú hana ndjindji. <sup>12</sup> Engú la bini, ma apa pi yi me Eliya ago nani ago. Okpála mbila aní de, engú bini, u amene ndu 'ngú hana li kute aní maka u akunda lie. A ayo me ngama Ndili gba kpála ma dje bhadi likabhu ka uo moko.» <sup>13</sup> A la bhomu-o, nambila ka omukpata-a me aní adu akpo 'ngú pi o pindji Djaa bhulu nabatisa okpála.

*Yesu akobho ndili bini na bhobhoko li siti bua adu nadu bhú e*  
(Tsia bhú Mlk. 9:14-29; di ne bhú Luk. 9:37-43a.)

<sup>14</sup> Yesu ne omukpata gba e bata ake eta-o. U akolo lie de kambí okpála-a, kpála bini adyudyo lie de Yesu. Aní atutu lipaku e kuto kala aní, <sup>15</sup> aní atsia apa pi aní me: «Ngámá, dje nga mbo ndjinga ndili gba ma na bhobhoko-o. A li aní ne kuo na gbulu magbulu. A ngagbo 'i aní bhú djua, i du di-e bhú 'ngu piko. Aní ngadje likabhu naali. <sup>16</sup> Ma anu ne aní pi omukpata gba mu-o, la-a, u ti da nakobho aní de.» <sup>17</sup> Do Yesu de-e: «Ngayi-e, nabhuka gba yi-e su? Yi ne okpála na sisiti. Ma adu bhú dabili bini ne yi akolo bhú mangua nedhinga dho? Ma akibila yi akolo bhú mangua nedhinga dho? Yi go ne aní mama ei.» <sup>18</sup> U ago pi aní ne ndili-o. Yesu ambe bhú 'ndji siti bua-o, siti bua ango-o atsia akoto bhú ndili-o. Nayie bha li nedhinga bhomu-o, ndili ango-o atsia akobho.

<sup>19</sup> Abhomu-o, omukpata-a adyudyo lio de Yesu, u atsia ayi aní me u nde ne uo kpi o kpi me: «Musuno, ka ni ngaya makpe ya ti igini da nagbe siti bua bhomu-o lie di-e?» <sup>20</sup> Yesu agie pi uo me: «A ko anga nabhuka gba yi-e mbomboyé. Padhá de, anga ma apa pi yi na paká me, i dú me li nabhuka gba yi-e dú nga bha bhú 'ngbé lie maka lí kundju-o, yi de pá pi eta inde-e me: <Yie si, nu aoo>, i tsia nú oo. Kpéke da 'ngú de dú pi yi de. [ <sup>21</sup> La di-e, ngua siti bua bhomu-o tí da nakoto bha ka mayo bhú dabili bini ne natse 'zu ngú nayo Ebhe.]]

*Yesu akpo 'ngú pindji nakpi ne nazuku ka e bhutsibhutsi na bhisi*  
(Tsia bhú Mlk. 9:30-32; di ne bhú Luk. 9:43b-45.)

<sup>22</sup> Ekpí bini, Yesu ne omukpata gba e anu apo bhúla o ndu o hana abhu ndu doto na Galilaya. Aní atsia apa pi uo me: «A ayo me u pu ma Ndili gba kpála pi okpála na doto, <sup>23</sup> amba u bhelo ma, engú bini, bhú ekpí na bata-a, ma tsia zuku.» Abhomu-o, bua omukpata atsia asia likabhu naali.

*Yesu akala mandjandja na 'ngbé 'ti Ebhe gba omaYuda-o*

<sup>24</sup> Yesu ne omukpata gba e akolo bhú Kapalanauma. Li u akolo lie oo-o, okpála atsitsindji mandjandja na 'ngbé 'ti Ebhe gba omaYuda-a adyudyo lio de Piele, u atsia ayi aní me: «Musuno gba yi-e kakala naae mandjandja na 'ngbé 'ti Ebhe-e di?» <sup>25</sup> Piele agie me: «A mo ade, aní kala makala.» Li Piele ali la lie abhu 'ti-e, Yesu akpo nagama 'ngú ngae. Aní ayi Piele me: «Simo, mo obhundja pi? A kakala mandjandja, i du di-e otakisi gba ongbengbe ongámási na doto da, ne me a ko ongisi gba uo, ne me a ko okpála koko?» <sup>26</sup> Piele agie me: «A kakala ne okpála koko.» Abhomu-o, Yesu atsia apa pi aní me: «I du mo-o, ongisi gba ongámási kála naao de, anga uo bhú ngu o. <sup>27</sup> La-a, ngú napa me bua okpála inde-e asiti de-e, nu abhu ekpo. Bhike engbe bhú 'ngu. Sungu na kalanu inde mo ogbé e, bhulu 'bhe aní. Mo obháka oo lí falanga bini. Haha, amba mu ha pi uo, ngubula ní ne mu.»

## 18

*A ngbéngbé bhú Nau na abhúla-a da?*  
(Tsia bhú Mlk. 9:33-37; di ne bhú Luk. 9:46-48.)

<sup>1</sup> Bhú nedhinga bhomu-o, omukpata adyudyo lio de Yesu, u atsia ayi aní me: «A nga ngbéngbé bhú Nau na abhúla-a da?» <sup>2</sup> Yesu a'i mboyé ndili bini, aní a'o aní tu uo, <sup>3</sup> aní atsia apa me: «Ma apa pi yi na paká me, i du me yi nde li bua yi de, yi ké liyi ne kuto ngú nakolo maka ongisi na djedjedje de-e, yi lí belegu bhú

Nau na abhúlá-a de. <sup>4</sup> Padhá de, anga gagala 'ngú bhú ndili ade. Kaka-a, kpála bhende i ngakø lie ne kuto maka mboye ndili inde-e, kpála ango-o ngbéngbé bhú Nau na abhúlá-a ngae.»

*Yi ató okpála koko bhú siti 'ngú de  
(Tsia bhú Mlk. 9:42-48; di ne bhú Luk. 17:1-2.)*

<sup>5</sup> Yesu atsia apa matá pi omukpata gba e me: «Kpála bhende asía nga bha belegu kpála bhende ngakø lie ne kuto maka mboye ndili inde-e ka 'li ma-a, kpála ango-o ngasia bhomu-o ma makpe. <sup>6</sup> Engú bini, li kpála bini to suka ongisi bini inde abhuka ma-a bhú siti 'ngú-o, a ndjindji pi ani me u gbite ngingi tangulu ani, amba u bhike ani bhú 'ngbé 'ngu. <sup>7</sup> A ko likabhu pi okpála na doto, anga a ne engú bhelé inde ngato uo bhú siti 'ngú! A moko, engú na sisiti néke galikpe 'kpí bini de, engú la bini, a ko likabhu pi kpála inde i ngayie ka e ko!

<sup>8</sup> I du me 'kpa mu, i du di-e 'dhu mu nde ngato mu bhú siti 'ngú-o, mu de kodho, amba mu bhike de mu tsutsu. Padhá de, anga a ndjindji pi mu nali bhú mukobho na kukulu ne ekpa bini, i du di-e edhu bini. Bhobhomu-o ane ne bádha me u bhike mu ne 'kpa mu bhisi, i du di-e ne 'dhu mu bhisi hana bhú djua na duduma! <sup>9</sup> I du di me lí djila mu bini nde ngato mu bhú siti 'ngú-o, mu de gbe, amba mu bhike de mu tsutsu. Padhá de, anga a ndjindji pi mu nali ne djila mu bini bhú mukobho na kukulu. Bhobhomu-o ane ne bádha me u bhike mu ne djila mu bhisi hana bhú djua na duduma!»

*Gbitaku gba kandøle inde angita  
(Tsia bhú Luk. 15:3-7.)*

<sup>10</sup> Yesu atsia apa matá pi omukpata gba e me: «'E-e! Yi aú suka okpála inde ngakø lio ne kuto maka ongisi inde-e padhá de, anga ma apa pi yi me abhúlá-a, oandjelu gba uo ngalu ndu nedhinga hana kala 'Dyi ma. [ <sup>11</sup> Padhá de, anga ngama Ndili gba kpála ma ago nani ngú nakobho kpála bhende angita ko.]

† 18:16 18:16 Tsia bhú Det. 19:15.

<sup>12</sup> Yi ngabhundja pi? Li kpála bini du ne okandøle kámá bini-e, li suka uo bini ngita-a, ani 'ó ká obhende ndjikpa odukpabini ne ká odukpabini-e apí 'ta di, ani tsia nú nagili bhende angita-a di? <sup>13</sup> I du la me ani nde au ani au-o, ma apa pi yi na paká me, ani bédhe ne djali bedhe ane djali inde ani nde ne e ngú obhende ndjikpa odukpabini ne ká odukpabini inde i ngita naao de ko. <sup>14</sup> A moko, 'Dyi yi inde abhúlá-a kunda de me suka okpála inde ngakø lio ne kuto maka ongisi inde-e ngita belegu de bini.»

*Naleke 'ngú sunda o ne ondaise o*

<sup>15</sup> Yesu apa matá pi omukpata gba e me: «Li ndai mu mene mu sisiti-e, mu de nu bhaka ani, amba mu suno siti 'ngú gba ani-e pi ani me yi nde bhisi ka yi ne ani. Ani dje mu-o, amba mo osia ndai mu asia. <sup>16</sup> Ani dje mu de-e, mu de nu, mu ha kpála bini, i du di-e okpála bhisi, amba <engú ango-o lu li 'li okpála bhisi, i du di-e okpála bata+> maka li Bhuku gba Ebhe apa lie ko. <sup>17</sup> Ani dje uo de-e, mu de pa engú ango-o bhú Piga gba Ebhe. I du la me ani nde ayala nadjé belegu okpála na Piga gba Ebhe-e, a ayo me ani koló pi mu maka mupagano, la di maka ndombi na mandjandja.

<sup>18</sup> Ma apa pi yi na paká me, ndu 'he hana inde yi agbite e píla doto-o, a agbite bhadi lie abhúlá moko. Ndu 'he hana la di yi abhúlu e píla doto-o, a abhúlu bhadi lie abhúlá moko.»

*Nayo bhú dabili bini*

<sup>19</sup> Do Yesu pi omukpata gba e de-e: «Ma apa matá pi yi me, i du me píla doto, okpála bhisi bhú ká yi nde adje lio ngú nayo 'he, abana i du bha mangua 'he dhoie, 'Dyi ma inde abhúlá-a há ehe ango-o pi uo. <sup>20</sup> Padhá de, anga bili inde li okpála bhisi, i du di-e okpála bata apo bhúla o lie ne 'li ma-a, ma bhú ká uo oo.»

*Yi mbu li ondaise yi*

<sup>21</sup> Abhomu-o, Piele adyudyo lie de Yesu, do ani pi ani me: «Ngámá, li ndai ma mene siti 'ngú li pabili gba ma-a, ma de



mbu li ani bhutsibhutsi madho? A apise li bhutsibhutsi mananika?»<sup>22</sup> Yesu agie pi ani me: «Ma pa pi mu de me a apise li bhutsibhutsi mananika-a de, engú bini, a apise li bhutsibhutsi ndjikpa mananika bhutsibhutsi mananika.

<sup>23</sup> A bhadi moko, Nau na abhúlá-a, a maka tsingú gba 'ngbé ngámá bini inde akúnda nani naleke 'ngú na tia gba e ne okpála na kulu gba e-o.<sup>24</sup> Kalanu-o, u ago pi ani ne bhe bini inde adu ne tia gba ani-e bhelé na kuo kuo.<sup>25</sup> Li tia du la lie ka ani ngú nagigie de-e, ngámá-a atsia aha líli me u tsindji ani, ne wala ani, ne ongisi gba ani, la di ne ndu 'he gba ani-e hana, amba ni sia tia gba ni-e bhúbhú.<sup>26</sup> Abhomu-o, kpála na kulu-o ati bhú 'li 'dhu ani, ani atu 'ndji e ne kuto, ani atsia akikiliki lie pi ani me: «Du nga mbo ne 'ndjá bua li pabili gba ma, ma agie ndu tia gba mu-o hana.»<sup>27</sup> Ngámá adje ndjinga ani, ani ambu li ndu bopulu gba ani-e hana. Ani atsia a'o ani me ani nunu.

<sup>28</sup> Li kpála na kulu ango-o akoto lie, ani aké lie ne suka kilí e na kulu-o bini. Kpála ango-o adu ne bopulu gba ani na li falanga kámá bini má kpikili! Ani ati li ngulu kpála na bopulu gba e bhomu-o má gbu! Ani aholo nafelə ngulu ani me ni ngabhelə ani ne napa pi ani me: «Gie falanga gba ma inde ka mu ko.»

<sup>29</sup> Kilí ani ango-o ati bhú li 'dhu ani, ani aholo nakikiliki lie pi ani me: «Du nga mbo ne 'ndjá bua li pabili gba ma, ma agie pi mu magie.»

<sup>30</sup> Engú bini, bhe koko ayala. La matá pépé-e, ani aha ani, ani anu ne ani me u to ani bhú tikpu akólo bha bini li ani agie bopulu gba e lie-o.

<sup>31</sup> Li obi ani koko au lie mo-o, u adje likabhu li bua o naali. Kaka-a, u anu akpokpo ndu 'ngú bhomu-o hana maka a akodho 'kpí lie pi ngámá gba o-o.

<sup>32</sup> Abhomu-o, ngámá gba ani-e atsia apa me u 'i ani. Do ngámá-a pi ani de-e: «Mu ne siti kpála na kulu! Ma ambu li ndu bopulu gba mu inde-e hana, anga mo okikiliki limu mu. <sup>33</sup> Ngamu di-e, a ayo igini de me mu dje di ndjinga kilí mu

maka ngama makpe ma adje ndjinga mu lie di?»<sup>34</sup> Bua ngámá-a ake naali. Ani aha ani, ani anu ne ani pi okpekpeke obhosi me u mene ani kpekpeke, ngú nakolo bha bini li 'kpí inde ani agie ndu bopulu gba e lie hana ko.

<sup>35</sup> 'Dyi ma inde abhúlá améne bhadi pi yi moko, i du me kpála ne kpála nde mbu li ndai e ne bua e hana de ko.»

## 19

*Yesu asuno pindji nagbo bhusu o bhú kúva*

*(Tsia bhú Mlk. 10:1-12.)*

<sup>1</sup> Nedhinga li Yesu andjia nagama ongú bhomu-o lie, u ayie ne omukpata gba e bhú ndu doto na Galilaya. U atsia anu bhú ndu doto na Yudaya inde lingo ngade 'ngu na Djuludani-o.<sup>2</sup> Bhiti okpála akpata ani oo. Abhomu-o, ani atsia akobho okpála na kuo inde adu bhú ká uo-o.

<sup>3</sup> Omufalaisai koko adyudyo lio de ani. U atsia ayi ani ngú nale ani me: «Líli gba ní-e aziba pi bhoko uu me ani gie wala e abana i du bha mangua 'ngú dhoie?»<sup>4</sup> Ani agie me: «Yi tanga nga engú li Bhuku gba Ebhe-e apa e de me nani li lilita-a, Ebhe abho uo elə ne bhoko-o di?»<sup>5</sup> Bhuku ango-o atsia apa matá me: ka 'ngú ango-o, bhoko a'ó ká 'dyi e ne 'hi e, ani tsia dhédhe li wala e. Ndu uo bhisi hana tsia kólo koli kpála bini.†<sup>6</sup> Kaka-a, ma apa pi yi me, uo matá bhisi ade. Engú bini, u akolo koli kpála bini. A ayo de me kpála gbo bhusu 'he inde li Ebhe agbite e de!»<sup>7</sup> Abhomu-o, omufalaisai ayi ani me: «Ka ni la li Moidje aha nani líli lie me bhoko ha balua nagbo bhusu e pi wala e nedhinga ani agie ani lie?»<sup>8</sup> Yesu agie me: «Moidje aha nani kpadji pi yi ngú nagie olisi gba yi-e ka kpéke 'ndji gba yi-o. Engú la bini, a li lilita-a, adu nani mo-o de.<sup>9</sup> Ma apa pi yi me: i du me kpála nde agie wala e, a nde de me elə ango-o akúnda gala bhoko de-e, i du me kpála ango-o nu ha elə koko-o, kpála ango-o akúnda bhomu-o elə koko.»

† 19:4 19:4 Tsia bhú Dje. 1:27, 5:2. † 19:5 19:5 Tsia bhú Dje. 2:24.

<sup>10</sup> Omukpata-a apa pi ani me: «Ɔ dũ me líli gba bhoko lí pabilí gba wala e nde mo-o, tata lí naha lío ade.» <sup>11</sup> Aní agie pí uo me: «Ndũ okpála hana kò mboli engú bhomũ-o de, bha bini obhende lí Ebhe aka kpadjì pí o tété-o. <sup>12</sup> A ne engú bhelé bhelé inde nga'o me kpála dũdũ bhú lingbangi. Pí okpála koko-o, u azu uo me angu na òlò nde bhú uo ade. Pí okoko, okpála asiti uo ngao. A la di ne okoko í ha olisi de, ngubula na'o lío kpi ngubula Nau na abhúlá . A ayo me kpála inde atí da nake mboli nasuno inde-e, aní kò mbolimboli kòkò.»

*Yesu atuko bisagu pí ongisi*

*(Tsia bhú Mlk. 10:13-16; di ne bhú Luk. 18:15-17.)*

<sup>13</sup> Abhomũ-o, okpála ago pí Yesu ne ongisi ngubula me aní 'o 'kpa e pí 'ndjì uo, amba aní yo Ebhe pí uo. Engú bini, omukpata aholo nayoko okpála ango-o. <sup>14</sup> Yesu atsia apa pí omukpata-a me: «Yí 'o ongisi bhomũ, u go bhaka ma, yí ayóko uo de, anga Nau na abhúlá pí okpála bhende lí bua o nde maka ongisi ko.» <sup>15</sup> Aní a'o 'kpa e pí 'ndjì uo, pípíta-a, aní atsia ayie lí bíli bhomũ-o.

*Bhulũ tia bini ayi 'ngú pindjì mukobho na dũdũma*

*(Tsia bhú Mlk. 10:17-31; di ne bhú Luk. 18:18-30.)*

<sup>16</sup> Abhomũ-o, makombi bini adyudyo líe de Yesu. Aní atsia ayi aní me: «Mũsuno, a ayo me ma mene mangua bádha 'ngú dho ngú nasia mukobho na dũdũma-a?»

<sup>17</sup> Yesu agie pí aní me: «Mũ ngayi ma pindjì bádha 'ngú ka ní? Koli bádha kpála bha bini. Ɔ dũ me mũ nde akũnda nali bhú mukobho na dũdũma-a, líla olíli-e malila.» <sup>18</sup> Makombi ango-o ayi Yesu me: «Olíli bhedho?» Yesu agie pí aní me: «Mo obhólò kpála de, mo okũnda òlò, í dũ di-e bhoko koko de, mo ozí 'he de, mo opá 'ngú lí kilí mũ bhú djila okpála ne eu de.

<sup>19</sup> Manga 'dyi mũ ne 'hi mũ mamanga. Kũnda kilí mũ maka mo okũnda límũ líe ngamũ makpe-o.†» <sup>20</sup> Makombi-e apa pí aní me: «Ndũ 'he bhomũ-o hana, ma amene. A aneke matá ma ne bhedho?»

<sup>21</sup> Yesu apa pí aní me: «Ɔ dũ me mũ nde akũnda nadũ ngbingbili-e , nũ tsindjì ndũ 'he inde ka mũ-o hana, amba mũ ha tia ango-o pí obhulũ ndibhili. Abhomũ-o, mũ tsia sía tia abhúlá. Pípíta-a go kpata ma!»

<sup>22</sup> Lí makombi bhomũ-o adje 'ngú bhomũ-o líe, aní agie líe ne líkabhu naali, anga tia adũ nani ka aní na mũgwe mũgwe.

<sup>23</sup> Abhomũ-o, Yesu atsia apa pí omukpata gba e me: «Ma apa pí yí na paká me, da nali ka bhulũ tia bhú Nau na abhúlá-a kpekpeke. <sup>24</sup> Ma amata apa pí yí ne toto me da nali ka enũ maka eya lí gudho mũsana kpekpeke. La-a, da nali ka bhulũ tia bhú Nau gba Ebhe-e ane la matá ne kpéke.» <sup>25</sup> Lí omukpata adje eli bhomũ-o líe, u angamba na kuo kuo. U adũ apa me: «Ɔ dũ mo-o, a atí la íbili da nakobho da?» <sup>26</sup> Yesu atsia uo, aní atsia apa pí uo me: «Pí okpála-a, a tí da namene líe de, engú bini, pí Ebhe-e, a tí da namene líe.»

<sup>27</sup> Abhomũ-o, Piele atsia ayi aní me: «Mũsuno, djedje nga. Ngaya-a, ya a'o ká ndũ 'he hana ngú nakpata mũ. Engú bhe gba ya-a adú lele e pí?» <sup>28</sup> Yesu agie pí omukpata-a me: «Ma apa pí yí na paká me, nedhinga lí doto adjí líe líe na mbia-a, Ndíli gba kpála adú pí kiti na asasaua gba e-o. Ngayi obhe akpata ma-a, yí tsia dũ di pí okiti na ngámá ndjikpa ne ká bhisi ngú nakodho 'ngú gba opiga ndjikpa ne ká bhisi gba omaɽsalaele ko. <sup>29</sup> La di-e, kpála ne kpála inde a'o ká oeti gba e, í dũ di-e ondaise e na obhosibhosi ne obhe na olisilisi, í dũ di-e 'dyi e ne 'hi e, í dũ di-e ongisi gba e, í dũ di-e edyi gba e ngubula 'lí ma-a, aní asía matá koko bhelé. Aní tsia sía di mukobho na dũdũma. <sup>30</sup> Yí mbila ndjindjì me, bhelé na obhende mbia inde-e ne okpála na kalanũ-o, akólo okpála na asidi, lí obhende mbia inde asidi-e, tsia kólo okpála na kalanũ.»

## 20

*Gbitaku gba bhulũ 'dyi vino ne okpála na kulu gba e*

<sup>1</sup> Abhomũ-o, Yesu atsia apa matá me: «Yí gbo nga 'dje yí. Nau na abhúlá mana

† 19:19 19:18-19 Tsia bhú Eki. 20:12-16; ne bhú Det. 5:16-20; di ne bhú Lev. 19:18.

lie ne tsingɔ gba bhulɔ 'dyi bini. Bhulɔ 'dyi ango-o akoto agba e kɛkpí má bhé ngubula naha okpála ngú kulu na edyi na vino gba e-o. <sup>2</sup> Aní au uo lie, u adje lio ne uo me ni ahá kuo 'kpa pi uo li lele kulu na ekpí bini. Aní atsia atima uo ngú nanɔ amene kulu abhiye na vino gba e-o. <sup>3</sup> Aní akoto matá bhú saa na odukpabini na kɛkpí. Aní au okpála inde alulɔ li bili bini bhomɔ-o mandí kulu. <sup>4</sup> Aní pi uo me: <Ngayi di-e, yi nɔ abhiye gba ma-o. Kuo 'kpa ma ahá e pi yi-e, adú li lelele.> <sup>5</sup> Abhomɔ-o, u atsia agbida oo. Bhulɔ 'dyi-e akoto matá tulukpe. Pipita-a, aní akoto matá bhú saa na bata pita tulukpe. Ndɔ nedhinga aní adɔ akoto lie hana, aní adɔ abhaka okpála koko alulɔ li bili bini bhomɔ. U adje lio ne uo, aní atsia apa pi uo me u nɔ abhiye gba ni ko.

<sup>6</sup> Nakolo matá bhú saa na bhuluvue pita tulukpe-e, aní akoto. Aní abhaka okpála koko alulɔ oo. Aní atsia ayi uo me: <Yi alulɔ si ngbolo 'kpí libhomu mandí kulu ka ní?> <sup>7</sup> Do uo pi aní de-e: <A ko anga kpála bini ha ya bhú kulu de.> Aní pi uo me: <Ngayi di-e, yi nɔ mene kulu abhiye na vino gba ma-o.>

<sup>8</sup> Li ekpí akolo lie tagolo-o, bhulɔ 'dyi-e apa pi kapita gba e me: <Í okpála na kulu-o, amba mɔ ha kuo 'kpa gba kpála ne kpála pi e, nayie li obhe ago sidi ngú nabu soso li obhe ago igini kalanɔ-o.> <sup>9</sup> Obhe akpo igini lita kulu bhú saa na bhuluvue pita tulukpe-e ago. Kpála ne kpála atsia asia kuo 'kpa maka u adje igini lio ne uo lie-o. <sup>10</sup> Li obhe ago igini kalanɔ-o ago lie, u abhundja naao me o osía tia bhelé nane obhe ago igini sidi-o. Engú bini, ngauo di-e, kpála ne kpála asia kuo 'kpa aviti bini ne obhe ago igini sidi-o. <sup>11</sup> Ú adɔ asisia lie, u aholo adi mutokono li bhulɔ 'dyi-o. <sup>12</sup> U adɔ apa me: <Okpála inde-e ago sidi. U amene kulu bha koli saa bini má kpíkili, la-a, mɔ ngaha uo aviti bini ne ya, ngaya okpála inde andala ne kulu ngbolo 'kpí libhomu bhú ke ku 'la!>

<sup>13</sup> Engú bini, bhulɔ 'dyi-e agie pi sɔka uo me: <Olia ma, mɔ ti da nadi mutokono de. Ma aha tia gba mɔ-o pi mɔ maka ní

adje igini liní ne mɔ lie-o. <sup>14</sup> Ha tia gba mɔ-o, tatapa. Ma tí da naha pi obhende ago sidi-e bha maka ma aha pi mɔ lie-o. <sup>15</sup> Mɔ mbila de me ma ti da namene ne tia gba ma-a maka ma akunda lie di? Ne me mɔ ngatsia ma ne ndje djila ka ma amene okpála bhe ago sidi-e lie ndjindji-e!>> <sup>16</sup> Yesu atsia abu tata-a me: «Okpála inde asidi-e akólo okpála na akalanɔ, li okpála na kalanɔ-o tsia kólo okpála na asidi.»

*Yesu apa matá bhútsibhútsi na bata engú nakpi ne nazuku ka e*  
(Tsia bhú Mlk. 10:32-34; di ne bhú Luk. 18:31-34.)

<sup>17</sup> Lí Yesu adɔ lie nanɔ bhú Yelusalema-a, aní a'í omukpata gba e de e titi o. Aní atsia apa pi uo me: <sup>18</sup> «Yi djedje nga! Ní adji bhú Yelusalema, bili inde u apú ma Ndili gba kpála lie pi ongbengbe odimandɔ di ne omɔsuno na líli gba Moidje-o. U akódho 'ngú gba ma-a me ma kpi bha makpi. <sup>19</sup> U apú ma pi okpála inde ne omaYuda ade ngubula me u mɔ ma. U abhí ma ne fimbo, u tsia gí ma li kulusi. La-a, ekpí na bata-a, ma tsia zúku.»

*Mayo gba wala Djebedayo*  
(Tsia bhú Mlk. 10:35-45.)

<sup>20</sup> Abhomɔ-o, wala Djebedayo adyudyo lie de Yesu bhú dabili bini ne ongisi gba e bhisi na obhosibhosi, Djaki ne uo ne Djaa, inde adɔ nani omukpata gba Yesu-o. Aní atɔ 'ndji e ne kuto kala Yesu ngú nayo 'he ka aní. <sup>21</sup> Yesu ayi aní me: «Mo okunda me ma mene pi mɔ ní?» Aní agie pi Yesu me: «Tsia nga ongisi gba ma bhisi inde. Ha líli me u dulɔ bhú Nau gba mɔ-o: bhe bini li pá 'kpa mɔ na kokpa, bhe koko li pá 'kpa mɔ na gali.» <sup>22</sup> Do Yesu de-e: «Yi mbila ehe inde yi ngayo e de. Yi ti da nazɔ likabhu inde ma azú e uu?» U agie me: «Ya ti da nazuzɔ.» <sup>23</sup> Yesu atsia apa pi uo me: «A moko, likabhu ma azú e, yi azú mazɔ. La-a, ngú nadɔ ka yi li pá 'kpa ma na kokpa ne bhe na gali-e, a ko 'ngú ka ma nakodho 'ngú tété de. Obili bhomɔ-o pi okpála inde li 'Dyi ma aleke pi o ko.»

<sup>24</sup> Li omukpata bhe ndjikpa adje 'ngú bhom̄-o lie, u ake 'ngú lio pi omukpata bhe bhisi bhom̄-o. <sup>25</sup> Abhom̄-o, Yesu a'i ndu omukpata hana me u go de ni. Ani atsia apa pi uo me: «Yi mbila ndjindji me ongámási na doto a'o omaha o pi o ma'o, ongbengbe okpála adele omaha o sa 'dhu o. <sup>26</sup> A ayo de me a du bhú ká yi mo-o de. A ayo mangbo me i du me kpála nde akunda nadu 'ngbé kpála bhú ká yi-e, ani de du kpála na kulu gba yi. <sup>27</sup> La di-e, li kpála bini kunda nadu kpála na bini bhú ká yi-e, ani de du bali gba yi-o. <sup>28</sup> A bhadi moko, ngama Ndili gba kpála ma go ngú napa de me okpála mene kulu lio pi ma-a de. Engú bini, ma ago mangbo ngubula namene kulu lima pi okpála, amba ma ha di mukobho gba ma-a maka tia ngú nagbegbe okpála bhelé bhú siti 'ngú gba o-o.»

*Yesu akobho okpála bhisi inde i u 'kpí de*  
(*Tsia bhú Mlk. 10:46-52; di ne bhú Luk. 18:35-43.*)

<sup>29</sup> Nedhinga li Yesu ne omukpata gba e adu akoto lie bhú gudhu na Djeliko-o, bhiti okpála atsia akpata ani. <sup>30</sup> Abhaka me okpála bhisi inde i u 'kpí de-e nde adulu lingo kpadji oo. U adje me Yesu ngakodho 'kpí bhom̄-o ngae. Abhom̄-o, u aholo nasusula me: «Ngámá, ndili gba Davidi, dje ndjinga ya!» <sup>31</sup> Bhiti okpála bhom̄-o adu ambembe bhú 'ndji uo ngubula me u ndjili má bulu! Engú bini, u aholo matá nasusula kpekpeke me: «Ngámá, ndili gba Davidi, dje ndjinga ya!» <sup>32</sup> Abhom̄-o, Yesu alu. Ani a'i uo. Ani atsia ayi uo me: «Yi akunda me ma mene pi yi mangua 'ngú dho?» <sup>33</sup> Do uo pi ani de-e: «Ngámá, mene me djila ya u 'kpí.» <sup>34</sup> Yesu adje ndjinga uo, ani abu 'kpa e li djila uo. Ma gala kolo me-e, u aholo nau 'kpí. Abhom̄-o, u atsia akpata ani.

## 21

*Yesu ali bhú Yelusalema*  
(*Tsia bhú Mlk. 11:1-11; ne bhú Luk.*

*19:28-40; di ne bhú Dja. 12:12-19.)*

<sup>1</sup> Yesu ne omukpata gba e akolo masikpe de Yelusalema. U adu ibili de kuti na Betefadje, li ngba 'ta na ondula na Olive. Abhom̄-o, Yesu atsia atima omukpata bhisi bhú ká omukpata gba e-o. <sup>2</sup> Ani apa pi uo me: «Yi nu bhú kuti inde kala yi aoo. Yi akólo lie oo, yi abháka kolo me u nde agbite punda na ølø bini, la di ne ndili punda bini bhú dabili bini ne ani. Yi bhulu uo, amba yi go ne uo muma. <sup>3</sup> Li kpála bini yi yi me yi adji ne uo suoie, yi de gie me: «Ngámá ne gumu uo.» Abhom̄-o, ani 'ó bha kolo me yi nu ne uo nanu.» <sup>4</sup> Engú bhom̄-o améne lie mo-o ngubula me engú inde li polofeta apa nani e, amene lie. Polofeta apa nani me: <sup>5</sup> «Yi pa pi okpála na Siona me: <Yi tsitsia nga, 'ngbé ngámá gba yi-e ngago agba yi. Ani akø lie ne kuto. Kaka-a, ani adu pí 'ngbu ndili punda.†>»

<sup>6</sup> Omukpata-a anu, u atsia amene maka li Yesu apa pi uo lie-o. <sup>7</sup> U ago ne ndili punda ne 'hi e. U aha okoti gba o-o, u abu pí 'ngbu uo. Abhom̄-o, Yesu atsia adu pí 'ngbu ndili punda-o. <sup>8</sup> Bhiti okpála na bhighbiti apa okoti gba o kuto li kpadji. Okoko adu atsolo 'kpá ngulu, u atsia adu napapa li kpadji. <sup>9</sup> Bhiti okpála inde adu adholo kala ani di ne obhende adu nakpata ani-e adu asusula me:

«Odjana\* pi ndili gba Davidi!

A ayo me bisagu du pí kpála inde ngago ne 'li Ngámá-o!

Odjana pi Ebhe inde abhúlá-o!†»

<sup>10</sup> Li Yesu ali lie bhú Yelusalema-a, gudhu-o adimba madimba. Okpála adu ayi me: «A ko da?» <sup>11</sup> Bhiti okpála atsia adu agie me: «A ko polofeta Yesu, kpála na Nadjaleta bhú ndu doto na Galilaya.»

*Yesu apandja okpála natsindji 'he bhú 'ngbé 'ti Ebhe gba omaYuda*

(*Tsia bhú Mlk. 11:15-19; ne bhú Luk. 19:45-48; di ne bhú Dja. 2:13-22.*)

† 21:5 21:5 Tsia bhú Djkl. 9:9. \* 21:9 21:9 Odjana: A akunda napa bhú eli gba oebele me «Sangu .» Tsia bhú Ets. 118:25-26. † 21:9 21:9 Tsia bhú Ets. 118:25-26.

12 Pipita-a, Yesu ali bhú 'ngbé 'ti Ebhe gba omaYuda-o. Ani apandja ndu okpála hana inde adu natsindji onu di ne odhu inde u adu aha o pi Ebhe, a la di-e obhende adu akakala kilidjo. Ani abala omisa gba okpála nayipa falanga, di ne odabili gba okpála natsindji opidjo-o kuto.

13 Abhomu-o, ani atsia apa pi uo me: «U aye bhú Bhuku gba Ebhe-e me, Ebhe apa me, <u a'í eti gba ma-a me a ko eti na mayo.> La ngayi-e, yi adjí, a tsia akolo bili gba obhulu 'zil!†»

14 Abhomu-o, okpála inde i u 'kpí de ne obhende na eze-e adyudyo lio de ani bhú 'ngbé 'ti Ebhe gba omaYuda, ani atsia akobho uo. 15 Li ongbengbe odimandø gba Ebhe , di ne omusuno na líli gba Moidje au ongamba 'ngú inde ani amene e lie, la di ne ongisi inde adu asusula bhú 'ngbé 'ti Ebhe gba omaYuda me: «Odjana pi ndili gba Davidi-e», u asia siti bua .

16 Abhomu-o, u atsia ayi Yesu me: «Mu ngadje engú inde li ongisi bhomu-o ngapa e uu?» Yesu atsia agie pi uo me: «Hení, ma ngadjedje hana. Yi tanga nga engú inde li Davidi apa nani e bhú Bhuku gba Ebhe-e belegu de bini? Davidi apa nani me, Ebhe amene me belegu ongisi na djedjedje ne obhende ngandji 'ka toko ni.†» 17 Pipita-a, ani a'o ká ongbengbe odimandø di ne omusuno na líli gba Moidje-e bhú gudhu oo. Ani atapa bhú kuti na Betania, ani atsia asi oo ko.

*Yesu atu pødjø li 'lá figi inde i li líli de (Tsia bhú Mlk. 11:12-14, 20-24.)*

18 Køkpí li ekpí aseke lie, li Yesu aholo nagie matá lie lie abhú gudhu-o, ani aholo nadge gumu. 19 Abhomu-o, ani au 'lá figi deno 'hi-kpadji. Ani adyudyo lie dede masikpe, engú bini, ani bhaka 'he bhúbhú belegu de bini, bha bini ndu mbulu kpákpá padhá. Ani atsia apa pi ndula na figi-e me: «Mu lí matá líli belegu de bini!» Kolo me-e, 'lá figi a'ulu hana má kekele! 20 Li omukpata au lie mo-o, u angamba naali, u atsia ayi Yesu me: «Lele pi li 'lá figi-e a'ulu bha lie ma 'li mu-o?»

21 Do Yesu pi uo me: «Ma apa pi yi na paká me, i du me yi nde ne nabhuka , yi du ne bua na bhisi bhisi de-e, yi méne bha bini engú inde ma amene e li kute 'lá figi-e de. Engú bini, yi ti da napa belegu pi eta inde-e me: <Yie oo, amba mu nu ti bhú ngade 'ngu>, i tsia méne lie moko. 22 I du me yi nde ne nabhuka-a, ndu 'he hana inde yi ayó e bhú mayo-o, yi asia masia.»

*A ngaha angu pi Yesu da?*

*(Tsia bhú Mlk. 11:27-33; di ne bhú Luk. 20:1-8.)*

23 Yesu akolo lie bhú gudhu-o, ani ali matá bhú 'ngbé 'ti Ebhe gba omaYuda-o. Ani atsia aholo nasuno pi okpála. Abhomu-o, ongbengbe odimandø gba Ebhe, ne obhelesi okpála adyudyo lio de ani. U atsia ayi ani me: «A aha kpadji pi mu ngu namene ongú inde-e da? A aha la di angu ango-o pi mu nganga da?» 24 Yesu agie pi uo me: «Ngama di-e, ma ayi yi li koli engú bini. I du me yi nde agie 'ngú muma tété-e, ma tsia pá di pi yi me ma ngamene ehe inde-e ne mangua angu dho-ie.

25 Ma ngayi yi me: «A aha nani kpadji pi Djaa ngu nabatisa okpála da? Ne me aha nani kpadji pi ani ne okpála, ne me aha kpadji pi ani ne Ebhe?» U atsia aholo natoto bua o sunda o me: «I du me ní nde apa me: <A aha kpadji pi ani ne Ebhe-e>, ani yi ní me: <Ka ni la yi bhuka nani ani lie de-e?» 26 I du la di me ní nde apa me: «A aha kpadji pi ani ne okpála-a», ní de tsia 'kpí liní ka okpála-a ndjindji, anga ndu okpála hana du nani nau Djaa me a ko polofeta.» 27 Abhomu-o, u atsia agie pi Yesu me: «Ya mbila de me aha nani kpadji pi ani da-ie de.» Ngaani di-e, ani atsia apa pi uo me: «Ngama-a, ma pá di pi yi de me aha angu muma ngu namene ongú inde-e da-ie de.»

*Gbitaku pindji ongisi bhisi*

28 Yesu atsia ayi matá me: «Yi apa nga naayi li 'ngú inde-e pi? Kpála bini adu nani ne ongisi gba e bhisi. Ani anu abhaka bhe na kalanu-o, ani atsia apa pi ani me: <Ndika ma, naki-e, nu mene

† 21:13 21:13 Tsia bhú Iša. 56:7; di ne bhú Djlm. 7:11.

† 21:16 21:16 Tsia bhú Ets. 8:3.

kulu abhiye na vino.> <sup>29</sup> Ndili agie me: <Ma nɔ de.> Pipita-a, ani adji bua e, ani atsia anɔ abhiye-o. <sup>30</sup> 'Dyi uo anɔ apa di pi bhe na bhisi-e me ani nɔ abhiye na vino-o. Bhobhomɔ-o agie pi ani me: <Ma adji, 'dyi ma.> La-a, ani tsia nɔ de. <sup>31</sup> Bhú ká ongisi bhisi bhomɔ-o, a amene engú inde li 'dyi uo adɔ akunda e da?» U agie me: «Bhende na kalanɔ-o.» Yesu atsia apa pi uo me: «Ma apa pi yi na paká me, ondombi na mandjandja, di ne obambakuya ali pi yi kalanɔ bhú Nɔ gba Ebhe-o . <sup>32</sup> Padhá de, anga Dja a ago agba yi ne nasuno pi yi kpadji na ngbili 'ngú , yi tsia bhuka ani de. Engú bini, ondombi na mandjandja di ne obambakuya atsia abhuka ani. Abana yi au ndɔ 'ngú bhomɔ-o hana lie ne djila yi-e, ngayi-e, yi bhuka ani de.»

*Gbitaku pindji osisiti okpála na kulu  
(Tsia bhú Mlk. 12:1-12; di ne bhú Luk.  
20:9-19.)*

<sup>33</sup> Yesu atsia apa matá me: «Yi dje nga matá gbitaku koko inde. Bhulɔ bili bini alu nani ngu vino, ani asa ngongo-o hana ne aga. Ani adji edú ngú napi olíli-e bhúbhú, ani atsia ayiki 'ndjá 'ti abhúlá bhúbhú ngubula nalila edyi-o. Pipita-a, u adje lio ne okpála ngú namene kulu bhú 'dyi-o, amba o dɔ agbó bhusu o ne uo li nguwa-o. Abhomɔ-o, ani atsia atapa dhuku. <sup>34</sup> A akolo lie li nedhinga nako líli-e, ani atima okpála na kulu gba e agba okpála inde ngamene kulu bhú 'dyi vino me u ha nguwa bhe gba ni-e pi ni haha.

<sup>35</sup> Engú bini, okpála namene kulu bhú 'dyi vino azumɔ bha okpála ango-o hana. Bhe bini-e, u abhi ani má kpu! Bhe koko-o, u abhelo ani, bhe na bata-a, u atutulɔ ani ne teme. <sup>36</sup> Abhomɔ-o, bhulɔ 'dyi-e atima matá okpála na kulu koko bhelé nane obhende na kalanɔ-o mane. U amene bhadi uo moko. <sup>37</sup> Ali soso-o, ani atima ndili gba e agba okpála ango-o ne nabhundja me: <U amánga ndili gba ma-a mamanga.> <sup>38</sup> Engú bini, li okpála namene kulu bhú 'dyi vino au ndili-e lie, u apa sɔnda o me: <Kukulɔ kpála inde

atígala la ndjɔ ne edyi-e ngae inde. Yi gógo, ní bhelo ani, amba ní tigala ibili ne edyi-e nganí!» <sup>39</sup> Abhomɔ-o, u ati pi ani má kii! U aha ani, u agbe ani bhú 'dyi na vino-o, u atsia abhelo ani.

<sup>40</sup> Mbia inde-e, nedhinga li bhulɔ 'dyi vino agó lie, ani améne ngú okpála na kulu bhomɔ-o pi?» <sup>41</sup> U agie pi ani me: «Ani abhili omabhobhelo kpála bhomɔ-o hana, ani djé ndjinga uo de. Pipita-a, ani há 'dyi vino pi okpála koko ngú namene kulu bhúbhú, obhende ahá nguwa pi ani bhú nedhinga u adje lio ne uo li e-o.»

<sup>42</sup> Yesu atsia apa pi uo me yi ngagama 'ngú mugito me yi tanga nga engú inde li Bhuku gba Ebhe-e apa e belegu de bini. Bhuku gba Ebhe-e apa li 'ngú gba Masiya me:

«Teme inde li okpála nayiki eti-e au me a ne tata ade-e,  
a akolo teme inde abi eti-e libhomu-o ngae.

Ebhe Ngámá amene mo-o ngae.

Bhú djila ní-e, a ko 'ngú na ngangamba!†»

<sup>43-44</sup> Kpála bhende atí pí teme ango-o, ani gúgamɔ. Kpála bhende la di li teme ango-o atí pí e, teme ango-o bá mbu ani má mbu! Ka yi au teme li Bhuku gba Ebhe-e apa 'ngú e lie padhá-a, ma apa pi yi me, ngayi-e, Ebhe aní 'bhe bhoti na Nɔ gba e pi yi mani, ani tsia bhulu pi okpála bhende ngamene engú inde ani akunda e-o.

<sup>45</sup> Li ongbengbe odimandɔ di ne omɔFalisai adje gbitaku ango-o lie, u atsia akɔ mbolimboli me ani de ngagama 'ngú bhomɔ-o pindji o. <sup>46</sup> U aholo agili kpadji ngú naholo ani, engú bini, u adɔ ne tsulɔ ka okpála, anga okpála adɔ au me a ko polofeta.

## 22

*Gbitaku pindji 'ngbé anokomia na kɔva  
(Tsia bhú Luk. 14:15-24.)*

<sup>1</sup> Abhomɔ-o, Yesu apa matá gbitaku pi okpála ani adɔ akpo 'ngú pi o-o me: <sup>2</sup> «Yi tsia nga engú inde li Nɔ na abhúlá akpo 'ndji e ne e-o: A maka tsingɔ gba 'ngbé

† 21:42 21:42 Tsia bhú Ets. 118:22-23.

ngámá bini inde amene anokomia na kúva pí ndili gba e na bhobhoko. Aní atsia a'i okpála bhú anokomia ango-o. <sup>3</sup> Ekpí na anokomia ale lie, aní atima okpála na kulu gba e na'i okpála inde aní a'i o me u go bhú anokomia ango-o. Engú bini, u ziba nago lí e'i ango-o de.

<sup>4</sup> Aní atima matá okpála na kulu koko. Aní aha líli pí uo me u nù pa pí okpála aní a'i o-o me: <Mbia inde-e, ma alù ezù gba ma-a alù. Ma abhili obagala gba ma ne onù na tsikpa abhili, ndùndù hana ibili bedhe. Yi go bhú anokomia ango-o gogo!> <sup>5</sup> Engú bini, ngauo-o, u adje bha ne 'dje o. U atsia agbida bhú ongú gba o. Bhe bini aholo ne enú abhú 'dyi gba e, koko bhú natsindji mase gba e. <sup>6</sup> Okoko aholo okpála na kulu inde u atima o-o, u amene uo kpekepeke, u atsia abhili uo. <sup>7</sup> Lí 'ngbé ngámá-a adje lie, aní abí 'gú naali. Abhomù-o, aní atsia atima osùdha gba e me u bhili omabhèbhèlè kpála bhomù, amba u to di djua lí gadhù gba uo-o.

<sup>8</sup> Pipita-a, aní atsia apa pí okpála na kulu gba e me: <Anokomia na kúva-a bedhe. Engú bini, okpála ma a'i o-o tí matá da nago bhúbhú de. <sup>9</sup> Kaka-a, yi nù lí odi kpadji, yi 'i ndù okpála inde yi abháka o hana, amba u go zù 'he-o.> <sup>10</sup> Okpála na kulu bhomù-o aze lí okpadji. U atsia apo bhúla okpála bhende u adù abhaka o-o hana, obabadha okpála di ne osisiti okpála. U anù ne uo bhú 'tí na anokomia-o. Abhomù-o, tína 'tí na anokomia atsia abedhe ne uo bedhe.

<sup>11</sup> Abhomù-o, 'ngbé ngámá-a ali bhú 'tí na anokomia ngubula natsia okpála inde aní a'i o-o. Aní au kpála bini inde i dyi bongo na anokomia de. <sup>12</sup> Aní ayi kpála ango-o me: <Wai, mo olí ei lele pí me mù nde dyi bongo na anokomia di-e?> Kpála ango-o andjili bha má bulu! <sup>13</sup> Abhomù-o, 'ngbé ngámá-a apa pí okpála na kulu-o me: <Yi gbigbite 'kpa aní ne 'dhù aní, amba yi bhike aní bhú bití akilidjo. Oo-o, aní adú aku 'gbá ne nazù tate e.>>

<sup>14</sup> Yesu atsia abu tata-a me: «A moko, Ebhe a'i okpála bhelé, engú la bini, obhende aní alo o-o, uo bhelé ade.»

*OmùFalisai ato Yesu pindji nakala mandjandja gba 'ngbé ngámá Kaisala*  
(Tsia bhú Mlk. 12:13-17; di ne bhú Luk. 20:20-26.)

<sup>15</sup> Abhomù-o, omùFalisai anù nadi bula ngubula nagili kpadji ngú nateke Yesu lí 'li e. <sup>16</sup> U atsia atima té omùkpata gba o bhú dabili bini ne okpála gba Elode ngubula napa pí Yesu me: «Mùsuno, ya mbila ndjindji me mù ngapa ngbili 'ngú . Mù ngasuno bhadi kpadji gba Ebhe-e ngbingbili. Tsulù kpála belegù lí mù ade bini, anga mù tsia di engbé gba kpála de. <sup>17</sup> Mù ngabhundja naamù pí? A ayo me ya kala mandjandja gba 'ngbé ngámá Kaisala ne me ya kala de. Pa nga pí ya.» <sup>18</sup> Engú bini, lí Yesu ambila siti kali gba uo-o lie, aní atsia apa pí uo me: «Obhùlù kali inde-e, ka ní yi ngato ma lie? <sup>19</sup> Yi suno nga falanga inde u akakala mandjandja ne e mùmà.» U atsia ago pí aní ne lí falanga bini. <sup>20</sup> Yesu atsia ayi uo me: «Kulu kpála, ne balù inde pí lí falanga inde-e, a ko naa da?» <sup>21</sup> U atsia agie pí aní me: «A ko naa Kaisala.» Abhomù-o, aní atsia apa pí uo me: «Yi ha oehe bhende lí Kaisala ngayo e pí Kaisala, amba oehe bhende lí Ebhe ngayo e, yi ha pí Ebhe.» <sup>22</sup> U adje lie mo-o, u angamba naali. U a'o ká aní, u atsia agbida.

*OSadukai ayi 'ngú pindji nazuku ka okpála*

(Tsia bhú Mlk. 12:18-27; di ne bhú Luk. 20:27-40.)

<sup>23</sup> Bha lí 'kpí bhomù-o, oSadukai ago abhaka Yesu. (Ngauo-o, u ngapa naao me okpála inde amu-o zúku de.) U atsia ayi Yesu me: <sup>24</sup> «Mùsuno, Moidje apa nani me: <Í dù me bhoko bini kpi me aní nde zu ongisi de-e, ndai aní na bhobhoko-o bhe akè pita aní-e de ha èkè aní ngubula nazu ongisi pí ndai e inde akpi-o.> <sup>25</sup> Gbo nga la 'dje mù. Obhosi mananika adù nani agba ya. A adù nani ondaise. Bhebhele-e aha èlè, aní atsia akpi me aní nde zu de. Bhende akè pita aní-e atsia aha èkè aní-o. <sup>26</sup> Bhende na bhisi bhomù-o akpi bhadi moko, aní nde zu de. A akè lí bhende na bata, nakolo makolo lí bhende na mananika-o. Ndù

uo hana amu me u nde zu de. <sup>27</sup> Pita namu ka ndu uo hana-a, òlò-o atsia akpi di. <sup>28</sup> Li 'kpí li okpála inde amu-o azúku lie, bhú ká obhosi mananika bhomu-o, òlò bhomu-o adú naa da? Padhá de, anga ndu uo hana aha nani ani.»

<sup>29</sup> Yesu atsia agie pi uo me: «Yi angita, anga yi kò mboli engú li Bhuku gba Ebhe-e ngapa e de. Yi mbila di angu gba Ebhe-e de. <sup>30</sup> Padhá de, anga li okpála inde amu-o azúku lie, olisi ne obhosi há lio de. Engú bini, u adú ibili maka oandjelu abhúla. <sup>31</sup> Pindji 'ngú bhende atsia nazuku ka okpála inde amu-o, yi tanga nga eli gba Ebhe-e di? Ebhe apa nani pi yi me: <sup>32</sup> <Ngama-a, ma ne Ebhe inde li onguo ogbi yi Abalahama, Isaka, ne Yakobho ngamene kulu lio pi e ko.> Ebhe-e, a ko Ebhe gba okpála bhende amu-o ade. Engú bini, a ko Ebhe gba okpála inde u ko.»† <sup>33</sup> Ndu okpála hana inde adje engú bhomu-o angamba naali li nasuno gba ani-o.

*Nasuno pindji líli inde ane ne engbé  
(Tsia bhú Mlk. 12:28-34; di ne bhú Luk. 10:25-28.)*

<sup>34</sup> Abhomu-o, Yesu atsia agbite 'bhe oSadukai ne engú ani agie e pi uo-o. Li omuFalisai adje lie mo-o, u anu apo bhúla o de ani. <sup>35</sup> Suka uo adu musuno na líli gba Moidje . Ani adu akunda nato Yesu. Kaka-a, ani atsia ayi ani me: <sup>36</sup> «Musuno, bhú ká olíli-e, bhende ane ne engbé-e ngae dho?» <sup>37</sup> Yesu atsia agie pi ani me: «<A ayo me kunda Ebhe, Ngámá gba mu-o ne bua mu hana, ne mukobho gba mu-o hana, di ne mabhundja gba mu-o hana.>† <sup>38</sup> A bhomu-o líli inde ane ne engbé, inde di líli na kalanu-o. <sup>39</sup> Bhende pipita, inde bhadi ngbéngbé maka bhe na kalanu-o ngae inde: <A ayo me kunda kilí mu maka mo okunda limu lie ngamu makpe-o.>† <sup>40</sup> Engú li u aye e bhú líli gba Moidje ne bhende li opolofeta aye e hana alu pí olíli bhisi bhomu.»

*Masiya ne Ngámá gba Davidi  
(Tsia bhú Mlk. 12:35-37; di ne bhú Luk. 20:41-44.)*

† 22:32 22:32 Tsia bhú Eki. 3:6. † 22:37 22:37 Tsia bhú Det. 6:5. † 22:39 22:39 Tsia bhú Lev. 19:18. † 22:44 22:44 Tsia bhú Ets. 110:1.

<sup>41</sup> OmuFalisai adu nga bha nagama 'ngú ne Yesu. Ani atsia ayi uo me: <sup>42</sup> «Yi ngabhundja pindji Masiya pi? A ko ndili ka da?» U atsia agie pi ani me: «A ko ndili ka Davidi.» <sup>43</sup> Yesu atsia ayi uo me: «I du mo-o, lele pi li Davidi, bhú angu gba Bu Bhobua-a nga'i Masiya lie me Ngámá gba ni-e? Padhá de, anga Davidi apa nani me: <sup>44</sup> <Ebhe Ngámá apa pi Ngámá gba ma-a me:

go du li pá 'kpa ma na kokpa, amba ma mene me mu ha angu obhulu yala gba mu-o.>†

<sup>45</sup> I du la me Davidi nde nga'i Masiya me <Ngámá gba ni-e>, lele pi li Masiya ti da nadu lie ndili ka ani-e?» <sup>46</sup> Abhomu-o, kpála bini tsia du ne eli nagigie pi ani li 'ngú ani ayi e de. Nayie li 'kpí bhomu-o, kpála bini tsia le matá nayi ani li 'ngú belegu de bini.

## 23

*Yesu apa me yi améne 'ngú maka omusuno na líli gba Moidje di ne omuFalisai-e de*

*(Tsia bhú Mlk. 12:38-39; di ne bhú Luk. 11:43, 46, 20:45-46.)*

<sup>1</sup> Abhomu-o, Yesu apa pi bhiti okpála di ne omakpata gba e me: <sup>2</sup> «Kulu gba omusuno na líli gba Moidje di ne omuFalisai-e , a ko nambamba ta olíli gba Moidje pi okpála. <sup>3</sup> Kaka-a, yi mene ndu 'ngú hana inde u apa e pi yi-o, amba yi tsia lila di ndjindji. Engú la bini, yi akpáta kulu gba uo-o de, anga engú u ngapa e, u mene maka u ngapapa lie de. <sup>4</sup> U ngagbite titili 'he na titili, u nga'o'o de-ngulu okpála. La-a, ngauo makpe, u ngayala na'o nga bha tété ndjili 'kpa o ngú nateteke okpála li tili 'he inde u a'o e de-ngulu uo-o. <sup>5</sup> Ndu 'ngú gba uo hana, u ngamemene me okpála u o mau. Kaka-a, u ngaye 'li Ebhe ne baba djila balua, u ngagbigbite pidi o ne li 'kpa o. U la di ngadu 'so kandju gba o ndjandjandja ane mane. <sup>6</sup> U ngakunda nadulu bhú dá oanokomia li bili gba ongbengbe okpála, u kunda di nadulu bhú oti nadje líli gba



Moidje li bili inde li okpála adú au o lie mau. <sup>7</sup> U kúkúnda me u dā nayi o bhú odaposo, di ne me okpála dā a'i o me <Mūsuno.>

<sup>8</sup> Pi yi-e, yi améne de me okpála dā a'i yi me <Mūsuno-o> de. Padhá de, anga yi bha ne koli Mūsuno bini, yi la bhadi ndū yi hana ne ondaise. <sup>9</sup> Yi a'í kpála bini p'la doto de me <'Dyi yi-e> de, anga koli 'dyi yi bha bini ngae inde abhúlá ko. <sup>10</sup> Yi améne di de me okpála dā a'i yi me <Ngámá-a> de, anga koli Ngámá gba yi-e bha bini ne Kilisito. <sup>11</sup> A ayo me kpála inde ane ne engbé bhú ká yi-e dā kpála na kulu gba yi ko. <sup>12</sup> Kpála bhende a'ó lie ngae makpe ne abhúlá-a, u aké ani ne akuto. Kpála bhende a'ó la lie ngae makpe ne akuto-o, u a'é'e ani ne abhúlá.»

*Yesu ambamba ta kali gba omūsuno na líli gba Moidje di ne omūFalisai-o*  
(Tsia bhú Mlk. 12:40; di ne bhú Luk. 11:39-52, 20:45-47.)

<sup>13</sup> Yesu apa matá me: «A ko líkabhu pi yi, omūsuno na líli, di ne omūFalisai. Yi ne obhúlá kali! Padhá de, anga yi ngani 'bhə bhoti na Naū gba Ebhe-e pi okpála. La ngayi-e, yi li oo de, yi ka la di kpadji pi obhende akúnda nali-e de. [ <sup>14</sup> \*]

<sup>15</sup> A ko líkabhu pi yi, omūsuno na líli di ne omūFalisai. Yi ne obhúlá kali! Padhá de, anga yi ngadholo ne ndū bili hana p'la doto ne pí 'ngbé 'ngu ngubula me gandji kpála bini bhuka líli gba Moidje-o. I dā la me ani nde abhuka-a, yi ngamene me ani kolo kpála na djua na dūduma nane yi bhətsibhətsi bhisi.

<sup>16</sup> A ko líkabhu pi yi, djila yi adūdu. Yi la ngale me yi suno kpadji pi okpála! Yi ngapa me: <I dā me kpála nde atū silika ne 'li 'ngbé 'ti Ebhe gba omaYuda-a, engú tété ade. Engú la bini, i dā me kpála nde atū silika ne 'li olo na 'ngbé 'ti Ebhe gba omaYuda-a, a ayo me kpála ango-o mene engú inde ani atū silika ngú e-o.> <sup>17</sup> Ngayi-e, yi ne ongingi, djila yi adūdu! A ane ne

engbé ne bhedho? Ne me a ko olo, ne me a ko 'ngbé 'ti Ebhe inde ngamene me olo-o kolo bubu kala Ebhe-e? <sup>18</sup> Yi ngapa matá me: <I dā me kpála nde atū silika ne 'li bili natsulu enū pi Ebhe-e, engú tété ade. Engú la bini, i dā me kpála nde atū silika ne 'li enū inde u ngatsulu e pépé-e, a ayo me kpála ango-o mene engú inde ani atū silika ngú e-o.> <sup>19</sup> Ngayi-e, djila yi adūdu! A ane ne engbé ne bhedho? Ne me a ko enū inde u ngatsulu e pi Ebhe, ne me a ko bili inde ngamene me enū ango-o kolo bubu kala Ebhe-e? Ndūndū hana viti bini.

<sup>20</sup> Kaka-a, kpála bhende ngatū silika ne 'li bili natsulu enū-o, ani bhomū-o ngatūtu ne 'li bili natsulu enū, la di ne 'li ndū 'he hana inde pépé-o. <sup>21</sup> La di-e, kpála bhende ngatū silika ne 'li 'ngbé 'ti Ebhe, ani bhomū-o ngatūtu ne 'li 'ngbé 'ti Ebhe, di ne 'li Ebhe inde ngadū bhúbhú ko. <sup>22</sup> Kpála bhende ngatū la di silika ne 'li kokpí-e, ani bhomū-o ngatūtu ne 'li kiti na ngámá gba Ebhe, la di ne 'li Ebhe inde ngadū pépé-o.

<sup>23</sup> A ko líkabhu pi yi omūsuno na líli di ne omūFalisai. Yi ne obhúlá kali! Padhá de, anga yi ngaha belegū bini bhú ká ndjikpa na oulu na babadha sese. La-a, ongbengbe 'ngú inde li líli-e ngasuno e pindji nakodho 'ngú li lelele bhú dabili bini ne bua na ndjinga, a la di-e namene engú inde li Ebhe akúnda e, yi ngauu padhá. A la bhomū-o engú inde a ayo me yi de amene e, me yi nde 'ili di 'to yi li okoko de ko. <sup>24</sup> Ngayi-e, djila yi adūdu, Yi la ngale me o suno kpadji pi okpála! Yi ngapandja ondjindji bhú 'he nandji mandji gba yi-o. La-a, yi ngabhi enū maka eya libhomu bhú 'bu yi má ngbi!

<sup>25</sup> A ko líkabhu pi yi omūsuno na líli di ne omūFalisai. Yi ne obhúlá kali! Padhá de, anga yi ngavulū kute okópo ne osaani gba yi-e má ngbi, la-a, ohe inde yi nga'o e bhúbhú-o, a ko ohe inde yi asia e li kpadji na ezi bhú dabili bini ne kúndū 'he inde

\* **23:14** 23:14 Lukuluku inde-e, a bhú obhuku koko na didili u aye e bhú eli na giliki ade. [A ko líkabhu pi yi, omūsuno na líli di ne omūFalisai. Yi ne obhúlá kali! Padhá de, anga yi ngabha ndū 'he inde ka oekesi-e hana. Yi la di ngayo Ebhe ngengele bhú djila okpála, amba u u me yi ne obabadha okpála. Kaka-a, u akódho 'ngú gba yi-e kpekpeke naali!] Tsia bhú Mlk. 12:40.

bhú yi-o. <sup>26</sup> Ngayi omuFalisai-e, yi u 'kpí de! Yi vulu ngaiza bhú kópo-o ngubula me kakute kolo di babadha.

<sup>27</sup> A ko likabhu pi yi omusuno na líli di ne omuFalisai. Yi ne obhulu kali! Padhá de, anga yi maka olata inde u apulu embú pí e, inde i ngau lie akilidjo babadha. Engú bini, abhúbhú abedhe ne tsagala bikí okpála bhende amu di ne ondu 'he na sisiti hana. <sup>28</sup> A bhadi pi yi moko. Bhú djila okpála-a, yi ngau liyi me yi ne okpála na ngbingbili. La abhú yi-e, yi abedhe ne kali di ne ongu na sisiti bedhe.

<sup>29</sup> A ko likabhu pi yi omusuno na líli di ne omuFalisai. Yi ne obhulu kali! Padhá de, anga yi ngaleke olata opolofeta ndjindji, yi di ngaye obabadha tele li olata okpála na ngbingbili-o. <sup>30</sup> Yi la ngapa me: <Ya dú nani bhú 'kpí odyi ya u-o, ya de kpetsé 'kpa ya ne uo ngu nabhili opolofeta de.> <sup>31</sup> Kaka-a, yi ngakpokpo bhomu-o engú gba yi makpe, me yi ne ongisi gba okpála inde abhili opolofeta-o! <sup>32</sup> Atou! Yi bedhe 'bhé engú li odyi yi akpo nani lita e bebedhe! <sup>33</sup> Yi ne okpulu, yi ne piga ombuma! Yi anéke mangimbo nanu bhú djua na duduma lele pi?

<sup>34</sup> Kaka-a, yi djedje nga: ma ngatima opolofeta ne obhulu imbilangu, la di ne okukulu omusuno na líli pi yi. Yi abhili okoko bhú ká uo, yi gí okoko li kulusi. Yi abhi okoko ne fimbo bhú oeti nadje líli gba yi-o, yi tsia nú ne nato mbolo li okoko bhú gudhu bini ne bini. <sup>35</sup> Yi améne mo-o ngubula me ngute ndu okpála na ngbingbili hana inde yi abhili nani o pála doto libhomu-o tuko pí 'ndji yi. Padhá de, anga yi abhili nani okpála na ngbingbili bhelé, nayie li Abele, nakolo li Djakalia, ndili gba Balasi-o. Yi abhelo nani Djakalia bhú mbadhasu na 'ngbé 'ti Ebhe, sunda bili natsulu enu pi Ebhe ne titina na bubu-o. <sup>36</sup> A moko, ma apa pi yi me ndu 'ngú bhomu-o hana atúko pí 'ndji okpála na naki inde.»

*Yesu aku 'gbá ngu okpála na Yelusalema*  
(Tsia bhú Luk. 13:34-35.)

† 23:39 23:39 Tsia bhú Ets. 118:26.

<sup>37</sup> Yesu apa matá me: «Ngayi okpála na Yelusalema, ngayi okpála na Yelusalema, ngayi-e, yi ngabhili opolofeta, yi la di ngabhili okpála inde li Ebhe atima o pi yi-e ne teme! A ko bhutsibhutsi madho, ma akunda napo bhúla ongisi gba yi-e lie maka li 'hi 'ngu apopo bhúla ongisi gba e lie sa mbudha e? La-a, yi tsia kunda de! <sup>38</sup> Kaka-a, kuti gba yi-e atigala padhá. <sup>39</sup> Padhá de, anga ma apa pi yi me nayie pi mbia inde-e, yi u matá ma belegu de bini akólo li 'kpí inde yi apá lie me: <A ayo me Ebhe tuko bisagu pí kpála inde ngago ne 'li ani-o!†>»

## 24

*Yesu apa me u agugumu 'ngbé 'ti Ebhe gba omaYuda-a kuto*

(Tsia bhú Mlk. 13:1-2; di ne bhú Luk. 21:5-6.)

<sup>1</sup> Abhomu-o, Yesu akoto bhú 'ngbé 'ti Ebhe gba omaYuda-o. Li ani aholo ne 'nú lie, omukpata gba ani atsia adyudyo lio de ani ngu napana pi ani maka li 'ngbé 'ti Ebhe gba omaYuda-a ayiki lie lie-o. <sup>2</sup> Yesu atsia apa pi uo me: «Yi ngau ndu 'he bhomu-o hana? Ma apa pi yi na paká me, ekpi bini akólo makolo, u agugumu 'ngbé 'ti Ebhe-e hana kuto. Teme bini tígala pí kili e de.»

*Engú inde akólo kala sokpi-o*

(Tsia bhú Mlk. 13:3-13; di ne bhú Luk. 21:7-19.)

<sup>3</sup> Abhomu-o, Yesu anu adu kuto pí 'ta na ondula na Olive. Omukpata gba ani e adyudyo lio de ani, u atsia ayi ani me u nde ne uo kpi o kpi me: «Musuno, pa nga pi ya, engú mu de ngapa e bhomu-o améne lie nadho? Ehe inde asúno nago ka mu-o ne ni? Ehe inde asúno la di me sokpi-e akolo ne ni?» <sup>4</sup> Yesu agie pi uo me: «'E-e! Yi lila liyi me kpála bini apite yi de. <sup>5</sup> Padhá de, anga okpála bhelé agó ne 'li ma. U adu abhi 'kpa o pí mbulu o me o ne Masiya, u tsia pite okpála bhelé naali. <sup>6</sup> Yi adjé tolo egú ne ngali 'ngú na egú. 'E-e! Yi adjé tsulu de, anga a ayo me ndu 'ngú bhomu-o hana mene lie. Engú bini, a nga bhomu-o sokpi-e de. <sup>7</sup> Padhá

de, anga okpála na kuti bini ahá 'gú pi okpála na kuti koko, li ngámá na kuti bini há 'gú pi ngámá na kuti koko. Adyindi adú li obili ngangá, li adjigidjo dyíki doto li obili ngangá. <sup>8</sup> Ndu 'ngú bhomu-o adú maka likabhu inde adúdu kala nazu ka ele.

<sup>9</sup> Abhomu-o, ndu okpála hana ayála yi ka 'li ma, u apú yi me u mene yi sisiti. U tsia bhíli yi. <sup>10</sup> Li okpála bhelé bhú ká yi 'ó ká nabhuka gba o. U apú ngbángá o sunda o, u tsia yála di lio sunda o. <sup>11</sup> Opolofeta na eu azé bhibhiti naali, u tsia píte di okpála bhelé. <sup>12</sup> Siti 'ngú abé ndu e naali, li mukunda gba okpála bhelé tsia bí zini. <sup>13</sup> La-a, kpála bhende alú kpekpeke bhú nabhuka nakolo makolo alí soso-o, kpála ang-o tsia kóbho. <sup>14</sup> U akpókpo Bádha NgaliNau na abhúlá inde e pila doto libhomu, amba ndu opiga hana mbila 'ngú tété ndjindji. Pipita-a, li sokpí-e tsia kólo.»

*Okpála azú likabhu naali kala sokpí-o (Tsia bhú Mlk. 13:14-23; di ne bhú Luk. 21:20-24.)*

<sup>15</sup> Yesu atsia apa matá pi omukpata gba e me: «Yi aú kpála u a'i e me <'Ngbé Siti bhélú nabhóló kuti>, inde li polofeta Danyeale apa nani engú gba e adu bhú tina 'ti na bubu inde bhú 'ngbé 'ti Ebhe gba omaYuda-o. A ayo me kpála inde atánga engú nani li Danyeale aye e bhomu-o kó mbolimboli ndjindji!† <sup>16</sup> Abhomu-o, obhende abháka o abhú Yudaya-a, a ayo me u kpe apí oeta. <sup>17</sup> Kpála bhende abháka e kilidjo-o, a ayo de me aní djidji matá lie ngú nanu nabha oehe inde abhú 'ti gba e de. <sup>18</sup> Kpála bhende abháka e abhiye-e, a ayo de me aní gie matá lie asidi ngú naha koti gba e de. <sup>19</sup> A ko la mangua likabhu dho pi olisi inde adú ne ebhi di ne obhende adú a'o 'ka bhú 'bhe ongisi li 'kpí ang-o!

<sup>20</sup> Yi yo Ebhe me ekpí nakpe ka yi-e adú bhú nedhinga na zini di ne li 'kpí naguo gba omaYuda-a de. <sup>21</sup> Padhá de, anga a adú 'ngbé likabhu na ngbéngbé, inde li okpála u nga e de, nayie maka

li Ebhe abho nani kokpí ne doto lie, nakolo pi mbia inde. Okpála ú la matá di galikpe ngua likabhu ang-o belegu de bini. <sup>22</sup> Ebhe amene me oekpí ang-o adú ngengele de. I dú me Ebhe gbételó oekpí ang-o de-e, kpála bini de kóbho de. La-a, aní agbételó oekpí ang-o kabula okpála bhende aní alo o-o. <sup>23</sup> Li nedhinga bhomu-o, li kpála bini pa pi yi me: <Yi tsitsia nga, Masiya si-i>, i du di-e me: <Ani abhe-e>, yi abhúka aní de. <sup>24</sup> Padhá de, anga omasiya na eu di ne opolofeta na eu azé bhelé. U améne ongú na ngbengbengbe di ongú na ngangamba ngubula napite okpála. Li angu uo kólo makolo-o, u de píte belegu okpála inde li Ebhe alo o ko. <sup>25</sup> Kaka-a, ma apa engú ang-o pi yi kalanu.

<sup>26</sup> A moko, i du me u nde apa pi yi me: <Yi tsitsia nga, Masiya abhú mili bilí-e>, yi anú oo de. U pa di pi yi-e me: <Yi tsitsia, aní awo lie ki>, yi abhúka de. <sup>27</sup> Padhá de, anga maka li ekpí andjendjengene lie nayie andjongu nakolo akati-e, nago ka ma Ndili gba kpála-a adú bhadi moko. Ndu okpála hana au ne djila o. <sup>28</sup> A viti bini maka bili li kuo 'he nde lie me okpála nde mbila de-e, okpála ambíla ka odhu inde azuzu kuo apókobhó bhadi bhúla o lie dede-o.»

*Yesu akpokpo lele nago ka e-o (Tsia bhú Mlk. 13:24-27; di ne bhú Luk. 21:25-28.)*

<sup>29</sup> Yesu atsia apa matá me: «Pita likabhu na oekpí bhomu-o, ma 'li ma me-e, biti abúku bhúla ela libhomu, epe sá matá-a de, oikupala abála kuto, li oangu na abhúlá tsia dyíki má djigi djigi!†

<sup>30</sup> Abhomu-o, ehe bini inde asúno me ngama Ndili gba kpála ma ngago-o akóto abhúlá. Ndu okpála hana pila doto libhomu adú bhú 'gbá. U tsia ú ma, ngama Ndili gba kpála me ma nde ngago pi ndindi abhúlá, ma nde abedhe ne angu la di ne sangú bedhe. <sup>31</sup> U adjé gili toti na

† 24:15 24:15 Tsia bhú Dan. 9:27, 11:31, 12:11. † 24:29 24:29 Tsia bhú Isa. 13:10, 34:4; ne bhú Edj. 32:7; di ne bhú Djl. 2:10.

kpekpeke ngau. Ngama, Ndili gba kpála-a, ma tsia tíma oandjelu gba ma me u n̄u po bhúla okpála bhende li Ebhe alo o ne nd̄u 'dje doto badha hana, nayie li pápá bini, akólo makolo li pápá koko.»

*Kpála bini mbila nedhinga nago ka Ndili gba kpála-a de*

*(Tsia bhú Mlk. 13:28-31; di ne bhú Luk. 21:29-33.)*

<sup>32</sup> Yesu akpokpo matá gbitaku koko me: «Nago ka ma, Ndili gba kpála-a, adú maka engú inde asuno lie pi yi li ndula na figi-o . Yi k̄o mbolimboli ndjindji. Padhá de, anga nedhinga li 'ndji 'ndji aholo asú lie, li okpákpá holo nak̄o-o, yi mbíla me gbokokpi akolo masikpe. <sup>33</sup> Kaka-a, nedhinga yi aú nd̄u ongú inde ma akpokpo e pi yi bhomu-o lie hana-a, yi mbila ndjindji me nago ka ma, Ndili gba kpála akolo masikpe, me ma bha ibili li obh̄o bhoti gba yi-o. <sup>34</sup> Ma apa pi yi na paká me, nd̄u 'ngú inde ma akpokpo e pi yi p̄indji nago ka ma, Ndili gba kpála-a akódho 'kpí me okpála na naki inde-e nde mu nga nd̄u o hana de. <sup>35</sup> Kokpi ne doto akódho 'kpí makodho, engú bini, 'li ma kódho 'kpí belegu de bini.

<sup>36</sup> La-a, kpála bini mbila ekpi di ne nedhinga nago ka ma Ndili gba kpála-a de, abana bha oandjelu inde abhúla, u mbila de, abana bha ma Ndili-o, ma mbila de. Kpála bini mbila de, ambila bha bini ne 'Dyi ma kpi e kpi. <sup>37</sup> Maka engú inde akodho nani 'kpí bhú nedhinga gba N̄u-a, nago ka ma Ndili gba kpála adú bhadi moko. <sup>38</sup> Padhá de, anga bhú nedhinga bhomu-o, kala me engu-o si na eu eu-o, okpála adu mugito me engú ade. U adu naz̄u 'he, u atsia adu di nandji pandi. Obhosi ne olisi adu naha lio, u atsia adu di amba ongisi gba o na olisilisi bhú k̄uva, akolo li 'kpí inde li N̄u-a ali lie bhú 'ngbé zab̄u-o. <sup>39</sup> 'To uo du 'to 'ngú bini de, akolo li nedhinga inde li engu asi lie, a atsia abha nd̄u uo hana má kpek̄obh̄o! Nago ka ma, Ndili gba kpála-a adú bhadi moko.

<sup>40</sup> Abhomu-o, i bhaka okpála bhisi abhiye-e, oandjelu gba Ebhe-e ahá bini, u tsia 'ó ká bhe koko-o. <sup>41</sup> I bhaka olisi bhisi

ngatu mapunga-a, oandjelu gba Ebhe-e ahá bini, u tsia 'ó ká bhe koko-o. <sup>42</sup> Yi lila liyi ndjindji, anga yi mbila ekpi inde li Ngámá gba yi-e agó lie de. <sup>43</sup> A ayo me yi mbila ndjindji me, i dú me bhulu 'ti-e mbila nedhinga inde li bhulu 'zi agó lie sukpe uu-o, ani de dú bha bini li zaku. Ani de 'ó de me bhulu 'zi gumu eti gba ni-e de. <sup>44</sup> Kaka-a, ngayi di-e, yi du bedhe, anga nedhinga yi nde lie bhú 'ili 'to-o, a la bhomu-o nedhinga inde li ngama Ndili gba kpála ma agó lie-o.»

*Kpála na kulu inde ngbingbili inde di na imbilanḡu*

*(Tsia bhú Luk. 12:41-48.)*

<sup>45</sup> Yesu atsia apa matá me: «Kpála na kulu inde ngbingbili inde di na imbilanḡu-o ngae dho? Yi tsitsia nga, a ko ngua kpála na kulu inde li ngámá gba e a'o e pí 'ndji okpála na eti gba e me ani du naha ez̄u pi uo li nedhinga ayo lie-o. <sup>46</sup> A ko djali pi kpála na kulu bhomu i du me ngámá gba ani-e nde ago, ani bhaka me ani nde ngamemene mo-o. <sup>47</sup> Ma apa pi yi na paká me, ngámá a'ó ani pí 'ndji nd̄u 'he gba e hana. <sup>48</sup> Engú bini, i du me a nde kpála na kulu na sisiti-e, ani pá li bua e me: <Ha-a, ngámá gba ma nga bha ngabhue.> <sup>49</sup> Abhomu-o, ani hólo nabhi obi e koko na kulu-o, ani hólo naz̄u 'he, ani hólo nandji pandi ne omulangba. <sup>50</sup> Li ngámá gba kpála na kulu ango-o go li 'kpí ani djeke ani lie de, di li nedhinga inde ani mbila e de-e, <sup>51</sup> ani 'é ani bhú kulu, ani tsia méne ani kpekpeke maka li Ebhe améne galikpe obhulu kali lie li bili ani abú uo lie-o. Oo-o, u adú aku 'gbá, u tsia dú di naz̄u tate e-o.»

## 25

*Gbitaku p̄indji otsalisi ndjikpa na k̄uva*

<sup>1</sup> Abhomu-o, Yesu apa matá me: «Ekpi li ngama Ndili gba kpála ma agó lie, engú inde akódho 'kpí bhú N̄u-a na abhúla adú maka gbitaku inde: a adu nani otsalisi ndjikpa inde aha otala gba o ngú nanu nak̄o lio ne bhoko inde adu akunda naha ele. <sup>2</sup> Bhú ká uo, obhe bhuluvue adu ongingi, obhe bhuluvue koko adu obhulu

imbilangu. <sup>3</sup> Otsalisi bhe na ngingi-e aha otala gba o-o, la-a, 'to uo a'ili li naha otsupa 'm̄ koko dede. <sup>4</sup> Engú bini, obhe na imbilangu-o aha otala gba o bhú dabili bini ne otsupa 'm̄ koko dede. <sup>5</sup> Li bhoko-o go lie má gala de-e, ela aholo ndu uo hana, u atsia atuko ne ela.

<sup>6</sup> Tutu sukpe-e, tolo 'ue akoto: <Bhoko-o ki-e! Yi ze ngú nakè liyi ne uo.> <sup>7</sup> Abhomu-o, ndu otsalisi-e hana azuku. U atsia aholo naleke otala gba o-o. <sup>8</sup> Otsalisi bhe na ngingi-e apa pi obhende na imbilangu-o me: <Yi ha mbo té emu gba yi-e pi ya, anga otala gba ya-a ngabulu.> <sup>9</sup> Obhe na imbilangu-o agie pi uo me: <A mo-o ade, anga bhe ka ya-a bhelé da nale li lele ní ne yi ade. Yi nu bhaka mangbo okpála i ngatsitsindji, amba yi kala pi yi ka uo.> <sup>10</sup> Obhe na ngingi-e anu nakala emu-o. Engú bini, nedhinga u adu anu lie nakakala-a, bhoko-o akolo. Otsalisi bhuluvue inde adu bedhe ali ne ani bhú 'ti na anokomia-o. U atsia adula bhoti-o. <sup>11</sup> A abhue bedi, otsalisi bhe koko akolo. U atsia aholo nasusula me: <Ngámá, ngámá, bhulu bhoti-e pi ya!> <sup>12</sup> Engú bini, bhoko-o agie pi uo me: <Ma apa pi yi na paká me, ma mbila yi de.>>

<sup>13</sup> Yesu atsia abu tata-a me: «Yi lila liyi, anga yi mbila ekpi li ngama Ndili gba kpála ma agó lie de, yi mbila la di nedhinga ango-o de.»

*Gbitaku pindji okpála na kulu bata  
(Tsia bhú Luk. 19:11-27.)*

<sup>14</sup> Yesu apa matá me: «Ekpi li ngama Ndili gba kpála ma agó lie, engú inde akódho 'kpi bhú Nau na abhúla adú maka gbitaku inde: a adu nani bhoko bini inde adu akunda nanu dhuku. Kala nanu ka ani-e, ani a'i okpála na kulu gba e-o. Ani atsia a'o tia gba e sakpa uo. <sup>15</sup> Ani aha pi bhe bini-e lí falanga kámá bhuluvue. Ani aha pi bhe koko lí falanga kámá bhisi. Ani atsia aha pi bhe koko lí falanga kámá bini. Ani aha pi kpála ne kpála li lele angu gba e. Pipita-a, ani atsia atapa. <sup>16</sup> Kpála na kulu bhe asia kámá bhuluvue-e, anu kolo nabe ndundu. Ani atsia asia di lí falanga koko pépé kámá bhuluvue. <sup>17</sup> Bhende asia kámá bhisi-e amene bhadi

moko. Ani atsia asia di lí falanga koko pépé kámá bhisi. <sup>18</sup> Engú bini, bhende asia kámá bini-e anu bha naae nadjí edú bhú doto. Ani atsia awo tia gba ngámá gba e bhúbhú.

<sup>19</sup> Pipita abhue naali, ngámá na kulu gba okpála bhomu-o ago. Ani atsia aholo nagama 'ngú ne uo pindji lele maka u amene kulu ne tia gba ni-e lie-o. <sup>20</sup> Bhe asia nako lí falanga kámá bhuluvue adyudyo lie. Ani agbe lí falanga kámá bhuluvue koko-o ne napa me: <Ngámá, mo oha nako muma lí falanga kámá bhuluvue. A inde-e lí falanga kámá bhuluvue koko inde ma asia e pépé ko.> <sup>21</sup> Do ngámá gba ani pi ani me: <So! Mu ne bádha kpála na kulu, mu la di ngbingbili. Mo omene nako ngbili 'ngú bhú ongú inde djedjedje, ma a'ó ibili mu me mu du atsia 'kpi li ongú na ngbengbengbe. Go kpi djali bhú dabili bini ne ma.>

<sup>22</sup> Kpála na kulu bhende asia nako lí falanga kámá bhisi-e adyudyo di lie. Ani pi ngámá-a me: <Ngámá, mo oha nako muma lí falanga kámá bhisi. A inde-e lí falanga kámá bhisi koko inde ma asia e pépé ko.> <sup>23</sup> Do ngámá gba ani pi ani me: <So! Mu ne bádha kpála na kulu. Mu la di ngbingbili. Mo omene nako ngbili 'ngú bhú ongú inde djedjedje, ma a'ó ibili mu me mu du atsia 'kpi li ongú na ngbengbengbe. Go kpi djali bhú dabili bini ne ma.>

<sup>24</sup> Li soso-o, kpála bhende asia nako lí falanga kámá bini-e ago di. Ani pi ngámá-a me: <Ngámá, ma adu nako ambila ndjindji me mu ne kpála na gúgú. Mu ngaha 'zu li bili inde mu lu 'zu li e de. Mu ngazu 'he li kulu inde li okpála koko andala lie ngao. <sup>25</sup> Ma adje tsulu mu. Ma atsia anu awo tia gba mu-o bhú doto. A la bhadi ii. Tia gba mu-o ki.> <sup>26</sup> Engú bini, ngámá gba ani agie pi ani me: <Mu ne siti kpála na kulu! Mu di ne bhulu ipio! Ka ni mo odu nako ambila lie ndjindji me ma ngaha 'zu li bili inde ma alu 'zu lie de, me ma ngazu 'he li kulu inde li okpála koko andala lie ngao, <sup>27</sup> mu tsia 'o nako tia gba

ma-a bhú baki de ka ni, amba ma agó lie, ma de bhaka me a nde abe ndu e abe-e?

<sup>28</sup> Yaka! Yi gbɛlɛ lí falanga kámá bini bhomɔ-o ka aní, amba yi ha pi kpála inde ka e kutu bini ko. <sup>29</sup> Ngámá bhomɔ-o apa mo-o, anga kpála inde ka e ne ehe, u ahá matá koko pi aní pépé. Aní tsia dú bhú mɔndeyi. Engú bini, kpála li ehe nde ka e belegu ade bini-e, u agbúlu belegu dhegu bhende i ti da nadu ka aní-o. <sup>30</sup> Ngámá-a atsia abu 'so 'ngú gba siti kpála na kulu bhomɔ-o ne napa me, u bhike aní bhú bití akilidjo li bíli inde li okpála nde lie bhú 'gbá di ne nazu tate o-o.»

*Yesu akpokpo lele maka aní akódho 'ngú gba okpála lie-o*

<sup>31</sup> Yesu atsia apa matá me: «Ekpí li ngama Ndili gba kpála ma agó lie bhú sangu gba ma bhú dabili bini ne oandjelu hana-a, ma adú pí kiti na ngámá gba ma na sangu-o. <sup>32</sup> Ndu okpála na píla doto hana apó bhúla o kala ma. Ma tsia gbógbo bhusu uo maka li mɔlila agbogbo bhusu okandɔlɔ lie ne omeme-o. <sup>33</sup> Ma a'ó okandɔlɔ li pá 'kpa ma na kokpa, ma tsia ó omeme-e li pá 'kpa ma na gali.

<sup>34</sup> Abhomɔ-o, ma tsia pá pi obhende adú li pá 'kpa ma na kokpa-a me: «Yi gógo, ngayi okpála asia bisagu ka 'Dyi ma-o. Yi go sia ngámá inde li aní aleke nani e pi yi nayie li nedhinga aní abho kokpí ne doto lie ko. <sup>35</sup> Padhá de, anga ma adje gumu, yi atsia aha ezú muma. Ma adu adje gumu 'ngu, yi atsia aha engu nandji mandji muma. Ma adu ne gomago, yi atsia asia ma agba yi. <sup>36</sup> Ma adu ndumbu, yi atsia ato bongo li ma. A adu li ma ne kuo, yi atsia ateteke ma. Ma adu bhú tikpu, yi atsia ago natsia ma.»

<sup>37</sup> Abhomɔ-o, obhende amene mukunda gba Ebhe-e tsia yí ma me: «Ngámá, ya au mu ne gumu nadho, ya atsia aha 'zu pi mu-o? Ya au mu ne gumu 'ngu nadho, ya atsia aha engu nandji mandji pi mu-o? <sup>38</sup> Ya au mu me mu nde ne gomago nadho, ya atsia asia mu agba ya-a? Ya au mu ndumbu nadho, ya atsia ato bongo li mu-o? <sup>39</sup> Ya au mu ne kuo, i du di-e me mu nde bhú tikpu nadho,

ya atsia anu ateteke mu-o?» <sup>40</sup> Ma tsia gie pi uo me: «Ma apa pi yi na paká me, ndu nedhinga hana inde yi amene bádha 'ngú lie pi saka ondaise ma inde li okpála ngau o padhá inde-e, yi amene bhomɔ-o muma.»

<sup>41</sup> Abhomɔ-o, ma tsia pá di pi obhende adú li pá 'kpa ma na gali-e me: «Yi yie si yiyie, yi gbida de ma tsutsu, ngayi okpála li Ebhe atu pedje lio-o! Yi nu bhú djua na dudu ma inde li Ebhe aleke nani e pi djabalu ne omaha e-o! <sup>42</sup> Padhá de, anga ma adu adje gumu, yi tsia ha 'zu muma de. Ma adu adje gumu 'ngu, yi tsia ha engu nandji mandji muma de. <sup>43</sup> Ma adu ne gomago, yi tsia sia ma agba yi de. Ma adu ndumbu, yi tsia to bongo li ma de. Ma adu ne kuo di ne bhú tikpu, yi tsia go nateteke ma de.»

<sup>44</sup> Abhomɔ-o, u tsia yí di ma me: «Ngámá, ya au mu nadho me mu nde ne gumu, i du di-e gumu 'ngu-o? Ya au mu nadho me mu nde ne gomago, mu nde ndumbu, i du di-e me mu nde ne kuo, i du di-e me mu nde bhú tikpu-o, ya tsia nu teteke mu di-e?» <sup>45</sup> Ma tsia gie pi uo me: «Ma apa pi yi na paká me, ndu nedhinga hana yi mene bádha 'ngú lie pi saka ondaise ma inde li okpála ngau o padhá inde-e de-e, yi mbila me yi aneke di namemene bhomɔ-o muma.» <sup>46</sup> Abhomɔ-o, obhende i mene mukunda gba Ebhe-e de-e, gbida nazu likabhu na dudu ma. Engú bini, obhende amene mukunda gba Ebhe-e, tsia gbida naao bhú mukobho na dudu ma.»

## 26

*Ongámási gba omaYuda agili kpadji ngú nabhɔle Yesu*

*(Tsia bhú Mlk. 14:1-2; ne bhú Luk. 22:1-2; di ne bhú Dja. 11:45-53.)*

<sup>1</sup> Li Yesu andjia nakpo ongu bhomɔ-o lie hana-a, aní atsia apa pi omukpata gba e me: <sup>2</sup> «Yi mbila hana me pita 'kpí bhisi-e, adú anokomia na Pasika . Li 'kpí angoo, u apú ma Ndili gba kpála ngubula me u gi ma li kulusi.»

<sup>3</sup> Yesu adu akpo 'ngú bhomu-o pi omukpata gba e lie, abhaka me ong-bengbe odimandø ne obhelesi okpála gba omaYuda nde apo bhúla o agba bhele kpála gba odimandø , u a'i e me Kaifa. <sup>4</sup> U atsia aziba lio ngubula naholo Yesu bhú pepe, amba o bhøle ani. <sup>5</sup> Engú bini, u adu apa me: «A ayo de me ní holo ani bhú nedhinga na anokomia de, anga li okpála gbe tolo.»

*Øle bini atuko mungotsi pí 'ndji Yesu  
(Tsia bhú Mlk. 14:3-9; di ne bhú Dja.  
12:1-8.)*

<sup>6</sup> Ekpí bini, Yesu ne omukpata gba e adu bhú kuti na Betania, abhú 'ti gba Simo nani li kába amene e-o. <sup>7</sup> Nedhinga u adu azu 'he lie, øle bini ago de ani ne gili inde u abho e li alabatele.\* Gili ang-o adu me a nde abedhe ne mungotsi na kpéke mase bedhe. Ani atsia atuko mungotsi ang-o pí 'ndji Yesu. <sup>8</sup> Li omukpata gba ani-e au lie mo-o, u ake 'ngú lio, u atsia apa me: «Ta nasiti mungotsi inde-e padhá me-e ne ni? <sup>9</sup> U ti igini da natsitsindji bhú kpéke mase, u tsia há tia ang-o pi obhulu ndibhili.» <sup>10</sup> Li Yesu ambila engú u adu apa e lie, ani atsia apa pi uo me: «Yi ngato mbolo li øle inde-e ka ni? Engú inde ani amene e li pabili gba ma-a, a ko bádha 'ngú. <sup>11</sup> Padhá de, anga obhulu ndibhili-e, yi adú ne uo ndu nedhinga hana. Engú bini, ngama-a, ní dú ne yi ndu 'kpí hana de. <sup>12</sup> Ani atuko mungotsi inde li kute ma, ngubula naleleke ngú ekpí inde u azí ma lie ko. <sup>13</sup> Ma apa pi yi na paká me, píla doto libhomu, ndu bili hana inde u akpókpo Bádha Ngali gba Ebhe-e lie, u akpókpo di engú inde li øle inde-e amene e ngú nabhundja ani.»

*Yuda adje lie ne ongámási gba  
omaYuda ngú napu  
Yesu pi uo*

*(Tsia bhú Mlk. 14:10-11; di ne bhú Luk.  
22:3-6.)*

<sup>14</sup> Abhomu-o, suka omukpata ndjikpa ne ká bhisi anu nabhaka ong-bengbe odimandø. A adu 'li mukpata ang-o me Yuda Isikalio. <sup>15</sup> Ani atsia apa pi uo me: «Yi akunda naha muma ni, amba ma pu Yesu pi yi-e?» Abhomu-o, u adje lio ne uo li mase-o. Ong-bengbe odimandø atanga lí falanga ndjikpa bata,† u atsia aha pi ani. <sup>16</sup> Nayie bhú nedhinga bhomu-o, Yuda adu nagili nedhinga na ndjindji ngubula napu Yesu pi uo me u bhøle ani.

*Yesu atima omukpata gba e naleke da  
anokomia na Pasika*

*(Tsia bhú Mlk. 14:12-21; ne bhú Luk.  
22:7-14, 21-23; di ne bhú Dja. 13:21-30.)*

<sup>17</sup> Li 'kpí na kalanu na anokomia nazu mapa inde li levile nde bhú e ade-e , omukpata gba Yesu ago nayi ani me: «Mo okunda me ya leke dá Pasika pi mu su?» <sup>18</sup> Yesu agie pi uo me: «Yi nu abhú gudhu, agba kpála bini me, amba yi pa pi ani me: «Musuno apa me, nedhinga gba ni-e akolo masikpe. Ngani ne omukpata gba ni-e, o ozú anokomia agba mu.» <sup>19</sup> Omukpata amene maka Yesu apa lie pi uo-o. Abhomu-o, u atsia anu aleke da anokomia-o.

*Yesu apa me suka omukpata gba ni bini  
apú ni*

<sup>20</sup> Li akolo lie tagolo-o, Yesu ne omukpata gba e ndjikpa ne ká bhisi-e aholo nazu 'he. <sup>21</sup> Nedhinga uo adu azu 'he lie, do Yesu de-e: «Ma apa pi yi na paká me, suka yi bini apú ma.» <sup>22</sup> Omukpata-a asia likabhu naali. Abhomu-o, kpála ne kpála aholo nayi ani me: «Ngámá, a adú bha ndju ma?» <sup>23</sup> Ani agie pi uo me: «Kpála inde ya ngato 'kpa ya ne e bhú saani bini-e, kpála ang-o apú ma ngae. <sup>24</sup> Ngama Ndili gba kpála, ma adji akpí maka u aye 'ngú gba ma lie-o. Engú bini, a ko likabhu pi kpála inde ngapu ma-o! A nani pi kpála ang-o ndjindji me u azú ani de!» <sup>25</sup> Abhomu-o, Yuda, kpála inde apú ani atsia ayi me:

\* **26:7** 26:7 Alabatele: A ko teme na mase naali inde u abhobho øehe maka gili lie ko. † **26:15** 26:15 Lí falanga ndjikpa bata: A ko nani tia bhelø de, ati di nani da nakala bali bini de. Tsia bhú Eki. 21:32, di ne bhú Djkl. 11:12.

«Músuno, a adú bha ndjũ ma?» Yesu atsia agie pi ani me: «Mo opa ngamũ!»

*Yesu agapa mapa ne vino li omũkpata gba e ndjikpa ne ká bhisi-o*

*(Tsia bhú Mlk. 14:22-26; ne bhú Luk. 22:14-20; di ne bhú 1 Kol. 11:23-25.)*

<sup>26</sup> Nedhinga u adũ azũ 'he lie, Yesu aha mapa-o. Anĩ agie heni pi Ebhe, ani agumũ bhũsũ bhũsũ, ani atsia aha pi omũkpata gba e ne napa me: «Yi zũzũ, a inde-e kũte ma.» <sup>27</sup> Pipita-a, ani aha kópo na vino-o, ani agie heni pi Ebhe, ani atsia aha pi uo ne napa me: «Yi ndji ndũ yi hana, <sup>28</sup> anga a inde-e ngũte ma. A ko ngũte inde ngasuno me Ebhe akodho gandja ne okpála-o. Ngũte ango-o atuko ngũ na'e osisiti 'ngũ gba okpála bhelé. <sup>29</sup> Ma apa pi yi me: Nayie pi mbia inde-e, ma ndjĩ matá vino belegũ de bini, akólo li 'kpĩ inde ma andjĩ lie ne toto bhũ dabili bini ne yi bhũ Nau gba 'Dyĩ ma-o.» <sup>30</sup> Pipita-a, u ali etsi na anokomia-o. U aze, u atsia agbida apĩ eta na ondula na Olive.

*Yesu apa me Piele apá me ni mbila ni de*

*(Tsia bhú Mlk. 14:27-31; ne bhú Luk. 22:31-34; di ne bhú Dja. 13:36-38.)*

<sup>31</sup> Abhomũ-o, Yesu atsia apa pi omũkpata gba e me: «Sukpe na naki inde-e, ndũ yi hana a'ó ká ma. Padhá de, anga Ebhe apa bhũ Bhuku gba e me: «Ma abhólø mũlila gba okandølø-o,

li okandølø-o tsámbala ne bili ngangá.†»

<sup>32</sup> Engũ bini, ngama-a, ekpĩ ma azũku lie, ma anũ adjeke yi abhũ Galilaya.» <sup>33</sup> Piele atsia apa pi ani me: «Abana li ndũ okpála hana 'o ká mũ-o, ngama-a, ma 'ó ká mũ belegũ de bini.» <sup>34</sup> Abhomũ-o, Yesu atsia agie pi ani me: «Ma apa pi mũ na paká me, sukpe na naki inde-e, kala me engũ ku 'gbá-a, mo opá bhũtsibhũtsi bata me ni mbila ma de.» <sup>35</sup> Piele atsia apa matá pi ani me: «Abana i dũ bha me a nde ayo me ní kpi bhũ dabili bini ne mũ-o, ma 'ó ká mũ de.» Abhomũ-o, ndũ omũkpata koko hana atsia apa bhadi moko.

† 26:31 26:31 Tsia bhú Djl. 13:7.

*Yesu ayo Ebhe bhũ Getesemani*  
*(Tsia bhú Mlk. 14:32-42; di ne bhú Luk. 22:39-46.)*

<sup>36</sup> Abhomũ-o, Yesu akolo ne omũkpata gba e li bili bini inde u a'i e me Getesemani. Anĩ atsia apa pi uo me: «Yi dũlũ si nedhinga ma adji lie nayo Ebhe aoo ko.» <sup>37</sup> Anĩ aha Piele ne ongisi bhisi gba Djebedayo-o. Anĩ anũ ne uo bhũ dabili bini. Tsũlũ aholo ani, likabhu atsia abedhe di li bua ani bedhe. <sup>38</sup> Abhomũ-o, ani atsia apa pi uo me: «Bua ma abedhe ne likabhu bedhe ka ma adji akpi lie-o. Yi dũlũ si, yi dũ la di ne ma li zũkũ bhũ dabili bini.»

<sup>39</sup> Pipita-a, ani adyudyo mbo lie tsutsu bedi. Anĩ atũtũ lipũkũ e kuto, ani atũ bhũla e pí doto, ani atsia ayo Ebhe me: «'Dyĩ ma, i dũ ndjindji-e, mũ de dyudyo likabhu inde-e de ma tsutsu! Engũ la bini, mo oméne maka ma akũnda lie de, mene mangbo maka mo okũnda lie ko!» <sup>40</sup> Anĩ agie lie li bili li omũkpata bata adũ lie-o. Anĩ abhaka me u nde atuko ne 'la má dhululu! Do ani pi Piele de-e: «Yi ti igini da nadũ li zũkũ ngabha ne ma ngũbula saa bini di? <sup>41</sup> Yi dũ li zũkũ, yi yo Ebhe, amba yi alĩ bhũ nale de. Bua kpála bedhe ndũ 'kpĩ hana ngũ namene bádha 'ngũ, engũ bini, kũte ani bhũbhũkũ.»

<sup>42</sup> Matá bhũtsibhũtsi na bhisi-e, ani adyudyo lie de omũkpata bata-a tsutsu. Anĩ atsia ayo Ebhe me: «'Dyĩ ma, i dũ me likabhu inde-e nde ti da naneke ma de-e, a nde ayo bha me a kolo li ma-a, a ayo me engũ mo okũnda e mene lie ngae!» <sup>43</sup> Abhomũ-o, Yesu agie matá lie li bili li omũkpata-a adũ lie-o. Anĩ abhaka me u nde tila. Padhá de, anga djila uo adũ me a nde ne ela má yikpokpo! <sup>44</sup> Anĩ a'o ká uo, ani adyudyo matá lie de uo tsutsu. Anĩ atsia ayo Ebhe bhũtsibhũtsi na bata ne napa bha oeli bini bhomũ-o.

<sup>45</sup> Abhomũ-o, ani ago abhaka omũkpata gba e bata-o, ani atsia apa pi uo me: «A ndjindji! Yi la nga lala, amba yi guo! La-a, nedhinga akolo, nedhinga inde u apũ ma, Ndili gba kpála lie pi osisiti okpála-o.



46 Yi tsitsia nga, kpála inde apú ma akolo. Yi yie bhúlá, ní nù bhaka uo!»

*U aholo Yesu*

(*Tsia bhú Mlk. 14:43-50; ne bhú Luk. 22:47-53; di ne bhú Dja. 18:3-12.*)

47 Bha li nedhinga li Yesu adu agama 'ngú lie, me-e, Yuda, suka omukpata ndjikpa ne ká bhisi-e akolo. Aní ago nani ne bhiti okpála inde adu sa 'kpa o ne ombotia di ne ondula. A atima nani uo ne ongbengbe odimandø di ne obhelesi okpála gba omaYuda. 48 Yuda adje nani lie ne uo kalanu me: «Kpála inde ma akáma e, a ko aní. Yi holo aní!» 49 Me-e, aní adyudyo lie de Yesu, aní atsia ayi aní me: «Musunu, mu oo!» Aní atsia akama aní. 50 Yesu atsia apa pi aní me: «Olia ma, engú inde mo ogo namene e, memene!» Abhomu-o, okpála koko inde ago bhú dabili bini ne Yuda-a, adyudyo lio de Yesu, u abu 'kpa o li aní, u atsia aholo aní.

51 Kolo me-e, suka okpála inde adu bhú dabili bini ne Yesu-o agbe mbotia gba e, aní asu kpála na kulu gba bhele kpála gba odimandø-o ne nakodho 'dje aní má tse! 52 Yesu atsia apa pi aní me: «Gie mbotia gba mu-o bhú 'ti e. Padhá de, anga ndu okpála hana inde ngagu 'gú ne mbotia-a, amú bhadi li mbotia. 53 Mu mbila de me ma ti igini da nayo ka 'Dyi ma me aní go teteke ma-a di? Ma yo ka aní-e, aní kolo tíma libi oandjelu muma nane ndjikpa ne ká bhisi mane. 54 I du la mo-o, engú inde u aye e bhú Bhuku gba Ebhe-e améne lie lele pi? Padhá de, anga Bhuku gba Ebhe-e apa me, a ayo me engú inde ngamene lie inde-e, amene lie moko.»

55 Abhomu-o, Yesu atsia apa pi kambi okpála bhomu-o me: «Ndu 'kpi hana ma adu nako nadu bhú 'ngbé 'ti Ebhe gba omaYuda ngú nasuno. La-a, yi holo nako ma de. Ka ni yi ngago lie ngú ma ne ombotia di ne ondula sa 'kpa yi mugito me ma ne siti bhulu 'zi-e? 56 Engú bini, ndu 'ngú bhomu-o hana amene lie ngubula me engú inde li opolofeta aye e amene lie.» Abhomu-o, ndu omukpata

hana atsambala de aní má mæ, u atsia agbida!

*U anu ne Yesu kala Libi okpála natsia 'kpi li 'ngú gba omaYuda*

(*Tsia bhú Mlk. 14:53-65; ne bhú Luk. 22:54-55, 63-71; di ne bhú Dja. 18:13-14, 19-24.*)

57 Abhomu-o, okpála inde u atima nani o ngú naholo Yesu-o anu ne aní kala Kaifa, bhele kpála gba odimandø-o, li bili inde li omusunu na líli gba Moidje ne obhelesi okpála apøkøbhø bhúla o lie-o. 58 Piele atsia adu naae nakpata Yesu mbo tsutsu, nakolo makolo bhú mbadhasu gba bhele kpála gba odimandø-o. Aní alí bhú mbadhasu-o, aní atsia adu kuto bhú ká okpála na kulu ngubula natsia me engú angu-o abú 'ta e lele pi-ie.

59 Abhomu-o, ongbengbe odimandø bhú dabili bini ne ndu okpála koko na Libi okpála natsia 'kpi li 'ngú gba omaYuda libhomu adu agili kpála inde agó napa 'ngú li Yesu sisiti, abana i du eu, amba o kodho 'ngú gba aní-e me aní kpi bha makpi. 60 Engú bini, belegu li bhiti okpála adu apa 'ngú li Yesu lie ne eu-o, u u kpála bini de inde apa engú inde u ti da nabhøle aní ka e. Li soso-o, okpála bhisi adyudyo lio masikpe. 61 U atsia apa me: «Bhoko inde-e apa nako me, <ni ti da nabhøle 'ngbé 'ti Ebhe gba omaYuda-o, ni tsia yiki matá ne toto sunda ekpi bata.»

62 Abhomu-o, 'ngbé dimandø-o ayie bhúlá, aní atsia ayi Yesu me: «Mu gie 'ngú li 'ngú inde li okpála inde-e ngapa e li kute mu-o belegu de bini?» 63 Engú bini, Yesu andjili bha má bulu! Abhomu-o, bhele kpála gba odimandø-o atsia ayi matá aní me: «Ma ngayi mu ne 'li Ebhe inde u-o me pa nga pi ya: ngamu-o, mu ne Masiya , Ndili gba Ebhe-e?» 64 Yesu agie pi aní me: «Mo opa ngamu. Mbila la me, nayie pi mbia inde-e, yi aú Ndili gba kpála adu li pápá na kokpa gba Angbamili me aní nde ngago pi ndindi na abhúlá.†»

65 Engú bhomu-o ake li bua bhele kpála gba odimandø-o naali. Abhomu-o, aní

† 26:64 26:64 Tsia bhú Ets. 110:1; di ne bhú Dan. 7:13.

asidha bongo li e má tsue! Aní atsia apa me: «Aní asobho Ebhe, anga kpála-kúti tí da nakpo 'ndjì e ne Ebhe de! Ní matá ne gümü okpála koko ngú nakpokpo 'ngú gba ani-e ade! Yì adje sobho aní asobho Ebhe ne e ne 'dje yi makpe. <sup>66</sup> Yì abhundja naayi me ní mene ngú ani pí?» U agie me: «A ayo me u bhølø aní mabhølø.» <sup>67</sup> Abhomu-o, u aholo akuku ngusu bhúla aní, u adu asu aní, u atsia adu di abhi bhúla aní. <sup>68</sup> U atsia adu apa pí ani me: «Í dũ me mũ nde bha ndjũ ne Masiya na paká-a, pa nga pí ya me asu mũ da?»

*Piele apa me ni mbila Yesu de*

*(Tsia bhú Mlk. 14:66-72; ne bhú Luk. 22:56-62; di ne bhú Dja. 18:15-18, 25-27.)*

<sup>69</sup> Nedhinga u adu ato mbolo li Yesu lie, abhaka me Piele nde adu kilidjo tu mbadhasu gba bhele kpála gba odimandø-o. Kpála bini na kulu na øøle adyudyo lie de aní. Aní atsia apa pí ani me: «Ngamu di-e, mo odu nako bhú dabili bini ne Yesu, kpála na Galilaya-o.» <sup>70</sup> Engú bini, Piele ayala kala ndu okpála hana me: «Ma mbila engú inde mũ ngakunda napa e de.» <sup>71</sup> Abhomu-o, Piele adyudyo lie de 'bhø aga-o. Kpála na kulu koko bini na øøle au aní. Aní atsia apa pí okpála inde adu oo me: «Kpála inde-e adu nako bhú dabili bini ne Yesu, kpála na Nadjaleta-o.» <sup>72</sup> Piele ayala matá, aní atsia apa me: «Ne 'li Ebhe, ma mbila kpála inde yi ngapa 'ngú gba e bhomu-o de!»

<sup>73</sup> Pipita kolo me-e, okpála inde adu oo adyudyo lio, u atsia apa pí Piele me: «A ko kukulu 'ngú. Ngamu di-e, mũ bha ne sũka uo, anga nagama 'ngú gba mũ-o ngambamba ta mũ ngae.» <sup>74</sup> Abhomu-o, Piele aholo natu silika ne nasima me: «Ne 'li Ebhe, ma mbila kpála bhomu-o de!» Bha li nedhinga bhomu-o, engu atsia aku 'gbá. <sup>75</sup> Abhomu-o, Piele abhundja eli inde li Yesu apa igini e pí ani me: «Kala me engu ku 'gbá-a, mo opá bhutsibhutsi bata me ni mbila ma de.» Aní akoto kilidjo, aní atsia abhølø kuo e ne egbá má kusu!

† 27:9 27:9 Tsia bhú Djkl. 11:12-13.

## 27

*U anu ne Yesu kala Pilatø*  
*(Tsia bhú Mlk. 15:1; ne bhú Luk. 23:1-2; di ne bhú Dja. 18:28-32.)*

<sup>1</sup> Køkpí má bhø, ndu ongbengbe odimandø hana di ne obhelesi okpála gba omaYuda adje lio me o méne lele pí me o bhølø Yesu-o. <sup>2</sup> U agbigbite aní, u anu ne aní, u atsia aha aní pí guvelenele Pilatø.

*Yuda agi ngulu e*

*(Tsia bhú Kul. 1:18-19.)*

<sup>3</sup> Abhomu-o, Yuda, kpála inde apu Yesu-o au lie me u akodho 'ngú gba ani-e me aní kpi bha makpi-e, aní adje likabhu li bua e naali. Aní atsia anu nagie lí falanga ndjikpa bata-a pí ongbengbe odimandø di ne obhelesi okpála. <sup>4</sup> Do aní pí uo de-e: «Ma amene siti 'ngú, anga ma apu kpála inde i tu 'ngú de-e pí yi me u bhølø aní!» Engú bini, u agie pí ani me: «Naaya bhúbhú ne ní? A ko naamu 'ngú!» <sup>5</sup> Abhomu-o, Yuda abala lí falanga kuto bhú 'ngbé 'ti Ebhe gba omaYuda ne nakoto bini. Aní atsia anu nagi ngulu e. <sup>6</sup> Ongbengbe odimandø-o aha tia-o. U atsia apa me: «Líli gba ní-e ziba de me ní 'o tia inde-e bhú ká tia na 'ngbé 'ti Ebhe gba omaYuda-a de, anga a ko tia inde u asia e li ngute kpála.» <sup>7</sup> Pita u adje lio lie, u atsia akala ne tia bhomu-o edyi gba kpála bini inde apopo lusa ngubula me u du azi ogomago bhúbhú. <sup>8</sup> Kaka-a, u nga 'li edyi ango-o nakolo pí naki me: «Edyi inde u akala e ne tia na ngute kpála.»

<sup>9</sup> Abhomu-o, engú nani li polofeta Djelemi apa e atsia amene lie. Aní apa nani me:

«U aha lí falanga ndjikpa bata-o.

A bhomu-o mase inde li omafsalaele ato e li ani-o. †

<sup>10</sup> U atsia akala ne di edyi gba bhulu napo lusa.

A bhomu-o engú inde li Ebhe Ngamá aha nani

líli mũma me ma pa e pí uo-o.»

*U akodho 'ngú gba Yesu-o me ani kpi bha makpi*

*(Tsia bhú Mlk. 15:2-5; ne bhú Luk. 23:3-5; di ne bhú Dja. 18:33-38.)*

11 Nedhinga u akolo ne Yesu lie kala guvelenele Pilatø-o, ani ayi ani me: «Ngamũ-o, mũ ne 'ngbé ngámá gba omaYuda-a?» Yesu agie me: «Mo opa ngamũ.» 12 Abhomũ-o, ongbengbe odimandø di ne obhelesi okpála gba omaYuda adũ apa 'ngú li ani sisiti. La-a, ani gie 'ngú tété de. 13 Pilatø atsia ayi ani me: «Mũ dje engú inde u ngapa e li kate mũ bhomũ-o di?» 14 Engú bini, Yesu gie engú bini pi ani tété de. Abhomũ-o, Pilatø atsia angamba naali.

15 Bhú ndũ Pasika hana, guvelenele dũ nani natse 'kpa li bhũlu 'kpú bini, bhende li bhiti okpála adũ akũnda me ani tse 'kpa lie-o. 16 A abhaka me 'ngbé bhũlu 'kpú bini inde adũ 'li e me Balabasi nde bhú tikpũ. 17 Pilatø atsia ayi bhiti okpála inde apo bhũla o me: «Yi akũnda me ma tse 'kpa li da pi yi-e? Ne me ma tse 'kpa li Yesu Balabasi, ne me ma tse 'kpa li Yesu inde u a'i e me Masiya-a?» 18 Pilatø yi mo-o padhá de. Ani ayi mo-o, anga ani adũ ambila ndjindji me u apũ Yesu pi ni anga u adũ adje siti bua li ani.

19 Nedhinga li Pilatø adũ lie pí kiti nakodho 'ngũ-o, wala ani atima kpála bini pi ani ne tobhila me: «Mo olí bhú 'ngú gba ngbili kpála bhomũ-o de, anga sukpe na naki inde-e, ma aloto siti loto li 'ngú gba ani-o.»

20 Ongbengbe odimandø, di ne obhelesi okpála gba omaYuda ato bhú 'ndji bhiti okpála me u yo ka Pilatø me ani tse 'kpa li Balabasi, amba ani ka kpadji me u bhøle Yesu. Okpála atsia amene bhadi moko. 21 Pilatø atsia apa pi uo me: «Ma atsé 'kpa li bhũlu 'kpú bini pi yi matse. Bhú ká Yesu ne Balabasi-e, yi akũnda me ma tse 'kpa li da pi yi-e?» U agie me: «Balabasi!» 22 Pilatø ayi uo me: «Ma mene la ngú Yesu inde u a'i e me Masiya pi?» Do uo de-e: «Gi ani li kulusi!» 23 Pilatø atsia ayi uo me: «Ani amene la mangua siti 'ngú dho?» Engú bini, u atsia adũ asũsula matá kpekpeke me: «Gi ani li kulusi!» 24 Li Pilatø au lie me angu ni kolo de-e, di ne me tolo ngakolo kpekpeke-e, ani aha engu, ani atsia avũlu 'kpa e kala bhiti

okpála ne napa me: «Ngama-a, ma bhú ta nakpi gba kpála inde-e ade! A ko naayi 'ngú.» 25 Ndũ okpála hana agie me: «A ayo me ngute ani tuko pí 'ndji ya ne ongisi gba ya-o!» 26 Abhomũ-o, ani atse 'kpa li Balabasi pi uo. Ani aha líli me u bhi Yesu ne fimbo. Ani atsia aha ani pi uo me u gi ani li kulusi.

*Osũdha amũ Yesu  
(Tsia bhú Mlk. 15:16-20; di ne bhú Dja. 19:2-3.)*

27 Abhomũ-o, osũdha gba guvelenele anũ ne Yesu bhú mbadhasũ gba o dengo 'ti gba guvelenele-o. Ndũ osũdha hana atsia apo bhũla o de ani. 28 U agbe bongo li ani, u atsia ato koti na mbembe li ani mũgito me a ko ngámá. 29 U agala 'he na kilikili li kate yá ndula na eti, u atsia ato bhú 'ndji ani. U ato mbamba sa 'kpa ani na kokpa, u atsia atũtu lipũkũ o kuto kala ani. U adũ amũ ani ne napa me: «'Ngbé ngámá gba omaYuda, mũ oo!» 30 U adũ aku ngũsu li ani, u aha mbamba-a, u atsia adũ asũ 'ndji ani ne di. 31 U andjia namũ ani lie, u agbe koti u de ato e li ani-o, u atsia ato matá bongo gba ani-e li ani. Pipita-a, u atsia anũ ne ani ngú nagi ani li kulusi.

*Osũdha agi Yesu li kulusi  
(Tsia bhú Mlk. 15:21-32; ne bhú Luk. 23:26-43; di ne bhú Dja. 19:17-27.)*

32 Osũdha akoto ne Yesu bhú gũdhũ-o. U adũ akoto lie, u akø lio ne kpála bini na kuti na Silene, adũ 'li ani me Simo. Osũdha aholo ani ne kpéke me ani bi kulusi gba Yesu-o. 33 Li u akolo lie li bili inde u a'i e me Gologota-a, inde akũnda napa me «Bili na pelege 'ndji-e», 34 osũdha aha vino inde u amata e ne 'he na sũsũ-o pi ani. Ani ale lie, ani tsia kũnda nandjindji de.

35 Osũdha-a agi Yesu li kulusi. Pita u agi ani lie li kulusi-e, u agũ gbanda ngú obongo gba ani-o. U atsia agbogbo bhũsu o tété.† 36 Pipita-a, u atsia adũlu kuto oo ngú nalila ani. 37 U a'o nani abhũlá pí 'ndji ani balũa inde asuno ta nagi ani li kulusi-o. U aye nani balũa angø-o me: «A

† 27:35 27:35 Tsia bhú Ets. 22:19.

INDE-E YESU, 'NGBÉ NGÁMÁ GBA OMAYUDA-O.»<sup>38</sup> U atsia agi osisiti obhulá 'zi bhisi li okulusi de ani: bini li kulusi gba e li pá 'kpa ani na kokpa, koko li kulusi gba e li pá 'kpa ani na gali.

<sup>39</sup> Okpála inde adu akodho 'kpí-e, adu asobho Yesu ne nako 'ndji o.<sup>40</sup> U adu apa pi ani me: «Ngamu, bhulu nagugumu 'ngbé 'ti Ebhe gba omaYuda ne nayiyiki bhú 'kpí bata-a, kobho limu ngamu makpe! I du me mu nde ne ndili gba Ebhe-e, ke li kulusi-e kuto.»

<sup>41</sup> Ongbengbe odimandø, omusuno na lili gba Moidje bhú dabili bini ne obhelesi okpála, adu bhadi amu ani moko. U adu apa me:<sup>42</sup> «Ani akobho okpála koko. Ka ni ani ti da nakobho lie lie ngae makpe di-e, ngaani inde 'ngbé ngámá gba omafalaele-e? Ani ke nga kuto li kulusi mbia inde, amba ya bhuka ani!»<sup>43</sup> Ani a'o nabhuka gba e bhú Ebhe. A ayo me Ebhe kobho ani mbia inde, i du me Ebhe nde akunda ani na paká-o, anga ani apa me ni ne Ndili gba Ebhe!»<sup>44</sup> Abana osisiti obhulá 'zi inde u agi o li kulusi lingo Yesu-o, u adu bhadi asobho ani moko.

*Yesu andala 'kpa li bua e*

*(Tsia bhú Mlk. 15:33-41; ne bhú Luk. 23:44-49; di ne bhú Dja. 19:28-30.)*

<sup>45</sup> Abhomu-o, nayie tulukpe akolo bhú saa na bata pita tulukpe-e, biti agba pila doto libhomu.<sup>46</sup> Bhú saa na bata pita tulukpe-e, Yesu asula kpekpeke me: «Eli, Eli, lema sabakatani?» A akunda napa me: «Ebhe gba ma, Ebhe gba ma, mo o'o ka ma ka ni?»<sup>47</sup> Bini bini bhú ká okpála inde adu oo adje ani lie, u atsia adu apa me: «Ani nga'i Eliya!»<sup>48</sup> Ma 'li ma-e, suka osudha-a agu holo. Ani anu aha epondje, ani ato bhú kpongadha pandi. Ani atsia ato li 'ndji mbamba, ani aha pi Yesu me ani ndjindji.<sup>49</sup> Engú bini, okoko apa pi ani me: «Djedjeke, ní u nga ne me Eliya ngago nakobho ani!»

<sup>50</sup> Yesu atsia asula matá kpekpeke, ani atsia andala 'kpa li bua e.<sup>51</sup> Me-e, 'ngbé 'kpá bongo inde adu abuku 'bhe tina 'ti na bubu bhú 'ngbé 'ti Ebhe gba

omaYuda-a asidha bhusu e bhisi má tsue nayie abhulá, akolo akuto. Doto adyiki, ongbengbe teme atsia ampa.<sup>52</sup> Abhomu-o, olata-a ada bhusu o, bhiti omabhuka inde amu nani-e atsia azuku.<sup>53</sup> U aze bhú olata gba o-o. Pita li Yesu azuku lie, u atsia agbida bhú Yelusalema, gudhu na bubu-o. Okpála bhelé atsia au uo.

<sup>54</sup> Ngámá gba osudha na Loma bhú dabili ne osudha gba e inde adu alila Yesu nedhinga ani adu lie li kulusi-e au engú inde akodho 'kpí ne nadyiki ka doto-o. Abhomu-o, u adje tsulu naali. U atsia apa me: «Kpála inde-e bha ndju nako ne Ndili gba Ebhe na paká!»<sup>55</sup> Olisi bhelé adu li bili bhomu-o. U adu atsia 'ngú bhomu-o mbo tsutsu. Olisi ango-o ayie nani ne Yesu bhú Galilaya, nakolo makolo bhú Yelusalema ngú nateteke ani.<sup>56</sup> Bhú ká uo, a adu nani Malia, kpála na gudhu na Magadala, Malia 'hi Djaki ne Djodjefu, a la di-e 'hi ongisi gba Djebedayo-o.

*Djodjefu azi Yesu*

*(Tsia bhú Mlk. 15:42-47; ne bhú Luk. 23:50-56; di ne bhú Dja. 19:38-42.)*

<sup>57</sup> A akolo lie tagolo-o, bhulu tia bini ago. A adu kpála na gudhu na Alimatayo. A adu 'li ani me Djodjefu. Kpála ango-o du di nani mukpata gba Yesu.<sup>58</sup> Ani anu abhaka guvelenele Pilato, ani atsia ayo kuo Yesu ka ani. Pilato atsia aha lili me u ha pi ani haha.<sup>59</sup> Abhomu-o, Djodjefu aha kuo Yesu, ani agagala ne daladeli na mbia inde ani akala e bhú kpeke mase.<sup>60</sup> Ani anu ato bhú lata na mbia inde ani aleke nani e pi e makpe bhú teme-o. Pipita-a, ani awawala 'ngbé teme bini li bhøbhø ngú nanini, ani atsia atapa.<sup>61</sup> Nedhinga bhomu-o, Malia, kpála na gudhu na Magadala ne Malia bhe koko adulu kuto bhula lata-o.

*U abu osudha ngú nalila lata Yesu*

<sup>62</sup> Li ekpi aseke lie, a akunda napa me bhú ekpi naguo gba omaYuda-a, ongbengbe odimandø di ne omufalisai anu bhú dabili bini agba Pilato.<sup>63</sup> U atsia apa pi ani me: «Ngámá, 'ndji ya ago mbia inde-e li engú li bhulu eu bhomu-o apa

† 27:46 27:46 Tsia bhú Ets. 22:2.

nako e nedhinga ani adu lie uu-o me pita 'kpí bata ni zuku-o. <sup>64</sup> Kaka-a, a ayo me ha líli me u lila lata ani nakolo bhú 'kpí na bata. Padhá de, anga i du mo-o de, omukpata gba ani-e ti da nago nazi kuo ani. U tsia pá pi okpála me ani azuku. Li okpála dje la ibili mo-o, eu bhende-e né la ibili da bhende ani apa nako e kalanu-o mane.» <sup>65</sup> Pilatø atsia apa pi uo me: «Yi ha osudha-a haha. Yi nu ne uo, amba u lila lata-a maka yi au lie ndjindji-o.» <sup>66</sup> U atsia anu naleke lele nalila lata-o. U ayele bhøbhø ne teme, u atsia a'o osudha ngu nalilila.

## 28

### *Yesu azuku*

*(Tsia bhú Mlk. 16:1-10; ne bhú Luk. 24:1-12; di ne bhú Dja. 20:1-10.)*

<sup>1</sup> Pita ekpi nago gba omaYuda-a, bhú 'kpí yinga køkpi má bhé-o, Malia, kpála na gudhu na Magadala ne Malia koko-o, agbida ngu natsia lata-o. <sup>2</sup> Me-e, doto adyiki ne adjigidjo na ngbéngbé, anga andjelu bini gba Ngámá-a ayie abhúlá, ani ago awawala teme inde adu li 'bhe lata-o, ani atsia adu pépé. <sup>3</sup> Kute ani adu asu má ngbi ngbi ngbi! La di-e, bongo gba ani-e avu má tuu! <sup>4</sup> Li osudha inde adu alila lata-a au lie mo-o, u aholo naguku ka tsulu má kpi kpi kpi, u atsia abala kuto magito me a ko okpála inde amu.

<sup>5</sup> Engú bini, andjelu-o apa pi olisi-e me: «Yi akpé-e de, anga ma ambila me yi ngagili Yesu inde u agi nako e li kulusi-o. <sup>6</sup> Ani sii ade. Ani azuku maka ani apa nako lie-o. Yi go tsia bili inde u aseke nako ani lie-o. <sup>7</sup> Yi nu pa kolo pi omukpata gba ani-e má gala me, ani azuku. Ani adji kala yi bhú Galilaya bhomu. Yi aú ani oo. A bhomu-o ngali ma de ago napa e pi yi-o.»

<sup>8</sup> Abhomu-o, olisi-e ayie bha kolo bhú lata-a má gala me u nde abedhe ne tsulu di ne djali bedhe. U anu ne holo, u atsia anu ngu napa ngali ango-o pi omukpata gba Yesu-o. <sup>9</sup> Ma 'li ma me-e, Yesu ago akø lie ne olisi ango-o. Ani atsia ayi uo me: «Yi oo!» Abhomu-o, u adyudyo lio de ani, u atuko kuto bhú li 'dhu ani, u atsia adhøge ani. <sup>10</sup> Pipita-a, Yesu atsia apa pi uo me:

«Yi akpé-e de. Yi nu pa pi ondaise ma me u nu abhú Galilaya, u aú ma oo ko.»

*Ongámási gba omaYuda ato kali me u bubuku engú nazuku gba Yesu-o*

<sup>11</sup> Li olisi-e adu nga bha lie li kpadji-e, okpála koko bhú ká osudha inde adu nalila lata-a anu abhú gudhu. U atsia akpokpo ndu 'ngú hana inde akodho 'kpí abhú lata-a pi ongbengbe odimandø gba Ebhe-o. <sup>12</sup> Abhomu-o, ongbengbe odimandø apo bhúla o ne obhelesi okpála gba omaYuda-o, u atsia adje lio me o méne pi-ie. Pita nadje lie ka uo-o, u aha tia bhelé pi osudha-a me u apa kukulu 'ngú inde akodho 'kpí-e de. <sup>13</sup> U atsia apa pi uo me: «I du me kpála bini nde ayi yi-e, yi de pa me: <Nedhinga ya adu lie tila-a, omukpata gba ani-e ago, u atsia azi kuo ani li ya.> <sup>14</sup> La di-e, i du me guvelenele nde adje-e, ya ambila lele ya akpokpo pi ani lie ngaya, amba yi asia mangimbo de.» <sup>15</sup> Osudha abha tia-o, u atsia amene bha maka u apa lie pi uo-o. Abhomu-o, ngali ango-o ayangba bha sunda omaYuda moko nakolo pi naki.

*Eli na soso gba Yesu pi omukpata gba e-o*

*(Tsia bhú Mlk. 16:14-18; ne bhú Luk. 24:36-49; ne bhú Dja. 20:19-23; di ne bhú Kul. 1:6-8.)*

<sup>16</sup> Abhomu-o, omukpata ndjikpa ne ká bini-e anu bhú Galilaya, pi eta inde li Yesu apana nani e pi uo me ni akø lini ne uo pi e-o. <sup>17</sup> U akolo lie oo, Yesu akoto li uo. U au ani lie, u atuko kuto bhú li 'dhu ani, u atsia adhøge ani. Engú bini, okoko bhú ká uo adu ne bua na bhisi bhisi. <sup>18</sup> Abhomu-o, Yesu adyudyo lie de uo, ani atsia apa pi uo me: «Ebhe aha ndu angu na abhúlá ne bhe na píla doto hana muma. <sup>19</sup> Kaka-a, yi nu bhú ndu opiga hana. Yi mene me u kolo omukpata gba ma. Yi batisa uo ne 'li 'Dyi ní, ne 'li Ndili, la di ne 'li Bu Bhobua. <sup>20</sup> Yi suno pi uo me u lila ndu líli inde ma aha e pi yi-e hana. Yi mbila la me ngama-a, ní ne yi bhú dabili bini ndu 'kpí hana akólo bha bini makolo ali sokpi.»

**Bádha Ngali  
gba Yesu Kilisito maka li  
Maloko  
aye lie ko  
Eli na kalanu**

Bádha Ngali maka li Maloko aye lie-e, akpo lita e ne naziba me Bádha Ngali ango-o a ko na Yesu Kilisito, Ndili gba Ebhe. Aní asuno Yesu maka kpála na kulu di na angu. Angu gba aní ngau lie bhú nasuno gba aní, ne bhú angu gba aní pi si siti bua di ne bhú nambu li osisiti 'ngú gba okpála. Yesu ngakpokpo 'ngú gba e makpe maka Ndili gba kpála inde ago ngú naha mukobho gba e ngubula nagbegbe okpála bhú sisiti 'ngú gba o-o.

Maloko akpokpo 'ngú gba Yesu-o mbámbá, aní agama 'ngú naali píndji kulu li Yesu amene e ane bhende li Yesu akpokpo e di ne bhende aní asuno e-o. La-a, li omakpata gba Yesu adu la lie abhue ne aní bhú dabili bini-e, u atsia ambila aní ndjindji. Engú bini, obhulu yala gba aní adu matá akolo pi aní ne siti bua naali.

Olukuluku (9-20) inde u a aye e sánda oehe bhisi me-e, ngau lie me aye ne kpála koko. Maloko ye ngae de.

**Ongbengbe ongú inde bhú bhuku inde-e ngae inde:**

Lita Bádha Ngali-o 1:1-13

Kulu li Yesu amene e bhú ká okpála abhú Galilaya 1:14 - 9:50

Dhaku gba Yesu nayie bhú Galilaya ngú nanu abhú Yelusalema 10:1-52

Oekpi nasoso gba Yesu abhú Yelusalema 11:1 - 15:47

Nazuku gba Yesu 16:1-8

Nakoto ka Yesu li okpála, ne na'u ka aní abhú 16:9-20

*Djaa bhulu nabatisa okpála aleke kpadji pi Ngamá Yesu*

*(Tsia bhú Mat. 3:1-12; ne bhú Luk. 3:1-18; di ne bhú Dja. 1:19-28.)*

<sup>1</sup> A inde-e lita Bádha Ngali gba Yesu Kilisito, Ndili gba Ebhe-o. <sup>2</sup> Maka li

polofeta Isaya aye lie bhú bhuku gba e me:

«Ebhe apa me: Djedje nga! Ma atíma bhulu titima gba ma-a pi ma kalanu ngubula naleke kpadji pi ma.

<sup>3</sup> Kpála ango-o ngatotobhila abhú mili bili me:

«Yi leke kpadji pi Ngamá!

Yi lili odjedje kpadji pi aní má ngbuu ngbuu!†»

<sup>4</sup> Kaka-a, Djaa bhulu nabatisa okpála akoto nani abhú mili bili. Aní adu a'i okpála me u go sia batisimo ngú nasuno me u adji bua o adji, amba Ebhe 'e siti 'ngú gba uo-o. <sup>5</sup> Abhomu-o, ndu okpála hana na ndu doto na Yudaya, di ne ndu okpála hana na gudhu na Yelusalema adu ago abhaka aní. U adu ambamba ta osisiti 'ngú gba o-o kala ndu okpála hana. Djaa atsia adu abatisa uo bhú ngade 'ngu na Djuludani. <sup>6</sup> Djaa adu adyi bongo inde u adu e li su enu u a'i e me «samo.» Aní adu agbite ludu e ne ekpu na kó 'nu. Aní adu azu omakindolo di ne nadha 'mu eu. <sup>7</sup> Aní atsia adu apa pi uo me: «Kpála bini ngago pita ma. Kpála ango-o ane ma ne angu. Ma ne tetele kpála ade ngubula me ma kita ne kuto ngubula me ma bhulu ekpu na maleke gba aní-o. <sup>8</sup> Ngama-a, ma ngabatisa yi ne engu. Engú bini, ngaani-e, aní abatisa yi ne Bu Bhobua .»

*Djaa abatisa Yesu*

*(Tsia bhú Mat. 3:13; di ne bhú Luk. 3:21-22.)*

<sup>9</sup> Bhú okpi bhomu-o, Yesu ayie bhú Nadjaleta, gudhu bini na ndu doto na Galilaya, Djaa atsia abatisa aní bhú ngade 'ngu na Djuludani. <sup>10</sup> Nedhinga li Yesu adu akoto lie bhú 'ngu-o, aní au kokpi ngada bhusu e. Aní atsia au di Bu Bhobua ngake pi e maka bebhe. <sup>11</sup> Abhomu-o, eli bini akoto abhú 16:9-20, atsia apa me: «Mu ne Ndili gba ma inde ma kunda e naali, ma ne kpukpú na bua ma.»

*Satana ale Yesu*

*(Tsia bhú Mat. 4:11; di ne bhú Luk. 4:1-13.)*

† 1:3 1:2-3 Tsia bhú Mal. 3:1; di ne bhú Isa. 40:3.

<sup>12</sup> Pipita kolo me-e, Bu Bhobua atsia amba bhúla Yesu abhú mili bili. <sup>13</sup> Ani adu oo ngubula ekpí ndjikpa badha me Satana nde ngale ani. Yesu adu nadu li bili li onu na bili adudu li e-o. Oandjelu atsia adu nateteke ani.

*Yesu a'i omukpata na gigena*

*(Tsia bhú Mat. 4:12-22; di ne bhú Luk. 4:14-15, 5:1-11.)*

<sup>14</sup> Ekpí bini, pita li Elode Atipasi aholo Djaa lie, ani atsia ato ani bhú tikpu-o, Yesu anu bhú ndu doto na Galilaya. Ani adu akpokpo Bádha Ngali gba Ebhe-e\* pi okpála. Ani adu apa me: <sup>15</sup> «Nedhinga nani li Ebhe a'o e akolo. Nau gba ani-e akolo di masikpe. Yi dji bua yi, yi bhuka Bádha Ngali gba Ebhe-o.»

<sup>16</sup> Li ani adu akpangba ngo 'kpø na Galilaya lie, ani au Simo ne ndai e Andili me u nde ngabhike nado bhúbhú. Padhá de, anga u du nani obhulu nagbe sungu. <sup>17</sup> Yesu atsia apa pi uo me: «Yi kpata ma, ma adjí ibili yi obhulu nagili okpála pi Ebhe.» <sup>18</sup> Kolo me-e, u a'o ka onado gba o-o, u atsia akpata ani.

<sup>19</sup> Pipita-a, Yesu adyudyo mbo lie ne kalanu masudha, ani au ongisi gba Djebedayo: Djaki ne ndai e Djaa . U adu me u nde bhú zabu gba o, u nde ngaleke onado gba o-o. <sup>20</sup> Abhomu-o, ani a'i uo. Má gala kolo me-e, u a'o ka 'dyi o, Djebedayo bhú zabu bhú dabili bini ne okpála na kulu-o. U atsia akpata ani.

*Yesu akobho kpála bini inde li siti bua adu nadu bhú e*

*(Tsia bhú Luk. 4:31-37.)*

<sup>21</sup> Abhomu-o, Yesu ne omukpata gba e akolo bhú kuti na Kapalanauma. A akolo lie bhú 'kpí nago gba omaYuda-a , Yesu ali bhú 'ti nadjé líli gba Moidje , ani atsia aholo nasuno. <sup>22</sup> Okpála inde adu nadjé ani-e, adu nangamba naali li nasuno gba ani-o. Padhá de, anga ani du asuno maka omusuno na líli gba Moidje de. Engú bini, ani adu asuno ne angu. <sup>23</sup> A abhaka me bhú 'ti nadjé líli oo, kpála bini inde li siti bua adu bhú e nde oo. Abhomu-o, kpála ango-o asula me: <sup>24</sup> «Yesu, kpála na

Nadjaleta, mo okunda namene ngú ya pi? Mo ogo ngú nandjia angu ya? Ma mbila hana me mu ne da-ie. Mu ne Kpála na Bubu inde li Ebhe atima e ko!»

<sup>25</sup> Engú bini, Yesu ambe bhú 'ndji siti bua ango-o me: «Gbite 'bhø mu, amba mu koto la di bhú kpála ango-o makoto!» <sup>26</sup> Abhomu-o, siti bua adyiki kpála bhomu-o má djigi djigi! Ani atu 'ue, ani atsia akoto bhú ani. <sup>27</sup> Ndu okpála hana angamba naali. Kaka-a, u aholo nayi lio sunda o me: «A inde-e mangua 'ngú dho? Nasuno na mbia inde-e abedhe ne angu! Kpála inde-e ngaha belegu líli pi osisiti bua, u la bhadi ngamemene!» <sup>28</sup> Abhomu-o, ngali gba Yesu-o ayangba bha kolo bhú ndu doto na Galilaya libhomu.

*Yesu akobho okpála bhelé na kuo*

*(Tsia bhú Mat. 8:14-17; di ne bhú Luk. 4:38-41.)*

<sup>29</sup> Yesu akoto lie bhú 'ti nadjé líli-e me-e, u atsia anu ne Djaki di ne Djaa bhú 'ti gba Simo ne Andili. <sup>30</sup> A abhaka me 'hi wala Simo nde asi kuto, ka anga adu li ani ne kuo, kute ani adu kpákpá. Abhomu-o, u atsia apa kolo engú gba ani-e pi Yesu. <sup>31</sup> Ani dyudyo lie de ani. Ani aha 'kpa ani, ani a'e ani bhúlá. Kuo ayie li ani, ani atsia aholo nalu 'zu pi uo.

<sup>32</sup> A akolo lie tagolo pita nati ka ela-a, okpála aholo nago ne obhulu kuo di ne obhende adu ne osisiti bua bhú o pi Yesu. <sup>33</sup> Okpála na gudhu libhomu adu apo bhúla o li 'bhø bhoti-o. <sup>34</sup> Abhomu-o, Yesu akobho okpála bhelé inde adu ne okuo ngangá. Ani atsia apandja di obua na sisiti bhelé inde adu nadu bhú okpála-o. Ani ha la di nedhinga pi osisiti bua ango-o ngú nagama 'ngú belegu de bini. Padhá de, anga a adu me u nde ngambila ani hana.

*Yesu akpokpo Ngali gba Ebhe-e bhú Galilaya*

*(Tsia bhú Luk. 4:42-44.)*

<sup>35</sup> Bhú sikikpi-e, me biti nde ani nga bha má gbu-o, Yesu ayie bhúlá, ani akoto. Ani

\* **1:14** 1:14 Bhú obhuku koko-o mo obháka me u nde aye me «Bádha Ngali Nau gba Ebhe .» Tsia bhú Mlk. 6:17.

atsia atapa abhú mili bili. Oo, ani aholo nayo Ebhe. <sup>36</sup> Abhomu-o, Simo ne okpála bhende u adu ne o-o, aholo nagili ani. <sup>37</sup> U au ani lie, do uo pi ani me: «Ndu okpála hana ngagili mu.» <sup>38</sup> Abhomu-o, Yesu atsia apa pi uo me: «Ní nu li obili koko, bhú okuti na ngongo, amba ma kpokpo di Ngali gba Ebhe-e oo. Padhá de, anga a bhomu-o engú inde ma ago ngú e ko.» <sup>39</sup> Abhomu-o, Yesu adholo nani bhú ndu doto na Galilaya libhomu. Ani atsia adu akpokpo Ngali gba Ebhe-e bhú oti nadje líli na kuti gba uo-o. Ani adu di napandja osisiti bua inde adu nadu bhú okpála-o.

*Yesu akobho bhulu kaba bini*  
(Tsia bhú Mat. 8:1-4; di ne bhú Luk. 5:12-16.)

<sup>40</sup> Bhú oekpi bhomu-o, bhulu kaba bini adyudyo lie de Yesu. Ani atutu lipuku e kuto kala ani, ani atsia akikiliki lie pi ani me: «Í du me mu nde akunda-a, mu ti da nakobho ma.» <sup>41</sup> Yesu adje ndjinga ani, ani a'o 'kpa e li kute ani. Ani atsia apa pi bhulu kaba angoo me: «Ako, ma akunda. Kokobho!» <sup>42</sup> Ma 'li ma me-e, kaba agulu li ani hana má da! Ani atsia akobho. <sup>43</sup> Kolo me-e, Yesu agie ani sidi ne nagbele 'dje ani kpekpeke. <sup>44</sup> Ani atsia apa pi ani me: «Djedje! Mo osú 'kpa li 'ngú inde-e de kpála bini belegu de má kpo! Engú bini, nu suno limu pi dimandé gba Ebhe, amba mu ha makiso gba mu-o maka li Moidje aye nani lie-o. Bhobhomu-o asuno pi okpála me mo okobho.» <sup>45</sup> La-a, li kpála angoo ayie lie oo, ani aholo bha ne kpokpo 'ngú bhomu-o pi ndu okpála hana li ndu bili hana inde ani adu apu li e-o. Kaka-a, Yesu ti matá nani da nasuno lie mbámabá bhú gudhu de. Engú bini, ani adu bha ibili nadu ne alingo gudhu, bhú omili bili. Okpála adu ayie ne ndu bili hana, u atsia adu ago nabhaka ani.

## 2

*Yesu akobho dukuto*  
(Tsia bhú Mat. 9:1-8; di ne bhú Luk. 5:17-26.)

<sup>1</sup> Pita 'kpi masudha-a, Yesu agie lie bhú Kapalanauma. Okpála atsia adje me ani akuti. <sup>2</sup> Abhomu-o, kambu okpála ago apo

bhúla o oo. Kaka-a, bili na padhá tsia du de, belegu de ali 'bhø bhoti. Ani atsia adu akpokpo eli gba Ebhe-e pi uo. <sup>3</sup> Bhú nedhinga bhomu-o, obhosi badha ago pi ani ne dukuto bini me u nde abi ani mabi. <sup>4</sup> Engú bini, li okpála adu la lie bhelé-e, u tsia ti nani da nakolo ne ani li Yesu de. Abhomu-o, u atsia a'uu ne ani api 'ngbu 'ti. U adu gudho li 'ngbu 'ti-e li lele bili inde Yesu adu lie-o. U atsia akø dukuto-o pi kalagba gba e tété. <sup>5</sup> Li Yesu au nabhuka gba uo lie, ani atsia apa pi dukuto-o me: «Ndika ma, osisiti 'ngú gba mu-o a'e lie a'e.»

<sup>6</sup> Omusuno na líli koko gba Moidje adu me u nde adulu kuto oo. U atsia adu nabhundja li bua o me: <sup>7</sup> «Kpála inde-e ngagama 'ngú mo-o ka ni? Ani ngasobho Ebhe. A ti da na'e siti 'ngú gba kpála da, bha bini Ebhe kpi e kpi di?» <sup>8</sup> Yesu atsia ambila bha kolo me u ngabhundja li bua o mo-o. Abhomu-o, ani atsia apa pi uo me: «Yi ngabhundja li bua yi mo-o ka ni?» <sup>9</sup> A ane ne bhuku ne bhedho: ne napa pi dukuto-o me «Osisiti 'ngú gba mu-o a'e lie a'e», ne napa me «Yie bhúlá, ha kalagba gba mu-o, amba mu dhuku?» <sup>10</sup> Engú bini, ma adji asuno pi yi me «Ndili gba kpála ne angu na'e osisiti 'ngú gba okpála na píla doto.» Abhomu-o, ani atsia apa pi dukuto-o me: <sup>11</sup> «Ma apa pi mu me yie bhúlá, ha kalagba gba mu-o, amba mu gie limu agba mu!» <sup>12</sup> Kolo me-e, bhoko angoo ayie bhúlá, ani aha kalagba gba e-o, ani akoto bhú ká djila ndu okpála hana, ani atsia atapa. Ndu okpála hana adu angamba. U adu adhøø Ebhe. U atsia adu apa me: «Ya u nga ngua engú inde-e belegu de bini!»

*Yesu a'i Levi*  
(Tsia bhú Mat. 9:9-13; di ne bhú Luk. 5:27-32.)

<sup>13</sup> Pipita-a, Yesu anu matá lingo ekpe na Galilaya. Bhati okpála adu ago abhaka ani, ani atsia adu asuno pi uo. <sup>14</sup> Ani adu akodho 'kpi lie, ani au Levi, ndili gba Alafayo me ani nde adu bhú 'ti inde u adu akala mandjandja bhú e-o. Yesu apa pi ani me: «Kpata ma.» Levi ayie bhúlá, ani atsia akpata ani. <sup>15</sup> Pipita-a, Yesu atsia



anɔ nazɔ 'he bhú 'ti gba ani. Ondɔmbi na mandjandja di ne okpála namene siti 'ngú bhelé adulu de Yesu ne omɔkpata gba e-o. Padhá de, anga ongua okpála bhomɔ-o bhelé adu akpata ani. <sup>16</sup> Li omɔsuno na líli inde adu bhú ká omɔFalisai au lie me Yesu ngazɔ 'he ne ongua okpála bhomɔ-o, u atsia ayi omɔkpata gba ani-e me: «Ani ngazɔ 'he bhú dabili bini ne ondɔmbi na mandjandja di ne okpála namene siti 'ngú ngú ní?» <sup>17</sup> Yesu adje uo napa engú bhomɔ-o lie, ani atsia apa pi uo me: «Okpála inde ne kuo ade-e ne gumu mutia ade. Engú bini, okpála na kuo mangbo ne gumu ani ngao. Ma go ngú na'i okpála bhende apa me o ngbingbili-e de. Engú bini, ma ago mangbo ngú na'i obhende ngau lio me o ne osisiti okpála ko.»

*Yesu akpo 'ngú pindji natse 'zu ngú nayo Ebhe*

*(Tsia bhú Mat. 9:14-17; di ne bhú Luk. 5:33-39.)*

<sup>18</sup> Ekpí bini, omɔkpata gba Djaa bhulu nabatisa okpála di ne omɔFalisai adu atse 'zu ngú nayo Ebhe. Abhomɔ-o, okpála ago ayi Yesu me: «Ka ní li omɔkpata gba mu-o tsetse ezɔ lie ngú nayo Ebhe de-e, obhende gba Djaa bhulu nabatisa okpála di ne obhende gba omɔFalisai-e nde la ngatsetse-e?» <sup>19</sup> Yesu agie pi uo me: «Yi abhundja naayi me okpála inde ago bhú da anokomia na kɔva ti da natse nazɔ 'he me 'ko ɔlɔ-o nde bhú dabili bini ne uo? 'Kpí bini de! Nedhinga inde li 'ko ɔlɔ-o nde nga bha lie bhú dabili bini ne uo-o, u ti da natse nazɔ 'he de. <sup>20</sup> Engú bini, ekpí akólo makolo nedhinga inde li u a'é 'ko ɔlɔ-o lie bhú ká uo-o, ekpí ango-o, u tsia tsé nazɔ 'he. <sup>21</sup> Kpála bini ti da naleke bongo na didili ne pála bongo na mbia de. I du mo-o de-e, pála bongo bhe na mbia sídha té bhe na didili-o, li eka ango-o kólo ngbéngbé ane bhe na kalanu-o mane. <sup>22</sup> La di-e, kpála bini túko pandi na mbia bhú odidili dhudhu na kó 'nu de. I du mo-o de-e, pandi-e úpa bhusu odhudhu-o. Ani tsia néke pandi-e ne odhudhu-o hana. Engú bini, pandi na mbia ayo bha ne odhúdhú na mbia.»

*Yesu ne Ngámá pí 'ndji ekpí naguo gba omaYuda*

*(Tsia bhú Mat. 12:1-8; di ne bhú Luk. 6:1-5.)*

<sup>23</sup> Ekpí bini naguo gba omaYuda-a, Yesu ne omɔkpata gba e adu akodho 'kpí bhú ngu 'zu inde u a'i e me ngano. Omɔkpata gba ani-e aholo akodho 'ndji 'ndji, u atsia adu nazuzɔ. <sup>24</sup> OmɔFalisai apa pi Yesu me: «Tsia nga engú u ngamene e li 'kpí naguo-o. Líli gba ní-e ziba namene kulu bhú 'kpí naguo de.» <sup>25</sup> Ani atsia gie pi uo me: «Yi tanga nga engú inde li Davidi amene nani e di? Ekpí bini, ngaani ne okpála inde adu adhuku bhú dabili bini ne ani-e adje gumu. <sup>26</sup> Abhomɔ-o, ani ali bhú 'ti Ebhe, ani atsia azɔ mapa inde u a'o e pi Ebhe-o (a adu me Abiatali nde ne bhele kpála gba odimandɔ li nedhinga bhomɔ-o nga). La-a, líli gba ní aziba me odimandɔ zuzɔ bha ngao kpi o kpi. Engú bini, Davidi azɔ, ani atsia aha di pi okpála inde adu adhuku bhú dabili bini ne ani-o.» <sup>27</sup> Yesu atsia apa matá pi uo me: «U a'o ekpí naguo pi kpála-kuti. Engú la bini, u bho kpála-kuti pi ekpí naguo de. <sup>28</sup> Kaka-a, Ndili gba kpála di ne Ngámá pí 'ndji ekpí naguo.»

### 3

*Yesu akobho bhoko bini li 'kpí naguo gba omaYuda*

*(Tsia bhú Mat. 12:9-14; di ne bhú Luk. 6:6-11.)*

<sup>1</sup> Ekpí koko, Yesu ali matá bhú 'ti nadje líli gba Moidje-o. Bhú 'ti oo, kpála bini inde li 'kpa e andia adu oo. <sup>2</sup> OmɔFalisai adu akunda na'o 'ngú pí Yesu. Kaka-a, u aholo atsia ani ne kpéke djila, atigala ani kóbho kpála inde adu me 'kpa e nde andia-a li 'kpí naguo. <sup>3</sup> Abhomɔ-o, Yesu atsia apa pi kpála ango-o me: «Yie bhúlá, amba mu lu si bhú ká djila ndu okpála hana.» <sup>4</sup> Pipita-a, Yesu atsia ayi okpála inde adu oo me: «Li 'kpí naguo gba omaYuda-a, líli gba ní-e aziba bhedho: U mene bádha 'ngú ne me u mene siti 'ngú? U kobho kpála ne me u bhelɔ kpála?» Engú bini, u tsia du ne engú na gigie de! <sup>5</sup> Ani aholo atsia ndu uo hana bini ne bini

na gúgú. Bua ani ake, ka kpéke 'ndji gba uo-o. Abhomu-o, ani atsia apa pi kpála li 'kpa e andia me: «Gbele 'kpa mu.» Kpála ang-o agbele 'kpa e, 'kpa ani atsia akolo matá ndjindji. <sup>6</sup> Li omuFalisai aze lie oo, u atsia apo kolo bhúla o ne omaha Elode. \* U atsia adje lio me ogili kpadji nabhøle Yesu.

### *Kambi okpála akpata Yesu*

<sup>7</sup> Pipita-a, Yesu ne omukpata gba e agbida lingo ekpø na Galilaya. Kambi okpála atsia akpata ani. Okpála ang-o ayie nani bhú ndu doto na Galilaya ne Yudaya, <sup>8</sup> bhú gudhu na Yelusalema, bhú ndu doto na Idumé, bhú ndu doto inde ayi 'ngu na Djuludani, bhú odoto na Tile ne Sidona. Kambi okpála ang-o adje nani ngali na ongú li Yesu adu amene e lie, u atsia ago abhaka ani. <sup>9</sup> Yesu atsia aha líli pi omukpata gba e me u 'o zabu pi ni bini masikpe, amba i du me okpála bhomu-o nde asulu ni má wakaka-a, ni de 'u bhúbhú. <sup>10</sup> Padhá de, anga ani akobho nani okpála bhelé. Kaka-a, okpála na kuo adu agbene lio me o bu 'kpa o li ani amba o kobho. <sup>11</sup> Li okpála inde li osisiti bua adu ato mbolo li o adu au ani lie, u adu ago atuko ne 'ue bhú li 'dhu ani me: «Mu ne Ndili gba Ebhe.» <sup>12</sup> Engú bini, Yesu adu apa pi uo na gúgú me u ambamba ta ni pi okpála koko de.

*Yesu alo obhulu titima ndjikpa ne ká bhisí*

*(Tsia bhú Mat. 10:1-4; di ne bhú Luk. 6:12-16.)*

<sup>13</sup> Pipita-a, Yesu a'u apí 'ta. Ani atsia a'i obhende ani adu akunda o-o. U atsia ago abhaka ani. <sup>14</sup> Abhomu-o, bhú ká okpála ang-o, ani alo okpála ndjikpa ne ká bhisí. Ani agisila 'li uo me obhulu titima. Ani a'o uo ngubula me ni du adu ne uo bhú dabili bini, la di ngubula me ni tima uo ngú nakpokpo Ngali gba Ebhe-o. <sup>15</sup> Ani aha di pi uo angu ngú napandja osisiti bua bhú okpála. <sup>16</sup> A inde-e obhe ndjikpa ne ká bhisí inde ani alo nani o-o: Simo (inde li Yesu agisila nani 'li e me «Piele»), <sup>17</sup> Djaki ne ndai e Djaa (ongisi

gba Djebedayo inde li Yesu aha nani 'ili koko pi o me «Boaneledjesi», a akunda napa me «ongisi gba mugbálá»), <sup>18</sup> a la di-e, Andili, Filipino, Batelemi, Matié, Tuma, Djaki (ndala Alafayo), Tade, Simo (kpála nakunda doto gba e naali), <sup>19</sup> di ne Yuda Isikaliete, kpála inde apú Yesu-o.

*Okpála na piga gba Yesu abhundja me ani ati pele*

<sup>20</sup> Abhomu-o, Yesu agie matá lie li bili ani adu nadu li e-o, bhiti okpála atsia ago apo matá bhúla o de ani. Kaka-a, Yesu ne omukpata gba e sia belegu nedhinga ngú nazu 'he de. <sup>21</sup> Li okpála na piga gba ani adje ngali ang-o lie, u akø kpadji ngú nanu aholo ani. Padhá de, anga u adu apa me: «Yesu akolo bhulu pele!»

*Yesu agie 'ngú pi omusuno na líli gba Moidje*

*(Tsia bhú Mat. 12:22-32; di ne bhú Luk. 11:14-23, 12:10.)*

<sup>22</sup> Abhomu-o, omusuno na líli gba Moidje inde ayie nani bhú Yelusalema adu apa me: «A bhú kpála bhomu-o ne Beledjebula!» U adu di apa matá me: «A ngaha angu nato holo bhú 'dhu osisiti bua pi ani ne ngámá gba osisiti bua.» <sup>23</sup> Abhomu-o, Yesu atsia a'i omusuno bhomu-o. Ani atsia apa pi uo bhú gbitaku me: «Lele pi Satana ti da nato holo lie bhú 'dhu Satana-a? <sup>24</sup> I du me okpála gba ngámá bini nde ngagu gbele sunda o, kuti ang-o lú-u de. <sup>25</sup> I du me okpála na piga bini nde ngagu gbele sunda o, piga ang-o lú-u de. <sup>26</sup> I du me Satana nde ngagu lie ngae makpe, nau gba ani-e gbógbo bhusu e. Ani ti da nabhue de, li 'ngú gba ani-e ndjia.

<sup>27</sup> Kpála ti da nali bhú 'ti gba kpéke bhoko bini de, ani tsia bhá ndu 'he gba ani-e me ani nde gbigbite ngaiza kpéke bhoko bhomu-o kalanu de-e de. Engú bini, ani de agbigbite ani agbigbite-e, ani tsia bhá ndu 'he gba ani-o. <sup>28</sup> Ma apa pi yi na paká me, u tí da nambu li osisiti 'ngú gba okpála di ne osobho inde u ngasobho Ebhe ne e hana. <sup>29</sup> Engú la bini, li kpála

\* 3:6 3:6 Okpála gba Elode: A ko okpála inde adu bhú dabili bini ne Elode. Tsia bhú Mat 22:16.

sobho Bu Bhobua-a , Ebhe 'é siti 'ngú gba kpála ango-o de. Padhá de, anga ani amene bhomu-o siti 'ngú na dudu. <sup>30</sup> Yesu adu apa nani pi uo mo-o, anga u adu apa me: «A bhú ani ne siti bua.»

*'Hi Yesu ne ondaise Yesu ngao dho*

*(Tsia bhú Mat. 12:46-50; di ne bhú Luk. 8:19-21.)*

<sup>31</sup> Pipita-a, 'hi Yesu ne ondaise ani akolo li bili ani adu asuno li e-o. U alulu akilidjo, u atsia atima kpála bini ngú na'ani. <sup>32</sup> Kambi okpála adulu nani de ani. U atsia apa pi ani me: «Tsia nga, 'hi mu di ne ondaise mu alulu akilidjo, u ngagili mu.» <sup>33</sup> Ani atsia gie pi uo me: «'Hi ma ne ondaise ma ngao dho?» <sup>34</sup> Abhomu-o, ani atsia bhiti okpála asa deno ani ngbalina-o. Ani atsia apa me: «Yi tsitsia nga, 'hi ma ne ondaise ma ngao inde! <sup>35</sup> Ndu kpála hana inde ngamene engú li Ebhe akunda e, kpála ango-o, a ko ndai ma na bhobhoko, a ko ndai ma na eole, a ko la di 'hi ma.»

## 4

*Gbitaku gba bhulu nalu nguwa*

*(Tsia bhú Mat. 13:1-9; di ne bhú Luk. 8:4-8.)*

<sup>1</sup> Li Yesu akolo lie lingo ekpe na Galilaya-a, ani aholo mata nasuno. Abhomu-o, bhiti okpála na bhighbiti ago apo bhula o de ani. Kaka-a, ani atsia a'u bhú zabu bini, ani anu adu bhubhu api 'ngu. Bhiti okpála-a atsia adu naao apigo deno 'ngu-o. <sup>2</sup> Yesu atsia adu asuno ongu pi uo bhelé bhú ogbitaku. Ani adu apa bhú nasuno gba e me: <sup>3</sup> «Yi djedje nga! Ekpi bini, kpála bini anu abhiye gba e ngú nalu 'zu. <sup>4</sup> Nedhinga ani adu alulu lie, tété abala lingo kpadji. Odhu ago, u atsia azu hana má kpekobho!

<sup>5</sup> Koko atsia abala li bili na teme, doto du li bili ango-o bhelé de. Kaka-a, a atsia aké má gala, anga doto du sasa bhelé de. <sup>6</sup> Engú bini, li ela akolo lie kpekpeke-e, ezu ango-o atsia atsulu ka ndibhili sisie-o. Abhomu-o, a atsia a'ulu. <sup>7</sup> Té koko abala li bili na oeti, oeti atsia abhele, a anguvo ezu-o. Kaka-a, a atsia li líli de. <sup>8</sup> Lí nguwa

koko atsia abala li bili na dobho, a aké, a abhele a atsia ali líli. Lí nguwa bini ali líli ndjikpa bata. Koko ali líli ndjikpa madhia. Koko ali líli kama bini.» <sup>9</sup> Yesu atsia abu tata me: «I du me a nde li kpála ne djedje ngú nadje 'kpi-e, ani de dje!»

*Yesu ngakpo 'ngú bhú ogbitaku ka ni?*

*(Tsia bhú Mat. 13:10-17; di ne bhú Luk. 8:9-10.)*

<sup>10</sup> Pipita-a, li Yesu atigala bha lie ne omukpata ndjikpa ne ka bhisi di ne okpála inde adu nadu de ani titi o-o, u aholo nayi ani pindji ogbitaku-o. <sup>11</sup> Ani atsia agie pi uo me: «Ngayi-e, Nau gba Ebhe ambamba ta e pi yi ambamba. La-a, pi okpála bhende kilidjo-o, ma bha ngapapa pi uo bhú ogbitaku. <sup>12</sup> A ko ngubula me engú inde bhú Bhuku gba Ebhe-e mene lie. Engú inde me:

«Abana u du atsia 'kpi-e, u u 'kpi de,  
abana u du adje 'kpi-e, u ké mbolim-boli de.

Kaka-a, u dji bua o de,

Ebhe 'é di siti 'ngú gba uo-o de.†»

*Yesu ambamba ta gbitaku gba bhulu nalu nguwa*

*(Tsia bhú Mat. 13:18-23; di ne bhú Luk. 8:11-15.)*

<sup>13</sup> Pipita-a, Yesu atsia apa pi uo me: «Yi ké mboli gbitaku bhomu-o de! La mbia inde-e, yi aké mboli ndu ogbitaku koko hana lele pi?

<sup>14</sup> Bhulu nalu nguwa inde ma de apa 'ngú e ngalu eli gba Ebhe. <sup>15</sup> Okpála koko maka ngo 'hi kpadji li bili inde li eli gba Ebhe-e alu lie li e-o. Nedhinga u adje eli-e lie, kolo ma 'li ma me-e, Satana gó, ani tsia 'é eli inde alu lie bhú uo-o. <sup>16</sup> Okpála koko ngasia eli-e bhú doto na ká teme. Nedhinga u ngadje eli-e lie, a bhúe de u ngasia ne djali hana. <sup>17</sup> Engú bini, u 'o de me eli bhomu-o si kuti e ali bua o-o de. U nga'o 'to o tété bha mbo ngú nedhinga bedi. Kaka-a, nedhinga li okpekpeke da 'ngú ngago lie, i du di-e mbolo ka 'li Ebhe-e, u nga'o ká nabhuka gba o kolo má gala! <sup>18</sup> Matá-a, okoko ngasia eli-e bhú ká oeti. A bhomu-o, obhende i di me

† 4:12 4:12 Tsia bhú Isa. 6:9-10.

ziba eli inde u ngadje e-o. <sup>19</sup> Engú bini, u ngabhundja naali pindji ongú na doto inde. Tiatia ngapipite uo. La di-e, ndu ogumu 'ngú ngangá ngali bhú uo, i tsia ngúvo eli-o. Kaka-a, eli-e zú nguwa de. <sup>20</sup> Ngú nabu tata-a, okoko ngasia eli-e bhú doto na dobho. U ngadje eli-o, u ngasisia, u la di ngali líl. Bhú okoko-o, líl bini ngali líl ndjikpa bata, bhú okoko ndjikpa madhia, bhú okoko kámá bini.»

*Yesu akpokpo gbitaku na eke  
(Tsia bhú Luk. 8:16-18.)*

<sup>21</sup> Pipita-a, Yesu atsia apa pi uo me: «U dhedhedhe eke ngubula na'o'o asa lusa i du di-e asa mako uu? U dhedhedhe mangbo ngubula na'o'o pí misa. <sup>22</sup> Padhá de, anga ehe bini ade inde adudu bhú pepe, inde i kóto bhú mbasu de-e ade. La di-e, ndu 'he hana inde awo lie mawo inde li kpála u e de-e ade. <sup>23</sup> I du me a nde li kpála ne djedje ngú nadjje 'kpí-e, ani de djel!»

<sup>24</sup> Yesu atsia apa pi uo me: «Yi 'o 'to yi li 'ngú ma ngapa e ndjindji, anga yi dje ndjindji-e, yi ké bhadi mboli engú bhelé. <sup>25</sup> Padhá de, anga kpála inde ngaké mboli engú ndjindji-e, Ebhe ambamba bhadi ta engú bhelé pi ani. Engú bini, kpála inde i ké mboli engú ndjindji de-e, u a'é belegu mboye bhende ka ani-o.»

*Naɛ gba Ebhe-e maka ni?*

<sup>26</sup> Yesu atsia apa matá pi uo me: «Yi tsia nga ehe inde li Naɛ gba Ebhe-e nde maka e ko. A maka kpála inde adjí abhiye ngú nalu nguwa. <sup>27</sup> Ngbikpi ne sukpe, abana ani du bha tila, ne me ani du li zuku, lí nguwa du bha me a nde ngaze, a nde la di ngabhele. Ani mbila la de me a ngamene lie lele pi-ie de. <sup>28</sup> Doto ne titi e ngaké ngaiza musana. Pipita-a, i bí 'bhi. Li soso-o, i bá líl inde ato na paká paká. <sup>29</sup> Li líl mbe-e, kpála alu-o tsia kodho anga a ko nedhinga na'e nguwa abhiye.»

<sup>30</sup> Yesu atsia apa matá me: «Ní ti da nakpo 'ndji Naɛ gba Ebhe-e ne ni, ne me ní ti da nasusuno li mangua gbitaku dho? <sup>31</sup> A maka lí 'lá u a'i e me mutadi. Li u lu ani bhú doto-o, a ko lí nguwa bhe na yeye ane mane bhú ká oli nguwa hana na

píla doto. <sup>32</sup> Engú bini, nedhinga u alu ani lie, a ngabhele, i tsia kólo ngbéngbé ane ondula koko hana. Li oyáyá-a kólo ngbéngbéngbe da napa me odhu ti da nayiki oti gba o bhú bhiti kpákpá-o.»

<sup>33</sup> Abhomu-o, Yesu adu asuno bhú ogbitaku bhelé maka obhende bhomu. Ani adu akpokpo 'li Ebhe pi uo li lele bhende li okpála adu adje ani-e, ti da naké mbolimboli lie ko. <sup>34</sup> Ani du nani agama 'ngú pi uo padhá de mandi gbitaku. Engú bini, nedhinga ani adu nadu lie ne omakpata gba e titi o, ani atsia adu ambamba tata-a pi uo hana.

*Yesu ayoko kpéke anvi pí 'ngu  
(Tsia bhú Mat. 8:23-27; di ne bhú Luk. 8:22-25.)*

<sup>35</sup> Bha tagolo bhú ekpi bhomu-o, Yesu atsia apa pi omakpata gba e me: «Ní gulu 'ngu ayi 'ngu.» <sup>36</sup> Abhomu-o, u a'o ká bhiti okpála-o, u anu ne Yesu bhú zabu ani adu bhú e-o. Ozabu koko adu di bhú dabili bini ne uo. <sup>37</sup> Kolo me-e, kpéke anvi na gipi aholo ape. Ongbo 'ngu-o adu atuko bhú zabu masakpe de me zabu-o bedhe ne engu. <sup>38</sup> La ngaani, Yesu-o, ani adu me ani nde ala atabhu zabu-o. Ani a'o 'ndji e pí kuse. Omakpata gba ani anu azuku ani ne napa pi ani me: «Musuno, ní adjí amú. A zí 'ngú bhú djila mu di?» <sup>39</sup> Ani azuku lie, ani ambe bhú 'ndji anvi-o. Ani atsia apa pi ngbo 'ngu-o me: «Gba 'bhe mu! Ndjili má bulu!» Anvi a'o nape, engu atsia akolo guguo má bi! <sup>40</sup> Yesu atsia apa pi omakpata gba e me: «Yi ne tsulu mo-o ka ni? Nabhuka nga bhú yi adi?» <sup>41</sup> Engú bini, u adu adje tsulu naali. U atsia adu apa sunda o me: «Ae mangua kpála dho i ngadje belegu e ne anvi di ne engu-o?»

## 5

*Yesu akobho kpála bini inde li siti bua adu nadu bhú e  
(Tsia bhú Mat. 8:28-34; di ne bhú Luk. 8:26-39.)*

<sup>1</sup> Pipita-a, Yesu ne omakpata gba e akolo ayi 'ngu, bhú ndu doto gba okpála na Gelasa. <sup>2</sup> Li Yesu akoto lie bhú zabu-o, kolo me-e, kpála bini akoto li bili na olata,

ani atsia ago abhaka ani. Kpála angoo, siti bua adu nadu bhú ani. <sup>3</sup> Kpála angoo adu nadu bhú ká olata. Kpála bini ti nani da nagbite ani de, belegu de ne gbíndjili. <sup>4</sup> Padhá de, anga bhútsibhútsi, u adu agbite 'dhu ani di ne 'kpa ani ne ogbíndjili. Engú bini, ani adu akokodho ogbíndjili bhomu-o má dhu dhu dhu! Kpála bini ko nani angu e pí ani de. <sup>5</sup> Ndu 'kpí hana sukpe ne ngbikpi ani adu bha nasusula bhú ká olata di ne bhú ká oeta. Ani atsia adu natsotsolo eka li kute e ngae makpe ne oteme.

<sup>6</sup> Ani au Yesu lie me ani nde nga bha tsutsu-o, ani ago ne holo, ani atutu lipuku e kuto kala ani. <sup>7</sup> Ani atsia asula kpekpeke me: «Yesu, Ndili gba Ebhe Apí 'Kpí, mo okunda namene ngu ma pi? Ma akikiliki lima pi mu! Ne 'li Ebhe, mo otó mbolo li ma de.» <sup>8</sup> (Ani asula mo-o, anga Yesu apa nani pi siti bua angoo me ani koto bhú kpála bhomu-o makoto!) <sup>9</sup> Abhomu-o, Yesu ayi ani me: «A 'li mu pi?» Ani agie pi ani me: «A 'li ma me Bhelé, anga ya bhibhiti.» <sup>10</sup> Abhomu-o, osisiti bua-a akikiliki lio pi Yesu naali me ani agbe o bhú ndu doto bhomu-o de.

<sup>11</sup> A abhaka me 'ngbé piga opame nde ngazu 'he li pabu 'ta oo. <sup>12</sup> Osisiti bua atsia akikiliki lio pi Yesu me: «Tima ya bhú ká opame inde, amba ya li bhú uo.» <sup>13</sup> Abhomu-o, Yesu atsia aziba pi uo. U aze bhú kpála angoo, u atsia ali bhú opame-o. Piga opame bhomu-o libhomu aké eta ne holo, u anu atuko bhú ekpo-o, u atsia amu ndu o hana. U adu masikpe de kutu bhisi.

<sup>14</sup> Abhomu-o, omulila gba opame atsi naao ne holo. U anu akpokpo 'ngú angoo pi okpála abhú gudhu ne bhú okuti na ngongo. Okpála atsia ago ngu nau engú inde akodho 'kpí-o. <sup>15</sup> U ago de Yesu, u au kpála inde li bhiti osisiti bua adu nadu bhú e-o: ani adu me ani nde adu kuto, ani nde ato bongo li e, ani nde ngabhundja 'ngú ndjindji. Abhomu-o, u atsia adje tsulu naali. <sup>16</sup> Okpála bhende au engú angoo, atsia akpokpo engú inde akolo li kpála bhomu-o, di ne li opame-e pi uo.

<sup>17</sup> Abhomu-o, u atsia aholo nakikiliki lio pi Yesu me ani yie bhú ndu doto gba o yiyie. <sup>18</sup> Li Yesu adu a'u lie bhú zabu-o, kpála li siti bua adu igini bhú e, adu akikiliki lie pi ani me ni du bha ibili ne ani bhú dabili bini. <sup>19</sup> Yesu tsia ziba pi ani mo-o de. Engú bini, ani apa pi ani me: «Gie limu agba mu, bhú ká okpála na piga gba mu-o, amba mu kpokpo ndu 'ngú hana li Ngámá amene e pi mu-o maka ani adje ndjinga mu lie pi uo.» <sup>20</sup> Abhomu-o, kpála angoo atapa. Ani atsia aholo nakpokpo ndu 'ngú hana li Yesu amene e pi ani-e bhú ndu doto na Ogudhu Ndjikpa. Okpála inde adu adje ani-e, ndu uo hana adu angamba naali.

*Yesu akobho ndili na eole gba Yailo di ne eole bini*  
(*Tsia bhú Mat. 9:18-26; di ne bhú Luk. 8:40-56.*)

<sup>21</sup> Li Yesu agie matá lie lie ayi ekpo-o, kambi okpála abedhe de ani bedhe lingo ekpo-o. <sup>22</sup> Abhomu-o, suka ongámási na eti nadge líli gba Moidje ago. A du li ani me Yailo. Ani au Yesu lie, ani ati bhú li 'dhu ani. <sup>23</sup> Ani atsia akikiliki lie pi ani ne kekele ne napa me: «Ndili na eole gba ma-a masikpe de nakpi. Gogo, nu 'o 'kpa mu pí 'ndji ani ngubula me ani kobho, amba ani akpí-i de.» <sup>24</sup> Abhomu-o, Yesu anu ne ani bhú dabili bini. Bhiti okpála na bhibhiti naali adu akpata ani. U aholo nasulu ani.

<sup>25</sup> Abhomu-o, eole bini inde asi ne kuo naze ka ngute kalanga ndjikpa ne ká bhisi-e adu oo. <sup>26</sup> Bhiti omutia inde atia nani ani-e, aha nani likabhu pi ani naali. Padhá de, anga ani andjia nani tia nganda e hana má kpekobhe, ani kobho de! Engú bini, kuo gba ani-e adu mangbo nakolo sisiti naali. <sup>27</sup> Ani adje ngali gba Yesu-o lie, abhomu-o, ani ago bhú ká bhiti okpála ne akele ani, ani atsia abu 'kpa e li bongo gba ani-o. <sup>28</sup> Padhá de, anga ani adu apa li bua e me: «I du me ma nde abu nga bha bini 'kpa ma li bongo gba ani-e, ma kóbho.» <sup>29</sup> Abhomu-o, kolo ma 'li ma me-e, ngute-e akodho má ká! Ani atsia ambila bhú e me Yesu akobho ni ne kuo gba ni-e akobho.

<sup>30</sup> Bha li nedhinga bhomu-o, Yesu ambila bhú e makpe me angu nakobho kpála akoto bhú ni. Abhomu-o, ani atsia tsia 'kpí ne lingo e hana, ani atsia ayi me: «A abu 'kpa e li bongo gba ma-a da?» <sup>31</sup> Abhomu-o, omukpata gba ani-e agie pi ani me: «Mú ngau hana me bhiti okpála asulu mú má wakaka! Lele pi mú ti da nayi lie me: «Abu 'kpa e li ma daie?»» <sup>32</sup> Engú bini, Yesu adu bha natsitsia 'kpí lingo e ngú nau kpála inde amene engú bhomu-o. <sup>33</sup> Òlò ango-o adu adje tsulu, ani aholo naguku. Padhá de, anga ani ambila nani engú inde akolo li ani-e ndjindji. Ani ago ati bhú li 'dhu Yesu, ani atsia apa ndu 'ngú hana na kukulu pi ani. <sup>34</sup> Abhomu-o, Yesu atsia apa pi ani me: «Ndi òlò-e, nabhuka gba mú-o akobho mú akobho, nu ne guo 'ngú . Mo okobho ne kuo gba mú-o akobho.»

<sup>35</sup> Yesu ndjia nga nagama 'ngú de, okpála inde ayie agba Yailo akolo. U atsia apa pi ani me: «Ndili gba mú-o akpi. Mo ondála matá Musuno de.» <sup>36</sup> Engú bini, Yesu 'o 'to e li 'ngú u adu apa e de. Ani apa bha pi Yailo me: «Mo odjé tsulu de, du bha ne nabhuka.» <sup>37</sup> Yesu tsia ziba pi kpála koko nanu ne o de. U anu bha bhú dabili bini ne Piele ne Djaki, a la di-e Djaa ndai Djaki-o. <sup>38</sup> U akolo akuti gba Yailo. Yesu au me okpála má dja dja dja! U adu aku 'gbá naali, u atsia adu di atú 'ue. <sup>39</sup> Abhomu-o, ani ali abhú 'ti, ani atsia apa pi uo me: «Yi má dja dja dja di ne naku 'gbá naali me-e ka ni? Ndili-e kpi de, engú bini, ani tila.» <sup>40</sup> Abhomu-o, u aholo amu ani.

Engú bini, ngaani-e, ani apandja ndu okpála hana kilidjo. Ani aha bha bini 'dyi ndili-e ne 'hi ndili-o, la di ne omukpata gba e bata-o. Abhomu-o, u atsia ali ne uo abhú tina 'ti inde li ndili-e adu bhú e-o. <sup>41</sup> Ani aha 'kpa ndili-o, ani atsia apa pi ani me: «Talita kumi!» (Tata-a me: «Ndi òlò-e, ma apa pi mú me yie bhúlá!») <sup>42</sup> Ndi òlò ango-o (inde adu nani ne kalanga ndjikpa ne ká bhisi ayie kolo bhúlá má gala! Ani atsia aholo nadhuku). Bhú nedhinga bhomu-o, bhú 'bhe okpála akpina má di! <sup>43</sup> Abhomu-o, Yesu agbele

'dje uo kpekpeke me u apá engú ango-o pi kpála belegu de bini. Pipita-a, ani atsia apa pi uo me u ha ezú pi ani.

## 6

*Okpála na Nadjaleta ayala Yesu*  
(*Tsia bhú Mat. 13:53-58; di ne bhú Luk. 4:16-30.*)

<sup>1</sup> Yesu ayie li bili bhomu-o, ani atsia gie lie bhú Nadjaleta, kuti inde ani abhele bhú e-o. Omukpata gba ani-e atsia anu di bhú dabili bini ne ani. <sup>2</sup> A akolo lie bhú 'kpí naguo gba omaYuda-a, ani aholo nasuno bhú 'ti nadge líli gba Moidje-o . Abhomu-o, bhiti okpála inde adu nadge ani-e, adu angamba naali. U adu apa me: «A asuno ongú inde-e pi ani da? Ani ayie ne imbilangu di ne angu namene ongua ongamba 'ngú inde-e su? <sup>3</sup> A inde-e kpála nagolo ndula-a di? A ko ndili gba Malia di? A ko ndai Djaki ne Djodje, ne Djude, la di ne Simo-o di? Ondaise ani na olisilisi la bhadi bhú dabili bini ne ní sii adi?» Kaka-a, u atsia ayala nabhuka ani.

<sup>4</sup> Abhomu-o, Yesu atsia apa pi uo me: «U mamanga polofeta ne ndu bili hana. La-a, u mamanga ani de-e bha bhú kuti inde u azu ani bhú e-o, ne bhú ká omaha ani, ne la di bhú ká okpála na bhú 'bu 'ti gba ani-o.» <sup>5</sup> Ka ndi nabhuka gba uo-o, ani ti nani da namene ongamba 'ngú oo bhelé de. Ani akobho bha obhulu kuo bedi me ani nde nga'o 'kpa e pí uo. <sup>6</sup> Abhomu-o, ani atsia adu angamba naali ka ndi nabhuka gba uo-o.

*Yesu atima omukpata gba e ndjikpa ne ká bhisi bhú kulu*  
(*Tsia bhú Mat. 10:5-15; di ne bhú Luk. 9:1-6.*)

Pipita-a, Yesu adholo bhú ndu okuti na ngongo hana me ani nde ngasuno pi okpála. <sup>7</sup> Abhomu-o, ani a'i omukpata ndjikpa ne ká bhisi gba e-e ngú natima uo bhisi bhisi. Kala natima uo-o, ani aha angu pi uo ngú napandja osisiti bua bhú okpála. <sup>8</sup> Ani atsia aha líli inde-e pi uo me: «Yi ahá ehe bini ngú enú-o de, yi ha bha ndula bini. Yi abí ezú de, yi ahá gonia de, yi ató falanga li yi bhú 'ti bongo de. <sup>9</sup> Yi dyi malòkò bhú 'dhu yi, engú bini, yi adyí

bongo na mbulu bhisi de. <sup>10</sup> Nedhinga yi li lie bhú gúdhú bini-e, yi de dū bha nasi gba koli kpála bini akólo li 'kpí yi akóto bhú gúdhú ango-o lie ko.

<sup>11</sup> I dū me okpála na kúti bini nde sia yi de-e, i dū la di me u nde dje yi de-e, yi de yie oo, amba yi pulu ndju doto na kúti bhómú-o li 'dhú yi hana. Bhobhomú-o asúno ngae me yi abala uo ne ndú 'ngú gba o hana abala.» <sup>12</sup> Abhomú-o, omúkpa ndjikpa ne ká bhisi-e agbida. U atsia adú akpokpo ngali gba Ebhe-e pí okpála ne napa pí uo me a ayo me u dji bua o. <sup>13</sup> U adú apandja osisiti bua bhelé bhú okpála. U atsia adú akobho okpála na kuo bhelé ne napulu 'mú pí 'ndji uo.

*Elode Atipasi aha líli me u bhələ Djaa bhulú nabatisa okpála*

*(Tsia bhú Mat. 14:1-12; di ne bhú Luk. 9:7-9.)*

<sup>14</sup> Abhomú-o, 'ngbé ngámá Elode Atipasi adje engú gba Yesu-o, anga 'li ani ayangba nani ne ndú bili hana. Okpála adú apa me: «Djaa bhulú nabatisa okpála azuku! Kaka-a, a bhú ani ne angu namene ongamba 'ngú.» <sup>15</sup> Okpála koko adú apa naao me: «A ko polofeta Eliya.» Do okoko me: «A ko polofeta koko maka sùka obhende na kalanú-o.» <sup>16</sup> Li Elode adje engú gba Yesu lie-e, ani atsia apa me: «A ko Djaa bhulú nabatisa okpála! Ma ha nani líli ngama makpe me u kodho ngulú ani. La-a, ani azuku bhómú-o ngae!»

<sup>17</sup> A na paká me Elode atima nani osudha me u nū holo Djaa bhulú nabatisa okpála, amba u to ani bhú tikpú ngubula Elodiade. Elodiade nani ne ọlẹ gba ndai ani Filipino. Engú bini, Elode atsia aha nani ani maka ọlẹ ka e. <sup>18</sup> Abhomú-o, Djaa adú apa pí Elode me: «Líli ziba pí mú ngú naha ọlẹ gba ndai mú-o de.» <sup>19</sup> Kaka-a, Elodiade adú nayala Djaa, ani atsia adú akúnda me u bhələ ani. Engú bini, ani tí nani da naha líli de me u bhələ ani mandí napa me Elode ziba. <sup>20</sup> La pí Elode, ani ambila nani lie me Djaa ne kpála na ngbingbili di na bubu-o, ani adú namanga ani naali, ani atsia adú di nalila ani. Nedhinga li Elode adú adje 'li Djaa

lie, mabhundja gba Elode adú angbingi naali. Engú bini, ani adú ne djali naali ngú nadje ani.

<sup>21</sup> Abhomú-o, li ekpí u azu Elode akolo lie, a adú ekpí na babadha pí Elodiade. Elode amene anokomia pí olubasa gba e, pí ongámási na sudha, di ne pí ongámási na ndu doto na Galilaya hana. <sup>22</sup> Ndili ọlẹ gba Elodiade ango-o ago. Ani atsia ali bhú 'ti na anokomia-o. Ani adho ebi, a atsia anga li Elode di ne okpála inde ani a'i o bhú anokomia-o. Abhomú-o, Elode atsia apa pí ndili ọlẹ ango-o me: «Yo 'he inde mú nde ne gumú e ka ma, amba ma ha pí mú.» <sup>23</sup> Ani atsia atú silika pí ani me: «Ehe inde mo oyó e ka ma-a, ma há bha pí mú e, abana i dū bha nagbo bhúsú nau gba ma ko.» <sup>24</sup> Abhomú-o, ndili ango-o akoto, ani anú ayi 'hi e me: «Mo okúnda me ma yo ka ngámá ní?» 'Hi ani atsia agie pí ani me: «Yo 'ndji Djaa bhulú nabatisa okpála ko.»

<sup>25</sup> Ani agie lie ne holo agba ngámá. Ani atsia apa pí ani me: «Ma akúnda me ha múma mbia inde-e, bhú tsakpa saani, 'ndji Djaa bhulú nabatisa okpála!» <sup>26</sup> Abhomú-o, Elode asia líkabhu li bua e naali. Engú bini, ani tí nani da nayayala de ka silika inde ani atú e kala okpála inde ani a'i o bhú anokomia-o. <sup>27</sup> Abhomú-o, Elode atima kolo sùka omúlila gba e me ani nū, amba ani go ne 'ndji Djaa bhulú nabatisa okpála-o. Múlila ango-o anú, ani atsia akodho ngulú Djaa bhulú nabatisa okpála bhú tikpú-o má tse! <sup>28</sup> Pipita-a, ani aha 'ndji Djaa-a, ani ago ne di bhú tsakpa saani, ani aha pí ndili ọlẹ ango-o. Abhomú-o, ndili ọlẹ ango-o atsia anú aha pí 'hi e. <sup>29</sup> Li omúkpa gba Djaa adje engú ango-o lie, u ago aha kuo ani, u atsia azi.

*Yesu aha ezú pí obhosi kutu bhuluvue*  
*(Tsia bhú Mat. 14:13-21; ne bhú Luk. 9:10-17; di ne bhú Dja. 6:1-14.)*

<sup>30</sup> Pita nagie lie ka obhulú titima ndjikpa ne ká bhisi-e bhú kulu-o, u apo bhúla o de Yesu. U atsia akpokpo ndú 'ngú inde u amene e di ne bhende u asuno e hana pí ani. <sup>31</sup> Do ani pí uo me: «Yi gógo,

ní nù lí bìlì inde lí kpála nde lie ade, amba yi guo nga mbo masudha.» Padhá de, anga okpála inde adu nago, di ne obhende adu agie lio-o, u adu bhibhiti naali. Kaka-a, Yesu ne omukpata gba e sia belegu nedhinga ngú nazu 'he de. <sup>32</sup> Abhomu-o, u a'u'u bhú zabu-o, u atsia atapa bha ngao kpi o kpi lí bìlì lí kpála nde lí e ade ko. <sup>33</sup> Engú bini, okpála bhelé au maka u adu anu lie hana. U atsia ambila me a ko uo. Abhomu-o, okpála ayie ne ndu ogudhu bhelé, u agu holo ne 'dhu o, u atsia akolo lí bìlì ango-o pí Yesu ne omukpata gba e kalanu. <sup>34</sup> Lí Yesu akoto lie bhú zabu-o, aní au bhiti okpála-o. Aní adje ndjinga uo, anga u adu maka okandole inde lí mulila nde ka o ade ko. Abhomu-o, aní atsia aholo nasuno engú bhelé pí uo.

<sup>35</sup> A akolo lie masikpe de nabi ka ekpí-e, omukpata gba aní-e adyudyo lio de aní. U atsia apa pí aní me: «Ekpí-e ngabi, a la di-e mili bìlì. <sup>36</sup> Ha kpadji pí okpála inde, amba u nu kala ezu nazu mazú pí o lí ongangba di ne bhú okuti na ngongo si.» <sup>37</sup> Engú bini, Yesu agie pí uo me: «Yi ha ezú pí uo ngayi makpe!» Abhomu-o, u atsia ayi aní me: «Ya ayie ne bhiti tia ngú nakala ezú nazú mazú pí bhiti okpála inde-e su?» <sup>38</sup> Abhomu-o, aní ayi uo me: «Mapa ka yi madho? Yi nu tsitsia!» U atsia lie, u atsia apa me: «A ka ya ne mapa bhuluvue, la di ne sungu bhisi.»

<sup>39</sup> Abhomu-o, Yesu atsia aha lílì pí uo me: «Yi pa pí ndu okpála hana me u popo bhúla o, amba u dulú kuto pí ulu-o.» <sup>40</sup> U apopo bhúla o, u adulu kuto: okoko kámá kámá, okoko ndjikpa bhuluvue ndjikpa bhuluvue. <sup>41</sup> Abhomu-o, Yesu aha mapa bhuluvue ne sungu bhisi-o. Aní atsia 'kpí ne abhúlá, aní atsia agie heni pí Ebhe ngánga. Pipita-a, aní atsia agugumu mapa ango-o, aní aha pí omukpata gba e-o, amba u gapa lí okpála. Aní atsia agapa di sungu bhisi-e pí ndu okpála hana. <sup>42</sup> Ndu uo hana azu 'he, u atsia a'u'u má kpe-e kpe-e! <sup>43</sup> Pipita-a, omukpata alo dú mapa ne sungu inde atigala-o, a atsia abebedhe okíli ndjikpa ne ká bhisi. <sup>44</sup> Bhú ká obhende azu 'he ango-o, obhosi nani

kutu bhuluvue. (Mandi natanga olisi ne ongisi.)

*Yesu adholo pí 'ngu*

*(Tsia bhú Mat. 14:22-33; di ne bhú Dja. 6:15-21.)*

<sup>45</sup> Pipita kolo me-e, Yesu apa pí omukpata gba e me: «Yi 'u'u bhú zabu. Yi kodho 'kpí muma kalanu ayi 'ngu lí pápá na gudhu na Betesaida lí nedhinga ma nde nga lie naha kpadji pí okpála ko.»

<sup>46</sup> Pita nagbo bhusu e ne uo-o, aní anu a'u apí 'ta ngú nayo Ebhe. <sup>47</sup> Lí ekpí abi lie, omukpata adu ne zabu atu 'ngu, Yesu atsia atigala apí 'go kpi e kpi. <sup>48</sup> Aní au me omukpata gba ní-e ale nadjele zabu pima anga anvi adu amene uo kpekpeke. Abhomu-o, akolo lie bhú 'gbá 'ngu na bini-e, aní aholo nadholo pí 'ngu, aní atsia akolo masikpe de uo. Aní di me ne uo mane. <sup>49</sup> Engú bini ngauo-o, u au aní lie ngadholo pí 'ngu-o, u abhundja naao me a ko igbadyibhe. Kaka-a, u aholo natu 'ue. <sup>50</sup> Padhá de, anga u adu au aní ndu o hana. Kaka-a, u atsia abedhe ne tsulu na kuo kuo. La-a, aní atsia apa bha kolo pí uo me: «Yi sia kpéke bua! A ko ma, yi adjé tsulu de!»

<sup>51</sup> Abhomu-o, aní a'u nganda uo bhú zabu-o, anvi-e a'o nape. U atsia adu ne nangamba na kuo kuo. <sup>52</sup> Padhá de, anga ngamba 'ngú inde aní amene e lí mapa-a, u mbila nga nani de ka ndi nabhuka gba o-o.

*Yesu akobho kpála na kuo bhú ndu doto na Genedjaleta*

*(Tsia bhú Mat. 14:34-36.)*

<sup>53</sup> Pita u agulu ekpe na Galilaya lie, u atsia akolo bhú ndu doto na Genedjaleta. Abhomu-o, u atsia agbite zabu lingo 'kpe-o. <sup>54</sup> U aze lie bhú zabu-o me-e, okpála ambila bha kolo me Yesu ngae inde.

<sup>55</sup> Abhomu-o, okpála adji ndu doto ango-o libhomu ne holo. U aholo nabi obhulu kuo pí okalagba, ne nanu ne uo lí bìlì inde u adu adje lie me Yesu lí e-o. <sup>56</sup> Ndu bìlì hana inde lí aní adu anu lí e, lí ongangba, bhú ogudhu, i du di-e bhú okuti, okpála adu nabu obhulu kuo bhú odaposo. Obhulu kuo ango-o adu akikiliki



lio pi ani me ani ha kpadji me o bu nga bha 'kpa o li 'so bongo li ani-o. A na paká me ndu okpála hana inde adu nabu 'kpa o li ani-e, adu nakobho.

## 7

*Ongú inde ngayie li bua kpála nga'o kpála sisiti kala Ebhe ngae*  
(Tsia bhú Mat. 15:1-9.)

<sup>1</sup> Abhomu-o, omuFalisai di ne omusuno koko na líli gba Moidje inde ayie nani bhú Yelusalema-a, ago apo bhúla o de Yesu. <sup>2</sup> U au me okoko bhú ká omukpata gba Yesu-o ngazu 'he mandí navulu 'kpa o kalanu. Kaka-a, omuFalisai adu abhundja me omukpata bhomu-o bubu kala Ebhe ade. <sup>3</sup> (Padhá de, anga omuFalisai ne ndu omaYuda hana ngalila odasundu gba onguo ogbi o-o. Kaka-a, kala nazu 'he-e, u vuvulu ngaiza 'kpa o i lí mali. <sup>4</sup> † du me u nde kolo bhú daposu-o, u vuvulu 'kpa o ndu 'kpí hana kala nazu 'he. U ngalila di olíli koko u asia e ka onguo ogbi o naali maka: navulu okópo, obhende maka zulubho di ne obhende maka zikio.) <sup>5</sup> Abhomu-o, omuFalisai di ne omusuno na líli-e ayi Yesu me: «Omukpata gba mu-o ngakpata 'ngú maka li dasundu gba onguo ogbi ní apa lie ade. U ngazu 'he me u nde vulu 'kpa o de. U ngamene la mo-o ka ní?» <sup>6</sup> Yesu agie pi uo me: «Polofeta Isaya pa nani tala li 'ngú gba yi-e me, yi ne obhulu kali. Ani aye nani bhú bhuku gba e me:

«Okpála inde-e ngamanga ma bha ne 'bhe o padhá.

La-a, bua uo de ma tsutsu.

<sup>7</sup> Nadhøge gba uo zi bhú djila ma de.

Padhá de, anga ongú inde u ngasuno

e a ko bha bhende i ngayie ka okpála.†»

<sup>8</sup> Yi nga'o ká olíli gba Ebhe-e ngú nazi 'ndji yi bhú olíli gba onguo ogbi yi.»

<sup>9</sup> Ani atsia apa matá pi uo me: «Yi nga'o olíli gba Ebhe-e li ngongo ngubula nalila odasundu gba onguo ogbi yi-o. <sup>10</sup> Padhá de, anga Moidje apa nani me: «Manga

'dyi mu ne 'hi mu mamanga.» Ani atsia apa matá di me: «Kpála bhende i sobho 'dyi e, i du di-e 'hi e, a ayo me u bhele ani mabhøle.»† <sup>11</sup> Engú bini, ngayi-e, yi ngasuno pi okpála me, kpála bini ti da napa pi 'dyi e, i du di-e 'hi e me: «Mbu li ma, anga ehe inde ayo igini me ma ha e pi mu-o, a ko makiso inde ma adjí naha e pi Ebhe.» <sup>12</sup> Ngayi omuFalisai-e, yi ngaziba bhomu-o pi okpála me u améne 'he pi odyi o di ne pi ohi o belegu de bini. <sup>13</sup> Kaka-a, yi bhomu-o ngalila odasundu gba onguo ogbi yi-e ane eli gba Ebhe-e mane. Yi la di ngamene ndu ngua ongú bhomu-o bhelé.»

<sup>14</sup> Pipita-a, Yesu a'i matá bhiti okpála-o. Abhomu-o, ani atsia apa pi uo me: «Yi dje ma ndu yi hana, amba yi kò la di mboli engú inde: <sup>15</sup> Ehe bini ade inde yi zu e, i 'ó yi sisiti-o. La-a, engú inde ngakoto li bua yi-e, maka oeli di ne okulu-o, a bhomu-o ongú inde nga'o yi sisiti-o.» [ <sup>16</sup> \*]

<sup>17</sup> Li Yesu ayie lie bhú ká bhiti okpála bhomu-o, ani atsia ali abhú 'ti-e, omukpata gba ani atsia ayi ani li ta gbitaku bhomu-o. <sup>18</sup> Abhomu-o, Yesu atsia apa pi uo me: «Ngayi di-e, yi mbila 'ngú inde-e di? Yi mbila de me ndu 'he hana li kpála ngazu e ti da na'o ani siti kpála de-e di? <sup>19</sup> Padhá de, anga ezú ango-o ngali li bhobua ani ade. Engú bini, a ngali bhú 'bu ani. Pipita-a, i tsia koto.» (Yesu adu apa bhomu-o me ndu 'zu hana ndjindji ngú nazuzu.) <sup>20</sup> Abhomu-o, Yesu atsia abu tata-a me: «Engú inde ayie li bua kpála, a bhomu-o bhende i nga'o kpála sisiti-o. <sup>21</sup> Padhá de, anga osisiti 'ngú inde ngayie li bhobua kpála ngae inde: omabhundja na sisiti, zabhe, ezi, nabhili okpála, <sup>22</sup> nakunda olisi, i du di-e obhosi gba okpála koko, kundu tia, gumu namene osisiti 'ngú, kali, bambakuya, gumu 'he gba okpála koko, osobho, 'ngbé 'ndji di ne pulu 'ngú. <sup>23</sup> Ndu osisiti 'ngú bhomu-o hana ngakoto li bhobua kpála, i tsia 'ó kpála ango-o sisiti bhú djila Ebhe.»

† 7:7 7:6-7 Tsia bhú Isa. 29:13. † 7:10 7:10 Tsia bhú Eki. 20:12; ne bhú Det. 5:16; ne bhú Eki. 21:17; di ne bhú Lev. 20:9. \* 7:16 7:16 Lukuluku inde-e, a bhú obhuku koko na didili u aye e bhú eli na giliki ade. [La bhú okoko-o, u aye me: «Kpála inde ne djedje ngú nadje 'kpí-e, ani de dje.»]

*Gandji ɔlɔ bini abhuka Yesu  
(Tsia bhú Mat. 15:21-28.)*

<sup>24</sup> Pipita-a, Yesu ayie oo, ani atsia atapa bhú doto inde lingo gúdhú na Tile. Ani ali bhú 'ti bini, ani tsia kúnda de me u mbila de me ni oo de. Engú bini, ngali nago ka ani-e adje lie ne ndú bili hana. <sup>25-26</sup> Ma 'li ma me-e, gandji ɔlɔ bini adje 'ngú gba Yesu-o. ɔlɔ ango-o dú nani maYuda de. Dú ani ayie nani bhú ndu doto na Fenisia, bhú doto na Silia. Ndili gba ani na ɔlɔ adú me siti bua nde bhú ani. Abhomú-o, ɔlɔ bhomú-o ago ati bhú li 'dhú Yesu, ani atsia ayo ka Yesu me ani gbe siti bua bhú ndili ɔlɔ gba ni-o. <sup>27</sup> Yesu atsia apa pi ani me: «'O nga ongisi me u zú 'he gba o, amba u 'u'u. Padhá de, anga a ndjindji ade me u ha mapa gba ongisi ngú nabhibhike pi ongisi búlú-o de.» <sup>28</sup> ɔlɔ ango-o atsia agie pi Yesu me: «Ngámá, belegú ongisi búlú ngazú okulú 'zú bhende i ngabala asa misa-o.» <sup>29</sup> Yesu apa pi ani me: «Bha bini ka 'li mú bhomú-o, núnú, siti bua-a akoto bhú ndili gba mú na ɔlɔ-o akoto.» <sup>30</sup> Abhomú-o, ɔlɔ ango-o agie lie agba e, ani atsia abhaka ndili-e me ani nde asi pi mako me siti bua nde akoto bhú ani akoto.

*Yesu akobho bhoko inde i bhú 'ngú de,  
i dje di 'kpí de*

<sup>31</sup> Pipita-a, Yesu ayie bhú ndu doto na gúdhú na Tile. Ani apú bhú Sidona. Ani anú li pápá na ekpɔ na Galilaya, ani atsia akolo bhú ndu doto na Ogúdhú Ndjikpa. <sup>32</sup> U atsia ago pi ani ne bhoko bini inde i dje 'kpí de. Bhoko ango-o da nagama 'ngú ka ani adú kpekpeke. U atsia akikiliki lío pi Yesu me ani 'o 'kpa e pí bhoko ango-o, amba ani kobho.

<sup>33</sup> Abhomú-o, Yesu atsia aha ani, ani anú ne ani li ngongo masudha de bhiti okpála-o. Ani atsia 'o líkpa e bhú 'dje ani. Ani aku ngusú li líkpa e, ani atsia 'o pí 'mi bhoko ango-o ko. <sup>34</sup> Pipita-a, Yesu atsia 'kpí ne abhúlá, ani awo má fe, ani atsia apa pi bhoko ango-o me: «Efata!» (A akúnda napa me: «A ayo me bhulu límú!») <sup>35</sup> Ma 'li ma me-e, 'dje ani abhulu lie, 'mi ani ayaka, ani aholo agama 'ngú

ndjindji. <sup>36</sup> Yesu atsia aha líli pi okpála me u avé 'ngú ango-o pi kpála belegú de bini. Engú bini, ani adú ayoko uo lie, engú ango-o tsia dje yoko de. <sup>37</sup> U adú angamba na kuo kuo. Kaka-a, u atsia adú apa me: «Ani ngamene ndú 'ngú hana ndjindji. Ani ngaha pi obhende i dje 'kpí de-e nadje 'kpí. Ani ngaha pi obhende i bhú 'ngú de-e nabhú 'ngú.»

## 8

*Yesu aha 'zú pi okpála kutu badha  
(Tsia bhú Mat. 15:32-39.)*

<sup>1</sup> Bhú oekpí bhomú-o, bhiti okpála apo matá bhúla o de Yesu. Abhomú-o, li ehe nazú mazú dú la lie ka uo de-e, Yesu atsia a'i omúkpata gba e, ani atsia apa pi uo me: <sup>2</sup> «Ma ngadje ndjinga bhiti okpála inde, anga akolo mbia inde-e 'kpí bata u bha ngadú de ma si, ehe nazú mazú la matá di ka uo ade. <sup>3</sup> I dú me ma nde agie uo agba o ne gúmú mo-o, angu uo ndjía li kpadji, anga a di bhú ká uo ne okpála bhende ayie tsutsutsu.» <sup>4</sup> Omúkpata gba ani agie pi ani me: «Ní aú ezú bhú mili bili si-e ngubula nazúzú ka uo su?» <sup>5</sup> Abhomú-o, Yesu atsia ayi uo me: «A ka yi ne mapa madho?» U agie me: «Mananika.»

<sup>6</sup> Abhomú-o, ani apa pi bhiti okpála me u dúlú kuto. Ani aha mapa mananika-o, ani agie heni pi Ebhe. Ani agugumú mapa-o, ani atsia aha pi omúkpata gba e me u gapa li okpála. U atsia agapa li uo. <sup>7</sup> U adú di nani ne djedje osungu. Ani agie di heni pi Ebhe ngú osungu-o, ani atsia apa me u gapa di osungu-o li uo. <sup>8</sup> Okpála azú 'he, u a'u'u. Pipita-a, omúkpata apo bhúla dúdú inde atigala, atsia abebedhe okili mananika. <sup>9</sup> Okpála inde adú oo, u adú masíkpe de kutu badha. Pipita-a, Yesu atsia aha kpadji pi uo. <sup>10</sup> Kolo má gala me-e, ani a'ú ne omúkpata gba e bhú zabú, u atsia atapa bhú ndu doto na Dalamanuta.

*OmúFalisai ayo ngamba 'ngú bini ka  
Yesu  
(Tsia bhú Mat. 16:1-4.)*

<sup>11</sup> Abhomú-o, omúFalisai ago, u aholo namene kpekebhe ne Yesu. U adú akúnda

nale ani. Kaka-a, u ayo ka ani me ani mene nga bha pi o ngamba 'ngú bini inde asúno me Ebhe atima ani ngae. <sup>12</sup> Li Yesu adje lie mo-o, ani atsia apa me: «Okpála na naki inde-e ngayo ngamba 'ngú ngubula ni? Ma apa pi yi na paká me, ma méne ngamba 'ngú bini pi uo de!» <sup>13</sup> Ani a'o ka uo oo, ani a'u matá bhú zabu, ani atsia akodho 'kpí ayi 'ngu.

*Yi lila liyi ka levile gba omuFalisai di ne bhe gba Elode malila*

*(Tsia bhú Mat. 16:5-12.)*

<sup>14</sup> Li omukpata a'u lie bhú zabu-o, u a'ili 'to o li naha mapa. Kokoli adu bha ka uo bini bhú zabu-o. <sup>15</sup> Abhomu-o, Yesu atsia agbele dje uo me: «'E-e! Yi lila liyi ka levile gba omuFalisai di ne bhende gba Elode malila.» <sup>16</sup> Omukpata aholo namene kpekebhe sunda o me: «Ani ngapa mo-o, anga ní go ne mapa de.»

<sup>17</sup> Li Yesu ambila engú inde u adu apa e sunda o lie, ani atsia ayi uo me: «Yi ngamene kpekebhe sunda yi li 'ngú na mapa li 'to yi a'ili li e ka ni? Yi ke nga mbolimboli di? Yi mbila la di di? Yi ne nabhuka adi? <sup>18</sup> Ali yi ne djidjila, yi ngau 'kpí adi ka ni? Ali yi ne djedje, yi ngadje 'kpí adi ka ni? 'To yi a'ili li ndu ongamba 'ngú inde ma amene e hana? <sup>19</sup> Nedhinga ma aku nako obhosi kutu bhuluvue lie ne mapa bhuluvue, dudu inde atigala-a, yi abebedhe nako okili ne di madho?» U agie pi ani me: «Ndjikpa ne ká bhisi.» <sup>20</sup> Abhomu-o, Yesu atsia ayi matá uo me: «La di-e, mapa mananika inde ma aku nako okpála kutu badha ne e, dudu inde atigala-a, yi abebedhe nako okili ne di madho?» U agie me: «Mananika.» <sup>21</sup> Abhomu-o, Yesu atsia apa pi uo me: «Yi ke nga mbolimboli sii di?»

*Yesu akobho kpála bini inde i u 'kpí de*

<sup>22</sup> Pipita-a, Yesu ne omukpata gba e akolo bhú gudhu na Betesaida. Oo, okpála ago ne kpála bini inde i u 'kpí de-e pi Yesu. U atsia akikiliki lio pi ani me, ani 'o 'kpa e li ani amba ani kobho. <sup>23</sup> Yesu aholo 'kpa kpála inde i u 'kpí de-o. Ani agbe ani bhú gudhu-o. Ani aku ngusu e bhú djila ani, ani abu 'kpa e li ani, ani atsia ayi ani

me: «Mu ngau mbo-o 'he uu?» <sup>24</sup> Kpála ango-o atsia 'kpí li ngo e, ani atsia apa me: «Ma ngau okpála, u mana ndula inde ngadhuku.» <sup>25</sup> Pipita-a, Yesu abu matá 'kpa e li djila ani. Kpála ango-o atsia 'kpí má sasu, ani atsia adu au 'kpí ndjindji. Ani atsia akobho. <sup>26</sup> Abhomu-o, Yesu agie ani agba e, ani atsia apa pi ani me: «Mo onú abhú gudhu de.»

*Piele apa me Yesu ne Kilisito*

*(Tsia bhú Mat. 16:13-20; di ne bhú Luk. 9:18-21.)*

<sup>27</sup> Pipita-a, Yesu ne omukpata gba e anu bhú okuti inde li ngo gudhu na Sedjale gba Filipino-o. Li kpadji-e, ani ayi uo me: «Okpála ngapa li ma me ma ne da?» <sup>28</sup> U agie pi ani me: «Okoko ngapa me mu ne Djaa bhulu nabatisa okpála, okoko me mu ne Eliya, okoko matá me mu ne saka opolofeta .» <sup>29</sup> Yesu atsia ayi uo me: «A la yi-e, yi ngapa naayi me ma ne da?» Piele atsia agie pi ani me: «Mu ne Kilisito .» <sup>30</sup> Abhomu-o, Yesu atsia aha líli pi uo kpekpeke me u apa 'ngú gba ni-e pi kpála bini de.

*Yesu akpo 'ngú pindji nakpi ne nazuku ka e*

*(Tsia bhú Mat. 16:21-28; di ne bhú Luk. 9:22-27.)*

<sup>31</sup> Pipita-a, Yesu aholo nasuno pi omukpata gba e me: «A ayo me ngama Ndili gba kpála-a, ma dje likabhu naali. Obhelesi okpála, ongbengbe odimandé gba Ebhe di ne omusuno na líli gba Moidje ayála ma. U tsia bhéle ma. La-a, pita ekpí bata-a, ma tsia zuku.» <sup>32</sup> Ani du apa 'ngú ango-o lie ne tsulu de-e, Piele atsia agbele ani li ngongo. Do ani pi Yesu de-e: «Mo opá mo-o de.» <sup>33</sup> Engú bini, Yesu adji lie, ani atsia omukpata gba e-o, ani ambe bhú 'ndji Piele me: «Yie de ma mayie, ngamu Satana ! Padhá de, anga mabundja gba mu-o, a ko bhende gba Ebhe-e de. Engú bini, a ko bhende gba okpála.»

*A ayo namene ni ngú nakpata Yesu-o?*

<sup>34</sup> Pipita-a, Yesu apo bhúla bhiti okpála di ne omukpata gba e de e. Ani atsia apa pi uo me: «I du me kpála nde akunda

nakpata ma-a, a ayo me ani 'o nabhundja engú gba e makpe, ani bi la di kulusi gba e, amba ani kpata ma. <sup>35</sup> Padhá de, anga kpála bhende ngalila mukobho gba e pi e makpe, akpí makpi. La-a, kpála bhende ngaha mukobho gba e libhomu ngubula ma di ne ngubula Bádha Ngali gba Ebhe-e, ani akóbho makobho. <sup>36</sup> Ɔ dũ me kpála nde asia ndũ tia na doto hana, tata-a pi ani ne ni i dũ me ani nde akpi na dudũma-a? <sup>37</sup> Ehe bini ade inde li kpála-kuti ti da na'o e bhú da mukobho gba e. <sup>38</sup> Ɔ dũ me kpála bini nde adje numũ li ma di ne li oeli gba ma kala obhulũ namene sisiti 'ngú na naki inde-e, inde i bhuka di Ebhe ne bua o bini de-e, ngama Ndili gba kpála ma adjé bhadi numũ li ani nedhinga ma agó lie bhú sangu gba 'Dyi ma bhú dabili bini ne oandjelu na bububu ko.»

## 9

<sup>1</sup> Yesu atsia apa matá pi uo me: «Ma apa pi yi na paká me, okpála koko bhú ká obhende si-e, mú padhá de, u aú ngaiza Nau gba Ebhe-e me, a nde ngago ne angu kalanũ.»

*Kute Yesu ayipa ka sangu gba Ebhe  
(Tsia bhú Mat. 17:1-13; di ne bhú Luk. 9:28-36.)*

<sup>2</sup> Pita ekpí madhia, Yesu aha Piele ne Djaki, di ne Djaa , ani anũ ne uo titi o apí 'ndjá 'ta. Bha si me-e, ani adji lie kala uo kpi, <sup>3</sup> bongo gba ani avu má tuu! Píla doto libhomu-o, kpála bini ti da navulũ bongo, i tsia vú mo-o de. <sup>4</sup> Kolo me-e, Eliya ne Moidje aze li uo, u atsia aholo agama 'ngú ne Yesu. <sup>5</sup> Piele atsia apa pi Yesu me: «Mũsuno, a ndjindji maka ní nde lie si. Ziba pi ya me ya yiki oti ngbangbali bata: bini pi mũ, bini pi Moidje, bini pi Eliya.» <sup>6</sup> Engú bini, Piele dũ ambila de me ni apa pi-ie de, anga ngaani makpe ne omukpata bhisi inde adũ bhú dabili ne ani-e, adũ me u nde abedhe ne tsulũ na kuo kuo. <sup>7</sup> Abhomũ-o, ndindi ago abuku uo má kagbu! Eli atsia akoto bhú ndindi ang-o me: «Kpála inde-e, a ko Ndili gba ma inde ma akũda e naali-o. Yi dje ani!» <sup>8</sup> Ma gala kolo me-e, li omukpata atsia 'kpí

lie lingo o-o, u u matá kpála bini de, bha Yesu kpi e kpi bhú dabili bini ne uo.

*Omukpata ayi 'ngú pindji polofeta Eliya*

<sup>9</sup> Li Yesu ne omukpata gba e adũ akẽ eta-a lie, ani atsia apa pi uo me: «Yi apá engú yi au e inde-e pi kpála belegũ de bini, akólo li nedhinga inde ngama Ndili gba kpála ma azúku lie bhú ká okpála inde amu ko.» <sup>10</sup> Abhomũ-o, u awo eli bhomũ-o li bua o, u atsia adũ ayi lio sũnda o pépé me: «Nazuku bhú ká okpála inde amu-o, ani akũda igini napa bhomũ-o pi?»

<sup>11</sup> Pipita-a, u ayi Yesu me: «Ka ni li omũsuno na líli gba Moidje ngapa lie me kala nago ka Masiya-a , a ayo me Eliya go ngaiza kalanũ-o?» <sup>12</sup> Yesu atsia agie pi uo me: «A na paká me Eliya ngago ngaiza kalanũ, naleke ndũ 'ngú hana. Engú bini, ka ni u aye nani lie bhú Bhuku gba Ebhe-e me, Ndili gba kpála adjé likabhu naali, la di-e li okpála tsia yála ani-e? <sup>13</sup> La-a, ma apa pi yi me, Eliya ago nani ago, okpála atsia ato mbolo li ani má gbekpe maka u a aye lie bhú Bhuku gba Ebhe ko.»

*Yesu akobho ndili na bhobhoko li siti bua adũ nadũ bhú e*

*(Tsia bhú Mat. 17:14-21; di ne bhú Luk. 9:37-43a.)*

<sup>14</sup> Li Yesu ne omukpata bata akẽ eta-a lie, u anũ abhaka omukpata koko-o. A abhaka me bhiti okpála nde asa uo ngbalina. La di-e, omũsuno na líli nde ngamene kpekebhe ne omukpata ang-o-o.

<sup>15</sup> Li bhiti okpála-a au Yesu lie, ndũ uo hana angamba, u atsia agu holo ngú nago ayi ani. <sup>16</sup> Yesu ayi omukpata gba e me: «Yi ngamene kpekebhe ne uo pindji ni?»

<sup>17</sup> Kpála bini bhú ká bhiti okpála bhomũ-o, atsia agie pi ani me: «Mũsuno, ma ago ne ndili gba ma-a pi mũ me kobho ani, anga a bhú ani ne siti bua inde ngagbite 'bhe ani me ani agáma 'ngú de.

<sup>18</sup> Ndũ nedhinga hana li siti bua ang-o-o agbugbulũ ani lie, a ngagũ 'i ani kuto, li efu holo naze bhú 'bhe ani, ani holo nazũ tate e, kute ani kpekpeke má ki ki ki! Ma ayo ka omukpata gba mũ-o me u gbe siti bua ang-o-o, engú bini, u ale pima.»

19 Yesu atsia apa pi uo me: «Ngayi okpála na naki-e, nabhuka bhú yi ade! Ma adú matá ne yi ngubula nedhinga madho? Ma akíbila matá yi ngubula nedhinga madho? Yi go ne ndili-e muma ei.» 20 Abhomu-o, u ago ne ani pi Yesu. Li ndili-e au Yesu lie, siti bua adyiki ani má djigi djigi, ani agu 'i ani kuto! Ndili-e aholo nawawala kuto me efu nde ngaze bhú 'bhø ani. 21 Yesu atsia ayi 'dyi ndili-e me: «Kuo inde-e amene ani me-e ngubula kalanga madho?» Ani agie me: «Nayie bhú ndili li ani. 22 La di-e, siti bua ango-o ngagu 'i ani bhú djua di ne bhú 'ngu bhutsibhutsi ngú nabhø ani. Engú bini, i du me mu nde ti da namene 'he-e, mu de dje mbo ndjinga ya, teteke ya!»

23 Yesu agie pi ani me: «Mu ngapa me: <Ɔ du me mu nde ti da namene 'he.> La-a, ndu 'ngú hana ti da namene lie pi kpála inde ngabhuka ko.» 24 Má gala kolo me-e, 'dyi ndili-e asula me: «Ma abhuka. La-a, go teteke ma, amba nabhuka gba ma kolo kpekpeke!» 25 Li Yesu au bhiti okpála ngago ne holo li pápá gba o lie, ani atsia ambe bhú 'ndji siti bua me: «Ngamu siti bua inde ngagbite 'bhø ndili inde-e ne nanini 'dje ani, ma aha líli pi mu me: <Koto bhú ndili inde, la di-e, mo ogie matá limu bhú ani belegu de bini!»» 26 Abhomu-o, siti bua atu 'ue, ani adyiki ndili-e má djigi djigi, pipita-a, ani atsia akoto bhú ani! Ndili na bhobhoko ango-o, akolo maka kpála inde akpi. Okpála bhelé adu apa me: «Ani akpi.» 27 Engú bini, Yesu aholo 'kpa ani, ani a'e ani bhúlá, ndili-e atsia alu malu.

28 Pipita-a, Yesu ne omukpata gba e agie lio li bili u adu nadu li e-o. Nedhinga u adu lie ne uo titi o-o, u atsia ayi ani me: «Ka ni ya ti igini lie da nagbe siti bua bhomu-o bhú ndili inde-e lie de-e?» 29 Yesu atsia agie pi uo me: «U ti da nagbe ngua bua bhomu-o bha bini ne mayo.»

*Yesu akpo matá 'ngú pindji nakpi ne nazuku ka e*

*(Tsia bhú Mat. 17:22-23; di ne bhú Luk. 9:43b-45.)*

30 Li Yesu ne omukpata gba e ayie lie oo, u agulu ndu doto na Galilaya. Yesu

du akunda de me okpála mbila bili inde ni adu li e de, 31 anga ani adu asuno pi omukpata gba e-o. Ani adu apa pi uo me: «U apú ngbángá Ndili gba kpála pi okpála, li okpála ango-o tsia bhø ani. La-a, pita 'kpí bata-a, ani tsia zúku.» 32 Engú bini, omukpata du ambila nani ta engú bhomu-o de. U adu la di ne tsulu ngú nayi ani.

*A ngbéngbé da?*

*(Tsia bhú Mat. 18:1-5; di ne bhú Luk. 9:46-48.)*

33 Abhomu-o, Yesu ne omukpata gba e anu bhú gudhu na Kapalanauma. Pipita-a, u ali lie bhú 'ti bini me-e, Yesu atsia ayi omukpata gba e me: «Yi de igini ngamene kpekebhe sunda yi li kpadji-e pindji mangua 'ngú dho?» 34 Engú bini, u andjili má bulu, anga li kpadji-e, u amene kpekebhe sunda o me a ngbéngbé bhú ká o da-ie. 35 Abhomu-o, Yesu adu kuto. Ani apo bhúla omukpata ndjikpa ne ká bhisie de e masikpe. Ani atsia apa pi uo me: «Ɔ du me kpála bini nde akunda nadu kpála na kalanu-o, a ayo me ani du pita ndu okpála hana, ani du di bali gba ndu okpála koko hana.»

36 Pipita-a, ani aha mboye ndili, ani a'o ani bhú ká uo, ani abi ani sa 'kpa e, ani atsia apa pi uo me: 37 «Kpála inde ngasia mboye ndili maka bhende-e ka 'li ma-a, ani ngasia bhomu-o ma makpe. La di-e, kpála inde ngasia ma-a, ani sia bha bini ma kpi ma kpi de, engú bini, ani ngasia di bhomu-o 'Dyi ma inde atima ma ko.»

*Kpála inde i gu ní de-e, a ko naaní kpála*  
*(Tsia bhú Luk. 9:49-50.)*

38 Abhomu-o, Djaapa pi Yesu me: «Musuno, ya au kpála bini ngapandja osisiti bua ne 'li mu. Ya atsia ayoko ani, anga a ko suka ní de.» 39 Engú bini, Yesu agie pi uo me: «Yi ayoko ani de, anga kpála inde amene ngamba 'ngú ne 'li ma-a, ti da napa kolo siti 'ngú li ma pipita-a de. 40 Padhá de, anga kpála inde i gu ní de-e, a ko naaní kpála. 41 Ma apa pi yi na paká me, kpála inde ngaha kópo na engu pi yi bini kabula me yi ne okpála gba Kilisito-o, ani asia makalá gba e masia.»

*Ongú inde ngato kpála bhú siti 'ngú-o*  
(*Tsia bhú Mat. 18:6-9; di ne bhú Luk. 17:1-2.*)

<sup>42</sup> Yesu atsia apa matá pi omukpata gba e me: «Kpála inde ngato suka odjedje ongisi inde ngabhuka ma inde-e bhú siti 'ngú-o, a pi ani ndjindji me u gi ngingi tangulu ani, amba u bhike ani bhú 'ngbé 'ngu. <sup>43</sup> I da me 'kpa mu nde ngato mu bhú siti 'ngú ngae-e, mu de kodho. A ndjindji pi mu nali bhú mukobho na duduma ne koli 'kpa mu bini, ane mane nanu ka mu bhú djua na duduma ne duduma ne 'kpa mu bhisi hana. [ <sup>44</sup> \*]

<sup>45</sup> I da di me 'dhu mu nde ngato mu bhú siti 'ngú ngae-e, mu de kodho. A ndjindji pi mu nali bhú mukobho na duduma ne koli 'dhu mu bini, ane mane me u bhike mu bhú djua na duduma ne duduma ne 'dhu mu bhisi hana. [ <sup>46</sup> †] <sup>47</sup> I da me li djila mu nde ngato mu bhú siti 'ngú ngae-e, mu de gbe. A ndjindji pi mu nali bhú Nau gba Ebhe-e ne koli li djila mu bini, ane mane me u bhike mu bhú djua na duduma ne duduma ne djila mu bhisi hana. <sup>48</sup> Oo, «okéké maka bangili inde ngazu kute kpála mumu de, djua bubulu la di-i de.†» <sup>49</sup> Padhá de, anga Ebhe alé nabhuka gba ndu okpála hana bhú djua, amba a kolo kpekpeke.

<sup>50</sup> Ngutu ne bádha 'he. Engú bini, i da me a nde abolo, u ti da nagie matá kpokpo bhúbhú ne ni? Nabhuka gba yi da maka ngutu inde i bolo de, yi da la di ne guo 'ngú sánda yi.»

## 10

*Nasuno pindji nagbo bhusu o ne ele*  
(*Tsia bhú Mat. 19:1-12; di ne bhú Luk. 16:18.*)

<sup>1</sup> Li Yesu ayie lie oo, ani anu bhú ndu doto na Yudaya, ayi 'ngu na Djuludani. Bhiti okpála ago matá de ani. Ani aholo nasuno pi uo maka ani amemene lie-o. <sup>2</sup> Abhomu-o, omuFalisai koko adyudyo lio

de Yesu, ngú naholo ani li 'li e. Kaka-a, u atsia ayi ani me: «Lili gba ní-e aziba uu me bhoko gbo bhusu e ne ele gba e?»

<sup>3</sup> Yesu atsia agie pi uo me: «Moidje aha nani pi yi li 'ngú bhomu-o mangua lili dho?» <sup>4</sup> U atsia apa me: «Moidje aha nani pi bhoko kpadji me ani ye balua ngú nagbo bhusu o ne wala e, amba ani gie ani agba o.»

<sup>5</sup> Engú bini, Yesu agie pi uo me: «Moidje aye nani lili bhomu-o pi yi ka kpéke 'ndji gba yi-o. <sup>6</sup> La li lilita-a, nedhinga li Ebhe abho ndu 'he lie hana-a «ani abho uo bhoko ne ele.†» <sup>7</sup> «Kaka-a, bhoko a'li ka 'dyi e ne 'hi e, ani tsia dhédhe li wala e, <sup>8</sup> ndu uo bhisi hana kólo koli kpála bini.†» Abhomu-o, uo matá okpála bhisi ade. Engú bini, u akolo koli kpála bini. <sup>9</sup> Kaka-a, a ayo de me kpálakuti gbo bhusu uo de, anga Ebhe akpètse uo ngae.»

<sup>10</sup> Li Yesu ne omukpata gba e agie lio lie li bili u adu nalu li e, u atsia ayi ani li 'ngú ango-o. <sup>11</sup> Yesu apa pi uo me: «I da me bhoko bini nde a'e wala e ngú naha ele koko-o, ani a'o bhomu-o ká wala e na kalanu-o ngú nakunda ele koko. <sup>12</sup> I da la di me ele nde atse 'ko e ngú naha bhoko koko-o, ani a'o bhomu-o ká 'ko e ngú nakunda bhoko koko.»

*Yesu atuko bisagu pi 'ndji ongisi*  
(*Tsia bhú Mat. 19:13-15; di ne bhú Luk. 18:15-17.*)

<sup>13</sup> Abhomu-o, okpála adu ago ne ongisi gba o me Yesu 'o 'kpa e pi uo, ne natuko bisagu pi uo. Engú bini, omukpata ake 'ngú lio pi okpála ango-o. <sup>14</sup> Yesu au lie mo-o, bua ani ake, ani atsia apa pi omukpata gba e me: «Yi 'o ongisi me, u go li pabili ma nde li e-o, yi ayoko uo de. Padhá de, anga Nau gba Ebhe-e , a pi obhende maka uo ko. <sup>15</sup> Ma apa pi yi na paká me, kpála bhende nabhuka gba e nde maka bhe gba ndili ade-e, kpála ango-o ti da nali bhú Nau gba Ebhe-e belegu de

\* **9:44** 9:44 Lukuluku inde-e, a bhú obhuku koko na didili u aye e bhú eli na giliki ade. [Oo, okéké maka bangili inde ngazu kute kpála mumu de, djua bubulu la di-i de.] † **9:46** 9:46 Lukuluku inde-e, a bhú obhuku koko na didili u aye e bhú eli na giliki ade. [Oo, okéké maka bangili inde ngazu kute kpála mumu de, djua bubulu la di-i de.] † **9:48** 9:48 Tsia bhú Isa. 66:24. † **10:6** 10:6 Tsia bhú Dje. 1:27, 5:2. † **10:8** 10:7-8 Tsia bhú Dje. 2:24.

bini.» <sup>16</sup> Abhomu-o, Yesu adu abi ongisi bhomu-o, ani atsia adu atuko bisagu pi uo me ani nde nga'o 'kpa e pi uo.

*Bhulu tia bini ayi 'ngú pindji mukobho na duduma*  
(Tsia bhú Mat. 19:16-30; di ne bhú Luk. 18:18-30.)

<sup>17</sup> Li Yesu adu a'e ne enu lie, bhoko bini ago ne holo nabhaka ani, ani akikita lipuku e kuto kala ani. Ani atsia ayi ani me: «Musuno na babadha, a ayo me ma mene pi ngu nasia mukobho na duduma-a?» <sup>18</sup> Yesu atsia apa pi ani me: «Ka ni mu nga'i ma lie me badha kpala-a? Badha kpala belegu ade bini, bha bini Ebhe kpi e kpi. <sup>19</sup> La-a, mu mbila olili-e ndjindji: «Mo obhelo kpala de, mo osi ne elo, i du di-e bhoko gba kpala koko de, mo ozi 'he de, mo opa 'ngu li kilí mu bhú djila okpala ne eu de, mo ozi kpala bhú nyali de, manga 'dyi mu ne 'hi mu mamanga.†»

<sup>20</sup> Bhoko ango-o apa pi ani me: «Musuno, nayie bhú ndili li ma-a, ma amene ndu olili bhomu-o hana.» <sup>21</sup> Yesu atsia ani ne mukunda hana. Ani atsia apa pi ani me: «Mo oneke bha koli 'he bini. Nunu, tsindji ndu 'he inde mu nde ne e hana, amba mu ha tiatia pi obhulu ndibhili, mo osia tia abhula. Pipita-a, go kpata ma.» <sup>22</sup> Engu bini, nedhinga li bhoko ango-o adje lie mo-o, ani atu 'ndji e ne kuto, ani atsia agie lie ne babuma naali, anga tia adu nani ka ani bhele.

<sup>23</sup> Abhomu-o, Yesu atsia omukpata gba e inde adu me u nde asa ani ngbalina-o. Ani apa pi uo me: «A ko kpeke da 'ngu pi obhulu tia ngu nali bhú Nau gba Ebhe-o!»

<sup>24</sup> Abhomu-o, omukpata atsia angamba ka eli ango-o. La-a, Yesu apa mata pi uo me: «Odi ma, a ko kpeke da 'ngu ngu nali bhú Nau gba Ebhe-o! <sup>25</sup> Da nali ka samo\* li gudho musana kpekpeke. A la mata kpekpeke naali pi bhulu tia nali bhú Nau gba Ebhe-o.» <sup>26</sup> Omukpata angamba mata bha naali, u atsia adu apa sunda o me: «I du mo-o, a ti da nakobho da?» <sup>27</sup> Yesu atsia uo ma suu, ani atsia apa pi uo me:

«Pi okpala-a, a ko kpeke da 'ngu. Engu bini, pi Ebhe-e, a ko kpeke da 'ngu de, anga ani ti da namene ndu 'ngu hana.»

<sup>28</sup> Abhomu-o, Piele apa pi ani me: «Djedje nga, ya a'o ndu 'he hana ngu nakpata mu.» <sup>29</sup> Yesu atsia apa pi ani me: «Ma apa pi yi na paká me, kpala inde a'o ka eti gba e, inde a'o ka ondaise e na obhosibhosi, i du di-e obhende na olisilisi, inde a'o ka 'hi e, i du di-e 'dyi e, i du di-e ongisi gba e, i du di-e edyi gba e ngubula ma, la di ne ngubula Badha Ngali-e, <sup>30</sup> kpala ango-o asia mbia inde-e bhutsibhutsi kama bini: oeti, ondaise na obhosibhosi ne obhende na olisilisi, oehi, ongisi, la di ne oedyi bhú dabili bini ne olukabhu. Ani tsia sia di bhú nedhinga inde ngago-o, mukobho na duduma. <sup>31</sup> Engu bini, bhele na okpala inde u ngau o maka okpala na akalanu mbia inde-e, akolo okpala na asidi, li obhende u ngau o maka okpala na asidi mbia inde-e kolo okpala na akalanu.»

*Yesu akpo 'ngú bhutsibhutsi na bata pindji nakpi ne nazuku ka e*

(Tsia bhú Mat. 20:17-19; di ne bhú Luk. 18:31-34.)

<sup>32</sup> Li Yesu ne omukpata gba e a'e ibili ne enu lie ngu nanu bhú Yelusalema-a, ani ako pi uo kalanu. Omukpata-a adu angamba. Obhende adu akpata uo-o, adu ne tsulu, Yesu aha mata omukpata gba e ndjikpa ne ka bhisi titi o, ngu nagama 'ngu pi uo. Ani atsia aholo akpokpo 'ngu pi uo pindji ongu inde akolo li ani-o. <sup>33</sup> Ani apa pi uo me: «Yi dje nga 'ngu inde. Ni adji bhú Yelusalema. Oo, u apu ngbanga Ndili gba kpala pi ongbengbe odimandé gba Ebhe ne omusuno na lili-o. U akodho 'ngu gba ani me ani kpi bha makpi. Pipita-a, u tsia pu ani pi omupagano. <sup>34</sup> U ato padha li ani, u aku ngusu li ani, u abhi ani ne fimbo, u tsia bhelo ani. Engu bini, pita 'kpi bata-a, ani tsia zuku.»

*Mayo gba Djaki ngauo ne Djaa*  
(Tsia bhú Mat. 20:20-28.)

† **10:19** 10:19 Tsia bhú Eki. 20:12-16; di ne bhú Det. 5:16-20. \* **10:25** 10:25 Enu inde li Yesu abhu lie si-e a ko samo. Li papa gba uo oo enu inde adu nani ngbengbe ne samo.

<sup>35</sup> Pipita-a, Djaki ngauo ne Djaa , ongisi gba Djebedayo, adyudyo lio de Yesu. U atsia apa pi ani me: «Musunu, ya ngakunda me mene pi ya engú inde ya adji ayo e ka mu-o.» <sup>36</sup> Yesu atsia ayi uo me: «Yi akunda me ma mene pi yi ni?» <sup>37</sup> U agie pi ani me: «Ziba pi ya nadulu bhú Nau gba mu na sangu-o , bini li pá 'kpa mu na kokpa, koko li pá 'kpa mu na gali.» <sup>38</sup> Engú bini, Yesu atsia apa pi uo me: «Yi mbila ehe inde yi ngayo e de. Yi ti da nandji kópo na likabhu inde ma andjí e uu? Yi ti da nasia batisimo na likabhu inde ma asia e uu?» <sup>39</sup> U atsia agie pi ani me: «Ya ti da namemene.» Do Yesu pi uo me: «A moko, yi andjí kópo na likabhu inde ma andjí e-o, yi sía di batisimo na likabhu inde ma asia e-o. <sup>40</sup> Engú bini, ma ti da napa ngama de me a adulu li pá 'kpa ma na kokpa ne me a adulu li pá 'kpa ma na gali da-ie de. Obili ang-o, a pi obhende li Ebhe aleke pi o ko.»

<sup>41</sup> Li omukpata ndjikpa bhe koko adje engú li Djaki ne Djaa ayo e lie, u atsia ake 'ngú lio pi uo. <sup>42</sup> Abhomu-o, Yesu a'i uo de e, ani atsia apa pi uo me: «Yi mbila hana me ongamási na doto inde ngau pi omaha o ne kpéke. La di-e, ongbengbe okpála ngaha okpekpeke líli pi omaha o. <sup>43</sup> Engú bini, a ayo de me adu akodho 'kpí sunda yi mo-o de. I du me kpála bini nde akunda nadu 'ngbé kpála bhú ká yi-e, a ayo me ani du kpála na kulu gba yi-o. <sup>44</sup> I du me kpála bini bhú ká yi nde akunda nadu kpála na kalanu-o, a ayo me ani du bali gba ndu okpála koko hana. <sup>45</sup> Padhá de, anga ngama Ndili gba kpála ma go nani de me okpála du amene kulu lio pi ma-a de. Engú bini, ma ago mangbo ngú namene kulu lima pi okpála, di ne ngubula nagbegbe okpála bhelé bhú bali ne lá ma makpe.»

*Yesu akobho Balatimé, kpála i u 'kpí de (Tsia bhú Mat. 20:29-34; di ne bhú Luk. 18:35-43.)*

<sup>46</sup> Pipita-a, Yesu akolo bhú gudhu na Djeliko. Li Yesu ne omukpata gba e, la di ne bhiti okpála adu akoto lie oo, u

abhaka kpála bini i u 'kpí de me ani nde adu dengo 'hi kpadji. A adu 'li ani me Balatimé, a adu ndala Timaya. Ani adu me ani nde ngayoyo 'he. <sup>47</sup> Nedhinga ani adje lie me a ko Yesu, kpála na Nadjaleta-a, ani aholo asusula me: «Yesu, Ndili gba Davidi, dje nga mbo ndjinga ma!» <sup>48</sup> Bhiti okpála adu ambembe bhú 'ndji ani me: «Gbite 'bhø mu!» Engú bini, ani aholo la matá asusula kpekpeke me: «Ndili gba Davidi, dje nga mbo ndjinga ma!»

<sup>49</sup> Abhomu-o, li Yesu adje lie, ani alu, ani atsia apa me: «Yi 'i ani ei.» U atsia a'i kpála i u 'kpí de ne napa pi ani me: «Atou! Yie bhúlá. Ani nga'i mu.»

<sup>50</sup> Abhomu-o, ani abala 'kpa li koti gba e-o, ani a'ulu má ngudha, ani atsia ago abhaka Yesu. <sup>51</sup> Abhomu-o, Yesu atsia ayi ani me: «Mo okunda me ma mene pi mu ni?» Kpála i u 'kpí de-e agie pi ani me: «Musunu, ma akunda me ma u matá 'kpí.» <sup>52</sup> Yesu atsia agie pi ani me: «Nanu, nabhuka gba mu-o akobho mu akobho.» Má gala kolo me-e, ani aholo au 'kpí, ani atsia adu akpata Yesu li kpadji-o.

## 11

*Yesu ali bhú Yelusalema (Tsia bhú Mat. 20:29-34; di ne bhú Luk. 18:35-43.)*

<sup>1</sup> Li u akolo lie de Yelusalema-a, masikpe de okuti na Betefadje ne Betania-a, u akolo pí eta na ondula na Olive. Yesu atima omukpata bhisi bhú ká omukpata gba e akalanu. <sup>2</sup> Ani atsia apa pi uo me: «Yi nu bhú kuti inde kala yi aoo. Yi akólo lie oo me-e, yi abháka me u nde agbite ndili punda\* inde li kpála bini dhuku nga pí e de. Yi bhulu ani, amba yi go ne ani. <sup>3</sup> I du la me kpála bini nde ayi yi me: <Yi ngabhulu ani ngú ni?> Yi de gie pi ani me: <Ngamá ne gumu ani. Engú bini, ani agie bha ani si mbia inde.»

<sup>4</sup> Abhomu-o, u anu, u atsia abhaka ndili punda me u nde agbite ani akilidjo, de 'bhø bhoti bini li 'hi kpadji. U atsia abhulu ani. <sup>5</sup> U adu abhulu ani lie, okpála koko bhú ká obhende adu oo, ayi

\* 11:2 11:2 Enu inde si-e a ko piga 'nu maka punda, uo la ndundundu u bibi di okpála.



uo me: «Yi ngamene bhomu-o ni? Yi ngabhulu ndili punda bhomu-o ngu ni?»

<sup>6</sup> Omukpata agie pi uo maka li Yesu apa lie pi uo-o. Okpala ango-o atsia a'o uo me u nuna. <sup>7</sup> Abhomu-o, omukpata-a atsia ago ne ndili punda-a pi Yesu, u apa obongo gba o pi 'ngbu ani. Abhomu-o, Yesu atsia adu pepé. <sup>8</sup> Okpala bhelé apa obongo gba o li kpadji, okoko apa okpala inde u akodho e bhú bili-o. <sup>9</sup> Okpala bhende adu adhaku kala Yesu ne obhende adu akpata ani-e, adu asusula me:

«Ebhe heni!

A ayo me Ebhe tuko bisagu pi kpala inde ngago ne 'li Ngamá ko! †

<sup>10</sup> A ayo me Ebhe tuko bisagu pi nau inde ngago, nau gba ogbi ni Davidi ko!

Ebhe Apí 'Kpí heni!»

<sup>11</sup> Abhomu-o, Yesu anu bhú gudhu na Yelusalema, ani atsia ali bhú 'ngbé 'ti Ebhe gba omaYuda-o. Pita natsia 'kpi ka ani lingo e hana, ani atsia anu ne omukpata gba e ndjika ne ka bhisi bhú Betania, anga adu me ekpi nde ngabi.

*Yesu atu pedjo li ndula na figi*

*(Tsia bhú Mat. 21:18-19.)*

<sup>12</sup> Pita ekpi bhomu-o, u adu akoto lie bhú Betania-a, Yesu aholo nadje gamu.

<sup>13</sup> Ani au ndula na figi inde adu bhú e ne kpkpa-a de e tsutsu. Ani atsia anu ngu natsia 'kpi bhú ndula ango-o atigala ni u lili bhúbhú. Engu bini, ani akolo lie dede-e, ani au bha bhiti kpkpa-o. Padha de, anga adu nedhinga nali kaka de. <sup>14</sup> Abhomu-o, Yesu atsia atu pedjo li ndula na figi-e ne napa me: «Mu li mata lili inde li kpala ti da nazu e belegu de bini!» Omukpata gba ani adje 'ngu ango-o hana.

*Yesu atsambala obhulu natsindji 'he bhú 'ngbé 'ti Ebhe gba omaYuda*

*(Tsia bhú Mat. 21:12-17; ne bhú Luk. 19:45-48; di ne bhú Dja. 2:13-22.)*

<sup>15</sup> Abhomu-o, u atsia agie mata lio bhú Yelusalema. Li Yesu ali lie bhú

'ngbé 'ti Ebhe gba omaYuda-a, ani aholo natsambala okpala inde adu atsindji 'he, ne obhende adu akala 'he oo-o. Ani atumba omisa gba okpala inde adu ayipa falanga, di ne okiti gba obhende adu atsindji obobho-o kuto. <sup>16</sup> Yesu 'o nani kpala bini akodho 'kpi ne ehe bini na mase bhú 'ngbé 'ti Ebhe de. <sup>17</sup> Pipita-a, ani aholo asuno, ne napa pi uo me: «U aye bhú Bhuku gba Ebhe-e me, Ebhe apa me: <U a'i eti gba ma-a me eti nayo Ebhe pi ndu opiga hana.> Engu bini, ngayi-e, yi adji, a atsia akolo bili gba obhulu 'zi!†»

<sup>18</sup> Ongbengbe odimandé di ne omusuno na lili adje engu inde li Yesu amene e-o. U atsia aholo agili kpadji ngu nabhoé ani. Engu bini, u adu akpe ani, anga ndu okpala hana adu angamba li nasuno gba ani-e mangamba. <sup>19</sup> Akolo lie tagolo-o, Yesu ne omukpata gba e akoto bhú gudhu-o.

*Yesu asuno pindji nadu ne nabhuka na kpekpeke*

*(Tsia bhú Mat. 21:20-22.)*

<sup>20</sup> Kkpi má bhé-o, Yesu ne omukpata gba e a'e ne enu. U akolo lie li bili li Yesu atu pedjo lie li ndula na figi-e, omukpata gba ani au me ndula ango-o a'ulu hana, akolo makolo bha bini li osisie. <sup>21</sup> Abhomu-o, Piele abhundja engu inde li Yesu apa lili e li figi-o, ani atsia apa pi Yesu me: «Musuno, tsitsia nga, ndula na figi inde mo otu pedjo lie a'ulu hana!»

<sup>22</sup> Yesu atsia apa pi omukpata gba e me: «Yi du ne nabhuka bhú Ebhe! <sup>23</sup> I du me yi nde apa pi eta inde-e me: <Yie sii, amba mu nu gu 'i mu bhú 'ngbé 'ngu-o, Ebhe méne pi yi, i du me yi nde ne bua na bhisi bhisi ade ko. Engu bini, a ayo la me yi bhuka me Ebhe améne mamene.>

<sup>24</sup> Kaka-a, ma apa pi yi me: ndu ehe hana yi ayó e bhú mayo-o, yi bhuka me yi asia ehe ango asia. Abhomu-o, ehe ango tsia méne lie pi yi. <sup>25</sup> Engu bini, nedhinga yi nde lie ngayo Ebhe-e, i du me yi nde ne engu pi kpala-a, yi de mbu ngaiza li ani,

† 11:9 11:9 Tsia bhú Ets. 118:25-26. † 11:17 11:17 Tsia bhú Isa. 56:7; di ne bhú Dglm. 7:11. † 11:26 11:26 Lukuluku inde-e, a bhú obhuku koko na didili u aye e bhú eli na giliki ade. [Engu bini, i du me yi nde mbu li okpala koko de-e, 'Dyi yi inde abhúla-a 'é di osisiti 'ngu inde yi amene e de.]

amba 'Dyi yi inde abhúlá-a 'e di osisiti 'ngú gba yi o. [ <sup>26</sup> † ]»

*A ngaha angu pi Yesu da?*

*(Tsia bhú Mat. 21:23-27; di ne bhú Luk. 20:1-8.)*

<sup>27</sup> Yesu ne omukpata gba e agie lio bhú Yelusalema. Li Yesu adu adholo lie bhú 'ngbé 'ti Ebhe gba omaYuda-a, ongbengbe odimandø gba Ebhe, ne omusunò na líli, di ne obhelesi okpála ago de ani. <sup>28</sup> U atsia ayi ani me: «A aha kpadji pi mu ngú namene ongu inde-e da? A aha la di angu pi mu ngú namemene da?» <sup>29</sup> Yesu atsia agie pi uo me: «Ma adji ayi yi li koli engú bini, i du me yi nde agie engú muma tété-e, ma atsia pá pi yi me ma ngamemene ne mangua angu dho-ie. <sup>30</sup> Aha kpadji pi Djaa ngú nabatisa okpála da? Ne me a ko Ebhe, ne me a ko okpála? Yi gie engú muma tété.»

<sup>31</sup> U aholo amene kpekebhe sùnda o me: «I du me ni nde apa me, aha kpadji pi Djaa ne Ebhe-e, ani yí ní me, i du mo-o, ka ni ní bhuka la nani Djaa lie de-e? <sup>32</sup> Engú bini, ní ti da nale napa me: «Aha kpadji pi Djaa ne okpála-a?» (U apa nani mo-o anga u adu adje tsulu ka bhiti okpála-o. Padhá de, anga ndu okpála hana adu abhundja me Djaa ne polofeta na kukulu.) <sup>33</sup> Abhomu-o, u agie pi Yesu me: «Ya mbila de.» Yesu atsia agie pi uo me: «A ndjindji, ngama di-e, ma apa pi yi de me a aha angu muma ngú namene ehe inde-e da-ie de.»

## 12

*Gbitaku pindji osisiti okpála namene kulu bhú 'dyi vino*

*(Tsia bhú Mat. 21:33-46; di ne bhú Luk. 20:9-19.)*

<sup>1</sup> Abhomu-o, Yesu aholo nakpokpo 'ngú pi uo bhú ogbitaku me: «Kpála bini alu nani ngu vino, ani asa ngongo-o hana ne aga. Ani adji edú ngú napi olíí-e bhúbhú, ani atsia ayiki 'ndjá 'ti abhúlá bhúbhú ngubula nalila edyi-o. Pipita-a, u adje lio ne okpála ngú namene kulu bhú 'dyi-o, amba o du agbó bhusu o ne uo li nguwa-o. Abhomu-o, ani atsia atapa dhuku.

<sup>2</sup> Nedhinga li nguwa abhele lie, ani atima kpála bini na kulu agba okpála ango-o me u ha nguwa bhe gba ni-e pi ni haha. <sup>3</sup> Okpála namene kulu bhú ngu vino aholo kpála ango-o, u abhi ani má kpú! U atsia agie ani ne mbulu 'kpa e padhá. <sup>4</sup> Bhulu 'dyi-e atima matá kpála na kulu koko bini, bhobhomu-o di-e, u abhi ani li 'ndji e, u atsia asosobho ani. <sup>5</sup> Bhulu 'dyi-e atima matá kpála koko bini, u abhele bha ibili bhobhomu-o mabhelo. Pipita-a, bhelé na okpála koko-o, u abhi uo. Okoko-o, u abhili uo.

<sup>6</sup> A atigala nani ibili ka bhulu edyi-e bha ne koli kpála bini ani ti da natima e, bha ndili na bhobhoko gba ani bini na 'kpú bua ani-o. Ali soso hana-a, ani aha ani, ani atsia atima ani agba uo oo-o. Do ani de-e: «U amanga ndili gba ma-a mamanga.» <sup>7</sup> Engú bini, okpála ango-o apa sùnda o me: «Yi tsia nga la ndju kpála inde atigala galikpe ne edyi-o. Yi gogo! Ní bhelo ani, amba edyi-e kolo ibili pi ní.» <sup>8</sup> U aholo ani, u abhele ani, u atsia abhike kuo ani alingo 'dyi.» <sup>9</sup> Abhomu-o, Yesu atsia ayi me: «Mbia inde-e, bhulu 'dyi-e améne pi? Ani agó, ani bhili okpála namene kulu bhú 'dyi-e hana. Pipita-a, ani há edyi-e, ani tsia pú pi okpála koko. <sup>10</sup> Yi atanga bha ndju Bhuku gba Ebhe-e uu? Li bili inde u aye lie me:

«Teme inde li okpála nayiki eti-e abhike e, akolo teme inde abi eti-e libhomu.

<sup>11</sup> Ebhe Ngámá amene engú bhomu-o ngae.

Bhú djila ní-e, a ko engú na ngbéngbé!†»

<sup>12</sup> Li Yesu apa lie mo-o, obhulu yala gba ani-e atsia adu agili naholo ani. Padhá de, anga u adu ambila ndjindji me ani apa gbitaku bhomu-o pi o. Engú la bini, u adu adje tsulu ka bhiti okpála. Abhomu-o, u a'o ká ani, u atsia agbida.

*Engú pindji nakala mandjandja gba 'ngbé ngámá Kaisala*

*(Tsia bhú Mat. 22:15-22; di ne bhú Luk. 20:20-26.)*

<sup>13</sup> Abhomu-o, u atima té omuFalisai di ne okpála gba Elode me u nu agba Yesu,

† 12:11 12:10-11 Tsia bhú Ets. 118:22-23.

u gama 'ngú ne ani, amba u holo ani li 'li e. <sup>14</sup> U ago, u atsia apa pi ani me: «Musunu, ya ngambila ndjindji me mu ngapa kukulu 'ngú. Mu ne tsulu kpála belegu ade bini. Mu tsia di engbé gba kpála bini de. Engú bini, mu ngasuno engú gba Ebhe-e pi okpála bhú kukulu 'ngú. Lili aziba pi? U kala mandjandja gba Kaisala, 'ngbé ngámá na doto na Loma, ne me u akála de. A ayo me ya kala, ne me ya akála de?» <sup>15</sup> Yesu ambila kali gba uo lie, abhomu-o, ani atsia ayi uo me: «Yi ngale ma ngubula ni? Yi go nga muma ne lí falanga bini, ma tsia!» <sup>16</sup> U ago ne lí falanga bini pi ani. Ani atsia ayi uo me: «Kulu kpála di ne balua inde pépé inde-e, a ko naa da?» U agie pi ani me: «A ko naa Kaisala.» <sup>17</sup> Abhomu-o, Yesu atsia apa pi uo me: «Yi ha ehe bhende gba Kaisala-a pi Kaisala, amba yi ha la di bhende gba Ebhe-e pi Ebhe.» U atsia adu nangamba li ani naali.

*Engú pindji nazuku ka okpála*

*(Tsia bhú Mat. 22:23-33; di ne bhú Luk. 20:27-40.)*

<sup>18</sup> Abhomu-o, oSadukai ago de Yesu. (Ngauo-o, u ziba nani naao de me okpála inde amu-o azúku mazuku-o de.) U atsia ayi Yesu me: <sup>19</sup> «Musunu, Moidje aye nani líli pi ní me: <Ɔ du me kpála bini nde akpi, ani 'o ká wala e me u nde zu ne ani de-e, a ayo me ndai ani ha ekø angu-o, amba ani zu ndili pi ndai e inde akpi ko.> <sup>20</sup> La-a, a adu nani obhosi mananika bhú piga bini. Bhende na kalanu-o aha ølø, ani akpi padhá me ani nde zu de. <sup>21</sup> Bhende na bhisi aha ølø angu-o, ani akpi padhá me ani nde zu de. A akolo bhadi lí kute bhende na bata moko. <sup>22</sup> Ndu obhosi bhomu-o mananika hana amu me u nde zu de. Pita ndu uo hana-a, ølø-o atsia akpi di. <sup>23</sup> Lí 'kpí li okpála inde amu-o azúku lie, ølø angu-o adú naa da? Padhá de, anga ndu uo mananika hana aha nani ani!»

<sup>24</sup> Abhomu-o, Yesu atsia agie pi uo me: «Yi angita, anga yi mbila Bhuku gba Ebhe-e de, yi mbila la di angu gba Ebhe-e de.

<sup>25</sup> Padhá de, anga li okpála inde amu-o azúku lie, u há lio de. Engú bini, u adú ibili maka oandjelu abhúlá. <sup>26</sup> Lí 'ngú bhende atsia nazuku ka okpála-a, yi tanga nga bhuku gba Moidje, li bili inde ani akpo 'ngú lie pindji tsá 'pó inde adu atsi-e di? Lí bili bhomu-o, u aye me Ebhe apa pi ani me: <Ma ne Ebhe gba Abalahama, Ebhe gba Isaka, Ebhe gba Yakobho.> <sup>27</sup> Ebhe ne Ebhe gba okpála inde amu-o ade. Engú bini, ani mangbo ne Ebhe gba okpála inde uu ko. Yi angita bha ndju na paká paká.»

*Lili inde ane ne engbé*

*(Tsia bhú Mat. 22:34-40; di ne bhú Luk. 10:25-28.)*

<sup>28</sup> Musunu bini na líli gba Moidje adje uo nedhinga u adu amene kpekebhe lie-o. Ani atsia au di maka li Yesu agie 'ngú lie pi oSadukai ndjindji-o. Abhomu-o, ani adyudyo lie, ani atsia ayi Yesu me: «Lili inde ane ne engbé-e ngae dho?» <sup>29</sup> Yesu agie pi ani me: «Lili na bini inde ane ne engbé-e ngae inde: <Isalaele, djedje nga! Ebhe, Ngámá gba ní-e bha ne koli Ngámá kpi e kpi. <sup>30</sup> A ayo me kunda Ebhe, Ngámá gba mu-o ne bua mu hana, ne mukobho gba mu-o hana, ne mabhundja gba mu-o hana, la di ne angu gba mu-o hana.>† <sup>31</sup> Bhende na bhisi-e ngae inde: <A ayo me kunda kilí mu maka mo okunda limu lie makpe ko.>† Líli bini ade inde ane obhobhomu-o ne engbé.»

<sup>32</sup> Abhomu-o, musunu na líli-e apa pi ani me: «A ndjindji naali, Musunu! Mo opa paká. Ani bha ne koli Ngámá ngae kpi e kpi, Ngámá koko ade, bha bini ani. <sup>33</sup> La di-e, a ayo me kpála kunda ani ne bua e hana, ne imbilangu gba e hana, ne angu gba e hana, amba ani kunda la di kilí e maka ani akunda lie lie makpe ko. Bhobhomu-o ndjindji ane natsulu oenu pi Ebhe di ne obhe u ahaha e pi ani ko.» <sup>34</sup> Líli Yesu au lie me ani agie 'ngú ne imbilangu-o, ani atsia apa pi ani me: «Mu de Nau gba Ebhe-e tsutsu ade.» Pipita-a, kpála bini le matá nayi Yesu belegu de bini.

† 12:30 12:30 Tsia bhú Det. 6:4-5. † 12:31 12:31 Tsia bhú Lev. 19:18.

*Masiya ne ngámá gba Davidi*

*(Tsia bhú Mat. 22:41-46; di ne bhú Luk. 20:41-44.)*

<sup>35</sup> Li Yesu adu asuno lie pi okpála bhú 'ngbé 'ti Ebhe gba omaYuda-a, ani atsia adu ayi me: «Lele pi li omusuno na líli gba Moidje ti da napa lie me Masiya ne ndili gba Davidi-e? <sup>36</sup> Padhá de, anga ngaani Davidi makpe-e bhú nateteke gba Bu Bhobua apa nani me:

«Ebhe Ngámá apa pi ngámá gba ma-a me:

Du li pá 'kpa ma na kokpa, akolo li nedhinga inde ma a'ó obhulu yala gba mu-o lie

sa 'dhu mu ko.»†

<sup>37</sup> Davidi ngae makpe nga'i Masiya me «Ngámá.» Lele pi ani nde la lie ne ndili gba Davidi-e?» Bhati okpála na bhibhiti adu nadje ani ne djali naali.

*Yi lila liyi ka omusuno na líli gba Moidje malila*

*(Tsia bhú Mat. 23:1-36; di ne bhú Luk. 20:45-47.)*

<sup>38</sup> Yesu adu apa pi okpála bhú nasuno gba e me: «Yi lila liyi ka omusuno na líli gba Moidje malila. Padhá de, anga ngauo-o, u kanda bha nadhuku ne ondjandja yambu, di ne me u du nayi o maka ongámási li obili inde li okpála apəpəkəbhə bhúla o li e-o. <sup>39</sup> U kanda bha nadulu pi odabili na akalanu bhú oeti nadje líli gba Moidje, di ne pi odabili na akalanu bhú da oanokomia. <sup>40</sup> U ngabha oehe gba oekəsi na olisilisi. U ngayo Ebhe ngengele ngubula me okpála u o. Kaka-a, u asia mangimbo ane bhende gba okpála koko mane.»

*Makiso gba okə bini na oelə*

*(Tsia bhú Luk. 21:1-4.)*

<sup>41</sup> Yesu adu li bilí li sanduku na makiso na 'ngbé 'ti Ebhe-e adu nadu li e, ne li pápá na abhúbhúla. Yesu adu atsia maka li okpála adu na'o makiso lie bhúbhú-o. Kambi obhulu tia adu na'o tia bhelé. <sup>42</sup> Engú bini, okə bini na oelə, bhulu ndibhili ago. Ani aha bha naae djedje lí falanga bhisi padhá má kpikili! <sup>43</sup> Abhomu-o, Yesu a'i omukpata gba e-o. Ani atsia apa pi uo me: «Ma apa pi

yi na paká me, okə na oelə inde naae ne bhulu ndibhili inde-e, aha makiso ane ndu okpála inde a'o makiso bhú sanduku inde-e hana. <sup>44</sup> Padhá de, anga ndu okoko hana, u aha tia bhende u nde ne gumu e ade ko. Engú bini, ngaani, bhú ndibhili gba e, ani aha ndu bhende adu ka e, inde ani adu akobho li e hana-o.»

## 13

*Yesu apa me 'ngbé 'ti Ebhe gba omaYuda atúko kuto*

*(Tsia bhú Mat. 24:1-2; di ne bhú Luk. 21:5-6.)*

<sup>1</sup> Nedhinga li Yesu adu akoto lie bhú 'ngbé 'ti Ebhe gba omaYuda-a, suka omukpata gba ani bini atsia apa pi ani me: «Musuno, tsitsia nga! Ae mangua babadha ka oteme dho! Ae mangua babadha ka oeti dho!» <sup>2</sup> Yesu atsia agie pi ani me: «Mo ou ongbengbe 'ti inde ayiki lie inde-e au? Oteme bhomu-o, susuka bini tígala pi kilí e de. Ndundu hana atúko kuto.»

*Engú inde akólo kala sokpi-o*

*(Tsia bhú Mat. 24:3-14; di ne bhú Luk. 21:7-19.)*

<sup>3</sup> Li Yesu adu lie pi eta na ondula na Olive bhúla 'ngbé 'ti Ebhe gba omaYuda-a, Piele, Djaki, Dja ne Andili adu ne ani titi o. U atsia ayi ani me: <sup>4</sup> «Pa nga pi ya me engú ango-o akólo nadho? Ehe inde asuno la di me ndu 'ngú hana adji andjia adú ni?»

<sup>5</sup> Abhomu-o, Yesu aholo napa pi uo me: «E-e! Kpála bini apíte yi de! <sup>6</sup> Okpála bhelé agó amene engú ne 'li ma ne napa me: «Ma ne Masiya !» U tsia píte okpála bhelé. <sup>7</sup> Nedhinga yi adjé ngali na oegú di ne dhukudhuku na oegú lie, yi adjé tsulu de, anga a ayo me oengú ango-o kolo. Engú bini, adú nga bhomu-o sokpi-e de. <sup>8</sup> Padhá de, anga okpála na kuti bini atí 'gú li okpála na kuti koko. Ngámá na kuti bini atí 'gú li ngámá na kuti koko. Oadjigidjo na ngbengbengbe adyiki doto li obili ngangá. Ehe nazu mazú dú ka okpála belegu de bini. A adú maka li bhú 'bu elə azuzu lie kala nazu ka e-o.

† 12:36 12:36 Tsia bhú Ets. 110:1.

9 'E-e! Yi lila liyi malila. Padhá de, anga okpála agbé yi bhú ngbanga kala ongámási, di ne abhú oeti nadje líli gba Moidje . U abhí yi, u apándja yi kala okpála natsia 'kpí li ndu doto di ne kala ongbengbe ongámási ngubula ma, amba yi kpokpo 'ngú gba ma kala uo. 10 Padhá de, anga a ayo ngaíza me u kpokpo Bádha Ngali pi ndu opiga hana. 11 Li nedhinga u anú ne yi lie kala ongámási ngú nakodho 'ngú gba yi-e, bua yi agúku de me ni apá pi-ie de. Engú bini, engú inde akóto bhú 'bhe yi li nedhinga bhomu-o, yi de pa bha e. Padhá de, anga engú yi apá e yíe ka yi de. Engú bini, ayíe ka Bu Bhobua .

12 Kpála apú ndai e na bhobhoko me u bhele aní. 'Dyi ndili améne bhadi moko li pabili gba ndili gba e. Li ongisi kólo obhulá yala gba odyi o, u tsia pú uo me u bhili uo. 13 Ndu okpála hana ayála yi kabula 'ngú gba ma. Engú bini, kpála bhende alú kpekpeke akólo li soso-o, akóbho ngae.»

*Likabhu na ngbéngbé inde akólo kala sokpí-o*

*(Tsia bhú Mat. 24:15-28; di ne bhú Luk. 21:20-24.)*

14 «Yi aú kpála inde u a'i e me <Siti bhulá nabhóló kuti-e†> adu li bili inde i ti de me aní du lie de-o. (A ayo me kpála atánga bhuku inde-e, kə mbolimboli ndjindji!) Abhomu-o, obhende adú abhú Yudaya-a, a ayo me u kpe apí oeta. 15 Kpála inde adú apí 'ngbu 'ti-e, a ayo de me aní kə ngú nanu abhú 'ti gba e naha 'he bini-e de. 16 Kpála bhende adú abhiye-e, a ayo de me aní gie lie naha bongo gba e de. 17 Li 'kpí angoo, a adú likabhu na ngbéngbé pi olisi na 'bhi di ne obhende li ongisi adu andji 'ka o-o! 18 Yi yo Ebhe ngubula me engú angoo akólo li nedhinga na zini de.

19 Padhá de, anga oekpí angoo adú oekpí na likabhu u u nga ngua e de, nayie maka li Ebhe abho doto lie nakolo pi mbia inde. La di-e, u ú matá ngungua de. 20 †

du me Ngámá gbétole oekpí angoo de-e, kpála bini de tí da ndu bhú mukobho de. Engú bini, aní agbételə oekpí angoo ka okpála bhende aní alo o ko. 21 † du me kpála bini nde apa pi yi me: <Yi tsitsia, Masiya sii!>, i du di-e me: <Yi tsitsia, aní abhe!>, yi azíba kpála angoo de. 22 Padhá de, anga omasiya na eu di ne opolofeta na eu agó mago. U améne ongú na ngangamba di ne okiaka 'ngú ngú napite okpála. Li angu uo kolo-o, u apite belegu okpála li Ebhe alo o-o. 23 La-a, ngayie, yi tsia 'kpí liyi ndjindji, anga ma agbele 'dje yi li ndu 'ngú hana kalanu.»

*Nago gba Ndili gba kpála*

*(Tsia bhú Mat. 24:29-31; di ne bhú Luk. 21:25-28.)*

24 «Engú bini, li oekpí angoo, pita likabhu bhomu-o, li ela kólo biti,

epe sú matá-a de,

25 oikupala ahólo nabala kuto, oangu inde abhulá adyíki má djigi djigi!†

26 Abhomu-o, u ú Ndili gba kpála nago bhú ndindi, ne ndu angu di ne ndu sangu gba e hana.† 27 Aní atíma oandjelu li odje bili badha hana ngú napo bhúla obhende aní alo o-o, abana u du bha su-oie.»

*Gbitaku pindji ndula na figi*

*(Tsia bhú Mat. 24:32-35; di ne bhú Luk. 21:29-33.)*

28 «Yi kə mboli nasuno inde li ndula na figi asuno e-o. † du me yi nde au me oyáyá angbéngbétole-o, di me okpákpá-a nde akə-o, yi de mbila me gbokokpi ibili masikpe. 29 A bhadi moko. Ngayi di-e, nedhinga yi aú engú bhomu-o ngakolo lie, yi mbila me nago gba Ndili gba kpála akolo masikpe. Aní li obhəbhoti gba yi-o. 30 Ma apa pi yi na paká me, nedhinga na engú angoo akólo makolo, me ndu okpála inde-e nde ndjia nga ndu o hana de. 31 Ekpí ne doto andjia mandjia. Engú bini, oeli gba ma-a adú duduma ne duduma.»

*Yi lila liyi*

*(Tsia bhú Mat. 24:36-44.)*

† 13:14 13:14 Tsia bhú Dan. 9:27, 11:31, 12:11. † 13:25 13:24-25 Tsia bhú Isa. 13:10, 34:4; ne bhú Edj. 32:7; di ne bhú Djl. 2:10, 3:4. † 13:26 13:26 Tsia bhú Dan. 7:13.

<sup>32</sup> «Engú bini, ekpí di ne nedhinga li ongú bhomu-o akólo lie, kpála bini mbila de, belegu de oandjelu abhúlá, belegu de Ndili-o. Ambila bha ne 'Dyi ma kpi e kpi. <sup>33</sup> 'E-e! Yi alá-a de, anga yi mbila nedhinga li engú ango-o agó lie de! <sup>34</sup> A adú maka kpála bini inde adji enú: aní a'o ká eti gba e pi obhulu kulu gba e me u du atsia 'kpí tété. Aní aha kulu namene mamene pi kpála bini ne bini. Aní aha líli pi mulila me aní alá-a de. <sup>35</sup> Kaka-a, yi alá-a de, anga yi mbila nedhinga li bhulu eti-e agie lie lie de! Nedhinga koko adú tagolo, koko adú tutu sukpe, koko adú bhú 'gbá 'ngu na bini, koko adú kəkpi. <sup>36</sup> Aní koto la di-e má gbilikiti-e, a ayo de me aní bhaka yi tila-a de! <sup>37</sup> Engú inde ma ngapa e pi yi-e, ma ngapapa pi ndu okpála hana me: <Yi alá-a de!>»

## 14

*Ongámási gba omaYuda agili nabhelo Yesu*  
(Tsia bhú Mat. 26:1-5; ne bhú Luk. 22:1-2; di ne bhú Dja. 11:45-53.)

<sup>1</sup> A adu nani 'kpí bhisi kala anokomia na Pasika, ne kala anokomia nazu mapa inde li levile nde bhú e ade-o. Ongbengbe odimandø di ne omusuno na líli gba Moidje adu agili me o hóló Yesu bhú pepe lele pi, amba o bhelo aní-e. <sup>2</sup> U adu apa me: «A ayo de me ní holo aní bhú nedhinga na anokomia de, anga ní mene mo-o, li okpála gbé tolo.»

*Ølo bini atuko mungotsi pí 'ndji Yesu*

<sup>3</sup> Yesu adu bhú kuti na Betania bhú 'ti gba Simo, bhulu kába-o. Nedhinga u adu lie nazu 'he-e, ølo bini ago ne gili inde u amene e li alabatele.\* A adu bhúbhú ne tiki mungotsi na nalade.† A adu la di bhú kpéke mase. Aní agumu gili na alabatele-o, aní atsia atuko mungotsi ango-o pí 'ndji Yesu. <sup>4</sup> Okpála koko a adu apa sunda o ne ke bua me: «Mungotsi inde-e ngasiti lie me-e ka ni? <sup>5</sup> U ti nako da natsitsindji ngu lí denalio ane kámá bata mane. U tsia

há tia ango-o pi obhulu ndibhili!» U atsia adu ake 'ngú lio pi ølo ango-o.

<sup>6</sup> Engú bini, Yesu apa me: «Yi 'o aní. Yi ngato mbolo li aní ngu ni? Aní amene muma bhomu-o bádha 'ngú. <sup>7</sup> Padhá de, anga ngayi-e, yi ngadu ne obhulu ndibhili ndu 'kpí hana de yi. Nedhinga yi kunda lie, yi ti da namene bádha 'ngú pi uo. Engú bini, ngama-a, ní ne yi ndu 'kpí hana ade. <sup>8</sup> Bhende aní ati nako da namene e, aní amene: aní apulu mungotsi li kute ma kalanu ngu nazi ma ko. <sup>9</sup> Ma apa pi yi na paká me, ndu bili hana inde u akpokpo Bádha Ngali lie píla doto libhому-o, u akpókpo di engú aní amene e, li okpála du di abhundja aní.»

*Yuda Isikaliote agili kpadji napu Yesu*  
(Tsia bhú Mat. 26:6-13; di ne bhú Luk. 12:1-8.)

<sup>10</sup> Abhому-o, Yuda Isikaliote, suka omukpata ndjikpa ne ká bhisi-e anu agba ongbengbe odimandø ngu napu Yesu pi uo. <sup>11</sup> U adje engú bhomu-o lie, u akpi ndjili naali. U atsia apa me o há pi aní tia. Abhому-o, Yuda atsia adu agili bádha nedhinga ngubula napu Yesu pi uo.

*Omukpata gba Yesu anu naleke da anokomia na Pasika*  
(Tsia bhú Mat. 26:17-25; ne bhú Luk. 22:7-14; di ne bhú Dja. 13:21-30.)

<sup>12</sup> Ekpí na bini na anokomia nazu mapa inde li levile nde bhú e ade-e, ekpí u adu abhelo kandelo lie ngubula Pasika-a, omukpata gba Yesu ayi aní me: «Mo okunda me ya nu leke da nazu Pasika pi mu su?» <sup>13</sup> Abhому-o, aní atima omukpata bhisi bhú ká omukpata gba e-o. Aní atsia apa pi uo me: «Yi nu bhú gudhu, yi akó liyi ne bhoko bini inde abi lusa 'ngu, yi kpata aní. <sup>14</sup> Bili inde aní alí li e-e, yi de pa pi bhubhulu-o me: <Musuno apa me: tina 'ti inde mo oleke e muma ne omukpata gba ma ngu nazu Pasika tété-e ngae dho?> <sup>15</sup> Abhому-o, aní asúno tina 'ti inde abhúlá-a pi yi. A ngbéngbé, u aleke ndjindji, ndu 'he hana bhúbhú

\* **14:3** 14:3 Alabatele: A ko teme na mase naali inde u abhobho oehe maka gili li e ko. † **14:3** 14:3 Nalade: A ko mungotsi inde u amene e li 'kpá ulu. Tsia bhú Mat. 26:7.

bedhe. A bhomu-o bili inde yi aléke da anokomia pi ní li e ko.»

<sup>16</sup> Omukpata-a agbida. U anu abhu gudhu. U atsia abhaka ndu 'ngú hana maka li Yesu apa pi uo lie ko. Abhomu-o, u atsia alu ezu na Pasika-o.

*Yesu apa me suka omukpata bini apu ni*

<sup>17</sup> A akolo lie tagolo-o, Yesu ne omukpata gba e ndjikpa ne ka bhisi-e akolo. <sup>18</sup> Nedhinga u adulu lie pi misa me u nde ngazu 'he-e, Yesu atsia apa me: «Ma apa pi yi na paká me, suka yi bini, inde ngazu 'he ne ma-a, apu ma.» <sup>19</sup> Omukpata-a abedhe ne babuma li bua o bedhe. U atsia aholo nayi ani bini ne bini me: «A adu ma?» <sup>20</sup> Ani apa pi uo me: «A ko suka yi omukpata ndjikpa ne ka bhisi-o, bhende i ngato 'kpa e ne ma bhú saani-o. <sup>21</sup> Ndili gba kpála akpi bha na paká maka u aye lie bhú Bhuku gba Ebhe li 'ngú gba ani-o. Engú bini, a ko likabhu pi kpála inde apu Ndili gba kpála-o. A belegu nako pi kpála ango-o ndjindji me u azu ani de!»

*Yesu aha mapa ne vino pi obhulu titima gba e-o*

*(Tsia bhú Mat. 26:26-30; ne bhú Luk. 22:14-20; di ne bhú 1 Kol. 11:23-25.)*

<sup>22</sup> Nedhinga u adu azu 'he lie, Yesu aha mapa-o. Pipita-a, ani agie heni pi Ebhe. Ani atsia agumu bhusu bhusu, ani atsia aha pi uo. Do ani de-e: «Yi haha, a inde-e kute ma.» <sup>23</sup> Pipita-a, ani aha kopo-o, pita ani agie heni lie pi Ebhe-e, ani atsia aha pi uo. U atsia andji ndu o hana. <sup>24</sup> Ani atsia apa pi uo me: «A inde-e ngute ma, ngute na gandja inde atuko lie pi bhiti okpála-o. <sup>25</sup> Ma apa pi yi na paká me, ma andji mata galikpe li ndula na vino belegu de bini, akolo li 'kpi inde ma andji mata lie ne toto bhú Nau gba Ebhe-o.»

<sup>26</sup> Pita u ali 'tsi lie, u aze ngu nanu pi 'ta na ondula na Olive.

‡ **14:26** 14:26 Etsi: Etsi inde si-e, a ko bhende bhú bhuku na Etsi gba omaYuda ko. OmaYuda du nani alili li 'so anokomia na Pasika. Tsia bhú Mat. 26:30. † **14:27** 14:27 Tsia bhú Djkl. 13:7. § **14:36** 14:36 Kopo na likabhu: Bhú eli na giliki-e, u aye bha me kopo.

*Yesu apa me Piele ayala ni*

*(Tsia bhú Mat. 26:31-35; ne bhú Luk. 22:31-34; di ne bhú Dja. 13:36-38.)*

<sup>27</sup> Abhomu-o, Yesu apa pi uo me: «Ndu yi hana, yi a'ó ka ma, anga u aye bhú Bhuku gba Ebhe-e me:

<Ma asu mulila gba okandole-o, li ongisi kandole-o gbongbolo ne bili ngangá.†>

<sup>28</sup> Engú bini, ma azuku lie, ma anu adjeke yi abhu Galilaya.» <sup>29</sup> Piele atsia apa pi ani me: «Belegu li ndu okpála hana 'o ka mu-o, ngama de!» <sup>30</sup> Yesu atsia apa pi ani me: «Ma apa pi mu na paká me, ngamu-o, sukpe na naki inde-e, kala me engu ku 'gbá bhutsibhutsi bhisi-e, mo opa bhutsibhutsi bata me ni mbila ma de.» <sup>31</sup> Engú bini, Piele atsia apa mata ne kekele me: «Abana i yo bha me ma kpi bhú dabili bini ne mu-o, ma atse mu de!» Abhomu-o, ndu uo hana atsia apa bhadi moko.

*Yesu ayo Ebhe bhú Getesemani*

*(Tsia bhú Mat. 26:36-46; di ne bhú Luk. 22:39-46.)*

<sup>32</sup> Pipita-a, Yesu ne omukpata gba e akolo li bili inde u a'i e me Getesemani. Ani atsia apa pi uo me: «Yi dudu kuto si, nedhinga inde ma adu lie nayo Ebhe ko.»

<sup>33</sup> Ani anu bhú dabili bini ne Piele, Djaki ne Dja. Abhomu-o, tsulu aholo ani, ani aholo azu likabhu li bua e. <sup>34</sup> Ani atsia apa pi uo me: «Bua ma abedhe ne likabhu bedhe ka ma adji akpi lie-o. Yi tigala si, yi ala-a de!»

<sup>35</sup> Pipita-a, ani anu mbo tsutsu bedi. Ani atsia agu 'i e bhú doto. Ani atsia adu ayo Ebhe ngubula e me i du me a nde ale male-e, nedhinga bhomu-o de kodho 'kpi de ni tsutsu. <sup>36</sup> Ani adu apa me: «Aba, 'Dyi ma, kpeke da 'ngú pi mu ade. 'E kopo na likabhu inde-e de ma ma'e! Engú bini, mo omene maka ma akunda lie de, mene mangbo maka mo okunda lie ko!»

<sup>37</sup> Yesu agie lie, ani abhaka omukpata gba e bata me u nde tila. Do ani pi Piele de-e: «Simo, mu ngala-a? Mu sia angu

ngú nadu ndila belegu de ngubula saa bini? <sup>38</sup> Yi alá-a de, yi yo Ebhe, amba yi alí bhú nale de. Bua kpála dudu bedhe ne angu, engú bini, kute ani bhuhukú.»

<sup>39</sup> Pipita-a, Yesu atuto matá lie mbo tsutsu masudha. Ani atsia ayo Ebhe ne oeli bini bhomu. <sup>40</sup> Abhomu-o, ani ago matá, ani abhaka uo tila, anga djila uo adu me a nde ali tili ne ela má yikpokpo! U tsia du nambila de me o opá pi ani pi-ie de. <sup>41</sup> Bhutsibhutsi na bata, ani ago. Ani apa pi uo me: «Yi nga bha ngala di ne naguo? A andjia, nedhinga akolo. Yi tsitsia nga, u apú Ndili gba kpála mbia inde-e pi obhulu siti 'ngú. <sup>42</sup> Yi yie bhúlá, ní nãnu! Yi tsitsia nga, kpála inde i ngapu ma-a, akolo!»

*U aholo Yesu*

*(Tsia bhú Mat. 26:47-56; ne bhú Luk. 22:47-53; di ne bhú Dja. 18:3-12.)*

<sup>43</sup> Bha li nedhinga li Yesu adu ngabha lie agama 'ngú-o, Yuda, suka obhulu titima ndjikpa ne ká bhisi-e, akoto li uo bhú dabili bini ne okpála inde adu sa 'kpa o ne tia 'gú: ombotia ne ondula. U ago me a nde atima uo ne ongbengbe odimandø, ne omusuno na líli gba Moidje di ne obhelesi okpála. <sup>44</sup> Yuda, kpála inde apú Yesu-o, adje lie ne uo me: «Kpála inde ma anvú pabhø e, a ko ani! Yi holo ani, amba yi nu ne ani ne nalila ani ndjindji.» <sup>45</sup> Nedhinga li ani akolo lie, ani atuto lie de Yesu. Ani atsia apa pi ani me: «Labi!» Ani atsia anvú pabhø ani. <sup>46</sup> Okpála bhe koko abu 'kpa o li ani, u atsia aholo ani.

<sup>47</sup> Suka okpála inde adu oo agbe mbotia gba e-o. Ani asu kpála na kulu gba bhele kpála gba odimandø-o, ani atsia akodho 'dje ani má tse! <sup>48</sup> Abhomu-o, Yesu atsia apa pi uo me: «Yi ago ngú ma ne ombotia di ne ondula mugito me ma ne bhulu 'zi! <sup>49</sup> Ma du nako ndu 'kpí hana bhú ká yi bhú 'ngbé 'ti Ebhe gba omaYuda ngú nasuno, yi tsia holo ma de. Engú bini, a ko ngubula me engú inde u aye e bhú Bhuku-o mene lie.» <sup>50</sup> Abhomu-o, ndu omakpata hana a'o ká ani. U atsia akpekpe. <sup>51</sup> Makombi bini adu akpata

Yesu me ani nde abuku kute e bha ne mbulu daladeli. U aholo ani. <sup>52</sup> Engú bini, ngaani-e, ani abala 'kpa li daladeli-o, ani atsia ayiki lie ne holo ndumbu.

*U anu ne Yesu kala Libi okpála natsia 'kpí li 'ngú gba omaYuda*

*(Tsia bhú Mat. 26:57-68; ne bhú Luk. 22:54-55, 63-71; di ne bhú Dja. 18:13-14, 19-24.)*

<sup>53</sup> Abhomu-o, u anu ne Yesu kala bhele kpála gba odimandø-o. U atsia apo bhúla o ndu o hana: ongbengbe odimandø, obhelesi okpála di ne omusuno na líli gba Moidje. <sup>54</sup> Piele adu akpata Yesu mbo tsutsu. Ani atsia akolo bhú mbadhasu gba bhele kpála gba odimandø-o. Ani adu kuto, ani atsia adu atu djua bhú dabili bini ne omulila.

<sup>55</sup> La-a, ongbengbe odimandø bhú dabili bini ne Libi okpála natsia 'kpí li 'ngú gba omaYuda adu naao agili kpála inde agó apa 'ngú li kute Yesu sisiti, amba o kodho 'ngú gba ani-e me ani kpi. Engú bini, u u de. <sup>56</sup> Okpála bhelé adu apa 'ngú li Yesu ne eu. Engú bini, ongú u adu apa e, a go li kpadji bini de. <sup>57</sup> Okpála bini bini adu ayie bhúlá ne napa 'ngú li ani ne eu me: <sup>58</sup> «Ya adje ani me ani nde ngapa me: <Ngama-a, ma abhølo 'ti Ebhe inde li okpála amene e inde. Pita 'kpí bata, ma tsia yiki koko inde li 'kpa kpála mene e de.» <sup>59</sup> Engú bini, abana u adu apa lie mo-o, u du adje lio bhú nakpokpo 'ngú ango-o de.

<sup>60</sup> Abhomu-o, bhele kpála gba odimandø-o ayie bhúlá bhú ká okpála-o. Ani atsia ayi Yesu me: «Mu gie 'ngú li kute engú u ngakpokpo e li mu-o di?» <sup>61</sup> Engú bini, ngaani-e, ani andjili bha má bulu, ani gie engú bini de! Bhele kpála gba odimandø-o atsia ayi matá ani me: «Mu ne Masiya, Ndili gba Ebhe inde li okpála ngadhøe e?» <sup>62</sup> Yesu agie me: «A moko, ma ne ani. Yi au Ndili gba kpála adu li pápá na kokpa gba Angbamili me ani nde ngago ne ndindi na abhúlá.†»

<sup>63</sup> Abhomu-o, bhele kpála gba odimandø-o asidha bongo gba e. Ani atsia

† 14:62 14:62 Tsia bhú Ets. 110:1; di ne bhú Dan. 7:13.



apa me: «Ní matá ne gümü okpála koko ngú nakpokpo 'ngú gba ni-e ade! <sup>64</sup> Yi adje maka ani asobho Ebhe lie adje. Yi apa tété pi?» Abhomu-o, ndu uo hana akodho 'ngú gba ani-e me ani ati ne nakpi. <sup>65</sup> Bini bini bhú ká uo aholo aku ngusu li ani. U atsia adu di abuku bhúla ani, asu ani ne napa pi ani me: «Pa pi ya me asu mu da!» Omulila-a aha ani, u atsia aholo di nasu ani.

*Piele apa me ni mbila Yesu de*

*(Tsia bhú Mat. 26:69-75; ne bhú Luk. 22:56-62; di ne bhú Dja. 18:15-18, 25-27.)*

<sup>66</sup> Nedhinga li Piele adu nga bha lie tu mbadhasu-o, saka okpála na kulu bini na eole gba bhele kpála gba odimandø ago. <sup>67</sup> Ani au Piele lie ngatu djua-a, ani atsia ani má suu! Ani atsia apa pi ani me: «Ngamu di-e, mo odu nako bhú dabili bini ne Yesu, kpála na Nadjaleta-o!» <sup>68</sup> Engú bini, Piele ayaya. Ani atsia apa me: «Ma mbila de. Ma ke di mboli engú mu ngakunda napa e de.» Abhomu-o, ani akoto kilidjo bhú mbaladja. [Pipita-a, engu atsia aku 'gbá.]

<sup>69</sup> Engú bini, kpála na kulu na eole ango-o au ani. Ani atsia apa matá bhú djila okpála inde adu oo me: «Kpála inde aoo, a ko di saka uo!» <sup>70</sup> La-a, Piele ayaya matá. Pita nedhinga masudha, okpála inde adulu oo apa matá pi Piele me: «A ko paká, mu ne saka uo, anga ngamu di-e mu ne kpála na Galilaya.» <sup>71</sup> Engú bini ngaani-e, ani aholo natu silika ne nasima me: «Ma mbila kpála inde yi ngapa 'ngú gba e muma bhomu-o de!» <sup>72</sup> Má gala kolo me-e, engu atsia aku 'gbá bhutsibhutsi na bhisi. Abhomu-o, Piele abhundja engú inde li Yesu apa igini e pi ani me: «Kala me engu ku 'gbá bhutsibhutsi bhisi-e, mo opa bhutsibhutsi bata me ni mbila ma de.» Ani atsia akoto ne holo ne naku 'gbá.

## 15

*U anu ne Yesu kala Pilato*

*(Tsia bhú Mat. 27:1-2, 11-14; ne bhú Luk. 23:1-5; di ne bhú Dja. 18:28-38.)*

<sup>1</sup> Kèkpí má bhø, ongbengbe odimandø gba Ebhe-e apo bhúla o bhú bula. U

adu bhú dabili bini ne obhelesi okpála, ne omusuno na líli gba Moidje, la di ne Libi okpála natsia 'kpí li 'ngú gba omaYuda libhomu. U agbite Yesu ne ekrø, u anu ne ani, u atsia aha ani pi Pilato. <sup>2</sup> Pilato ayi ani me: «Mu ne 'ngbé ngámá gba omaYuda?» Yesu agie pi ani me: «Mu ngapapa ngamu.» <sup>3</sup> Ongbengbe odimandø adu apa osisiti 'ngú bhelé li kute ani. <sup>4</sup> Abhomu-o, Pilato atsia ayi matá ani me: «Ndu 'ngú inde u ngapa e li kute mu inde-e, mu gie 'ngú tété bini di?» <sup>5</sup> Engú bini, Yesu gie 'ngú tété belegu de bini. Kaka-a, Pilato angamba naali.

*U akodho 'ngú gba Yesu me ani kpi bha makpi*

*(Tsia bhú Mat. 27:15-26; ne bhú Luk. 23:13-25; di ne bhú Dja. 18:39 - 19:16.)*

<sup>6</sup> Bhú ndu anokomia na Pasika hana, a ayo me Pilato tse 'kpa li kpála bini inde u aholo e bhú tikpu-o pi omaYuda. A ayo me a adu bhende li okpála ayó me Pilato tse 'kpa li e ko. <sup>7</sup> A abhaka me kpála bini inde u a'i e me Balabasi nde bhú tikpu. A adu me u nde aholo ani bhú dabili bini ne okpála na kpekpeke 'ndji me u nde abhølo kpála bini bhú nedhinga u agbe kpéke 'ndji lie-o. <sup>8</sup> Abhomu-o, bhiti okpála anu abhaka Pilato, u atsia aholo nayo me Pilato mene pi o maka ani amemene lie gømø gømø-o.

<sup>9</sup> Pilato agie pi uo me: «Yi akunda me ma tse 'kpa li 'ngbé ngámá gba omaYuda pi yi?» <sup>10</sup> Padhá de, anga ani adu ambila ndjindji me ongbengbe odimandø apu Yesu, anga okpála adu ne mukunda naali pi Yesu. <sup>11</sup> Abhomu-o, ongbengbe odimandø atsia ato bhú okpála bhelé me u yo me Pilato tse mangbo 'kpa li Balabasi. <sup>12</sup> Pilato atsia ayi bha matá uo me: «A ayo la me ma mene ngú kpála bhende yi nga'i e me 'ngbé ngámá gba omaYuda-a pi?» <sup>13</sup> Okpála bhomu-o atsia agie ne nasusula me: «Gi ani li kulusi!» <sup>14</sup> Pilato atsia adu ayi uo me: «Ani amene la mangua siti 'ngú dho?» U asusula matá kpekpeke naali ne na'e'e 'li o ne abhúla me: «Gi ani li kulusi!» <sup>15</sup> Abhomu-o, Pilato atse 'kpa li Balabasi pi uo, amba ni atsøgbolo bua uo

de. Aní aha lílì me u bhí Yesu ne fimbo, pípita-a, aní atsia aha aní pí uo me u gí aní lí kulusi gígi.

*Osudha amu Yesu*

*(Tsia bhú Mat. 27:27-31; di ne bhú Dja. 19:2-3.)*

<sup>16</sup> Abhomu-o, osudha aha Yesu, u atsia anu ne aní tu mbadhasu gba Pilate. U a'i ndu osudha koko hana. <sup>17</sup> U ato bongo na zúmbe zúmbe lí kute aní, u atsia agala ehe na eti má kililí, u aha-a, a ato bhú 'ndji aní. <sup>18</sup> U atsia aholo nayi aní me: «'Ngbé ngámá gba omaYuda, atou!» <sup>19</sup> U adu abhi 'ndji aní ne mbamba, u atsia adu aku ngusu lí kute aní. U atutu lipuku o kuto, u atsia adu ati kala aní. <sup>20</sup> Pita u amu aní lie má tsiki tsiki-e, u agbe bongo na zúmbe zúmbe-e lí kute aní, u atsia agie obongo gba aní-e pí aní. Pípita-a, u atsia agbe aní kilidjo ngubula nagí aní lí kulusi.

*U agi Yesu lí kulusi*

*(Tsia bhú Mat. 27:32-44; ne bhú Luk. 23:26-43; di ne bhú Dja. 19:17-27.)*

<sup>21</sup> Abhomu-o, osudha aholo kpála bini ne kpéke me aní bí kulusi gba Yesu-o. A adu 'lí kpála ango-o me Simo, a adu 'dyi Alekidjandele ngauo ne Lufusi. A adu kpála na gudhu na Silene. U aholo aní me aní nde ngakodho 'kpí oo nedhinga aní adu agie lie lie abhiye-o. <sup>22</sup> U anu ne Yesu lí bilí inde u a'i e me Gologota, (a akunda napa me «bilí na pelege 'ndji»). <sup>23</sup> U adu akunda naha vino inde u akpotsé e ne mila pí aní. Engú bini, Yesu ndji de.

<sup>24</sup> U agi aní lí kulusi. U agbogbo bhusu o lí obongo gba aní-e me u nde agu ngaiza tété gbanda ngú nambila bhende a ayo me kpála bini ne bini sia e ko. <sup>25</sup> U agi Yesu lí kulusi bhú saa na odukpabini kala tulukpe. <sup>26</sup> Balua inde u aye e ngú nasuno ta mangimbo gba aní-e aye nani lie me: «'NGBÉ NGÁMÁ GBA OMAYUDA.» <sup>27</sup> U atsia agi la di bhú dabilí bini ne aní-e, obhulu 'zi bhisi inde adu agbulu 'he gba okpála ne kpéke. Bini adu lí kulusi gba e lí pá 'kpa aní na kokpa. Koko atsia adu

lí kulusi gba e lí pá 'kpa aní na gali. [<sup>28</sup> Abhomu-o, eli gba Ebhe inde aye lie bhú Bhuku gba aní-e me: «U ato 'lí aní bhú ká okpála na sisiti-e†», atsia amene lie.]

<sup>29</sup> Okpála inde adu akodho 'kpí oo adu asosobho aní. U adu ako 'ndji o, u atsia adu apa me: «He-e! Ngamu, kpála inde abhéle 'ngbé 'ti Ebhe gba omaYuda, i tsia yíki sunda 'kpí bata-a, <sup>30</sup> kobho limu ngamu makpe, amba mu yie lí kulusi-e ké kuto.»

<sup>31</sup> Ongbengbe odimandé gba Ebhe di ne omusuno na lílì gba Moidje adu bhadi namu aní moko. U adu apa sunda o me: «Aní akobho okpála koko, aní tí da nakobho lie ngae makpe di! <sup>32</sup> Mbia inde-e, a ayo me Masiya , 'ngbé ngámá gba omaIsalaele yie lí kulusi, ya u, amba ya bhuka.» Obhende u agi o ne lí okulusi gba o dengo aní-e adu bhadi namu aní moko.

*Yesu akpi*

*(Tsia bhú Mat. 27:45-56; ne bhú Luk. 23:44-49; di ne bhú Dja. 19:28-30.)*

<sup>33</sup> Tulukpe-e, bití aké pí doto libhomu, nakolo pí saa na bata pita tulukpe. <sup>34</sup> Abhomu-o, bhú saa na bata-a, Yesu asula kpekpeke me: «Eloi, Eloi, lama sabakatani?» (A akunda napa me, «Ebhe gba ma, Ebhe gba ma, mo o'o ká ma ka ni?»)† <sup>35</sup> Bini bini bhú ká okpála inde adu oo adje aní lie, u atsia apa me: «Yi djedje, aní nga'i Eliya!» <sup>36</sup> Suka kpála bini agu holo. Aní anu azi epondje bhú kpongadha pandi. Aní agbite lí kute mbamba. Aní atsia aha pí aní me aní ndji ne napa pí obi e me: «Ayó nga! Ní tsia nga ne me Eliya agó ngú naké aní lí kulusi-e kuto.» <sup>37</sup> Engú bini, Yesu asula kpekpeke. Aní atsia akpi.

<sup>38</sup> Abhomu-o, lido\* inde adu agbo bhusu 'ngbé 'ti Ebhe-e asidha bhusu e bhisi má tsue nayie abhúlá, akolo akuto! <sup>39</sup> Ngámá gba osudha kámá bini inde adu bhúla aní au lele maka aní akpi lie, aní atsia apa me: «Kpála inde-e bha ndju nako ne ndilí gba Ebhe kukulu!»

† 15:28 15:28 Tsia bhú Isa. 53:12. † 15:34 15:34 Tsia bhú Ets. 22:2. \* 15:38 15:38 'Ngbé 'kpá bongo inde si-e, adu nani agbo bhusu tina 'ti na bubu-o, ne bhende na bubu naali bhú 'ngbé 'ti Ebhe gba omaYuda ko. Tsia bhú Eki. 26:31-33, ne bhú Luk. 23:45, di ne bhú Ebe. 6:19.

<sup>40</sup> Olisi bini bini adu di oo. U adu atsia 'ngú bhomu-o mbo tsutsu. Bhú ká uo-o, a adu nani Malia , kpála na gudhu na Magadala, Malia , 'hi Djodje ngauo ne Djaki bhe na makombi makombi-o, a la di-e Salome. <sup>41</sup> Nedhinga li Yesu adu lie bhú Galilaya-a, olisi bhomu-o adu adhuku bhú dabili bini ne ani. U atsia adu di ateteke ani. Olisi koko bhelé inde ayie nani ne ani bhú Yelusalema adu di oo.

### *Djodjefu azi Yesu*

*(Tsia bhú Mat. 27:57-61; ne bhú Luk. 23:50-56; di ne bhú Dja. 19:38-42.)*

<sup>42</sup> A adu ibili tagolo. A abhaka la lie me a nde ekpi naleke lio ngú anokomia-a, a akunda napa me ekpi kala ekpi naguo gba omaYuda-a , <sup>43</sup> suka okpála na Libi okpála natsia 'kpí li 'ngú gba omaYuda ago. A adu 'li ani me Djodjefu , kpála na gudhu na Alimatayo. A adu kpála nakpe makpe. Ani adu di adjeke Nau gba Ebhe-o . Ani atsia asia kpéke bua ngú nali agba Pilatø ngú nanu ayo kuo Yesu. <sup>44</sup> Pilatø angamba naali nadje me Yesu akpi kolo akpi-o. Abhomu-o, ani a'i ngámá gba osudha-o. Ani atsia ayi ani me ani akpi igini bhutode i-e. <sup>45</sup> Pita nagie 'ngú tété ka ngámá gba osudha-a, Pilatø aziba pi Djodjefu naha kuo Yesu. <sup>46</sup> Abhomu-o, Djodjefu akala daladeli inde u amene e li lene. Ani akø kuo Yesu li kulusi-e kuto. Ani atsia agagala ne daladeli bhomu. Ani anu a'o bhú lata inde adu me u nde adje e bhú teme-o. Ani awawala 'ngbé teme li bhøbhø. <sup>47</sup> Malia, kpála na gudhu na Magadala ngauo ne Malia, 'hi Djodje adu atsia bili u a'o ani li e-o.

## 16

### *Yesu azuku*

*(Tsia bhú Mat. 28:1-8; ne bhú Luk. 24:1-12; di ne bhú Dja. 20:1-20.)*

<sup>1</sup> Li ekpi naguo gba omaYuda akodho 'kpí lie, Malia , kpála na gudhu na Magadala, ne Malia , 'hi Djaki, bhú dabili bini ne Salome, akala emu inde bhú e ne mungotsi ngú nanu apulu kute kuo Yesu ne di. <sup>2</sup> Abhomu-o, bhú 'kpí yinga køkpi

má bhø-o, nedhinga li ela adu akoto lie, u anu abhú lata. <sup>3</sup> U adu apa sunda o me: «A atumba teme inde li 'bhø lata-a pi ní da?» <sup>4</sup> Engú bini, u atsia 'kpí lie me-e, u au me teme bhomu-o atumba lie atumba. Abana a adu lie ngbéngbé.

<sup>5</sup> U ali lie bhú lata-a, u au makombi bini ato 'ndjá yambu na bubu me ani nde adu li pápá na kokpa. U atsia adje tsulu naali. <sup>6</sup> Engú bini, makombi bhomu-o apa pi uo me: «Yi adje tsulu de. Yi ngagili Yesu, kpála na Nadjaleta, inde u agi nako e li kulusi-o. Ani azuku. Ani sii ade. Yi tsia nga bili nako u a'o ani li e-o. <sup>7</sup> Yi nu pa mangbo pi omukpata gba ani di ne Piele me: «Ani akodho 'kpí pi yi bhú Galilaya kalanu. Yi au ani oo maka ani apa nako pi yi lie ko.» <sup>8</sup> Abhomu-o, u aze bhú lata-a ne holo kilidjo, anga mabhundja gba uo angbingi, kute uo atsia adu aguku. U tsia pa pi kpála de, anga u adu ne tsulu.

### *Yesu akoto li Malia, kpála na gudhu na Magadala*

*(Tsia bhú Mat. 28:9-10; di ne bhú Dja. 20:11-18.)*

[ <sup>9</sup> Li Yesu azuku lie bhú 'kpí yinga køkpi-e, ani akoto ngaiza li Malia, kpála na gudhu na Magadala, inde ani apandja nani osisiti bua mananika bhú e-o.\* <sup>10</sup> Malia anu napapa pi okpála inde adu nani bhú dabili bini ne Yesu-o. U adu ne likabhu, u atsia adu di aku 'gbá. <sup>11</sup> Engú bini, li okpála bhomu-o adje lie me ani nu, di ne me Malia au ani-e, u bhuka ani de.

### *Yesu akoto li omukpata bhisi*

*(Tsia bhú Luk. 24:13-35.)*

<sup>12</sup> Pipita-a, Yesu asuno matá lie maka kpála koko pi omukpata bhisi inde adu li kpadji ngú nanu akuti-o. <sup>13</sup> Abhomu-o, obhobhomu-o ago apa pi okoko-o. Engú bini, okoko bhuka uo de.

### *Yesu asuno lie pi omukpata ndjikpa ne ká bini*

*(Tsia bhú Mat. 28:16-20; ne bhú Luk. 24:36-49; ne bhú Dja. 20:19-23; di ne bhú Kul. 1:6-8.)*

\* **16:9** 16:9 Ongú nayie si akólo bhú 16:20, a bhú obhuku koko na didili-e ade.

<sup>14</sup> Li soso-o, Yesu atsia asuno lie pi obhulũ titima gba e ndjikpa ne ká bini-e me u nde ngazũ 'he. Abhomũ-o, ani atsia agbele 'dje uo ka ndi nabhuka di ne kpéke 'ndji gba uo-o. Padhá de, anga u bhuka nani okpála inde au ani me ani nde azuku-o de. <sup>15</sup> Abhomũ-o, ani atsia apa pi uo me: «Yi nũ pĩla doto libhomu nakpokpo Bádha Ngali pi ndũ okpála hana. <sup>16</sup> Kpála inde abhúka-a, inde asía la di batisimo-o, ani kóbho. Kpála bhende i bhúka de-e, asía mangimbo. <sup>17</sup> A inde-e ongú inde adhúku bhú dabili bini ne obhende abhúka-o: u apándja osisiti bua bhú okpála ne 'li ma, u agáma 'ngú bhú odikongũ na mbia. <sup>18</sup> U ahólo okpũlũ ne 'kpa o. I dũ di me u nde andji elá na bhelø kpála-a, a améne 'he bini ngú uo de. U a'ó 'kpa o pí 'ndji okpála na kuo, li okpála na kuo ango-o kóbho.»

<sup>19</sup> Pita napa ongú bhomũ-o pi uo-o, Ebhe aha Ngámá Yesu abhúlá. Ani atsia adũ kuto li pá 'kpa Ebhe na kokpa. <sup>20</sup> Abhomũ-o, omukpata-a atsia anũ naao nakpokpo Bádha Ngali ne ndũ bili hana. Ngámá adũ ateteke uo bhú okulu bhomũ-o hana. Ongamba 'ngú inde u adũ amene e adũ di asuno me nasuno inde u ngasuno e-e, a ko 'ngú na paká.]

**Bádha Ngali  
gba Yesu Kilisito maka li  
Luka  
aye lie ko  
Eli na kalanu**

Bádha Ngali gba Yesu Kilisito maka li Luka aye lie ngasuno Yesu maka Məkobho inde li Ebhe apa nani me ni aha e pi piga gba omaƙsalaele la di ne pi ndu opiga na pila doto hana. Luka ngakpokpo me Bu Bhobua gba Ngámá-a a'i nani Yesu ngabula nakpokpo Bádha Ngali pi obhulu ndibhili (4:18). La, Bádha Ngali angoo abedhe ne ndjinga bhú e pi okpála inde bhú o ne omulopolo gba o hana. Engú na ndjili abhú bhuku gba Luka ngbéngbé ane la mane bhú oalo na kalanu inde ngakpokpo 'ngú nago gba Yesu. Engú na djali angoo ane matá mane bhú 'so 'kpí nedhinga na'u ka Yesu abhúla. A ko bha Luka bini inde akpokpo 'ngú bhú bhuku na Kulu gba obhulu titima gba Yesu pindji nabhele a la di-e nayangba ka nabhuka bhú Kilisito pita na'u ka Yesu abhúla-o.

Bhú Bádha Ngali inde-e, u ngagama 'ngú naali pindji mayo, ne pindji Bu Bhobua, ne pindji kulu gba olisi bhú kulu gba Yesu, di ne lele maka li Ebhe ngambu li sisiti 'ngú gba okpála lie-o.

**Ongbenge ongú inde bhú bhuku inde-e ngae inde:**

Eli na kalanu 1:1-4

Nazu lie ne nazu bhú ndili lie gba Djaa bhulu nabatisa okpála di ne Yesu 1:5 - 2:52

Kulu gba Djaa bhulu nabatisa okpála 3:1-20

Batisimo di ne nale inde li Djabulu ale Yesu ne e-o 3:21 - 4:13

Kulu inde li Yesu amene e bhú ká okpála bhú Galilaya 4:14 - 9:50

Dhuku gba Yesu nayie bhú Galilaya ngu nanu abhú Yelusalema 9:51 - 19:27

Oekpi nasoso gba Yesu abhú Yelusalema 19:28 - 23:56

Nazuku gba Yesu, ne nakoto ka ani li okpála, a la di-e na'u ka ani abhúla-o 24:1-53

*Lita 'ngú-o*

<sup>1</sup> Nda ma na mukunda Tiofile,

Okpála bhelé ale naye todú na ongú inde akodho 'kpí bhú ká ya-o. <sup>2</sup> U aye ongú angoo maka li okpála inde au nayie li lilita-a, akpokpo pi ya lie ko. A ko okpála inde adu nakpokpo eli gba Ebhe-o. <sup>3</sup> Kaka-a, ngama di-e, pita nagili 'ngú tété má bhotobhoto nayie li dudu-o, ma au ndjindji me, ma kpokpo kúkú pi mu li lelele, bhele kpála Tiofile, maka li ongú angoo akodho 'kpí lie ko. <sup>4</sup> Ma kpokpo kúkú pi mu, amba mu mbila kukulu 'ngú na ongú inde u asuno e pi mu ko.

*Andjelu apa me u azú Djaa bhulu nabatisa okpála*

<sup>5</sup> Bhú nedhinga li Elode adu lie 'ngbé ngámá na ndu doto na Yudaya-a, dimandé bini gba Ebhe-e adu oo. A adu 'li ani me Djakalia, ani adu bhú libi odimandé gba Abia. A adu 'li wala ani me Alidjabheti, ani adu bhú piga gba 'ngbé dimandé Alona. <sup>6</sup> Ndu uo bhisi hana adu bhú djila Ebhe ngbingbili. U atsia adu amene ndu líli gba Ngámá Ebhe-e hana. <sup>7</sup> Engú bini, ndili du ka uo de, anga Alidjabheti adu ne izude. La di-e, u adu ndu o bhisi hana me u nde agbegbe.

<sup>8</sup> Ekpí bini, Djakalia adu amene kulu na dimandé gba e kala Ebhe, anga adu ekpi na libi gba uo-o ngu namemene. <sup>9</sup> Maka li odimandé adu amemene lie, Djakalia atsia asia ngasa ngu nanu natsulu mungotsi pi Ebhe abhú 'ngbé 'ti gba Ngámá Ebhe, bhú titina na bubu-o. <sup>10</sup> Nedhinga ani adu atsutsulu lie, ndu okpála hana adu ayo Ebhe akilidjo.

<sup>11</sup> Abhomu-o, kolo má gala me-e, andjelu gba Ngámá Ebhe-e akoto li ani. Ani ala de bili natsulu mungotsi-e ne li pápá na kokpa. <sup>12</sup> Li Djakalia au ani lie me-e, tsulu aholo amene ani, mabhundja gba ani-e atsia angbingi. <sup>13</sup> Engú bini, andjelu-o apa pi ani me: «Djakalia, mo odje tsulu de, anga Ebhe adje nayo gba mu-o adje. Wala mu Alidjabheti azú pi mu ndili na bhobhoko. Mo ogisila 'li ani me Djaa. <sup>14</sup> Mo odú ne djali naali, li okpála bhelé tsia kpi di djali ka nazu ani-o. <sup>15</sup> Ani adu

'ngbé kpála bhú djila Ebhe. Aní ndjí vino de, aní ndjí di pandi na kpekpeke de. Aní abédhe ne Bu Bhobua me aní nde nga bha bhú 'bu 'hi e. <sup>16</sup> Aní agíe ongisi na Isalaele bhelé li pápá gba Ebhe, Ngámá gba o-o. <sup>17</sup> Aní adú amene kulu kala Ebhe bhú dabili bini ne bua di ne angu maka Polofeta Eliya. Aní aléke engú sūnda odyi ongisi ne ongisi gba o-o. Aní adjí mabhundja gba okpála na kpekpeke 'ndji, u tsia kólo ngbingbili,† ngubula naleke okpála inde bedhe pi Ebhe Ngámá.»

<sup>18</sup> Abhomu-o, Djakalia ayi andjelu-o me: «Ma ambila la lele pi me a ko kukulu 'ngú-o? Padhá de, anga ma agbe, wala ma akolo la di ne kalanga bhelé.» <sup>19</sup> Andjelu-o atsia agie pi aní me: «Ngama-a, ma ne Gabiele, ndu 'kpí hana ma dudu de Ebhe. Aní atima ma me ma go kpokpo bádha ngali inde-e pi mu. <sup>20</sup> Engú bini, li mu bhuka engú ma apa e pi mu-o lie de-e, kaka-a, 'bhe mu aní, mu tí da nagama 'ngú belegu de bini akólo li 'kpí li ongu angu-o améne lie lie ko. Engú inde améne lie na paká li nedhinga li Ebhe a'o e-o.»

<sup>21</sup> Li nedhinga bhomu-o, okpála adu adjeke Djakalia, u adu angamba ka aní adu abhue lie bhú 'ti Ebhe oo naali-o. <sup>22</sup> Aní akoto lie, aní ale nagama 'ngú pi uo pima. Abhomu-o, u atsia ambila me oo, aní au engú na ngangamba gba Ebhe-e au. Aní adu asuno 'ngú pi uo ne 'kpa e, aní ti da nagagama ne 'bhe e de.

<sup>23</sup> Li nedhinga na kulu gba aní andjia lie, aní atsia agie lie agba e. <sup>24</sup> Pita nedhinga bhomu-o, wala aní Alidjabheti atsia abi 'bhi. Aní awo nga bha lie ngubula epe bhuluvue libhому. Aní adu apa me: <sup>25</sup> «Tsia nga engú inde li Ngámá Ebhe amene e muma-o. Aní abhundja ma. Mbia inde-e, aní a'e ehe inde nako adu aha numu muma bhú ká djila okpála a'e.»

### *Andjelu akpo 'ngú pindji nazu Yesu*

<sup>26</sup> Li ebhi gba Alidjabheti akolo lie ne epe madhia-a, Ebhe atima andjelu Gabiele bhú kuti bini na ndu doto na Galilaya, inde 'li e me Nadjaleta.\* <sup>27</sup> Aní

atima aní gba tsangba bini inde adu adjeke naha lie ne bhoko bini. A adu 'li bhoko angu-o me Djodjefu, aní adu bhú piga gba 'ngbé ngámá Davidi. Tsangba angu-o, a adu 'li aní me Malia. <sup>28</sup> Andjelu-o ali agba aní, aní atsia ayi aní me: «Mu oo! Ngamu inde asia bádha bhú 'bu gba Ebhe-e, Ngámá Ebhe bhú dabili bini ne mu.» <sup>29</sup> Malia angamba ka eli bhomu-o naali. Aní adu ayi bua e me: «Ta nayi inde-e pi?» <sup>30</sup> Abhomu-o, andjelu-o atsia apa pi aní me: «Malia, mo odjé tsulu de, anga mo osia bádha bhú 'bu gba Ebhe-e asia. <sup>31</sup> Tsia nga, mo obí 'bhi, mu zú ndili na bhobhoko, mu tsia gísila 'li aní me Yesu. <sup>32</sup> Aní adú 'ngbé kpála, u tsia dú a'i aní me, Ndili gba Apí 'Kpí. Ebhe Ngámá a'ó me aní u maka ogbi e Davidi. <sup>33</sup> Aní aú dudu ma ne dudu ma pí piga gba omaIsalaele. Nau gba aní-e ndjia de.»

<sup>34</sup> Malia atsia ayi andjelu-o me: «Engú angu-o améne lie lele pi? Padhá de, anga ma kunda nga naama bhoko de!» <sup>35</sup> Andjelu-o agie pi aní me: «Bu Bhobua agó pí mu, li angu gba Ebhe Apí 'Kpí búku mu maka kulu zini. Kaka-a, ndili inde mo ozú e adu bubu, u atsia du a'i aní me, Ndili gba Ebhe. <sup>36</sup> Tsia nga okala mu Alidjabheti di ne ebhi. Aní azú ndili na bhobhoko, abana aní nde lie ne kalanga bhelé. Kpála nako u adu a'i e me izude-o. Mbia inde-e, ebhi gba aní-e ibili ne epe madhia, <sup>37</sup> anga kpéke da 'ngú pi Ebhe belegu ade bini.» <sup>38</sup> Abhomu-o, Malia atsia apa me: «Ma ne bali gba Ngámá. A ayo me ndu 'ngú mo opa e hana, a mene lie muma moko.» Pipita-a, andjelu-o atsia atapa.

### *Malia anu natsia Alidjabheti*

<sup>39</sup> Bha bhú oekpí bhomu-o, Malia ayie, aní anu má gala bhú kuti bini na ndu doto na ndu ká eta na Yudaya. <sup>40</sup> Aní akolo lie oo, aní ali bhú 'ti gba Djakalia, aní atsia ayi Alidjabheti. <sup>41</sup> Li Alidjabheti adje maka li Malia ayi aní lie me-e, ndili-e atsia atili bhú 'bu aní. Abhomu-o, Alidjabheti atsia abedhe ne Bu Bhobua. <sup>42</sup> Aní atsia

† **1:17** 1:17 Tsia bhú Mal. 3:23-24. \* **1:26** 1:26 Nadjaleta: Nayie bhú Yelusalema akólo bhú Nadjaleta-a, a ko kilometele kámá bini. Tsia bhú Luk. 1:19.

asula kpekpeke me: «Ebhe aha bisagu pi mu ane ndu olisi hana, bisagu gba ani-e di pi ndili inde mo ozu e-o! <sup>43</sup> Ma ne da me 'hi Ngama gba ma-a go tsia ma-a? <sup>44</sup> Tsia nga, li nedhinga inde ma adje maka mo oyi ma lie me-e, ndili inde bhú 'bu ma-atili ne djali hana. <sup>45</sup> A ko djali pi mu, ngamu elo inde abhuka! Padhá de, anga engu inde li Ebhe apa e pi mu-o, amene lie mamene.»

### *Etsi gba Malia*

<sup>46</sup> Abhomu-o Malia atsia atoko Ebhe me: «Bua ma ngadhogo Ngama,  
<sup>47</sup> bua ma abedhe ne djali pi Ebhe Mukobho gba ma-o,  
<sup>48</sup> anga ani abhundja ma, bali gba e-e ko. A moko, nayie pi mbia inde-e, ndu opiga hana adu a'i ma me, ma ne elo inde asia bisagu ka Ebhe,  
<sup>49</sup> anga Ebhe na Angu amene ongu na ngbengbengbe mu-ma. A ko Ebhe na bubu,  
<sup>50</sup> ndjinga gba ani-e ngadu duduma ne duduma pi okpala inde ngakpe ani ko.  
<sup>51</sup> Ani amene ngbengbe 'ngu ne angu gba e-o. Ani atsambala okpala na 'ngbe bua. Ani atsia amene me mabhundja gba uo-o kolo padhá.  
<sup>52</sup> Ani aké ongbengbe ongamasí ne kuto, ani atsia a'e'e okpala na padhá ne abhula.  
<sup>53</sup> Ani aha ehe bhelé pi obhende adu ne gumu-o, ani atsia agie obhulu tia ne 'kpa o padhá.  
<sup>54</sup> Ani ateteke omafala-ele, obalise gba e-o. Ani 'ili 'to e de li nasuno badha 'ngu gba e ndu 'kpi hana,  
<sup>55</sup> maka nani ani apa lie pi onguo ogbi ni Abalahama ne opiga gba e-o.»  
<sup>56</sup> Malia asi ne Alidjabheti masikpe de epe bata. Pipita-a, ani atsia agie lie agba e.

### *Alidjabheti azu Djaa*

<sup>57</sup> Li nedhinga nazu ka Alidjabheti akolo lie, ani atsia azu ndili na bhobhoko. <sup>58</sup> Li okpala inde asili kuti dengo ani-e, di ne

obhe na piga gba ani-e adje lie me, Ebhe adje bha ndju ndjinga ani-e, u atsia adu akpi djali bhú dabili bini ne ani.

<sup>59</sup> Pita poso bini-e, u ago ngu nato ndili-e bhú gandja. U adu akunda nagisila 'li 'dyi ani Djakalia. <sup>60</sup> Abhomu-o, 'hi ani atsia apa me: «A mo-o ade, adu 'li ani me Djaa.» <sup>61</sup> U atsia apa pi ani me: «Bhú piga gba mu-o, kpala bini inde ne 'ili bhomu-o ade.» <sup>62</sup> Abhomu-o, u atsia amene 'kpa o pi 'dyi ani ngu nayi ani me ani akunda me u gisila 'li ndili-e pi. <sup>63</sup> Djakalia amene 'kpa e pi uo me u go pi ni ne pala ndula, ani atsia aye pepé me: «A 'li ani me Djaa.» Ndu uo hana atsia angamba naali. <sup>64</sup> Bha li nedhinga bhomu-o, 'bhe ani abhulu, ani aholo nagama 'ngu, di ne nadhogo Ebhe. <sup>65</sup> Abhomu-o, ndu okpala hana inde asili kuti lingo uo-o, aholo adje tsulu. Ngali na engu ango-o atsia aya bhú ndu doto na ndu ka eta na Yudaya libhomu. <sup>66</sup> Ndu okpala hana inde adu adjedje-e, adu abhundja pepé, u atsia adu apa me: «Mbo! Ndili ango-o, adu-e maka da?» Angu gba Ebhe-e adu bha ndju bhú dabili bini ne ani.

### *Djakalia akpokpo ngbengbe 'ngu gba Ebhe*

<sup>67</sup> Djakalia, 'dyi ndili-e, abedhe ne Bu Bhobua. Abhomu-o, ani atsia aholo nakpokpo 'ngu maka polofeta me:  
<sup>68</sup> «A ayo me, u dhogo Ebhe, Ngama gba omafala-ele-o, anga ani abhundja okpala gba e, ani atsia agbegbe uo bhú bali.  
<sup>69</sup> Ani atima kpala na angu bini bhú piga gba Davidi, bali gba e, ngu nakobho ya.  
<sup>70</sup> A bhomu-o engu inde ani apa nani e didili bhú 'li obubu opolofeta gba e-o.  
<sup>71</sup> Ani apa nani me, ni akobho ni sa 'kpa ndu obhulu yala gba ni-e hana, di ne obhende ngakunda amene ni sisiti-o.  
<sup>72</sup> Ani adje ndjinga onguo ogbi ni, ani atsia abhundja di gandja na bubu gba e-o.  
<sup>73</sup> Silika nani inde ani atu e pi ogbi ni Abalahama-a,

- ani améne pi ní mamene.
- 74 Pita nakobho ní sa 'kpa obhulá yala ngubula me ní améne kulu pi ni ne tsulá de,
- 75 amba ní dhogè ni ne bua ní hana. Ní dū di bhú djila ni ngbingbili ndū 'kpí hana bhú mukobho gba ní-o.
- 76 Pi mū-o, ndika ma, u adú a'i mū me, polofeta gba Apí 'Kpí, anga mo onú kalanú ngú naleke kpadji gba Ebhe-o.
- 77 Mo osúno pi okpála gba ani-e me, ani a'é siti 'ngú inde bhú uo-o ma'e, ani tsia kóbho di uo.
- 78 A ko anga Ebhe gba ní-e abedhe ne ndjinga bedhe, kaka-a, ani atíma zi 'kpí pí ní maka zi 'ndji 'la na kèkpí.
- 79 Ani asúno lie pi obhende bhú biti di ne obhende ne tsulá kuo, ngubula me ní dhuku li kpadji na guo 'ngú .»
- 80 Ndili-e adū abhele, ani atsia adū asia kpéke bua. Ani adū nadū bhú omili bili akolo li 'kpí inde ani asuno lie lie mbámbá pi omaɓsalaele ko.

## 2

### *Malia azu Yesu (Tsia bhú Mat. 1:18-25.)*

- 1 Li nedhinga bhomū-o, Agosite, 'ngbé ngámá na Loma , aha líli me u ye 'li okpála hana inde píla doto gba ní-o.
- 2 Gina naye 'li okpála ango-o amene lie me Kiliniusi nde ne 'ngbé ngámá na Silia.
- 3 Ndū okpála hana adū anū me u ye 'li o. Abhomū-o, kpála ne kpála atsia anū bhú kuti u azu ani bhú e ko.
- 4 Djodjefu ayie bhú kuti na Nadjaleta, bhú ndu doto na Galilaya, ngú nanū bhú ndu doto na Yudaya, bhú kuti inde u a'i e me Beteleme. A ko bili inde u azu 'ngbé ngámá Davidi lie-o, anga ngaani makpe, ani dū nani bhú piga gba Davidi ko. 5 Ani anū oo me u ye 'li ni, bhú dabili bini ne Malia , òlè inde ani adū adjeke naha e ko. Òlè ango-o adū ne ebhi. 6 U adū lie abhú Beteleme-e, ekpí nazu ka ani atsia akolo.
- 7 Ani azu ndili na bhobhoko, gina ndili gba e ko. Ani agagala ani ne bongo , ani

atsia aseke ani bhú ehe nazu 'he gba onū, anga dabili dū pi uo bhú 'ti gba ogomago-o de.

### *Andjelu akpokpo bádha ngali pi omulila gba okandèlè*

8 Bha bhú ndu doto bhomū-o, omulila gba okandèlè adū asili abhú 'gu ngú nalila onū gba o-o. 9 Andjelu gba Ebhe-e akoto li uo. Sangu gba Ebhe-e asa uo ngbalina maka zi 'kpí. Abhomū-o, u atsia adje tsulá naali. 10 Engú bini, andjelu-o apa pi uo me: «Yi adjé tsulá de, anga ma ago akpokpo pi yi bádha ngali inde ahá djali naali pi ndū okpála hana. 11 Naki bhú kuti gba Davidi-e, u azu Mukobho pi yi. A ko Kilisito , Ngámá. 12 Yi tsia 'he inde yi ambila ani ka e ko: yi abháka ndje ndili u agagala e ne bongo, u atsia aseke e bhú ehe nazu 'he gba onū.» 13 Kolo má gala me-e, bhiti oandjelu ayie abhúlá, u ago abhaka andjelu bhomū, u atsia adū adhogè Ebhe me:

- 14 «Sangu pi Ebhe inde abhúlá, guo 'ngú gba ani-e dū píla doto pi okpála inde ani akunda o ko!»

### *Omulila anū abhú Beteleme*

15 Li oandjelu-o agie lio lie abhúlá-a, omulila atsia apa sūnda o me: «Ní nū kolo nga bha abhú Beteleme, amba ní u engú inde akolo oo, engú inde li Ebhe Ngámá asuno e pi ní ko.» 16 U anū bhú holo, u abhaka Malia, Djodjefu ne mboye ndili-e me u nde aseke ani bhú ehe nazu 'he gba onū. 17 U au ani lie, u atsia akpokpo 'ngú inde li andjelu apa e pi uo pindji mboye ndili bhomū-o. 18 Ndū okpála hana inde adje engú li omulila adū apa e-e, angamba naali. 19 La-a, pi Malia, ani adū alila ndū 'ngú bhomū-o hana li bua e ndjindji. Ani atsia adū abhundja pépé. 20 Pípita-a, omulila aholo nagie lio. U adū aha sangu pi Ebhe, u atsia adū di adhogè ani ngubula ndū 'ngú inde u adje e ne bhende u au e hana, anga ndūndū hana akodho 'kpí maka li andjelu-o akpokpo pi uo lie ko.

*U anū ne Yesu bhú 'ngbé 'ti Ebhe gba omaYuda*



21 Bhú ekpí na madjina pita nazu ani-e, li nedhinga nato ani bhú gandja akolo lie, u atsia agisila 'li ani me Yesu. A bhomu-o 'ili inde li andjelu asuno e kala me 'hi ani bi 'bhi ani-o.

22 Li nedhinga navulu lie pita nazu ka Malia akolo lie, maka li líli gba Moidje apa lie, u atsia anu ne ndili-e bhú Yelusalema ngú na'o ani sa 'kpa Ngámá. 23 Padhá de, anga u aye bhú líli gba Ngámá-a me: «Ndu ongisi na obhosibhosi na gigena hana, u a'ó uo kpí pi Ngámá.» 24 U atsia aha di makiso maka li líli gba Ngámá-a apa lie me: «A ayo naha bebhe bhisi. I du mo-o de-e, mu de ha ongisi bebhe bhisi.»\*

### *Simeona agie heni pi Ebhe ngú Yesu*

25 Bhú nedhinga bhomu-o, kpála bini adu nani bhú Yelusalema, a adu 'li ani me Simeo. A ko nani kpála na ngbing-bili, ani adu amanga Ebhe. Ani adu adjeke nedhinga li Ebhe a'é likabhu gba omaIsalaele lie ko. Bu Bhobua adu bhú dabili bini ne ani. 26 Abhomu-o, Bu Bhobua atsia apa nani pi ani me, kala nakpi ka ani-e, ani au ngaiza Masiya inde li Ngámá atima e-o. 27 Nedhinga li okpála inde azu Yesu ago ne ani lie ngú namene maka li líli apa lie li 'ngú gba ani-e, Bu Bhobua ato bhúla Simeo abhú 'ngbé 'ti Ebhe gba omaYuda. 28 Abhú 'ti Ebhe oo, ani aha ndili-o, ani abi ani sa 'kpa e, ani atsia agie heni pi Ebhe me:

29 «Ngámá, mbia inde-e, maka mo opa lie, mu ti da na'o ma, bali gba mu-o, me ma nu ne guo 'ngú,

30 anga ma au mukobho gba mu-o ne djila ma au.

31 Mukobho inde mo otima e kala ndu okpála hana-o.

32 Ani adú eke pi omupagano.

Ani tsia dú sangu gba omaIsalaele, okpála gba mu-o.»

33 'Dyi Yesu ne 'hi Yesu angamba naali ka engú inde u adu apa e li ani-o. 34 Simeo ayo me Ebhe tuko bisagu pí uo, ani atsia apa pi Malia, 'hi Yesu me: «Ebhe abhu ndili inde-e ngabula me okpála bhelé bhú

ká omaIsalaele li bhú mangimbo, amba Ebhe 'e'e matá okoko bhúlá. Ani adú ehe inde li Ebhe ngasuno e, li okpála bhelé tsia yála ani. 35 Kaka-a, ani agbé mabhundja inde awo lie li bua okpála bhelé-e bhú mbasu. La-a, pi mu makpe-e, likabhu adú bua mu maka ngise má puu!»

### *Ana, polofeta na øøø*

36 Polofeta bini na øøø adu di nani oo. A adu 'li ani me Ana, ndili gba Fanuele bhú piga gba Asela. Ani adu me ani nde agbe má dyuku! U amene nani ne bhoko gba e inde u aha lio ne e bhú ndili-e kalanga mananika. 37 Pita nakpi ka 'ko ani-e, ani atsia ato øøø. Li nedhinga bhomu-o, ani adu ibili ne kalanga ndjikpa madjina ne ká badha. Ani du ayie bhú 'ngbé 'ti Ebhe gba omaYuda-a de. Ani adu amene kulu lie pi Ebhe sukpe ne ngbikpi. Ani adu atse ezu ngú nayo Ebhe. 38 Bha li nedhinga bhomu-o, ngaani di-e, ani ago, ani atsia aholo adhøøø Ebhe. Ani aholo akpokpo 'ngú pindji ndili-e pi ndu okpála hana inde adu adjeke me Ebhe gbegbe okpála na Yelusalema bhú likabhu gba o ko.

### *U agie lio bhú Nadjaleta*

39 Li 'dyi Yesu ne 'hi Yesu andjia namene ndu 'ngú hana inde li líli gba Ngámá apa e lie, u atsia agie lio bhú ndu doto na Galilaya, bhú kuti gba o na Nadjaleta-o. 40 Ndili-e adu abhele, ani atsia adu abi angu. Imbilangu gba ani-e atsia adu di abhulu lie. Bádha bhú 'bu gba Ebhe-e atsia adu di bhú dabili bini ne ani.

### *Yesu bhú 'ngbé 'ti Ebhe gba omaYuda*

41 Ndu kalanga hana, okpála inde azu ani-e adu anú bhú Yelusalema ngú namene anokomia na Pasika. 42 Li ani akolo lie ne kalanga ndjikpa ne ká bhisi-e, u atsia anu ne ani bhú dabili bini maka u amemene lie ko. 43 Li anokomia andjia lie, u aholo agie lio. Engú bini, ndili-e Yesu atigala naae bhú Yelusalema me 'dyi ani ne 'hi ani nde mbila de. 44 U

† 2:23 2:23 Tsia bhú Eki. 13:2, 12. \* 2:24 2:22-24 Bhú líli gba omaYuda-a, i du nani me øøø nde azu-o, a ayo me ani nu ngaiza bhú 'ngbé 'ti Ebhe gba omaYuda, ani vulu lie, amba ani kolo bubu kala Ebhe. Tsia bhú Lev. 12:8.

adu abhundja lie me ani bhú dabili bini ne obi o na kpadji-e, u atsia adhuku ekpí bini libhomu. Pipita-a, u aholo nagili ani bhú ká opiga gba o di ne bhú ká obi o-o. <sup>45</sup> U u la ani lie de-e, u atsia agie lio bhú Yelusalema ngú nagili ani.

<sup>46</sup> Bhú 'kpí na bata-a, u abhaka ani bhú 'ngbé 'ti Ebhe gba omaYuda me ani nde adu bhú ká omusuno. Ani adu adje uo di ne nayiyi uo. <sup>47</sup> Ndu okpála inde adu adje ani-e hana, adu angamba naali ka imbilangu inde ani adu agie engú ne e ko. <sup>48</sup> Li okpála inde azu ani au ani lie, u angamba naali. 'Hi ani atsia ayi ani me: «Ndika ma, mo omene ya mo-o ka ni? Tsia nga ya ne 'dyi mu-o, ya adu igini agili mu me bua ya nde alu bha ndju abhú lá má gba!» <sup>49</sup> Engú bini, ani agie pi uo me: «Yi de ngagili ma ngú ni? Yi mbila igini de me, a ayo me ma du bhú 'ti gba 'dyi ma-a di?» <sup>50</sup> Engú bini, u mbila nani ta 'ngú inde ani adu apa e pi uo-o de.

<sup>51</sup> Pipita-a, ani atsia agie lie ne uo bhú Nadjaleta. Ani adu amene líli gba uo-o. 'Hi ani adu alila ndu 'ngú bhomu-o hana li bua e ndjindji. Ani atsia adu abhundja pépé. <sup>52</sup> Yesu adu abhele, imbilangu gba ani-e adu di abhulu lie. Engú inde ani adu amene e bhú bádha bhú 'bu gba Ebhe-e, a adu anga li Ebhe, di ne li okpála naali.

### 3

*Kulu gba Djaa bhulu nabatisa okpála (Tsia bhú Mat. 3:1-12; ne bhú Mlk. 1:1-8; di ne bhú Dja. 1:19-28.)*

<sup>1-2</sup> Pipita-a, Tibeles akolo 'ngbé ngámá na Loma . Bhú kalanga na ndjikpa ne ká bhuluvue bhú nau gba ani-e, Djaa ndili gba Djakalia, inde adu nani adu abhú 'gu-o, asia eli gba Ebhe . Nedhinga ango-o, Pose Pilate adu alila ndu doto na Yudaya. Elode adu ngámá na ndu doto na Galilaya. Ndai ani Filipino atsia adu ngámá na ndu doto na Itule ne Talakonite. Lisiansi atsia adu naae ngámá na Abilene. Bhú nedhinga bhomu-o, Ana ne uo ne Kaifa atsia adu obhelesi okpála gba odimandé gba Ebhe . <sup>3</sup> Abhomu-o, Djaa aholo

adhuku bhú 'gu lingo ngade 'ngu na Djuludani, ani atsia adu atotobhila me: «Yi dji bua yi, yi sia batisimo, amba Ebhe 'e siti 'ngú gba yi ko.» <sup>4</sup> Maka li polofeta Isaya, aye lie bhú bhuku gba e me:

«A ko kpála bini inde ngatotobhila abhú 'gu me:

<Yi leke kpadji pi Ngámá,  
yi li okpadji pi ani ngbingbili!

<sup>5</sup> Ndu tsutsukudhu bili sunda ongba 'ta hana abédhe lie.

Ndu oeta na ngbengbengbe ne obhe na djedjedje hana adjí lie,  
i kólo má gbata gbata!

Ndu kpadji na gagala hana akólo ngbingbili.

Okpadji na sisiti akólo babadha.

<sup>6</sup> Li ndu okpála hana tsia ú maka li Ebhe ngakobho okpála lie kol!†»

<sup>7</sup> Abhomu-o, okpála bhelé adu ago abhaka Djaa ngubula nasia batisimo. Ani atsia adu ayi uo me: «Ngayi opiga kpulu inde-e! A asuno pi yi da me yi kpe mangimbo gba Ebhe inde ngago-o? <sup>8</sup> I du mo-o, yi mene engú inde asuno me yi adji bua yi kukulú! Yi adu abhundja bha li bua yi de me, Abalahama ne ogbi yi. Padhá de, anga ma apa pi yi na paká me, teme yi ngau e inde-e, Ebhe tí da nadjidji, i tsia kólo odi Abalahama! <sup>9</sup> Maka ma ngapapa lie inde-e, u a'o ngbakpa bhú li ndula-a ngú nadede a'o. Ndu ndula hana inde i li líli na babadha de-e, u adé, u tsia bhike bhú djua.»

<sup>10</sup> Abhomu-o, okpála ango-o atsia adu ayi ani me: «I du mo-o, a ayo me ya mene pi?» <sup>11</sup> Ani atsia adu agie pi uo me: «Kpála bhende li bongo na mbulu nde ka e bhisi-e, a ayo me ani ha bini pi kpála bhende li bongo na mbulu nde ka e ade ko. Kpála bhende li ezú nde ka e-e, a ayo me ani ha di mbo pi kpála bhende li ezú nde ka e ade ko.» <sup>12</sup> Ondombi na mandjandja ago di ngú nasia batisimo, u atsia ayi ani me: «Musuno, a ayo me ya mene pi?» <sup>13</sup> Ani atsia agie pi uo me: «Yi ayó tia ane bhende li líli aziba e de.» <sup>14</sup> Osudha atsia ayi di ani me: «A la ya-a, a ayo me ya mene naaya pi?» Ani atsia agie

† 3:6 3:4-6 Tsia bhú Isa. 40:3-5.

pi uo me: «Yi agbúlú tia ka kpála bini ne kpéke, di ne eu de. Engú bini, yi mbíla bha tia na kulu gba yi ko.»

<sup>15</sup> Maka li okpála adu adjeke nago ka Masiya lie, u atsia adu ayi lio li bua o pindji Djaa me: «A ko ndi-e Masiya inde li Ebhe atima e di?» <sup>16</sup> Djaa atsia agie pi ndu uo hana me: «Ngama-a, ma ngabatisa naama yi ne engu. Engú bini, a ngago pita ma ne kpála. Kpála ango-o ane ma ne angu. Ma belegu ne tetele kpála ade ngubula me ma bhulu ekpu na maloke gba ani-o.\* Ani abátisa yi ne Bu Bhobua di ne djua. <sup>17</sup> Ani aholo kakpa gba e sa 'kpa e ngu nape nguwa gba e-o. Ani apó bhúla nguwa na babadha gba e bhú ngbokopi, engú la bini, ani tsia bú fufukudha-a bhú djua inde li kpála bini ti da nabulu e de.»

<sup>18</sup> Djaa aha nani líli koko bhelé pi okpála. Bhúbhú-o, ani atsia adu akpokpo Bádha Ngali gba Ebhe-e pi uo. <sup>19</sup> Ngámá Elode aha nani Elodiade, olo gba ndai e-o.† Ani amene nani matá di osisiti 'ngú koko bhelé. Kaka-a, Djaa atsia ambe bhú 'ndji ani. <sup>20</sup> Abhomu-o, Elode amene matá siti 'ngú koko pépé, ani aha Djaa, ani atsia abhike ani bhú tikpu.

### *Djaa abatisa Yesu*

*(Tsia bhú Mat. 3:13-17; di ne bhú Mlk. 1:9-11.)*

<sup>21</sup> Kala me Djaa li bhú tikpu-o, ani abatisa ngaiza ndu okpála hana. Abhomu-o, Yesu atsia asia di batisimo. Nedhinga li Yesu adu akpokpo 'ngú ne Ebhe lie, kokpi abhulu lie, <sup>22</sup> u au Bu Bhobua ngaké pí ani maka bebhe. U atsia adje eli ayie abhúlá apa me: «Mu ne ndili gba ma na mukunda. Djali li bua ma ngu mu naali.»

### *Onguo ogbi Yesu*

*(Tsia bhú Mat. 1:1-17.)*

<sup>23</sup> Yesu akpo nani lita kulu gba e me ani nde ne kalanga masikpe de ndjikpa bata. Okpála adu abhundja naao me, a ko ndili gba Djodjefu .

Djodjefu ndili gba Eli,

<sup>24</sup> Eli ndili gba Matati,  
Matati ndili gba Levi,  
Levi ndili gba Maleki,  
Maleki ndili gba Djanai,  
Djanai ndili gba Djodjefu ,  
<sup>25</sup> Djodjefu ndili gba Matatiasi,  
Matatiasi ndili gba Amosi,  
Amosi ndili gba Nauma,  
Nauma ndili gba Eseli,  
Eseli ndili gba Nagai,  
<sup>26</sup> Nagai ndili gba Mata,  
Mata ndili gba Matatiasi,  
Matatiasi ndili gba Semeini,  
Semeini ndili gba Djoseke,  
Djoseke ndili gba Djoda,  
<sup>27</sup> Djoda ndili gba Yoanana,  
Yoanana ndili gba Lesa,  
Lesá ndili gba Djelubabela,  
Djelubabela ndili gba Salatiele,  
Salatiele ndili gba Neli,  
<sup>28</sup> Neli ndili gba Maleki,  
Maleki ndili gba Adi,  
Adi ndili gba Kosama,  
Kosama ndili gba Elemadama,  
Elemadama ndili gba Ele,  
<sup>29</sup> Ele ndili gba Yesu,  
Yesu ndili gba Eliedjele,  
Eliedjele ndili gba Djolime,  
Djolime ndili gba Matati,  
Matati ndili gba Levi,  
<sup>30</sup> Levi ndili gba Simeo,  
Simeona ndili gba Yuda,  
Yuda ndili gba Djodjefu ,  
Djodjefu ndili gba Djonama,  
Djonama ndili gba Eliakime,  
<sup>31</sup> Eliakime ndili gba Melea,  
Melea ndili gba Mena,  
Mena ndili gba Matata,  
Matata ndili gba Natana,  
Natana ndili gba Davidi,  
<sup>32</sup> Davidi ndili gba Yese,  
Yese ndili gba Obede,  
Obede ndili gba Boadja,  
Boadja ndili gba Salamona,  
Salamona ndili gba Nasone,  
<sup>33</sup> Nasona ndili gba Aminadaba,  
Aminadaba ndili gba Adimina,

\* **3:16** 3:16 Nani agba omaYuda-a, kulu nagbe maloke bhú 'dhu ogomago ne navulu 'dhu uo-o, a ko nani kulu ka obalise di ne okpála na padhá. † **3:19** 3:19 Filipo ne ndai Elode nani inde abhelo Djaa bhulu nabatisa okpála ko. A adu nani me Filipo nde kpi nga de. Tsia bhú Lev. 20:21.

Adimina ndili gba Aluni,  
 Aluni ndili gba Edjelone,  
 Edjelone ndili gba Peledje,  
 Peledje ndili gba Yuda,  
<sup>34</sup> Yuda ndili gba Yakobho,  
 Yakobho ndili gba Isaka,  
 Isaka ndili gba Abalahama,  
 Abalahama ndili gba Tela,  
 Tela ndili gba Naola,  
<sup>35</sup> Naola ndili gba Seluga,  
 Seluga ndili gba Lagau,  
 Lagau ndili gba Pelege,  
 Pelege ndili gba Ebele,  
 Ebele ndili gba Sela,  
<sup>36</sup> Sela ndili gba Kainame,  
 Kainame ndili gba Alepakasada,  
 Alepakasada ndili gba Seme,  
 Seme ndili gba Nua,  
 Nua ndili gba Lemeke,  
<sup>37</sup> Lemeke ndili gba Matusalema,  
 Matusalema ndili gba Enoka,  
 Enoka ndili gba Yelede,  
 Yelede ndili gba Malalele,  
 Malalele ndili gba Kenana,  
<sup>38</sup> Kenana ndili gba Enosa,  
 Enosa ndili gba Sete,  
 Sete ndili gba Adamu ,  
 Adamu ndili gba Ebhe.

#### 4

##### *Djabulu ale Yesu*

(*Tsia bhú Mat. 4:1-11; di ne bhú Mlk. 1:12-13.*)

<sup>1</sup> Pita li Yesu abedhe lie ne Bu Bhobua-a , ani ayie lingo 'ngu na Djuludani, Bu Bhobua atsia amba bhúla ani abhú mili bili. <sup>2</sup> Oo, Djabulu ale ani ngubula ekpí ndjikpa badha. Bhú oekpí bhomu-o, ani zu 'he de. Pipita-a, gumu aholo amene ani. <sup>3</sup> Abhomu-o, Djabulu atsia apa pi ani me: «I du me mu nde ne Ndili gba Ebhe-e, pa pi teme inde-e me a dji lie, amba a kolo ezu.» <sup>4</sup> Yesu agie pi ani me: «Eli gba Ebhe-e apa me: <Kpála kóbho bha bini ka ezu de.†>»

<sup>5</sup> Djabulu aha ani, anu ne ani apí 'ta. Ani asuno ndu ondende na doto pi ani hana, bhú nedhinga bedi bhomu. <sup>6-7</sup> Ani

atsia apa pi ani me: «Ebhe aha ndu angu, ne otia na ondende bhomu-o hana mu ma. Ma ti da nahaha pi kpála inde ma akunda nahaha pi e. I du me mu nde akikita lipuku mu kuto kala ma-a, ma ahá ndu angu ne otia na ondende bhomu-o hana pi mu.» <sup>8</sup> Yesu atsia agie pi ani me: «Eli gba Ebhe-e apa me:

<Dhөгө Ebhe Ngámá gba mu,  
 amba mu toko bha bini ani kpi e  
 kpi.†>»

<sup>9</sup> Pipita-a, Djabulu aha ani, anu ne ani abhú Yelusalema. Ani a'o ani apí tulundji 'ngbé 'ti Ebhe gba omaYuda, ani atsia apa pi ani me: «I du me mu nde bha ndju ne Ndili gba Ebhe-e, 'ulu, mu ke kuto, <sup>10</sup> anga eli gba Ebhe-e apa me:

<Ebhe ahá líli pi oandjelu gba e me, u lila  
 mu.†>

<sup>11</sup> La di matá:

<U abí mu sa 'kpa o, amba mo otú 'dhu  
 mu li teme de.†>»

<sup>12</sup> Yesu atsia agie pi ani me: «Eli gba Ebhe-e apa la di me: <Mo olé Ebhe Ngámá gba mu-o de.†>»

<sup>13</sup> Pita li Djabulu andjia nale Yesu lie ne ndu kpadji hana-a, ani atsia a'o ka ani ngu nadjeke nedhinga koko.

##### *Yesu agie lie bhú Galilaya*

(*Tsia bhú Mat. 4:12-17; di ne bhú Mlk. 1:14-15.*)

<sup>14</sup> Abhomu-o, Yesu atsia agie lie bhú ndu doto na Galilaya, bhú angu gba Bu Bhobua. Ndu okpála hana aholo nakpokpo 'ngu gba ani-e bhú ndu doto bhomu-o libhomu. <sup>15</sup> Ani adu asuno bhú oeti gba uo nadje líli gba Moidje-o . Ndu okpála hana atsia adu adhөгө ani.

##### *Yesu anu bhú Nadjaleta*

(*Tsia bhú Mat. 13:53-58; di ne bhú Mlk. 6:1-6.*)

<sup>16</sup> Pipita-a, ani atsia anu bhú Nadjaleta, kuti inde ani abhele bhú e-o. Li 'kpí nago gba omaYuda-a , ani ali bhú 'ti nadje líli gba Moidje maka ani adu amemene lie ko. Ani ayie bhúla ngu natanga eli gba Ebhe-e pi okpála.

<sup>17</sup> Abhomu-o, u atsia aha bhuku gba

† 4:4 4:4 Tsia bhú Det. 8:3. † 4:8 4:8 Tsia bhú Det. 6:13. † 4:10 4:10 Tsia bhú Ets. 91:11. † 4:11 4:11 Tsia bhú Ets. 91:12. † 4:12 4:12 Tsia bhú Det. 6:16.

polofeta Isaya pi ani. Ani abhulu bhuku-o, ani atsia agili bili u aye lie me:

<sup>18</sup> «Bua gba Ngámá-a bhú dabili bini ne ma.

Ani abhu ma ngú nanu nakpokpo Bádha Ngali pi obhulu ndibhili.

Ani atima ma ngú natobhila pi obalise me, u azé bhú bali gba o-o maze, pi okpála i u 'kpí de-e me, u aú matá 'kpí mau.

Ani atima ma di ngú napandja obhende bhú mbolo sa 'kpa obhende ngato mbolo li uo-o.

<sup>19</sup> Ngama-a, ma akpókpo pi okpála me nedhinga inde li Ebhe adjé ndjinga uo lie akolo.†»

<sup>20</sup> Pita li Yesu andjia natatanga lie, ani agagala bhuku-o, ani atsia agie pi kpála na kulu-o. Abhomu-o, ani aha lie adu kuto. Ndu okpála inde adu bhú 'ti oo hana abanga djila o li ani. <sup>21</sup> Ani atsia aholo napa pi uo me: «Engú inde yi adje e bhú Bhuku gba Ebhe-e li bili bhomu-o, amene lie naki amene.» <sup>22</sup> Ndu okpála hana adu angamba li Yesu naali. U atsia adu aziba eli na bádha bhú 'bu inde ani adu akpokpo e-o. Abhomu-o, u atsia adu apa me: «A inde-e ndili gba Djodjefu-o di?»

<sup>23</sup> Abhomu-o, ani atsia apa pi uo me: «Ma ambila na paká me yi apá muma gbitaku inde me: <Mütia, kobho limu ne titi mu.> Yi tsia pá di muma me: <Ya adje ndu 'ngú inde mo omene e bhú Kapalanauma-a hana. Mene nga la di ngua 'ngú angoo bhú kuti mo obhele bhú e ko.>» <sup>24</sup> Ani atsia apa matá pipita-a me: «A moko, ma apa pi yi me, a ko kukulu 'ngú, okpála ziziba polofeta bhú kuti gba e belegu de bini.

<sup>25</sup> Ma apa pi yi na paká me, oekesi na olisilisi adu nani bhelé bhú ká omafalaale li nedhinga gba polofeta Eliya. Li nedhinga bhomu-o, ebha dhi nani-i de ngubula kalanga bata ne epe madhia. Kaka-a, adyindi na ngbéngbé atsia ali bhú doto angoo libhomu. <sup>26</sup> Engú bini, Ebhe tima nani Eliya ngú nateteke suka oekesi bhomu-o bini de. Ani atima bha bini ani gba oko bini na gandji kuti na

Salepeta bhú ndu doto na Sidona. <sup>27</sup> Matá-a, okpála na kába adu di nani bhelé bhú ká omafalaale li nedhinga gba polofeta Elisa. Engú bini, Ebhe kobho nani suka uo de, bha bini Namana, gandji kpála na Silia.»

<sup>28</sup> Li ndu okpála hana inde adu bhú 'ti oo adje 'ngú bhomu-o lie, u ake 'ngú lio naali. <sup>29</sup> U ayie bhú lá, u agbe ani bhú 'ti bhomu-o, u agbele ani apí 'ta inde u ayiki gudhu gba o pí e-o. U amene nani mo-o ngú nandjimba ani akuto. <sup>30</sup> Engú bini, ani akodho bha 'kpí bhú ká uo oo, ani atsia atapa.

*Yesu akobho kpála li siti bua adu ato mbolo lie*

*(Tsia bhú Mlk. 1:21-28.)*

<sup>31</sup> Abhomu-o, Yesu anu bhú Kapalanauma, kuti bini na ndu doto na Galilaya. Ani atsia adu asuno pi okpála bhú 'kpí nagu gba omaYuda-o. <sup>32</sup> U adu nangamba li ngua nasuno gba ani-o, anga ani adu nasuno ne angu gba Ebhe. <sup>33</sup> Bhú 'ti nadge líli gba Moidje oo, kpála bini li siti bua adu nato mbolo lie, aholo asusula kpekpeke me: <sup>34</sup> «Aa! Yesu, kpála na Nadjaleta, mo okunda namene ngú ya pi? Mo ogo ngú nabhili ya? Ma mbila mu hana, mu ne kpála na bubu inde li Ebhe atima e ko!» <sup>35</sup> Yesu atsia ambe bhú 'ndji ani me: «Gbite 'bhø mu, amba mu koto la di bhú kpála bhomu!» Siti bua-a agu 'i kpála angoo kuto má gbwe, bhú ká djila ndu okpála inde adu oo hana. Ani akoto bhú ani, engú bini ani mene ani sisiti de. <sup>36</sup> Ndu okpála hana angamba, u atsia adu ayi lio sunda o me: «A inde-e mangua eli dho? Ani ngaha líli ne kpéke, di ne angu pi osisiti bua, uo ngaze bhú okpála!» <sup>37</sup> Okpála atsia adu apa 'ngú gba Yesu-o bhú ndu okuti bhomu-o hana.

*Yesu akobho okpála bhelé na kuo*

*(Tsia bhú Mat. 8:14-17; di ne bhú Mlk. 1:29-34.)*

<sup>38</sup> Li Yesu ayie lie bhú 'ti nadge líli gba Moidje-e, ani atsia anu ali bhú 'ti gba Simo. A abhaka me a nde li 'hi wala Simo ne kpéke bandji. Abhomu-o, u atsia ayo

† 4:19 4:18-19 Tsia bhú Isa. 61:1-2.

ka Yesu me ani kobho ani. <sup>39</sup> Ani ago ala pi ani, ani ambe bhú 'ndji bandji-o. Abhomu-o, bandji-e atsia ayie li ani. Ani ayie bhúlá kolo má gala, ani atsia aholo nalá 'zu pi uo.

<sup>40</sup> Li ela ati lie, ndu okpála hana inde adu ne okpála na kuo ngangá agba o-o, abha uo, u atsia ago ne uo pi Yesu. Ani a'o 'kpa e pí 'ndji uo bini ne bini, u atsia akobho ndu o hana. <sup>41</sup> Osisiti bua aze di bhú okpála na kuo bhelé. Osisiti bua ango-o atsia adu asusula me: «Mú ne Ndili gba Ebhe!» Engú bini, Yesu adu ambe bhú 'ndji uo. Ani atsia adu di agbite kpadji pi uo me u agama 'ngú de, anga u adu ambila hana me a ko Masiya inde li Ebhe atima e ko.

*Yesu akpokpo Bádha Ngali bhú ndu doto na Yudaya*

*(Tsia bhú Mlk. 1:35-39.)*

<sup>42</sup> Li ekpí aseke lie, ani akoto bhú kuti bhomu, ani atsia atapa bhú mili bili. Bhiti okpála aholo nagili ani. U au ani lie, u aholo akikiliki lío pi ani me: «Mo o'ó ká ya de, ní tigala ne yi si-i.» <sup>43</sup> Engú bini, Yesu apa pi uo me: «A ayo me ma anu di nakpokpo Bádha Ngali Nau gba Ebhe-e bhú okuti koko, anga Ebhe atima ma ngánga.» <sup>44</sup> Abhomu-o, ani atsia adu akpokpo Bádha Ngali bhú oti nadje líli gba Moidje na ndu doto na Yudaya-o.

## 5

*Yesu a'i omukpata na gina*

*(Tsia bhú Mat. 4:18-22; di ne bhú Mlk. 1:16-20.)*

<sup>1</sup> A akolo ekpí bini, Yesu adu lingo ekpe na Genedjaleta.\* Bhiti okpála asulu de ani má wakaka ngú nadje 'li Ebhe. <sup>2</sup> Ani au zabu bhisi lingo 'ngu me obhubhulu-o nde aze, u nde ngavulu onado gba o na sungu-o. <sup>3</sup> Yesu atsia a'u bhú susuka bini, bhende gba Simo-o. Do ani pi Simo me: «Yie lingo 'gø-o, amba mu dyudyo limu mbo ne abhú 'ngu.» Yesu atsia adu bhú zabu-o kuto. Ani aholo nasuno pi bhiti okpála bhomu-o. <sup>4</sup> Ani andjia nagama 'ngú lie, ani atsia apa pi Simo me:

«Dyudyo zabu-o apí tsiba, amba ngayi ne obi mu-o, yi bala onado gba yi-e bhú 'ngu ngú naholo osungu-o.»

<sup>5</sup> Simo agie pi ani me: «Musuno, ya amene kulu sukpe inde-e libhomu, ya holo belegu sungu de bini. Engú la bini, ka 'li mu-o, ya abhíke onado-o bhú 'ngu mabhike.» <sup>6</sup> U abala onado lie bhú 'ngu-o, u atsia aholo osungu bhelé. Kaka-a, onado gba uo-o aholo natsotsolo. <sup>7</sup> Abhomu-o, u amene 'kpa o pi obi o inde adu bhú zabu koko ngú na'i uo me, u go ha mbo 'kpa o pi o. Obhobhomu-o ago, u abebedhe ozabu bhisi-e ne osungu bedhebedhe. Kaka-a, ozabu atsia aholo nalinda bhú 'ngu.

<sup>8</sup> Li Simo Piele au lie mo-o, ani ati bhú li 'dhu Yesu, ani atsia apa me: «Ngámá, gbe limu de ma ne sidi, anga ma ne siti kpála!» <sup>9</sup> Ani apa mo-o, anga ngauo ne obi e, u angamba nani naali ka bhiti osungu inde u aholo e ko. <sup>10</sup> Djaki ne Djaa, ongisi gba Djebedayo inde adu amene bhú dabili bini ne Simo-o, angamba bhadi moko. Engú bini, Yesu apa pi Simo me: «Mo odjé tsulu de, anga nayie pi mbia inde-e, mu dú matá agili osungu de, engú bini, mo odú ibili agili okpála pi Ebhe.» <sup>11</sup> Abhomu-o, u agbele ozabu gba o apí 'gø. U a'o ka ndu 'he gba o hana, u atsia anu bhú dabili bini ne Yesu.

*Yesu akobho kpála na kába*

*(Tsia bhú Mat. 8:1-4; di ne bhú Mlk. 1:40-45.)*

<sup>12</sup> A akolo ekpí bini, Yesu adu bhú kuti bini na ndu doto na Galilaya, kpála bini inde li kába atsotsolo kute e hana-a, akoto. Li ani au Yesu lie, ani ago ati kala ani, ani atu bhúla e ne kuto, ani atsia alopole lie pi ani me: «Ngámá, i du me mu nde akunda-a, mu ti da nakobho ma.» <sup>13</sup> Yesu aha 'kpa e a'o li ani. Ani atsia apa me: «Ma akunda moko, kokobho!» Abhomu-o, kába agulu bha kolo li kute kpála ango-o hana maka ndjombe. <sup>14</sup> Yesu atsia aha líli pi ani me: «Mo opá belegu engú inde-e pi kpála bini de. Engú bini, nu suno bha limu pi dimandø gba Ebhe maka li

\* 5:1 5:1 Genedjaleta: A ko 'ili koko na ekpe na Galilaya. Tsia bhú Mlk. 6:53.

kute mu nde lie ko. Pipita-a, amba mu ha makiso maka li lili gba Moidje apa lie, ngubula napana pi ndu okpala hana me mo okobho.»<sup>15</sup> Abana mo-o, engu gba Yesu adu bha ayangba ne kalanu. Okpala bhelé adu ago apo bhula o de ani ngu nadjé ani, ne di me ani kobho o ne okuo gba o-o.<sup>16</sup> Engu la bini, ani adu anu bhú omili bili. Oo, ani atsia adu akpokpo 'ngu ne Ebhe.

*Yesu akobho dukuto*

*(Tsia bhú Mat. 9:1-8; di ne bhú Mlk. 2:1-12.)*

<sup>17</sup> Ekpí bini, Yesu adu asuno pi okpala. Omufalaisai koko ne omusuno na lili gba Moidje inde ayie nani bhú ndu okuti hana na ndu doto na Galilaya ne Yudaya, di ne bhú 'ngbé gudhu na Yelusalema adulu de ani. Ne angu gba Ebhe-e, ani atsia adu akobho okpala na kuo.<sup>18</sup> Li nedhinga bhomu-o, okpala koko ago ne dukuto bini me u nde abi ani pi kalagba. U adu nagili kpadji ngu nato ani abhu 'ti, amba u 'o ani kala Yesu.<sup>19</sup> Engu bini, u ale nali ne ani abhu 'ti pima ka li okpala adu lie bhelé-o. Abhomu-o, u atsia a'hu ne ani api 'ngbu 'ti. U adu gudho li 'ngbu 'ti-e má vuu! U atsia aké ani ne ekpu tété ne kalagba gba e hana bhú ka okpala kala Yesu.<sup>20</sup> Li Yesu ambila lie me okpala bhomu-o abhuka ni na paká-a, ani atsia apa pi kpala na kuo-o me: «Olia ma, ma a'e osisiti 'ngu gba mu-o a'e.»

<sup>21</sup> Li omusuno na lili di ne omufalaisai adje 'ngu bhomu-o lie, u atsia aholo nabhundja me: «Kpala inde ngasobho Ebhe me-e, a ko nga naae da? A ti da na'e siti 'ngu gba okpala da, bha bini Ebhe ngae kpi e kpi di?»<sup>22</sup> Yesu ambila mabhundja gba uo lie, ani apa pi uo me: «Yi ngabhundja li bua yi mo-o ka ni? <sup>23</sup> Ne napa me, <Ma a'e osisiti 'ngu gba mu a'e>, ne napa me, <Yie bhula, amba mu dhuku-o> a ane ne bhuku ne bhedho? <sup>24</sup> Engu bini, ma akunda me yi mbila me ngama, Ndili gba kpala-a, ma ne angu pila doto ngu na'e siti 'ngu.» Abhomu-o, Yesu atsia apa pi dukuto-o me: «Ma apa pi mu me yie bhula, ha dabili gba mu-o, amba mu

gie limu agba mu!»<sup>25</sup> Kolo má gala me-e, kpala bhomu ayie bhula bhú ka djila ndu okpala hana, ani aha dabili inde ani de asi pi e, ani atsia agie lie agba e me ani nde ngadhogo Ebhe.<sup>26</sup> Ndu okpala hana adu angamba naali. U abedhe ne tsulu bedhe, u adu adhogo Ebhe, u atsia adu apa me: «Ya au naki ongu na ngangamba!»

*Yesu a'i Levi*

*(Tsia bhú Mat. 9:9-13; di ne bhú Mlk. 2:13-17.)*

<sup>27</sup> Pipita-a, Yesu akoto kilidjo, ani atsia au ndombi bini na mandjandja, adu 'li ani me Levi,<sup>†</sup> ani nde adu kuto bhú bilo gba e-o. Yesu apa pi ani me: «Kpata ma.»<sup>28</sup> Levi ayie bhula, ani a'o ka ndu 'he hana, ani atsia akpata Yesu.

<sup>29</sup> Pipita-a, Levi atsia amene 'ngbé anokomia pi Yesu abhu 'ti gba e. Ondombi na mandjandja bhelé di ne okpala koko adu nazu 'he ne uo bhú dabili bini.<sup>30</sup> Omufalaisai di ne omusuno na lili gba o adu nadi mutokono, u atsia ayi omukpata gba Yesu-o me: «Ka ni yi ngazu 'he ne nandji vino lie bhú dabili bini ne ondombi na mandjandja di ne okpala na sisiti-e?»<sup>31</sup> Yesu atsia agie pi uo me: «Okpala bhende li kuo nde li o ade-e, u ne gumu mutia ade. Engu bini, obhende inde li o ne kuo ne gumu mutia ngao.<sup>32</sup> Ma go ngu na'i okpala bhende ngbingbili-e de. Engu bini, ma ago ngu na'i obhende na sisiti-o, ngubula me u dji bua o.»

*Yesu akpo 'ngu pindji natse ezu ngu nayo Ebhe*

*(Tsia bhú Mat. 9:14-17; di ne bhú Mlk. 2:18-22.)*

<sup>33</sup> Okpala bhomu-o apa pi ani me: «Omukpata gba Djaa di ne obhende gba omufalaisai ngatse ezu piko ngu nayo Ebhe. Engu bini, obhende gba mu-o la bha naao ngazu 'he ne nandji vino.»<sup>34</sup> Yesu agie pi uo me: «Yi abhundja naayi me yi ti da naholo omaha 'ko elo ne kpeke ngu natse ezu me 'ko elo-o nde nga bha bhú dabili bini ne uo? <sup>35</sup> Nedhinga koko akolo makolo, nedhinga inde li okpala

<sup>†</sup> 5:27 5:27 Levi: A ko 'ili koko gba Matié.

adhépe 'ko elə-o lie bhú ká uo-o. Li oekpí ango-o, u tsia tsé la 'zə.»

<sup>36</sup> Yesu atsia aha di gbitaku inde-e pi uo me: «Kpála bini tí da nasidha bongo na mbia, ani tsia há pápála-a ngú nadudu li bongo na didili de. Ani mene mo-o, li bongo na didili-e sídha, la di-e, pála bongo na mbia lé ne bhe na didili-e de.

<sup>37</sup> Kpála bini tí da na'o vino na mbia bhú odidili dhudhu na ko 'nə de. Ani mene mo-o, li vino na mbia bí 'fu, i úpa odidili dhudhu-o. Pandi-e túko, li odhudhu-o tsia síti di. <sup>38</sup> Engú bini, a ayo na'o vino na mbia bhadi bhú odhudhu na mbia!‡ <sup>39</sup> † du me kpála bini nde andji pandi na didili andji-e, ani kúnda matá pandi na mbia de, anga ani pá me: «Pandi na didili-e ane ne bádha.»»

## 6

*Yesu aziba me ni ne ngámá pí 'ndji ekpí naguo gba omaYuda*

*(Tsia bhú Mat. 12:1-8; di ne bhú Mlk. 2:23-28.)*

<sup>1</sup> Ekpí bini naguo gba omaYuda-a, Yesu ne oməkpatá gba e adu akodho 'kpí bhú ngu 'zə inde u a'i e me ngano. Oməkpatá gba ani-e aholo akodho 'ndji 'ndji, atutuluba sa-tikpa o, u atsia adu nazuzə.\* <sup>2</sup> OməFalisai koko ayi uo me: «Yi ngamene bhomu-o ni? Líli gba ní-e ziba namene kulu bhú 'kpí naguo de.»

<sup>3</sup> Yesu atsia agie pi uo me: «Yi atanga ndjindji bhú Bhuku gba Ebhe-e, engú nani li Davidi amene e? Ekpí bini, ngaani ne omaha e, u adu lie ne gumu-o, <sup>4</sup> ani ali nani bhú 'ti Ebhe. Ani aha mapa inde u a'o e ngú nadhəgə Ebhe-e, ani azə. Ani atsia aha di pi omaha e, abana li líli gba ní-e apa lie me azú bha mapa ango-o ne odimandə-o.» <sup>5</sup> Yesu atsia apa matá pi uo me: «Yi mbila me ngama, Ndili gba kpála-a, ma ne ngámá pí 'ndji ekpí naguo.»

*Yesu akobho kpála li 'kpa e adu ne eze*  
*(Tsia bhú Mat. 12:9-14; di ne bhú Mlk. 3:1-6.)*

‡ 5:38 5:38 Yesu akúnda napa bhomu-o me, u ti da na'o nasuno gba ni na mbia pí bhe gba oməFalisai-e de.

\* 6:1 6:1 Agba omaYuda-a, i du me kpála nde ngakodho ngano-o, amba ani ngamene bhomu-o kulu. La-a, líli gba uo-o ziba namene kulu bhú 'kpí naguo-o de. Tsia bhú Det. 23:26, di ne bhú Lev. 23:5-14.

<sup>6</sup> A adu nani ekpí naguo koko bini, Yesu ali bhú 'ti nadje líli gba Moidje-o. Ani akolo lie oo, ani atsia aholo nasuno. Bhú ká okpála-a, bhoko bini adu oo, adu li 'kpa ani na kokpa-a ne eze. <sup>7</sup> Omusuno na líli gba Moidje di ne oməFalisai adu agili kpadji ngú napu ngbángá Yesu me, ani ngamene siti 'ngú. Kaka-a, u aholo atsia ani ne kpéke djila atigala ani kóbho kpála li 'kpí naguo.

<sup>8</sup> Engú bini, li Yesu ambila lie me ali bua uo oo, u ngabhundja mo-o, ani atsia apa pi kpála li eze adu li 'kpa e me: «Yie bhúlá, amba mu lu si bhú ká djila ndu okpála hana.» Kpála ango-o ayie bhúlá, ani atsia alu kala ndu okpála inde adu bhú 'ti oo hana. <sup>9</sup> Pipita-a, Yesu atsia apa pi uo me: «Ma ne engú bini ngú nayi yi tété: Li 'kpí naguo, líli gba ní-e aziba pi? U mene bádha 'ngú, ne me u mene siti 'ngú? U kobho kpála, ne me u akóbho ani de?» <sup>10</sup> Ani atsia ndu uo hana bini ne bini. Abhomu-o, ani atsia apa pi kpála na eze-e me: «Gbele 'kpa mu.» Kpála ango-o agbele 'kpa e, 'kpa ani atsia akolo ndjindji. <sup>11</sup> Engú bini, okpála ango-o abi 'gú naali, u atsia aholo nayi lio sunda o me: «Ní ti da namene ngú Yesu mangua 'ngú dho?»

*Yesu alo obhulu titima ndjikpa ne ká bhisi*

*(Tsia bhú Mat. 10:1-4; di ne bhú Mlk. 3:13-19.)*

<sup>12</sup> Bhú oekpí bhomu-o, sukpe bini, Yesu a'u apí 'ta ngú nakpokpo 'ngú ne Ebhe. Sukpe libhomu ani asi nakpokpo 'ngú ne Ebhe. <sup>13</sup> Li ekpí aseke lie, ani a'i oməkpatá gba e-o, ani atsia alo okoko bhú ká uo ndjikpa ne ká bhisi inde ani agisila nani 'li o me obhulu titima gba Yesu. <sup>14</sup> A adu nani Simo (inde li Yesu agisila 'li e me Piele) ne ndai e Andili, Djaki ne Djaa, Filipino ne Batelemi, <sup>15</sup> Matié ne Tuma, Djaki ndili gba Alafayo ne Simo (inde u a'i e me kpála inde akúnda doto gba e),



16 Djude ndili gba Djaki ne Yuda Isikalioote, inde apú Yesu pì obhùlù yala-o.

*Yesu asuno pì bhiti okpála  
(Tsia bhú Mat. 4:23-25.)*

17 Anì akè ne uo, anì atsia alù asabu 'ta li bìli li omùkpata gba anì koko bhelé adù lie ko. Okpála bhelé na ndu doto na Yudaya libhomu, na Yelusalema ne ogùdhù na ngo 'ngbé 'ngu, gùdhù na Tile ne Sidona adù di oo. 18 Okpála ango-o ago nani ngú nadjé Yesu, amba anì kobho di obhende adù ne okuo-o. Anì atsia akobho di okpála inde li osisiti bua adù ato mbolo li o ko. 19 Ndu okpála hana adù nagili nabu 'kpa o li kùte anì, anga ndu uo hana adù akobho ka angu inde adù bhú anì-o.

*Yesu akpo 'ngú pìndji djali ne likabhu  
(Tsia bhú Mat. 5:1-12.)*

20 Yesu atsia omùkpata gba e-o, anì atsia apa pì uo me:

«A ko djali pì yi, ngayi obhùlù ndìbhìli,  
anga Ebhe ne ngámá gba yi-e ngae!

21 A ko djali pì yi, ngayi obhende ngadje gumù mbia inde,  
anga yi azú 'he, yi tsia 'ú 'u!

A ko djali pì yi, ngayi obhende ngaku 'gba mbia inde,  
anga yi amú 'zo!

22 A ko djali pì yi, ì dù me okpála nde ngayala yi, u nde ngagbe yi bhú ká o, u nde ngasobho yi, u nde ngapa 'ngú gba yi-e sisiti kabula ma, Ndili gba kpála. 23 Li nedhinga ango kolo, yi de kpi djali, amba yi dho di ebi, anga makalá na ngbéngbé ngadjeke yi abhùlá. Ogbi uo adù nani amene bhadi opolofeta sisiti moko.

24 Engú bini, a ko likabhu pì yi obhùlù tia,  
anga yi asia makalá gba yi-e asia!

25 A ko likabhu pì yi, ngayi obhùlù ká 'zú mbia inde,  
anga yi adú adjé gumù!

A ko likabhu pì yi, ngayi obhende ngamù 'zo mbia inde,  
anga yi adú bhú talia, yi tsia dú naku 'gbá!

26 A ko likabhu pì yi, ì dù me ndu okpála hana nde ngapa 'ngú gba yi-e ndjindji,

anga ogbi uo adù apa bhadi nani babadha 'ngú moko li opolofeta na eu ko!»

*Yi kunda obhùlù yala gba yi-o  
(Tsia bhú Mat. 5:38-48, 7:12a.)*

27 «Engú bini, ma apa la pì yi me, ngayi obhende ngadje ma-a, yi kunda obhùlù yala gba yi-o. Yi mene bádha 'ngú pì obhende ngayala yi ko. 28 Yi yo me bisagu gba Ebhe-e go pì okpála bhende ngatù pèdjè li yi, amba yi yo Ebhe pì obhende ngamene yi sisiti ko. 29 Li kpála bini sù pála mù li pápá bini-e, mù de dji di pápá koko pì anì, amba anì sù.† Li kpála bini gbùlù koti gba mù-o, mù de 'o di anì amba anì ha bongo na mbulu mù-o. 30 Li kpála yo 'he ka mù-o, mù de ha pì anì. † dù me kpála bini nde agbùlù 'he ka mù-o, mo oyó matá ka anì de. 31 Yi mene pì okpála koko bhadi maka bhende yi akunda me u mene e pì yi ko.

32 † dù me yi nde ngakunda bha bini okpála bhende ngakunda yi-e, yi abhùndja de me yi asia makalá kaka-a de, anga okpála na sisiti-e, u ngakunda bhadi okpála bhende ngakunda o ko! 33 † dù me yi nde ngamene bha bini bádha 'ngú pì okpála bhende ì ngamemene pì yi-e, yi abhùndja de me yi asia makalá kaka-a de, anga okpála na sisiti-e bhadi ngamemene moko! 34 † dù me yi nde ngaha bha bini 'he pì okpála inde yi abhùndja me u ti da di nagigie pì yi li 'kpí koko-o, yi abhùndja de me yi asia makalá kaka-a de. Abana okpála na sisiti, u ngaha di 'he pì obi o okpála na sisiti ngubula me, u gie di pì o li 'kpí koko!

35 Engú bini, yi kunda obhùlù yala gba yi-o. Yi mene bádha 'ngú pì uo. Yi ha 'he pì uo me yi nde bhundja de me u agie pì yi magie de. Yi asia 'ngbé makalá. Yi mene mo-o, yi tsia dú ongisi gba Ebhe Apí 'Kpí, anga ngaani-e, anì babadha pì okpála inde ì gie heni pì anì de. Anì di babadha pì okpála na sisiti. 36 Yi bedhe ne ndjinga pì okpála maka li 'dyi yi Ebhe abedhe di ne di lie pì okpála ko.»

† 6:29 6:29 Agba omaYuda-a, nasu kpála li pabhè e-e, a ko sobho na ngbéngbé.

*Yi akódho 'ngú gba okpála koko de  
(Tsia bhú Mat. 7:1-5.)*

<sup>37</sup> «Yi akódho 'ngú gba okpála koko de, amba Ebhe akódho di 'ngú gba yi-e de. Yi a'ó engú pí okpála koko de, amba Ebhe a'ó di engú pí yi de. Yi mbu li siti 'ngú gba okpála koko, amba Ebhe mbu di li siti 'ngú gba yi ko. <sup>38</sup> Yi ha 'he pi okpála koko, amba Ebhe ha di 'he pi yi. Aní abédhe kílí gba yi-e ne nguwa bedhe má kpambi, i hólo nabala kuto. A moko, Ebhe ahá bhadi pi yi maka lele yi ngahaha pi okpála koko lie ko.»

<sup>39</sup> Yesu atsia apa matá pi uo gbitaku bini me: «Kpála i u 'kpí de-e ti da naholo 'kpa kilí e inde i u 'kpí de ngú nasuno kpadji pi aní uu? A mo-o ade! I du mo-o, li ndu uo bhisi hana bála bhú 'dú. <sup>40</sup> Mụkpata bini ne mụsuno gba e ne imbilangu de. Engú la bini, ndu mụkpata hana inde u asuno 'he pi e ndjindji-e, aní kólo maka mụsuno gba e-o. <sup>41</sup> Ka ni mụ ngau mboye kụ mụsoli inde bhú djila ndai mụ-o lie, mụ tsia u la ndula inde bhú djila mụ-o de? <sup>42</sup> Lele pi mụ ti da napa lie pi ndai mụ me: <Ndai ma, 'o ma, ma gbe mboye kụ mụsoli inde bhú djila mụ bhomu>, ngamu-o, mụ nde u ngala belegu de ndula inde bhú djila mụ-o? Bhulu kali, gbe ngaiza ndula inde bhú djila mụ-o. Pipita-a, mụ tsia u la 'kpí ndjindji ngú nagbe mboye kụ mụsoli inde bhú djila ndai mụ ko.»

*Ndula ne lí e  
(Tsia bhú Mat. 7:16-20, 12:33-35.)*

<sup>43</sup> «Ndula na babadha líli lílí na sisiti de. La di-e, ndula na sisiti líli lílí na babadha de. <sup>44</sup> U mbila ndula li lí e. U koko manga li ndula na eti de. La di-e, u koko malibhombi li kobe de. <sup>45</sup> Kpála na babadha-a, ka bádha 'ngú inde li bua aní-e, aní méne bhadi engú na babadha. La di-e, kpála na sisiti-e, ka siti 'ngú inde li bua aní-e, aní méne bhadi engú na sisiti. Engú inde ngakoto bhú 'bhø kpála-a, a ko engú inde ngayie alí bua aní ko.»

*Oeti bhisi  
(Tsia bhú Mat. 7:24-27.)*

<sup>46</sup> «La ka ni yi nga'i ma lie ndu 'kpí hana me: <Ngámá, Ngámá?> Yi la ngamene engú inde ma ngapa e pi yi me yi mene e ade. <sup>47</sup> Kpála bini inde agó abháka ma, adjé 'li ma, aní tsia méne maka ma apa lie, ma akunda napana pi yi me aní maka da. <sup>48</sup> Aní maka kpála inde aholo nayiki eti. Aní adjí edú tsutsu, aní atsia a'o 'dhu 'dhu-o pí teme. Li engu asi lie, a ago atu lie li kute eti-o, eti ango-o tsia dyiki de, anga a alu kpekpeke. <sup>49</sup> Engú bini, kpála bhende adje 'li ma, aní tsia mene maka ma apa lie de-e, aní maka kpála inde ayiki eti gba e pí doto. 'Dhu 'dhu tété ade. Li engu asi lie, a ago atu lie li kute eti-o. Eti-e atuko bha kolo má gala, a atsia agugumu hana má kpekèbhø!»

## 7

*Yesu akobho kpála na kulu gba ngámá  
bini gba osudha  
(Tsia bhú Mat. 8:5-13.)*

<sup>1</sup> Pita aní andjia napa ndu ongu bhomu-o lie hana pi okpála-a, aní atsia atapa bhú kuti na Kapalanauma. <sup>2</sup> Oo, abhú Kapalanauma-a, ngámá bini gba osudha na Loma,\* adu ne bali gba e bini inde aní adu akunda e naali. A adu li bali ango-o ne kuo masikpe de me aní kodho bua e. <sup>3</sup> Li aní adje 'ngú gba Yesu-o lie, aní atsia atima obhelesi okpála koko gba omaYuda agba Yesu. U anu napa pi aní me, aní go kobho bali gba ngámá ango-o. <sup>4</sup> Li obhelesi okpála bhomu-o akolo de Yesu lie, u atsia aholo nakikiliki lio pi aní me: «Mụ ti da namene ehe inde aní ayo e pi aní, i du me mụ nde akunda-o, anga aní ndjindji. <sup>5</sup> Aní kunda di omaha ní naali. Aní ayiki eti nadje líli gba Moidje pi ní ngae.»

<sup>6</sup> Abhomu-o, Yesu atsia aholo 'nú ne uo. Aní akolo lie de kuti-e masikpe-e, ngámá gba osudha-a atsia atima obi e me u pa pi aní me: «Ngámá, mo ondála limu de. Ma ne kpála na padhá. A ayo ka mụ nali bhú

\* **7:2** 7:2 Ngámá gba osudha na Loma: Ngámá bini gba osudha na Loma: Ngámá ango-o nani ne ngámá pí 'ndji osudha kámá bini. A adu nani maYuda de. † **7:6** 7:6 Li maYuda bini li bhú 'ti gba kpála inde ne maYuda ade-e, li maYuda ango-o kólo sisiti kala Ebhe.

'ti gba ma-a de.† 7 Kaka-a, ma u igini lima ndjindji de me ma go kolo li mu ngama-a de. Engú bini, pa bha koli eli bini, amba bali gba ma-a kobho. 8 Ma ngapa mo-o, anga ma sa líli gba ongámási. Ma la di ngaha líli pi osudha. Ma pa pi bhe bini-e me: <Nunú!> Aní nú. Ma pa pi bhe koko-o me: <Gogo!> Aní gó. Ma pa pi bali gba ma-a me: <Mene 'he inde!> Aní méne.»

9 Li Yesu adje engú inde li ngámá bhomu-o apa e lie, aní angamba naali. Aní adji lie, aní atsia apa pi bhiti okpála inde adu akpata ani-e me: «Ma apa pi yi me, ma bhaka nga ngua kpála inde abhuka ma me-e de, belegu de bhú ká omaɪsalaele!» 10 Li okpála na titima agie lio lie agba ngámá-a, u abhaka me kuo nde ayie li bali gba ngámá ang-o ayie.

### *Yesu azuku ndili na bhobhoko gba økø bini na øelø*

11 Pita li Yesu akobho bali gba ngámá bhomu-o lie, aní atsia atapa bhú gudhu na Naine. Omukpata gba aní ne okpála bhelé anu bhú dabili bini ne aní. 12 Aní akolo li 'bhe bhoti na gudhu-o lie, a abhaka me u nde adji ne ngbangba makombi bini ngú nazizi. A ko nani koli ndili na bhobhoko bini gba økø bini na øelø. Okpála bhelé na gudhu bhomu-o adu bhú dabili bini ne ølø ang-o.

13 Abhomu-o, Ngámá Yesu au aní. Li aní au aní lie, aní adje ndjinga aní naali. Aní atsia apa pi aní me: «'O naku 'gbá!»

14 Pipita-a, aní adyudyo lie, aní a'o 'kpa e li ngbangba-o. Abhomu-o, okpála inde abi kuo atsia alu. Yesu atsia apa pi makombi bhomu-o me: «Ma apa pi mu me, yie bhúlá!» 15 Kpála inde adu igini me aní nde akpi-e, aní ayie bhúlá, aní adu madu. Aní atsia aholo nagama 'ngú. Abhomu-o, Yesu atsia aha aní pi 'hi e. 16 Ndu okpála hana adje tsulu. U adu adhøgø Ebhe, u atsia adu apa me: «'Ngbé polofeta akoto bhú ká ní! Ebhe ago nateteke okpála gba e-o!» 17 Ngali na engú li Yesu amene e atsia agbolo bhú ndu doto na Yudaya libhomu di ne bhú okuti na ngongo-o hana.

### *Djaa bhulu nabatisa okpála atima okpála agba Yesu*

*(Tsia bhú Mat. 11:2-19.)*

18 Li omukpata gba Djaa agie lio lie, u atsia akpokpo ndu ongamba 'ngú inde li Yesu amene e hana pi Djaa. Abhomu-o, aní a'i okpála bhisi bhú ká uo. 19 Aní atsia atima uo ngú nayi Yesu me: «Ne me mu ne Masiya inde ngago, ne me ayo me ya adjeke kpála koko?» 20 Li okpála bhomu-o akolo lie de ani-e, u atsia apa pi aní me: «Djaa bhulu nabatisa okpála atima ya me ya go yi mu me: <Ne me mu ne Masiya inde ngago, ne me ayo me ya djeke kpála koko?»»

21 Bha li nedhinga bhomu-o, Yesu akobho okpála bhelé na kuo. Aní akobho obhende adu ne okuo ngangá. Aní akobho di obhende adu ne ositi bua bhú o-o. Aní atsia abhulu di djila okpála bhelé inde i u 'kpí de-e bhú bádha bhú 'bu gba e-o. 22 Pipita-a, aní atsia agie pi okpála li Djaa atima o-o me: «Yi nu kpokpo pi Djaa engú inde yi au e, di ne bhende yi adje e ko. Okpála i u 'kpí de-e ngau 'kpí. Obhende ne eze li 'dhu o-o, u ngadhuku ndjindji. Okpála na kába ngakobho. Obhende i dje 'kpí de-e ngadje 'kpí. Obhende amu-o ngazuku. Ma ngakpokpo Bádha Ngali pi obhulu ndibhili. 23 A ko djali pi kpála inde i bhúka ma ne bua na bhisi bhisi de ko!»

### *Yesu akpokpo 'ngú gba Djaa bhulu nabatisa okpála*

24 Bhiti okpála adu oo. Pita li obhulu titima gba Djaa agbida lie, Yesu atsia aholo akpokpo 'ngú gba Djaa pi uo me: «Yi anu igini natsia abhú 'gu-o ni? Yi anu igini natsia kpála inde maka mbamba inde ngadyiki ka anvi-e? A mo-o ade. 25 I du mo-o de-e, yi anu la igini natsia ni? Kpála inde adyi babadha bongo-o? A mo-o ade, anga obhende ngadyi babadha bongo-o, inde di ne ká tia ka o-o ngadu abhú 'ti gba ongámási. 26 Yi anu nga la igini natsia ni? Polofeta? A moko, ma apa pi yi me, yi au bhende ane belegu polofeta mane. 27 Padhá de, anga a ko kpála inde li eli gba Ebhe-e apa 'ngú gba e me:

«Ebhe apa me, ma ngatima bhulũ titima  
gba ma-a  
pi mũ kalanũ  
ngũ naleke kpadji pi mũ.†»

<sup>28</sup> Ma apa pi yi me, Djaa ngbéngbé ane  
ndũ okpála hana. Engú bini, kpála inde  
ane ne mboye bhú Nau gba Ebhe-e , ani  
ane ani ne engbé.»

<sup>29</sup> Ndũ okpála hana, belegũ ondombi  
na mandjandja adũ adje Yesu. Abhomũ-  
o, u ambila nani ngbili 'ngũ gba Ebhe-e  
lie, Djaa atsia abatisa uo. <sup>30</sup> Engú bini,  
omũFalisai ne omũsuno na líli gba Moidje  
ayala nani me Djaa batisa o. U amene  
lie mo-o, u ayala engú inde li Ebhe adũ  
akũnda e pi uo-o.

<sup>31</sup> Do Yesu matá me: «Ma tí da nasuno  
okpála na naki si li da? Uo maka da?

<sup>32</sup> Uo maka ongisi inde adũ bhú daposu.  
Okoko ngasũsũla pi obi o me:

«Ya abhi ngbabi na ebi pi yi,  
engú bini, yi tsia dho 'bi de!

Ya ali etsi na da kuo pi yi,  
engú bini, yi ku 'gbá de!»

<sup>33</sup> Padhá de, anga Djaa bhulũ nabatisa  
okpála ago, ani zũ 'he maka okpála koko  
de, ani ndji di vino de, do yi me: «A  
bhú ani ne siti bua!» <sup>34</sup> Ngama, Ndili  
gba kpála, ma ago, ma ngazũ 'he maka  
okpála koko, ma ngandji vino, do yi me:  
«Yi tsia nga kpála inde ngabhundja bha  
bini nazũ 'he di ne nandji vino! Ani  
ngakũnda ondombi na mandjandja, a ko  
la di olia okpála na sisiti!» <sup>35</sup> Engú bini,  
ndũ okpála hana inde abhuka imbilangũ  
gba Ebhe-e, u ambila me imbilangũ angu-  
o ngbingbili.»

*Yesu azũ 'he abhú 'ti gba Simo  
mũFalisai*

<sup>36</sup> A adũ nani mũFalisai bini, ani a'i  
Yesu ngũ nazũ 'he bhú dabili bini ne e.  
Yesu ali bhú 'ti gba mũFalisai-o. Oo, ani  
atsia aholo nazũ 'he-o. <sup>37</sup> Ølø bini na sisiti  
adũ bhú gudhũ bhomũ-o. Ani adje lie  
me Yesu ngazũ 'he abhú 'ti gba mũFalisai  
bhomũ-o, ani ago ne gili bini inde u abho  
e li teme inde u a'i e me alabatele.‡ Gili

angu-o abedhe nani ne mũngotsi bedhe.  
<sup>38</sup> Ani akolo lie, ani atsia akita bhú li  
'dhũ Yesu li pápá ne akele ani. Ani aholo  
naku 'gbá, ngũla adũ atuko li 'dhũ Yesu.  
Abhomũ-o, ani aholo nakukuo ne sundjo  
e. Ani akama 'dhũ ani, ani atsia aha  
mũngotsi-e, ani atuko tété. <sup>39</sup> Li mũFalisai  
inde a'i Yesu au lie mo-o, ani atsia apa li  
bua e me: «Kpála inde-e, a ko bha ndjũ  
polofeta de kũkũlũ! Padhá de, anga ølø  
inde ngabu 'kpa e li ani bhomũ-o, a ko  
siti ølø. Ani mbila la-a de!»

<sup>40</sup> Abhomũ-o, Yesu atsia apa pi  
mũFalisai-e me: «Simo, ma mbo ne  
engú bedi napapa pi mũ.» Simo atsia  
agie me: «Mũsuno, papa.» <sup>41</sup> Yesu atsia  
apa me: «Kpála bini aha nani bopulu  
pi okpála bhisi. Ani aha pi kpála bhe  
bini-e lí falanga kámá bhuluvue. Ani  
atsia aha pi kpála bhe koko-o lí falanga  
ndjikpa bhuluvue. <sup>42</sup> Li tia dũ la lie ka  
okpála angu-o ngũ nagigie de-e, abhomũ-  
o, ani atsia ambu li bopulu gba ndũ uo  
bhisi hana. Bhú ká okpála bhisi bhomũ-  
o, akũnda ani ané mane ne bhedho?»

<sup>43</sup> Simo atsia agie me: «Ma abhundja me  
a ko kpála bhende u ambu li bopulu gba  
e adũ bhelé naali ko.» Do Yesu pi ani me:  
«Mo opa ndjindji.»

<sup>44</sup> Pipita-a, ani adji lie ne li pápá gba  
ølø-o, ani atsia apa pi Simo me: «Mo ou  
engú li ølø inde-e amene e au? Ma ali lie  
bhú 'ti gba mũ-o, mũ ha engu mũma ngũ  
navulũ 'dhũ ma de. § Engú bini, ngaani-  
e, ani avulũ 'dhũ ma ne ngũla na djila e.  
Ani atsia akuo ne sundjo e. <sup>45</sup> Mũ kama  
ma de. Engú bini, ngaani-e, nayie maka  
ma ali igini lie si-e, akolo pi mbia inde-  
e, ani 'o nakama 'dhũ ma de. <sup>46</sup> Mũ tuko  
emũ pí 'ndji ma de. Engú bini, ngaani-e,  
ani atuko mũngotsi li 'dhũ ma.

<sup>47</sup> Kaka-a, ma apa pi mũ me, mũkũnda  
na ngbéngbé inde ani asuno e, apana me  
u a'e bhiti siti 'ngũ gba ani-e a'e. Engú  
bini, kpála inde u a'e siti 'ngũ gba e me a  
nde yeye-e, ani pána bhadi mũkũnda na  
yeye.» <sup>48</sup> Abhomũ-o, ani atsia apa pi ølø

† **7:27** 7:27 Tsia bhú Mal. 3:1. ‡ **7:37** 7:37 Alabatele: A ko teme na mase naali inde u abhobho oehe maka gili lie ko. § **7:44** 7:44 Simo ha nani engu pi Yesu ngũ navulũ 'dhũ e de, anga Simo adũ au lie me ni ngbéngbé pi Yesu ngaani. Tsia bhú Dje. 18:4, 19:2.

bhomu-o me: «Ma a'e osisiti 'ngú gba mu-o a'e.»<sup>49</sup> Okpála inde adu azu 'he bhú dabili bini ne ani aholo nabhundja me: «A inde-e mangua kpála dho? Ani nga 'e belegu siti 'ngú!»<sup>50</sup> Abhomu-o, Yesu atsia apa pi ele-o me: «Ebhe akobho mu, anga mo obhuka ma. Nu ne guo 'ngú.»

## 8

### *Omukpata ndjikpa ne ka bhisi ne olisi koko akpata Yesu*

<sup>1</sup> Pipita-a, Yesu adu adholo bhú ndu ogudhu di ne bhú ndu okuti hana. Ani adu akpokpo Bádha NgaliNau gba Ebhe ne ndu bili hana. Omukpata ndjikpa ne ka bhisi-e adu bhú dabili bini ne ani.<sup>2</sup> Olisi koko nani li Yesu apandja osisiti bua bhú o, ne obhe ani akobho o ne okuo-o, a adu di bhú dabili bini ne ani. A du nani: Malia (u a'i e me kpála na gudhu na Magadala) nani li Yesu apandja osisiti bua bhú e mananika-o; <sup>3</sup> Djaani, wala Kudja, ngámá na kulu gba 'ngbé ngámá Elode; Sudjana ne olisi koko bhelé. Ndu olisi bhomu-o hana adu aha tia gba o ngú nateteke Yesu ne omukpata gba e ne di.

### *Gbitaku gba kpála nalu nguwa*

*(Tsia bhú Mat. 13:1-9; di ne bhú Mlk. 4:1-9.)*

<sup>4</sup> Okpála adu nayie bhú gudhu bini ne bini, u adu ago abhaka Yesu. Li okpála bhelé adu apokobho bhúla o lie de ani-e, ani atsia apa gbitaku inde-e me: <sup>5</sup> «Kpála bini anu ngú nabala nguwa abhú 'dyi gba e. Ani adu ababala lie, té nguwa koko atsia abala li kpadji. Okpála adedele ne 'dhu o, odhu atsia ago, u azu bhobhomu-o hana. <sup>6</sup> Koko abala li bili na teme. Li ezu-o aze lie, atsia a'ulu anga engu du bhú doto sasa de. <sup>7</sup> Koko atsia abala li bili na eti. A aké lie, ezu-o aké ne eti-e bhú dabili bini. Eti-e atsia agaga ezu-o. Kaka-a, ezu-o bhele ndjindji de. <sup>8</sup> Engú bini, koko atsia abala nae bhú doto na babadha. Ezu-o ake, a atsia ali lílí. Nguwa bini ne bini ali lílí kámá bini.» Yesu atsia apa matá me: «Yi dje ndjindji, i du me a nde li yi ne 'dje 'dje ngú nadje 'kpí ko!»

† 8:10 8:10 Tsia bhú Isa. 6:9.

### *Ka ni li Yesu adu akpo 'ngú lie bhú ogbitaku-o?*

*(Tsia bhú Mat. 13:10-17; di ne bhú Mlk. 4:10-12.)*

<sup>9</sup> Omukpata gba Yesu ayi ani me: «Ta gbitaku bhomu-o pi?»<sup>10</sup> Ani atsia agie pi uo me: «Ngayi-e, yi ambila naayi engú inde awo nani lie kalanu pindji Nau gba Ebhe-e ambila. Engú bini pi okpála koko-o, ma akpo engú bhomu-o bhú ogbitaku maka li Bhuku gba Ebhe apa lie me:

«U ti da natsia 'kpí,

engú la bini, u ú 'kpí de.

U ti da nadje 'kpí,

engú la bini, u mbíla tata-a de.»

### *Yesu akpo ta gbitaku gba kpála nalu nguwa-o*

*(Tsia bhú Mat. 13:18-23; di ne bhú Mlk. 4:13-20.)*

<sup>11</sup> «Ta gbitaku bhomu-o me, nguwa-a, a ko eli gba Ebhe-o. <sup>12</sup> Nguwa bhende abala li kpadji-e, a ko okpála bhende ngadje eli gba Ebhe-o. Engú bini, li Djabulu gó, ani tsia dhépe eli ango-o li bua uo, ngú nagbite kpadji pi uo me u abhúka de, amba Ebhe akóbho uo de. <sup>13</sup> Nguwa bhende abala li bili na teme-e, a ko okpála bhende ngadje eli gba Ebhe-e, u tsia sía ne djali hana. Engú bini, eli ango-o lí li bua uo de. U bha ngabhuka ngubula nedhinga bedi. Li nale kolo-o, u 'ó ká nabhuka gba o-o. <sup>14</sup> Nguwa bhende abala li bili na oeti-e, a ko okpála bhende ngadje eli gba Ebhe-o. Engú bini, u ne gumu ndu 'he na doto ngangá. U ne gumu tia na doto ne odjali na mukobho na doto. Gumu tia na doto ne odjali na mukobho na doto ango-o ngagaga Eli-o. Kaka-a, eli bhomu-o lí lílí nabhele mabhele de. <sup>15</sup> Nguwa bhende abala bhú doto na babadha-a, a ko okpála bhende ngadje eli gba Ebhe ne bua na babadha, u tsia zíba. U líla ndjindji, u tsia lí lílí ka kekele gba o ko.»

### *Gbitaku na eke*

*(Tsia bhú Mlk. 4:21-25.)*

<sup>16</sup> «I du me kpála bini nde adhedhe eke, ani búku ne lusa de. Ani tó di asa polo de. Engú bini, ani 'ó pí 'he ngubula me

okpála inde ngali bhú 'ti-e, u u 'kpí tété ndjindji. <sup>17</sup> A moko, ndu 'he hana inde awo lie mawo-o, akóto bhú mbasú. Ndu 'he inde na pepe hana akóto li zi 'kpí, li okpála tsia mbíla. <sup>18</sup> Kaka-a, 'e-e! Yi lila liyi bhú nadjé eli-o, anga kpála li ehe nde ka e, u ahá matá koko pí ani pépé. Engú bini, kpála inde li ehe nde ka e ade-e, u adhépe belegu mboye 'he bhende ani ngabhundja me a ka ni ko.»

*'Hi Yesu ne ondaise Yesu*  
(Tsia bhú Mat. 12:46-50; di ne bhú Mlk. 3:31-35.)

<sup>19</sup> 'Hi Yesu ne ondaise Yesu ago ngú natsia ani. Engú bini, u ale nakolo li ani pima ka bhiti okpála-o. <sup>20</sup> Abhomu-o, u atsia apa pí Yesu me: «'Hi mu ne ondaise mu akilidjo, u ngakunda nau mu.» <sup>21</sup> Engú bini, Yesu atsia apa pí ndu uo hana me: «'Hi ma ne ondaise ma-a, a ko okpála inde ngadje eli gba Ebhe ne namemene ko.»

*Yesu ayoko kpéke anvi pí 'ngu*  
(Tsia bhú Mat. 8:23-27; di ne bhú Mlk. 4:35-41.)

<sup>22</sup> Ekpí bini pipita-a, Yesu ne omukpata gba e a'u bhú zabu bini. Ani atsia apa pí uo me: «Ní gulu ekpe-o ai 'ngu.» Abhomu-o, u atsia atapa. <sup>23</sup> Nedhinga u adu agulu 'ngu-o lie, Yesu atsia ati ne ela. Kpéke anvi na gipi aholo nape pí ekpe-o. Engu aholo nabedhe bhú zabu-o, kuo atsia akolo de uo masakpe. <sup>24</sup> Omukpata adyudyo lio de Yesu masakpe, u atsia azuku ani me: «Musunu, Musunu, ní adji amú!» Yesu azuku, ani atsia ambe bhú 'ndji anvi di ne wowo 'ngu-o. Abhomu-o, anvi-e a'o nape, engu-o atsia akolo guguo. <sup>25</sup> Do ani pí uo me: «Nabhuka gba yi-e su?» Engú bini, u adu adje tsulu, u atsia adu angamba naali. Abhomu-o, u adu apa sunda o me: «A e mangua kpála dho inde ngaha belegu líli pí anvi ne engu, uo ngamemene!»

*Yesu akobho kpála bini li osisiti bua adu ato mbolo li e*

(Tsia bhú Mat. 8:28-34; di ne bhú Mlk. 5:1-20.)

<sup>26</sup> Abhomu-o, u akolo bhú ndu doto gba okpála na Gelasa, ayi ekpe bhúla ndu doto na Galilaya. <sup>27</sup> Nedhinga li Yesu adu akoto bhú zabu-o lie, kpála bini na kuti bhomu-o ago ngú nabhaka ani. Kpála angoo, osisiti bua adu bhú ani. Ekpí bhelé, ani du adyi bongo de, ani du asi bhú 'ti de. La-a, ani adu bha bini adu bhú ká olata. <sup>28-29</sup> Siti bua-a adu agbulu ani piko. Abhomu-o, u atsia adu agbite 'kpa ani ne 'dhu ani ne ekpú di ne gbíndjili ngú nalila ani. Engú bini, kpála angoo adu atsotsolo gbíndjili di ne ekpe-o má dhu dhu dhu! Siti bua atsia adu amba bhúla ani ne abhú mili bíli. Li kpála angoo au Yesu lie me-e, ani aholo natu 'ue. Abhomu-o, ani ati bhú li 'dhu Yesu, ani atsia asula kpekpeke me: «Yesu, Ndili gba Ebhe na Apí 'Kpí, mo okunda namene ngú ma pí? Ma ayo ka mu me, mo oméne ma sisiti de!» Ani apa nani mo-o, anga Yesu adu aha líli pí siti bua angoo me ani koto bhú kpála bhomu-o makoto.

<sup>30</sup> Yesu atsia ayi kpála angoo me: «A 'li mu pí?» Ani agie me: «A 'li ma me <Bhelé.» Ani apa mo-o anga osisiti bua bhelé ali nani bhú ani. <sup>31</sup> Osisiti bua angoo atsia adu akikiliki lio pí Yesu me: «Mo ombá ya bhú tsu 'dú bhe má ngbongobho-o de!» <sup>32</sup> A abhaka me 'ngbé piga opame bini nde ngagili 'zu gba o pí 'ta oo. Osisiti bua-a atsia apa pí Yesu me: «Ha kpadji pí ya, ya li bhú opame bhomu-o.» Ani atsia aziba pí uo.\* <sup>33</sup> Abhomu-o, osisiti bua aze bhú kpála angoo, u atsia amba lio bhú opame-o. Piga opame bhomu-o libhomu ayie ne holo apí 'ta, u anu alilinda bhú ekpe-o, u atsia amu.

<sup>34</sup> Li omulila gba opame au engú inde akodho 'kpí-e lie, u atsi ne holo, u atsia anu nakpokpo ngali angoo abhú gudhu ne abhú okuti. <sup>35</sup> Okpála aze ngú nau engú inde akodho 'kpí-o. U akolo de Yesu lie, u abhaka me kpála inde li osisiti bua

\* **8:32** 8:32 Engú inde amene lie si-e, a du nani bhú kuti gba omaYuda de, anga omaYuda ngau opame sisiti. Tsia bhú Lev. 11:7, ne bhú Det. 14:8, di ne bhú Mlk. 5:11.

aze bhú e nde adu kuto bhú li 'dhu Yesu. Aní adu me aní nde adyi bongo, aní nde ngabhundja 'ngú hana ndjindji. Abhomu-o, tsulu atsia aholo uo. <sup>36</sup> Okpála inde au ndu 'ngú bhomu-o hana atsia akpokpo pi uo maka li Yesu akobho kpála ango-o lie ko.

<sup>37</sup> Abhomu-o, ndu okpála hana na ndu doto bhomu-o atsia apa pi Yesu me aní yie bhú kuti gba o mayie, anga u adu adje tsulu naali. Yesu a'u bhú zabu-o ngú na'e ne enú. <sup>38</sup> Kpála inde li osisiti bua aze bhú e aholo nalopolo lie pi Yesu me: «Yesu, i du me mu nde akunda-a, mo o'ó ka ma de, ní nu ne mu.» Engú bini, Yesu agie aní sidi, aní atsia apa pi aní me: <sup>39</sup> «Gie limu agba mu, amba mu kpokpo ndu 'ngú inde li Ebhe amene e pi mu-o hana.» Abhomu-o, kpála ango-o atsia atapa ne kpokpo ndu 'ngú li Yesu amene e pi aní-e hana bhú gudhu libhomu.

*Yesu akobho elə bini, aní atsia azuku di ndili na ələ gba Yailo*

*(Tsia bhú Mat. 9:18-26; di ne bhú Mlk. 5:21-43.)*

<sup>40</sup> Nedhinga li Yesu agie lie lie ali pála ekpə koko-o, okpála bhelé asia aní ndjindji, anga ndu uo hana adu adjeke aní. <sup>41</sup> Li nedhinga bhomu-o, kpála bini akolo. A adu 'li aní me Yailo. Aní adu nani ngámá na eti nadje líli gba Moidje na bili bhomu-o. Aní ati bhú li 'dhu Yesu, aní atsia akikiliki lie pi aní me aní nu agba ni, <sup>42</sup> anga ndili gba aní na ələ adu masikpe de nakpi. Koli ndili bhomu-o bha nani ka aní bini, aní adu ne kalanga ndjikpa ne ká bhisi. Li kpadji-e, bhiti okpála asulu Yesu má wakaka!

<sup>43</sup> A abhaka me ələ bini nde oo. Ələ ango-o, ngute adu atuko li aní bhú sunda kalanga ndjikpa ne ká bhisi. [Aní andjia nani tia lie hana pi omutia], engú bini, kpála bini ti nani da nakobho aní de. <sup>44</sup> Aní ago ne akele Yesu, aní atsia abu 'kpa e li bongo 'ta aní-o.† Ngute-e a'o bha kolo natuko li aní maka ndjombe. <sup>45</sup> Abhomu-o, Yesu atsia ayi me: «A abu 'kpa e li ma da?» Ndu uo hana agie me: «A ko nae ya

de!» Piele atsia apa pi Yesu me: «Musuno, bhiti okpála inde asa mu ngbalina inde-e, ngasulu mu ngao.» <sup>46</sup> Engú bini, Yesu atsia apa me: «Kpála bini abu 'kpa e li ma, anga ma ambila me té angu gba ma-a akoto.»

<sup>47</sup> Ələ ango-o au me Yesu ambila engú inde ni amene e ambila. Abhomu-o, aní ago ne nagaku, aní tsia ati bhú li 'dhu Yesu. Aní atsia akpokpo pi Yesu kala ndu okpála hana ta 'ngú inde aní abu 'kpa e li aní lie, di ne maka aní akobho bha lie maka ndjombe-o. <sup>48</sup> Yesu pi aní me: «Ndi ələ-e, mo okobho, anga mo obhuka ma kukulu. Nu ne guo 'ngú.»

<sup>49</sup> Nedhinga li Yesu adu apa lie mo-o, kpála bini ayie agba ngámá Yailo, aní ago apa pi aní me: «Ndili gba mu-o andjili. Mo ondála matá musuno de.» <sup>50</sup> Engú bini, li Yesu adje aní lie, aní atsia apa pi Yailo me: «Mo odjé tsulu de, du bha ne nabhuka, ndili gba mu-o akóbho makobho.»

<sup>51</sup> Li Yesu akolo lie agba ngámá Yailo, aní ziba de me kpála bini li nganda ni abhú 'ti-e de, bha bini Piele, Djaa ne Djaki, a la bhadi-e 'dyi ndili-e ne 'hi ndili-o. <sup>52</sup> Ndu okpála inde adu oo hana, adu atə 'ue ne naku 'gbá ngú ndili ango-o. Abhomu-o, Yesu atsia apa pi uo me: «Yi 'o naku 'gbá! Ndili-e kpi de, engú bini, aní tila.» <sup>53</sup> La-a, u aholo namu aní anga u adu ambila ndjindji me ndili-e akpi. <sup>54</sup> Abhomu-o, Yesu aholo 'kpa aní, aní atsia asula kpekpeke me: «Ndika ma, yie bhúlá!» <sup>55</sup> Ndili-e azuku, aní ayie bhúlá kolo má gala! Yesu atsia aha líli pi uo me, u ha ezə pi aní. <sup>56</sup> Okpála inde azu aní angamba naali. Engú bini, Yesu agbele 'dje uo kpekpeke me u apá belegu engú inde akodho 'kpí-e pi kpála bini de.

## 9

*Yesu atima obhulu titima ndjikpa ne ká bhisi gba e-o*

*(Tsia bhú Mat. 10:5-15; di ne bhú Mlk. 6:7-13.)*

† 8:44 8:44 Bhú líli gba omaYuda-a, li ələ du ne kuo gba olisi-e, aní bu 'kpa e li bhoko-o, li bhoko ango-o kolo sisiti kala Ebhe. Tsia bhú Lev. 15:25-33.

<sup>1</sup> Ekpí bini, Yesu apo bhúla omùkpata ndjikpa ne ká bhisi gba e-o. Aní aha angu pí uo me u pandja ndu osisiti bua hana bhú okpála, amba u kobho di okpála na kuo. <sup>2</sup> Pipita-a, aní atsia atima uo me u nu ne kpokpo ngali Nau gba Ebhe , amba u kobho di okpála na kuo. <sup>3</sup> Aní pí uo me: «Nanu ka yi-e, yi abhá oehe de. Yi ahá ndula de. Yi ahá ehe ngú nabi 'he bhúbhú de. Yi ahá ezú de. Yi ahá falanga de. Kpála bini bhú ká yi ahá bongo na mbulu bhisi de. <sup>4</sup> Ndu eti hana u asía yi bhú e-e, yi du bha oo, akólo lí nedhinga inde yi ayíe lie bhú eti ango-o. <sup>5</sup> Ndu eti hana u sía yi bhú e de-e, yi de koto bhúbhú, amba yi pulu doto na kuti gba uo inde adhedhe lí 'dhu yi-o. Bhobhomu-o asúno pí uo me u amene siti 'ngú.»\* <sup>6</sup> Obhulu titima gba Yesu agbida, u apu bhú ndu okuti hana. U akpokpo Bádha Ngali gba Ebhe-e pí okpála. U atsia akobho di okpála na kuo ne ndu bili hana.

*Mabhundja gba Elode adholo ngangá (Tsia bhú Mat. 14:1-12; di ne bhú Mlk. 6:14-29.)*

<sup>7</sup> Elode , ngámá na ndu doto na Galilaya, adje ndu 'ngú lí Yesu ne omùkpata gba e adu amene e hana. Abhomu-o, mabhundja gba aní-e atsia aholo adholo ngangá, anga okpála koko adu apa me: «Djaa bhulu nabatisa okpála azuku!» <sup>8</sup> Okoko adu apa me: «Polofeta Eliya akoto bhomu-o ngae.» Okoko atsia adu apa matá me: «Suka opolofeta na kalanu-o, azuku bhomu-o ngae.» <sup>9</sup> Engú bini, Elode atsia apa naae me: «Ma aha nani líli-e ngama me u kodho ngulu Djaa . Kpála bhende ma ngadje okpála apa 'ngú gba e me-e, a ko matá naae da?» Abhomu-o, aní atsia adu agili me ni u Yesu.

*Yesu aha 'zú pí bhiti okpála (Tsia bhú Mat. 14:13-21; ne bhú Mlk. 6:30-44; di ne bhú Dja. 6:1-14.)*

<sup>10</sup> Lí obhulu titima agie lío lie de Yesu-o, u atsia akpokpo ndu 'ngú inde u amene e hana pí aní. Pipita-a, aní abha uo, aní atsia atapa ne uo de okpála tsutsu lí pápá

na gudhu na Betesaida. <sup>11</sup> Engú bini, lí bhiti okpála bhomu-o ambila lie me u agbida oo, u atsia akpata aní. Abhomu-o, Yesu asia uo, aní atsia akpokpo 'ngú píndji Nau gba Ebhe-e pí uo. Aní atsia akobho di okpála inde adu ne kuo ko.

<sup>12</sup> Lí ekpí aholo lie nabi-e, obhulu titima ndjikpa ne ká bhisi-e adyudyo lío de Yesu, u atsia apa pí aní me: «Ha kpadji pí okpála, amba u gbida nagili dabili nasi tété, di ne ehe nazú mazú bhú odjedje kuti masikpe sí, anga ní ei bhú mili bili.»

<sup>13</sup> Do Yesu pí uo me: «Yi ha 'zú pí uo ngayi.» U atsia agie me: «A bha ka ya sí ne mapa bhuluvue di ne sungu bhisi. Ne me mo okunda me ya nu nakala ezú pí ndu okpála inde-e hana ngaya?»

<sup>14</sup> (Obhosi adu nani oo masikpe de kutu bhuluvue.) Yesu atsia apa pí omùkpata gba e me: «Yi pa pí uo me u popo bhúla o okpála ndjikpa bhuluvue, ndjikpa bhuluvue, amba u dulu kuto.»

<sup>15</sup> Omùkpata-a amene maka aní apa pí uo lie ko. U atsia apa pí ndu okpála hana me u dulu kuto. <sup>16</sup> Abhomu-o, Yesu aha mapa bhuluvue ne sungu bhisi-o, aní atsia 'kpí ne bhúlá, aní atsia agie heni pí Ebhe ngubula ezú bhomu-o. Pipita-a, aní agumu mapa ne sungu-o, aní aha pí omùkpata ngú nagagapa lí okpála. <sup>17</sup> Ndu uo hana azú 'he, u a'u'u má kpú kpú kpú! Dudu atigala-a, obhulu titima alo, a atsia abebedhe okili ndjikpa ne ká bhisi.

*Piele apa me Yesu ne Masiya (Tsia bhú Mat. 16:13-19; di ne bhú Mlk. 8:27-29.)*

<sup>18</sup> A akolo ekpí bini, Yesu adu akpokpo 'ngú ne Ebhe kpi e kpi me, omùkpata gba aní-e nde de aní. Aní atsia ayí uo me: «Okpála ngapa me ma ne da?» <sup>19</sup> U agie me: «Okpála koko ngapa me, mu ne Djaa bhulu nabatisa okpála. Okoko me, mu ne polofeta Eliya. Okoko matá me, suka opolofeta na kalanu-o azuku.» <sup>20</sup> Aní atsia ayí matá uo me: «A la yi-e, yi ngapa naayi me ma ne da?» Do Piele me: «Mu ne Masiya inde lí Ebhe atima e ko.»

\* **9:5** 9:5 Okuti gba omaYuda inde i ziba nani Bádha Ngali gba Ebhe-e de-e, u du nani au uo maka omaYuda de, ne odoto gba o-o hana. Tsia bhú Mlk. 6:11.



*Yesu akpo 'ngú pindji nakpi ne nazuku ka e*

*(Tsia bhú Mat. 16:20-28; di ne bhú Mlk. 8:30, 9:1.)*

<sup>21</sup> Engú bini, ani agbele 'dje uo kpekpeke, ani atsia aha líli me u apá belegu engú bhomu-o pi kpála bini de. <sup>22</sup> Abhomu-o, ani atsia apa matá pi uo me: «A ayo me ngama, Ndili gba kpála-a, ma dje likabhu naali. Obhelesi okpála, ongbengbe odimandø di ne omusuno na líli gba Moidje ayála ma. U abhéle ma, engú bini, ekpí na bata-a, ma tsia zúku.»

<sup>23</sup> Pipita-a, ani apa pi ndu okpála hana inde adu oo me: «Í du me kpála nde akunda nakpata ma-a, a ayo me ani 'o nabhundja 'ngú gba e makpe. Ekpí bini ne bini hana, a ayo me ani bi kulusi gba e-o, amba ani kpata ma. <sup>24</sup> Padhá de, anga i du me kpála nde akunda nalila mukobho gba e, ani kpí. La-a, i du me kpála nde akunda nakpi ngubula ma-a, ani tsia kóbho. <sup>25</sup> Í du me kpála nde asia ndu 'he na doto hana, engú la bini, ngaani makpe ani ngita-a, ani tsia kpi-e, a la pi ani babadha bhúbhú ne ni? <sup>26</sup> Í du me kpála bini nde adje numu li 'ngú gba ma-a, di ne bhe ma ngapa e-e, ngama Ndili gba kpála, ma adjé bhadi numu li 'ngú gba ani. A adú moko li nedhinga ma agó lie bhú nau na asasaua gba ma, ne bhe gba 'Dyi ma, di ne bhe gba oandjelu na bububu-o. <sup>27</sup> Ma apa pi yi na paká me, okpála koko bhú ká obhende inde si-e, mú padhá de, u aú ngaiza Nau gba Ebhe-e kalan.»

*Zi Ebhe asa Yesu ngbalina*

*(Tsia bhú Mat. 17:1-8; di ne bhú Mlk. 9:2-8.)*

<sup>28</sup> Masikpe de ekpí madjina pita ani apa 'ngú bhomu-o lie, Yesu aha Piele, ne Djaa di ne Djaki, ani atsia a'u ne uo apí 'ta ngú nakpokpo 'ngú ne Ebhe. <sup>29</sup> Ani adu akpokpo 'ngú ne Ebhe lie, bhúla ani ayipa lie, bongo gba ani avu má tuu! <sup>30</sup> Kolo me-e, okpála bhisi aze, u atsia aholo nagama 'ngú ne ani. A adu nani Moidje ne Eliya. <sup>31</sup> Zi Ebhe asa uo ngbalina. U atsia adu akpokpo 'ngú ne Yesu maka ani adjí nandjia kulu gba e lie ne nakpi ka e abhú

Yelusalema ko. <sup>32</sup> Piele ne obi e adu ne ela má yikpokpo! U agbungbua lio lie, u au Yesu ne okpála bhisi me zi Ebhe nde asa uo ngbalina. <sup>33</sup> Li okpála bhisi bhomu-o adu ayie lie de Yesu-o, Piele atsia apa pi ani me: «Musuno, ya si ndjindji. A ayo me ya yiki 'ti ngbangbali bata, bini pi mu, bini pi Moidje, bini pi Eliya.» (Engú bini, ani du ambila ta 'ngú inde ani adu apa e de.)

<sup>34</sup> Nedhinga ani adu apa 'ngú bhomu-o lie, ndindi atsia ago abuku uo. Li ndindi adu abuku uo lie, omukpata atsia aholo nadje tsulu naali. <sup>35</sup> Bhú ndindi-e, eli bini akoto, atsia apa me: «Kpála inde-e, a ko Ndili gba ma inde ma abhu e ko. Yi dje ani!» <sup>36</sup> Pita li eli bhomu-o andjia lie, u au bha ibili Yesu kpi e kpi. Nani li nedhinga bhomu-o, omukpata andjili bha má bulu! U tsia pa nga nani engú ango-o pi kpála bini de.

*Yesu akobho ndili na bhobhoko bini li siti bua adu ato mbolo lie*

*(Tsia bhú Mat. 17:14-18; di ne bhú Mlk. 9:14-27.)*

<sup>37</sup> Li ekpí aseke lie, Yesu ne omukpata bata-a akø eta-o. Okpála bhelé atsia ago ngú nakø lio ne Yesu. <sup>38</sup> Bhú ká okpála bhomu-o, kpála bini aholo nasusula me: «Musuno, kikiliako, dje nga bha-a mbo ndjinga ndili gba ma na bhobhoko-o. Koli ani bha ka ma bini! <sup>39</sup> Siti bua ngagbulu ani piko. A ngaha pi ani natu 'ue. A ngadyiki ani kpekpeke má djigi djigi! Li efu holo naze bhú 'bhe ani. Bua ango-o le bha nakoto bhú ani pima. Li angu ani ndjia má ngba! <sup>40</sup> Ma akikiliki lima pi omukpata gba mu-o me u gbe bua ango-o bhú ani, engú bini, u ale pima.»

<sup>41</sup> Do Yesu de-e: «Ngayi okpála na naki-e, yi ne nabhuka ade, yi ngamene siti 'ngú. Ma adú matá ne yi bhú dabili bini ngubula ekpí madho? Ma akibila matá yi ngubula ekpí madho?» Pipita-a, Yesu apa pi kpála ango-o me: «Go ne ndili gba mu ei.»

<sup>42</sup> Li ndili-e adu ago lie, bua ango-o adyiki ani má djigi djigi! Ani atsia agu 'i ani kuto má gbwe! Abhomu-o, Yesu ambe bhú 'ndji siti bua ango-o. Ani akobho

ndili-o, ani atsia aha ani pi 'dyi e. <sup>43</sup> Ndu okpála hana adu angamba. U atsia aziba me Ebhe ne angu naali.

*Yesu akpo matá engú pindji nakpi gba e ko*

*(Tsia bhú Mat. 17:22-23; di ne bhú Mlk. 9:30-32.)*

Li ndu okpála hana adu angamba lie li ndu 'ngú li Yesu adu amene e, ani atsia apa pi omukpata gba e me: <sup>44</sup> «Yi dje engú ma adji apa e pi yi inde-e ndjindji. U apú ma, Ndili gba kpála-a, pi okpála na doto.» <sup>45</sup> Engú bini, omukpata gba ani-e mbila nani ta 'ngú bhomu-o de. Ebhe awo nani tata-a pi uo mawo. U atsia adu adje tsulu ngú nayi ani tété.

*A ngbéngbé da?*

*(Tsia bhú Mat. 18:1-5; di ne bhú Mlk. 9:33-37.)*

<sup>46</sup> Abhomu-o, omukpata aholo amene kpekebhe sunda o ngú nambila me, a ti da nadu ngbéngbé bhú ká o da. <sup>47</sup> Engú bini, li Yesu ambila engú inde u adu abhundja e li bua o-o lie, abhomu-o, ani aha mboye ndili bini, ani a'o ani de e. <sup>48</sup> Ani atsia apa pi uo me: «Kpála inde asia mboye ndili inde-e ka 'li ma-a, ani asia bhomu-o ma. Kpála inde asia ma-a, ani asia la di bhomu-o kpála inde atima ma ko. Padhá de, anga kpála inde ane ne mboye bhú ká yi hana-a, ani ane ne engbé ngae.»

*Kpála inde i yala yi de-e, a ko naayi kpála*

*(Tsia bhú Mlk. 9:38-40.)*

<sup>49</sup> Abhomu-o, Djaa adyudyo lie de ani, ani atsia apa pi ani me: «Musunu, ya au kpála bini ngapandja osisiti bua bhú okpála ne 'li mu. Ya di me yoko ani, anga a ko mukpata gba mu-o maka ya de.» <sup>50</sup> Engú bini, Yesu agie pi ani me: «Yi ayoko ani de, anga kpála inde i yala yi de-e, a ko naayi kpála.»

*Okpála na kuti bini na ndu doto na Samalia ayala nasia Yesu*

<sup>51</sup> Li nedhinga nagie lie ka Yesu abhúla a akolo lie masikpe-e, ani atsia aholo kpadji na Yelusalema ne kpeke bua hana.

<sup>52</sup> Ani atima obhulu titima kalanu bhú kuti bini na ndu doto na Samalia, ngú naleke ndu 'ngú hana pi ani ndjindji.

<sup>53</sup> Engú bini, ani adu la anu lie ne abhú Yelusalema-a, okpála na kuti bhomu-o atsia ayala nasia ani. <sup>54</sup> Omukpata Djaki ne Djaa au lie mo-o, u atsia apa pi Yesu me: «Ngámá, mo okunda me ya ha líli me mugbála yie abhúla, amba a go bhili uo?» <sup>55</sup> Engú bini, Yesu adji bhúla e ne li pápá gba uo, ani atsia ambe bhú 'ndji uo.† <sup>56</sup> Abhomu-o, u atsia agbida bhú kuti koko.

*Okpála bhende akunda nakpata Yesu*

*(Tsia bhú Mat. 8:19-22.)*

<sup>57</sup> U adu lie li kpadji-e, kpála bini apa pi Yesu me: «Ma akpáta mu li ndu bili mo onú lie hana.» <sup>58</sup> Yesu atsia apa pi ani me: «A ka onekpe di ne odhu ne dabili gba o ngú nasi tété. Engú bini, dabili ngú nago ka ma, Ndili gba kpála tété ade.» <sup>59</sup> Ani apa matá pi kpála koko me: «Kpata ma.» Engú bini, kpála ango-o apa pi ani me: «Ngámá, 'o nga ma, amba ma nú zi ngaiza 'dyi ma.»‡ <sup>60</sup> Yesu agie pi ani me: «'O okpála bhende amu-o, u zi okuo gba o-o, amba ngamu-o, mu nu naamu ne kpokpo ngali Nau gba Ebhe ko.» <sup>61</sup> Kpála koko apa matá pi ani me: «Ngámá, ma akpáta mu makpata. Engú la bini, 'o ngaiza ma, amba ma nu bhana lima pi opiga gba ma ko.» <sup>62</sup> Yesu agie pi ani me: «Li kpála bini holo namene kulu ne kengø-o, pipita ani tsia 'kpi ne sidi-e, kpála ango-o ti ne Nau gba Ebhe-e de.»

## 10

*Yesu atima omukpata ndjikpa mananika ne ká bhisi*

<sup>1</sup> Pipita-a, Ngámá Yesu alo omukpata koko ndjikpa mananika ne ká bhisi.\* Ani atsia atima uo bhisi bhisi kalanu bhú

† **9:55** 9:55 U aye bhú obhuku koko-o me: «Yi mbila ngua bua inde i ngagama 'ngú bhú yi-e de. Padhá de, anga ngama, Ndili gba kpála-a, ma go ngú nabhili okpála de, ma ago mangbo ngú nakobho uo.» Tsia bhú Luk. 19:10.

‡ **9:59** 9:59 A adu me 'dyi ani nde kpi nga nani-i de. Tsia bhú Eki. 20:12. \* **10:1** 10:1 U aye bhú obhuku koko-o me: «Ndjikpa mananika.»

ndu ogudhu ne ndu bili hana inde a ayo nako lie me, ani nu bha ngae makpe ko. <sup>2</sup> Ani atsia apa pi uo me: «Nguwa abhu 'dyi bhelé. Engú bini, okpála namene kulu ango-o bhelé ade. Yi yo ka bhulu edyi-e me ani tima okpála na kulu bhelé bhú edyi gba e ko. <sup>3</sup> Ma atima yi maka okandole bhú ká osia. Yi nunu! <sup>4</sup> Yi ahá falanga de. Yi ahá ehe nabi 'he bhúbhú de. Yi ahá maloke de. Yi adú ne lulu li kpadji-e ngú nayiyi okpála de.

<sup>5</sup> Yi li bhú 'ti bini-e, yi de pa ngaiza me: <Guo 'ngú gba Ebhe-e du bhú 'ti inde.> <sup>6</sup> Li kpála inde akunda guo 'ngú du bhú 'ti ango-o, li guo 'ngú gba yi-e dú bhú dabili bini ne ani. I du mo-o de-e, nayi na guo 'ngú gba yi-e gie lie pí yi. <sup>7</sup> Yi du bhú 'ti ango-o. I du me u nde aha ehe nazu mazú di ne bhe nandji mandji pi yi-e, yi de zu, amba yi ndji. Padhá de, anga a ayo me kpála na kulu sia makalá na kulu gba e ko. Yi adú asi bhú 'ti ngangá de.

<sup>8</sup> I du me yi nde ali bhú gudhu bini-e, li okpála na gudhu ango-o sia yi-e, yi de zu 'he inde u ahá e pi yi ko. <sup>9</sup> Yi kobho obhulu kuo inde bhú gudhu ango-o, amba yi pa pi ndu okpála hana me: <Nau gba Ebhe-e akolo de yi masikpe.>

<sup>10</sup> Engú bini, i du la me yi nde ali bhú gudhu bini-e, u sia yi de-e, yi de ze ali kpadji, amba yi pa me: <sup>11</sup> <Ya ngapulu belegu doto na gudhu gba yi inde adhedhe li 'dhu ya, ngú nasuno pi yi me yi amene siti 'ngú. Yi mbila la ndjindji me, Nau gba Ebhe-e akolo de yi masikpe.> <sup>12</sup> Ma apa pi yi me li 'kpí li Ebhe akódho 'ngú gba okpála lie, okpála na gudhu ango-o adjé likabhu naali ané okpála na Sodomu† mane.»

*Okuti inde ayala nabhuka Yesu  
(Tsia bhú Mat. 11:20-24.)*

<sup>13</sup> «'E-e! A ko likabhu pi yi okpála na gudhu na Koladjina! A ko likabhu pi yi okpála na gudhu na Betesaida! Padhá de, anga i du me ongamba 'ngú inde amene lie agba yi-e, i méne lie bhú ogudhu na Tile ne Sidona-a, okpála na ogudhu ango-o de adyi nani pili didili, u tsia túko

'mbi bhú 'ndji o ngú napana me u adji bua o adji. <sup>14</sup> Kaka-a, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Tile ne Sidona mane. <sup>15</sup> Ne yi di, okpála na Kapalanauma-a, yi abhundja naayi me u a'é'e yi abhúla-a? A mo-o ade. U abála yi bhú djua na duduma.»

<sup>16</sup> Do ani matá pi omukpata gba e me: «Li kpála bini dje yi-e, amba ani adje bhomu-o ma. Li kpála bini yala nasia yi-e, amba ani ayala bhomu-o nasia ma. Engú bini, li kpála bini yala nasia ma-a, amba ani ayala bhomu-o nasia kpála inde atima ma ko.»

*Omukpata ndjikpa mananika ne ká  
bhisi-e agie lio*

<sup>17</sup> Omukpata ndjikpa mananika ne ká bhisi-e agie lio me u nde abedhe ne djali bedhe. U atsia apa me: «Ngámá, osisiti bua ngamanga belegu ya ngao nedhinga ya ngaha líli pi uo lie ne 'li mu ko!» <sup>18</sup> Yesu atsia apa pi uo me: «Ma au Satana ayie abhúla aké kuto maka mugbálá. <sup>19</sup> Yi djedje nga, ma aha angu pi yi ngú nadele okpulu ne oapekebhe ne 'dhu yi di ne nandjia ndu angu gba bhulu yala gba yi-e hana. Ehe bini tí da namene yi sisiti de. <sup>20</sup> Engú bini, yi akpí djali ka li osisiti bua ngamanga yi lie de. Yi kpi mangbo djali ka li Ebhe aye 'li yi lie abhúla ko.»

*Yesu akpi djali*

*(Tsia bhú Mat. 11:25-27, 13:16-17.)*

<sup>21</sup> Bha li nedhinga ango-o makpe-e, Yesu abedhe nani ne djali bedhe ka Bu Bhobua . Ani atsia apa me: «Ma agie heni pi mu, 'Dyi ma, Ngámá na abhúla ne Ngámá na doto. Padhá de, anga engú inde mo opana e pi obhende imbilangu de-e, mo owo pi okpála na imbilangu di ne obhende amene balua má too! A moko, 'Dyi ma, anga mo okunda bha nani moko.

<sup>22</sup> 'Dyi ma, mo oha ndu 'he hana mu ma. Kpála bini mbila de me ngama, Ndili-e, ma ne da-ie, bha bini ngamu, 'Dyi ma. Kpála bini mbila la di de me ngamu, 'Dyi ma-a, mu ne da-ie, bha bini ngama,

† 10:12 10:12 Sodomu: A ko gudhu inde li Ebhe atsulu nani e ka siti 'ngú gba okpála ango-o. Tsia bhú Dje. 19:24-28.

Ndili gba m̄-o, la di ne okpála bhende li ngama, Ndili-e, ma akunda napana m̄ pi o ko.»

<sup>23</sup> Pipita-a, ani adji bhúla e li pápá gba omukpata gba e-o, ani atsia apa pi uo kpi o kpi me: «A ko djali pi yi, ngayi okpála i ngau engú inde yi ngau e ko! <sup>24</sup> Padhá de, anga ma apa pi yi me opolofeta di ne ongbengbe ongámási bhelé akunda nani nau engú yi ngau e inde, engú bini u u de. U akunda nani nadje engú yi ngadje e inde, engú bini u dje de.»

*Kpála bini na ndu doto na Samalia inde amene bádha 'ngú*

<sup>25</sup> Abhom̄-o, m̄suno bini na líli gba Moidje ayie bhúlá. Ani atsia ayi Yesu ngú nale ani me: «M̄suno, a ayo me ma mene pi ngubula me ma sia mukobho na duduma?» <sup>26</sup> Yesu agie pi ani me: «U aye bhú líli gba ní-e pi? Mo otatanga lie, m̄ djedje bhúbhú pi?» <sup>27</sup> Kpála ango-o atsia agie pi ani me: «A ayo me kunda Ebhe, Ngámá gba m̄-o, ne bua m̄ hana, ne mukobho gba m̄-o hana, ne angu gba m̄-o hana, ne mabhundja gba m̄-o hana», amba «M̄ kunda la di kilí m̄, maka mo okunda lim̄ lie makpe ko.»† » <sup>28</sup> Do Yesu pi ani me: «Mo ogie ndjindji. Mene moko, amba m̄ sia mukobho na duduma.»

<sup>29</sup> Engú bini, m̄suno na líli-e ango-o adu akunda nasuno me engú inde ni ayi e, a ngbingbili. Abhom̄-o, ani atsia ayi Yesu me: «Kilí ma-a, a ko da?»

<sup>30</sup> Do Yesu pi ani me: «Kpála bini ayie nani bhú Yelusalema, ani adu akò ne abhú Djeliko. Li kpadji-e, ani ati bhú 'kpa obhul̄ 'zi inde adu agbul̄ 'he gba okpála ne kpéke. U abha obongo gba ani-o. U abhi ani má kpú! U abha li-o-o, u agbida. U atsia a'o ka ani masikpe de nakpi. <sup>31</sup> Dimandè bini adu apu li kpadji ango-o. Ani au kpála ango-o lie me-e, ani abuma bha ani li pála kpadji koko, ani atsia atapa. <sup>32</sup> Kpála bini na piga gba Levi akolo di li bili li kpála ango-o adu lie-o.

Ani au ani lie, ani abuma bha ani li pála kpadji koko, ani atsia atapa.

<sup>33</sup> Engú bini, kpála bini na ndu doto na Samalia inde adu naae bhú dhuku li kpadji bhom̄-o, akolo de ani. Ani au ani lie, ani adje ndjinga ani naali. <sup>34</sup> Ani adyudyo lie de ani masikpe. Ani aha em̄ di ne vino,§ ani atuko li djila oeka gba ani-o, ani atsia agbite ne papala bongo. Ani aha ani, ani a'o ani pí 'ngbu punda gba e-o. Ani anu ne ani bhú 'ti gba ogomago. Oo, ani atsia alila ani ndjindji. <sup>35</sup> Li ekpí aseke lie, ani agbe lí falanga bhisi, ani aha pi bhul̄ eti-o. Ani atsia apa pi ani me: «Lila kpála inde-e ndjindji. I du me m̄ nde apu tia koko pi ani pí bhende-e, ma agie pi m̄ ngama, nedhinga ma apu matá lie sii ko.»

<sup>36</sup> Yesu atsia ayi m̄suno bhom̄-o me: «Mo obhundja naam̄ pi? Bhú ká okpála bata bhom̄-o, a ko kpála bhedho adu nani kilí kpála inde ati bhú 'kpa obhul̄ 'zi bhom̄-o?» <sup>37</sup> M̄suno na líli-e agie me: «A ko bhende adje ndjinga ani-o.» Yesu atsia apa pi ani me: «Nun̄, amba m̄ mene bhadi moko.»

*Yesu anu natsia Malata ne Malia*

<sup>38</sup> Li Yesu ne omukpata gba e adu lie li kpadji-e, ani ali bhú kuti bini. Oo, òlò bini adu 'li ani me Malata, ani atsia asia Yesu agba e. <sup>39</sup> Malata adu ne ndai e na òlò bini, adu 'li ani me Malia . Malia adu naae kuto bhú li 'dh̄ Yesu, ani atsia adu adje engú inde li Yesu adu apa e ko. <sup>40</sup> Bua Malata adu abhúlá ka bhiti kulu-o. Ani ago de Yesu, ani atsia apa pi ani me: «Ngámá, li ndai ma a'o ka ma lie namene ndu kulu hana kpi ma kpi me-e, m̄ bhundja 'ngú tété bini di? Pa ngala pi ani me, ani go ha mbo 'kpa e m̄ma.» <sup>41</sup> Ngámá agie pi ani me: «Malata, Malata, m̄ nga'o bua m̄ abhúlá, m̄ la di ngatutu lim̄ ngubula ongu bhelé. <sup>42</sup> La-a, a ndjindji ne koli 'he bini. Malia aha naae ehe inde ane ne bádha, inde li kpála bini dhépe e ka ani de.»

† **10:27** 10:27 Tsia bhú Det. 6:5; di ne bhú Lev. 19:18. nani ateteke odimandè li kulu bhú 'ngbé 'ti Ebhe gba omaYuda-o.

‡ **10:32** 10:32 Piga gba Levi: A ko okpála inde a adu

§ **10:34** 10:34 Vino du di nani ngú nabhili okoké bhú djila eka.

# 11

*Yesu asuno nakpokpo 'ngú ne Ebhe pi omukpata gba e-o*

*(Tsia bhú Mat. 6:9-13.)*

<sup>1</sup> A adu ekpí bini, Yesu adu akpokpo 'ngú ne Ebhe li bili bini. Ani andjia lie, saka omukpata gba ani-e atsia apa pi ani me: «Ngámá, suno nakpokpo 'ngú ne Ebhe pi ya, maka li Djaa asuno di lie pi omukpata gba e ko.» <sup>2</sup> Yesu atsia apa pi uo me: «Yi du akpokpo 'ngú ne Ebhe-e, yi de pa me:

«Dyi ya,

a ayo me, okpála mbila me, ma ne Ebhe na bubu;

a ayo me, ma go u Ngámá píla doto.

<sup>3</sup> Ha ezu gba ya na ekpí bini ne bini-e pi ya.

<sup>4</sup> Mbu li osisiti 'ngú gba ya ko.

A moko, ngaya makpe, ya ngambu di li osisiti 'ngú li okpála amene e li pabili gba ya ko.

Mo o'ó de me nale ha angu ya-a de.»»

<sup>5</sup> Yesu atsia apa matá pi uo me: «I du me saka yi bini nde ne kilí e, ani nu bhaka ani agba e tutu sukpe ngú napa pi ani me: «Wai, ha mbo mapa muma bata. <sup>6</sup> Kilí ma bini inde bhú dholo ago li ma oo, ehe la ka ma ngú nahaha pi ani ade.» <sup>7</sup> I du me bhende abhú 'ti-e nde agie pi ani me: «Mo ondála ma de! Ma ani bhoti-e ani. Ngaya ne ongisi gba ma-a, ya asili kuto asili. Ma ti da nayie bhúlá ngú naha mapa pi mu de.» <sup>8</sup> Ma apa pi yi na paká me, abana ani yie bhúlá ngú nahaha pi ani kabula mukunda gba o-o de-e, engú bini, ani ayie bhúlá ngú naha ndu 'he hana inde ani nde ne gumu e pi ani ka ani ngandala ani lie ko.

<sup>9</sup> Ngama-a, ma atsia apa pi yi me, yi yo 'he inde yi nde ne gumu e-o, amba Ebhe ha pi yi. Yi gili 'he inde yi nde ne gumu e-o, amba yi u. Yi bhi bhoti-o, amba Ebhe 'u pi yi. <sup>10</sup> Padhá de, anga ndu okpála hana inde ngayo 'he ani nde ne gumu e, ani ngasisia. Kpála bhende ngagili 'he inde ani nde ne gumu e, ani ngauu. Ebhe

nga'u bhoti pi kpála bhende ngabhibhi-o. <sup>11</sup> Bhú ká yi odyi ongisi-e, a ti da naha kpulu pi ndili gba e da, i du me ndili-e nde ayo ka ani sungu-o?» <sup>12</sup> I du me ani nde ayo ka ani pala 'ngu-o, ani tsia há pi ani apekebhe-e? <sup>13</sup> Belegu ngayi okpála na sisiti-e, yi ngaha babadha 'he pi ongisi gba yi-o. A ane la mane ne bádha pi 'Dyi yi inde abhúlá-a me ani ha Bu Bhobua pi obhende ngayoyo ka ani ko!»

*Yesu agbe siti bua inde adu ani 'bhø kpála-o*

*(Tsia bhú Mat. 12:22-30; di ne bhú Mlk. 3:22-27.)*

<sup>14</sup> Yesu adu agbe siti bua inde adu ani 'bhø kpála bhú bhoko bini. Li siti bua angu-o akoto lie, kpála angu-o aholo agama 'ngú. Abhomu-o, bhiti okpála inde adu oo angamba naali. <sup>15</sup> Okpála koko bhú ká uo atsia apa me: «Ngámá gba osisiti bua inde 'li e me Beledjebula ngaha angu pi ani ngae, ngú napandja osisiti bua ne di!»

<sup>16</sup> Okoko adu agili nale ani. Abhomu-o, u atsia apa pi ani me, ani mene ngamba 'ngú ngú napana me, angu gba ani-e ngayie abhúlá. <sup>17</sup> Engú bini, Yesu ambila mabundja gba uo-o lie, ani atsia apa pi uo me: «I du me okpála gba ngámá bini nde ngagu gbele sunda o, nau angu-o lú-u de. Li ndu eti hana túko. <sup>18</sup> I du me omaha Satana nde ngagu gbele sunda o-o, nau gba ani-e ti da nalu lele pi? Padhá de, anga yi ngapa me, ma ngapandja osisiti bua ne angu gba Beledjebula. <sup>19</sup> I du me ma nde ngapandja osisiti bua ne angu gba Beledjebula-a, okpála gba yi-e ngapandja uo ne angu gba da? Kaka-a, okpála gba yi-e akódho 'ngú gba yi-e ngao! <sup>20</sup> La-a, i du me ma nde ngapandja osisiti bua ne angu gba Ebhe na paká-a, apa bhomu-o me, Nau gba Ebhe-e akolo li yi akolo.

<sup>21</sup> Li kpála bini na angu inde li tia 'gú nde ka e ndjindji, du alila eti gba e-e, ehe bini dúla tia gba ani-e de. <sup>22</sup> Engú la bini, i du me kpála bini inde ane ani ne angu-o go, ani há egú pi ani, ani tsia há angu ani. Ani bhá ndu tia 'gú inde ani adu a'o bua

\* **11:11** 11:11 U aye bhú obhuku koko-o me: «Teme i du me u nde ayo ka ani mapa.»

e lie hana. Aní tsia gápa ndu 'he inde ani abha e ka ani-e hana.

<sup>23</sup> Kpála bhende pí ma ade-e, a ko yala ma. Kpála bhende í ha 'kpa e muma ngú napo bhúla okpála de-e, ani ngatsambala uo matsambala.»

*Siti bua ti da matá nagie lie*

*(Tsia bhú Mat. 12:43-45.)*

<sup>24</sup> «Li siti bua koto bhú kpála bini-e, ani nú ne djakadha abhú omili bilí† ngú nagili bilí nague ka e tété. Í du me ani nde u de-e, ani pá li bua e me: «Ma agie lima bhú 'ti gba ma inde ma akoto nako bhú e-o.» <sup>25</sup> Aní gie lie oo, ani bháka me u apo bhú 'ti-o, u aleke ndjindji. <sup>26</sup> Abhomu-o, ani nú, ani bhá osisiti bua koko mananika inde ane ani ne siti. U gie lio bhú dabili bini, u lí bhú 'ti-o, u tsia dúlu. Pipita-a, mukobho gba kpála ango-o, kólo la matá sisiti naali ane bhende na kalanu-o mane.»

*Djali na kukulu*

<sup>27</sup> Nedhinga ani adu apa 'ngú bhomu-o lie, elee bini atsia asula pí ani bhú ká okpála me: «A ko djali pí elee inde azu mu-o, inde di mo ondji 'ka e-o!» <sup>28</sup> Engú bini, Yesu agie me: «A ko djali mangbo pí okpála inde ngadje eli gba Ebhe di ne nalilila ko!»

*Yesu ayala namene ngamba 'ngú pí okpála*

*(Tsia bhú Mat. 12:38-42.)*

<sup>29</sup> Li bhiti okpála ago apo bhúla o lie de Yesu-o, ani atsia aholo apa me: «Okpála na naki inde-e sisiti. U ngayo ngamba 'ngú. Engú bini, Ebhe méne ngamba 'ngú bini pí uo de, bha bini bhende gba polofeta Djonasi. <sup>30</sup> Padhá de, anga maka li Ebhe aha nani Djonasi lie ngú napana ngamba 'ngú pí okpála na Ninive-e, Ebhe ahá bhadi ma, Ndili gba kpála-a, ngú napana ngamba 'ngú pí okpála na naki moko. <sup>31</sup> Ngámá na elee inde adu atsia 'kpí li ndu doto na Saba ayie nani tsutsu ngú nago nadje oeli na imbilangu gba 'ngbé ngámá Salomo. Li Ebhe akódho

'ngú gba okpála lie, ngámá na elee ango-o alú kala okpála na naki, ani tsia a'ó 'ngú pí uo. Kaka-a, kpála bini si, ani ane Salomo mane! <sup>32</sup> Okpála na Ninive adji nani bua o li nedhinga u adje ngali gba Ebhe inde li Djonasi adu akpokpo e lie-o. Li Ebhe akódho 'ngú gba okpála lie, okpála na Ninive alú kala okpála na naki, u tsia a'ó 'ngú pí uo. Kaka-a, kpála bini si, ani ane Djonasi mane!»

*Nadu li zi 'kpí*

*(Tsia bhú Mat. 5:15, 6:22-23.)*

<sup>33</sup> «Í du me kpála bini nde adhedhe eke-e, ani tó asa lusa de. Engú bini, ani 'ó pí 'he amba okpála inde ngali bhú 'ti-e, u u 'kpí tété ndjindji. <sup>34</sup> Djila mu ne zi 'kpí na kute mu. Li djila mu du ndjindji-e, ndu kute mu hana dú bhú zi 'kpí. Engú bini, li djila mu du sisiti-e, ndu kute mu hana dú bhú biti. <sup>35</sup> Tsia ndjindji me zi 'kpí inde bhú mu-o, adú biti de. <sup>36</sup> Í du me ndu kute mu hana nde li zi 'kpí-e, yá mu bini nde bhú biti ade-e, kute mu libhomu dú li zi 'kpí, maka li zi 'ke ngaziga mu lie má ngilili ko!»

*Yesu ambamba ta osisiti 'ngú gba omuFalisai di ne bhende gba omusuno na líli gba Moidje-o*

*(Tsia bhú Mat. 23:1-36; di ne bhú Mlk. 12:38-40.)*

<sup>37</sup> Li Yesu andjia nagama 'ngú lie, muFalisai bini atsia a'i ani agba e ngú nazu 'he. Aní alí abhú 'ti gba muFalisai-o, ani atsia aholo nazu 'he-o. <sup>38</sup> MuFalisai ango-o angamba naali, anga ani au me Yesu vulu lie kala nazu 'he-e de.‡

<sup>39</sup> Abhomu-o, Ngámá Yesu apa pí ani me: «Ngayi omuFalisai-e, yi ngavulu kute pápá di ne kute saani. Engú la bini, ngayi-e, yi abedhe ne 'ngbé bua di ne siti bua bhú yi bedhe. <sup>40</sup> Imbilangu bhú yi ade! Ebhe inde abho kute-e, ani bho di bua ngae di? <sup>41</sup> Kaka-a, yi ha mangbo pí obhulu ndibhili ehe bhende bhú opápá di ne bhú osaani gba yi ko. Yi mene mo-o, li ndu 'he hana kólo pí yi babadha.

† 11:24 11:24 Mili bilí: A ko bilí inde li engu nde lie ade, li kpála ti da di nasi kuti lie de. ‡ 11:38 11:38 OmuFalisai adu nani navulu lio kala nazu 'he ngubula nasuno me o naao ne obabadha okpála kala Ebhe.

<sup>42</sup> La-a, a ko likabhu pi yi, omuFalisai! Padhá de, anga yi ngaha bini bhú ká ndjikpa na oulu na sese ne ndu djedje ulu na abhú 'dyi-e hana pi Ebhe. La-a, yi mene engú na ngbingbili pi okpála de. Yi kunda la di Ebhe de. A la bhomu-o engú inde ayo me yi mene ngaiza e me, yi nde 'ili 'to yi li naha bini bhú ká ndjikpa na oehe gba yi-e pi Ebhe de ko. <sup>43</sup> A ko likabhu pi yi, omuFalisai! Padhá de, anga yi kunda bha nadulu pi dabili na akalanu bhú oti nadje líli gba Moidje . Yi kunda la di me okpála du ne yiyi yi maka ongámási li ohi-kpadji. <sup>44</sup> A ko likabhu pi yi! Padhá de, anga yi maka olata inde u 'o 'he pi e ngú nasusuno de, li okpála ngadhuku pi e me u nde mbila de!»

<sup>45</sup> Suka omusuno na líli-e apa pi ani me: «Musuno, mo opa lie mo-o, mo osobho di bhomu-o ya.» <sup>46</sup> Yesu atsia agie me: «A ko di likabhu pi yi, omusuno na líli! Padhá de, anga yi ngamene mugito me yi nga'o titili 'he li 'ngbu okpála. Engú la bini, ngayi makpe-e, yi 'o belegu likpa yi bini tété ngú nateteke uo de. <sup>47</sup> A ko likabhu pi yi! Padhá de, anga yi ngaleke olata opolofeta, inde li ogbi yi abhili nani o-o! <sup>48</sup> Yi ngapana bhomu-o me, yi aziba engú inde li ogbi yi amene nani e ko. Padhá de, anga ngauo-o, u abhili opolofeta, ngayi-e, yi la ngaleke olata uo! <sup>49</sup> Kaka-a, Ebhe ne imbilangu gba e, apa li 'ngú gba yi-e me: <Ma atima opolofeta di ne obhulu titima pi uo. U abhili okoko bhú ká uo, u tsia méne okoko sisiti.>

<sup>50</sup> Nayie maka li Ebhe abho nani doto lie, okpála atuko ngute opolofeta bhelé. Kaka-a, okpála na naki abí mangimbo angoo ngao. <sup>51</sup> Kalanu-o, u abhelo Abele. Ali soso-o, u abhelo Djakalia bhú mbadhasu na 'ngbé 'ti Ebhe gba omaYuda, sunda bili natsulu enu pi Ebhe ne titina na bubu-o. Ma apa pi yi na paká me, okpála na naki abí mangimbo na ngute okpála bhomu-o hana ngao!

<sup>52</sup> A ko likabhu pi yi, omusuno na líli! Padhá de, anga yi ani bhoti na imbilangu-o. La ngayi makpe-e, yi li de. Yi atsia ani

la di bhoti angoo pi obhende akunda nali-o.»

<sup>53</sup> Li Yesu ayie lie li bili bhomu-o, omusuno na líli ne omuFalisai aholo nepadha ani. U atsia aholo ayiyi ani li ongú bhelé bhelé. <sup>54</sup> Padhá de, anga u adu agili nagbo ani li 'li e.

## 12

*Yi du apa 'ngú mbámbá, yi adú ne tsulu de*

*(Tsia bhú Mat. 10:26-27.)*

<sup>1</sup> Nedhinga bhomu-o, bhiti okpála apo bhúla o de Yesu. U adu bhibhiti naali, kaka-a, u adu adedele 'dhu obi o. Abhomu-o, Yesu atsia aholo napa ngaiza pi omakpata gba e me: «'E-e! Yi lila liyi ka levile gba omuFalisai-e uu! Padhá de, anga u ngali bhú ndu ongú hana ne kali gba o-o maka li levile\* ngali bhú mapa lie hana ko. <sup>2</sup> Ndu 'ngú inde awo lie mawoo hana, akóto bhú mbasu. Ndu 'ngú inde na pepe hana, ndu okpála hana ambila. <sup>3</sup> Kaka-a, ndu 'ngú inde yi apá e sukpe-e hana, okpála adjé ne ngbikpi. Ndu 'ngú inde yi apá e bhú tupele abhú 'ti-e hana, okpála asúsula ne di bhú mbasu.»

*Kpála inde a ayo me yi kpe e ko*  
*(Tsia bhú Mat. 10:28-31.)*

<sup>4</sup> «Ma apa pi yi, ngayi ondaise ma me: yi akpé okpála bhende ngabhelo kute-e de, inde pipita-a, i ti da matá namene 'he bini de ko. <sup>5</sup> Ma asúno pi yi kpála inde a ayo me yi kpe e ko. Yi kpe Ebhe inde ka e ne angu ngú nabhili okpála. Pipita-a, ani ti da nabu uo bhú djua na daduma. A moko, ma apa pi yi me: yi kpe mangbo ani!

<sup>6</sup> U tsitsindji odjedje odhu bhuluvue ngubula senge bhisi di? La-a, Ebhe 'ili 'to e li suka uo bini de. <sup>7</sup> Ebhe mbila belegu alo na sundjo yi-e hana. Yi adjé tsulu de, bhú djila Ebhe-e, yi ane bhiti odjedje 'dhu bhomu-o mane!»

*Okpála ayála Yesu-o, Yesu ayála di uo*  
*(Tsia bhú Mat. 10:32-33, 12:32.)*

<sup>8</sup> «Ma apa pi yi me: kpála inde apá li ma bhú ká djila okpála me ni ne naama

\* 12:1 12:1 Li bili inde-e, levile ngasuno ehe na sisiti.

kpála-a, ngama, Ndili gba kpála-a, ma apá bhadi li ani bhú ká djila oandjelu gba Ebhe-e me, a ko naama kpála. <sup>9</sup> Engú bini, kpála inde apá li ma bhú ká djila okpála me ni mbila ma de-e, ngama, Ndili gba kpála, ma apá bhadi li ani bhú ká djila oandjelu gba Ebhe-e me, ma ambila ani de.

<sup>10</sup> I dɔ me kpála bini nde apa siti 'ngú li kute ma, Ndili gba kpála-a, li Ebhe mbú li ani. I dɔ la me kpála bini nde asobho Bu Bhobua-a, Ebhe mbú li ani de.

<sup>11</sup> Nedhinga u anú lie ne yi bhú oti nadje líli gba Moidje, di ne kala ongámási inde ngatsia 'kpí li doto me u kodho 'ngú gba yi-e, yi adjé tsulɔ de me yi akóbho li mangua kpadji dho-ie de, di ne me yi apá pi-ie de. <sup>12</sup> Padhá de, anga li nedhinga bhomɔ-o, Bu Bhobua asúno pi yi ngae engú inde a ayo me yi pa e-o.»

### *Mukobho gba kpála ane tia*

<sup>13</sup> Abhomɔ-o, kpála bini bhú ká okpála apa pi Yesu me: «Mɔsuno, pa pi ndai ma me ani ha naama tia na libhondi 'dyi ya-a mɔma haha.» <sup>14</sup> Yesu agie pi ani me: «Wai, a'o ma kpála nakodho 'ngú di ne nagbogbo bhɔsɔ otia gba yi-e da?» <sup>15</sup> Ani atsia apa pi ndɔ uo hana me: «'E-e! Yi lila liyi ka gɔmɔ tia na doto uu, anga belegɔ li tia dɔ bha ka kpála bhelé-e, mukobho gba ani-e dɔ bhúbhú de.»

<sup>16</sup> Abhomɔ-o, ani atsia akpokpo gbitaku inde-e pi uo me: «Kpála bini na tia adɔ nani ne odyi bhelé inde aha nguwa pi ani naali. <sup>17</sup> Ani adɔ ayi li bua e me: <Ma améne si pi? Dabili ka ma ngú nalila nguwa gba ma-a tété hana ade.>

<sup>18</sup> Pipita-a, ani me: <Ma ambila engú inde ma améne e ambila! Ma apándjala ongbokopi gba ma-o, ma ayiki ibili obhe na ngbengbengbe. Ma bú nguwa ne otia gba ma-a hana bhúbhú. <sup>19</sup> Abhomɔ-o, ma tsia pá li bua ma me, tia ka ma bhelé ngubula bhiti kalanga. Ma guo ngala mbo guguo. Ma zɔ babadha 'zɔ, ma ndji pandi, amba ma kpi djali.> <sup>20</sup> Engú bini, Ebhe pi ani me: <Mɔ ne ngingi! Sukpe na naki-e, mɔ ngakpi. Ndɔ 'he inde mo opo bhúla e hana-a atígala pi da?>» <sup>21</sup> Yesu apa matá

me: «A bhadi moko pi kpála inde ngapo bhúla tia pi e makpe, me ani nde gili nadɔ bhulɔ tia li pápá gba Ebhe de ko.»

### *Yi ha liyi pi Ebhe*

*(Tsia bhú Mat. 6:25-34.)*

<sup>22</sup> Pipita-a, Yesu atsia apa pi omɔkpata gba e me: «Kaka-a, ma apa pi yi me: yi akína liyi ngubula ezɔ inde yi nde ne gɔmɔ e ngú mukobho gba yi-e de. Yi akína di liyi ngubula obongo inde yi nde ne gɔmɔ e ngú kute yi-e de. <sup>23</sup> Padhá de, anga mukobho gba yi-e ane ezɔ. La di-e, kute yi ane bongo. <sup>24</sup> Yi tsia nga odhu, u lulu 'dyi de. U popo bhúla nguwa de. Dabili ngú naleke 'zɔ ka uo tété ade. Ngbokopi ka uo ade. La-a, Ebhe ngakɔ uo! Mukobho gba yi-e, ane bhe gba odhu-o tsutsu naali!

<sup>25</sup> A ko da bhú ká yi-e, inde ka nakina lie, i ti da nadyudyo ekpi na mukobho gba e nga bha mbo ne ekpi bini-e? <sup>26</sup> I dɔ me yi nde ti da namene belegɔ de mboye ehe bhomɔ-o, yi la ngakina liyi ngú ongú koko ka ni? <sup>27</sup> Yi tsia nga ofelele abhiye. U memene kulu de. U dɔdɔ bongo de. Ma apa la pi yi me, belegɔ 'ngbé ngámá Salomo bhú ndɔ ká tia gba e hana-a, ani sia bongo bini ane ne bádha maka sɔsɔka de. <sup>28</sup> I dɔ me Ebhe nde ngadyi bongo li ulu inde naki abhiye, mambi u tsia bhíke e bhú djua-a, ani ti da nadyi bongo li yi ane mane di? Ngayi okpála inde li nabhuka gba yi-e nde yeye!

<sup>29</sup> Kaka-a, yi a'ó bua yi abhúlá ngú nagili ezɔ inde yi azú e, ne ehe bhende yi andji e de. <sup>30</sup> Omɔpagano, okpála na doto inde-e, u ngagili ehe bhomɔ-o ndɔ 'kpí hana ngao. Engú bini, 'Dyi yi Ebhe mbila hana me yi ne gugumɔ. <sup>31</sup> Yi gili nga mangbo namene ongú inde li Nau gba Ebhe-e akunda e ko. Yi mene mo-o, li Ebhe tsia há di ndɔ 'he koko pi yi hana pépé.»

### *Yi wo tia gba yi-e abhúlá*

*(Tsia bhú Mat. 6:19-21.)*

<sup>32</sup> «Ngayi okpála gba ma, inde bhelé ade-e, yi adjé tsulɔ de. Padhá de, anga 'Dyi yi Ebhe au ndjindji me yi dɔ ongámási bhú Nau gba ani-e, maka



ngaani 'Dyi yi, ni nde lie ne Ngámá ko. <sup>33</sup> Yi tsindji ohe gba yi-o, amba yi ha tiatia, yi ha pi obhulú ndibhili. Yi bho pi yi oti bongo inde i kádha de. Yi wo tia gba yi-e abhúlá, li bili i síti lie de. Obhulú 'zi ti da nakolo tété de. Okoké ti la di da nazuzú de. <sup>34</sup> Padhá de, anga bili inde li tia gba yi-e nde lie, bua yi bhadi oo ko.»

*Okpála na kulu inde i ngalila*

<sup>35</sup> «Yi dū bedhe ngubula kulu maka kpála inde adyi bongo na kulu, ani atsia adhedhe eke gba e madhedhe. <sup>36</sup> Yi dū bedhe maka okpála inde i ngadjeke ngámá gba o me, ani nde atapa bhú anokomiá na káva. U ngadjeke me u 'u bhoti-e pi ani má gala, li nedhinga inde ani agó nabhibhi lie ko. <sup>37</sup> A ko djali pi okpála na kulu inde li ngámá gba o akólo lie, ani bháka me u nde la de ko! Ma apa pi yi na paká me, ani dyí bongo na kulu gba e-o, ani 'í uo ngubula nazú 'he. Ani tsia há ezú-o pi uo. <sup>38</sup> A ko djali pi uo, i dū me ani nde abhaka me u nde la de ko, belegu ani go tutu sukpe, belegu ani go bhú sikikpi! <sup>39</sup> Yi mbila ndjindji me, i dū me bhulú eti mbíla nedhinga inde li bhulú 'zi agó lie mambíla-a, ani de 'ó de me ani li abhú 'ti gba ni-e de. <sup>40</sup> Ngayi di-e, yi dū bedhe. Padhá de, anga yi mbíla nedhinga li ngama, Ndili gba kpála-a, ma agó lie de.»

*Kpála na kulu na ngbingbili di ne kpála na kulu na sisiti*

*(Tsia bhú Mat. 24:45-51.)*

<sup>41</sup> Abhomú-o, Piele atsia ayi ani me: «Ngámá, mo opa gbitaku inde-e bha bini pi ya kpi ya kpi? Ne me, mo opa pi ndū okpála hana.» <sup>42</sup> Ngámá agie pi ani me: «Kpála na kulu na ngbingbili ne imbilangu-o, a ko bhedho? A ko kpála bhende li ngámá gba e a'o e ngú nalila eti gba e-o, di ne nagapa ezú pi okpála koko na kulu, i dū me nedhinga angoo nde akolo-o. <sup>43</sup> A ko djali pi kpála na kulu angoo, i dū me ngámá gba ani-e nde agie lie agba e, ani tsia bhaka me ani nde ngamene kulu gba e ko! <sup>44</sup> Ma apa pi yi na

paká me, ngámá bhomu-o 'ó ani pí 'ndji ndū 'he gba e hana. <sup>45</sup> Engú bini, i dū me kpála na kulu angoo nde apa li bua e me: <Ha-a! Ngámá gba ma-a gó má gala de.> Ani hólo nabhi obi e na obhosibhosi di ne obhe na olisilisi-o. Ani hólo nazú 'he, nandji pandi ne nalangba ne di. <sup>46</sup> Ngámá gba ani-e gíe lie li ekpí ani djeke ani lie de, li nedhinga inde ani mbíla e de. Ngámá gba ani-e 'é ani bhú kulu, ani tsia 'ó ani bhú ká okpála na sisiti.†

<sup>47</sup> I dū me kpála na kulu nde ambíla engú li ngámá gba e akúnda e, engú bini ani tsia leke lie ngú namemene maka li ngámá angoo akúnda lie de-e, kaka-a, u bhí ani naali. <sup>48</sup> La-a, i dū me kpála na kulu nde mbíla 'ngú li ngámá gba e ngakúnda e de-e, ani mene engú inde a ayo me u bhi ani ka e, u bhí ani naali de. Padhá de, anga kpála bhende u aha 'he pi e bhelé-e, u ayó bhadi 'he ka ani bhelé. Kpála bhende u a'o 'he sa 'kpa e bhelé-e, u ayó matá ehe ka ani pépé ane mane.»

*Yesu ago ngú nagbogbo bhusu okpála (Tsia bhú Mat. 10:34-36.)*

<sup>49</sup> «Ma ago ngú nabhike djua píla doto. Ma akúnda me adū atsi matsi! <sup>50</sup> A ayo me ma sia batisimo na likabhu. La-a, likabhu li bua ma naali akólo li 'kpi inde ma asía lie ko! <sup>51</sup> Yi abhundja naayi me ma ago ngú na'o guo 'ngú píla doto? Ma apa pi yi me, a mo-o ade. Ma ago mangbo ngú nagbogbo bhusu okpála. <sup>52</sup> Nayie pi mbíla inde-e, piga bini na okpála bhuluvue agbó bhusu e, bata ayála bhisi, li bhisi yála bata.

<sup>53</sup> 'Dyi ndili ayála ndili na bhobhoko gba e-o,

li ndili-e yála 'dyi e.

'Hi ndili ayála ndili na eelə gba e-o,

li ndili-e yála 'hi e.

Ogbi na eelə ayála eelə gba ndala e,

li eelə gba ndili-e yála ogbi e. †»

*Yi mbíla engú inde ngakodho 'kpi mbíla inde-e ko*

*(Tsia bhú Mat. 16:2-3.)*

† 12:46 12:46 U aye bhú obhuku koko-o me: «U kókodho bhusu ani má mbi mbi mbi!» † 12:53 12:53 Tsia bhú Mik. 7:6.

<sup>54</sup> Yesu apa matá pi okpála me: «Yi u me ebha ngago ne kati, yi kolo pá me: «Ebha inde-e adhi madhi.» I tsia méne la bhadi lie moko. <sup>55</sup> Yi dje anvi me a nde ngayie li pápá na yoyoko, yi pá me: «Ekpí-e akpá naali.» I tsia méne la bhadi lie moko. <sup>56</sup> Ngayi obhulú kali inde-e! Yi mbila engú inde ngakodho 'kpí abhulá ne bhende pála doto-o hana. La ka ni, yi kunda nambila engú inde ngakodho 'kpí li nedhinga inde-e lie de-e?»

*Yi dje liyi ne kpála inde yi nde ne e bhú 'ngú ko*

*(Tsia bhú Mat. 5:25-26.)*

<sup>57</sup> «Ka ni, ngayi makpe, yi mbila nakodho 'ngú na ngbingbili inde ayo namene e lie de-e? <sup>58</sup> I du me yi nde bhú 'ngú ne kilí mu-o, ani du anú ne mu bhú djila okpála nakodho 'ngú-o, mu de mene ne kpéke me yi dje liyi ne ani li kpadji. Mu ngakpe bhomu-o me, ani anú ne mu pi kpála nakodho 'ngú-o de. Li kpála nakodho 'ngú-o há mu pi osudha de. Li osudha-a tsia bhíke mu bhú tikpu de. <sup>59</sup> Ma apa pi mu me, mu kóto bha oo me, mu nde agie ndu bopulu gba mu-o hana má kpəkəbhə!»

## 13

*Ebhe nga'i okpála me u dji bua o*

<sup>1</sup> Abhomu-o li nedhinga ango-o, okpála koko ago akpokpo pi Yesu me: «Pilate abhili okpála koko na Galilaya me u nde ngatsulu enu pi Ebhe.» <sup>2</sup> Ani agie pi uo me: «Yi abhundja naayi me, i du me Pilate nde abhili uo mo-o, a akunda napa me u adu sisiti ane ndu okpála koko na Galilaya hana? <sup>3</sup> Ma apa pi yi me, a mo-o ade. Engú bini, i du me yi nde dji bua yi de-e, ndu yi hana, yi amú bhadi maka uo. <sup>4</sup> Yi bhundja okpála ndjikpa ne ká madjina nani li 'ndjá 'ti na Silue abhili o-o. Yi abhundja naayi me u adu nani sisiti ane ndu okpála koko na Yelusalema hana? <sup>5</sup> Ma apa pi yi me, a mo-o ade. Engú bini, i du me yi nde dji bua yi de-e, ndu yi hana, yi amú bhadi maka uo.»

*Ndula na figi inde i li lílí de*

<sup>6</sup> Pipita-a, Yesu atsia apa gbitaku inde-e pi uo me: «Kpála bini alu nani ndula na figi bhú edyi gba e na vino. Ekpí bini, ani ago nagili lílí bhúbhú. La-a, ani u belegu de bini. <sup>7</sup> Abhomu-o, ani atsia apa pi kpála na kulu gba e me: «Tsitsia nga, a ko mbia inde-e kalanga bata, ma ngago agili lílí bhú ndula inde. La-a, ma u belegu de bini. Dede! A ngangí bili padhá ka ni?» <sup>8</sup> Engú bini, kpála na kulu-o agie pi ani me: «Ngámá, 'o nga matá ndula ango-o li kalanga inde, amba ma dji doto bhú lili ngbalina, ma tuko doto na eká bhúbhú. <sup>9</sup> Koko bhú kalanga na sidi-e, i lí lílí. I du la me a nde li lílí de-e, mu tsia dé.»»

*Yesu akobho ələ bini na kuo bhú 'kpí naguo gba omaYuda*

<sup>10</sup> Li 'kpí bini naguo gba omaYuda-a, Yesu adu asuno bhú 'ti nadjé lílí gba Moidje-o. <sup>11</sup> A abhaka me ələ bini na kuo nde oo. Sunda kalanga ndjikpa ne ká madjina, siti bua adu bhú ani. Siti bua ango-o atsia adu anu 'ngbu ani. Kaka-a, ani ale nani nali lie pima. <sup>12</sup> Li Yesu au ələ ango-o lie, ani a'i ani. Ani atsia apa pi ani me: «'Hi ma, kuo gba mu-o ayie.» <sup>13</sup> Ani abu 'kpa e pi ani, kolo má gala me-e, ani ali lie má ngbuu! Ani atsia aholo nadhəgə Ebhe.

<sup>14</sup> Engú bini, ngámá na eti nadjé lílí-e ake 'ngú lie naali, ka li Yesu akobho kpála lie bhú 'kpí naguo-o. Do ani pi okpála inde adu oo me: «A ne 'kpí madhia ngú namene kulu. Yi go li okpí bhomu-o, ngubula me u kobho yi ne okuo gba yi ko. Engú bini, yi agó bhú 'kpí naguo de!» <sup>15</sup> Abhomu-o, Ngámá Yesu atsia agie pi ani me: «Yi ne obhulú kali! Li 'kpí naguo-o, yi bhuhulu bagala di ne punda gba yi-e bhú 'ti o, ngú nanu ne uo me u ndji 'ngu di? <sup>16</sup> Ələ inde-e, ani bhú piga gba Abalahama. Satana agbite ani kalanga ndjikpa ne ká madjina. A ayo de me u bhulu ani li 'kpí naguo di?» <sup>17</sup> Li Yesu agie pi uo lie mo-o, ndu obhulú yala gba ani-e hana atsia asia numu. Engú bini, ndu okpála hana adu akpi djali ka ndu obabadha kulu hana inde ani adu amene e ko.

*Gbitaku pindji lí ndula u a'í e me mutadi*

(*Tsia bhú Mat. 13:31-32; di ne bhú Mlk. 4:30-32.*)

<sup>18</sup> Abhomu-o, Yesu atsia apa me: «Naṁ gba Ebhe-e , a maka ni? Ma ti da napapana li ni? <sup>19</sup> A maka lí ndula na mutadi. Kpála bini aha, aní alu bhú 'dyi gba e-o. A akè, a akolo 'ngbé ndula. Odhu atsia ayiki 'ti o bhú oyáyá ko.»

*Gbitaku pindji levile*

(*Tsia bhú Mat. 13:33.*)

<sup>20</sup> Do Yesu matá me: «Ma ti da napana Naṁ gba Ebhe-e li ni? <sup>21</sup> A maka levile inde li èlè bini aha e. Aní atsia akpèdhèlè ne bhiti faline akólo li nedhinga li faline hana afúka lie ko.»

*Yi li li bhoti na yeye*

(*Tsia bhú Mat. 7:13-14, 21-23.*)

<sup>22</sup> Yesu aholo 'nú bhú Yelusalema. Li aní adu anu lie oo, aní adu apu bhú ogudhu ne bhú okuti me aní nde ngasuno Bádha Ngali pi okpála. <sup>23</sup> Kpála bini ayi aní me: «Ngámá, Ebhe akóbho bha okpála masudha?» Abhomu-o, Yesu atsia agie pi uo me: <sup>24</sup> «Yi mene ne kpéke me yi li li bhoti na yeye-o. Padhá de, anga ma apa pi yi me, okpála bhelé agili me ni li, engú la bini u alé pima.

<sup>25</sup> A maka me li nedhinga li bhulu 'ti-e ayie bhulá lie, aní ní bhoti-o. Pipita-a, yi dúlu akilidjo. Yi hólo nabhi bhoti-e me yi nde ngapa me: «Ngámá, 'u bhoti-e pi ya.» Aní tsia gie pi yi me: «Ma mbila bili li yi ayie lie de!» <sup>26</sup> Abhomu-o, yi tsia pá pi aní me: «Ní azu nani 'he, ní andji di pandi ne yi bhú dabili bini. Mo otsia asuno li okpadji gba ya-o.» <sup>27</sup> Aní tsia gie pi yi me: «Ma mbila bili li yi ayie lie de. Ngayi osisiti okpála, yi yie de ma oo ko!» <sup>28</sup> Nedhinga yi aú Abalahama, Isaka, Yakobho di ne ndu opolofeta hana lie bhú Naṁ gba Ebhe-e, li Ebhe tsia bála la naae yi akilidjo! Oo, yi adú aku 'gbá di ne nazu tate yi. <sup>29</sup> Okpála ayie ne 'dje doto badha hana, u tsia gó bhú anokomia bhú Naṁ gba Ebhe ko. <sup>30</sup> Abhomu-o, okpála koko

inde asidi mbia inde-e, u akólo akalanu. Li obhe koko inde akalanu mbia inde-e, u tsia kólo asidi.»

*Yesu li kpadji na Yelusalema*

(*Tsia bhú Mat. 23:37-39.*)

<sup>31</sup> Li nedhinga ango-o, omuFalisai koko ago apa pi Yesu me: «Yie si mayie, anga ngámá Elode ngakunda nabhèlè mu.» <sup>32</sup> Yesu atsia agie pi uo me: «Yi nu pa pi bhulu kali maka nekpè bhomu-o me: «Ma ngapandja osisiti bua bhú okpála. Ma di ngakobho okpála na kuo naki di ne mambi. Ma tsia ndjia kulu gba ma-a bhú 'kpí na bata.» <sup>33</sup> Engú bini, a ayo me ma kpata kpadji gba ma-a, naki, mambi di ne ekpí na bata. Padhá de, anga a ayo de me, okpála bhèlè polofeta li bili koko de, bha bini abhú Yelusalema.

<sup>34</sup> Aa! Ngayi, okpála na Yelusalema-a, yi ngabhili opolofeta! Yi la di ngabhili ne teme okpála inde li Ebhe atima o agba yi-o! A ko bhutsibhutsi madho ma akunda napo bhúla yi maka li 'hi 'ngu apopo bhúla ongisi gba e lie sa mbudha e-o. La-a, yi tsia kunda de! <sup>35</sup> Mbia inde-e, kuti gba yi-e atigala padhá. Ma apa pi yi me, yi ú matá ma belegu de bini akólo li nedhinga inde yi apá lie me: «A ayo me Ebhe tuko bisagu pí kpála inde ngago ne 'li aní ko!†»

## 14

*Yesu akobho kpála na kuo li 'kpí naguo gba omaYuda*

<sup>1</sup> A akolo ekpí bini, ekpí naguo gba omaYuda-a , Yesu anu nazu 'he agba saka ongámási gba omuFalisai-o . Okpála inde adu oo adu atsia Yesu ne kpéke djila. <sup>2</sup> Abhomu-o, kpála bini inde li kute e asisika ne engu adu kala ani. <sup>3</sup> Yesu ayi omusuno na líli gba Moidje ne omuFalisai-e me: «Líli gba ní aziba nakobho kpála li 'kpí naguo? Ne me a ziba de.» <sup>4</sup> Engú bini, u andjili bha má bulu! Abhomu-o, Yesu aha 'kpa bhulu kuo-o, aní akobho aní. Aní atsia apa pi aní me aní gie lie agba e. <sup>5</sup> Pipita-a, aní pi uo me: «Belegu li 'kpí naguo-o, li saka

† 13:35 13:35 Tsia bhú Djlm. 22:5; di ne bhú Ets. 118:5. u aye me «punda.»

\* 14:5 14:5 Ongisi na obhosibhosi: Bhú obhuku koko-o

ongisi gba yi na bhosibhosi-e,\* i dɛ di-e sɔka bagala gba yi-e ti bhú 'dú 'ngu-o, yi kolo gbé ani má gala! A mo-o adi?»<sup>6</sup> U mbila engú bini inde u agie e tété-e de.

### *Yi kò l̩y̩i ne kuto*

<sup>7</sup> Yesu au me okpála inde u a'i o-o ngadulɔ pí odabili na akalanɔ. Abhomɔ-o, ani atsia apa gbitaku inde-e pí ndɔ uo hana me: <sup>8</sup> «Li kpála bini 'i mɔ bhú anokomia na kɔva-a, mo onú adɔ pí dabili na akalanɔ de. Padhá de, anga mɔ mbila de me, u a'i kpála koko inde ane mɔ mane e-e de. <sup>9</sup> I dɛ mo-o, li kpála inde a'i ndɔ yi bhisi hana gó pa pí mɔ me: «'O ka dabili bhomɔ-o pí ani.» Abhomɔ-o, mɔ nú ne nɔmɔ hana, mɔ tsia dú asidi. <sup>10</sup> Engú bini, li kpála bini 'i mɔ bhú anokomia-a, mɔ de nɔ dɛ pí dabili na asidi, amba li kpála inde a'i mɔ agó lie, ani de pa pí mɔ me: «Ndai ma, dyudyo limɔ ne akalanɔ.» Li ndɔ okpála bhende yi ngazɔ 'he ne o-o hana, tsia ú mɔ me, mɔ ne 'ngbé kpála. <sup>11</sup> Padhá de, anga i dɛ me kpála nde nga'o lie ne abhúlá-a, li Ebhe ké ani ne kuto. I dɛ la me kpála nde nga'o lie ne kuto-o, li Ebhe 'é'e ani ne abhúlá.»

### *A ayo na'i da bhú anokomia gba mɔ-o?*

<sup>12</sup> Pípita-a, Yesu apa pí kpála inde a'i ani-e me: «Li mɔ 'i okpála ngú nazɔ 'he tulukpe, i dɛ di-e tagolo-o, mo o'í obi mɔ de. Mo o'í ondaise mɔ de. Mo o'í okpála na piga gba mɔ-o de. Mo o'í la di okpála na tia inde asili kuti lingo mɔ-o de. Padhá de, anga ngauo-o, u 'í di mɔ li 'kpí koko, u tsia gie ehe inde mo omene e pí uo-o pí mɔ. <sup>13</sup> Engú bini, li mɔ 'i okpála bhú anokomia-a, 'i obhulɔ ndibhili. 'I okpála na eze. 'I obhende ne eze li 'dhɔ o-o di ne obhende i u 'kpí de ko. <sup>14</sup> Mɔ mene mo-o, mɔ dú ne djali, anga u ti da nagie 'he bini pí mɔ de. Ebhe agie pí mɔ li 'kpí li okpála na ngbingbili-e azúku lie ko.»

### *Gbitaku p̩ndj̩i 'ngbé anokomia (Tsia bhú Mat. 22:1-10.)*

<sup>15</sup> U adje 'ngú bhomɔ-o lie, sɔka okpála inde adɔ azɔ 'he bhú dabili bini ne Yesu-o atsia apa pí ani me: «A ko djali pí kpála inde azú anokomia bhú Nau gba

Ebhe-o !»<sup>16</sup> Do Yesu pí ani me: «Kpála bini amene 'ngbé anokomia. Ani atsia a'i okpála bhelé ngánga. <sup>17</sup> A akolo lie li nedhinga nazɔ 'he-e, ani atsia atima kpála na kulu gba e ngú napa pí okpála inde ani a'i o-o me: «Ezɔ-o abhɔ, yi gógo.» <sup>18</sup> Kpála ne kpála aholo ayo ka ani me ani mbu li ni. Bhe na kalanɔ-o apa pí ani me: «Ma akala edyi, a ayo me ma nɔ natsitsia. Ma ayo ka mɔ me mbu li ma.» <sup>19</sup> Koko apa pí ani me: «Ma akala obagala ndjikpa ngɔbula kulu na edyi. Ma adji nale uo. Ma ayo ka mɔ me mbu li ma.» <sup>20</sup> Koko atsia apa matá me: «Ma aha elɔ mbia inde. Kaka-a, ma ti dá nanɔ-u de.»

<sup>21</sup> Kpála na kulu-o agie lie agba ngámá gba e-o. Ani atsia akpokpo 'ngú bhomɔ-o pí ani. Abhomɔ-o, ngámá-a aholo ake 'ngú lie. Ani atsia apa pí kpála na kulu gba e me: «Nɔ má gala bhú odaposo, di ne li okpadji. 'I obhulɔ ndibhili. 'I okpála na eze. 'I obhende i u 'kpí de, di ne obhende ne eze li 'dhɔ o-o.» <sup>22</sup> Pita nedhinga masudha-a, kpála na kulu ago, ani atsia apa me: «Ngámá, ma amene líli gba mɔ-o amene. Engú bini, dabili nga bha uu.» <sup>23</sup> Abhomɔ-o, ngámá atsia apa pí kpála na kulu gba e me: «Nɔ li okpadji 'dyi, lingo oaga na edyi, mba okpála ne kpéke, amba eti gba ma-a bedhe bedhe. <sup>24</sup> Padhá de, anga ma apa pí yi me, okpála inde ma a'i o kalanɔ-o, sɔka uo bini zú anokomia gba ma-a de!»

### *Yi 'o ka ndɔ 'he hana ngú nakpata Yesu (Tsia bhú Mat. 10:37-38.)*

<sup>25</sup> Ekpí koko-o, li okpála bhelé adɔ adhukɔ lie bhú dabili bini ne Yesu-o, ani adji bhúla e li pápá gba uo-o, ani atsia apa pí uo me: <sup>26</sup> «Kpála inde akunda akpata ma-a, a ayo me ani yala 'dyi e ne 'hi e. Ani yala wala e ne ongisi gba e-o. Ani yala ondaise e na obhosibhosi, di ne obhende na olisilisi, amba ani yala belegu mukobho gba e makpe ko. I dɛ mo-o de-e, ani tí da nadɔ mukpata gba ma-a de. <sup>27</sup> Kpála inde i kunda nabi kulusi gba e de-e, inde i kpata ma de-e, ani tí da nadɔ mukpata gba ma-a de.»

28 I dɔ me sɔka yi nde akɔnda nayiki 'ngbé 'ti-e, ani dú ngaiza kuto. Ani tsia hólo nabhundja ngú nambila me tia ka ni bhelé ngú nandjia kulu ango-o. 29 I dɔ mo-o de-e, ani 'o 'dhu 'ti-e, pipita ani tsia ndjia eti-e de-e, ndɔ okpála hana inde aú-o, u hólo namɔ ani. 30 U tsia dú apa me: <Yi tsia nga kpála inde, ani akpo nako lita nayiki eti. Engú bini, ani ndjia de!> 31 A bhadi moko, i dɔ me 'ngbé ngámá bini nde akɔnda nagɔ 'gú ne 'ngbé ngámá koko, ani dú ngaiza kuto. Ani holo nabhundja ngú nambila me, ne okpála kutu ndjikpa-a, ni ti da nagɔ 'gú ne 'ngbé ngámá inde ka e ne okpála kutu ndjikpa bhisi-o. 32 I dɔ mo-o de-e, ani tíma obhɔlɔ titima pi 'ngbé ngámá ango-o nedhinga ani nde nga bha lie tsutsu-o. Ani tsia yí ani me: <A ayo namene pi ngubula me egú adú-u de-e?>» 33 Abhomɔ-o, Yesu atsia apa matá me: «Sɔka yi bini ti da nadɔ mukpata gba ma-a de, i dɔ me ani nde 'o ka ndɔ 'he gba e hana de ko.»

### *Ngutɔ inde akolo padhá*

*(Tsia bhú Mat. 5:13; di ne bhú Mlk. 9:50.)*

34 «Ngutɔ ne bádha 'he. Engú bini, i dɔ me kpokpo nde andjia bhúbhú andjia, u tí da nagie matá kpokpo bhúbhú ne ni? 35 A belegɔ ndjindji ade ngú doto di ne ngú nalu 'zɔ. U bála bha ibili akilidjo. Kpála inde ne 'dje 'dje ngú nadje 'kpí-e, ani djedje!»

## 15

*Gbitaku gba kandɔlɔ inde angita, u atsia au matá e*  
*(Tsia bhú Mat. 18:12-14.)*

1 Ekpí bini, ondɔmbi na mandjandja di ne okpála na sisiti ago ndɔ o hana de Yesu ngú nadje ani. 2 OmɔFalisai ne omɔsuno na líli gba Moidje adɔ adi ani. U adɔ apa me: «Kpála inde-e ngasia okpála na sisiti. Ani la di ngazɔ 'he ne uo bhú dabili bini!»

3 Abhomɔ-o, Yesu atsia apa gbitaku inde-e pi uo me: 4 «Kpála bini bhú ká yi ne okandɔlɔ kámá bini. Lí sɔka uo

bini ngita-a, ani mene pi? A na paká me, ani 'ó ká obhende ndjikpa odukpabini ne ká odukpabini-e lí bili nazɔ 'he ka o-o. Ani tsia nú nagili bhende angita-a, akólo lí nedhinga inde ani aú ani lie-e ko. 5 Lí ani au ani lie, ani bédhe ne djali bedhe. Ani há kandɔlɔ-o, ani 'ó ani pí de-ngulɔ e. 6 Ani gie lie agba e. Pipita-a, ani 'í obi e ne okpála inde asili kuti de ani-o. Ani tsia pá pi uo me: <Yi kpi djali bhú dabili bini ne ma, anga ma au kandɔlɔ gba ma inde angita nako au!» 7 Yesu atsia apa matá me: «Djali adú bhadi moko abhúla ngubula kpála bini na sisiti inde adji bua e. Djali ango-o ané bhende u nde ne e ngubula okpála na ngbingbili ndjikpa odukpabini ne ká odukpabini, inde ngabhundja me o ne gumɔ nadji bua o ade ko.»

*Gbitaku pindji lí falanga inde angita, u atsia au matá e*

8 «Matá di-e, i dɔ me ɔlɔ bini nde ne lí falanga\* ndjikpa, lí sɔsɔka bini ngita-a, ani mene pi? A na paká me, ani dhédhe eke. Ani pó bili abhú 'ti. Ani gili má bhotobhoto, akólo lí nedhinga inde ani aú lie-e ko! 9 Lí ani au lie, ani 'í obi e di ne okpála inde asili kuti de ani-o. Ani tsia pá pi uo me: <Yi kpi djali bhú dabili bini ne ma, anga ma au lí falanga inde angita nako ka ma-a au!» 10 Yesu atsia apa matá me: «Oandjelu gba Ebhe-e akpí bhadi djali moko ngubula koli kpála na sisiti bini inde adji bua e ko.»

*Gbitaku gba ndili inde angita, u atsia au matá e*

11 Yesu atsia apa matá me: «Bhoko bini adɔ nani ne ongisi na obhosibhosi bhisi. 12 Bhende na ndimindimi-e apa pi 'dyi e me: <'Dyi ma, ha naama tia na libhondi-e mɔma haha.> Abhomɔ-o, 'dyi uo atsia agapa tia gba e lí uo. 13 Pita 'kpí bedi, ndili na ndimindimi-e abha tia gba e, ani atapa ne di bhú kuti bini tsutsu. Oo, ani andjia tia gba e hana má kpɔkɔbhɔ lí ndɔ 'ngú na padhá padhá!

\* 15:8 15:8 Agba omaYuda-a, lí falanga bini (denaliusi) nani ne makalá pi kpála na kulu ngubula ekpí bini.

14 Li ani andjia tia gba e lie hana-a, adyindi na ngbéngbé atsia ali bhú ndu doto ango-o. Abhomu-o, ani aholo adje gumu. 15 Ani anu ali bhú kulu pi suka kpála na ndu doto bhomu-o. Kpála ango-o aha ani, ani atsia atima ani abhú 'dyi gba e me ani du nalila opame. 16 Ani adu akunda nazu ezu gba opame-o. La-a, kpála bini ha nani ehe nazu mazu pi ani de.

17 Abhomu-o, ani aholo abhundja. Pipita-a, ani atsia apa li bua e me: <Ndu okpála na kulu gba 'dyi ma-a hana, ezu ka uo bhibhiti naali. Ngama la ei-e, ma ngakpi ne gumu! 18 Ma agie lima agba 'dyi ma, ma tsia pá pi ani me: 'Dyi ma, ma amene siti 'ngú kala Ebhe di ne li pápá gba mu. 19 A ayo matá na'i ma me ndili ka mu de. Ha bha ibili ma maka suka okpála na kulu gba mu ko.>

20 Ani atsia aholo agie lie agba 'dyi e. Li nedhinga inde ani adu nga bha lie de kuti-e tsutsu-o, 'dyi ani au ani. Ani au ani lie, ani adje ndjinga ani naali. Ani anu ne holo, ani ati li ngulu ani, ani atsia akama ani li kute e. 21 Abhomu-o, ndili-e atsia apa pi ani me: <'Dyi ma, ma amene siti 'ngú kala Ebhe di ne li pápá gba mu. A ayo matá na'i ma me ndili ka mu de.> 22 U akolo lie akuti-e, do 'dyi ani pi okpála na kulu gba e me: <Yaka! Yi go ne yambu bhende ane ne bádha, yi dyi li ani. Yi to kati bhú 'kpa ani, amba yi to maloke bhú 'dhu ani. 23 Pipita-a, yi nu bhelo folo bagala na tsikpa-o. Ni zu 'he, amba ni kpi djali. 24 Padhá de, anga ndili gba ma inde adu nako mugito me ani akpi-e, ani agie matá lie bhú mukobho. Ani adu nako me ani nde angita, ma atsia au matá ani.> Abhomu-o, u atsia aholo nakpi djali.

25 Li nedhinga bhomu-o, ndili bhende na gigina adu abhiye. Nedhinga ani adu agie lie lie akuti-e, ani akolo lie de eti-e masakpe-e, ani adje tolo 'tsi ne ebi. 26 Ani a'i suka okpála na kulu-o. Ani atsia ayi ani li engú inde adu akodho 'kpi-o. 27 Kpála na kulu ango-o agie pi ani me: <Ndai mu agie lie agie. 'Dyi mu atsia abhelo folo bagala na tsikpa-o, anga ani au me, ani agie lie ne kute na angu.>

28 Abhomu-o, ndili na gigina-a aholo nake 'ngú lie. Ani ayala nali abhú 'ti-o. 'Dyi ani akoto, ani atsia alopole lie pi ani me ani lili. 29 Engú bini, ndili-e agie pi 'dyi e me: <Djedje nga, a ko kalanga bhelé ma ngamene kulu pi mu maka bali. Ma ndjo suka lili gba mu-o 'kpi bini de. Mu ha nga la belegu ndili meeme muma bini de me, ya mene anokomia ne obi ma-a ne di. 30 Li ndili gba mu inde andjia tia gba mu-o hana ne olisi na zabhe-e ago lie, mo otsia abhelo folo bagala na tsikpa-a pi ani!>

31 'Dyi ani atsia apa pi ani me: <Ndika ma, ndu 'kpi hana, ni ne mu bhú dabili bini. Ndu 'he inde gba ma-a hana, a ko naamu. 32 Engú bini, a ayo bha igini me ni mene anokomia amba ni kpi djali. Padhá de, anga ndai mu inde adu nako mugito me ani akpi-e, ani agie matá lie bhú mukobho. Ani adu nako me ani nde angita, ma atsia au matá ani!>

## 16

### *Kpála na kulu na kali*

1 Pipita-a, Yesu atsia apa matá pi omukpata gba e me: <Bhulu tia bini adu ne kpála na kulu gba e. Kpála ango-o adu atsia 'kpi li ohe gba ani-o. Okpála koko ago apa pi ani me, kpála na kulu ango-o ngapupu tia gba ani-o. 2 Abhomu-o, ani a'i kpála na kulu-o. Ani atsia apa pi ani me: <Ma ngadje pindji mu e mangua 'ngú dho? Suno obhuku na ndu tia gba ma-a hana muma, anga mu ti da matá natsia 'kpi li ohe gba ma-a de.> 3 Abhomu-o, kpála na kulu ango-o aholo ayi bua e me: <Ma améne si pi? Padhá de, anga ngamá gba ma adjí a'é ma bhú kulu. Angu ka ma ngú nade edyi ade. A la di li ma ne numu ngú nadu ne yoyo 'he. 4 Aa! Ma ambila engú inde ma améne e ambila, ngabula me okpála sia ma ndjindji li nedhinga u a'é ma lie bhú kulu ko!>

5 Abhomu-o, ani a'i okpála bini ne bini inde adu ne bopulu gba ngamá gba ani-o. Ani ayi bhende na kalanu-o me: <Bopulu gba ngamá gba ma-a ka mu madho?> 6 Ani agie pi ani me: <Ngbongelo na emu kama bini.> Kpála na kulu-o pi ani

me: <Ha 'kpa balua na bopulu gba m̄-o. D̄u kuto má gala, amba m̄u d̄ji me ndjikpa bhuluvue.> <sup>7</sup> Pipita-a, ani ayi koko me: <A la m̄u-o, bopulu gba m̄-o madho?> Ani agie me: <Kili mapunga kámá bini.> Kpála na kulu-o pi ani me: <Ha 'kpa balua na bopulu gba m̄u-o, amba m̄u d̄ji me ndjikpa madjina.> <sup>8</sup> Ngámá gba kpála na kulu na kali ango-o adhøge ani, anga ani amene ehe maka kpála inde ngau 'kpí tsutsu. Okpála na doto inde-e ne imbilanḡu na kali gba o-o, u ambila namene ehe s̄unda o ane ongisi gba Ebhe.

<sup>9</sup> Ngama-a, ma apa pi yi me, yi gili nad̄u bhú makpolia ne obi yi ne tia na kali na doto inde, amba li tia neke ka yi-e, u de sia yi bhú kuti na d̄ud̄uma. <sup>10</sup> Kpála bhende ngbingbili bhú ohe na djedjedje-e, ani bhadi ngbingbili bhú ohe na ngbengbengbe. Kpála bhende ngbingbili bhú ohe na djedjedje-e ade, ani di ngbingbili bhú ohe na ngbengbengbe ade. <sup>11</sup> I d̄u me yi nde mene ndjindji ne tia na kali na doto inde-e de-e, Ebhe tí da naha k̄ukul̄u tia pi yi de. <sup>12</sup> I d̄u me yi nde mene ehe ngbingbili ne tia gba kpála koko de-e, a há tia gba yi-e pi yi da?

<sup>13</sup> Kpála bini ti da namene kulu pi ongámási bhisi de. Ani yála bini, ani tsia k̄unda koko. Ani méne kulu pi koko ndjindji, ani tsia ú koko bhú djila e padhá. Yi ti da namene kulu pi Ebhe bhú dabili bini ne namene pi tia de.»

*Yesu asuno pindji 'ngú ngangá*

*(Tsia bhú Mat. 11:12-13, 5:31-32; di ne bhú Mlk. 10:11-12.)*

<sup>14</sup> Om̄Falisai adje nd̄u 'ngú bhom̄u-o hana. Abhom̄u-o, u atsia ad̄u am̄u Yesu, anga u ad̄u nani ak̄unda tia naali. <sup>15</sup> Yesu atsia apa pi uo me: «Yi ngamene ehe bhú djila okpála m̄ugito me yi ngbingbili. Engú bini, Ebhe mbila bua yi hana, anga ehe li okpála ngau e bhú djila o ngbéngbé-e, Ebhe ngauu bhú djila e padhá.

<sup>16</sup> Nakolo li nedhinga gba Djaa bhul̄u nabatisa okpála-a, u akpokpo 'li Ebhe pi okpála bhú líli gba Moidje di ne bhú obhuku gba opolofeta . Nayie li nedhinga bhom̄u-o, u akpokpo Bádha NgaliNau gba

Ebhe-e pi okpála. Kpála ne kpála ngagili ne kpéke me ni li bhú kuti na m̄undeyi-o . <sup>17</sup> A ko mboye 'ngú masudha me ekpí di ne doto kodho 'kpí. A ko la kpéke da 'ngú me okpála 'e mboye k̄u eli bini bhú ká líli gba Moidje-o.

<sup>18</sup> Li bhoko bini 'e wala e bhú k̄uva-a, ani ha ølø koko-o, ani ak̄unda bhom̄u-o ølø gba kpála koko. Li bhoko bini ha ølø inde li 'ko e a'e e bhú k̄uva-a, ani ak̄unda di bhom̄u-o ølø gba kpála koko.»

*Gbitaku gba bhul̄u tia ne bhul̄u ndibhili*

<sup>19</sup> «A ad̄u nani bhul̄u tia bini. Ani ad̄u adyi babadha bongo na tia naali. Nd̄u 'kpí hana, ani ad̄u nad̄u ndjindji. Ani atsia ad̄u di naz̄u 'he ndjindji. <sup>20</sup> Bhul̄u ndibhili bini ad̄u di nani oo. A ad̄u 'li ani me Ladjalo. Eka atstsolo nani k̄ute ani hana. Ani ad̄u asi kuto li bhoti gba bhul̄u tia-o. <sup>21</sup> Ani ad̄u ak̄unda naz̄u okul̄u 'z̄u inde ad̄u abala sa dabili naz̄u 'he gba bhul̄u tia-o. La di-e, obul̄u ad̄u ago adhapa oeka gba ani-o. <sup>22</sup> Bhul̄u ndibhili-e akpi. Oandjelu aha ani, u atsia an̄u a'o ani ade Abalahama. Bhul̄u tia akpi di, u atsia azi ani.

<sup>23</sup> Oo, li bili gba okpála inde amu-o, ani ad̄u adje likabhu naali. Ani atsia 'kpí ne abhúlá, ani au Abalahama tsutsu ne Ladjalo de e. <sup>24</sup> Abhom̄u-o, ani aholo natobhila me: <'Dyi ma Abalahama, dje nga bha mbo ndjinga ma! Tima Ladjalo me ani to ndji-likpa e bhú 'ngu, amba ani go ne di t̄un̄u pí 'mi ma, anga ma ngadje likabhu bhú djua inde-e naali.>

<sup>25</sup> Abalahama agie pi ani me: <Ndika ma, bhundja me mo osia nani tia bhelé li nedhinga mo od̄u lie bhú mukobho píla doto-o. La-a, Ladjalo atsia asia nani naae likabhu naali. Mb̄ia inde-e, ani ngasia bádha 'ngú, m̄u la naam̄u ngasia likabhu. <sup>26</sup> Matá-a, a s̄unda ní ne tsú 'dú, ngubula me li kpála k̄unda nayie gba ya ei akodho 'kpí ne agba yi oo, ani de le pima! Li kpála k̄unda nayie gba yi oo akodho 'kpí ne agba ya ei-e, ani de le di pima!>

<sup>27</sup> Do bhul̄u tia me: <'Dyi ma, kikiliako, ma ayo nga bha-a ka m̄u me, tima Ladjalo agba 'dyi ma, <sup>28</sup> anga ondaise ma na obhosi bhosi bhuluvue oo. A ayo me, ani n̄u

nagbele 'dje uo, amba ngauo di-e, u agó li bilí na likabhu inde-e de.»<sup>29</sup> Abalahama agie me: «U mbila líli gba Moidje di ne obhuku gba opolofeta-a hana. A ayo me u dje uo.»<sup>30</sup> Bhulú tia atsia apa me: «'Dyi ma Abalahama, a mo-o ade. Engú bini, i dɔ me sɔka okpála inde amu-o nde azuku-o, ani nɔ pa pi uo-o, u dji bua o.»<sup>31</sup> Abalahama pi ani me: «I dɔ me u nde dje engú inde bhú líli gba Moidje di ne bhú obhuku gba opolofeta de-e, belegu i dɔ me sɔka okpála inde amu-o nde azuku-o, u djé di ani de.»»

## 17

*Yi mbu li siti 'ngú gba okpála koko (Tsia bhú Mat. 18:6-7, 21-22; di ne bhú Mlk. 9:42.)*

<sup>1</sup> Pipita-a, Yesu apa pi omɔkpata gba e me: «Engú inde ngato okpála bhú siti 'ngú-o néke de. Engú la bini, a ko likabhu pi kpála inde i ngato engú ango-o ko!»<sup>2</sup> I dɔ me kpála bini nde ngato ongisi bhú siti 'ngú-o, a pi ani ndjindji me u gbite ngingí tangulú ani, amba u bhike ani bhú 'ngbé 'ngu. Bhobhomu-o pi ani ndjindji naali ane me sɔka okpála na bhɔbhuku-o ti ka ani bhú siti 'ngú.<sup>3</sup> 'E-e! Yi lila liyi ndjindji!

I dɔ me ndai mu nde amene siti 'ngú-o, mu de suno pi ani. I dɔ me ani nde apa me ni amene sisiti-e, mu de mbu li ani.<sup>4</sup> I dɔ me ani nde amene mu sisiti bhɔtsibhɔtsi mananika li 'kpi bini-e, ani go bhɔtsibhɔtsi mananika hana, ani pa pi mu me: «Ma amene mu sisiti, mbu li ma.» Mu de mbu li ani.»

### *Nabhuka na kpekpeke*

<sup>5</sup> Obhulú titima apa pi Ngámá Yesu me: «Mene me nabhuka gba ya-a kolo matá kpekpeke.»<sup>6</sup> Abhomu-o, Ngámá Yesu atsia agie me: «I dú me nabhuka gba yi-e dú maka lí ndula na mutadi-e, yi de tí da napa pi ndula inde-e me: «Yie si, amba mu nɔ lu limu abhú 'ngbé 'ngu.» I tsia méne bhadi moko.»

*Kulu inde a ayo me kpála na kulu mene e ko*

<sup>7</sup> «Li kpála bini bhú ká yi dɔ ne kpála na kulu gba e bini-e, i dɔ me kpála na kulu ango-o nde ngamene kulu abhiye, ani dɔ di-e ngalila onu-o, ani gie lie akuti-e, ani tsia pá pi kpála na kulu ago-o me: «Go má gala ngú nazu 'he?»<sup>8</sup> A mo-o ade. Ani pá mangbo pi ani me: «Lu ezɔ, mu yipa bongo-o ngú naha ezɔ-o mu ma akólo li nedhinga ma andjia nazu 'he lie di ne nandji 'he bhende nandji mandji lie ko. Pipita-a, mu tsia zu 'he amba mu ndji di 'he bhe gba mu-o.»<sup>9</sup> Ani ti da nagie heni pi kpála na kulu-o, anga ani amene líli gba ani-e uu? Belegu de bini.<sup>10</sup> A bhadi pi yi moko. Nedhinga yi amene ndu 'ngú inde u apa e pi yi e lie hana-a, yi de pa me: «Ya bha naaya ne okpála na kulu. Ya amene bha kulu inde a ayo igini me ya mene e ko.»»

### *Yesu akobho okpála na kába ndjikpa*

<sup>11</sup> Li Yesu adu anu lie abhú Yelusalema-a, ani apu sɔnda ndu doto na Samalia ne bhe na Galilaya.<sup>12</sup> Ani ali lie bhú kuti bini me-e, obhosi na kába ndjikpa ago akɔ lio ne ani. U alulu mbo de ani tsutsu.<sup>13</sup> U atsia aholo atobhila me: «Ngámá Yesu, dje nga bha-a mbo ndjinga ya!»<sup>14</sup> Yesu au uo lie, ani atsia apa pi uo me: «Yi nɔ suno liyi pi odimandɔ gba Ebhe-o .» Nedhinga u adu anu lie, u atsia akobho.<sup>15</sup> Li sɔka uo bini au lie me ni akobho-o, ani atsia agie lie sidi me ani nde ngadhɔgɔ Ebhe ne angu hana.<sup>16</sup> Ani ati bhú li 'dhu Yesu. Ani atu bhúla e ne kuto. Ani atsia agie heni pi Yesu. Bhoko ango-o adu nani kpála na Samalia.<sup>17</sup> Abhomu-o, Yesu atsia ayi me: «Ndu okpála ndjikpa hana akobho adi? Obhende odukpabini-e la su?»<sup>18</sup> Kpála bini bhundja nago nagie heni pi Ebhe de, bha bini kpála inde naae ne maYuda ade inde-e?»<sup>19</sup> Pipita-a, Yesu atsia apa pi ani me: «Yie bhúla, nɔnu. Mo okobho, anga mo obhuka ma.»

### *Nedhinga li Ebhe agó nau lie píla doto (Tsia bhú Mat. 24:23-28, 37-41.)*

<sup>20</sup> OmɔFalisai ayi Yesu me: «Nau gba Ebhe-e agó nadho?» Ani atsia agie pi uo me: «Nau gba Ebhe-e gó ngua bhende de me okpála nde ngauu mau-o de.»<sup>21</sup> U



pá de me: <Yi tsitsia, a sii!> ne me <A aoo!> padhá de, anga yi mbila me Naa gba Ebhe-e bhú ka yi.»

<sup>22</sup> Pipita-a, ani atsia apa pi omukpata-a me: «Nedhinga koko akólo makolo. Yi akúnda me yi u nga bha mbo ma, Ndili gba kpála, 'kpí bini. Engú bini, yi ú la ma de. <sup>23</sup> U apa pi yi me: <Ani aoo!> di ne me: <Ani sii!> engú bini, yi agú holo oo de. <sup>24</sup> Ekpí li ngama, Ndili gba kpála, ma agó lie, a adú maka muggbálá, li zi e ngayie li 'dje kokpí, li pápá bini akólo li pápá koko. <sup>25</sup> Engú bini, a ayo me ma dje ngaiza likabhu naali, amba okpála na naki yala di ma.

<sup>26</sup> Maka engú inde akodho 'kpí nani bhú 'kpí Naa-a, akódho bhadi 'kpí moko li 'kpí inde li ngama, Ndili gba kpála, ma agó lie ko. <sup>27</sup> Padhá de, anga bhú 'kpí Naa, okpála adu azu 'he. U adu andji pandi. Obhosi ne olisi adu aha lio akolo li 'kpí li Naa ali bhú zabu lie ko. Ebha adhi, engu asi píla doto libhomu, a atsia abhili ndu uo hana. <sup>28</sup> A adú maka bhú 'kpí gba Loto. Okpála adu azu 'he. U adu andji pandi. U adu akala 'he di ne natsindji 'he. U adu alu 'zu. U adu ayiki 'ti. <sup>29</sup> Engú bini, ekpí li Loto akoto bhú Sodomu lie, djua di ne itimeli ayie abhúlá, abala pí uo maka ebha, atsia abhili ndu uo hana. <sup>30</sup> A akódho bhadi 'kpí moko li 'kpí li ngama, Ndili gba kpála-a, ma súno angu gba ma-a lie pi okpála ko.

<sup>31</sup> Li 'kpí ango-o, kpála bhende abháka e apí 'ngbu 'ti-e, a ayo de me ani li abhú 'ti ngú nabha ohe gba e de. A bhadi moko, kpála bhende abháka e abhú 'dyi-e, a ayo de me ani gie lie akuti-e de. <sup>32</sup> Yi bhundja engú inde amene nani wala Loto-o.\* <sup>33</sup> Kpála bhende agíli nalila mukobho gba e, ani kpí. Kpála bhende la abhíke mukobho gba e, ani tsia kóbho. <sup>34</sup> Ma apa pi yi me, sukpe ango-o, okpála bhisi adú pí mako bini, u ahá bini, u tsia 'ó ká koko. <sup>35</sup> Olisi bhisi adú atu mapunga bhú dabili bini, u ahá bini, u tsia 'ó ká koko. [<sup>36</sup> Obhosi bhisi adú amene kulu bhú edyi bini, u ahá bini, u

tsia 'ó ká koko.]] <sup>37</sup> Omukpata ayi ani me: «Ngámá, engú ango-o akódho 'kpí ne su?» Ani atsia agie pi uo me: «Bili li kuo kpála adú lie, oagbagba apékabhè bhadi bhúla o oo ko.»

## 18

*Gbitaku gba siti kpála nakodho 'ngú ne òkè bini na òèlè*

<sup>1</sup> Pipita-a, Yesu apa gbitaku bini pi omukpata gba e ngú nasuno pi uo me, a ayo me u du nayo Ebhe ndu nedhinga hana, u andála de. <sup>2</sup> Ani pi uo me: «Kpála nakodho 'ngú bini adu nani bhú gudhu bini. Ani du akpe Ebhe de. Ani atsia adu di au okpála bhú djila e padhá. <sup>3</sup> Bhú gudhu ango-o, òkè na òèlè bini adu di oo. Ani adu ago apa pi ani me: <Leke engú sùnda ya ne kpála inde ya nde ne e bhú 'ngú ko.> <sup>4</sup> Ekpí bhelé, kpála nakodho 'ngú ango-o adu ayayala. Pipita-a, ani atsia apa li bua e me: <Ma ngakpe Ebhe ade. Ma la di ngau okpála bhú djila ma padhá. <sup>5</sup> Engú bini, òkè inde ngandala ma naali. A ayo me ma leke engú gba ani-o, anga i du mo-o de-e, ani du bha ago naba 'ndji ma.»

<sup>6</sup> Ngámá Yesu atsia apa matá me: «Yi dje engú inde li siti bhulu nakodho 'ngú bhomu-o apa e ndjindji! <sup>7</sup> Ebhe méne bádha 'ngú pi okpála inde ani alo o-o di? I du me u nde ngaku 'gba pi ani sukpe ne ngbikpi-e? Ani djéke ngengele ngú nateteke uo? <sup>8</sup> Ma apa pi yi me, ani aléke 'ngú gba uo-o má gala! La-a, li nedhinga li ngama, Ndili gba kpála, ma agó lie, ma abháka me okpála nde abhuka Ebhe píla doto uu?»

*Gbitaku gba muFalisai , ne ndombi na mandjandja*

<sup>9</sup> Okpála koko adu au lio me o naao ngbingbili. U atsia adu au ndu okpála koko hana bhú djila o padhá. Abhomu-o, Yesu atsia apa gbitaku inde-e li 'ngú gba uo-o me: <sup>10</sup> «Ekpí bini, okpála bhisi anu bhú 'ngbé 'ti Ebhe gba omaYuda ngú nayo Ebhe. Bhe bini adu muFalisai , bhe koko

\* 17:32 17:32 Wala Loto akolo nani teme na ngutu anga ani agumu nani lili gba Ebhe. Tsia bhú Dje. 19:26.

adu ndombi na mandjandja. <sup>11</sup> MuFalisai-e ayie bhúlá, aní atsia ayo Ebhe a li bua e me: <Oo, Ebhe! Ma ngagie heni pí m̄, anga ma maka okpála koko ade. U ngazi 'he. U ngamene sisiti 'ngú. U ngakunda olisi, i d̄ di-e obhosi gba okpála koko. Ma di ngagie heni pí m̄, anga ma maka ndombi na mandjandja inde-e ade. <sup>12</sup> Ma tsetse ez̄ 'kpí bhisí s̄nda poso bini ngú nayo m̄. Ma haha bini bhú ká ndjikpa pí nd̄ 'he ma ngasia e hana.>

<sup>13</sup> Ndombi na mandjandja al̄ naae mbo tsutsu, aní akpe beleḡ natsia 'kpí ne abhúlá. Engú bini, aní at̄ bhúla e ne kuto, aní abu 'kpa e pí 'ka e, aní atsia apa me: <Oo, Ebhe! Dje nga bha-a mbo ndjinga ma, ma naama ne siti kpála.> <sup>14</sup> Do Yesu matá me: «Ma apa pí yi me, ndombi na mandjandja ango-o agie nani lie agba e me, Ebhe nde adje nayo gba aní-e adje. Engú bini, Ebhe dje bhende gba m̄Falisai-e de. Padhá de, anga kpála bhende nga'o lie ne bhúlá-a, li Ebhe k̄ aní ne kuto. La-a, kpála bhende nga'o lie ne kuto-o, li Ebhe 'é'e aní ne bhúlá.»

#### *Yesu asia ongisi na ndjendje*

<sup>15</sup> Okpála adu ago di pí aní ne ongisi na ndjendje ngubula me aní 'o 'kpa e pí 'ndji uo. Li om̄kpata au lie mo-o, u aholo nayoko uo. <sup>16</sup> Engú bini, Yesu a'i uo, aní atsia apa me: «Yi 'o ongisi na djedjedje me u go bhaka ma! Yi aní kpadji pí uo de, anga Nau gba Ebhe-e , a pí okpála inde maka uo ko. <sup>17</sup> Ma apa pí yi na paká me, kpála inde i sia Nau gba Ebhe-e maka mboye ndili de-e, aní ti ne Nau gba Ebhe-e de.»

*Bhul̄ t̄ia ne uo ne Yesu*  
(*Tsia bhú Mat. 19:16-30; di ne bhú Mlk. 10:17-31.*)

<sup>18</sup> Abhom̄-o, ngámá bini gba omaYuda ayi Yesu me: «M̄suno, ngam̄ bádha kpála, a ayo me ma amene pí ngubula nasia m̄kobho na d̄d̄uma?» <sup>19</sup> Yesu atsia agie pí aní me: «M̄ nga'i ma me bádha kpála ka ni? Kpála bini babadha ade. Ebhe bha babadha ngae kpi e kpi. <sup>20</sup> M̄ mbila ol̄li-e ndjindji: <Mo okánda

ol̄, i d̄ di-e bhoko gba kpála koko de. Mo obh̄l̄ kpála de. Mo ozí 'he de. Mo opá eu li kilí m̄ de. Manga 'dyi m̄ ne 'hi m̄ mamanga.†>» <sup>21</sup> Ngámá ango-o atsia apa me: «Nayie bhú ndili li ma-a, ma amene nd̄ 'ngú bhom̄-o hana.» <sup>22</sup> Pita li Yesu adje engú bhom̄-o lie, aní atsia apa pí aní me: «Mo oneke matá koli ehe bini. N̄n̄, tsindji nd̄ 'he gba m̄-o hana, amba m̄ gapa tiatia pí obhul̄ ndibhili. Mo osía tia abhúlá. Pipita-a, m̄ go kpata ma.» <sup>23</sup> Aní adje lie mo-o, aní asia likabhu naali, anga tia adu nani ka aní bhelé naali.

<sup>24</sup> Li Yesu au lie me aní asia likabhu mo-o, aní atsia apa me: «A bha ndj̄ kpekpeke pí obhul̄ tia ngú nali bhú Nau gba Ebhe-o! <sup>25</sup> A kpekpeke pí eya ngubula nali li gudho m̄sana. A la matá kpekpeke ane pí bhul̄ tia ngubula nali bhú Nau gba Ebhe ko.»

<sup>26</sup> Abhom̄-o, okpála inde adje engú inde aní apa e atsia ayi me: «I d̄ mo-o, a ti da nakobho da?» <sup>27</sup> Yesu agie me: «Engú bhende i ti ne okpála de-e, a ati bha ne Ebhe.»

<sup>28</sup> Abhom̄-o, Piele atsia apa me: «Tsit-sia nga, ya a'o ká nd̄ 'he gba ya-a hana ngú nakpata m̄.» <sup>29</sup> Do Yesu pí uo me: «Ma apa pí yi na paká me, i d̄ me kpála bini nde a'o ká eti gba e, aní 'o ká wala e, aní 'o ká ondaise e, aní 'o ká okpála inde azu e, aní 'o ká ongisi gba e ngubula Nau gba Ebhe-e, <sup>30</sup> aní sía 'he bhelé naali kuto ei. Pipita-a, bhú nedhinga inde ngago-o, aní tsia sía di m̄kobho na d̄d̄uma.»

*Yesu akpo 'ngú bh̄tsibh̄tsi na bata p̄ndji nakpi di ne nazuku ka e*  
(*Tsia bhú Mat. 20:17-19; di ne bhú Mlk. 10:32-34.*)

<sup>31</sup> Pipita-a, Yesu aha okpála na titima ndjikpa ne ká bhisí-e, aní an̄ ne uo li ngongo, aní atsia apa pí uo me: «Yi djedje, ní adji mbia inde-e abhú Yelusalema. Oo, nd̄ 'ngú hana inde li opolofeta aye e p̄ndji ma, Ndili gba kpála-a, adji amene lie. <sup>32</sup> Padhá de, anga u apú ma pí om̄pagano. Li okpála ango-o m̄ ma, u sóbho ma, u tsia kú di ngus̄ li k̄te ma. <sup>33</sup> U abhí ma ne fimbo. Pipita-a, u tsia

† 18:20 18:20 Tsia bhú Eki. 20:12-16; di ne bhú Det. 5:16-20.

bhólè ma. La-a, bhú 'kpí na bata-a, ma tsia zúku.» <sup>34</sup> Engú bini, omákpata mbila nani ta 'ngú ango-o de, anga a awo nani lie pí uo mawo. U tsia dú ambila ta 'ngú li Yesu adu apa e de.

*Yesu akobho kpála bini inde i u 'kpí de (Tsia bhú Mat. 20:29-34; di ne bhú Mlk. 10:46-52.)*

<sup>35</sup> Li Yesu akolo lie masikpe de Djeliko-o, kpála bini inde i u 'kpí de-e adu kuto dengo 'hi-kpadji. Ani adu ayo 'he. <sup>36</sup> Ani adje tolo okpála akodho 'kpí lie, ani atsia ayi me: «A ko ni?» <sup>37</sup> Okpála atsia agie pí ani me: «Yesu, kpála na kuti na Nadjaleta ngakodho 'kpí bhomu-o ngae.» <sup>38</sup> Abhomu-o, ani atsia asula me: «Yesu, Ndili gba Davidi, dje nga bha-a mbo ndjinga ma!» <sup>39</sup> Okpála inde adu akalanu-o aholo ambembe bhú 'ndji ani me: «Gbite 'bhe mu.» Engú bini, ani aholo asusula matá kpekpeke me: «Ndili gba Davidi, dje nga bha-a mbo ndjinga ma!» <sup>40</sup> Yesu alu, ani atsia aha líli me u go ne ani pí ni. Ani akolo lie de ani-e, Yesu atsia ayi ani me: <sup>41</sup> «Mo okunda me ma mene pí mu ni?» Ani agie me: «Ngámá, bhulu djila ma, amba ma u matá 'kpí.» <sup>42</sup> Yesu apa pí ani me: «U matá 'kpí uu! Mo okobho anga mo obhuka ma.» <sup>43</sup> Kolo má gala me-e, ani aholo matá nau 'kpí. Ani atsia adu akpata Yesu me ani nde ngadhögö Ebhe. Ndu okpála hana inde au engú ango-o, aholo di nadhögö Ebhe.

## 19

*Yesu ali bhú 'ti gba Djakayo*

<sup>1</sup> Pita li Yesu ali lie bhú Djeliko, ani atsia adu agulu gudhu-o. <sup>2</sup> A abhaka me kpála bini nde oo, a adu 'li ani me Djakayo. A adu nani ngámá gba ondombi na mandjandja. Tia adu ka ani bhelé. <sup>3</sup> Ani adu agili nau me Yesu ngae dho. Engú bini, li okpála adu la lie bhelé-e, ani ale nau ani pima anga ani adu nani ndundu. <sup>4</sup> Abhomu-o, ani ayiki lie ne holo ne akalanu. Ani atsia a'ú bhú ndula bini

denko 'hi-kpadji ngubula me ni u Yesu nedhinga inde ani apú lie oo ko.

<sup>5</sup> Li Yesu akolo lie li bili bhomu-o, ani a'e djila e ne abhúlá, ani atsia ani. Ani atsia apa pí ani me: «Djakayo, kè kuto má gala, anga a ayo me ma si naki bhú 'ti gba mu-o.» <sup>6</sup> Abhomu-o, Djakayo akè kuto bhú holo. Ani atsia asia Yesu ne djali hana. <sup>7</sup> Ndu okpála hana au lie mo-o, u aholo adi mutokono. U atsia adu apa me: «Lele pí li kpála inde-e atapa lie nasi agba kpála na sisiti-e!» <sup>8</sup> Djakayo ayie bhúlá, do ani pí Yesu me: «Ngámá, djedje nga. Ma agbó bhusu tia gba ma-a bhisi. Ma ahá bhe bini-e pí obhulu ndibhili. I du me ma nde aha tia gba kpála bini ne kali-e, ma agie pí ani bhutsibhutsi badha.» <sup>9</sup> Abhomu-o, Yesu atsia apa pí ani me: «Naki-e, Ebhe akobho mu. Ngamu di-e, mu bhú piga gba Abalahama-o. <sup>10</sup> Padhá de, anga ngama, Ndili gba kpála-a, ma ago nagili di ne nakobho okpála inde angita ko.»

*Gbitaku gba okpála na kulu ndjikpa (Tsia bhú Mat. 25:14-30.)*

<sup>11</sup> Yesu akolo de Yelusalema masikpe. Okpála inde adu adje ani-e adu abhundja naao me, Nau gba Ebhe-e asúno lie pí okpála mbia inde. <sup>12</sup> Kaka-a, ani atsia apa gbitaku bini pí uo me: «Kpála bini na piga gba ngámá bini anu nani bhú doto bini tsutsu ngubula me u to palata na ngámá tangulu ni, amba pipita-a, ni gie lini. <sup>13</sup> Kala me ani nu-o, ani a'i okpála na kulu gba e ndjikpa-o. Ani agapa lí falanga\* bini bini li ndu uo hana. Ani atsia apa pí uo me: «Yi mene kulu ne falanga inde, akólo li nedhinga inde ma agie lima lie ko.» <sup>14</sup> Okpála na doto gba ani-e adu ayala ani. U atima okpála nganda ani ngú napa me: «Ya kunda de me kpála bhomu-o u ngámá pí 'ndji ya-a de.»

<sup>15</sup> La-a, u ato palata na ngámá tangulu ani. Ani atsia agie lie bhú doto gba e-o. Abhomu-o, ani a'i okpála na kulu inde ani agapa nako falanga lío ngubula nambila bhende u asia e pépé-o. <sup>16</sup> Abhomu-o bhe na kalanu-o ago. Ani atsia apa

\* **19:13** 19:13 Agba omaYuda-a, lí falanga bini (olo) nani ne makalá pí kpála na kulu ngubula epe bata.

me: <Ngámá, ma asia lí falanga ndjikpa pí bhende nako mo oha e m̄ma ko.>  
<sup>17</sup> Abhom̄-o, ngámá-a apa pí ani me: <A ndjindji. M̄ ne bádha kpála na kulu, anga mo omene ndjindji bhú mboye ehe bedi. Ma a'ó ibili m̄ ngámá pí 'ndji ogudh̄u ndjikpa.> <sup>18</sup> Bhe na bhisi-e ago, ani atsia apa me: <Ngámá, ma asia lí falanga bhuluvue pí bhende nako mo oha e m̄ma ko.> <sup>19</sup> Abhom̄-o, ngámá-a apa di pí ani me: <Ngam̄ di-e, ma a'ó m̄ ngámá pí 'ndji ogudh̄u bhuluvue.>

<sup>20</sup> Pipita-a, koko ago, do ani de-e: <Ngámá, lí falanga gba m̄-o ii. Ma awo nako bhú bongo . <sup>21</sup> M̄ 'o lí ma tsul̄u, anga m̄ ne kpála inde ngamene 'ngú na kpekpeke. M̄ ngaha ehe bhende m̄ 'o e ngam̄ de. M̄ ngaha 'z̄u inde m̄ lu e ngam̄ de.> <sup>22</sup> Ngámá-a apa pí ani me: <M̄ ne siti kpála na kulu. 'Li m̄ makpe agbíte m̄ ngae. Mo ombila nako hana me, ma ne kpála inde ngamene 'ngú na kpekpeke. Ma ngaha ehe inde ma a'o e ngama de. Ma ngaha ez̄u inde ma alu e ngama de. <sup>23</sup> Ka ní m̄ 'o nako tia gba ma-a lie bhú baki de-e? Maka ma ago-o, ma de asia koko pépé.>

<sup>24</sup> Pipita-a, ani apa pí okpála inde ad̄u oo me: <Yi dhepe tia inde ka ani bhom̄, amba yi ha pí bhende ne di ndjikpa ko.> <sup>25</sup> U atsia apa pí ani me: <Ngámá, a ka ani ndjikpa!> <sup>26</sup> Ani agie me: <Ma apa pí yi me, kpála bhende lí ehe nde ka e, u ahá ehe pí ani bhelé. Engú bini kpála bhende lí ehe nde ka e ade-e, u adhépe beleḡu mboye ehe inde ka ani ko. <sup>27</sup> La-a, pí obhul̄u yala gba ma inde i kunda nako de me ma ā ngámá pí 'ndji o-o, yi go ne uo ei, amba yi bhili uo kala ma sī.>>

*Yesu alí bhú Yelusalema*  
*(Tsia bhú Mat. 21:1-11; ne bhú Mlk. 11:1-11; di ne bhú Dja. 12:12-19.)*

<sup>28</sup> Pita lí Yesu akpo 'ngú bhom̄-o lie, ani atsia akodho 'kpí ne akalan̄u ngú nan̄u bhú Yelusalema. <sup>29</sup> Ani akolo lie sunda kuti na Betefadje ne Betania-a,†

lingo 'ta na ondula na Olive, ani atsia atima om̄kpata bhisi. <sup>30</sup> Ani pí uo me: <Yi n̄ bhú kuti inde kala yi aoo. Yi akólo lie oo, yi abháka me u nde agbite ndilí punda oo. Kpála bini dhuk̄u nga pí ani de. Yi bhulu ani amba yi go ne ani ei. <sup>31</sup> I d̄u me kpála bini nde ayi yi me: <Yi ngabhulu ani ngú ní?> Yi de pa pí ani me: <Ngámá ne gum̄u ani.>> <sup>32</sup> Om̄kpata bhisi an̄u, u atsia abhaka nd̄u 'ngú hana maka lí Yesu apa pí uo lie ko. <sup>33</sup> U ad̄u abhulu en̄u-o lie, obh̄ubhul̄u-o ayi uo me: <Yi ngabhulu en̄u bhom̄-o ngú ní?> <sup>34</sup> U agie me: <Ngámá ne gum̄u ani.>

<sup>35</sup> Pipita-a, u ago ne ndilí 'n̄u-o pí Yesu. U apa okoti gba o pí 'ngb̄u en̄u-o. U atsia ateteke Yesu ngú na'u pí 'ngb̄u ani.† <sup>36</sup> Ani ad̄u an̄u lie, okpála ad̄u apa okoti gba o lí kpadji. <sup>37</sup> Ani akolo de Yelusalema masikpe lí ngba 'ta na ondula na Olive. Nd̄u om̄kpata hana abedhe ne djali bedhe. U atsia aholo nadhoḡo Ebhe kpekpeke ngú nd̄u ongamba 'ngú hana inde u au e ko. <sup>38</sup> U ad̄u apa me:

<A ayo me Ebhe tuko bisagu pí  
 'ngbé ngámá inde ani atima e ko!

Guo 'ngú abhúlá,  
 amba sangu d̄u di pí Ebhe Apí 'Kpí!†>  
<sup>39</sup> Om̄Falisi koko inde ad̄u bhú ká okpála bhom̄-o, apa pí Yesu me: <M̄suno, yoko om̄kpata gba m̄-o mayoko.> <sup>40</sup> Yesu atsia agie me: <Ma apa pí yi me, i d̄u me u nde agbite 'bh̄o o-o, lí oteme holo nat̄u 'ue!>

*Yesu aku 'gbá ngú okpála na Yelusalema*

<sup>41</sup> Lí Yesu akolo lie masikpe de Yelusalema-a, ani au gudh̄u-o lie, ani atsia aholo aku 'gbá ngú okpála angoo. <sup>42</sup> Ani ad̄u apa me: <Aa! Ngayi okpála na Yelusalema-a, i dú me yi mbíla lí 'kpí na naki inde-e, guo 'ngú inde u ago pí yi ne e uu-o! La-a, a ko likabh̄u pí yi anga mbia inde-e, awo lie pí yi mawo. <sup>43</sup> Padhá de, anga oekpí koko akólo pí yi makolo, lí 'kpí angoo, obhul̄u yala gba

† 19:29 19:29 Nayie bhú Yelusalema akólo bhú Betefadje ne Betania, a ko kilometele bata. ‡ 19:35 19:35 Na'u ka Yesu pí 'ngb̄u punda-a, asuno nani bhom̄-o guo 'ngú di ne nako lie ka ani ne kuto. Tsia bhú Djkl. 9:9. † 19:38 19:38 Tsia bhú Ets. 118:26.

yi-e, asá aga deno yi ngbalina. U búka yi, u tsia há 'gú pí yi ne ndu pápá hana. <sup>44</sup> U agúgumú gúdhú-o. U tsia bhíli ndu okpála inde bhúbhú-o hana. Agba yi-e, teme bini tígala pí kilí e de, anga yi mbíla nani ekpí inde lí Ebhe ago natsia yi lie de!»

*Yesu alí bhú 'ngbé 'tí Ebhe gba omaYuda*

*(Tsia bhú Mat. 21:12-17; ne bhú Mlk. 11:15-19; di ne bhú Dja. 2:13-22.)*

<sup>45</sup> Pipíta-a, Yesu alí bhú 'ngbé 'tí Ebhe gba omaYuda-o. Aní atsia aholo natsambala okpála inde adu atsindji 'he oo-o. §

<sup>46</sup> Aní apa pí uo me: «U aye bhú Bhuku gba Ebhe-e me, Ebhe apa me: «Eti gba ma, a adú eti nayo ma.» Engú bini, ngayi-e, yi adji, atsia akolo bíli gba obhulú 'zi!†»

<sup>47</sup> Yesu adu asuno ndu 'kpí hana bhú 'ngbé 'tí Ebhe gba omaYuda. Ongbengbe odimandé, omusuno na líli gba Moidje di ne obhelesi okpála adu agili kpadji ngú nabhólé aní. <sup>48</sup> Engú bini, u tsia sia kpadji ngú namemene de, anga ndu okpála hana adu adje aní ne gúgumú naali.

## 20

*A ngaha angu pí Yesu da?*

*(Tsia bhú Mat. 21:23-27; di ne bhú Mlk. 11:27-33.)*

<sup>1</sup> A akolo ekpí bini, Yesu adu asuno pí okpála bhú 'ngbé 'tí Ebhe gba omaYuda. Aní atsia adu di nakpokpo Bádha Ngali pí uo. Ongbengbe odimandé gba Ebhe, omusuno na líli gba Moidje di ne obhelesi okpála ago. <sup>2</sup> U atsia ayi aní me: «Pa nga pí ya, aha kpadji pí mú ngú namene ongú inde-e da? A aha la di angu angoo pí mú ngánga da?» <sup>3</sup> Abhomú-o, Yesu atsia agie pí uo me: «Ngama di-e, ma ayí yi lí 'ngú bini. Yi pa nga múma, <sup>4</sup> a ha kpadji pí Dja ngú nabatísa okpála da? Ne me a ko Ebhe, ne me a ko okpála?»

<sup>5</sup> U aholo namene kpekebhe sùnda o. U atsia adu apa me: «Í dū me ní nde agie me: «A aha kpadji pí aní ne Ebhe», aní yí

ní me: «Í dū mo-o, ka ní yi bhuka la nani engú inde aní adu apa e lie de-e?» <sup>6</sup> Í dū di me ní nde apa me: «A ha kpadji pí aní ne okpála-a», lí ndu okpála hana bhíli ní ne teme, anga u ambíla ndjindji me Dja nani ne polofeta.» <sup>7</sup> Abhomú-o, u atsia agie me: «Ya mbíla kpála inde aha kpadji pí aní-e de.» <sup>8</sup> Do Yesu pí uo me: «Í dū mo-o, ngama di-e, ma pá pí yi de me aha kpadji múma da ngú namene ehe inde.»

*Gbitaku píndji okpála na kulu inde abhólé ndíli gba ngámá gba o-o*

*(Tsia bhú Mat. 21:33-46; di ne bhú Mlk. 12:1-12.)*

<sup>9</sup> Pipíta-a, Yesu aholo nakpokpo gbitaku inde-e pí okpála me: «Kpála bini alu nani ngu vino.\* U adje lío ne okpála ngú namene kulu bhú 'dyi-o, amba o dū agbó bhúsú o ne uo lí nguwa-o. Aní atsia atapa dhuku ngubula 'kpí bhelé.

<sup>10</sup> A akolo lí nedhinga nako lílí o. Abhomú-o, aní atíma kpála na kulu bini agba okpála angoo me u ha nguwa bhe gba ní-e pí ní haha. Engú bini, okpála angoo abhí kpála na kulu bhomú-o má kpú! U atsia agie aní ne mbulú 'kpa e padhá. <sup>11</sup> Bhulú 'dyi-e atíma matá kpála na kulu koko bini. U abhí di aní, u asosobho aní, u atsia agie aní ne mbulú 'kpa e padhá. <sup>12</sup> Aní atíma matá kpála na bata. Bhobhomú-o, u atsotsolo kute aní ne eka. U atsia agbe aní bhú 'dyi-o.

<sup>13</sup> Abhomú-o, bhulú 'dyi atsia apa me: «Ma améne sí pí? Ma atíma nga íbílí ndíli gba ma na múkúnda-o. Nedhinga koko-o, u tí da namanga aní.» <sup>14</sup> Engú bini, lí okpála angoo au ndíli-e lie me-e, u atsia apa sùnda o me: «Yi tsia nga la ndju kpála inde atígala galíkpe ne edyi-o. Ní bhólé aní, amba edyi-e kolo íbílí naaní.» <sup>15</sup> Abhomú-o, u agbe aní bhú 'dyi-o, u abhólé aní.» Yesu atsia ayi me: «Mbía inde-e, bhulú 'dyi-e améne ngú uo pí? <sup>16</sup> Aní agó, aní bhíli okpála na kulu angoo. Aní tsia há edyi-e pí okpála na kulu koko.» Lí okpála adje engú bhomú-o lie,

§ 19:45 19:45 U adu nani atsindji onu di ne odhu bhú 'ngbé 'tí Ebhe gba omaYuda ngubula me okpála, inde adu ne gúgumú ngú nahaha pí Ebhe-e, kala. † 19:46 19:46 Tsia bhú Isa. 56:7; di ne bhú Djlm. 7:11. \* 20:9 20:9 Bhú bhuku gba polofeta Isaya-a, vino ngasuno píga gba omaIsalaele. Tsia bhú Isa. 5:1-7.

u atsia apa me: «A ayo de me, bhobhomu-o mene lie de!»

<sup>17</sup> Yesu atsia uo, ani atsia apa me: «Engú inde u aye e bhú Bhuku gba Ebhe-e me:

«Teme inde li okpála nayiki eti-e abhike e, akolo teme inde abí eti-e libhomu.†» A akúnda napa pí? <sup>18</sup> † du me kpála nde ati pí teme ang-o, ani gúgamu. † du la di me teme ang-o nde ati pí kpála-a, i tú nu ani.»

### *Engú pindji nakala mandjandja*

*(Tsia bhú Mat. 22:15-22; di ne bhú Mlk. 12:13-17.)*

<sup>19</sup> Bha li nedhinga bhomu-o, omusuno na líli gba Moidje di ne ongbengbe odimandø gba Ebhe-e, agili nani naholo Yesu, anga u ambila me ani apa gbitaku bhomu-o li 'ngú gba o-o. Engú bini, u adu adje tsulu ka okpála. <sup>20</sup> Abhomu-o, u aholo akenge Yesu. U atsia atima obhulu kali inde adu amene ehe mugito me uo ngbingbili. Okpála ang-o adu agili naholo ani li 'li e ngubula me o pu ani pi Pilate, ngamá na ndu doto ang-o. <sup>21</sup> U ayi ani me: «Musuno, ya ambila me mu ngagama 'ngú ndjindji, mu la di ngasuno 'ngú ngbingbili. Mu tsia engbé gba kpála de. Mu ngasuno kpadji gba Ebhe-e pi okpála ngbingbili. <sup>22</sup> Pa nga pi ya, a ayo me ya kala mandjandja gba Kaisala, 'ngbé ngamá na doto na Loma-a, ne me ya kala de?»

<sup>23</sup> Li Yesu ambila ekú gba uo-o lie, ani atsia apa pi uo me: <sup>24</sup> «Yi suno nga lí falanga mu ma bini. A pépé ne kulu da, la di ne 'li da?» U agie me: «A ko kulu Kaisala, 'ngbé ngamá na doto na Loma, di ne 'li ani.» <sup>25</sup> Abhomu-o, Yesu atsia apa pi uo me: «† du mo-o, yi ha ehe bhende gba Kaisala, 'ngbé ngamá na doto na Loma-a pi e, amba yi ha la di bhende gba Ebhe-e pi Ebhe.» <sup>26</sup> U u siti 'ngú bhú engú inde ani adu apa e kala okpála-a de. Engú bini, u angamba naali ka eli inde ani agie e ko. Kaka-a, u andjili bha má bulu!

### *Nazuku ka okpála inde amu*

*(Tsia bhú Mat. 22:23-33; di ne bhú Mlk. 12:18-27.)*

<sup>27</sup> Abhomu-o, oSadukai koko ago de Yesu. OSadukai ziba nani naao de me okpála inde amu-o, azúku mazuku-o de. U ayi ani me: <sup>28</sup> «Musuno, Moidje aye nani líli pi ní me: «Li kpála kpi 'o ká wala e me ani nde zu de-e, a ayo me ndai ani de ha ølø ang-o, amba ani zu ongisi pi ndai e inde akpi ko.» <sup>29</sup> La-a, adu nani obhosi mananika bhú piga bini. Bhende na kalanu-o aha ølø, ani akpi padhá me ani nde zu de. <sup>30</sup> Bhende na bhisi-e aha økø ang-o. Ani atsia akpi. <sup>31</sup> Pipita-a, bhende na bata-o. A adu bhadi moko pi ndu uo mananika hana, u amu me u nde zu de. <sup>32</sup> Ali soso-o, ølø ang-o atsia akpi di. <sup>33</sup> Ya ngayi mu me: Li 'kpi li okpála inde amu-o azúku lie, ølø ang-o adu naa da? Padhá de, anga ndu uo mananika hana aha nani ani!»

<sup>34</sup> Abhomu-o, Yesu atsia agie pi uo me: «Okpála na naki inde-e ngaha lio. <sup>35</sup> Engú bini, okpála bhende amu-o, li Ebhe au me u ti da nazuku ngú nasia mukobho bhú nedhinga inde ngago-o, u há lio de. <sup>36</sup> U tí da matá namu-u de, anga u akolo ibili maka oandjelu. A ko ongisi gba Ebhe, anga u azuku. <sup>37</sup> Moidje asuno pi ní mbámbá me okpála inde amu-o azúku mazuku. Ani aye bhú bhuku gba e li bili inde ani akpo 'ngú lie pindji tsa 'po inde adu atsi-e me, Ebhe apa me: «Ma ne Ebhe inde li Abalahama ngadhøgø e, Ebhe inde li Isaka ngadhøgø e, Ebhe inde li Jakobho ngadhøgø e ko.†» <sup>38</sup> Ebhe ne Ebhe gba okpála bhende amu-o ade. Engú bini, a ko Ebhe gba okpála bhende bhú mukobho, maka li Abalahama, Isaka ne Jakobho nde pi ani lie bhú mukobho ko.»

<sup>39</sup> Abhomu-o, omusuno na líli koko atsia agie pi ani me: «Musuno, mo opa ndjindji.» <sup>40</sup> Kaka-a, u yi matá ani li 'ngú bini de.

### *Masiya ne Ngámá gba Davidi*

*(Tsia bhú Mat. 22:41-46; di ne bhú Mlk. 12:35-37.)*

† 20:17 20:17 Tsia bhú Ets. 118:22. † 20:37 20:37 Abalahama, Isaka ne Jakobho ngadhøgø Ebhe anga pi Ebhe-e, belegu u amu lie li kate o, uo bhú mukobho li bua o. Tsia bhú Eki. 3:6.

<sup>41</sup> Abhomu-o, Yesu apa matá pi uo me: «Lele pi li okpála ti da napa lie me Masiya ne ndili na piga gba Davidi-e? <sup>42</sup> Padhá de, anga ngaani Davidi makpe-e, ani apa bhú bhuku na oetsi gba omaYuda me:

<Ebhe Ngámá apa pi Ngámá gba ma-a me:

Du kuto li pá 'kpa ma na kokpa,

<sup>43</sup> akólo li nedhinga inde ma a'ó obhulu yala gba mu-o lie

dabili na sa-tidhu mu ko.> †

<sup>44</sup> † du me Davidi nde nga'i Masiya me Ngámá gba ni-e, lele pi li Masiya ti da nadu lie ndili na piga gba Davidi-e?»

*Yi améne maka omusuno na líli de*

*(Tsia bhú Mat. 23:1-36; di ne bhú Mlk. 12:38-40.)*

<sup>45</sup> Ani apa pi omukpata kala ndu okpála hana inde adu adje ani-e me: <sup>46</sup> «'E-e! Yi lila liyi ka omusuno na líli gba Moidje-e uu! U kunda bha nadhuku ne ondjandja yambu. U kunda bha me okpála du ne yiyi o maka ongámási li bili li okpála apopokobhe bhúla o lie ko. U kunda bha nadulu pí odabili na akalanu bhú oeti naje líli , di ne odabili na akalanu bhú da anokomia. <sup>47</sup> U ngandjia angu oekesi na olisilisi ne nabha ohe gba uo. U ngayo Ebhe ngengele ngu nasuno mugito me a ko obabadha okpála. Kaka-a, u asia likabhu naali!»

## 21

*Makiso gba eké bini na oelè*

*(Tsia bhú Mlk. 12:41-44.)*

<sup>1</sup> Ekpí bini, Yesu adu bhú 'ngbé 'ti Ebhe gba omaYuda. Ani atsia 'kpí, ani au me obhulu tia ngabhike tia gba o-o bhú sanduku na makiso na 'Ngbe 'ti Ebhe-e ngu nahaha pi Ebhe. <sup>2</sup> Ani atsia au di eké bini na oelè bhulu ndibhili me ani nde ngabhike senge bhisi. <sup>3</sup> Abhomu-o, ani atsia apa me: «Ma apa pi yi na paká me, elè na ndibhili li 'ko e akpi inde-e, aha makiso ane ndu okpála koko hana. <sup>4</sup> Padhá de, anga ndu okoko hana, u aha tia bhende u nde ne gumu e ade ko. Engú bini, ngaani-e, abana ani nde lie bhú ndibhili-e, ani aha ndu bhende ani adu akobho lie hana.»

† 20:43 20:42-43 Tsia bhú Ets. 110:1.

*Yesu apa me: «U agugumu 'ngbé 'ti Ebhe gba omaYuda-o»*

*(Tsia bhú Mat. 24:1-2; di ne bhú Mlk. 13:1-3.)*

<sup>5</sup> Pipita-a, okpála koko aholo akpokpo 'ngú pindji 'ngbé 'ti Ebhe gba omaYuda-o. U adu apa me: «A bha ndju babadha naali ne obabadha teme ango-o, di ne ohe na mase naali inde u aha e pi Ebhe-o.» Engú bini, Yesu atsia apa me: <sup>6</sup> «Ndu 'he inde yi ngau e inde-e, ekpí koko akólo makolo, teme bini tígala pí kilí e de. U agugumu eti-e hana kuto.»

*Likabhu inde akólo kala sokpí-o*

*(Tsia bhú Mat. 24:3-14; di ne bhú Mlk. 13:3-13.)*

<sup>7</sup> Abhomu-o, u atsia ayi ani me: «Musuno, engú inde mu ngakpokpo 'ngú pindji e bhomu-o, akólo nadho? Ehe inde asuno nedhinga nago ka engú ango-o, a adú ni?» <sup>8</sup> Yesu agie me: «Yi lila liyi uu! Kpála bini apíte yi de. Padhá de, anga okpála bhelé agó ne 'li ma, u tsia pá me: <Ma ne Masiya !> U tsia pá di me: <Nedhinga nago ka Masiya akolo!> Engú bini, yi akpáta uo de. <sup>9</sup> † du me yi nde adje okpála ngakpo 'ngú na oegú di ne ongú na okpekpeke 'ndji-e, yi adjé tsulu de. Padhá de, anga a ayo ngaiza me oengú ango-o kolo kalanu. La-a, sokpí-e dú nga kolo má gala mo-o de.» <sup>10</sup> Pipita-a, ani matá pi uo me: «Okpála na kuti bini ahá 'gú pi okpála na kuti koko. Li ngámá na kuti bini há 'gú pi ngámá na kuti koko. <sup>11</sup> Doto adyiki ne adjigidjo na ngbéngbé. Adyindi di ne osisiti kuo natagba matagba alí bhú obili ngangá. Yi aú ongamba 'ngú di ne ongú na tsulu tsulu abhúla.»

<sup>12</sup> Engú bini, kala me ndu 'ngú bhomu-o hana kolo-o, u aholo yi. U améne yi sisiti. U anú ne yi me u kodho 'ngú gba yi-e bhú 'ti naje líli gba Moidje . U tsia bhike yi bhú tikpu. U asungula yi pi ongbengbe ongámási di ne obhende ngatsia 'kpí li kuti-e kabula 'li ma. <sup>13</sup> Bhobhomu-o ahá kpadji pi yi ngubula me, yi kpokpo 'ngú gba ma-a pi uo. <sup>14</sup> Yi 'o li bua yi me, yi gili engú inde yi apá e li nedhinga nakodho

'ngú gba yi-e kalanu de. <sup>15</sup> Padhá de, anga ma ahá eli di ne imbilangú pí yi ngama makpe, ngubula nagbite 'bhø ndu obhulú yala gba yi-e hana. <sup>16</sup> Odyi yi ne ohi yi, ondaise yi ne okpála na piga gba yi di ne obi yi apú belegu yi ngao. U abhíli okpála koko bhú ka yi. <sup>17</sup> Ndu okpála hana ayála yi kabula 'li ma. <sup>18</sup> Engú bini, 'kpa sundjo yi ngíta belegu de bini. <sup>19</sup> I du me yi nde alu kpekpeke akólo li soso-o, yi sia mukobho na duduma.»

*Engú inde akólo li Yelusalema*

*(Tsia bhú Mat. 24:15-21; di ne bhú Mlk. 13:14-19.)*

<sup>20</sup> «Nedhinga yi aú lie me osudha asa Yelusalema ngbalina-a, yi de mbila me, nakpi kaka-a akolo masikpe. <sup>21</sup> Abhomu-o, okpála bhende a abháka o bhú ndu doto na Yudaya-a, a ayo me u kpe ne apí 'ta. Obhende adú bhú Yelusalema-a, a ayo me u ze bhúbhú maze. Obhende adú asangba gudhu-o, a ayo matá de me u li abhú gudhu-o de. <sup>22</sup> Padhá de, anga adú ekpí nakodho 'ngú gba Ebhe ngubula me ndu 'ngú hana inde u aye e bhú Bhuku gba Ebhe-e, amene lie. <sup>23</sup> Li 'kpí angoo, adú likabhu na ngbéngbé pí olisi na ebhi di ne obhende li ongisi adú andji 'ka o-o. Padhá de, anga okpála na doto adjé likabhu naali, li mangimbo gba Ebhe-e súno lie pí uo. <sup>24</sup> U abhíli okoko ne ombotia. U tsia mbá okoko bhú bali ne ndu bilí hana. Omupagano adédele Yelusalema ne 'dhu o akólo bha bini li nedhinga gba uo andjia lie ko.»

*Nakolo ka sokpí*

*(Tsia bhú Mat. 24:29-31; di ne bhú Mlk. 13:24-27.)*

<sup>25</sup> «U aú oengú na ngangamba bhúla ela, bhúla epe di ne bhúla oikupala. Píla doto-o, bua okpála hana adú ati má ngbi ngbi ngbi ne tsulu ka tolo, di ne ka li 'ngbé 'ngu adú adimba lie ko! <sup>26</sup> Okpála amú ne tsulu ka nabhundja engú inde akólo píla doto libhomu-o, anga ndu 'he na abhúlá hana adyíki má djigi djigi! <sup>27</sup> Pipita-a, u tsia ú ma ngama, Ndili gba kpála, me ma nde ngago bhú ndindi ne angu di ne

asasaua gba ma-a hana.† <sup>28</sup> Nedhinga li ongú angoo ahólo amene lie lie, yi de lu kpekpeke, amba yi 'e 'ndji yi ne abhúlá, anga ekpí li Ebhe akóbho yi lie akolo masikpe.»

*Gbitaku pindji ndula na figi*

*(Tsia bhú Mat. 24:32-35; di ne bhú Mlk. 13:28-31.)*

<sup>29</sup> Pipita-a, Yesu atsia apa gbitaku inde e pí uo me: «Yi tsia nga ndula na figi di ne ondula koko hana. <sup>30</sup> Yi u me 'kpá 'kpá aholo nakoo, yi mbila me gboko 'kpí akolo masikpe. <sup>31</sup> A bhadi moko, nedhinga yi aú ongú bhomu-o lie ngakolo-o, yi de mbila me Nau gba Ebhe-e akolo masikpe. <sup>32</sup> Ma apa pí yi na paká me, ndu 'ngú bhomu-o hana akólo me okpála na naki inde-e nde mu nga ndu o hana de. <sup>33</sup> Ekpí ne doto akódho 'kpí makodho. Engú bini, 'li ma kódho 'kpí belegu de bini.»

*Yi lila liyi malila*

<sup>34</sup> «'E-e! Yi lila liyi uu! Yi adú abhundja bha engú na anokomia, ne engú nalangba ne pandi di ne ongangá 'ngú na doto inde-e de. I du mo-o, li ekpí li ngama, Ndili gba kpála, ma agó lie, i kólo li yi bhú gbilikiti, <sup>35</sup> maka ekú ahoholo onu lie ko. Padhá de, anga ahólo okpála píla doto libhomu. <sup>36</sup> Yi alá-a de. Yi du nayo Ebhe ndu nedhinga hana, ngubula me yi sia angu ngú nakpe ndu 'ngú inde akólo hana, amba yi koto ngú nalu kala ma, Ndili gba kpála-o.»

<sup>37</sup> Ne ngbikpi-e, Yesu adu asuno bhú 'ngbé 'ti Ebhe gba omaYuda-o. Tagolo, ani atsia adu anu asi apí 'ta na ondula na Olive. <sup>38</sup> Ndu okpála hana adu ago bhú sikikpi bhú 'ngbé 'ti Ebhe ngú nadje ani.

## 22

*Ongámási gba omaYuda agili nabhelo Yesu*

*(Tsia bhú Mat. 26:1-5; ne bhú Mlk. 14:1-2; di ne bhú Dja. 11:45-53.)*

<sup>1</sup> Ekpí na anokomia na Pasika, ekpí ayo di lie me u zu mapa inde li levile nde bhú e ade-e, akolo masikpe. <sup>2</sup> Ongbengbe odimandø gba Ebhe di ne omusuno na líli

† 21:27 21:27 Tsia bhú Dan. 7:13.



gba Moidje adu agili kpadji ngu nabhole Yesu. Engu la bini, u adu adje tsulu ka okpala.

<sup>3</sup> Pipita-a, Satana ali li bua Yuda inde u a'i e me Isikaliote, suka obhulu titima ndjikpa ne ka bhisi gba Yesu-o. <sup>4</sup> Abhomu-o, ani anu nadjie lie ne ongbengbe odi-mandø gba Ebhe di ne ongamasì gba okpala nalila 'ngbé 'ti Ebhe gba omaYuda. Ani anu nakpokpo ne uo maka ani apu Yesu lie pi uo ko. <sup>5</sup> U akpi djali naali, u atsia adje lio sunda o me o há pi ani falanga. <sup>6</sup> Yuda aziba. Ani atsia aholo agili nedhinga na ndjindji ngu napu Yesu pi uo me, okpala nde de uo ade.

*Yesu atima okpala me, u nu po bhula ezu na anokomia*

*(Tsia bhú Mat. 26:14-16; ne bhú Mlk. 14:12-21; di ne bhú Dja. 13:21-30.)*

<sup>7</sup> Ekpi na anokomia nazu mapa inde li levile nde bhú e ade-e akolo. A adu di ekpi inde ayo lie me u bhelø folo kandø ngubula anokomia na Pasika-o. <sup>8</sup> Yesu atima Piele ne Djaa . Ani pi uo me: «Yi nu leke ndu 'ngu hana pi ní ngu anokomia-o.» <sup>9</sup> U atsia ayi ani me: «Mo okunda me ya nu leke su?» <sup>10</sup> Ani agie pi uo me: «Yi djedje, yi alí lie bhú Yelusalema-a, yi atú liyi ne bhoko bini me ani nde abi lusa 'ngu pí 'ndji e. Yi kpata ani bhú eti inde ani alí bhú e-o. <sup>11</sup> Yi yi bhulu eti ango-o me: «Musunu ngayi mu me, tina 'ti inde ma azú anokomia ne omukpata gba ma-a bhú e ngae dho?» <sup>12</sup> Ani asúno 'ngbé tina 'ti bhe na abhula-a pi yi bini. Ndu 'he hana bhúbhú. Yi leke ehe na anokomia bhúbhú.» <sup>13</sup> U agbida, u abhaka ndu 'ngu hana maka li Yesu apa lie ko. Abhomu-o, u atsia aleke ezu na anokomia-o.

*Yesu aha mapa ne vino pi obhulu titima*

*(Tsia bhú Mat. 26:26-30; ne bhú Mlk. 14:22-26; di ne bhú 1 Kol. 11:23-25.)*

<sup>14</sup> Li nedhinga ango-o akolo lie, Yesu ne obhulu titima gba e atsia adulu kuto ngu nazu 'he-o. <sup>15</sup> Ani apa pi uo me: «Ma adu nako ne gamu naali me ní zu anokomia inde-e ne yi bhú dabili bini kala me ma dje likabhu ko! <sup>16</sup> Padhá de, anga ma apa pi yi me, ma zú matá-a de, akólo li

nedhinga inde li tata-a asúno lie lie bhú Nau gba Ebhe ko.» <sup>17</sup> Abhomu-o, ani aha kópo na vino-o, ani agie heni pi Ebhe. Ani atsia apa me: «Yi haha, amba yi ndji ndu yi hana. <sup>18</sup> Ma apa pi yi me, ma ndji matá-a de akólo li nedhinga inde li Nau gba Ebhe-e agó lie ko.» <sup>19</sup> Pipita-a, ani aha mapa-o, ani agie heni pi Ebhe. Ani agumu bhusu bhusu, ani aha pi uo. Ani atsia apa me: «A inde-e kute ma [inde aha lie pi yi-o. Yi du amemene moko, ngubula nabhundja ma.» <sup>20</sup> Pita u andjia nazu 'he bhomu-o lie, ani aha di kópo na vino-o pi uo, ani atsia apa me: «Vino inde-e, a ko gandja na mbia li Ebhe akodho e ne yi ne ngute ma inde atuko pi yi-o.]

<sup>21</sup> Engu bini yi tsitsia, kpala inde apu ma-a, ani ngazu 'he ne ma bhú dabili bini si! <sup>22</sup> Padhá de, anga a ayo me ngama, Ndili gba kpala-a, ma kpi maka li Ebhe apa lie ko. Engu la bini, a ko likabhu naali pi kpala inde apu ma ko!» <sup>23</sup> Abhomu-o, u atsia aholo ayi lio sunda o me, a ko kpala bhedho bhú ka o inde i tí da namene 'ngu bhomu-o.

*Ane ne engbé da?*

<sup>24</sup> Pipita-a, omukpata aholo amene kpekebhe sunda o ngu nambila me ane ne engbé bhú ka o da. <sup>25</sup> Yesu atsia apa pi uo me: «Ongbengbe ongamasì gba omupagano-o ngaha líli pi okpala gba o-o. Obhende ngatsia 'kpi li doto-o kunda me u 'i o me «Obabadha okpala.» <sup>26</sup> Pi yi-e, yi amene mo-o de. Engu bini, a ayo me kpala inde ane ne engbé bhú ka yi-e du maka mboye ndili, amba kpala inde ngatsia 'kpi li okpala koko-o, du naae maka kpala na kulu gba uo-o. <sup>27</sup> Padhá de, anga ane ne engbé da, ne me a ko kpala inde ngazu 'he? Ne me a ko kpala inde ngamene kulu kulu-o. A ko kpala inde ngazu 'he-e di? La-a, ma bhú ka yi maka kpala na kulu gba okpala koko.

<sup>28</sup> Ngayi obhulu titima gba ma-a, ní adu ne yi ndu 'kpi hana bhú nedhinga inde ma adu adje likabhu gba ma-a lie ko. <sup>29</sup> Kaka-a, ma ahá Nau pi yi maka li 'Dyi ma aha di muma lie ko. <sup>30</sup> Abhomu-o, yi azú 'he, yi tsia ndji di vino ne ma bhú

dabili bini, i du me ma nde ali bhú Nau gba ma-o. Yi adúlú di pí odabili na ngámá ngú nakodho 'ngú gba opiga ndjikpa ne ká bhisi gba omatsalaele ko.»

*Yesu apa pi Piele me: «Mo oyála ma»  
(Tsia bhú Mat. 26:31-35; ne bhú Mlk. 14:27-31; di ne bhú Dja. 13:36-38.)*

<sup>31</sup> Pipita-a, Ngámá Yesu atsia apa me: «Simo, Simo, djedje nga! Ebhe aha kpadji pi Satana me ani pe yi maka u apepe mapunga lie ko. <sup>32</sup> Engú bini, ngama-a, ma ayo Ebhe ngú m̄, amba mo o'ó ká nabhuka gba m̄-o de. Mo odji matá bua m̄ lie, m̄ de ha di angu pi ondaise m̄ uu.» <sup>33</sup> Piele apa pi ani me: «Ngámá, ma bedhe me, abana i du nanu bhú tikpu di ne nakpi-e, ní nú ne m̄ bhú dabili bini.» <sup>34</sup> Yesu agie pi ani me: «Piele, ma apa pi m̄ me, sukpe na naki inde-e, kala me engu ku 'gbá-a, mo opá bhutsibhutsi bata me ni mbila ma de.»

*Yesu apa pi omukpata gba e me, u leke lio ngubula egú*

<sup>35</sup> Pipita-a, ani atsia ayi uo me: «Nedhinga nako ma atima yi lie manditia-a, mandí gonia ne maløkø-o, ehe bini aneke nako ka yi uu?» U agie me: «Ehe bini neke ka ya de.» <sup>36</sup> Do ani pi uo me: «Mbía inde-e, kpála bhende li tia ne gonia nde ka e-e, a ayo me ani haha. Kpála bhende li mbotia nde ka e ade-e, a ayo me ani tsindji koti gba e-o, amba ani kala mbotia ne di. <sup>37</sup> Padhá de, anga ma apa pi yi me, engú inde u aye e bhú Bhuku gba Ebhe-e me, «U ato ani bhú ká okpála na sisiti-e», a ayo me amene lie li kute ma. A moko, engú inde atsia ma-a, a adji amene lie.†» <sup>38</sup> Omukpata atsia apa me: «Ngámá, a ka ya si ne ombotia bhisi.» Ani atsia agie pi uo me: «A ale.»

*Yesu anu nayo Ebhe pí eta na ondula na Olive  
(Tsia bhú Mat. 26:36-46; di ne bhú Mlk. 14:32-42.)*

<sup>39</sup> Pipita-a, Yesu akoto. Ani anu apí eta na ondula na Olive\* maka ani adu amemene lie ko. Omukpata gba ani atsia

akpata di ani. <sup>40</sup> U akolo lie oo, ani atsia apa pi uo me: «Yi yo Ebhe, amba yi alí bhú nale de.» <sup>41</sup> Ani ayie de uo, ani adyudyo mbo lie tsutsu masudha. Ani akikita lipuku e kuto, ani atsia ayo Ebhe me: <sup>42</sup> «'Dyi ma, i du me m̄ nde akunda-a, m̄ de 'e likabhu inde-e de ma tsutsu. La-a, mo oméne maka ma akunda lie de, mene mangbo maka mo okunda lie ko.» [ <sup>43</sup> Abhomu-o, andjelu bini ayie abhúlá, ani akoto li ani, ani atsia aha angu pi ani. <sup>44</sup> Ani abedhe lie ne likabhu-o, ani atsia aholo matá nayo Ebhe kpekpeke naali. Ngufu na kute ani akolo maka ngute, a atsia adu ayi kuto má ta ta ta!]

<sup>45</sup> Pita li ani a'o nayo Ebhe lie, ani ayie bhúlá, ani agie lie ade omukpata. Ani abhaka me u nde atuko ne ela ka likabhu. <sup>46</sup> Ani atsia apa pi uo me: «Yi atuko ne ela ka ni? Yi yie bhúlá, amba yi yo Ebhe, ngubula me yi alí bhú nale de.»

*U aholo Yesu  
(Tsia bhú Mat. 26:47-56; ne bhú Mlk. 14:43-50; di ne bhú Dja. 18:3-11.)*

<sup>47</sup> Li nedhinga li Yesu adu apa 'ngú bhomu-o lie, Yuda suka obhulu titima ndjikpa ne ká bhisi-e ago ne bhiti okpála. Ani adyudyo lie de Yesu masikpe ngubula me ni nvu pabhø ani. <sup>48</sup> Abhomu-o, Yesu atsia apa pi ani me: «M̄ nganvu pabhø ma, Ndili gba kpála, ngubula napu ma-a?»

<sup>49</sup> Li omukpata gba Yesu-o au engú inde adji akódho 'kpí-e lie, u atsia ayi Yesu me: «Ngámá, a la ya gu ne uo ne mbotia?» <sup>50</sup> Suka uo asu kpála na kulu gba bhele kpála gba odimandø gba Ebhe-o. Ani atsia akodho kpadje ani li pápá na kokpa-a má tse! <sup>51</sup> Engú bini, Yesu atsia apa me: «Yi 'o'o, a apise moko.» Ani aha kpadje kpála ango-o, ani a'o 'kpa e tété, ani atsia akobho ani.

<sup>52</sup> Pipita-a, Yesu atsia apa pi ongbengbe odimandø ne ongámási gba omulila na 'ngbé 'ti Ebhe gba omaYuda, di ne obhelesi okpála inde ago ngú naholo ani-e me: «Ka ni yi ago ngú ma lie ne ombotia, di ne ondula mugito me yi ago ngú naholo bhulu 'zi-e? <sup>53</sup> Ní adu nako ne yi ndu 'kpí

† 22:37 22:37 Tsia bhú Isa. 52:12. \* 22:39 22:39 Eta na ondula na Olive-e asangba gudhu na Yelusalema.

hana bhú dabili bini bhú 'ngbé 'ti Ebhe gba omaYuda. La-a, yi holo ma de. Engú bini, nedhinga gba yi-e akolo, nedhinga gba ngámá na biti-o.»

*Piele apa me ni mbila Yesu de*

*(Tsia bhú Mat. 26:57-58, 69-75; ne bhú Mlk. 14:53-54, 66-72; di ne bhú Dja. 18:12-18, 25-27.)*

<sup>54</sup> Abhomu-o, u aholo Yesu, u anu ato ani bhú 'ti gba bhele kpála gba odimandø gba Ebhe-o. Piele adu akpata uo mbo tsutsu. <sup>55</sup> A abhaka me u nde akpo djua tu mbadhasu, okpála adulu dede. Piele atsia ago adu bhú ká uo. <sup>56</sup> Kpála na kulu bini na øelø au ani li zi djua me ani nde adu kuto. Ani atsia Piele ne kpéke djila, ani me: «Kpála inde-e du di nako ne ani bhú dabili bini!» <sup>57</sup> Engú bini, Piele ayala, do ani de-e: «Ma ambila ani de, ølø-e.» <sup>58</sup> Pita nedhinga bedi-e, bhoko bini au ani, ani atsia apa me: «Ngamu di-e, mu ne suka okpála gba Yesu-o!» Engú bini, Piele atsia agie me: «Bhoko-e, ma ne suka uo ade.»

<sup>59</sup> Pipita abhue mbo ngengele. Bhoko koko atsia azi kekele tété me: «A ko kukulu 'ngú, kpála inde-e du nako ne Yesu bhú dabili bini, anga a ko di kpála na Galilaya.» <sup>60</sup> Engú bini, Piele agie pi bhoko ango-o me: «Bhoko-e, ma mbila 'ngú inde mu ngapa e de.» Bha li nedhinga inde ani adu apapa lie, engu atsia aku 'gbá. <sup>61</sup> Ngámá Yesu adji bhúla e, ani atsia bhúla Piele. Abhomu-o, Piele atsia abhundja engú inde li ngámá Yesu apa igini e pi ani-o me: «Sukpe na naki inde-e, kala me engu ku 'gbá-a, mo opa bhutsibhutsi bata me ni mbila ma de.» <sup>62</sup> Piele akoto kilidjo, ani abhelø kuo e ne egbá má kusu!

*U asobho Yesu, u atsia abhi di ani*

*(Tsia bhú Mat. 26:67-68; di ne bhú Mlk. 14:65.)*

<sup>63-64</sup> Okpála inde adu alila Yesu-o aholo amu ani. U agbite djila ani. U aholo abhi ani. U atsia adu ayi ani me: «Aa! Ngamu, polofeta-a, pa nga pi ya me asu mu da!» <sup>65</sup> U asosobho ani. U atsia apa di ongú

koko pi ani bhelé bhú osobho inde u adu asosobho ani ne e ko.

*Odimandø akodho 'ngú gba Yesu*

*(Tsia bhú Mat. 26:59-66; ne bhú Mlk. 14:55-64; di ne bhú Dja. 18:19-24.)*

<sup>66</sup> Li ekpi aseke lie, obhelesi okpála gba omaYuda apøkøbhø bhúla o bhú dabili bini ne ongbengbe odimandø gba Ebhe, di ne omusuno na lili gba Moidje-o. U atsia agbe ani kala Libi okpála natsia 'kpi li 'ngú gba omaYuda-o. <sup>67</sup> U ayi ani me: «I du me mu nde ne Masiya-a, mu de pa pi ya.» Abhomu-o, ani agie pi uo me: «I du me ma nde apa pi yi-e, yi bhúka de. <sup>68</sup> I du la di me ma nde ayi yi li 'ngú-o, yi gie 'ngú muma tété de. <sup>69</sup> Nayie pi mbia inde-e, ngama, Ndili gba kpála-a, ma adu li pápá na kokpa gba Ebhe na angu-o.†» <sup>70</sup> Abhomu-o, ndu uo hana atsia ayi me: «Bhobhomu-o apa me mu ne Ndili gba Ebhe?» Ani agie pi uo me: «A maka yi apa lie ko.» <sup>71</sup> Abhomu-o, u atsia apa me: «Ní matá ne gumu okpála koko inde i ti da napa engú ango-o pi ní ade, anga ní adje bha nganí makpe bhú 'li ani adje!»

## 23

*U anu ne Yesu kala Pilato*

*(Tsia bhú Mat. 27:1-2, 11-14; ne bhú Mlk. 15:1-5; di ne bhú Dja. 18:28-38.)*

<sup>1</sup> Pipita-a, ndu okpála hana inde adu bhú dá bula-a ayie bhúla, u atsia anu ne Yesu kala Pilato, ngámá na Loma. <sup>2</sup> Oo, u aholo apa li Yesu me: «Ya abhaka kpála inde-e me ani nde ngaha kpéke 'ndji pi okpála gba ya-o. Ani nde ngayoko uo me u akala mandjandja gba Kaisala, 'ngbé ngámá na Loma-a de. Ani atsia adu apa di me ni ne Masiya, akunda napa me 'ngbé ngámá.»

<sup>3</sup> Pilato ayi ani me: «Ngamu-o, mu ne 'ngbé ngámá gba omaYuda?» Yesu agie pi ani me: «Mo opa ngamu.» <sup>4</sup> Abhomu-o, Pilato atsia apa pi ongbengbe odimandø di ne bhiti okpála bhomu-o me: «Ma u engú bini inde a ayo me u holo kpála inde-e ngú e de.» <sup>5</sup> Engú bini, u azi bha

† 22:69 22:69 Tsia bhú Ets. 110:1.

kekele tété me: «Bhú nasuno gba ani-e, ani ngaha kpéke 'ndji pi okpála me u améne líli gba ngámá-a de. Ani amene bhú doto gba omaYuda libhomu. Ani akpo bhú ndu doto na Galilaya. Mbia inde-e, ani akolo ibili ne di ei.»

*U anu ne Yesu kala ngámá Elode*

<sup>6</sup> Li Pilatø adje lie mo-o, ani atsia ayi me: «Kpála inde-e, a ko kpála na Galilaya?»  
<sup>7</sup> U agie pi ani me: «A moko, a ko kpála na Galilaya.» Abhomu-o, li Pilatø adje lie me Yesu ayie bhú ndu doto li ngámá Elode adu alila e-e, ani atsia atima ani pi ani. Padhá de, anga bhú ekpí ang-o, Elode adu di bhú Yelusalema oo. <sup>8</sup> Elode akpi djali naali li ani au Yesu lie. Padhá de, anga nayie nani didili naali, ani adu akunda me ni u Yesu ka engú gba ani inde ani adu adje e-o. Ani atsia adu akunda nau ani me ani nde ngamene ngamba 'ngú. <sup>9</sup> Ani ayiyi Yesu li ongú bhelé. Engú bini, Yesu gie 'ngú pi ani tété belegu de bini. <sup>10</sup> Ongbengbe odimandø di ne omusuno na líli gba Moidje adu oo. U adu apa 'ngú li kute ani sisiti naali. <sup>11</sup> Elode ne osudha gba e amu ani, u atsia asosobho di ani. Pipita-a, u adyi bádha bongo li ani, u atsia agie ani pi Pilatø. <sup>12</sup> Kalanu-o, Elode ne Pilatø du nadje lio de. Nayie li 'kpí ang-o, u atsia akolo bhú makpolia.

*U akodho 'ngú gba Yesu me ani kpi bha makpi*

*(Tsia bhú Mat. 27:15-26; ne bhú Mlk. 15:6-15; di ne bhú Dja. 18:39 – 19:16.)*

<sup>13</sup> Abhomu-o, Pilatø apo bhúla ongbengbe odimandø, ongámási gba omaYuda di ne okpála. <sup>14</sup> Ani atsia apa pi uo me: «Yi ago ne kpála inde-e muma me ani ngaha kpéke 'ndji pi okpála. La-a, ma ayi ani li 'ngú ang-o kala yi si, ma u ani ne siti 'ngú belegu de bini bhú ká ndu 'ngú hana inde yi apa e li ani-o. <sup>15</sup> Elode u di siti 'ngú ka ani de anga ani agie ani pi ní ei. A moko me kpála inde-e mene siti 'ngú belegu de bini inde u ti da nabhøle ani ka e ko. <sup>16</sup> Kaka-a, ma abhí ani ne fimbo, ma atsia tsé 'kpa li ani.» [ <sup>17</sup> Bhú ndu anokomia na Pasika hana, a ayo me

Pilatø tse 'kpa li kpála inde u aholo e bhú tikpu-o pi uo bini.]

<sup>18</sup> Engú bini, ndu uo hana aholo asusula bhú dabili bini me: «Bhøle kpála bhomu-o mabhøle, amba mu tse 'kpa li Balaba pi ya!» <sup>19</sup> (U aholo nani Balaba bhú tikpu anga ani agbe nani kpéke 'ndji abhú Yelusalema, ani atsia abhøle di kpála.)  
<sup>20</sup> Pilatø adu akunda natse 'kpa li Yesu. Kaka-a, ani atsia ayi matá uo li 'ngú ang-o ko. <sup>21</sup> Engú bini, u aholo bha nasusula me: «Gi ani li kulusi! Gi ani li kulusi!»  
<sup>22</sup> Bhutsibhutsi na bata-a, ani apa pi uo me: «Ani amene la mangua siti 'ngú dho? Ma u engú inde ani amene e, u ti da nabhøle ani ka e de. Ma abhí bha ani ne fimbo, ma tsia tsé 'kpa li ani.»

<sup>23</sup> Engú bini, u azi bha kekele tété kpekpeke me, a ayo me u gi Yesu li kulusi. U adu bha a'é'e 'li o ne bhúla, akolo li nedhinga li 'li uo aha angu Pilatø lie ko. <sup>24</sup> Abhomu-o, Pilatø atsia aziba namene maka u adu akukunda lie ko. <sup>25</sup> Ani atsia atse 'kpa li kpála inde u adu ayo e-o, kpála inde u aholo e bhú tikpu-o. Padhá de, anga ani agbe kpéke 'ndji, ani atsia abhøle di kpála. Engú bini, ani atsia aha Yesu pi uo me u mene ne ani maka u adu akukunda lie ko.

*U anu ne Yesu ngú nabhøle ani*

*(Tsia bhú Mat. 27:32-44; ne bhú Mlk. 15:21-32; di ne bhú Dja. 19:17-27.)*

<sup>26</sup> Li osudha adu anu ne Yesu lie, u akø lio ne Simo, kpála na ndu doto na Silene, me ani nde ayie abhiye. U aholo ani, u atsia a'o kulusi gba Yesu-o li 'ngbu ani me, ani bibi amba ani kpata Yesu ne di.

<sup>27</sup> Okpála bhelé adu akpata Yesu. Bhú ká uo-o, adu di ne olisi inde adu aku 'gbá ne nalopolo lio ngú ani-o. <sup>28</sup> Yesu adji bhúla e ne apí uo, ani atsia apa pi uo me: «Ngayi, olisi na Yelusalema-a, yi akú 'gbá ngú ma de! Engú bini, yi ku mangbo egbá ngú yi ne ongisi gba yi ko. <sup>29</sup> Padhá de, anga oekpí koko akólo makolo, oekpí inde u apá lie me: «A ko djali pi olisi inde i zu de, inde i bi 'bhí de, di ne obhende li ongisi ndji 'ka o de-o!» <sup>30</sup> Li nedhinga bhomu-o, okpála ahólo napa pi

ongbengbe 'ta me: <Yi buku ya!> U tsia pá pi odjedje 'ta me: <Yi wo ya!>† <sup>31</sup> Padhá de, anga i dũ me okpála nde amene ndula bhe na yiyi-e mo-o, u méne la ibili naae ndula bhe na keke-e pi?»\*

<sup>32</sup> Li nedhinga bhomu-o, u anũ di ne obhosi bhisi koko inde amene sisiti 'ngú naali me u bhili uo bhú dabili bini ne Yesu.

### *U agi Yesu li kulusi*

*(Tsia bhú Mat. 27:45-56; ne bhú Mlk. 15:33-41; di ne bhú Dja. 19:28-30.)*

<sup>33</sup> U akolo li bili inde u a'i e me «Pelegendji.» U atsia agi Yesu li kulusi di ne okpála na sisiti bhisi-o, koko li kulusi gba e li pá 'kpa ani na kokpa, koko li kulusi gba e li pá 'kpa ani na gali. <sup>34</sup> [Abhomu-o, Yesu atsia apa me: «'Dyi ma, mbu li siti 'ngú gba uo, anga u mbila engú inde u ngamene e de.»]

Osudha agu gbanda ngú nagapa obongo gba ani-e li o. <sup>35</sup> Okpála adũ oo, u adũ atsia engú inde adũ akodho 'kpí-o. Ongámási gba omaYuda adũ amũ ani. U atsia adũ apa me: «Ani akobho okpála koko. A ayo me ani kobho di lie ne titi e, i dũ me ani nde ne Masiya inde li Ebhe abhũ e ko!» <sup>36</sup> Osudha amũ di ani. U adyudyo lio masakpe, u aha kpongadha pandi pi ani, u atsia apa me: <sup>37</sup> «I dũ me mũ nde bha ndjũ ne 'ngbé ngámá gba omaYuda-a, mũ de kobho limũ ne titi mũ!» <sup>38</sup> Pí 'ndji ani-e, u aye me: «A INDE-E 'NGBÉ NGÁMÁ GBA OMA YUDA-O.»

<sup>39</sup> Sũka okpála na sisiti inde u agi o li kulusi adũ asobho ani me: «Mũ ne Masiya adi? Kobho limũ ne titi mũ, amba mũ kobho di ya!» <sup>40</sup> Engú bini, bhe koko ambe bhú 'ndji ani, do ani de-e: «Mũ kpe Ebhe di, ngamũ inde ngasia bhadi likabhu maka ani-e? <sup>41</sup> Pi ní-e, a li likabhu gba ní-e ne tata, anga ní ngasia bhomu-o mbini kulu gba ní ko. La-a, ngaani-e, ani mene naae siti 'ngú belegũ de bini.» <sup>42</sup> Pipita-a, ani atsia apa pi Yesu me: «Bhundja ma uu, li nedhinga inde mo ogó lie ngú naũ ngámá gba mũ ko.» <sup>43</sup> Yesu agie pi ani me: «Ma apa pi mũ na paká me, naki-e,

ní adũ ne mũ bhú dabili bini bhú kuti na mundayi ko.»

### *Yesu akpi*

<sup>44</sup> A akolo masakpe de tulukpe, ela a'o nasũ. Biti aha pĩla doto libhomu akolo li saa na bata pita tulukpe. <sup>45</sup> 'Ngbé 'kpá bongo inde adũ agbo bhũsũ 'ngbé 'ti Ebhe gba omaYuda asidha bhũsũ e tũtũ má tsue! <sup>46</sup> Abhomu-o, Yesu atsia asũla kpekpeke me: «'Dyi ma, ma nga'o bua ma sa 'kpa mũ.» Pita ani apa engú bhomu-o lie, ani atsia andala 'kpa li bua e. <sup>47</sup> Li ngámá gba osudha na Loma au engú inde akodho 'kpí-e lie, ani atsia adũ adhøø Ebhe me: «A ko paká me kpála inde-e bha ndjũ nako ne kpála na ngbingbili!» <sup>48</sup> Ndũ okpála hana inde ago apo bhũla o ngú natsia engú ango-o, au engú inde akodho 'kpí-o. U atsia adũ agie lio agba o me u nde abubu 'kpa o pí 'ka o ka likabhu. <sup>49</sup> Ndũ obi Yesu hana di ne olisi inde adhũkũ ne ani bhú dabili bini nayie bhú Galilaya-a, alũlũ mbo tsutsu. U adũ natsia engú inde adũ akodho 'kpí ko.

### *U azi Yesu*

*(Tsia bhú Mat. 27:57-61; ne bhú Mlk. 15:42-47; di ne bhú Dja. 19:38-42.)*

<sup>50-51</sup> Kpála bini adũ nani oo. A adũ 'li ani me Djodjefũ , kpála na Alimaté, sũka gũdhũ gba omaYuda. A ko nani kpála na babadha inde adũ di ngbingbili. Ani adũ nani nadjeko nago ka Naũ gba Ebhe pĩla doto. A ko nani sũka Libi okpála natsia 'kpí li ongú gba omaYuda-o. Engú bini, ani dũ aziba engú inde li Libi okpála natsia 'kpí li ongú gba omaYuda adũ abhundja e di ne namene e li Yesu-o de. <sup>52</sup> Ani anũ abhaka Pilatø, ani atsia ayo kuo Yesu ka ani. Pilatø aziba. <sup>53</sup> Pipita-a, ani atsia a'e kuo ani li kulusi-o. Ani agagala ne bongo. Ani atsia ato bhú lata inde u adjĩ e bhú teme, lata inde u zĩ nga kpála bhú e kalanũ de. <sup>54</sup> A adũ nani 'kpí kulu bhuluvue, masakpe de ekpí naguo .

<sup>55</sup> Olisi inde ayie nani ne Yesu bhú Galilaya-a, anũ bhú dabili bini ne Djodjefũ. U atsia lata-o, u au maka u a'o kuo Yesu lie bhúbhú-o. <sup>56</sup> Pipita-a, u agie lio

\* 23:31 23:31 Ndula bhe na yiyi-e, a ko Yesu. Ndula bhe na keke-e, a ko okpála.

agba o. U atsia aleke emu, di ne mungotsi ngubula me sidi-e, u nu pulu kute kuo-o ne di. Li 'kpi nago-o, u atsia aguo maka li lili apa lie ko.

## 24

*Yesu azuku  
(Tsia bhú Mat. 28:1-10; ne bhú Mlk. 16:1-8; di ne bhú Dja. 20:1-10.)*

<sup>1</sup> Bhú 'kpi yinga kekpi má bhé-o, olisi aha mungotsi inde u agili e-o, u atsia agbida abhú lata. <sup>2</sup> U abhaka me teme nde awawala li 'bhe lata-a awawala. <sup>3</sup> U ali lie, u bhaka kuo Ngamá Yesu de. <sup>4</sup> Nedhinga u adu akiaka lie ka 'ngú ang-o, kolo me-e okpála bhisi aze li uo. Okpála ang-o adyidyí bubu bongo má tuu tuu! <sup>5</sup> U adu la lie ne tsulu naali-e, u atutu bhúla o ne kuto. Okpála ang-o atsia apa pi uo me: «Yi ngagili kpála inde uu-o bhú ká okpála inde amu-o ka ni? <sup>6</sup> Ani sii ade. Engú bini, ani azuku. Yi bhundja engú nako ani apa e pi yi li nedhinga inde ani adu nga bha lie bhú Galilaya me: <sup>7</sup> «A ayo me u pu ma, Ndili gba kpála, pi okpála na sisiti. U gi ma li kulusi, amba bhú 'kpi na bata-a, ma tsia zuku.» <sup>8</sup> Abhomu-o, u atsia abhundja 'li ani-o.

<sup>9</sup> U ayie bhú lata-o. U atsia anu nakpokpo ndu 'ngú bhomu-o hana pi obhulu titima ndjikpa ne ká bini, di ne ndu obhende adu ne uo bhú dabili bini-e hana. <sup>10</sup> Olisi ang-o, adu nani Malia, kpála na gudhu na Magadala, Djaani ne Malia, 'hi Djaki. Ngauo ne olisi koko inde adu bhú dabili bini ne uo akpokpo pi obhulu titima gba Yesu-o. <sup>11</sup> Engú bini, obhulu titima abhundja naao me, engú inde li olisi akpokpo e-e, a ko engú na ngingi. Kaka-a, u tsia bhuka de. <sup>12</sup> Engú bini, Piele ayie bhúlá, ani anu ne holo abhú lata. Ani akolo lie oo, ani akita ne kuto, ani atsia 'kpi, ani au bha bongo inde u agagala kuo ne e ko. Pipita-a, ani agie lie agba e me ani nde ngangamba naali ka engú inde akodho 'kpi ko.

*Yesu akoto li omukpata bhisi li kpadji na Emausi  
(Tsia bhú Mlk. 16:12-13.)*

<sup>13</sup> Bha li 'kpi ang-o, omukpata bhisi adu anu bhú kati bini inde u a'i e me Emausi. Kati ang-o adu de Yelusalema tsutsu, masikpe de kilometele ndjikpa ne ká bini. <sup>14</sup> U adu akpokpo 'ngú sunda o pindji ndu 'ngú hana inde akodho 'kpi-o. <sup>15</sup> Nedhinga uo adu akpokpo 'ngú di ne namene kpekebhe lie sunda o-o, ngaani Yesu makpe, ani adyudyo lie de uo masikpe. Ani atsia aholo 'nú ne uo bhú dabili bini. <sup>16</sup> U adu au ani, engú bini, ehe bini adu amene me u ambila ani de. <sup>17</sup> Ani ayi uo me: «A ko mangua 'ngú dho yi adji ne kpokpo e sunda yi me-e?» Abhomu-o, u alu, u atsia abedhe ne likabhu bedhe.

<sup>18</sup> Suka uo bini inde adu 'li e me Keleopasi apa pi ani me: «Bhú ká ogo-mago na Yelusalema libhomu-o, engú inde akodho 'kpi sunda okpi inde-e, mu mbila bha de ngamu kpi mu kpi?» <sup>19</sup> Ani ayi uo me: «Mangua 'ngú dho?» U atsia agie pi ani me: «Engú inde akolo li Yesu, kpála na Nadjaleta! A ko nako polofeta kukulu. Ongú inde ani amene e ne bhende ani asuno e, ani amene ndundu hana ne angu. Ani atsia asuno ongú ang-o kala Ebhe di ne kala ndu okpála hana. <sup>20</sup> La-a, ongbengbe odimande gba Ebhe di ne ongamási gba ní-e, apu ani me u bhele ani. U atsia agi ani li kulusi.

<sup>21</sup> La-a, ya adu nako ne 'to ya naaya me, a ko kpála inde agbégbé Isalaele bhú bali-o. Engú bini, a ane naki ekpi bata maka li oengú ang-o akodho 'kpi lie ko. <sup>22</sup> La matá di-e, ya angamba ka olisi koko bhú ka ya naali. U anu igini bhú sikikpi abhú lata. <sup>23</sup> Engú bini, u u kuo ani de. U agie lio, u apa pi ya me oandjelu aze lio. Oandjelu atsia apa pi o me ani uu. <sup>24</sup> Pipita-a, okpála koko bhú ká ya anu abhú lata, u atsia abhaka ndu 'ngú hana maka li olisi akpokpo lie ko. Engú bini, ngaani makpe-e, u u ani de.»

<sup>25</sup> Abhomu-o, Yesu atsia apa pi uo me: «Yi ne ongingi! Ka ni yi ngabhuka lie má gala ade ndu 'ngú hana inde li opolofeta-a apa e! <sup>26</sup> A ayo nako de me Kilisito dje likabhu kala me ani li bhú nau na asasaua gba e di?» <sup>27</sup> Pipita-a, ani aholo nakpokpo ndu 'ngú hana inde u apa e pindji ani bhú

oBhuku gba Ebhe-e pi uo. Ani akpokpo nayie bhú obhuku gba Moidje akólo bhú obhuku gba ndu opolofeta-a hana.

<sup>28</sup> U akolo lie de kuti inde u adu anu bhú e masikpe-e, Yesu amene mugito me ni adji tsutsu. <sup>29</sup> Engú bini, u atsia apa pi ani me: «Ní si ne yi si, anga ekpí asegele, bití la di ngago.» Ani atsia alí ngú nasi bhú dabilí bini ne uo oo ko. <sup>30</sup> Nedhinga ani adu azu 'he lie bhú dabilí bini ne uo-o, ani aha mapa, ani agie heni pi Ebhe. Pipita-a, ani agumu mapa-o, ani atsia aha pi uo. <sup>31</sup> Abhomu-o, djila uo abhulu, u atsia ambila ani. Engú bini, ani angita bha kolo bhú djila uo má pele! <sup>32</sup> U atsia aholo nayi lio sunda o me: «Li nedhinga inde ani adu akpokpo 'ngú di ne nasuno ta eli gba Ebhe lie pi ní li kpadji-e, bua ní bedhe igini bhú ní ne djali bedhe di?»

<sup>33</sup> Bha li nedhinga bhomu-o, u ayie bhúlá kolo má gala, u atsia agie lio abhú Yelusalema. Oo, u abhaka me obhulu titima ndjikpa ne ká bini-e nde apo bhúla o ne obi o-o bhú dabilí bini. <sup>34</sup> U atsia apa pi obhe bhisi bhomu-o me: «Ngámá azuku na kukulú! Simo au ani!» <sup>35</sup> Pipita-a, omukpata bhe bhisi-e atsia akpokpo 'ngú inde akodho 'kpí li kpadji-e pi uo, di ne maka u ambila Yesu lie li nedhinga ani agumu mapa lie ko.

*Yesu asuno lie pi omukpata gba e-o*

*(Tsia bhú Mat. 28:16-20; ne bhú Mlk. 16:14-18; ne bhú Dja. 20:19-23; di ne bhú Kul. 1:6-8.)*

<sup>36</sup> Li nedhinga u adu nga bha lie nakpokpo 'ngú ango-o, Yesu atsia alu bhú ká uo. Do ani pi uo me: «Guo 'ngú du bhú dabilí bini ne yi!» <sup>37</sup> U adje tsulu naali, u atsia aholo aguku, anga u adu abhundja me o ou igbadyibhe. <sup>38</sup> Engú bini, Yesu atsia apa pi uo me: «Yi ngadje tsulu ka ni? Yi ne bua na bhisi bhisi ka ni? <sup>39</sup> Yi tsia nga 'kpa ma di ne 'dhu ma, a ko bha ma makpe. Yi tana nga kute ma, amba yi u, anga mbilika ne biki li igbadyibhe ade maka yi ngau ma lie ne di ko.» <sup>40</sup> Ani apa engú bhomu-o lie, ani atsia asuno 'kpa e di ne 'dhu e pi uo. <sup>41</sup> Li djali di ne nangamba aha angu uo lie naali-e, u tsia bhuka ngaiza de. Ani atsia ayi uo me:

«Mbo 'he nazu mazu ka yi si uu?» <sup>42</sup> U atsia aha ndu sungu inde u azi e mazi-e pi ani. <sup>43</sup> Ani aha, ani atsia azu li djila uo oo.

<sup>44</sup> Pipita-a, ani pi uo me: «Ma apa nako pi yi ndjindji nedhinga ní adu nga bha lie bhú dabilí bini-e me, a ayo me ndu 'ngú hana inde u aye e pindji ma bhú líli gba Moidje, bhú obhuku gba opolofeta di ne bhú bhuku na oetsi gba ní-e, amene lie.»

<sup>45</sup> Pipita-a, ani atsia abhulu imbilangu gba uo ngubula me u mbila ta engú inde u aye e bhú oBhuku gba Ebhe ko. <sup>46</sup> Ani atsia apa pi uo me: «Maka u aye lie bhú oBhuku gba Ebhe-e me, a ayo me Kilisito dje likabhu, amba ani tsia zuku bhú 'kpí na bata. <sup>47</sup> A ayo me okpála kpokpo 'ngú gba ani-e pi ndu okpála hana píla doto libhomu. U akpokpo nayie bhú Yelusalema me okpála dji bua o, amba Ebhe 'e siti 'ngú gba uo ko. <sup>48</sup> Yi au engú inde akodho 'kpí-e ne djila yi makpe. <sup>49</sup> Ngama-a, ma atima pi yi bhende li 'Dyi ma apa me ni atima e-o. Kaka-a, yi du bha bhú gudhu si akólo li 'kpí inde li Ebhe atima angu pi yi lie ko.»

*Ebhe aha Yesu abhúlá*

*(Tsia bhú Mlk. 16:19-20; di ne bhú Kul. 1:9-11.)*

<sup>50</sup> Pipita-a, Yesu anu ne omukpata gba e masikpe de kuti na Betania. U akolo lie oo, ani a'e 'kpa e, ani atsia atuko bisagu pi uo. <sup>51</sup> Li nedhinga ani adu atuko bisagu pi uo lie, ani ayie bhú ká uo. Ebhe atsia aha ani abhúlá. <sup>52</sup> Ngauo-o, u adhögö ani. Pipita-a, u atsia agie lio abhú Yelusalema me u nde abedhe ne djali bedhe. <sup>53</sup> Ndu 'kpí hana, u adu nandu bhú 'ngbé 'ti Ebhe gba omaYuda ngú nadhögö Ebhe.

**Bádha Ngali  
gba Yesu Kilisito maka li  
Djaa  
aye lie ko  
Eli na kalanu**

Bádha Ngali gba Yesu Kilisito maka li Djaa aye lie ngasuno Yesu maka Eli na duduma gba Ebhe. Eli akolo maka kpálakuti atsia adu bhú ká ní (1:14). Maka li bhuku ngae makpe ngapapa lie, Bádha Ngali inde aye nani li e ngubula me okpála inde ngatatanga bhuka me Yesu ne Mükobho inde li Ebhe abhu nani e, inde di Ndili gba Ebhe, ngubula me ka nabhuka bhú ani-e, u sia mükobho na duduma (20:31).

U aye engú gba ølø na zabhe sunda oehe bhisi me anga bhú obhuku na didili koko-o, u ye engú angoo de, okoko atsia aye li obili koko (8:1-11).

Djaa ngagama 'ngú naali pindji mükobho na duduma inde li Ebhe aha e padhá bhú Yesu. A ngakpo lita e naki inde i tsia gó pi obhende ngaziba Yesu maka kpadji, maka kukulu 'ngú, la di maka mükobho. Engú na ngbéngbé inde bhú Bádha Ngali gba Djaa, a ko ngubula nasuno engú inde bhú mükobho gba kpála ngubula ekpí bini ne bini, ngubula nasuno lele kukulu 'ngú na Bu Bhobua : maka engu, maka mapa, maka zi 'kpí, maka mulila gba okandøle ne okandøle gba e, la di maka vino ne lí e.

**Ongbengbe ongú inde bhú bhuku inde-e ngae inde:**

Eli na kalanu 1:1-18

Djaa bhulu nabatisa okpála, ne omukpata gba Yesu na kalanu 1:19-51

Kulu gba Yesu bhú ká okpála 2:1 - 12:50

Oekpí nasoso gba Yesu abhu Yelusalema 13:1 - 19:42

Nazuku gba Yesu, ne nakoto ka Ngamá li okpála 20:1-31

Eli nasoso: ani akoto matá li okpála abhú Galilaya 21:1-25

*Eli inde zi 'kpí di ne mükobho*

<sup>1</sup> Nayie li lilita-a, Eli\* adu nani uu.

Eli angoo adu nani bhú dabili bini ne Ebhe.

La di-e, Eli angoo a adu Ebhe.

<sup>2</sup> Nayie li lilita-a, Eli angoo adu nani bhú dabili bini ne Ebhe.

<sup>3</sup> Ebhe atsia abho ndu 'he hana ne Eli angoo.

Ehe bini inde amene lie mandí ani ade.

<sup>4</sup> Mükobho akoto bhú Eli angoo.

Mükobho angoo atsia adu zi 'kpí pi okpála.

<sup>5</sup> Zi 'kpí ngaziga bili bhú biti.

Engú la bini, biti ha angu zi 'kpí angoo de.

<sup>6</sup> Ebhe atima kpála bini. A adu 'li kpála angoo me Djaa . <sup>7</sup> Ani ago maka kpála nakpokpo 'ngú. Ani atsia akpokpo 'ngú mbámhá pindji zi 'kpí-o, amba ndu okpála hana bhuka ka ani.† <sup>8</sup> Ngaani makpe-e, ani du nani zi 'kpí de. Engú bini, ani ago nani ngú nakpokpo 'ngú pindji zi 'kpí-o. <sup>9</sup> Zi 'kpí angoo, a ko nani zi 'kpí na kukulu. A ago píla doto, a ngaziga ndu okpála hana.

<sup>10</sup> Eli-e adu nani píla doto. Ebhe atsia abho ndu 'he hana ne di. La-a, okpála na píla doto tsia mbíla ani de. <sup>11</sup> Eli-e ago nani bhú ká omaha e. Engú bini, omaha ani tsia sia ani de. <sup>12</sup> La-a, okpála koko asia ani, u atsia abhuka di ani. Abhomu-o, ani atsia aha angu pi uo me u kolo ongisi gba Ebhe. <sup>13</sup> U kolo ongisi gba Ebhe li kpadji bhende maka u azuzu okpála na doto lie de. A ko la di ka gumu gba bhoko bini de. Engú bini, ayie ka Ebhe.

<sup>14</sup> Eli-e adjí lie, atsia akolo kpála. Ani adu nani bhú ká ní. Ní au sangu gba ani, sangu inde ani asia e ka 'Dyi e-o. A ko sangu gba koli Ndili bini, inde abedhe ne bádha bua di ne ngbili 'ngú . <sup>15</sup> Djaa‡ akpokpo 'ngú pindji ani mbámhá. Ani atsia asula me: «Engú nani ma apa e me:

\* 1:1 1:1 Eli: Eli-e, a ko Yesu (tsia lukuluku 14). † 1:7 1:7 Okpála bhuka zi 'kpí ka ani: Ani inde-e, a ko Djaa bhulu nabatisa okpála-o. ‡ 1:15 1:15 Djaa: A ko Djaa bhende Bhulu nabatisa okpála-o.



<Kpála inde ngago pita ma-a, ani ane ma mane. Padhá de, anga nani me ma nde nga ade-e, ani adu bha naae uu.> Ma apa nani engú ang-o pindji ani.» <sup>16</sup> Abhomu-o, bhú bádha bua gba ani inde bedhe-e, ndu ní hana ní atsia asia bádha bua pí bádha bua koko. <sup>17</sup> Padhá de, anga ní asia líli sa 'kpa Moidje . La-a, bádha bua di ne ngbili 'ngú-o, ní asia ka Yesu Kilisito . <sup>18</sup> Kpála bini u Ebhe belegu de bini. La-a, koli Ndili bini inde di Ebhe, inde ngadu de 'Dyi e-e, asuno ani pi ní ngae.

*Djaa bhulu nabatisa okpála akpokpo 'ngú gba Masiya*

*(Tsia bhú Mat. 3:1-12; ne bhú Mlk. 1:1-8; di ne bhú Luk. 3:1-18.)*

<sup>19</sup> A inde-e engú li Djaa akpokpo e, nedhinga li ongámási gba omaYuda na Yelusalema atima odimandø di ne okpála na piga gba Levi lie agba ani-o. U atima uo ngú nayi ani me: «Mu ne da?» <sup>20</sup> Ani yala nagie engú tété de. Ani apa mbámbá me: «Ngama-a, ma ne Masiya ade.» <sup>21</sup> U atsia ayi ani me: «Mu la ne da? Mu ne Eliya?» Djaa agie me: «Ma ne ani ade.» U ayi ani me: «Mu ne polofeta inde ya ngadjeke e?» Ani agie me: «Ma ne polofeta ade.» <sup>22</sup> Abhomu-o, u atsia apa pi ani me: «Mu la naamu ne da? Padhá de, anga a ayo me ya gie engú tété pi okpála inde atima ya ko. Ngamu makpe-e, mu ngapa li 'ngú gba mu-o pi?» <sup>23</sup> Djaa agie me:

«Ma ne kpála inde ngatotobhila bhú 'gu me,

<Yi leke kpadji ngbingbili pi Ngámá.>»

(A bhomu-o engú inde li polofeta Isaya apa nani e-o).†

<sup>24</sup> Okpála inde u atima o agba Djaa, a adu nani omuFalisai . <sup>25</sup> U ayi ani me: «Mu ne Masiya ade. Mu ne Eliya ade. Mu ne polofeta inde ya ngadjeke e ade. Mu la ngabatisa okpála ngú ni?» <sup>26</sup> Djaa agie pi uo me: «Ngama-a, ma ngabatisa okpála ne engu. La-a, kpála bini bhú ká yi, inde yi mbila e de. <sup>27</sup> Ani ngago pita ma. Ma belegu ne tetele kpála ade ngubula me ma bhulu ekpú na maløke gba ani-o.»

<sup>28</sup> Engú bhomu-o akodho 'kpí bhú kuti na Betania, ayi 'ngu na Djuludani li bili inde li Djaa adu abatisa okpála li e-o.

*Yesu ne Ndili Kandøle gba Ebhe*

<sup>29</sup> Li ekpí aseke lie, Djaa au Yesu me ani nde ngago li pápá inde ani adu li e-o. Ani atsia apa me: «Yi tsia nga Ndili Kandøle gba Ebhe-o. Ani nga'e siti 'ngú píla doto ngae. <sup>30</sup> Engú inde ma akpokpo e, ma akpokpo pindji ani, engú inde me: <Kpála bini ngago pita ma. La-a, ani ane ma mane. Padhá de, anga ani adu nani muma kalanu.> <sup>31</sup> Ma du ambila ani de. Engú bini, ma ago nabatisa okpála ne engu, ngubula me Ebhe suno ani pi omaIsalaele.» <sup>32</sup> Djaa akpokpo matá engú gba ani-e me: «Ma au BuaS gba Ebhe-e ngayie ne abhúlá, maka bøbhe, atsia adu pí ani. <sup>33</sup> Ma du ambila ani de. Engú bini, Ebhe inde atima ma ngú nabatisa okpála ne engu-o, apa muma me: <Mo ou Bua gba Ebhe-e ngakø, i tsia dú pí kpála bini. A bhomu-o kpála inde abátisa okpála ne Bu Bhobua ko.> <sup>34</sup> Ngama-a, ma au, ma atsia akpokpo la di 'ngú mbámbá me kpála inde-e, a ko Ndili gba Ebhe!»

*Yesu a'i omukpata na gigena*

<sup>35</sup> Li ekpí aseke lie, Djaa adu ago matá oo bhú dabili bini ne omukpata gba e bhisí. <sup>36</sup> Nedhinga ani au Yesu lie ngakodho 'kpí-e, ani atsia apa me: «Yi tsia nga Ndili Kandøle gba Ebhe-o.» <sup>37</sup> Li omukpata gba ani bhisí-e adje ani lie ngapa 'ngú bhomu-o, u atsia akpata Yesu. <sup>38</sup> Yesu adji lie. Ani au me u adu akpata ni, ani atsia ayi uo me: «Yi ngagili ni?» U agie pi ani me: «Labi, mu ngadu su?» (Labi akunda napa me Musuno.) <sup>39</sup> Yesu agie pi uo me: «Yi gógo amba yi u.» (A adu nani masikpe de saa na badha pita tulukpe.) U anu, u atsia au bili inde ani adu nadu li e ko. Li 'kpí ang-o, u atsia adulu ne uo bhú dabili bini.

<sup>40</sup> Andili, ndai Simo Piele, nani ne saka omukpata bhisí inde adje engú li Djaa apa e-e, atsia akpata Yesu-o. <sup>41</sup> Andili abhaka ngaiza kalanu hana-a ndai e makpe Simo.

† 1:23 1:23 Tsia bhú Isa. 40:3. § 1:32 1:32 Bua: f du me u nde aye ne 'dhu balua na ngbéngbé-e (madjisikile), amba a ko Bu Bhobua.

Ani atsia apa pi ani me: «Ya au Masiya au.» (A akunda napa me Kilisito.) <sup>42</sup> Ani anu ne Simo agba Yesu. Yesu atsia ani, ani atsia apa me: «Ngamu-o, mu ne Simo, ndili gba Djaa . U adu a'i mu me Sefasi.» (Hi ango-o akunda napa me Piele.)

### *Yesu a'i Filipino*

<sup>43</sup> Li ekpi aseke lie, Yesu akunda nanu bhú ndu doto na Galilaya. Ani abhaka Filipino, ani atsia apa pi ani me: «Kpata ma.» <sup>44</sup> (Filipo nani ne kpala na gudhu na Betesaida, gudhu inde li Andili ngauo ne Piele ayie bhú e-o.) <sup>45</sup> Pipita-a, Filipino abhaka Natanaele. Ani apa pi ani me: «Ya au kpala inde li Moidje aye nani engu gba e bhú bhuku na líli-o, li opolofeta akpokpo di nani engu gba e-o. A ko Yesu, ndili gba Djodjefu , kpala na gudhu na Nadjaleta.» <sup>46</sup> Natanaele ayi ani me: «Ehe na ndjindji ti da nayie bhú kuti na Nadjaleta uu?» Filipino agie pi ani me: «Gogo, amba mu u.»

<sup>47</sup> Li Yesu au Natanaele lie ngago li papá gba e, ani atsia apa li 'ngú gba anie me: «Yi tsia nga kukulu mafsalaele inde. Pulu 'ngú bhú ani belegu ade bini.»

<sup>48</sup> Natanaele ayi ani me: «Mo ombila ma lele pi?» Yesu agie pi ani me: «Ma au mu nedhinga mo odu lie sa ndula na figi , kala me Filipino 'i mu-o.» <sup>49</sup> Abhomu-o, Natanaele atsia apa pi ani me: «Labi, ngamu-o, mu ne Ndili gba Ebhe! Mu ne 'ngbé Ngámá gba omafsalaele!» <sup>50</sup> Yesu apa pi ani me: «Mo obhuka, anga ma apa pi mu me ma au mu sa ndula na figi? Mo ou ongu na ngbengbengbe ane bhobhomu-o mane!» <sup>51</sup> Yesu atsia apa mata me: «Ma apa pi yi na paká me yi au kokpi me a nde abhulu lie, oandjelu gba Ebhe-e nde nga'u, u nde di ngaké pi 'ndji ma, Ndili gba kpala!»

## 2

### *Anokia na kava bhú kuti na Kana*

<sup>1</sup> Abhomu-o, pita 'kpi bhisi-e, anokia na kava adu bhú Kana, kuti bini na ndu

doto na Galilaya. 'Hi Yesu adu oo. <sup>2</sup> U atsia a'i di Yesu ne omakpata gba e bhú anokia ango-o. <sup>3</sup> Li vino andjia lie, 'hi Yesu atsia apa pi ani me: «Vino mata ka uo ade.» <sup>4</sup> Engu bini, Yesu agie pi ani me: «'Hi ma, a ka ní ne mu ne ni? Nedhinga gba ma-a kolo nga de.» <sup>5</sup> Abhomu-o, 'hi ani atsia apa pi okpala na kulu-o me: «Yi mene ndu 'ngú hana inde ani apa e pi yi ko.»

<sup>6</sup> Ngbengbe madakpa inde u abho e li teme-e, adu oo madhia. OmaYuda vuvulu lio bhúbhú ngubula nakolo bubu kala Ebhe. Omadakpa ango-o bini ne bini ti da naha litele kama bini. <sup>7</sup> Yesu apa pi okpala na kulu-o me: «Yi bebedhe omadakpa bhomu-o ne engu.» Okpala na kulu-o abebedhe omadakpa ne engu bedhe bedhe. <sup>8</sup> Abhomu-o, Yesu atsia apa pi uo me: «Mbia inde-e, yi sese, amba yi nu ha pi ngama na anokia-o.» U amene bhadi moko. <sup>9</sup> Li ngama na anokia ale engu-o lie, ani au me akolo vino. Ani du ambila bili inde ayie li e de. (La-a, okpala na kulu inde asene engu-o, adu ambimbila ngao.) Abhomu-o, ani a'i 'ko ele-o. <sup>10</sup> Ani apa pi ani me: «Ndu okpala hana haha ngaiza kalanu vino na babadha. I du la me u nde andji vino bhelé andji-e, u tsia há bhende babadha ade ko. La-a, ngamu-o, mo owo vino bhende na babadha-a akolo li nedhinga inde!»

<sup>11</sup> Abhomu-o gina ongu na ngangamba\* inde li Yesu amene e-o. Ani amene bhú Kana, kuti bini na ndu doto na Galilaya. Ani asuno sangu gba e-o, omakpata gba ani-e atsia abhuka ani. <sup>12</sup> Pipita-a, ani anu bhú gudhu na Kapalanauma bhú dabili bini ne 'hi e, ne ondaise e, di ne omakpata gba e-o. U mene la oo ekpi bhelé de.

### *Yesu atsambala okpala natsindji 'he bhú 'ngbé 'ti Ebhe gba omaYuda*

(Tsia bhú Mat. 21:12-13; ne bhú Mlk. 11:15-17; di ne bhú Luk. 19:45-46.)

\* **2:11** 2:11 Ongu na ngangamba: Bhú Bádha Ngali gba Yesu Kilisito maka li Djaa aye lie, mo obhaka ongamba 'ngú mananika inde asuno okulu gba Yesu-o. Bhú obhuku koko u aye me «Okulu», bhú okoko u aye me «Ehe inde ngasuno ehe koko, i du di-e engu koko» (sinye). Tsia bhú Dja. 4:43-54, 5:1-16, 6:1-21.

<sup>13</sup> Anokomia na Pasika gba omaYuda akolo masikpe. Abhomu-o, Yesu atsia anu bhú gudhu na Yelusalema. <sup>14</sup> Oo, ani ali bhú 'ngbé 'ti Ebhe gba omaYuda-o. Ani abhaka me okpála ngatsindji obagala, ne okandele, di ne obobhe. Ani atsia abhaka di me okpála nayipa falanga nde adulu.†  
<sup>15</sup> Abhomu-o, Yesu amene fimbo li kute ekpu. Ani apandja ndu uo hana bhú 'ngbé 'ti Ebhe gba omaYuda-a kilidjo, bhú dabili bini ne okandele, di ne obagala gba o-o. Ani agu 'i dabili gba okpála nayipa falanga kuto. Ani atsia abala di falanga gba uo-o. <sup>16</sup> Ani atsia apa pi okpála inde adu natsindji obobhe-o me: «Yi 'e ehe inde-e si ma'e! Yi adji eti gba 'Dyi ma-a eti natsindji 'he de!» <sup>17</sup> Omukpata gba ani-e atsia abhundja engú inde u aye e bhú Bhuku gba Ebhe-e me: «Mukunda inde ma nde ne e ngubula eti gba mu-o, atsulu ma maka djual!†»

<sup>18</sup> Abhomu-o, omaYuda ayi ani me: «Mo oméne pi ya mangua ngamba 'ngú dho inde asuno me, mu ne angu namene mo-o?» <sup>19</sup> Yesu agie pi uo me: «Yi bhelo 'ngbé 'ti Ebhe gba omaYuda inde, sunda 'kpí bata-a, ma tsia yiki matá.» <sup>20</sup> OmaYuda ayi ani me: «A ayo nani kalanga ndjikpa badha ne ká madhia, ngú nayiki 'ngbé 'ti Ebhe gba omaYuda inde! La ngamu-o, mu tsia yiki sunda 'kpí bata?»

<sup>21</sup> Engú bini, 'ngbé 'ti Ebhe inde li Yesu adu apa 'ngú e, adu kute ani. <sup>22</sup> Kaka-a, li Yesu azuku lie, omukpata gba ani-e atsia abhundja engú nani ani apa e-o. Abhomu-o, u atsia abhuka engú inde u aye e bhú Bhuku gba Ebhe, di ne bhende nani li Yesu apa e ko.

### *Yesu mbila bua ndu okpála hana*

<sup>23</sup> Li Yesu adu lie bhú gudhu na Yelusalema ngubula anokomia na Pasika-a, okpála bhelé au ongú na ngangamba inde ani adu amene e-o. Abhomu-o, u atsia abhuka ani. <sup>24</sup> Engú bini, ngaani makpe, ani ziba uo de. Padhá de, anga ani adu ambila ndu uo hana ndjindji. <sup>25</sup> Ani

ne gumu nayi kpála bini li 'ngú pindji kpála-kuti ade. Padhá de, anga ngaani makpe, ani adu ambila engú inde bhú kpála ndjindji.

## 3

### *Yesu ngauo ne Nikodemu*

<sup>1</sup> Kpála bini adu nani bhú ká omuFalisai . A adu 'li ani me Nikodemu. Ani adu nani saka ongamási gba omaYuda . <sup>2</sup> Ani anu abhaka Yesu sukpe, ani atsia apa pi ani me: «Musuno, ya ambila me Ebhe atima mu ngae, ngú nasuno 'ngú pi ya. Padhá de, anga kpála bini ti da namene ongamba 'ngú , maka mu ngamemene lie inde-e de, i du me Ebhe nde bhú dabili bini ne ani ade ko.» <sup>3</sup> Yesu agie pi ani me: «Ma apa pi mu na paká me, kpála bini ti da nau Nau gba Ebhe-e de, i du me u nde zu ani ne toto de ko.» <sup>4</sup> Nikodemu ayi ani me: «Lele pi, u ti da nazu gbé kpála lie ne toto-o? Ani ti da nagie lie bhú 'bu 'hi e, li 'hi ani tsia zú ani ne toto?»

<sup>5</sup> Yesu agie pi ani me: «Ma apa pi mu na paká me, kpála bini ti da nali bhú Nau gba Ebhe-e de, i du me ani nde sia nazu li kpadji na engu di ne li kpadji na Bua de ko. <sup>6</sup> Bhende azu lie bhú kute-e, a ko kute. Bhende azu lie bhú Bhobua-a , a ko bua. <sup>7</sup> Mo ongamba de ka ma apa lie pi mu me: «A ayo me u zu ndu yi hana ne toto.» <sup>8</sup> Anvi ngape li pápá akunda nape li e. Mu ngadje gigili. Engú bini, mu mbila bili li anvi ango-o ayie li e de. Mu mbila la di pápá adji li e de. A bhadi moko pi ndu obhende hana asia nazu li kpadji na Bua.»

<sup>9</sup> Abhomu-o, Nikodemu ayi Yesu me: «Engú ango-o ti da namene lie lele pi?»

<sup>10</sup> Yesu atsia agie pi ani me: «Ngamu-o, mu ne saka ongbengbe omusuno na Isalaele. Engú la bini, mu mbila engú ango-o de! <sup>11</sup> Ma apa pi mu na paká me: ya ngapa engú inde ya ambila e. Ya la di ngakpokpo 'ngú pindji bhende ya au e ne djila ya. Engú la bini, yi bhuka engú inde ya akpokpo e pi yi-e de. <sup>12</sup> Ma ngakpokpo

† 2:14 2:14 OmaYuda inde adu ayie bhú okuti koko adu ngaiza nayipa falanga gba o-o. Pipita-a, u tsia ti la da nakala enu ngú nahaha pi Ebhe di ne nadi epo na 'ngbé 'ti Ebhe gba omaYuda-o. † 2:17 2:17 Tsia bhú Ets. 69:10.

'ngú pí yi pindji 'ngú na píla doto. Engú bini, yi bhuka de. I dú la me, ma nde akpokpo 'ngú pí yi pindji 'ngú na abhúlá-a, yi tsia bhúka? <sup>13</sup> Padhá de, anga kpála bini ade inde akolo nga abhúlá, bha bini ngama, Ndili gba kpála inde ayie oo-o!

<sup>14</sup> Maka li Moidje a'e'e nani kulu kpáwú lie li ndula abhú 'gú-o, a ayo bhadi me ngama, Ndili gba kpála-a, u 'e'e bhadi ma moko.\* <sup>15</sup> U 'e'e ma, amba kpála ne kpála inde abhuka ma-a, ani sia mukobho na dúdúma. <sup>16</sup> Padhá de, anga Ebhe akúnda okpála na píla doto naali. Kaka-a, ani atima koli Ndili gba e bini-e ngubula me kpála ne kpála inde abhuka ani-e, ani akpí-i de. Engú bini, ani sia mukobho na dúdúma. <sup>17</sup> La-a, Ebhe tima nani Ndili gba e ngú nakodho 'ngú gba okpála na píla doto de. Engú bini, ani atima ani ngubula me, okpála na píla doto kobho ka ani. <sup>18</sup> Kpála ne kpála inde abhuka ani-e, mangimbo pí ani ade. Engú la bini, kpála inde i bhuka de-e, u a'o mangimbo pí ani bhutode. Padhá de, anga ani bhuka koli Ndili bini gba Ebhe-e de.

<sup>19</sup> Ta mangimbo ango-o me: zi 'kpí ago píla doto, engú la bini, okpála na píla doto akúnda mangbo biti ane zi 'kpí, ka siti 'ngú inde u ngamene e-o. <sup>20</sup> Ndu kpála hana inde ngamene siti 'ngú-o, yala zi 'kpí mayala. Ani gó di li bili li zi 'kpí nde li e de. Padhá de, anga ani ngakpe me osisiti 'ngú gba ni-e akoto mbámbá li zi 'kpí de. <sup>21</sup> Engú la bini, ndu kpála hana inde ngamene ngbili 'ngú, ngago li bili li zi 'kpí nde li e-o. Ani ngamene mo-o ngubula me u u mbámbá me okulu ni ngamene e, a amene lie maka li Ebhe aziba lie ko.»

### *Yesu ngauo ne Djaa*

<sup>22</sup> Pita 'ngú ango-o, Yesu ngauo ne omukpata gba e anu bhú ndu doto na Yudaya. Oo, ani adu ne uo ngubula mbo nedhinga bedi. Ani atsia adu abatisa okpála. <sup>23</sup> Djaa atsia adu di nabatisa okpála bhú 'ngu na Enona, de bili na Salime, anga engu adu li bili ango-o naali.

Okpála adu ago abhaka ani, ani atsia adu abatisa uo. <sup>24</sup> (Li nedhinga bhomu-o, a abhaka me u nde bhike nga Djaa bhú tikpu de.)

<sup>25</sup> Abhomu-o, bhú ká omukpata gba Djaa, okoko aholo nabi bhayiki ne maYuda bini, pindji 'ngú navulu lie ngú nakolo ka e bubu, maka li líli apa lie-o.

<sup>26</sup> U anu abhaka Djaa, u atsia apa pí ani me: «Musuno, kpála nako yi adu ne e ayi 'ngu na Djáladani-e, di mo okpokpo 'ngú gba e-e, tsia nga mbia inde-e, ani ngabatisa okpála. Okpála bhelé nganu abhaka ani.»

<sup>27</sup> Djaa agie pí uo me: «Kpála bini ti da nasia 'he belegu de bini, i dú me Ebhe nde ha pí ani ngae de ko. <sup>28</sup> Ngayi makpe, yi ti da napapa li ma ngayi me, ma apa nako me: «Ngama-a, ma ne Masiya ade. Engú la bini, ma ne kpála inde u atima e pí ani kalanu.» <sup>29</sup> Bhulu elu-o, a ko 'ko elu-o. Olia bhoko-o alu de ani, ani ngadje ani. Ani ngakpi djali naali ka ani ngadje 'li 'ko elu-o lie-o. A ko di djali gba ma-o, djali ango-o mbia inde-e libhomu. <sup>30</sup> A ayo me u 'e'e ani ne abhúlá, amba ngama-a, ma kó naama ne kuto.»

### *Kpála inde ayie abhúlá-a ane ndu okpála hana*

<sup>31</sup> «Kpála inde ayie abhúlá ane ndu okpála hana. Kpála inde ayie píla doto-o, a ko kpála na píla doto. Ani ngakpokpo 'ngú na píla doto. Kpála inde ayie abhúlá-a ane ndu okpála hana. <sup>32</sup> Ani ngakpokpo 'ngú pindji engú inde ani au e, di ne bhende ani adje e-o. La-a, kpála bini ziba engú inde ani ngakpokpo e de. <sup>33</sup> Kpála inde aziba engú inde ani ngakpokpo e abhuka me Ebhe ngapa kukulu 'ngú. <sup>34</sup> Kpála inde li Ebhe atima e, ngakpokpo eli gba Ebhe. Padhá de, anga Ebhe abedhe ani ne Bua gba e bedhe. <sup>35</sup> 'Dyi Ndili-e, akúnda Ndili na bhobhoko gba e-o. Ani a'o ndu 'he hana sa 'kpa ani. <sup>36</sup> Kpála inde abhuka Ndili-e, asia mukobho na dúdúma. La-a, kpála inde i bhuka Ndili-e de-e, sía mukobho ango-o

\* **3:14** 3:14 Yesu ngapa bhomu-o engú nakpi ka e li kulusi di ne nagie lie ka e agba Ebhe.

de. Engú bini, ke 'ngú gba Ebhe-e adú pí ani.»

## 4

### *Yesu ngauo ne òlò bini na ndu doto na Samalia*

<sup>1-3</sup> Abhomu-o, omuFalisai adje me okpála bhelé ngakpata Yesu, di ne me ani ngabatisa okpála bhelé ane Djaa . (A na paká me Yesu du nani naae nabatisa okpála de. Omukpata gba ani-e adu mangbo nabatisa okpála ngao.) Li Yesu adje lie mo-o, ani ayie bhú ndu doto na Yudaya, ani atsia agie lie bhú ndu doto na Galilaya, <sup>4</sup> ngú nanu oo. Padhá de, anga a ayo me ani pu bhú ndu doto na Samalia.

<sup>5</sup> Ani akolo bhú gudhu bini na Samalia. A adu 'li gudhu ang-o me Sikale, deno ndu doto inde nani li Yakobho aha e pi ndili gba e Djodjefu-o . <sup>6</sup> Li dabili ang-o, kpongu gba Yakobho adu oo. Li Yesu andala lie ka dhuku-o, ani atsia adu deno kpongu ang-o kuto. A adu masakpe de tulukpe.

<sup>7</sup> Òlò bini na Samalia ago ngú nase 'ngu. Abhomu-o, Yesu atsia apa pi ani me: «Ha mbo engu nandji mandji muma.»

<sup>8</sup> (A abhaka me omukpata gba ani-e nde agbida bhú gudhu, ngú nakala ezú nazú mazú.) <sup>9</sup> Abhomu-o, òlò-o apa pi Yesu me: «Mu ne maYuda. Ngama-a, ma ne kpála na Samalia. Lele pi mu ti da nayo engu nandji mandji lie ka ma?» (Padhá de, anga omaYuda djedje lio ne omuSamalia de.)

<sup>10</sup> Yesu agie pi ani me: «I dú me mu mbíla makalá gba Ebhe-e uo, i dú la di me mu mbíla kpála inde apa pi mu me: «Ha mbo engu nandji mandji muma uo», mu de ayo mangbo engu ka ani ngamu. Ani de ahá engu na mukobho pi mu.»

<sup>11</sup> Òlò ang-o agie pi ani me: «Ngámá, ehe ngú nase engu-o ne di ka mu ade. 'Du 'ngu-o la di tsutsu. Mo oyie ne engu na mukobho-o su? <sup>12</sup> Ogbi ya Yakobho aha kpongu inde-e pi ya ngae. Ngaani makpe, ani andji engu inde-e bhú dabili bini ne ongisi di ne onu gba e-o. Mo obhundja naamu me mu ngbéngbé ane ani?»

<sup>13</sup> Yesu agie pi ani me: «Kpála inde andji engu inde-e, ani adjé matá gumu 'ngu madje. <sup>14</sup> Engú bini, kpála inde andji engu inde ma ahá e pi ani-e, ani djé matá gumu 'ngu belegu de bini. La-a, engu inde ma ahá e pi ani-e, akólo bhú ani kpongu na mukobho na duduma.» <sup>15</sup> Òlò ang-o apa pi ani me: «Ngámá, ha mbo engu ang-o muma, amba ma adjé matá gumu 'ngu de. Ma agó la di matá nase engu inde-e de.»

<sup>16</sup> Yesu apa pi ani me: «Nu 'i 'ko mu, amba mu gie matá limu ei.» <sup>17</sup> Ani agie pi Yesu me: «Bhoko ka ma ade.» Yesu atsia apa pi ani me: «Mo opa ndjindji me bhoko ka mu ade ko. <sup>18</sup> Padhá de, anga mo odu nako ne obhosi bhuluvue. Bhoko bhende yi nde ne e mbia inde-e, a ko la di 'ko mu de. Mo opa kukulu 'ngú.»

<sup>19</sup> Abhomu-o, òlò ang-o apa pi Yesu me: «Ngámá, ma au me mu ne polofeta . <sup>20</sup> Onguo ogbi ya, okpála na ndu doto na Samalia-a, adhögò Ebhe pí eta inde. Engú bini, ngayi omaYuda-a, yi ngapa me gudhu na Yelusalema ne bili inde a ayo lie me u dhögò Ebhe-o.»

<sup>21</sup> Yesu atsia agie pi ani me: «Òlò-e, bhuka 'li ma. Nedhinga ngago, nedhinga inde yi dhögò 'Dyi ní lie pí eta inde-e de. Yi dhögò la di ani lie bhú gudhu na Yelusalema de. <sup>22</sup> Ngayi okpála na ndu doto na Samalia-a, yi ngadhögò Ebhe inde yi mbila e de. Engú bini, गया-a, ya ngadhögò Ebhe inde ya ambila e. Padhá de, anga mukobho ago ne li pápá gba omaYuda. <sup>23</sup> Engú bini, nedhinga ngago, nedhinga ang-o belegu akolo, nedhinga inde li okukulu okpála nadhögò 'Dyi ní adhögò ani lie bhú Bu Bhobua , di ne bhú kukulu 'ngú-o. Padhá de, anga a bhomu-o okukulu okpála nadhögò 'Dyi ní inde ani nde ne gumu o-o. <sup>24</sup> Ebhe ne Bua. Kaka-a, a ayo me okpála inde ngadhögò ani-e, dhögò ani bhú Bua di ne bhú kukulu 'ngú.» <sup>25</sup> Òlò-o apa pi Yesu me: «Ma ambila me Masiya ('ili ang-o akunda napa me Kilisito) agó mago. Li ani agó lie-e, ani tsia bhulu ndu 'ngú hana pi ya mbámbá.» <sup>26</sup> Yesu agie pi ani me:

«Ngama kpála inde ngakpokpo 'ngú pi mụ mbia inde-e, ma ne aní.»

<sup>27</sup> Li nedhinga bhomụ-o, omụkpata gba Yesu-o agie lio. U angamba naali ngú nau aní me aní nde ngagama 'ngú ne ọlọ. Engú bini, sụka uo bini yi aní de me: «Mụ ngagili ní?» di ne me: «Mụ ngagama 'ngú ne aní ngú ní?»

<sup>28</sup> Abhomụ-o, ọlọ ango-o a'o ká lusa 'ngu gba e-o. Aní agie lie abhú gụdhụ. Aní atsia apa pi okpála me: <sup>29</sup> «Yi gógo, yi u kpála inde akpokpo ndụ 'ngú hana inde ma amene e mụma. A ko ndi Masiya di?» <sup>30</sup> Abhomụ-o, u aze bhú gụdhụ-o, u atsia agbida nabhaka Yesu.

<sup>31</sup> Bhú nedhinga bhomụ-o, omụkpata gba Yesu-o adụ atụ aní me aní zụ 'he. U adụ apa pi aní me: «Mụsuno, zụ nga mbo 'he!» <sup>32</sup> Engú bini, aní agie pi uo me: «A ka ma ne ehe nazụ mazụ inde yi mbila 'ngú li e de.» <sup>33</sup> Abhomụ-o, omụkpata-a ayi lio sụnda o me: «Kpála bini ago ndi pi aní ne ehe nazụ mazụ adi?»

<sup>34</sup> Yesu apa pi uo me: «Ezụ gba ma-a, a ko namene gụmụ gba kpála inde atima ma-o, di ne nandjia kulu inde aní aha e mụma-o. <sup>35</sup> Ngayi-e, yi papa me: «A atigala matá epe badha ngubula na'e nguwa abhiye.» La ngama-a, ma apa pi yi me, yi tsia nga oedyi-e ndjindji. Padhá de, anga nguwa abhele, a akolo bedhe ngubula na'e'e abhiye! <sup>36</sup> Kpála inde ngagbe nguwa abhiye-e ngasia makalá gba e-o. Aní ngapo bhúla nguwa-a ngubula mụkobho na dụdụma. Kaka-a, kpála nalu nguwa, ne kpála inde nga'e'e abhiye-e, ngakpi djali bhú dabilí bini. <sup>37</sup> Padhá de, anga a ko kụkụlụ 'ngú, engú inde u apa e bhú gbitaku me: «Kpála koko ngalu nguwa-o, li kpála koko tsia 'é abhiye.» <sup>38</sup> Ngama-a, ma atima yi na'e nguwa bhiye inde yi ndala bhú e de. Okpála koko andala bhúbhú, yi la ngasia bádha 'ngú li kulu gba uo-o.»

<sup>39</sup> Abhomụ-o, okpála bhelé na gụdhụ na Samalia bhomụ-o abhuka Yesu ka eli inde li ọlọ-o akpokpo e me: «Aní akpokpo ndụ 'ngú hana inde ma amene e mụma.»

<sup>40</sup> Kaka-a, li okpála na gụdhụ na Samalia akolo lie de Yesu-o, u ayo ka aní me aní

du mbo gba o oo. Abhomụ-o, Yesu atsia amene oo ekpí bhisi. <sup>41</sup> Okpála bhelé naali abhuka matá ka eli inde li Yesu apa e-o. <sup>42</sup> U atsia apa pi ọlọ-o me: «Mbia inde-e, ya bhuka bha bini ka engú mo okpokpo e de. Engú bini, ya abhuka anga ngaya makpe-e, ya adje aní. Ya atsia ambila na paká me a ko Mụkobho gba okpála na pıla doto.»

*Yesu akobho ndili na bhobhoko gba 'ngbé kpála bini*

<sup>43</sup> Pita 'kpí bhisi li Yesu amene e oo, aní ayie oo, aní atsia anụ bhú ndu doto na Galilaya. <sup>44</sup> Ngaani makpe-e, aní apa nani me: «Polofeta inde u amanga e bhú doto gba e belegu ade bini.» <sup>45</sup> Li aní akolo lie bhú ndu doto na Galilaya-a, okpála inde oo asia aní ndjindji. Padhá de, anga u au ndụ 'ngú hana inde li aní amene e li nedhinga na anokomia bhú gụdhụ na Yelusalema-o, anga u adụ di oo.

<sup>46</sup> Pipita-a, Yesu agie lie bhú kuti na Kana, bhú ndu doto na Galilaya. A bhomụ-o bili inde aní adji nani engu li e, atsia akolo vino-o. 'Ngbé kpála bini na Lita adụ oo. Adụ li ndili gba aní na bhobhoko-o ne kuo, bhú kuti na Kapalanauma. <sup>47</sup> Li kpála ango-o adje lie me Yesu ayie bhú ndu doto na Yudaya, aní akolo bhú ndu doto na Galilaya-a, aní anụ abhaka aní. Aní atsia akikiliki lie pi aní me aní nụ bhú kuti na Kapalanauma, amba aní kobho ndili gba ni na bhobhoko-o. Padhá de, anga ndili ango-o adụ masakpe de nakpi.

<sup>48</sup> Abhomụ-o, Yesu atsia apa pi aní me: «Í dụ me yi nde u ongamba 'ngú, di ne okiaka 'ngú de-e, a na paká me yi ti da nabhubhuka de!» <sup>49</sup> 'Ngbé kpála na Lita-a apa pi aní me: «Ngámá, kala me ndili-e kodho bua e, gogo.» <sup>50</sup> Yesu apa pi aní me: «Gie limụ agba mụ, ndili gba mụ-o akobho!» Kpála ango-o abhuka engú inde li Yesu apa e pi aní-o. Aní atsia atapa. <sup>51</sup> Nedhinga aní adụ anụ lie-e, okpála na kulu gba aní-e ago akọ lio ne aní li kpadji. U apa pi aní me: «Ndili gba mụ-o akobho!» <sup>52</sup> Aní atsia ayi uo li nedhinga li ndili-e akolo lie ndjindji-o. U apa pi

ani me: «Bandji-e ayie li ani lili bhú saa na bini, pita tulukpe.» <sup>53</sup> Abhomu-o, 'dyi ndili-e atsia ambila me, a ko saa inde li Yesu apa pi ani lie me: «Ndili gba mu-o akobho-o.» Nayie li nedhinga bhomu-o, ngaani makpe-e, ani abhuka, di ne piga gba e libhomu.

<sup>54</sup> A bhomu-o ngamba 'ngú na bhisi li Yesu amene e, pita ani ayie lie bhú ndu doto na Yudaya, ani atsia agie lie bhú ndu doto na Galilaya ko.

## 5

### *Yesu akobho kpála inde agugumu kuto*

<sup>1</sup> Pita ongu akodho 'kpí-e, anokomia bini gba omaYuda ati. Abhomu-o, Yesu atsia anu bhú gudhu na Yelusalema. <sup>2</sup> Bhú gudhu oo, de bhoti inde u a'i e me bhoti gba Okandelo-o, 'dú 'ngu bini navulu kute adu oo. A adu 'li 'li bhú eli na Ebele me Betedjata. Djedje 'he maka 'ti ngbangbali adu dede bhuluvue. <sup>3</sup> Obhulu kuo bhelé adu me u nde asili kuto sasa. A adu nani okpála inde i u 'kpí de, ne okpála inde ne eze li 'dhu o, di ne okpála na bhuku kute. [U adu adjeke me engu-o dimba. <sup>4</sup> Padhá de, anga li onedhinga koko-o, andjelu bini gba Ngámá-a adu aké bhú 'ngu-o, engu-o atsia adu adimba. Kpála na kuo inde adu aké bhúbhú kalanu-o, adu nakobho. Belegu li kuo du bha nani pi-ie.]

<sup>5</sup> Bhoko bini adu oo, ani asi nani ne kuo kalanga ndjikpa bata ne ká madjina.

<sup>6</sup> Li Yesu au ani lie asi kuto-o, ani ambila di lie me ani asi ne kuo 'kpí bhelé-e, ani atsia ayi ani me: «Mo okunda nakobho?»

<sup>7</sup> Kpála na kuo ango-o agie pi ani me: «Ngámá, kpála ka ma ade ngubula me ani ké ma bhú 'ngu-o, li nedhinga inde i ngadimba lie-o. Ma le me ma nu me-e, li kpála koko kodho 'kpí kala ma.» <sup>8</sup> Yesu apa pi ani me: «Yie bhúlá, ha tsala gba mu-o, nu.» <sup>9</sup> Kolo má gala me-e, kpála na kuo-o akobho. Ani aha tsala gba e-o, ani atsia aholo nadhuku.

La-a, adu nani li 'kpí naguo gba omaYuda-o. <sup>10</sup> Abhomu-o, omaYuda apa pi kpála inde akobho-o me: «A ko 'kpí naguo. A ayo de me mu bi tsala gba

mu-o de.» <sup>11</sup> Ani agie pi uo me: «Kpála inde akobho ma-a, apa mu me: «Ha tsala gba mu-o, nu.»» <sup>12</sup> U ayi ani me: «A ko kpála bhedho inde apa pi mu me: «Ha tsala gba mu-o nu?»» <sup>13</sup> Engú bini, kpála inde akobho-o mbila de me a ko da. Padhá de, anga adu me Yesu nde angita bhú ká okpála inde adu li bili ango-o angita.

<sup>14</sup> Pipita-a, Yesu abhaka ani bhú 'ngbé 'ti Ebhe gba omaYuda-o. Yesu apa pi ani me: «Tsitsia nga, mo okobho. Mo oméne matá siti 'ngú de, amba engú inde ane ne siti-e, akólo li kute mu de.» <sup>15</sup> Kpála ango-o anu napa pi omaYuda me Yesu akobho ni ngae. <sup>16</sup> Kaka-a, omaYuda aholo nadje siti bua pindji Yesu. Padhá de, anga ani amene nani engú ango-o bhú 'kpí naguo. <sup>17</sup> Engú bini, Yesu agie pi uo me: «Maka li 'Dyi ma ngamene kulu lie nakolo pi mbia inde-e, Ngama di-e, ma ngamemene moko.» <sup>18</sup> Kaka-a, omaYuda adu agili matá ne kekele ngú nabhele ani. Padhá de, anga ani gumu bha bini líli na 'kpí naguo de, engú bini, ani adu apa lie me Ebhe ne 'Dyi ni-e, ani adu ale lie bhomu-o li Ebhe.

### *Ebhe aha ndu 'ngú gba e hana pi Ndili gba e-o*

<sup>19</sup> Abhomu-o, Yesu apa matá pi uo me: «A moko, ma apa pi yi na paká me ngama Ndili-e, ma ti da namene 'he bini bhú ngu ma de, bha bini bhende ma au me 'Dyi ma ngamene e-o. Padhá de, anga ehe inde li 'Dyi ma ngamene e, ngama Ndili-e, ma ngamemene bhadi moko. <sup>20</sup> 'Dyi ma kunda ma, Ndili gba e-o. Ani ngasuno ndu 'ngú hana inde ngaani makpe ani ngamene e mu me, Ndili gba e-o. Ani asuno mu me, Ndili gba e, okulu na ngbengbengbe inde ane obhende-e mane. Yi tsia ngamba tété. <sup>21</sup> Padhá de, anga maka li 'Dyi ma ngazuku okpála inde amu-o lie, ani la di ngaha mukobho pi uo-o, ngama, Ndili gba ani-e, ma ngaha bhadi mukobho moko pi kpála inde ma akunda nahaha pi e ko. <sup>22</sup> 'Dyi ma kodho 'ngú gba kpála bini de. Engú bini, ani aha nakodho 'ngú hana mu me, Ndili gba e, <sup>23</sup> ngubula

me ndu okpála hana du namanga ma, Ndili gba ani, maka u ngamanga ani 'Dyi ma lie ko. Kpála inde i manga ma, Ndili-e de-e, ani manga di 'Dyi ma inde atima ma-a de.

<sup>24</sup> A moko, ma apa pi yi na paká me kpála inde adje 'li ma-a, inde abhuka la di kpála inde atima ma-a, kpála ango-o asia mukobho na duduma. U 'ó mangimbo pí kpála ango-o de. Engú bini, ani ayie bhú kuo, ani atsia akodho 'kpí bhú mukobho.

<sup>25</sup> A moko, ma apa pi yi na paká me nedhinga ngago, mbia inde-e, nedhinga ango-o belegu akolo, nedhinga li okpála inde amu-o, adjé 'li Ndili gba kpála-a lie-o. Abhomu-o, okpála inde adjé-e, u tsia kóbho.

<sup>26</sup> Padhá de, anga maka li 'Dyi ma nde lie ne angu ngubula naha mukobho-o, ani aha bhadi angu muma, Ndili gba e moko ngubula me ma du naha mukobho. <sup>27</sup> Ani atsia aha la di angu muma, Ndili gba e, ngú nakodho 'ngú gba okpála, anga ma ne Ndili gba kpála. <sup>28</sup> Yi angamba tété de. Padhá de, anga nedhinga ngago. Bhú nedhinga ango-o, ndu okpála hana inde bhú lata-a, adjé 'li Ndili gba kpála-o. <sup>29</sup> Abhomu-o, u tsia zé. Okpála bhende amene bádha 'ngú-o, azúku ngubula nasia mukobho. Engú bini, okpála bhende amene siti 'ngú-o, azúku ngubula nasia mangimbo.»

*Yesu bha bini ngamene gumu gba 'Dyi e*

<sup>30</sup> Ngama-a, ma ti da namene 'he bini bhú ngu ma de. Ma ngakodho 'ngú maka li kpála atima ma-a ngapapa muma lie ko. Kaka-a, nakodho 'ngú gba ma-a ngbingbili. Padhá de, anga ma gili namene gumu gba ma-a de. Engú bini, ma ngagili mangbo namene gumu gba kpála inde atima ma ko. <sup>31</sup> I dú me ma du akpokpo 'ngú inde a atsia ma-a, engú ango-o de dú kukulu 'ngú de. <sup>32</sup> Engú bini, kpála koko ngakpokpo 'ngú gba ma-a ngae. Ma ambila me engú gba ma inde ani ngakpokpo e, a ko kukulu 'ngú. <sup>33</sup> Ngayi-e, yi atima okpála agba Djaa, ani atsia akpokpo kukulu 'ngú. <sup>34</sup> Ngama-a,

ma ne gumu kpála ngú nakpokpo 'ngú gba ma-a ade. La-a, ma ngapapa mo-o ngubula me yi sia mukobho.

<sup>35</sup> Djaa nani maka eke inde u adhedhe e, inde ngatsi matsi. Ngayi-e, yi atsia akunda nani nakpi djali ngubula mbo nedhinga bedi li zi 'ke gba ani-o. <sup>36</sup> Engú bini, engú gba ma inde u ngakpokpo e, ane bhende gba Djaa mane. A ko bhende na kulu inde li 'Dyi ma apa me ma mene e-o. A moko, kulu inde ma ngamene e ngasuno me 'Dyi ma atima ma ngae.

<sup>37</sup> 'Dyi ma inde atima ma-a, akpokpo di engú gba ma-a ngae. La-a, yi dje nga 'li ani belegu de bini, yi u nga la di ani de.

<sup>38</sup> Eli gba ani-e ngadu bhú yi ade. Padhá de, anga yi ayala nabhuka kpála inde ani atima e-o. <sup>39</sup> Yi ngadjipi 'ngú pindji Bhuku gba Ebhe-e ndjindji, anga yi ngabhundja me yi asia mukobho na duduma bhúbhú. A la bhomu-o Bhuku inde ngakpokpo 'ngú gba ma-o! <sup>40</sup> Abana mo-o, yi kunda nago abhaka ma ngú nasia mukobho ango-o de.

<sup>41</sup> «Ma gili de me okpála dhoge ma-a de. <sup>42</sup> Engú bini, ma mbila yi ndjindji. Ma ambila me yi ne mukunda pi Ebhe ade.

<sup>43</sup> 'Dyi ma atima ma ngae. La-a, yi sia ma de. I du la me kpála koko nde ago bhú ngu e, yi tsia sia ani! <sup>44</sup> Yi ngatoko liyi sunda yi. Yi gili de me Ebhe toko bha yi ngae de. Lele pi yi ti da nabhuka ma lie? <sup>45</sup> Yi abhúndja de me ma a'ó yi bhú mangimbo kala 'Dyi ma ngama-a de. Kpála bhende a'ó yi bhú mangimbo-o, a ko Moidje inde yi a'o 'to yi 'to e ko. <sup>46</sup> I dú me yi bhúka Moidje kukulu-o, yi de abhúka di ma mabhuka. Padhá de, anga Moidje aye nani engú gba ma-o. <sup>47</sup> Engú bini, i du me yi nde bhuka engú inde ani aye e de-e, yi abhúka la 'li ma lele pi?»

## 6

*Yesu aha ezu pi obhosi kutu bhuluvue (Tsia bhú Mat. 14:13-21; ne bhú Mlk. 6:30-44; di ne bhú Luk. 9:10-17.)*

<sup>1</sup> Pipita-a, Yesu akodho 'kpí li pápá koko na ekpe na Galilaya, inde u a'i di-e me ekpe na Tibeliade. <sup>2</sup> Bhiti okpála na bhibhiti adu akpata ani. Padhá de, anga u



adu au ongamba 'ngú inde ani adu amene e li nakobho okpála na kuo-o. <sup>3</sup> Yesu atsia a'ua apí 'ta. Oo, u atsia adulu ne omukpata gba e kuto. <sup>4</sup> A adu me anokomia na Pasika gba omaYuda nde akolo masikpe.

<sup>5</sup> Abhomu-o, Yesu atsia 'kpí, ani au bhiti okpála na bhibhiti ngago abhaka ani. Ani atsia ayi Filipino me: «Ní ti da nakala mapa su ngubula me okpála inde-e hana zu-o?»

<sup>6</sup> (Yesu adu apa mo-o ngubula nale Filipino. Padhá de, anga ngaani Yesu-o, ani adu ambila engú inde ani améne e ndjindji.)

<sup>7</sup> Filipino atsia agie pi ani me: «Abana ya kala mapa ne lí denalio kámá bhisi-e, alé de me kpála ne kpála sia mbo-o de.»

<sup>8</sup> Suka omukpata gba ani koko-o, Andili ndai Simo Piele, apa pi ani me: <sup>9</sup> «Ndili na bhobhoko bini si-i, a ka ani ne mapa na olodje\* bhuluvue di ne sungu bhisi. A la bhomu-o ni pi bhiti okpála inde-e?»

<sup>10</sup> Do Yesu de-e: «Yi pa pi okpála me u dula kuto.» (Ulu adu li bili ango-o naali.) Okpála atsia adulu kuto. Obhosi adu masikpe de kutu bhuluvue. <sup>11</sup> Abhomu-o, Yesu aha mapa-o. Ani atsia agie heni pi Ebhe. Ani atsia agapa li okpála inde adu oo-o. Ani aha bhadi sungu-o pi uo moko li lele maka u adu akukunda lie ko. <sup>12</sup> Li okpála a'u'u lie, Yesu atsia apa pi omukpata gba e me: «Yi po bhúla dudu inde atigala-o, ngubula me asíti de.» <sup>13</sup> Dú mapa na olodje bhuluvue inde atigala-a, u apo bhúbhúla. A atsia abebedhe okili ndjikpa ne ká bhisi.

<sup>14</sup> Li okpála au ngamba 'ngú inde li Yesu amene e lie, u atsia apa me: «A inde-e bha ndju polofeta inde a ayo me ani go píla doto-o!» <sup>15</sup> Yesu ambila me u ngakunda nago aholo ni ne kpéke me ni du ngámá. Abhomu-o, ani ayie, ani atsia anu matá kpi e kpi apí 'ta.

### *Yesu adhuku pí 'ngu*

(Tsia bhú Mat. 14:22-33; di ne bhú Mlk. 6:45-52.)

<sup>16</sup> A akolo lie tagolo-o, omukpata gba Yesu aké alingo ekpe-o. <sup>17</sup> U a'ua bhú zabu bini u atsia aholo nagugulu, anu li

pápá na Kapalanauma. La-a, ekpí abi li uo padhá me Yesu nde kolo nga li uo de. <sup>18</sup> Anvi adu ape kpekpeke. Kaka-a, engu-o aholo nadimba. <sup>19</sup> A abhaka me omukpata-a nde adhuku ne zabu-o masikpe de kilometele madhia. Li nedhinga bhomu-o, u au Yesu me ani nde ngadhuku pí 'ngu. Ani akolo de zabu-o. Abhomu-o, u aholo nadjé tsulu. <sup>20</sup> Engú bini, Yesu apa pi uo me: «A ko ma, yi adjé tsulu de!» <sup>21</sup> U adu akunda me o ha ani, amba o bi ani bhú zabu-o. La-a, zabu akolo bha kolo lingo 'gø li bili u adu anu lie-o.

### *Bhiti okpála agili Yesu*

<sup>22</sup> Li ekpí aseke lie, bhiti okpála inde atigala ayi 'ngu-o au bha koli zabu bini. La-a, u adu ambila ndjindji me Yesu 'ua bhú zabu bhú dabili bini ne omukpata gba e de. Omukpata-a anu kpi o kpi. <sup>23</sup> Li nedhinga bhomu-o, ozabu koko ayie bhú gudhu na Tibeliade, atsia akolo de bili li okpála azu mapa li e píta li Ngámá agie heni lie pi Ebhe-o. <sup>24</sup> Li bhiti okpála bhomu-o au lie me Yesu ne omukpata gba e oo ade-e, u a'ua'ua bhú ozabu-o, u atsia agbida bhú Kapalanauma ngú nagili Yesu.

### *Yesu ne mapa na mukobho*

<sup>25</sup> U anu abhaka Yesu ayi 'ngu. Abhomu-o, u ayi ani me: «Musunu, mo okolo ei nadho?» <sup>26</sup> Yesu agie pi uo me: «Heni, ma apa pi yi na paká me, yi ngagili ma ka ongamba 'ngú inde yi au e ade. Yi ngagili mangbo ma ka mapa inde yi azu e, yi atsia a'u'u ne e má kpú kpú kpú-o!» <sup>27</sup> La-a, yi améne kulu ngubula ezu inde ngazi mazi-e de. Engú bini, yi mene mangbo ngubula ezu inde ngabhue, di ne bhende ngaha mukobho na duduma ko. Ngama, Ndili gba kpála-a, ma ahá ezu ango-o pi yi ngama. Padhá de, anga Ebhe 'Dyi ma a'o kasé na angu gba e li kute ma.»

<sup>28</sup> Abhomu-o, u atsia ayi ani me: «A ayo me ya mene pi ngú namene kulu maka li Ebhe akunda lie?» <sup>29</sup> Do Yesu pi uo me: «Kulu gba Ebhe-e, a ko me yi bhuka kpála inde ani atima e ko.»

\* 6:9 6:9 Mapa na olodje: A ko nani mapa na bhuku mase. Okpála na ndibhili ti nani da nakakala ndjindji.

<sup>30</sup> Abhomu-o, u atsia ayi ani me: «Mo oméne mangua ngamba 'ngú dho me ya u, amba ya bhuka mu-o? Kulu gba mu-o ne ni? <sup>31</sup> Li onguo ogbi ya adu lie abhú 'gu-o, u azu mana maka u aye nani lie bhú Bhuku gba Ebhe-e me: «Ani aha mapa inde ayie abhúlá-a pi uo ngú nazuzu.†» <sup>32</sup> Abhomu-o, Yesu agie pi uo me: «A moko, ma apa pi yi na paká me, Moidje ha mapa na abhúlá-a pi yi ngae de. Engú bini, 'Dyi ma ngaha mapa na kukulú na abhúlá-a pi yi ngae. <sup>33</sup> Padhá de, anga mapa inde li Ebhe ngaha e, a ko bhende ngayie abhúlá, inde ngaha la di mukobho pi okpála na doto-o.» <sup>34</sup> Abhomu-o, u atsia apa pi Yesu me: «Ngámá, ha pi ya ndu 'kpí hana mapa bhomu!»

<sup>35</sup> Yesu agie pi uo me: «Ma ne mapa na mukobho. Kpála bhende ago abhaka ma-a, gumu 'zu méne ani belegu de bini. Kpála bhende abhuka la di ma-a, gumu 'ngu méne ani belegu de bini. <sup>36</sup> Engú bini, ma apa 'ngú inde-e pi yi apa. Yi au ma. La-a, yi bhuka de. <sup>37</sup> Ndu kpála hana inde li 'Dyi ma ngaha e muma-a, agó li pabili gba ma. La di-e, ndu kpála hana inde agó li pabili gba ma-a, ma bhíke ani de. <sup>38</sup> Padhá de, anga ma ayie abhúlá, ma ago ngú namene engú inde li kpála inde atima ma-a akunda e ko. Engú bini, ma go ngú namene naama 'ngú de. <sup>39</sup> Engú inde li kpála inde atima ma akunda e-e, a ngae inde: ndu okpála inde ani aha o muma hana, a ayo de me suka uo bini ngita-a de. Engú bini, a ayo me, ali sokpí-e, ma zuku ndu uo hana. <sup>40</sup> Padhá de, anga 'Dyi ma akunda me, ndu okpála hana inde au ma Ndili-e, inde abhuka la di ma-a, sia mukobho na duduma, amba ma zuku uo ali sokpí.»

<sup>41</sup> Abhomu-o, omaYuda aholo namene bhayiki li kute ani. Padhá de, anga ani apa nani me: «Ma ne mapa inde ayie abhúlá.» <sup>42</sup> U atsia apa me: «A inde-e Yesu, ndili gba Djodjefu-o di? Ya mbila 'dyi ani ne 'hi ani hana. Lele pi ani apa lie me ni ayie abhúlá?» <sup>43</sup> Yesu agie pi uo me: «Yi 'o namene bhayiki sunda yi. <sup>44</sup> Kpála

ti da nago abhaka ma de, i du me 'Dyi ma inde atima ma-a nde holo 'kpa ani ngae de ko. Ngama la di-e, ma azúku ani li sokpí. <sup>45</sup> Opolofeta aye engú inde-e me: «Ebhe asuno 'ngú pi ndu okpála hana.†» Kpála ne kpála inde adje 'li 'Dyi ma, inde asia la di nasuno gba ani-e, ago nabhaka ma. <sup>46</sup> Bhobhomu apa me, kpála bini u Ebhe de. Bha bini ma, kpála inde ayie agba Ebhe-e, ma au bha 'Dyi ma ngama. <sup>47</sup> A moko, ma apa pi yi na paká me, kpála inde abhuka-a, asia mukobho na duduma.

<sup>48</sup> Ngama-a, ma ne mapa na mukobho. <sup>49</sup> Onguo ogbi yi azu nani mana abhú 'gu. La-a, u atsia amu. <sup>50</sup> Engú bini, mapa bhende ayie abhúlá-a, a ko bhende li kpála zu e, ani kpí de ko. <sup>51</sup> Ma ne mapa inde uu, inde ayie abhúlá ko. I du me kpála nde azu mapa ango-o, ani dú bhú mukobho na duduma. Mapa inde ma ahá e, a ko kute ma. Ma ngahaha me okpála na doto sia mukobho.»

<sup>52</sup> Li omaYuda adje 'ngú bhomu-o lie, u aholo amene kpekebhe sunda o kpekpeke. U adu apa me: «Lele pi kpála inde-e ti da naha kute e lie pi ní me ní zu-o?» <sup>53</sup> Abhomu-o, Yesu apa pi uo me: «A moko, ma apa pi yi na paká me: i du me yi nde zu kute ma, Ndili gba kpála de-e, i du la di me yi nde ndji ngute ma de-e, yi dú bhú mukobho de. <sup>54</sup> Kpála inde ngazu kute ma, inde la di ngandji ngute ma-a, ani bhú mukobho na duduma. Ngama-a, ma azúku la di ani ali sokpí. <sup>55</sup> Padhá de, anga kute ma-a, a ko ezú na kukulú. Ngute ma la di-e, a ko ehe nandji mandji na kukulú. <sup>56</sup> Kpála inde ngazu kute ma, inde la di ngandji ngute ma-a, ani ngadu bhú ma. Ma la di ngadu bhú ani.

<sup>57</sup> 'Dyi ma inde atima ma-a, ani uu. Ma la di ngadu bhú mukobho ka ani. A bhadi moko, kpála inde azú ma-a, ani adú bhú mukobho ka ma. <sup>58</sup> A bhomu-o mapa inde ayie abhúlá ko. A maka bhende li onguo ogbi yi azu e, u atsia amu-o ade. Engú bini, kpála inde azú mapa inde-e, adú bhú mukobho na duduma.» <sup>59</sup> Yesu akpokpo ndu 'ngú bhomu-o li nedhinga inde ani

† 6:31 6:31 Tsia bhú Eki. 16:4, 15; di ne bhú Ets. 78:24.

† 6:45 6:45 Tsia bhú Isa. 54:13.

adu asuno lie bhú 'ti nadjé líli gba Moidje bhú Kapalanauma-o.

*Eli inde ngaha mukobho na duduma*

<sup>60</sup> Pita u adje engú inde li Yesu apa e lie, bhelé na omukpata gba ani-e atsia apa me: «Eli inde-e, a kpekpeke! A ti da naziziba da?» <sup>61</sup> Engú bini, Yesu ambila me omukpata gba ni-e ngamene kpekebhe pindji 'ngú ango-o. Kaka-a, ani apa pi uo me: «Engú ango-o ngamene yi sisiti? <sup>62</sup> A la yi u me ngama, Ndili gba kpála-a, ma nde nga'ú li bili inde ma adudu nani lie kalanu-o? <sup>63</sup> Bua gba Ebhe-e ngaha mukobho ngae. Kpála-kuti ti da namene 'he bini de. Oeli inde ma apa e pi yi bhomu-o, a ko Bua inde ngaha mukobho. <sup>64</sup> Engú bini, okoko bhú ká yi bhuka de.» A na paká me Yesu ambila nani nayie li lilita me obhende i bhuka ni de-e ngao dho. Ani atsia ambila la di me apú ni da-ie. <sup>65</sup> Ani atsia apa matá me: «Kaka-a, ma apa nako pi yi me: «Kpála bini ti da nago gba ma de, i du me 'Dyi ma nde ha kpadji pi ani ngae de ko.»»

<sup>66</sup> Nayie li nedhinga bhomu-o, bhelé na omukpata gba ani-e a'o ká ani. U kpata matá ani de. <sup>67</sup> Abhomu-o, Yesu atsia ayi obhende ndjikpa ne ká bhisi-e me: «Ngayi di-e, yi akunda nagbida?» <sup>68</sup> Simo Piele agie pi ani me: «Ngámá, ya ti da nanu gba da? A ka mu ne oeli inde ngaha mukobho na duduma. <sup>69</sup> Ngaya-a, ya abhuka. Ya atsia ambila la di me mu ne Kpála na bubu inde li Ebhe atima e ko.» <sup>70</sup> Yesu agie pi uo me: «Ngayi okpála ndjikpa ne ká bhisi-e, ma lo nako yi ngama di? La-a, suka yi bini ne djabulu!» <sup>71</sup> Ani adu apa 'ngú bhomu-o li Yuda, ndili gba Simo Isikaliote. Padhá de, anga belegu ani adu lie suka omukpata ndjikpa ne ká bhisi-e, adu kpála inde apú Yesu-o ngae.

## 7

*Ondaise Yesu bhuka ani de*

<sup>1</sup> Pipita-a, Yesu aholo nadholo bhú ndu doto na Galilaya. Ani du akunda nadholo bhú ndu doto na Yudaya de, anga omaYuda adu akunda nabhele ani oo. <sup>2</sup> A

adu me, anokomia na oti ngbangbali gba omaYuda nde akolo masikpe. <sup>3</sup> Abhomu-o, ondaise Yesu atsia apa pi ani me: «Yie si yiyie. Nu bhú ndu doto na Yudaya, ngubula me omukpata gba mu-o, ngauo di-e, u u ngamba 'ngú inde mu ngamene e ko. <sup>4</sup> Padhá de, anga kpála inde akunda me okpála u ngamba 'ngú inde ni ngamene e mau-o, ani méne bhú pepe de. I nde lie me mu nde ngamene ngua ngamba 'ngú bhomu-o, mene kala ndu okpála hana!» <sup>5</sup> Padhá de, anga ondaise ani-e, ngauo makpe-e, u bhuka nani ani de.

<sup>6</sup> Abhomu-o, Yesu atsia apa pi uo me: «Nedhinga gba ma-a kolo nga de. Engú bini, pi yi-e, nedhinga ndu 'kpí hana ndjindji. <sup>7</sup> Okpála na doto ti da nayala yi de. La muma-a, u ngayala ma. Padhá de, anga ma ngapa me kulu gba uo-o ndjindji ade. <sup>8</sup> Yi nu bhú anokomia-a nanu. Ngama-a, ma nu-ú de. Padhá de, anga nedhinga gba ma-a kolo nga de.» <sup>9</sup> Pita ani apa lie mo-o, ani atsia atigala bhú ndu doto na Galilaya.

*Yesu asuno pi okpála bhú 'ngbé 'ti Ebhe gba omaYuda*

<sup>10</sup> Li ondaise Yesu agbida lie bhú anokomia-a, ani atsia anu di oo. La-a, ani suno lie mbámbá de. Ani adu me ani nde awo lie mawo. <sup>11</sup> Abhomu-o, omaYuda adu agili ani bhú nedhinga na anokomia-o. U adu ayi me: «Ani su?» <sup>12</sup> U adu amene kpekebhe naali li 'ngú gba ani-e bhú ká okpála. Okoko adu apa me: «A ko bádha kpála.» Okoko adu apa me: «A mo-o ade, ani ngapite okpála.» <sup>13</sup> Engú bini, u du apa engú ango-o mbámbá de. Padhá de, anga u adu akpe omaYuda.

<sup>14</sup> Nedhinga li anokomia akolo lie tutu-o, Yesu anu bhú 'ngbé 'ti Ebhe gba omaYuda, ani atsia aholo nasuno pi okpála. <sup>15</sup> Abhomu-o, omaYuda angamba naali. U atsia adu ayi lio me: «Kpála inde-e mene balua de. Ani ambila la 'he me-e lele pi?» <sup>16</sup> Yesu agie pi uo me: «Nasuno gba ma-a ngayie ka ma ade. Engú bini, a ngayie ka Kpála inde atima ma ko. <sup>17</sup> I du me kpála nde akunda namene engú inde li Ebhe akunda e-e, ani ti da nambila

me, ne me ayie ka Ebhe, ne me ma ngakpokpo 'ngú gba ma makpe. <sup>18</sup> Kpála bhende ngakpokpo 'ngú gba e makpe-e, ani ngagili me okpála dhøgø ni. Engú bini, kpála bhende ngagili me u dhøgø kpála bhende atima ni-e, ani ngapa 'ngú na kùkùlù. Ani pa la di eu de. <sup>19</sup> Moidje aha nani líli pí yi ngae. A mo-o adi? La-a, kpála bini bhú ká yi ngamene líli ango-o ade. Yi la ngagili nabhøle ma ngubula ni?»

<sup>20</sup> Okpála agie pí ani me: «A bhú m̀ ne siti bua ! A ngagili nabhøle m̀ da?»

<sup>21</sup> Yesu agie pí uo me: «Ma amene bha koli ngamba 'ngú bini má kpíkíli, ndu yi hana yi atsia aholo nangamba! <sup>22</sup> Moidje aha nani líli pí yi me, yi d̀ nato ongisi na bhosibhosi-e bhú gandja. Engú bini, líli ango-o yie ka Moidje de. A ayie ka onguo ogbi yi. Kaka-a, yi ngaziba nato kpála bhú gandja belegu bhú 'kpí naguo gba omaYuda . <sup>23</sup> Yi ngato kpála bhú gandja bhú 'kpí naguo ngú nakpe me yi agum̀ líli gba Moidje-e de. Ngama-a, ma akobho kpála-kuti libhomu bhú 'kpí naguo. Yi la ngake 'ngú liyi m̀ma tété ngú ni? <sup>24</sup> Yi akódho 'ngú maka yi ngauu lie de. Engú bini, yi kodho 'ngú ngbingbili!»

### *Yesu ne Masiya ?*

<sup>25</sup> Abhomu-o, okpála koko na gudhu na Yelusalema adu apa me: «A oo kpála inde u ngagili nabhøle e di? <sup>26</sup> Yi tsitsia nga, ani ngagama 'ngú mbámábá bhú ká okpála. La-a, u pa 'ngú pí ani belegu de bini! Ongámási gba ní-e ambila bha ndju si ndjindji me Masiya ngae inde-e? <sup>27</sup> Padhá de, anga bili li kpála inde-e ayie li e, ya mbila hana. Engú bini, nedhinga inde li Masiya agó lie, kpála bini mbila bili inde ani ayie li e de.»

<sup>28</sup> Li nedhinga bhomu-o, Yesu adu asuno bhú 'ngbé 'ti Ebhe gba omaYuda. Abhomu-o, ani atsia asula me: «Yi mbila bha ndju ma ndjindji? Yi mbila la di bili inde ma ayie li e hana? Padhá de, anga ngama-a, ma go bhú angu gba ma makpe-e de. Engú bini, kpála inde atima ma-a, a ko kpála na ngbingbili . Kpála ango-o, yi mbila ani de. <sup>29</sup> Ngama-a, ma mbila ani

ndjindji. Padhá de, anga ma ayie agba ani. Ani atima la di ma ngae.»

<sup>30</sup> Abhomu-o, u adu agili me, o holo ani. La-a, kpála bini bu 'kpa e li kute ani de. Padhá de, anga nedhinga gba ani-e le nga nani-i de. <sup>31</sup> La-a, okpála bhelé bhú ká bhiti okpála bhomu-o abhuka ani. U adu apa me: «Nedhinga li Masiya agó lie, ani améne ongamba 'ngú ané obhende li kpála inde-e amene e?»

### *U atima okpála ngú naholo Yesu*

<sup>32</sup> Omufalisai adje engú inde li okpála adu apa e bhú tupele li 'ngú gba Yesu-o. Abhomu-o, ongbengbe odimandø di ne omufalisai atima omalila na 'ngbé 'ti Ebhe gba omaYuda ngú naholo ani.

<sup>33</sup> Yesu atsia apa me: «Ma adu nga matá ne yi ngubula nedhinga bedi. Pipita-a, ma tsia tápa agba kpála inde atima ma ko. <sup>34</sup> Yi agili ma, engú bini, yi ú la ma de. Padhá de, anga yi ti da nanu li bili inde ma adji li e de.» <sup>35</sup> Abhomu-o, omaYuda atsia ayi lio sunda o me: «Ani anu li bili bhedho inde ní ti da nau ani lie de-e? Ani anu nabhaka omaYuda bhende atsambala bhú ká oGiliki-e? Ani anu asuno pí oGiliki? <sup>36</sup> Oeli inde ani apa e me: <Yi agili ma, engú bini, yi ú la ma de, anga yi ti da nanu li bili inde ma adji li e de.> A akunda napa pi?»

### *Engu na mukobho*

<sup>37</sup> Ekpí na soso na anokomia-a, a adu ekpí na ngbéngbé. Li 'kpí ango-o, Yesu alu malu, ani asula me: «Í d̀ me kpála nde ne gumu 'ngu-o, a ayo me, ani go bhaka ma, amba ani ndji! <sup>38</sup> Kpála bhende ngabhuka ma-a, maka li Bhuku gba Ebhe-e apa lie me: <Engu adu aze li bua ani. Engu ango-o, a ko engu na mukobho.>» <sup>39</sup> (Yesu adu apa 'ngú bhomu-o li Bua gba Ebhe inde li okpála inde abhuka ani asia e-o. Li nedhinga bhomu-o, Bua gba Ebhe-e go nga nani-i de. Padhá de, anga Yesu nde sia nga nani sangu gba e de.)

### *OmaYuda koko abhuka me Yesu ne Masiya*

<sup>40</sup> Okpála adje oeli inde li Yesu apa e-o. Okpála koko bhú ká uo atsia apa me: «Kpála inde-e bha ndju ne polofeta

inde ya ngadjeke e kukulu!» <sup>41</sup> Okoko atsia apa me: «A ko Masiya!» Engú bini, okpála koko atsia apa matá me: «Masiya ti da nayie bhú ndu doto na Galilaya? <sup>42</sup> Padhá de, anga Bhuku gba Ebhe-e apa me, Masiya adú sùka okpála na piga gba Davidi. Aní ayíe la di bhú Beteleme, kuti inde li Davidi abhele bhú e ko.» <sup>43</sup> Abhomu-o, okpála atsia agbogbo bhusu o li 'ngú gba ani-o. <sup>44</sup> Okoko bhú ká uo adu akunda me, o holo ani. Engú bini, kpála bini bu 'kpa e li ani de.

### *Ongámási gba omaYuda ayala nabhuka Yesu*

<sup>45</sup> Abhomu-o, omulila na 'ngbé 'ti Ebhe gba omaYuda-a agie lio agba ongbengbe odimandè, di ne omuFalisai-o. U atsia ayi omulila-a me: «Yi go ne Yesu de ngubula ni?» <sup>46</sup> Omulila-a agie me: «Kpála inde agama 'ngú maka kpála bhomu-o belegu ade bini!» <sup>47</sup> Abhomu-o, omuFalisai atsia agie pi uo me: «Ngayi di-e, yi a'o di me ani pite yi? <sup>48</sup> Bhú ká ongámási, i du di-e bhú ká omuFalisai-e, kpála bini abhuka ani uu? <sup>49</sup> Engú bini, bhiti okpála bhende abhuka ani bhomu-o, u mbila líli gba Moidje de. Ebhe abála uo mabala.»

<sup>50</sup> Nikodemu-o, a ko sùka omuFalisai. Aní anu la di nani kalanu abhaka Yesu-o ngae. Aní apa pi uo me: <sup>51</sup> «Líli gba ní-e ziba naholo kpála padhá de. A ayo ngaiza me ní dje ani, amba ní mbila la di engú inde ani amene e ko.» <sup>52</sup> U agie pi ani me: «Ngamu di-e, mu ne kpála na ndu doto na Galilaya? Tanga nga obhuku gba Ebhe-e ndjindji. Mu ú de me, polofeta bini ayie bhú ndu doto na Galilaya de.»

[ <sup>53</sup> Pipita-a, kpála ne kpála atsia agie lie agba e.\*

## 8

### *Èlè na zabhe*

<sup>1</sup> Abhomu-o, Yesu anu apí 'ta na ondula na Olive. <sup>2</sup> Li ekpí aseke lie, bhú sikikpi-e, ani agie lie bhú 'ngbé 'ti Ebhe gba omaYuda. Ndu okpála hana adyudyo lio de ani masikpe. Yesu adu kuto, ani

atsia aholo nasuno pi uo. <sup>3</sup> Abhomu-o, omusuno na líli gba Moidje , di ne omuFalisai ago ne èlè bini. U akoto li èlè ango-o bha li nedhinga u adu akunda lio lie ne bhoko koko. U aha ani, u atsia a'o ani kala ndu okpála hana. <sup>4</sup> Do uo pi Yesu me: «Musuno, u akoto li èlè inde-e bha li nedhinga u adu akunda lio lie ne bhoko koko. <sup>5</sup> Moidje aye nani pi ya bhú líli-e me, a ayo nabhili ongua olisi bhomu-o ne teme. Ngamu-o, mo opa naamu tété pi?»

<sup>6</sup> U adu apa engú bhomu-o ngú na'o ekú ngú ani. Padhá de, anga u adu agili nau engú inde u a'ó e pí ani-o. Engú bini, Yesu akita ne kuto, ani aholo naye 'he kuto bhú doto ne likpa e. <sup>7</sup> La-a, u azi bha kekele li nayi ani. Abhomu-o, ani ayie bhúlá, ani atsia apa pi uo me: «A ayo me kpála inde bhú ká yi, i mene nga naae siti 'ngú bini de-e, ani tulu ani ne teme na kalanu-o ngae.» <sup>8</sup> Pipita-a, Yesu akita matá ne kuto, ani atsia aholo bha naye ehe kuto bhú doto. <sup>9</sup> Li u adje oeli bhomu-o lie, ndu uo hana atsia aholo ayie bini ne bini. Akpo nayie ne obhelesi okpála. Yesu atigala bha ngae kpi e kpi. Èlè ango-o atsia adu la bhadi li bíli inde u a'o ani li e bhomu. <sup>10</sup> Abhomu-o, Yesu ayie matá bhúlá, ani ayi èlè ango-o me: «Okpála ango-o su? Kpála bini kodho 'ngú gba mu-o sisiti di?» <sup>11</sup> Èlè ango-o agie me: «Musuno, ma u kpála bini de.» Do Yesu pi ani me: «Ngama di-e, ma kódho 'ngú gba mu-o sisiti de. Mu ti da natapa. La-a, nayie pi mbia inde-e, mo oméne matá siti 'ngú belegu de bini.»]

### *Yesu ne zi 'ke pi okpála na píla doto*

<sup>12</sup> Abhomu-o, Yesu apa matá pi bhiti okpála-a me: «Ngama-a, ma ne zi 'ke pi okpála na píla doto. Kpála inde ngakpata ma-a, ani dhuku bhú biti de. Engú bini, a adú ka ani ne zi 'ke na mukobho.» <sup>13</sup> Abhomu-o, omuFalisai atsia apa pi ani me: «Mu ngakpokpo bhomu-o naamu 'ngú makpe! Engú inde mu ngakpokpo e bhomu-o, tata tété ade!»

<sup>14</sup> Yesu agie pi uo me: «A na paká moko me ma ngakpokpo 'ngú gba ma makpe.

\* **7:53** 7:53 Ongú nayie si akólo bhú 8:11, a bhú obhuku koko na didili-e ade.

La-a, engú inde ma ngakpokpo e, a ko kukulú 'ngú. Padhá de, anga ma mbíla bíli inde ma ayie lí e, di ne bíli inde ma adji lí e ndjindji. Engú bini, ngayi-e, yi mbíla bíli inde ma ayie lí e de. Yi mbíla la di bíli inde ma adji lí e de. <sup>15</sup> Yi ngakodho 'ngú maka okpála. Ngama-a, ma kodho 'ngú gba kpála bini de. <sup>16</sup> Í dũ la me, ma nde akodho 'ngú-o, nakodho 'ngú gba ma-a dú ngbingbili. Padhá de, anga ma kpi ma kpi ade, engú bini, 'Dyi ma inde atima ma-a, ya ne aní bhú dabilí bini.

<sup>17</sup> U aye bhú líli gba yi makpe-e me: «Í dũ me okpála bhisi nde akpokpo 'ngú-o, engú angó-o dú ngbingbili.» <sup>18</sup> Ma ngakpokpo naama 'ngú makpe. 'Dyi ma inde atima ma-a, ngakpokpo la di engú gba ma ko.»

<sup>19</sup> Abhomũ-o, u ayi aní me: «'Dyi mũ su?» Yesu agie pí uo me: «Yi mbíla ma de. Yi mbíla la di 'Dyi ma de. Yi mbíla ma uu-o, yi de ambíla di 'Dyi ma ambíla.» <sup>20</sup> Yesu apa 'ngú bhomũ-o lí nedhinga aní adũ asuno lie bhú 'ngbé 'ti Ebhe gba omaYuda, lí bíli lí osanduku inde u adũ a'o tia bhú e adũ lí e-o. Kpála bini tsia bu nani 'kpa e lí aní de, anga nedhinga gba aní-e kolo nga nani-i de.

*Yesu akpo 'ngú pindji bíli inde aní ayie lí e-o*

<sup>21</sup> Abhomũ-o, Yesu atsia apa matá pí uo me: «Ma adji. Yi agíli ma. La-a, yi amú bhú siti 'ngú gba yi-o. Yi tí da nanũ lí bíli inde ma adji lí e de.» <sup>22</sup> OmaYuda atsia ayi lío sũnda o me: «Aní abhóló lie ne títi e? Kaka-a, aní apa me bíli inde ní adji lí e, ní tí da nakoló tété dí?» <sup>23</sup> Yesu agie pí uo me: «Ngayi-e, yi ayie kuto sí. Engú la bini, ngama-a, ma ayie abhúlá. Ngayi-e, yi ne okpála na píla doto. Engú la bini, ngama-a, ma ne kpála na píla doto ade. <sup>24</sup> Kaka-a, ma apa ígini pí yi me, yi amú bhú siti 'ngú gba yi ko. Padhá de, anga í dũ me yi nde bhuka de me Ma uu-o\* de-e, yi amú bhú siti 'ngú gba yi ko.» <sup>25</sup> Abhomũ-o, u ayi aní me: «Ngamũ-o, mũ ne da?» Yesu agie pí uo me: «A ko

bha engú inde ma apa e pí yi, nayie lí lilita-o. <sup>26</sup> Ma ne engú bhelé napapa, di ne nakokodho lí 'ngú gba yi ko. Engú bini, ma ngapa pí okpála engú inde ma adje e ka kpála inde atima ma ko. Ngaani-e, aní ngapa ngbílí 'ngú .»

<sup>27</sup> U mbíla de me aní ngapa pí o bhomũ-o engú gba 'Dyi e de. <sup>28</sup> Abhomũ-o, Yesu atsia apa pí uo me: «Nedhinga yi a'é'e ma, Ndíli gba kpála lie ne abhúlá-a, yi tsia mbíla me ngama-a, ma uu. Yi mbíla la di me, ma mene ehe bini bhú angu gba ma makpe de. Engú bini, ma ngapa bha bini engú inde lí 'Dyi ma asuno e mũma ko. <sup>29</sup> Ya ne kpála inde atima ma-a bhú dabilí bini. Aní 'o ká ma kpi ma kpi de. Padhá de, anga ma ngamene ndũ 'kpí hana engú inde í nganga lí aní manga ko.» <sup>30</sup> Abhomũ-o, okpála bhelé inde adje Yesu ngapa 'ngú bhomũ-o, atsia abhuka aní.

*Okpála bhende ne obalise na siti 'ngú*

<sup>31</sup> Abhomũ-o, Yesu atsia apa pí omaYuda inde abhuka nani aní-e me: «Í dũ me yi nde alíla elí inde ma ngapa e pí yi-e ndjindji-e, yi dú omakpata gba ma-a na kukulú. <sup>32</sup> Yi mbíla la di ngbílí 'ngú. Lí ngbílí 'ngú-o tsia gbégbe yi bhú balí.»

<sup>33</sup> U agie pí aní me: «Ya ne odi Abalahama. Ya dũ nga balí pí kpála belegũ de bini. Lele pí mũ tí da napa lie pí ya me, ya azé bhú balí maze-e?» <sup>34</sup> Yesu agie pí uo me: «A moko, ma apa pí yi na paká me: ndũ kpála hana inde ngamene siti 'ngú-o, a ko balí ka siti 'ngú. <sup>35</sup> Balí ngadũ bhú píga ndũ 'kpí hana ade. Engú bini, ndíli na bhobhoko ngadũ ndũ 'kpí hana bhú píga. <sup>36</sup> Kaka-a, í dũ me Ndíli-e nde agbegbe yi bhú balí-e, yi tsia zé bhú balí kukulú. <sup>37</sup> Ma mbíla hana me, yi ne odi Abalahama. Engú la bini, yi ngagílí nabhóló ma. Padhá de, anga yi ngayala 'lí ma. <sup>38</sup> Ngama-a, ma ngakpokpo engú inde lí 'Dyi ma asuno e mũma ko. La ngayi-e, yi ngamene engú inde lí 'dyi yi apa e pí yi ko.»

<sup>39</sup> Abhomũ-o, u atsia agie pí aní me: «'Dyi ya-a, a ko Abalahama.» Do Yesu pí

\* **8:24** 8:24 Ma uu: A bhomũ-o 'lí gba Ebhe inde aní asuno e pí Moidje nedhinga aní atima aní lie bhú Edjipeto. Tsia bhú Eki. 3:14.

uo me: «Ɔ dú me yi dú ne odi Abalahama, yi de méne 'ngú maka Abalahama. <sup>40</sup> Engú bini, mbia inde-e, yi ngakúnda nabhølø ma, abana ma apa kúkulu 'ngú inde ma adje e ka Ebhe lie pi yi-o. Abalahama mene la nani mo-o de. <sup>41</sup> Engú bini, ngayi-e, yi ngamene bhadi ngua kulu inde li 'dyi yi ngamene e-o.» U atsia agie pi ani me: «Ya ne ongisi na ngongo ade. Koli 'dyi ya bha bini, Ebhe.»

<sup>42</sup> Yesu apa pi uo me: «Li Ebhe dú bha ndju ne 'Dyi yi-e, yi de akúnda ma. Padhá de, anga ma ayie agba Ebhe. Ma la di si bhú ngu ani. Ma go bhú ngu ma de. Engú bini, ani atima ma ngae. <sup>43</sup> Yi mbila engú inde ma ngapa e pi yi-e de ka ni? A ko anga, yi ti da nadje eli inde ma ngapa e pi yi-e de. <sup>44</sup> 'Dyi yi ne Djabulu. Yi la di ngamene 'ngú inde li 'dyi yi akúnda e-o. A ko bhulu nabhølø kpála nayie li lilita. Ani lu bhú kúkulu 'ngú belegu de bini. Padhá de, anga kúkulu 'ngú bhú ani ade. Nedhinga inde ani ngapa eu lie, ani ngapa 'ngú gba e makpe. Padhá de, anga a ko kpála na eu. A ko la di 'dyi eu. <sup>45</sup> Engú bini, ngama-a, ma ngapa kúkulu 'ngú. Yi ngabhuka ma ade kaka. <sup>46</sup> A ko kpála bhedho bhú ká yi-e, i ti da nasuno siti 'ngú inde ma amene e? Ɔ dú me ma nde ngapa kúkulu 'ngú-o, ka ni yi bhuka la ma lie de-e? <sup>47</sup> Kpála gba Ebhe-e ngadje 'li Ebhe. Engú bini, yi ne okpála gba Ebhe ade. Kaka-a, yi ngadjedje ade.»

### *Yesu akpo 'ngú pindji Abalahama*

<sup>48</sup> OmaYuda agie pi Yesu me: «Ya apa kúkulu 'ngú de me mu ne kpála na Samalia, a la di bhú mu ne siti bua?» <sup>49</sup> Yesu agie pi uo me: «Siti bua bhú ma ade. Engú bini, ma ngadhøø 'Dyi ma. La-a, ngayi-e, yi ngayala nadhøø ma. <sup>50</sup> Ngama-a, ma gili de me okpála dhøø ma-a de. 'Dyi ma ngagigili muma ngae. Ani la di ngakodho 'ngú-o ngae. <sup>51</sup> A moko, ma apa pi yi na paká me: kpála inde alila eli inde ma ngapa e, ani kpí dudu ma de.»

<sup>52</sup> OmaYuda atsia apa pi ani me: «Mbia inde-e, ya ambila la kúkulu me abhú mu ne siti bua! Abalahama akpi. Opolofeta di

amu. La ngamu-o, mu ngapa me: «Kpála inde ngalila eli inde ma ngapa e, ani kpí dudu ma de.» <sup>53</sup> 'Dyi ya Abalahama akpi. Mu ngabhundja me ni ngbéngbé ane ani? Opolofeta di amu. Mu la ngau nga naamu limu me ni ne da?»

<sup>54</sup> Yesu agie pi uo me: «Ɔ dú me, ma du adhøø lima ngama makpe-e, nadhøø gba ma-a de padhá. 'Dyi ma ngadhøø ma ngae, a ko kpála inde yi nga'i e me: «A ko Ebhe gba ya-o» <sup>55</sup> me yi nde mbila la ani de ko. Engú bini ngama-a, ma mbila ani hana. Ɔ dú me ma pá me ma mbila ani de-e, ma de ne kpála na eu maka yi. Engú bini, ma mbila ani hana. Ma la di ngalila eli inde ani ngapa e-o. <sup>56</sup> 'Dyi yi Abalahama akpi nani djali naali. Padhá de, anga ani adu abhundja me ni au ekpí nago gba ma-o. Ani au, ani atsia akpi djali.» <sup>57</sup> Abhomu-o, omaYuda atsia apa pi ani me: «Ngamu-o, mu kolo nga ne kalanga ndjikpa bhuluvue de. Mu la ngapa me, ni au Abalahama!» <sup>58</sup> Yesu agie pi uo me: «A moko, ma apa pi yi na paká me kala me u zu Abalahama, «Ma uu.»» <sup>59</sup> Abhomu-o, u abha teme ngubula natutulú ani ne di. Engú bini, Yesu awo lie, ani atsia akoto bhú 'ngbé 'ti Ebhe gba omaYuda-o.

## 9

### *Yesu akobho kpála inde u azu e me ani nde u 'kpí de*

<sup>1</sup> Li Yesu adu akodho 'kpí lie li kpadji-e, ani au kpála bini inde u azu e me ani nde u 'kpí de. <sup>2</sup> Omakpata gba ani ayi ani me: «Musuno, u azu kpála inde-e me ani nde u 'kpí de ka ni? A ko ka siti 'ngú gba ani makpe, ne me a ko ka siti 'ngú gba okpála inde azu ani?»

<sup>3</sup> Yesu agie me: «A ko ka siti 'ngú gba ani-e de. A ko la di ka siti 'ngú gba okpála inde azu ani-e de. Engú bini, u azu ani mo-o ngubula me okpála u ngamba 'ngú inde li Ebhe ngamene e bhú ani. <sup>4</sup> A ayo me ní mene kulu gba kpála inde atima ma-a nedhinga li ekpí nde nga lie ne ngbikpi-o. Padhá de, anga biti ngago, kpála bini ti da namene kulu de. <sup>5</sup> Nedhinga ma nde nga lie pála doto-o, ma

ne zi 'ke pi okpála na p'íla doto.» <sup>6</sup> Pita ani apa lie mo-o, ani aku ngusù bhú doto. Ani akpødhøle doto ne di. Ani aha ngbødhe angoo, apulu pí kó djila kpála inde i u 'kpí de ko. <sup>7</sup> Abhomu-o, Yesu atsia apa pi ani me: «Nù vùlù bhúla mù bhú 'dú 'ngu navùlù kùte na Siloe.\*» ('fili bhomu-o akùnda napa me «U atima ani.») Ani anù, ani atsia avùlù bhúla e. Ani agie lie me ani nde ngau 'kpí ndjindji!

<sup>8</sup> Okpála bhende asili kuti lingo ani, di ne obhende au ani kalanù me ani nde ne yoyo 'he-e, a adù ayi me: «A inde-e kpála adù nako adù kuto ngú nayo 'he-e di?» <sup>9</sup> Okoko adù apa me: «A ko ani.» Do okpála koko me: «A ko ani de. Engú bini, ani mana ani.» La-a, kpála angoo adù apa me: «A ko bha-a ma.» <sup>10</sup> Abhomu-o, u ayi ani me: «Djila mù abhulu lie lele pi?» <sup>11</sup> Ani atsia agie me: «Kpála inde u a'i e me Yesu-o, amene ngbødhe, ani apulu pí kó djila ma. Ani atsia apa muma me: «Nù vùlù bhúla mù bhú Siloe.» Ma anù oo. Pita ma avùlù lima lie, ma aholo nau 'kpí!» <sup>12</sup> U ayi ani me: «Kpála angoo su?» Ani agie me: «Ma mbila de.»

### *OmùFalisai ayiyi kpála inde li djila e akobho-o*

<sup>13</sup> Abhomu-o, u ago ne kpála inde adù kalanù me ani nde u 'kpí de-e pi omùFalisai. <sup>14</sup> Yesu amene nani ngbødhe, ani atsia abhulu djila ani ne di me a nde la ekpí naguo gba omaYuda. <sup>15</sup> Abhomu-o, omùFalisai ayi di ani me djila ani aholo au 'kpí lele pi. Ani agie pi uo me: «Ani apulu kó djila ma ne ngbødhe. Ma avùlù lima, ma atsia aholo au 'kpí.» <sup>16</sup> OmùFalisai koko atsia adù apa me: «Kpála amene engú inde-e, ani yie agba Ebhe de. Padhá de, anga ani ngalila líli na ekpí naguo ade.» Engú bini, okoko atsia adù apa naao me: «Kpála na sisiti ti da namene ngua ongamba 'ngú me-e lele pi?» U atsia agbogbo bhùsù o.†

<sup>17</sup> Abhomu-o, omùFalisai ayi matá kpála inde li djila e abhulu-o me: «A la mù-o, mo opa naamù li 'ngú gba kpála inde

abhulu djila mù-o pi?» Ani agie me: «A ko polofeta .»

<sup>18</sup> Engú bini, ongámási gba omaYuda kùnda nani nabhuka de me, ani adù me ani nde u 'kpí de, ani atsia aholo au 'kpí-e de. Kaka-a, u atsia a'i okpála inde azu ani-o. <sup>19</sup> U ayi uo me: «Kpála inde-e, a ko ndili gba yi na paká? A na paká me yi azu ani me ani nde u 'kpí di? Ani la ngau 'kpí mbia inde-e lele pi?» <sup>20</sup> Okpála inde azu ani-e agie me: «Ya ambila me a ko ndili gba ya. Ya azu ani me ani nde u 'kpí de. <sup>21</sup> Engú la bini, maka ani ngau 'kpí lie mbia inde-e, ya mbila naaya de. Ya mbila la di de me abhulu djila ani da-ie de. Yi yi ani, ani abhele, ani ti da nakpokpo 'ngú gba e ngae makpe!» <sup>22</sup> Okpála inde azu ani-e apa nani mo-o, anga u adù akpe omaYuda. Padhá de, anga omaYuda adje nani lio me, i dù me kpála nde aziba me Yesu ne Masiya, u de gbe ani bhú 'ti nadjè líli gba Moidje-e magbe. <sup>23</sup> Kaka-a, okpála inde azu ani-e apa nani me: «Ani abhele, ani ti da nakpokpo 'ngú gba e ngae makpe. Yi yi ani!»

<sup>24</sup> Abhomu-o, omùFalisai a'i matá kpála inde adù nako me ani nde u 'kpí de-o. U atsia apa pi ani me: «Dhøgø Ebhe bhú napa kùkùlù 'ngú. Ya ambila me kpála inde akobho mù bhomu-o, a ko siti kpála.» <sup>25</sup> Kpála angoo atsia agie me: «I dù siti kpála, i dù siti kpála de, ma mbila naama de. La-a, ma ambila koli 'ngú bini: ma dù nako au 'kpí de, engú bini, mbia inde-e, ma ngau 'kpí.»

<sup>26</sup> Abhomu-o, u ayi matá ani me: «Ani amene ngú mù pi? Ani abhulu djila mù lele pi?» <sup>27</sup> Ani agie pi uo me: «Ma apa igini pi yi apa. Engú bini, yi dje ma de. Yi akùnda matá nadjèje ne toto-o? Atigala yi ngakùnda me yi kolo di omùkpata gba ani.» <sup>28</sup> U asosobho ani. U atsia apa pi ani me: «Mù mangbo ne mùkpata gba kpála bhomu-o ngamù! Ngay-a, ya naaya ne omùkpata gba Moidje. <sup>29</sup> Ya ambila me Ebhe akpokpo 'ngú pi Moidje. Engú bini,

\* **9:7** 9:7 'Dú 'ngu navùlù kùte na Siloe nani abhú aga na Yelusalema. † **9:16** 9:16 Si-e, omùFalisai au me li Yesu akobho kpála lie bhú 'kpí naguo, ani amene bhomu-o kulu. La-a, líli gba Moidje ziba nani namene kulu bhú 'kpí naguo de.



ngaani-e, ya mbila de me ani ayie naae su-oie de!»

<sup>30</sup> Kpála ango-o agie pi uo me: «A ko 'ngú na ngangamba. Yi mbila bili inde ani ayie li e de. La-a, ani abhulu djila ma!»  
<sup>31</sup> Ní mbila hana me Ebhe djedje okpála na sisiti de. Engú bini, ani djedje ndu kpála hana inde ngamanga ani, inde di ngamene engú ani akunda e-o. <sup>32</sup> Nani akpo lie, kpála bini dje nga de me u ngapa me kpála bini abhulu djila kpála inde u azu e me ani nde u 'kpí de-e de. <sup>33</sup> Í dú me kpála inde-e yíe agba Ebhe de-e, ani de tí da namene 'he bini de.» <sup>34</sup> Abhomu-o, u agie pi ani me: «Ngamu-o, 'lá mu libhomu bhú siti 'ngú nayie maka nani u azu mu lie. Mu la ngakunda nasuno 'ngú pi ya?» U atsia agbe ani bhú 'ti nadjé líli-e kilidjo.

### *Okpála i u 'kpí kùkùlù de*

<sup>35</sup> Yesu adje me omuFalisai agbe kpála inde li djila e akobho-o kilidjo. Yesu anu abhaka ani, ani atsia ayi ani me: «Mo obhuka Ndili gba kpála-a abhuka?» <sup>36</sup> Ani agie pi ani me: «Musuno, kpála ango-o, a ko da, amba ma bhuka ani-e?» <sup>37</sup> Yesu agie pi ani me: «Mo ou ani au. Ani ngagama 'ngú ne mu mbia inde-e ngae.» <sup>38</sup> Do kpála ango-o me: «Ngámá, ma abhuka.» Ani atsia atutu lipaku e kuto kala Yesu.

<sup>39</sup> Abhomu-o, Yesu atsia apa pi ani me: «Ma ago píla doto ngú nakodho 'ngú. Ma ago ngubula me okpála bhende i u 'kpí de-e, u u 'kpí, amba okpála bhende ngau 'kpí-e, 'o nau 'kpí.»

<sup>40</sup> OmuFalisai inde adu de ani oo, adje oeli bhomu-o. U atsia ayi ani me: «Ngaya di-e, ya u 'kpí di?» <sup>41</sup> Yesu agie pi uo me: «Yi dú ne okpála bhende i u 'kpí de-e, yi de bhú siti 'ngú ade. Engú bini, maka yi apa lie me: «Ya ngau 'kpí-e», yi nga bha ne okpála na sisiti.»

## 10

### *Yesu ne mulila na babadha gba okandele*

<sup>1</sup> Yesu apa me: «A moko, ma apa pi yi na paká me: kpála inde i li bhú aga

gba okandele li bhobho-o de-e, engú bini, inde nga'u li pabu aga li pápá koko-o, kpála ango-o ne bhulu 'zi. Ani la di ne bhulu nagbulu 'he gba okpála ne kpéke. <sup>2</sup> Kpála inde ali la naae li bhobho-o, a ko mulila gba okandele-o. <sup>3</sup> Mulila na 'bhø aga-a nga'u'u pi ani. Okandele-o ngadje la di 'li ani. Ani nga'i okandele gba e bini ne bini li 'li e. Ani la di ngapandja uo kilidjo. <sup>4</sup> Li ani apandja uo hana lie kilidjo-o, ani ké kala uo, u tsia holo nakpata ani. Padhá de, anga u mbila 'li ani hana. <sup>5</sup> Engú bini, kpála bhende u mbila e de-e, u kpála ani de. U kpé de ani tsutsu. Padhá de, anga u mbila 'li ani de.»

<sup>6</sup> Yesu akpokpo gbitaku bhomu-o pi okpála inde adu adje ani-o. La-a, u mbila nani ta engú inde ani adu apa e pi uo-o de.

<sup>7</sup> Abhomu-o, Yesu atsia apa matá me: «A moko, ma apa pi yi na paká me: ma ne 'bhø aga gba okandele-o. <sup>8</sup> Ndu okpála hana inde ago mu ma kalanu-o, a ko obhulu 'zi. A ko la di obhulu nagbulu 'he gba okpála ne kpéke. Engú bini, okandele-o dje uo de. <sup>9</sup> Ngama-a, ma ne 'bhø bhoti. Kpála inde alí li pá bili gba ma-a, ani kóbho. Ani tí da nali, ani koto, ani tsia sia di ehe nazu mazú. <sup>10</sup> Bhulu 'zi ago bha naae ngubula nazi 'he. Ani ago ngubula nabhøbhøle mabhøle. Ani ago ngubula nasisiti masiti. La ngama-a, ma ago ngubula me okandele sia mukobho, u sia mukobho ango-o bhelé.

<sup>11</sup> Ma ne bádhá mulila gba okandele. Mulila na babadha gba okandele-o bedhe ngú naha mukobho gba e pi okandele gba e-o. <sup>12</sup> Kpála inde ngamene kulu bha bini ngubula tia-a, a ko kùkùlù mulila gba okandele-o de. A ko okandele ka ani de. Li ani u me sia ngago-o, ani há holo, ani 'ó ká uo. Abhomu-o, li sia-a tí pí uo, ani tsia tsámبالa uo. <sup>13</sup> Padhá de, anga ani ngamene bha naae kulu ngubula tia. Ani la di ne ndjinga uo ade. <sup>14-15</sup> Ngama-a, ma ne mulila na babadha gba okandele. Maka li 'Dyi ma ambila ma lie, ma atsia ambila di ani-e, ma ambila okandele gba ma-o, okandele gba ma-a atsia ambila di ma. Ma la di bedhe ngú naha mukobho

gba ma-a pi okandələ gba ma-o. <sup>16</sup> A ka ma ne okandələ koko inde bhú aga inde-e ade. A ayo me ma go di ne uo. U adjé 'li ma. U akólo koli piga okandələ bini, u tsia dú ne koli m̀lila bini.

<sup>17</sup> 'Dyi ma ngakunda ma, anga ma bedhe ngú naha mukobho gba ma-a, amba pipita-a, ma sia matá. <sup>18</sup> Kpála bini ha mukobho gba ma-a ne kpéke de. Engú bini, ma ngahaha bha ngama. Ma ne angu ngú nahaha, ma la di ne angu ngú nasisia. Ma asia líli bhomu-o ka 'Dyi ma.»

<sup>19</sup> OmaYuda atsia agbogbo matá bhusu o ka oeli bhomu-o. <sup>20</sup> Bhelé bhú ká uo adu apa me: «A abhú ani ne siti bua ! A ko la di bhulu pele! Yi ngadje ani ka ni?»

<sup>21</sup> Okoko adu apa me: «Kpála inde bhú e ne siti bua-a ti da napa 'ngú mo-o de. Siti bua ti da nabhulu djila okpála inde i u 'kpí de-e uu?»

### *OmaYuda ayala Yesu*

<sup>22</sup> Abhomu-o, bhú gudhu na Yelusalema-a, bhú nedhinga na zini-e, u amene anokomia Naleke 'ngbé 'ti Ebhe gba omaYuda-o. <sup>23</sup> Bhú 'ngbé 'ti Ebhe-e, Yesu adu adhuku sa ngba 'ti gba Salomo-o. <sup>24</sup> Abhomu-o, omaYuda asa lio dengo ani ngbalina. U atsia apa pi ani me: «Bua ya adú bha ka mu me a nde alu abhúla má gba me-e ngubula ekpí madho? I du me mu nde ne Masiya-a, mu de pa pi ya mbámá.» <sup>25</sup> Yesu agie pi uo me: «Ma apa pi yi apa. Engú bini, yi ziba ma de. Ongamba 'ngú inde ma ngamene e ne 'li 'Dyi ma-a, a ngakpokpo 'ngú gba ma-o. <sup>26</sup> Engú bini, yi bhuka de anga yi ne okandələ gba ma-a ade. <sup>27</sup> Okandələ gba ma-a ngadje 'li ma. Ma ambila uo, u la di ngakpata ma. <sup>28</sup> Ma ngaha mukobho na duduma pi uo. U mú duduma de. Kpála bini tí la di da nagbulu uo ka ma de. <sup>29</sup> 'Dyi ma inde aha uo mu ma-a, ani ngbéngbé ane ndu 'ngú hana. Kpála bini tí la di da nagbulu 'he bini ka 'Dyi ma de. <sup>30</sup> Ngaya ne 'Dyi ma-a, koli ya bha bini.»

<sup>31</sup> Abhomu-o, omaYuda abha matá teme ngú natutulú ani ne di. <sup>32</sup> Yesu agie pi uo me: «Obabadha 'ngú bhelé inde

ma asuno e pi yi-e, ayie ka 'Dyi ma. A ko ngubula obabadha 'ngú bhedho yi ngakunda nabhələ ma lie ne teme?»

<sup>33</sup> OmaYuda agie pi ani me: «A ko de me ya ngakunda nabhələ mu ne teme ka bádha 'ngú-o de. Engú bini, a ko anga mu ngasobho Ebhe. Ngamu inde bha ne kpála-kuti-e, mu nga'o limu maka Ebhe.»

<sup>34</sup> Yesu agie pi uo me: «U aye bhú líli gba yi-e me, ngama-a, ma apa me: <Yi ne oebhe.> <sup>35</sup> Ya ambila me, u ti da nabulu engú inde li Bhuku gba Ebhe-e apa e de. Okpála inde li eli gba Ebhe-e akolo nani gba o-o, u a'i uo me oebhe.

<sup>36</sup> Engú bini ngama-a, Ebhe abhu ma, ani atsia atima ma pála doto. Lele pi yi ngapa la lie me ma ngasobho Ebhe, anga ma ngapa me ma ne Ndili gba Ebhe-e? <sup>37</sup> I du me ma nde ngamene ngamba 'ngú gba 'Dyi ma ade-e, yi abhúka ma de. <sup>38</sup> I du la me ma nde ngamene ngamba 'ngú gba 'Dyi ma-a, abana yi bhuka ma de-e, yi de bhuka ngabha mbo ongamba 'ngú ang-o. Yi bhuka ongamba 'ngú ang-o ngubula nambila ndjindji me 'Dyi ma ngakobho bhú ma, ma la di ngakobho bhú ani.» <sup>39</sup> Abhomu-o, u agili matá naholo ani. Engú bini, ani atsia akobho sa 'kpa uo.

<sup>40</sup> Yesu atsia agie matá lie ayi 'ngu na Djuludani, li bilí inde li Djaa adu nani abatisa okpála li e kalanu-o. Ani atsia adu oo. <sup>41</sup> Okpála bhelé ago nabhaka ani. U adu apa me: «Djaa mene ngamba 'ngú belegu de bini. Engú bini, ndu 'ngú hana inde ani apa nani e pindji kpála inde-e, a ko kukulu 'ngú.» <sup>42</sup> Oo, okpála bhelé abhuka ani.

## 11

### *Ladjalo akpi*

<sup>1</sup> Kpála bini inde adu 'li e me Ladjalo, asi kuo. Ani adu nadu bhú Betania, kuti li Malia ne ndai e Malata adu nadu bhú e-o. <sup>2</sup> Malia ne elə inde atuko nani mungotsi li 'dhu Ngámá, ani atsia akuo ne sundjo e-o. Ladjalo inde adu ne kuo-o, nani ne ndai ani. <sup>3</sup> Ondaise ani na olisilisi bhisi bhomu-o, atima kpála ngú napa pi Yesu

† 10:34 10:34 Tsia bhú Ets. 82:6.

me: «Ngámá, ali kpála mo okukunda e ne kuo.» <sup>4</sup> Li Yesu adje engú bhomu-o lie, ani atsia apa me: «Kuo bhomu-o ngubula nabhøø ani mabhøø ade. Engú bini, a ngubula naha sangu pi Ebhe. A ko la di ngubula me ngama, Ndili gba Ebhe-e, ma sia sangu bhúbhú.»

<sup>5</sup> Yesu adu ne mukunda pi Malata, ne ndai e na øøø, di ne Ladjalo naali. <sup>6</sup> La-a, ani adje lie me ali Ladjalo ne kuo-o, ani amene matá 'kpí bhisi li bili abhaka me ani nde li e-o. <sup>7</sup> Pipita-a, ani apa pi omukpata gba e me: «Ní gie matá liní bhú ndu doto na Yudaya.» <sup>8</sup> Omukpata-a apa pi ani me: «Musunu, a mene nga 'kpí bhelé de, omaYuda adu nako agili nabhøø mu ne teme oo. Mo odji matá bha oo?» <sup>9</sup> Yesu agie pi uo me: «Ngbikpi ne saa ndjikpa ne ká bhisi. A mo-o adi? I du me kpála nde ngadhuku ne ngbikpi-e, ani dó 'dhu e de. Padhá de, anga ani ngau zi 'kpí na doto inde-e ndjindji. <sup>10</sup> Engú bini, i du la me kpála nde ngadhuku sukpe-e, ani dó 'dhu e. Padhá de, anga ani li zi 'kpí ade.»

<sup>11</sup> Pita li Yesu apa 'ngú bhomu-o lie, ani atsia apa pi uo me: «Ladjalo, olia ní-e, ani ala. Engú bini, ma adji, amba ma zuku ani.» <sup>12</sup> Abhomu-o, omukpata gba ani-e atsia apa pi ani me: «Ngámá, i du me ani nde tila-a, ani dú bhú mukobho.» <sup>13</sup> A na paká me Yesu adu apa me Ladjalo akpi. Engú bini, omukpata-a adu abhundja naao me ani akpo 'ngú pindji ela inde li okpála alala e-o. <sup>14</sup> Abhomu-o, Yesu atsia apa pi uo mbámbá me: «Ladjalo akpi. <sup>15</sup> Ma ne djali pi yi anga ma du nako oo de, amba yi bhuka ma. Engú bini, ní nu nabhaka ani!» <sup>16</sup> Abhomu-o, Tuma (inde u agisila 'li e me Bhuko-o), apa pi omukpata koko me: «Nganí-e, ní nu di oo, ngubula me ní mu ne Musunu bhú dabili bini.»

### *Malata anu nakø lie ne Yesu*

<sup>17</sup> Li Yesu akolo lie, ani abhaka me u azi Ladjalo azi, a nde ane nga 'kpí badha. <sup>18</sup> Kutu na Betania du nani de gudhu na Yelusalema masikpe de kilometele bata. <sup>19</sup> A abhaka me omaYuda bhelé nde ago

oo ngú nateteke Malata ne Malia ka li ndai uo na bhobhoko-o akpi lie ko.

<sup>20</sup> Li Malata adje lie me Yesu akolo de kutu masikpe-e, ani anu akø lie ne ani li kpadji. Engú bini, Malia adu naae akutu. <sup>21</sup> Abhomu-o, Malata atsia apa pi Yesu me: «Ngámá, mu dú nako si-e, ndai ma de kpi de. <sup>22</sup> Engú bini, ma ambila me belegu mbia inde-e, Ebhe ti da naha ndu 'he hana inde mo oyó e ka ani-e pi mu.» <sup>23</sup> Yesu apa pi ani me: «Ndai mu azúku mazuku.» <sup>24</sup> Malata agie pi ani me: «Ma ambila me ani azúku li 'kpí li okpála inde amu-o, azúku lie li sokpi-o.»

<sup>25</sup> Yesu apa pi ani me: «Kpála nazuku okpála-a, a ko ma. Kpála naha la di mukobho pi okpála-a, a ko ma. Kpála inde abhuka ma-a, abana ani kpi, ani kóbho. <sup>26</sup> La di-e, kpála ne kpála inde bhú mukobho, inde abhuka la di ma-a, ani kpi duduma de. Mo obhuka mo-o?» <sup>27</sup> Malata agie me: «A moko, Ngámá, ma abhuka me mu ne Masiya, Ndili gba Ebhe. Kpála inde a ayo me ani go píla doto ko.»

### *Malia anu di nakø lie ne Yesu*

<sup>28</sup> Pita ani apa 'ngú bhomu-o lie, Malata anu a'i ndai e Malia. Do ani pi ani bhú tupele me: «Musunu aoo. Ani nga'i mu.» <sup>29</sup> Li Malia adje lie mo-o, ani ayie kolo bhúlá má kia! Ani atsia anu abhaka Yesu. <sup>30</sup> A adu me Yesu nde kolo nga bhú kutu na Betania de. Engú bini, ani adu ngabha li bili inde li Malata anu akø lie ne ani li e ko. <sup>31</sup> Li omaYuda inde adu abhú 'ti ngú nateteke Malia au lie me ani ayie bhúlá ne nakoto kilidjo bhú holo-o, u atsia akpata ani. Padhá de, anga u adu abhundja naao me ani adji aku 'gba apí lata.

<sup>32</sup> Malia akolo li bili li Yesu adu li e-o. Ani au Yesu lie, ani ati bhú li 'dhu ani. Ani atsia apa pi ani me: «Ngámá, mu dú nako si-e, ndai ma de kpi de.» <sup>33</sup> Yesu au me ani ngaku 'gba di ne okpála inde ago ne ani bhú dabili bini-o. Ani asia likabhu naali li bua e. Mabhundja gba ani-e atsia angbingi di. <sup>34</sup> Abhomu-o, ani atsia ayi uo me: «Yi azi ani su?» U agie pi ani me: «Ngámá, gogo, amba mu u.» <sup>35</sup> Yesu aku 'gba. <sup>36</sup> Abhomu-o, omaYuda atsia apa me: «Yi u maka ani akunda nako ani lie

ko!» <sup>37</sup> Engú bini, okpála koko bhú ká uo atsia apa me: «Ngaani inde abhulu nako djila kpála inde i u kpí de-e, ani ti da nako namene de me Ladjalo akpí de-e di?»

### *Yesu azuku Ladjalo*

<sup>38</sup> Abhomu-o, Yesu asia matá likabhu naali li bua e. Ani anu abhú lata. A adu nani lata inde u adjí e bhú teme. U ani nani bhøbhø ne teme na ngbéngbé. <sup>39</sup> Abhomu-o, Yesu atsia apa me: «Yi 'e teme-o.» Malata, ndai kpála inde akpi-e, apa pi ani me: «Ngámá, se ani aholo napu aholo. Padhá de, anga ani amene nga satø 'kpí badha.» <sup>40</sup> Yesu agie pi ani me: «Ma pa igini pi mu de me, i du me mu nde abhuka ma-a, mu ú sangu gba Ebhe-e di?» <sup>41</sup> Abhomu-o, u a'e teme-o. Yesu atsia 'kpí ne bhúla, ani atsia apa me: «'Dyi ma, ma ngagie heni pi mu, anga mo odje ma. <sup>42</sup> Ma ambila ndjindji me mu ngadje ma ndu 'kpí hana. Ma ngapapa mo-o ka okpála inde asa lio denge ma inde, amba u bhuka me, mo otima ma ngamu.» <sup>43</sup> Ani apa 'ngú bhomu-o lie, ani asula kpekpeke me: «Ladjalo, koto ei!» <sup>44</sup> Ladjalo akoto. Ani akoto me 'dhu ani, di ne 'kpa ani nde agbigbite lie ne opapala bongo. Bhúla ani nde agbite la di lie ne bongo. Yesu atsia apa pi uo me: «Yi bhulu ani, amba yi 'o ani, ani tapa.»

### *Ongámási gba omaYuda adje lio ngu nabhøle Yesu*

*(Tsia bhú Mat. 26:1-5; ne bhú Mlk. 14:1-2; di ne bhú Luk. 22:1-2.)*

<sup>45</sup> Abhomu-o, omaYuda bhelé bhú ká okpála inde ago gba Malia au engú inde li Yesu amene e-o. U atsia abhuka Yesu. <sup>46</sup> Engú bini, okoko bhú ká uo anu abhaka omuFalisai. U akpokpo 'ngú inde li Yesu amene e pi uo. <sup>47</sup> Abhomu-o, ongbengbe odimandø gba Ebhe, di ne omuFalisai apo bhúla o bhú 'ngbé bula. U atsia apa me: «Kpála inde-e ngamene ongamba 'ngú bhelé. Ní améne si pi?» <sup>48</sup> I du me ní nde a'o me ani du bha anu ne di ne kalanu me-e, ndu okpála hana bhúka ani. Pipita-a, okpála na gudhu na Loma kólo ne angu. U bhøle 'ngbé 'ti Ebhe gba ní-o. U tsia bhøle la di kuti gba ní-o!»

<sup>49</sup> Kpála bini adu bhú ká uo. A adu 'li ani me Kaifa. Ani adu bhele kpála gba odimandø bhú kalanga bhomu-o ngae. Ani apa pi uo me: «Ngayi-e, yi mbila 'ngú de! <sup>50</sup> Yi mbila de me a pi yi ndjindji me kpála bini kpi pi ndu okpála hana, amba kuti libhomu akpí de-e di?» <sup>51</sup> La-a, ani du apa 'ngú bhomu-o bhú ngu e de. Engú bini, a adu la lie me ani nde ne bhele kpála gba odimandø bhú kalanga bhomu-o ngae-e, ani atsia apa 'ngú maka polofeta me: «A ayo me Yesu kpi ngabula kuti gba omaYuda-o. <sup>52</sup> Ani kpi bha bini ngabula omaYuda de. Engú bini, ani kpi ngabula me ni po bhúla ongisi gba Ebhe inde atsambala ne bili ngangá-a bhú piga bini.»

<sup>53</sup> Nayie li 'kpí bhomu-o, ongámási gba omaYuda atsia adje lio me o bhøle Yesu. <sup>54</sup> Kaka-a, Yesu du matá adholo mbámbá bhú ká omaYuda de. Ani atapa bhú gudhu na Efalaime, bhú ndu doto inde de egu-o. Abhomu-o, ani atsia adu ne omukpata gba e oo.

<sup>55</sup> Pasika gba omaYuda akolo masikpe. Kaka-a, okpála bhelé na kuti ango-o atsia anu bhú gudhu na Yelusalema ngabula me o vølu lio, amba o du pi Ebhe bubu kala anokomia-o. <sup>56</sup> Abhomu-o, u adu agili Yesu. U alulu bhú 'ngbé 'ti Ebhe gba omaYuda-o. U atsia adu ayi lio sunda o me: «Yi abhundja pi? Ani agó bha ndju bhú anokomia inde-e mago? Ne me, ani gó-o de?» <sup>57</sup> Ongbengbe odimandø gba Ebhe, di ne omuFalisai aha nani líli me: «I du me kpála nde ambila bili inde li Yesu nde lie-e, ani de pa, amba u nu holo ani.»

## 12

### *Malia atuko mungotsi li 'dhu Yesu*

*(Tsia bhú Mat. 26:6-13; di ne bhú Mlk. 14:3-9.)*

<sup>1</sup> Abhomu-o, ekpí madhia kala Pasika-a, Yesu anu bhú kuti na Betania. A bhomu-o bili inde li Ladjalo, kpála inde li Yesu azuku e adu nadu li e-o. <sup>2</sup> Oo, u aha ezu pi ani, Malata atsia adu a'o'o kala ani. Ladjalo atsia adu di bhú ká okpála inde adu azu 'he bhú dabili bini ne Yesu-o. <sup>3</sup> Abhomu-o, Malia aha gili bini inde

li mungotsi na mase naali adu bhú e-o. U amene nani mungotsi ango-o bha li ndula inde 'li e me nalade.\* Ani aha, ani atuko li 'dhu Yesu. Ani akuo 'dhu ani ne sundjo e. Bádha se mungotsi ango-o atsia aha eti-e libhomu.

<sup>4</sup> Engú bini, Yuda Isikaliote, suka omukpata gba Yesu, kpála inde apú ani pi obhulu yala-a, atsia apa me: <sup>5</sup> «A ayo igini de me u tsindji mungotsi inde-e li lí denalio kámá bata, amba u ha falanga ango-o pi obhulu ndibhili-e di?» <sup>6</sup> La-a, a ko de me ani apa mo-o, anga ani adu ne ndjinga obhulu ndibhili-e de. Engú bini, a ko anga ani adu bhulu 'zi. Padhá de, anga ani adu la alila gba tia lie ngae-e, ani adu azi tété. <sup>7</sup> Engú bini, Yesu atsia apa me: «'O elø bhomu! Padhá de, anga engú inde ani amene e, a ngubula ekpí inde u azí ma lie bhú lata ko. <sup>8</sup> Padhá de, anga yi adú bhú dabili bini ne obhulu ndibhili ndu 'kpí hana. Engú la bini, ngama-a, ní dú ne yi ndu 'kpí hana de.»

### *Ongbengbe odimandø adje lio ngú nabhøø Ladjalo*

<sup>9</sup> Abhomu-o, bhiti omaYuda adje me Yesu abhú kuti na Betania, u atsia anu oo. U nu oo bha bini ngubula Yesu de, engú bini, u anu di me o u Ladjalo inde li Yesu azuku e-o. <sup>10</sup> Abhomu-o, ongbengbe odimandø gba Ebhe-e atsia adje lio me o bhøø di Ladjalo. <sup>11</sup> Padhá de, anga omaYuda bhelé adu a'o ká uo, u atsia adu abhuka Yesu ka engú gba Ladjalo-o.

### *Yesu ali bhú gudhu na Yelusalema*

*(Tsia bhú Mat. 21:1-11; ne bhú Mlk. 11:1-11; di ne bhú Luk. 19:28-40.)*

<sup>12</sup> Ekpí bhe pipita-a, bhiti okpála na bhibhiti inde ago bhú anokomia na Pasika adje me Yesu adji bhú gudhu na Yelusalema. <sup>13</sup> Abhomu-o, u abha 'kpá ngulu, u aze ngú nanu nakø lio ne ani. U atsia adu asusula me:

«Sangu pi Ebhe!

A ayo me Ebhe Ngámá tuko bisagu pí kpála inde ngago ne 'li ani-o!

A ayo me Ebhe tuko bisagu pí 'ngbé Ngámá gba omafalaale-o!†»

<sup>14</sup> Yesu au ndili punda, ani atsia a'u pí 'ngbu ani maka li Bhuku apa lie me:

<sup>15</sup> «Gudhu na Siona, mo odjé tsulu de!

Tsitsia, 'ngbé Ngámá gba mu-o ngago, ani adu pí 'ngbu ndili punda na øøø.†»

<sup>16</sup> Li nedhinga bhomu-o, omukpata gba ani-e mbila nga nani ta engú ango-o de. La li nedhinga inde li Yesu asia sangu gba e lie, u atsia abhundja me u aye nani ongu bhomu-o bhú Bhuku gba Ebhe-e pindji ani. U atsia amene pi ani.

<sup>17</sup> Abhomu-o, bhiti okpála inde adu nani bhú dabili bini ne ani li nedhinga inde ani a'i Ladjalo lie me ani koto bhú lata-a, ani atsia azuku di ani-e, adu akpokpo 'ngú inde u au e-o. <sup>18</sup> Kaka-a, bhiti okpála ango-o abhaka ani. Padhá de, anga u adje nani me ani amene ngamba 'ngú bhomu-o. <sup>19</sup> Abhomu-o, omufalisai atsia apa sunda o me: «Yi au, ní ti da namene 'he bini de. Ndu okpála hana agbida nganda ani!»

### *OGiliki koko agili Yesu*

<sup>20</sup> OGiliki koko adu bhú ká okpála inde ago bhú gudhu na Yelusalema ngú nadhøø Ebhe bhú anokomia-o. <sup>21</sup> U adyudyo lio de Filipino, kpála na gudhu na Betesaida, bhú ndu doto na Galilaya. U atsia apa pi ani me: «Musuno, ya akunda nau Yesu.» <sup>22</sup> Filipino anu apa pi Andili. Pipita-a, ndu uo bhisi hana atsia anu apa pi Yesu. <sup>23</sup> Yesu agie pi uo me: «Mbia inde-e, a ko nedhinga inde a ayo lie me Ndili gba kpála sia sangu gba e-o. <sup>24</sup> A moko, ma apa pi yi na paká me: i du me lí ngano bini nde ati bhú doto, i kpi de-e, i tígala bha ngae kpi e kpi. Engú bini, i du la me a nde akpi-e, i lí lílí bhelé. <sup>25</sup> Kpála inde akunda mukobho gba e, ani kpi. Engú bini, li kpála bini kunda Ebhe ane mukobho gba e pála doto inde-e, mukobho ango-o líla lie, li kpála ango-o tsia sía di mukobho na duduma. <sup>26</sup> † du me kpála nde akunda namene kulu lie

\* **12:3** 12:3 Nalade: A ko mungotsi inde u amemene e li 'kpá ulu. Tsia bhú Mat. 26:7. † **12:13** 12:13 Tsia bhú Ets. 118:25-26. † **12:15** 12:15 Tsia bhú Djkl. 9:9.

muma-a, a ayo me kpála ango-o kpata ma. La di-e, bili inde ma adú li e, kpála na kulu gba ma-a adú bhadi oo. 'Dyi ma adhégo kpála inde ngamene kulu muma ko.»

*Yesu akpo 'ngú pindji nakpi ka e*

<sup>27</sup> «Mbia inde-e, bua ma ngadje likabhū. Ma apá la pí? Ma pá de me, <'Dyi ma, kobho ma lí nedhinga inde-e de.> Padhá de, anga ma ago ngubula nedhinga ango-o. <sup>28</sup> 'Dyi ma-e, dhogè 'li mụ!» Abhomu-o eli ayie abhúla, atsia apa me: «Ma adhogè aní adhogè. Ma adhogè la matá aní madhogè.» <sup>29</sup> Abhomu-o, bhiti okpála inde adu oo, inde adje la di eli ango-o, adu apa me: «Mugbálá asula bhomu-o ngae!» Okoko atsia adu apa me: «Andjelu bini agama 'ngú pí aní ngae.»

<sup>30</sup> La-a, Yesu apa pí uo me: «Eli bhomu-o pa lie ka 'ngú ka ma de. Engú bini, a apa lie ka 'ngú ka yi. <sup>31</sup> Mbia inde-e, u akódho 'ngú gba okpála na píla doto. Mbia inde-e, u ató holo bhú 'dhu ngámá na doto inde. <sup>32</sup> La ngama-a, lí nedhinga inde u a'è'e ma lie abhúla-a, ma agbéle ndu okpála hana lí pápá gba ma.» <sup>33</sup> Yesu adu apa 'ngú bhomu-o ngú nasuno lele maka aní akpí lie-o.

<sup>34</sup> Abhomu-o, bhiti okpála-a atsia agie pí aní me: «Ya adje bhú bhuku na líli me Masiya adú dudu ma ne dudu ma. Lele pí mụ ngapa lie me u a'è'e Ndili gba kpála abhúla? Ndili gba kpála ango-o ne da?»

<sup>35</sup> Abhomu-o, Yesu atsia agie pí uo me: «Zi 'ke nga matá bhú ká yi ngubula nedhinga bedi. Yi dhuku bhú nedhinga inde yi nde nga lie ne zi 'ke, ngú nakpe me biti ahólo yi bhú gbilikiti de. Padhá de, anga kpála inde ngadhuku bhú biti-e mbila bili inde aní adji lí e de. <sup>36</sup> Nedhinga yi nde lie ne zi 'ke-e, yi bhuka zi 'ke ango-o, amba yi kolo ongisi na zi 'ke.» Pita lí Yesu apa engú bhomu-o lie, aní atapa, aní atsia anu awo lie de uo tsutsu.

*OmaYuda bhuka Yesu de*

<sup>37</sup> Abana lí Yesu amene ongamba 'ngú lie bhelé-e, omaYuda du abhuka aní de. <sup>38</sup> U du abhuka aní de ngubula napa me

engú inde lí polofeta Isaya apa e-e, a mene lie, engú inde me:

«Ngámá, abhuka engú inde ya adu apa e da?»

Ngámá apana angu gba e pí da?†»

<sup>39</sup> Isaya apa di nani me, ka ní lí okpála bhomu-o tí nani da nabhuka lie de-e. Aní apa me:

<sup>40</sup> «Ebhe agbite djila uo.

Aní adji bua uo maka teme, ngubula me u aú 'kpí de, ngubula me u ambíla 'ngú bini de, di me u adji bua o de,

amba Ebhe akóbho uo de.†»

<sup>41</sup> Isaya apa engú bhomu-o, anga aní au nani sangu gba Yesu-o. Aní atsia akpokpo di 'ngú pindji aní. <sup>42</sup> La-a, belegu bhú ká ongámási gba omaYuda-a, bhelé abhuka Yesu. Engú bini, ka nakpe omuFalisai-e, u du apa engú ango-o mbámá de. Padhá de, anga u adu akpe me, u apándja o bhú 'tí nadge líli gba Moidje de. <sup>43</sup> U adu akunda me okpála dhogè o ane me Ebhe dhogè o ngae.

*Kpála inde abhúka 'li Yesu-o, aní kóbho*

<sup>44</sup> Yesu asula me: «Kpála inde abhuka ma-a, aní bhuka bhomu-o ma de. Engú bini, aní abhuka kpála inde atima ma ko.

<sup>45</sup> Kpála inde ngau ma-a, aní ngau bhomu-o kpála inde atima ma-o. <sup>46</sup> Ngama-a, ma ago píla doto maka zi 'ke, ngubula me ndu okpála hana inde abhuka ma-a, adú bhú biti de. <sup>47</sup> I du me kpála nde adje 'li ma-a, aní lila de-e, ma kódho 'ngú gba aní-e ngama de. Padhá de, anga ma go ngubula na'o 'ngú pí okpála de. Engú bini, ma ago ngú nakobho uo. <sup>48</sup> Kpála inde ayala ma-a, inde i ziba di 'li ma de-e, u akódho 'ngú gba aní-o. Eli inde ma apa e, eli ango-o akódho 'ngú gba aní lí sokpí-e ngae. <sup>49</sup> Padhá de, anga ma pa 'ngú gba ma makpe de. 'Dyi ma inde atima ma-a, aha líli muma ngae makpe ngubula ndu 'ngú hana inde a ayo me ma pa e, di ne bhende a ayo me ma kpokpo e-o.

<sup>50</sup> Padhá de, anga ma ambíla me líli gba aní-e ngaha mukobho na dudu ma. Kaka-a, ndu 'ngú hana inde ma ngapa e, ma

† 12:38 12:38 Tsia bhú fsa. 53:1. † 12:40 12:40 Tsia bhú fsa. 6:10.

ngapapa maka li 'Dyi ma apa muma lie ko.»

## 13

### *Yesu avulu 'dhu omukpata gba e*

<sup>1</sup> A adu nani ekpi kala anokia na Pasika . Yesu ambila nani me nedhinga nayie ka ni pila doto inde-e, ngu nanu agba 'Dyi ni-e akolo. Ani adu akunda okpala gba e inde pila doto-o. Ani akunda uo akolo ali soso.

<sup>2</sup> Yesu ne omukpata gba e adu azu 'he tagolo. A adu me Djabulu nde a'o li bua Yuda, ndili gba Simo Isikaliote, me ani pu Yesu pi obhulu yala. <sup>3</sup> Yesu ambila nani ndjindji me ngani makpe-e, ni ayie agba Ebhe. Ani atsia ambila la bhadi ndjindji me ni agie lini agba Ebhe, la di me 'Dyi ni a'o ndu 'ngu hana sa 'kpa ni. <sup>4</sup> Ani ayie bhula, ani ayie li bili nazu 'he-o. Ani agbe bongo inde u adyidi e pi bongo koko-o. Ani aha pala bongo, ani agbite ludu e. <sup>5</sup> Pipita-a, ani aha engu, ani atuko bhú base. Ani aholo navulu 'dhu omukpata gba e ne di. Ani atsia adu akukuo ne bongo inde ani agbite e ludu e-o.

<sup>6</sup> Ani akolo li Simo Piele. Do Piele pi ani me: «Ngamá, mo ovulu bha ndju 'dhu ma ngamu makpe?» <sup>7</sup> Yesu atsia agie pi ani me: «Engú inde ma ngamene e mbia inde-e, mu mbila de. Engú bini, mo ombila sidi.» <sup>8</sup> Piele apa pi ani me: «A mo-o ade. Mu vulu 'dhu ma belegu de bini!» Yesu atsia agie pi ani me: «I du me ma nde vulu 'dhu mu de-e, mu ti da nadu bhú dabili bini ne ma de.» <sup>9</sup> Simo Piele apa pi ani me: «Ngamá, mo ovulu bha bini 'dhu ma de. Engú bini, vulu di 'kpa ma, ne 'ndji ma!» <sup>10</sup> Yesu apa pi ani me: «Kpala inde avulu kute e avulu-o, kute ani libhomu akolo ndjindji. Ani ti mata da navulu kute e de. Engú bini, ani vulu bha ibili 'dhu e. Ngayi-e, yi bubu. La-a, yi bubu ndu yi hana ade.» <sup>11</sup> Yesu apa 'ngu bhomu-o anga ani adu ambila ndjindji me, apu ni pi obhulu yala da-ie. Kaka-a, ani atsia apa me: «Yi ndu yi hana bubu ade.»

<sup>12</sup> Pita ani avulu 'dhu uo lie, ani aha bongo gba e, ani adyi. Ani agie lie li bili nazu 'he-o. Ani atsia apa pi uo me: «Yi mbila ta 'ngu inde ma amene e li yi-e uu? <sup>13</sup> Yi nga'i ma me: <Musuno>, yi la di nga'i ma me: <Ngamá.> A ko kukulu 'ngu, anga ma mo-o. <sup>14</sup> I du me ngama, inde ne Ngamá, inde la di ne Musuno-o, ma nde avulu 'dhu yi-e, ngayi di-e, yi de vulu 'dhu yi sunda yi moko. <sup>15</sup> Ma asuno pi yi bhomu-o me amba ngayi di-e, yi mene maka ma amene pi yi lie ko. <sup>16</sup> A moko, ma apa pi yi na paká me, kpala na kulu ngbéngbé ane ngamá gba e ade. La di-e, bhulu titima ngbéngbé ane kpala inde atima ani-e ade. <sup>17</sup> Mbia inde-e, yi ambila ndu ongu bhomu-o hana ambila. A ko djali pi yi, i du me yi nde ngamene ongu ango-o.

<sup>18</sup> Engú inde ma ngapa e, a pi ndu yi hana ade. Ma mbila okpala inde ma abhu o-o hana. Engú bini, a ayo me engú inde u aye e bhú Bhuku gba Ebhe-e , a mene lie, engú inde me: <Kpala inde ya adu azu 'he ne e bhú dabili bini-e, adji lie bhulu yala gba ma.> <sup>19</sup> Ma apa pi yi mbia inde-e kala nakolo ka ongu ango-o, amba li engú ango-o akolo lie, yi bhuka me ngama-a <Ma uu.> <sup>20</sup> A moko, ma apa pi yi na paká me: i du me kpala nde asia kpala inde ma atima e, amba ani asia bhomu-o ma. I du la di me kpala nde asia ma-a, amba ani asia bhomu-o kpala inde atima ma-o.»

*Yesu apa me Yuda apu ni pi obhulu yala gba ni-o*

*(Tsia bhú Mat. 26:20-25; ne bhú Mlk. 14:17-21; di ne bhú Luk. 22:21-23.)*

<sup>21</sup> Pita li Yesu apa ongu bhomu-o lie, ani asia likabhu li bua e naali. Ani atsia apa mbamba me: «A moko, ma apa pi yi na paká me: suka yi bini apu ma pi obhulu yala gba ma-o.» <sup>22</sup> Omukpata-a aholo natsitsia bhula o. U du ambila de me Yesu ngapa inde-e engú gba daie de. <sup>23</sup> Li nedhinga u adu azu 'he lie, suka omukpata gba Yesu inde li Yesu adu akunda e naali-e, aseke 'ndji e pi mbulu ani. <sup>24</sup> Abhomu-o, Simo Piele amene 'kpa

† 13:18 13:18 Tsia bhú Ets. 41:10.

e pi mukpata ango-o me, ani yi Yesu me ani ngapa engú gba da. <sup>25</sup> Abhomu-o, mukpata ango-o adji bhúla e li pápá gba Yesu. Ani atsia ayi Yesu me: «Ngámá, a ko e da?»

<sup>26</sup> Yesu agie pi ani me: «Ma ngatunu mapa bhú 'mu 'zu-o, kpála inde ma ahá pi e-e, a ko ani.» Abhomu-o, Yesu aha mapa, ani atunu bhú 'mu 'zu-o. Pipita-a, ani atsia aha pi Yuda, ndili gba Simo Isikaliote. <sup>27</sup> Bha li nedhinga li Yuda aha mapa-a lie, Satana ali bhú ani. Yesu atsia apa pi ani me: «Engú inde mu nde ne e, mene má gala!» <sup>28</sup> Kpála bini bhú ká okpála inde u adu azu 'he ne o-o mbila de me ani apa pi Yuda mo-o ka ni-ie de. <sup>29</sup> Li Yuda adu alila tia lie ngae, kaka-a, okpála koko adu abhundja naao me, ani apa pi Yuda me ani kala ezu inde a ayo me u kala e ngú anokomia-o, ne me ani ha mbo ehe pi obhulu ndibhili. <sup>30</sup> Li Yuda aha ndu mapa lie, kolo má gala me-e, ani akoto kilidjo. A adu me ekpi nde abi.

### *Líli na mbia*

<sup>31</sup> Pita li Yuda akoto lie, Yesu atsia apa me: «Mbia inde-e, Ndili gba kpála, asia sangu gba e asia. Ebhe asia la di sangu ka ani. <sup>32</sup> Maka li Ebhe asia sangu ka ani lie, Ebhe asúno ngae makpe sangu gba ani-o. Ani asúno má gala! <sup>33</sup> Odi ma, ní dú matá ne yi ngubula 'kpi bhelé de. Pipita-a, yi agili ma. Engú la bini, ma ngapa pi yi mbia inde-e engú inde ma apa e pi omaYuda koko me, yi ti da nanu li bili inde ma adji li e de. <sup>34</sup> Ma ngaha pi yi-e líli na mbia. Líli inde me yi du ne mukunda sunda yi. A ayo me yi du ne mukunda sunda yi maka ma nde lie ne mukunda pi yi ko. <sup>35</sup> Padhá de, anga i du me yi nde ne mukunda sunda yi-e, li ndu okpála hana mbila me yi ne omukpata gba ma-o.»

<sup>36</sup> Simo Piele ayi ani me: «Ngámá, mo odji su?» Yesu agie pi ani me: «Mu ti da nakpata ma li bili ma adji li e mbia inde-e de. Engú bini, mo okpáta ma sidi.»

<sup>37</sup> Piele apa pi ani me: «Ngámá, ma ti da nakpata mu mbia inde-e de ka ni? Ma bedhe ngú nandala 'kpa li mukobho gba ma-a ngubula mu!» <sup>38</sup> Yesu agie pi ani me:

«Mu bha ndju bedhe ngú nandala 'kpa li mukobho gba mu-o ngubula ma? A moko, ma apa pi mu na paká me, kala me engu ku 'gbá-a, mo opá bhatsibhatsi bata me ni mbila ma de.»

## 14

### *Yesu ne kpadji ngú nanu agba Ebhe*

<sup>1</sup> Yesu apa pi omukpata gba e me: «Yi a'ó bua yi abhúla de. Yi bhuka Ebhe, yi bhuka di ma. <sup>2</sup> Abhú 'ti gba 'Dyi ma-a, dabili nadu tété-e bhelé. Ma adji naleke dabili pi yi. I dú mo-o de-e, ma de apa pi yi apa. <sup>3</sup> Pita nanu ka ma naleke dabili pi yi-e, ma agó matá, ma atsia há yi ngú nadu bhú dabili bini ne yi, amba bili inde ma ngadu li e, yi du bhadi tété. <sup>4</sup> Yi mbila la di kpadji na bili inde ma adji li e hana.»

<sup>5</sup> Tuma apa pi ani me: «Ngámá, ya mbila bili mo odji li e de. Ya ti da nambila kpadji-e lele pi?» <sup>6</sup> Yesu agie pi ani me: «Ma ne kpadji. Ma ne kukulu 'ngú. Ma la di ne mukobho. Kpála bini ti da nanu agba 'Dyi ma li kpadji koko de, bha bini me ani nde apu li pápá gba ma. <sup>7</sup> I du me yi nde ambila ma-a, yi mbila di 'Dyi ma. Nayie pi mbia inde-e, yi mbila ani hana. Yi au la di ani au.»

<sup>8</sup> Filipino apa pi ani me: «Ngámá, pana 'Dyi mu pi ya, amba ale pi ya.» <sup>9</sup> Yesu agie pi ani me: «Filipo, enú ní abhue lie ne yi ngengele-e, mu mbila nga ma sii di? Kpála inde au ma-a, ani au 'Dyi ma au. La ka ni mu ngapa lie me: «Pana 'Dyi mu pi ya?» <sup>10</sup> Mu bhuka de me ma ngadu bhú 'Dyi ma, 'Dyi ma la di ngadu bhú ma-a di? Oeli inde ma ngapa e pi yi-e, ayie ka ma makpe de. Engú bini, 'Dyi ma inde ngadu bhú ma-a, ani ngamene kulu gba e-o. <sup>11</sup> Yi bhuka ma, maka ma apa lie pi yi me ma ngadu bhú 'Dyi ma, 'Dyi ma la di ngadu bhú ma-o. I du mo-o de-e, yi de bhuka ka kulu inde ma ngamene e-o. <sup>12</sup> A moko, ma apa pi yi na paká me: kpála inde abhuka ma-a, ani améne bhadi okulu inde ma ngamene e-o. Ani améne belegu okulu na ngbengbengbe ane bhende-e mane. Padhá de, anga ma adji agba 'Dyi ma. <sup>13</sup> Ma améne ndu 'ngú



hana inde yi ayó e ne 'li ma-a mamene, ngubula me 'Dyi ma sia sangu gba e bhú ma, Ndili gba e ko. <sup>14</sup> I du me yi nde ayo 'he ka ma ne 'li ma-a, ma améne.

*Ebhe atíma Bu Bhobua pi obhulú titima gba Yesu*

<sup>15</sup> I du me yi nde akúnda ma-a, yi líla olíli gba ma-o. <sup>16</sup> Ma ayó ka 'Dyi ma me ani ha kpála koko ngú nateteke yi. Ani adú ne yi dudu ma ne dudu ma. <sup>17</sup> A ko Bua na kukulú 'ngú inde li okpála na píla doto ti da nasia e de. Padhá de, anga u u ani de. U mbíla la di ani de. Engú bini, ngayi-e, yi mbíla ani hana, anga ani ngadu bhú ká yi. Ani la di ngadu bhú yi. <sup>18</sup> Ma 'ó ká yi kpi yi kpi maka otsulosi de. Engú bini, ma agie matá lima agba yi magie. <sup>19</sup> Atigala nedhinga bedi, okpála na píla doto ú matá ma de. Engú bini, ngayi-e, yi aú ma, anga ma bhú mukobho. Ngayi di-e, yi adú bhú mukobho. <sup>20</sup> Li 'kpí ang-o, yi ambíla me ma ngadu bhú 'Dyi ma, yi ngadu bhú ma, ma la di ngadu bhú yi. <sup>21</sup> Kpála inde akúnda ma-a, a ko kpála inde ngalila, di ne namene olíli gba ma-o. 'Dyi ma akúnda kpála inde akúnda ma-o. Li ma kúnda di ani. Ma tsia pána lima pi ani.»

<sup>22</sup> Abhomu-o, Yuda (a ko Yuda Isikaliote de) apa pi Yesu me: «Ngámá, mo opána bha bini limu pi ya, lele pi ma tsia pána limu pi okpála na píla doto lie de-e?» <sup>23</sup> Yesu agie pi ani me: «I du me kpála nde akúnda ma-a, ani méne engú inde ma ngapa e-o. Li 'Dyi ma kúnda ani. Ngaya ne 'Dyi ma-a, ya agó agba ani, ya tsia dúlu oo ko. <sup>24</sup> Kpála inde i kúnda ma de-e, ani méne oeli ma ngapa e de. Engú inde yi ngadje ma ngapa e, a ngayie ka ma ade. Engú bini, a ngayie ka 'Dyi ma inde atima ma ko.

<sup>25</sup> Ma apa ongú bhomu-o pi yi li nedhinga inde ní nde ngabha lie ne yi bhú dabilí bini-o. <sup>26</sup> 'Dyi ma atíma Bu Bhobua pi yi ne 'li ma. Ani atéteke yi ngae. Bu Bhobua ang-o asúno ndu 'ngú hana pi yi ngae. Ani tsia méne di me yi bhundja ndu 'ngú hana inde ma apa e pi yi ko. <sup>27</sup> Ma a'o pi yi guo 'ngú . Ma aha guo 'ngú gba

ma-a pi yi. Ma ha pi yi maka li okpála na píla doto ngahaha lie de. Kaka-a, yi a'ó bua yi abhúlá de. Yi adjé la di tsulú de. <sup>28</sup> Yi adje maka ma apa lie pi yi me: «Ma adjí, engú bini, ma agie matá lima agba yi magie.» I dú me yi kúnda ma uu-o, yi de kpí djali kabula me ma adjí agba 'Dyi ma. Padhá de, anga 'Dyi ma ngebéngbé ane ma. <sup>29</sup> Ma apa pi yi mbia inde-e kala me ongú ang-o kolo, amba i kolo-o, yi de bhuka. <sup>30</sup> Ma gáma matá 'ngú ne yi ngengele de, anga ngámá na píla doto inde-e ngago. Ani ne angu pí ma belegu ade bini. <sup>31</sup> Engú bini, a ayo me okpála na píla doto mbíla me ma kúnda 'Dyi ma. U mbíla la di me ma ngamene olíli inde ani aha e muma-o. Yi yie bhúlá! Ní yie si yiyie.»

## 15

*Yesu ne ndula na vino na kukulú*

<sup>1</sup> «Ma ne ndula na vino na kukulú. 'Dyi ma la ne kpála inde ngaleleke-o. <sup>2</sup> Ani nga'e ndu yáyá hana inde akó li ma inde i li líli de ko. Engú bini, ani ngaleke obhende ngali líli-o, amba a li matá líli bhelé. <sup>3</sup> Eli inde ma apa e pi yi-e, avulú yi avulú. <sup>4</sup> Yi du bhú ma, maka ma nde lie bhú yi ko. Padhá de, anga yá ndula ngae kpi e kpi ti da nali líli de, i du me a nde li kúte 'lá e ade ko. A bhadi moko, yi ti da nali líli de, i du me yi nde bhú ma ade ko.

<sup>5</sup> Ma ne ndula na vino. Yi ne oyáyá-o. Kpála inde ngadu bhú ma, ma nde la di ngadu bhú e-e, ani lí líli bhelé. Padhá de, anga i du me yi nde bhú dabilí bini ne ma ade-e, yi ti da namene 'he bini de. <sup>6</sup> Kpála inde bhú ma ade-e, u abhíke ani akilidjo maka u abhibhike yá ndula lie-o. Yá ndula-a 'úlú, u há, u bhíke bhú djua, i tsí. <sup>7</sup> I du me yi nde bhú ma-a, 'li ma nde la di bhú yi-e, yi yo ehe inde yi akúnda e, amba yi sia. <sup>8</sup> I du me yi nde ali líli bhelé-e, yi suno di me yi ne omakpata gba ma-a, li 'Dyi ma tsia sía sangu . <sup>9</sup> Maka li 'Dyi ma akúnda ma lie, ma akúnda bhadi yi moko. Yi du bhú mukúnda gba ma-o. <sup>10</sup> I du me yi nde alila olíli gba ma-a, yi dú bhú

mukunda gba ma-o, maka ma alila olili gba 'Dyi ma lie, ma ngadu bhú mukunda gba ani-o.

<sup>11</sup> Ma apa engú bhomu-o pi yi, ngubula me djali gba ma-a da bhú yi, amba djali gba yi-e da libhomu. <sup>12</sup> Lili gba ma-a ngae inde: yi kunda liyi sunda yi maka ma akunda yi lie ko. <sup>13</sup> Mukunda na ngbéngbé inde li kpála ti da nasuno e, a ko naha mukobho gba e pi oolia e. <sup>14</sup> Yi ne oolia ma, i da me yi nde amene líli gba ma-o. <sup>15</sup> Ma nga'i matá yi me okpála na kulu ade. Padhá de, anga kpála na kulu mbila ehe inde li ngámá gba ani-e ngamene e de. Ma nga'i yi me oolia ma. Padhá de, anga ma asuno ndu 'ngú hana inde ma asia e ka 'Dyi ma-a pi yi asuno. <sup>16</sup> Yi bhu ma ngayi de. Engú bini, ma abhu yi ngama. Ma atima yi me yi nu zu nguwa inde i ti da nabhue mabhue, amba ndu 'he hana inde yi ayó e ka 'Dyi ma ne 'li ma-a, ani de ha pi yi. <sup>17</sup> La-a, líli ma aha e pi yi-e ngae inde, yi kunda liyi sunda yi.»

*Yesu apa me okpála na doto ayála ni ne omaha ni*

<sup>18</sup> «I da me okpála na doto nde ngayala yi-e, yi mbila ndjindji me u ayala ngaiza ma pi yi kalanu. <sup>19</sup> I dú me, yi dú ne okpála na doto-o, okpála na doto de ngakunda yi. Padhá de, anga yi bhú ngu doto. Engú bini, ma abhu yi, ma atsia a'e yi bhú ká okpála na doto. Kaka-a, okpála na doto ngayala yi. <sup>20</sup> Yi bhundja engú inde ma apa e pi yi-e me: «Kpála na kulu ngbéngbé ane ngámá gba e ade.†» Maka nani u ato mbolo li ma lie, u ató bhadi mbolo li yi moko. I dú me u djé 'li ma uu-o, u de adjé bhadi 'li yi moko.

<sup>21</sup> Engú bini, u améne ndu 'ngú bhomu-o hana li yi kabula ma. Padhá de, anga u mbila kpála inde atima ma-a de. <sup>22</sup> I dú me ma gó de-e, i dú la di me ma kpókpo pi uo de-e, a de okpála namene siti 'ngú ade. Engú bini, mbia inde-e, u mbú li siti 'ngú inde u amene e de. <sup>23</sup> Kpála inde ayala ma-a, ani ayala di 'Dyi ma. <sup>24</sup> Ma amene bhú ká uo ongamba 'ngú , inde li kpála

bini mene nga e de. I dú me ma méne mo-o de-e, a de okpála namene siti 'ngú ade. Engú bini, u au ongamba 'ngú gba ma-o, u ayala ma, u atsia yala di 'Dyi ma. <sup>25</sup> Engú bini, engú bhomu-o akolo ngubula me, eli inde u aye e bhú líli gba uo-o, amene lie, eli inde me: «U ayala ma padhá, tata tété ade.†»

<sup>26</sup> Ma atima pi yi kpála inde a ayo me ani teteke yi-o. Kpála ango-o ayie agba 'Dyi ma. A ko Bua na kukulu 'ngú inde ayie agba 'Dyi ma-o. Nedhinga ani agó lie, ani akpókpo 'ngú gba ma-a ngae. <sup>27</sup> Ngayi di-e, yi akpókpo 'ngú gba ma-o. Padhá de, anga ní adu ne yi nayie li lilita.»

## 16

<sup>1</sup> «Ma apa 'ngú bhomu-o pi yi, amba yi a'ó de me nabhuka gba yi-e kpi-e de. <sup>2</sup> U apándja yi bhú oti nadje líli gba Moidje . La di-e, ekpí akólo makolo, li okpála inde abhili yi-e adú abhundja lie me o ngamene lio bhomu-o kulu pi Ebhe. <sup>3</sup> U améne mo-o, anga u mbila 'Dyi ma de, u mbila la di ma de. <sup>4</sup> Kaka-a, ma apa 'ngú ango-o pi yi kalanu, amba li engú ango-o akólo lie, yi de bhundja me ma apa engú ango-o pi yi apa.»

*Bua na kukulu 'ngú agó mago*

«Ma pa nga nani engú ango-o pi yi nayie li lilita de, anga ní adu nga nani ne yi bhú dabili bini. <sup>5</sup> Mbia inde-e, ma adjí agba kpála inde atima ma ko. La-a, kpála bini bhú ká yi yi ma de me: «Mo odji su?» <sup>6</sup> Engú bini, bua yi abedhe ne babuma, anga ma apa pi yi moko. <sup>7</sup> Ma apa la pi yi na paká me, pi yi-e, a ndjindji me ma nu. Padhá de, anga i da me ma nde nu de-e, kpála inde atéteke yi-e gó-o de. Engú bini, i da me ma nde anu-o, ma tsia tíma ani pi yi. <sup>8</sup> Nedhinga ani agó lie, ani asúno pi okpála na doto me u ngapite lio pindji osisiti 'ngú inde u ngamene e-o. U di ngapite lio pindji ngbili 'ngú , di ne pindji nakodho 'ngú gba Ebhe-o. <sup>9</sup> U ngapite lio pindji osisiti 'ngú inde u ngamene e, anga

† 15:20 15:20 Tsia bhú Mat. 10:24; ne bhú Luk. 6:40; di ne bhú Dja. 13:16. † 15:25 15:25 Tsia bhú Ets. 35:19, 69:5.

u bhuka ma de. <sup>10</sup> U ngapite lio pindji ngbili 'ngú, anga ma adjí agba 'Dyi ma. La di-e, u ú matá ma de. <sup>11</sup> U ngapite lio pindji nakodho 'ngú, anga u akodho 'ngú gba ngámá na doto inde-e akodho.

<sup>12</sup> Ma matá ne engú bhelé napapa pi yi. Engú bini, yi tí da nakikibila mbia inde-e de. <sup>13</sup> Nedhinga li Bua na kukulu 'ngú-o agó lie, ani asúno pi yi ndu okukulu 'ngú hana. Ani pá 'ngú gba e makpe-e de. Engú bini, ani apá ndu 'ngú hana inde ani adjé e-o. Ani tsia pá di ndu 'ngú hana inde akólo-o pi yi. <sup>14</sup> Ani adhége ma. Padhá de, anga ndu 'ngú hana inde ani apá e pi yi-e, ani asía ka ma. <sup>15</sup> Ndu 'he gba 'Dyi ma-a hana, a ko di naama 'he. Kaka-a, ma apa me ndu 'ngú hana inde li Bua apá e pi yi-e, ayie ka ma.»

### *Yesu apa me babuma adjí lie djali*

<sup>16</sup> «Pita nedhinga bedi, yi ú matá ma de. La matá pita nedhinga bedi-e, yi ú ma.» <sup>17</sup> Omukpata koko gba ani-e apa sunda o me: «Ani apa pi ní me: «Pita nedhinga bedi, yi ú matá ma de. La matá pita nedhinga bedi-e, yi ú ma.» Ani apa matá di me: «Ma adjí agba 'Dyi ma.» Engú bhomu-o akunda napa pi?» <sup>18</sup> U adu apa matá me: «Engú inde ani ngapa e me: «Nedhinga bedi», a akunda napa pi? Ní mbila engú inde ani ngapa e de.»

<sup>19</sup> Yesu ambila me, u ngakunda nayi ni. Abhomu-o, ani atsia apa pi uo me: «Yi ngagili sunda yi ta 'ngú inde me: «Pita nedhinga bedi, yi ú matá ma de. La matá pita nedhinga bedi-e, yi ú ma.» <sup>20</sup> A moko, ma apa pi yi na paká me yi akú 'gbá, yi tsia lópolo di liyi. La-a, okpála na doto adú naao akpi djali. Yi adú ne babuma engú bini, likabhu gba yi-e adjí lie djali. <sup>21</sup> Nedhinga li olo ngazu lie, ani dú adje likabhu naali. Padhá de, anga nedhinga na likabhu pi ani akolo. Engú bini, nedhinga inde ani azu lie, ani 'íli 'to e 'to likabhu ang-o hana ka djali. Padhá de, anga u azu kpála-kuti pila doto. <sup>22</sup> Ngayi di-e, mbia inde-e, yi bhú likabhu. Engú bini, ma aú matá yi mau. Yi tsia kpi djali li bua yi. La di-e, kpála bini 'é djali ang-o bhú yi de.

<sup>23</sup> Li ekpí ang-o akólo lie, yi yí matá ma li 'ngú belegu de bini. A moko, ma apa pi yi na paká me ndu 'he hana inde yi ayó e ka 'Dyi ma ne 'li ma-a, ani ahá pi yi maha. <sup>24</sup> Nakolo pi mbia inde-e, yi yo nga 'he ne 'li ma belegu de bini. Yi yoyo, amba yi sia, ngubula me djali gba yi-e du bedhe.»

### *Yesu aha angu doto*

<sup>25</sup> «Engú bini, ma apa 'ngú bhomu-o pi yi bhú ogbitaku. Nedhinga inde ngago-o, ma pá matá 'ngú pi yi mo-o belegu de bini. La-a, nedhinga ang-o, ma akpókpo ongu gba 'Dyi ma-a pi yi mbámá. <sup>26</sup> Li 'kpi ang-o, yi ayó 'he ka 'Dyi ma ne 'li ma. Ma pa la di pi yi de me, ma ayó 'Dyi ma Ebhe pi yi-e de. <sup>27</sup> Padhá de, anga 'Dyi ma, ngae makpe akunda yi. Ani akunda yi, anga yi akunda ma. La di-e, anga yi abhuka me ma ayie agba Ebhe. <sup>28</sup> Ma ayie agba 'Dyi ma. Ma atsia ago pila doto. Mbia inde-e, ma nga'o ká doto, ma tsia gie lima agba 'Dyi ma.»

<sup>29</sup> Abhomu-o, omukpata gba ani-e atsia apa pi ani me: «Tsia nga mbia inde-e, mu ngapa 'ngú mbámá. Mu matá ngapapa bhú ogbitaku ade. <sup>30</sup> Mbia inde-e, ya ambila me, mu ngambila ndu 'ngú hana. A padhá me u yi mu li 'ngú. Kaka-a, ya ngabhuka me mo oyie agba Ebhe.» <sup>31</sup> Yesu atsia agie pi uo me: «Yi abhuka la mbia inde-e abhuka? <sup>32</sup> Yi tsitsia nga. Nedhinga ngago, mbia inde-e, nedhinga ang-o akolo, nedhinga inde yi andjambala lie má mue! Kpála ne kpála atápa li kpadji gba e. Yi tsia 'ó la di ká ma kpi ma kpi. Engú bini, ma la kpi ma kpi ade, anga 'Dyi ma bhú dabili bini ne ma. <sup>33</sup> Ma apa 'ngú bhomu pi yi, amba yi sia guo 'ngú bhú ma. Yi asía likabhu pila doto. Engú bini, yi adjé tsulu de! Padhá de, anga ma aha angu doto aha.»

## 17

### *Yesu ayo Ebhe ngú e makpe*

<sup>1</sup> Pita li Yesu apa ongu bhomu-o lie, ani atsia 'kpi ne bhúlá, ani atsia apa me: «'Dyi ma, nedhinga akolo. Ha sangu muma, ngama Ndili gba mu-o, amba ngama, Ndili gba mu-o, ma ha di sangu pi

m̄. <sup>2</sup> Padhá de, anga mo oha angu m̄ma pí 'ndji nd̄ okpála hana, amba ma ha mukobho na d̄d̄ma pí nd̄ okpála hana inde mo oha o m̄ma-o. <sup>3</sup> La-a, mukobho na d̄d̄ma-a, a ko me u mbila m̄, ngam̄ koli Ebhe inde na k̄k̄l̄-o. A ko me u mbila la di Yesu Kilisito , kpála inde mo otima e-o. <sup>4</sup> Ma aha sangu pí m̄ píla doto. Ma andjia kulu inde mo oha e m̄ma me ma mene e andjia. <sup>5</sup> La mbia inde-e, 'Dyi ma, ha sangu m̄ma de m̄, sangu inde ma ad̄ nani ne e agba m̄ kala me u bho doto ko.»

*Yesu ayo Ebhe nḡbula om̄kpata gba e*

<sup>6</sup> «Ma asuno 'li m̄ pí okpála inde mo 'e o bh̄ ká okpála na doto, mo otsia aha o m̄ma-o. A ko nani okpála ka m̄, mo otsia aha uo m̄ma. U atsia alila la di 'li m̄. <sup>7</sup> Mb̄ia inde-e, u ambila me nd̄ 'he inde mo oha e m̄ma hana, ayie ka m̄. <sup>8</sup> Padhá de, anga oeli inde mo okpokpo e m̄ma-a, ma akpokpo pí uo. U asia oeli ang-o. U ambila na paká me ma ayie agba m̄. U atsia abhuka di me mo otima ma ngam̄.

<sup>9</sup> Ma ngayo m̄ nḡbula uo. Ma ngayo m̄ nḡbula okpála na doto ade. Engú bini, ma ngayo nḡbula obhende mo oha o m̄ma ko. Padhá de, anga a ko okpála ka m̄. <sup>10</sup> Nd̄ 'he inde ka ma-a hana, a ko naam̄. Nd̄ 'he inde la di ka m̄-o hana, a ko naama. La di-e, ma atsia asia sangu ka uo. <sup>11</sup> Ma matá ne kpála na doto ade. Engú bini, ngauo-o, a ko okpála na doto. Ngama-a, ma adj̄ agba m̄. 'Dyi ma inde bubu, lila uo ne 'li m̄ inde mo oha e m̄ma-o, amba u d̄ bini maka nganí ne m̄, ní nde lie bini-o. <sup>12</sup> Nedhinga ya ad̄ lie ne uo-o, ma alila uo ne 'li m̄ inde mo oha e m̄ma ko. Ma alila uo ndjindji, kpála bini bh̄ ká uo ngita de. Angita bha bini ne kpála inde a ayo me ani ngita-o nḡbula me engú inde u aye e bh̄ Bhuku-o, a amene lie.

<sup>13</sup> La mbia inde-e, ma adj̄ agba m̄. Ma ngapa mo-o li nedhinga inde ma nde nga lie píla doto, amba u sia djali gba ma-a bh̄ o makpe, u bedhe la di ne di bedhe. <sup>14</sup> Ma aha 'li m̄ pí uo. Okpála na doto atsia ayala uo. Padhá de, anga uo bh̄ nḡ

doto ade, maka ma nde lie bh̄ nḡ doto ade ko. <sup>15</sup> Ma ngayo m̄ ade me m̄ 'e uo píla doto ma'e-e de. Engú bini, ma ngayo m̄ me lila uo sakpa Siti malila. <sup>16</sup> A ko okpála na doto de, maka ma nde lie ne kpála na doto ade ko. <sup>17</sup> Mene me u d̄ libhomu bubu li kpadji na k̄k̄l̄ 'ngú. 'Li m̄-o, a ko k̄k̄l̄ 'ngú. <sup>18</sup> Ma atima uo píla doto, maka mo otima ma lie píla doto-o. <sup>19</sup> Ngama makpe-e, ma aha lima hana pí m̄ nḡbula me ngauo di-e, u ha lio hana pí m̄ li kpadji na k̄k̄l̄ 'ngú.»

*Yesu ayo Ebhe ngú nd̄ okpála hana abhuka ani-o*

<sup>20</sup> «Ma ngayo bha bini nḡbula uo ade. Engú bini, ma di ngayo nḡbula okpála bhende abh̄ka ma ka 'li uo ko. <sup>21</sup> Ma ngayo me nd̄ uo hana d̄ bini. 'Dyi ma, a ayo me u d̄ bh̄ ní, maka m̄ nde lie bh̄ ma, ma la di bh̄ m̄-o. A ayo me u d̄ bini, amba okpála na doto bhuka me mo otima ma ngam̄.

<sup>22</sup> Ma aha sangu inde mo oha e m̄ma-a pí uo, amba u d̄ bini maka nganí ne m̄ ní nde lie bini-o. <sup>23</sup> Ma bh̄ uo, m̄ la di bh̄ ma. Abhom̄-o, u tí da nad̄ bha ndj̄ bini, amba okpála na píla doto mbila me mo otima ma ngam̄, u mbila la di me mo ok̄nda uo maka mo ok̄nda ma lie ko. <sup>24</sup> 'Dyi ma, mo oha uo m̄ma. Ma ak̄nda me u d̄ bh̄ dabili bini ne ma li bili inde ma nde li e, amba u uo sangu gba ma ko, sangu inde mo oha e m̄ma anga mo ok̄nda ma kala nabho doto. <sup>25</sup> 'Dyi ma inde ngbingbili, okpála na píla doto mbila m̄ de. Engú bini, ngama-a, ma ambila m̄. Okpála inde-e ambila la di me mo otima ma ngam̄. <sup>26</sup> Ma asuno 'li m̄ pí uo. Ma asúno la matá m̄ pí uo masuno, nḡbula me muk̄nda inde m̄ nde ne e m̄ma-a d̄ bh̄ uo, amba ngama makpe-e, ma d̄ di bh̄ uo.»

## 18

*U aholo Yesu*

*(Tsia bh̄ Mat. 26:47-56; ne bh̄ Mlk. 14:43-50; di ne bh̄ Luk. 22:47-53.)*

<sup>1</sup> Pita li Yesu andjia nayo Ebhe lie, ani an̄ ne om̄kpata gba e ayi mutselemutsele inde 'li e me Sedolo. Edyi

bini adu oo. Yesu atsia ali ne omukpata gba e bhúbhú. <sup>2</sup> Yuda, bhulu napu Yesu-o adu ambila di bili ango-o ndjindji. Padhá de, anga Yesu ne omukpata gba e adu anu oo piko. <sup>3</sup> Abhomu-o, Yuda anu abhú 'dyi oo bhú dabili bini ne ká osudha, di ne omulila na 'ngbé 'ti Ebhe gba omaYuda, inde li ongbengbe odimandø di ne omuFalasai atima o-o. A adu sa 'kpa osudha-a ne otolosi, ne oeke, di ne otia 'gá. <sup>4</sup> La-a, Yesu inde adu ambila ndu 'ngú inde akólo li kute e hana-a, adyudyo lie de uo. Aní atsia ayi uo me: «Yi ngagili da?» <sup>5</sup> U agie pi ani me: «Ya ngagili Yesu, kpála na Nadjaleta.» Yesu atsia apa pi uo me: «A ko ma.» Yuda, bhulu napu Yesu-o adu di bhú dabili bini ne uo. <sup>6</sup> Li Yesu apa pi uo lie me: «A ko ma-a», u agbe lio ne sidi, u atuko kuto má dhululu!

<sup>7</sup> Yesu atsia ayi matá uo me: «Yi ngagili da?» U agie me: «Ya ngagili Yesu, kpála na Nadjaleta.» <sup>8</sup> Yesu apa pi uo me: «Ma apa igini pi yi apa me, a ko ma. I du la me, yi nde ngagili ma-a, yi de 'o okpála koko-o, amba u gbida naao.» <sup>9</sup> Engú bhomu-o amene lie mo-o, ngubula me eli inde nani li Yesu apa e, amene lie, eli inde ani apa nani e me: «'Dyi ma, bhú ká okpála inde mo oha o muma-a, suka uo bini ngita ka ma de.»

<sup>10</sup> Simo Piele adu ne mbotia ludu e. Aní aluko ngise ango-o bhú 'ti e má vuu! Aní asu Malakusi, kpála na kulu gba 'ngbé dimandø gba Ebhe-o . Aní atsia akodho kpadje ani li pápá na kokpa-a má tse! <sup>11</sup> Engú bini, Yesu atsia apa pi Piele me: «Gie mbotia gba mu-o bhú titi. Mo obhundja naamu me likabhu inde li 'Dyi ma aha e muma-a, ma azú-u di?»

### *U anu ne Yesu kala Ana*

<sup>12</sup> Abhomu-o, osudha ne ngámá gba o, di ne omulila na 'ngbé 'ti Ebhe gba omaYuda inde anu naholo Yesu-o, atsia aholo ani. U agbite ani ne ekpu. <sup>13</sup> U atsia anu ngaiza ne ani gba Ana. Ana ango-o, a ko nani 'dyi wala Kaifa. Kaifa adu nani bhele kpála gba odimandø bhú kalanga bhomu-o ngae. <sup>14</sup> Abhomu-o, Kaifa atsia aha nani mabhundja pi ongámási gba omaYuda ngae me, a ndjindji mangbo me

koli kpála bini kpi ngubula ndu okpála hana.

### *Piele apa me ni ne mukpata gba Yesu ade*

*(Tsia bhú Mat. 26:69-70; ne bhú Mlk. 14:66-68; di ne bhú Luk. 22:55-57.)*

<sup>15</sup> Simo Piele, ngauo ne mukpata koko adu akpata Yesu. Bhele kpála gba odimandø-o ambila nani mukpata ango-o ndjindji. Kaka-a, mukpata ango-o ali nani ne Yesu bhú dabili bini bhú mbadhasu gba bhele kpála gba odimandø-o. <sup>16</sup> Engú bini, Piele atigala naae li 'bhø aga akilidjo. Abhomu-o, mukpata koko inde li bhele kpála gba odimandø-o ambila e ndjindji-e akoto. U agama 'ngú ne ølø inde adu alila 'bhø aga-o. Aní atsia ato Piele. <sup>17</sup> Ølø inde adu bhú kulu nalila 'bhø aga-a, apa pi Piele me: «Ngamu di-e, mu ndi ne suka omukpata gba kpála inde-e adi?» Piele agie pi ani me: «A mo-o ade, ma ne suka uo ade.» <sup>18</sup> Okpála na kulu, di ne omulila na 'ngbé 'ti Ebhe gba omaYuda-a akpo djua na makala. U ago alulu dede ngú natutu. Padhá de, anga zini adu naali. Piele ago alu di bhú dabili bini ne uo ngú natu djua-o.

### *Bhele kpála gba odimandø ayiyi Yesu*

*(Tsia bhú Mat. 26:59-66; ne bhú Mlk. 14:55-64; di ne bhú Luk. 22:66-71.)*

<sup>19</sup> Abhomu-o, bhele kpála gba odimandø-o aholo nayiyi Yesu pindji 'ngú gba omukpata gba ani, di ne pindji nasuno gba ani-o. <sup>20</sup> Yesu agie pi ani me: «Ma akpokpo 'ngú mbámbá pi ndu okpála hana. Ma adu asuno ndu 'kpí hana bhú oti nadjje líli gba Moidje , di ne bhú 'ngbé 'ti Ebhe gba omaYuda li bili li ndu omaYuda hana adu apøkøbhø bhúla o li e-o. Ma pa 'ngú bhú pepe belegu de bini. <sup>21</sup> Mu ngayi ma ka ni? Yi okpála inde adje ma-a me ma apa pi. Padhá de, anga u mbila engú inde ma apa e ndjindji.» <sup>22</sup> Li Yesu apa lie mo-o, suka okpála nalila 'ngbé 'ti Ebhe gba omaYuda-a asu pála ani má pa! Aní atsia apa pi ani me: «Abhomu-o eli inde mu ti da nagie e pi bhele kpála gba odimandø gba Ebhe-e?» <sup>23</sup> Yesu atsia apa pi ani me: «Engú

inde ma apa e, i dũ me a nde sisiti-e, yi de suno sisiti ango-o. Engú bini, i dũ la me ma nde apa ndjindji-e, mo otsia asũ la ma ngú ni?» <sup>24</sup> Abhomũ-o, Ana atsia atima Yesu pi Kaifa, bhele kpála gba odimandø-o me u nde agbigbite ani magbigbite.

*Piele apa matá me ni ne mukpata gba Yesu ade*

*(Tsia bhú Mat. 26:71-75; ne bhú Mlk. 14:69-72; di ne bhú Luk. 22:58-62.)*

<sup>25</sup> Nedhinga ango-o, Simo Piele alũ de djua-o. Ani adũ atũtũ. U atsia apa pi ani me: «Ngamũ di-e, mũ ne sũka omũkpata gba kpála inde-e adi?» Piele ayala, ani atsia apa me: «A mo-o ade, ma ne sũka uo ade.» <sup>26</sup> Sũka okpála na kulu gba bhele kpála gba odimandø gba Ebhe-e, inde adũ kpála na piga gba kpála li Piele akodho kpadje e, ayi Piele me: «A ko mũ di inde ma au nako e ne Yesu abhú 'dyi-e?» <sup>27</sup> Engú bini, Piele atsia ayala matá. Bha bini li nedhinga ango-o, engũ atsia aku 'gbá.

*U anũ ne Yesu kala Pilatø*

*(Tsia bhú Mat. 27:1-2, 11-14; ne bhú Mlk. 15:1-5; di ne bhú Luk. 23:1-5.)*

<sup>28</sup> Abhomũ-o, omaYuda ayie ne Yesu agba Kaifa, u atsia anũ ne ani agba ngámá na Loma, inde adũ atsia 'kpí li ndu doto-o. A adũ køkpi má bhø! Engú bini, omaYuda li naao abhú 'ti oo de. Padhá de, anga u adũ akũnda nadũ bubu kala Ebhe, amba o zu anokomia na Pasika-o.

<sup>29</sup> Kaka-a, Pilatø ngámá na ndu doto ango-o ago abhaka uo akilidjo. Ani atsia ayi uo me: «Yi agbe kpála inde-e kala ma me ani nde amene mangua siti 'ngú dho?» <sup>30</sup> U agie pi ani me: «Li kpála inde-e dú ne siti kpála de-e, ya de go ne ani pi mũ de.»

<sup>31</sup> Abhomũ-o, Pilatø atsia apa pi uo me: «Yi ha ani ngayi makpe, amba yi kodho 'ngú gba ani-e maka li líli gba yi-e apa lie ko.» OmaYuda agie pi ani me: «U ha kpadji pi ya ngú nabhøø kpála de.»

<sup>32</sup> Engú bhomũ-o amene lie mo-o ngú nakpata engú inde li Yesu apa nani e-o. Engú inde ani apa nani e ngú nasuno lele maka ani akpi lie ko. <sup>33</sup> Abhomũ-o, Pilatø agie matá lie abhú 'ti. Ani a'i

Yesu, ani atsia ayi ani me: «Mũ ne 'ngbé ngámá gba omaYuda?» <sup>34</sup> Yesu agie pi ani me: «Engú inde mo opa e bhomũ-o, mo obhundja bha ngamũ makpe? Ne me okpála koko apa 'ngú gba ma-a pi mũ ngao!» <sup>35</sup> Pilatø agie pi ani me: «Ngama-a, ma ne maYuda? Okpála na kuti gba mũ di ne ongbengbe odimandø gba Ebhe-e apũ mũ mũma. Mo omene la mangua 'ngú dho?»

<sup>36</sup> Yesu agie pi ani me: «Naũ gba ma-a, a ko bhende na doto inde-e de. I dú bhende na doto inde-e, okpála gba ma-a de agũ 'gú, ngũbula me u apũ ma pi omaYuda de. Engú bini, naũ gba ma-a, a ko bhende na doto inde-e de.» <sup>37</sup> Pilatø atsia apa pi ani me: «A akũnda napa me, mũ ne 'ngbé ngámá?» Yesu agie pi ani me: «Mo opa ngamũ me ma ne 'ngbé ngámá. U azu ma, ma atsia ago píla doto ngú nakpokpo 'ngú pindji kũkulu 'ngú. Kpála inde bhú kũkulu 'ngú-o ngadje engú inde ma ngapa e-o.» <sup>38</sup> Pilatø ayi ani me: «Kũkulu 'ngú-o, a ko ni?»

Pita li Pilatø apa 'ngú bhomũ-o lie, ani akoto, ani anũ matá nabhaka omaYuda akilidjo. Ani atsia apa pi uo me: «Ma u engú inde u ti da nabhøø kpála inde-e ka e belegũ de bini. <sup>39</sup> Engú bini, maka u amemene lie agba yi-e, bhú anokomia na Pasika-a, a ayo me ma tse 'kpa li bhũũ 'kpí pi yi bini. Yi akũnda me ma tse 'kpa li 'ngbé ngámá gba omaYuda-a pi yi?» <sup>40</sup> Abhomũ-o, u aholo asũsula me: «Ii-i! Ngaani de. Engú bini, tse mangbo pi ya 'kpa li Balabasi!» La-a, Balabasi nani ne 'ngbé bhũũ 'zi.

## 19

<sup>1</sup> Abhomũ-o, Pilatø atsia apa me u go ne Yesu, amba u bhĩ ani ne fimbo. <sup>2</sup> Osũdha agala ehe na eti má kilili, u ato bhú 'ndji ani! U atsia ato di bongo na zũbe zũbe li kũte ani. <sup>3</sup> U adũ ago de ani. U atsia adũ apa pi ani me: «'Ngbé ngámá gba omaYuda-a, atou!» U adũ di nabhi bhũla ani.

<sup>4</sup> Abhomũ-o, Pilatø akoto matá kilidjo. Ani atsia apa pi uo me: «Yi djedje nga!

Ma agbé ani pí yi kilidjo ei, amba yi mbila ndjindji me ma u belegu ehe bini de inde ma ti da naholo ani ngú e.» <sup>5</sup> Abhomu-o, Yesu atsia akoto kilidjo me u nde ato ehe na eti-e bhú 'ndji ani, ani nde di ne bongo na zúmbe zúmbe li kute e. Abhomu-o, Pilatø atsia apa pí uo me: «Kpála ango-o i!» <sup>6</sup> Engú bini, li ongbengbe odimandø gba Ebhe, di ne omalila na 'ngbé 'ti Ebhe au ani lie me-e, u aholo nasusula me: «Gi ani li kulusi! Gi ani li kulusi!» Pilatø apa pí uo me: «Yi nu gi ani li kulusi ngayi makpe. Padhá de, anga ngama-a, ma u belegu ehe bini de inde ma ti da naholo ani ngú e.» <sup>7</sup> OmaYuda agie pí ani me: «A ka ya ne líli. A ayo me ani kpi maka li líli ango-o apa lie-o. Padhá de, anga ani apa me ni ne ndili gba Ebhe.»

<sup>8</sup> Li Pilatø adje engú bhomu-o lie, ani adje matá tsulu naali. <sup>9</sup> Ani agie lie abhú 'ti. Ani atsia ayi Yesu me: «Mo oyie su?» Engú bini, Yesu gie 'ngú de. <sup>10</sup> Abhomu-o, Pilatø atsia apa pí ani me: «Mu kunda nagama 'ngú muma di? Mu mbila de me ma ne angu natse 'kpa li mu. Ma la di ne angu nagi mu li kulusi-e di?» <sup>11</sup> Yesu atsia apa pí ani me: «Mu ne angu pí ma belegu ade bini. I dú me Ebhe há angu pí mu de-e, mu de ti da namene 'he bini ngú ma de. Kaka-a, kpála inde apu ma pí mu-o, amene siti 'ngú naali ane mu.» <sup>12</sup> Nayie li nedhinga bhomu-o, Pilatø adu agili kpadji me ni tse 'kpa li Yesu. Engú bini, omaYuda aholo asusula me: «I du me mu nde atse 'kpa li kpála bhomu-o, amba mu kunda 'ngbé ngámá Kaisala de! Ndu kpála hana inde apa me ni ne 'ngbé ngámá-a, a ko bhulu yala gba 'ngbé ngámá Kaisala!»

<sup>13</sup> Li Pilatø adje eli bhomu-o lie, ani agbe Yesu kilidjo. Pilatø atsia adu pí dabili nakodho 'ngú-o, li bili inde u a'i e me «U apa oteme kuto» (inde u a'i e bhú eli na ebele me «Gabata»). <sup>14</sup> A adu nani masakpe de tulukpe, kala ekpi na Pasika. Pilatø apa pí omaYuda me: «'Ngbé ngámá gba yi-e i!» <sup>15</sup> Engú bini, u aholo nasusula me: «Bhøø ani! Bhøø ani! Gi ani li kulusi!» Pilatø apa pí uo me:

«A ayo me ma gi 'ngbé ngámá gba yi-e li kulusi?» Ongbengbe odimandø gba Ebhe-agie pí ani me: «'Ngbé ngámá koko ka ya ade. A ko bha bini 'ngbé ngámá Kaisala.» <sup>16</sup> Abhomu-o, Pilatø atsia atse 'kpa li Yesu ngubula me u gi ani li kulusi.

### *U agi Yesu li kulusi*

*(Tsia bhú Mat. 27:32-44; ne bhú Mlk. 15:21-32; di ne bhú Luk. 23:26-43.)*

U aha Yesu, u atsia atapa ne ani. <sup>17</sup> Yesu abi kulusi gba e ngae makpe. Ani atsia akoto nayie bhú gudhu akolo li bili na «Pelege 'ndji» (u a'i e bhú eli na ebele me «Gologota»). <sup>18</sup> A bhomu-o bili inde li osudha agi Yesu li e li kulusi-o. U atsia agi di okpála koko bhisi li kulusi. Yesu adu tutu, koko li kulusi gba e li pá 'kpa ani na kokpa, koko li kulusi gba e li pá 'kpa ani na gali. <sup>19</sup> Pilatø atsia aha di líli me, u ye balua, amba u bhi li kulusi gba Yesu-o. Balua ango-o adu me: «YESU, KPÁLA NA NADJALETA, 'NGBÉ NGÁMÁ GBA OMA YUDA.»

<sup>20</sup> Abhomu-o, omaYuda bhelé atanga balua ango-o. Padhá de, anga bili inde u agi nani Yesu li kulusi li e, a adu de gudhu masakpe. La di-e, balua ango-o adu bhú eli na ebele, a adu bhú eli na latino, a atsia adu di bhú eli na giliki. <sup>21</sup> Abhomu-o, ongbengbe odimandø gba omaYuda atsia apa pí Pilatø me: «Mo oyé de me, <'ngbé ngámá gba omaYuda-a> de. Engú bini, ye mangbo me, <Kpála bhomu-o apa me, ma ne 'ngbé ngámá gba omaYuda.>» <sup>22</sup> Pilatø agie pí uo me: «Bhende ma aye e, adjí lie de.»

<sup>23</sup> Li osudha agi Yesu li kulusi lie, u abha obongo gba ani-o. U agbo bhusu bhusu badha. Sudha bini ne bini aha naae bini. U atsia aha di bongo gba ani inde u du e madu de-o. Pápála adu bha bini nayie abhú lá akolo akuto. <sup>24</sup> Osudha-a apa sunda o me: «Ní asidha bongo inde-e de. Engú bini, ní gu mangbo gbanda tété, amba ní mbila me a adu na da.» U amene mo-o ngubula me eli inde u aye e bhú Bhuku-o, amene lie, eli inde me: «U agbogbo bhusu o li obongo gba ma-o. U atsia agu gbanda li bongo gba ma ko.†»

† 19:24 19:24 Tsia bhú Ets. 22:19.

A bhomu-o engu inde li osudha amene e-o.

<sup>25</sup> Malia , 'hi Yesu, ne ndai e na oelø, ne Malia , wala Kolopasi, di ne Malia , kpála na kuti na Magadala, alulu de kulusi gba Yesu-o. <sup>26</sup> Yesu au 'hi e ne mukpata inde li ani adu akunda e naali-o. Mukpata angoo adu me ani nde alu de 'hi ani oo. Ani atsia apa pi 'hi e me: «Olo-e,\* tsia ndili gba mu-o i.» <sup>27</sup> Pipita-a, ani atsia apa pi mukpata-a me: «Tsia 'hi mu i.» Nayie li nedhinga bhomu-o, mukpata-a atsia aha 'hi Yesu agba e.

### *Yesu akpi*

*(Tsia bhú Mat. 27:45-56; ne bhú Mlk. 15:33-41; di ne bhú Luk. 23:44-49.)*

<sup>28</sup> Pita ongu bhomu-o, Yesu ambila me, mbia inde-e, ndu 'ngu hana andjia. Abhomu-o, ngubula me 'li Bhuku-o amene lie akolo ali soso-o, ani atsia apa me: «A li ma ne gumu 'ngu.» <sup>29</sup> Lusa bini adu oo. A adu bhúbhú ne kpongadha pandi bedhe. Osudha aha epondje, u ato bhú kpongadha pandi-o. U agbite li ndula inde u a'i e me idjope.† U atsia adyudyo de 'bhø Yesu masakpe. <sup>30</sup> Li Yesu andji kpongadha pandi-e lie, ani atsia apa me: «Ndu 'ngu hana andjia!» Abhomu-o, ani atsu 'ndji e ne kuto, ani atsia andala 'kpa li bua e.

### *Sudha bini adu pá kala Yesu ne mandambi*

<sup>31</sup> A adu nani ekpi inde u adu aleke lio lie ngu ekpi naguo-o . Ongamási gba omaYuda du akunda de me okuo okpála du li okulusi li 'kpi naguo-o de. Padhá de, anga ekpi naguo angoo, adu ngbéngbé ane okoko mane. Kaka-a, u atsia ayo ka Pilatø me u gugumu 'dhu okpála inde u agi o li okulusi-o, amba u 'e okuo uo tété ma'e. <sup>32</sup> Abhomu-o, osudha ago de okpála inde u agi o li okulusi bhú dabili bini ne Yesu-o. U agugumu 'dhu kpála bhe na kalanu-o. Pipita-a, u agugumu 'dhu

kpála bhe koko-o. <sup>33</sup> U akolo lie li Yesu-o, u abhaka me ani nde akpi. Kaka-a, u gugumu 'dhu ani de.

<sup>34</sup> Engu bini, sudha bini adu pá kala ani ne mandambi má puu! Kolo me-e, ngute di ne engu aze bhú eka angoo.

<sup>35</sup> Kpála inde ngakpokpo ongu inde-e, au ongu angoo ne djila e. La di-e, ongu inde ani ngakpokpo e, a ko kukulu 'ngu. Ngaani-e, ani mbila ndjindji me ni ngakpo e kukulu 'ngu. Ani ngakpokpo ngubula me ngayi di-e, yi bhuka. <sup>36</sup> Ongu bhomu-o akolo ngubula me engu inde u aye e bhú Bhuku-o, amene lie, engu inde u aye e me: «U gumu suka biki ani belegu de bini.†» <sup>37</sup> La di-e, u aye bhú Bhuku li bili koko me: «U atsia kpála inde u adu e-o.†»

### *U azi Yesu*

*(Tsia bhú Mat. 27:57-61; ne bhú Mlk. 15:42-47; di ne bhú Luk. 23:50-56.)*

<sup>38</sup> Pita ongu akodho 'kpi-e, Djodjefu , kpála na gudhu na Alimatayo, ayo ka Pilatø me ani ha kpadji pi ni ngu na'e kuo Yesu. (Djodjefu nani ne suka omukpata gba Yesu-o. Engu bini, ani du asuno lie mbámá de, anga ani adu akpe ongamási gba omaYuda-o.) Pilatø aziba pi ani. Abhomu-o, Djodjefu anu, ani atsia a'e kuo Yesu. <sup>39</sup> Nikodemu, inde anu nani nabhaka Yesu 'kpi bini sukpe-e, ago di. Ani ago ne mungotsi inde u amene e li mila bhú dabili bini ne aloesi.‡ Mungotsi angoo, adu masakpe de kilo ndjikpa bata. <sup>40</sup> Abhomu-o, ndu uo bhisi hana aha kuo Yesu. U agagala ne opapala bongo na lene me u nde atuko mungotsi tété, maka li omaYuda adu amemene lie bhú nedhinga nazi kuo-o. <sup>41</sup> Li bili nani u agi Yesu li e li kulusi-e, edyi bini adu oo. Bhú 'dyi angoo, edú bini na mbia adu oo. Edú angoo, u zi nga nani kpála bini bhúbhú de. <sup>42</sup> U atsia ato Yesu bhúbhú. Padhá de, anga u adu agbene lio ka li ekpi naguo

\* **19:26** 19:26 Li kulusi-e, Yesu agama 'ngu pi 'hi e maka Ebhe. Kaka-a, ani a'i ani me: «Olo-e.» † **19:29** 19:29 Idjope: A ko suka ondula na gba omaYuda. Epondje nani u ato e bhú kpongadha pandi inde u aha nani e pi Yesu me ani ndji-e, nedhinga ani adu lie li kulusi-e, u agbite nani li Idjope. † **19:36** 19:36 Tsia bhú Ekí. 12:46; ne bhú Nom. 9:12; di ne bhú Ets. 34:21. † **19:37** 19:37 Tsia bhú Djkl. 12:10. ‡ **19:39** 19:39 Aloesi: A ko mungotsi inde li se e nde má wese. A ko la di elá, u memene li ndende ndula.



gba omaYuda adu lie masikpe-o. La di-e, edú angó-o adu oo masikpe.

## 20

*Yesu azuku*

*(Tsia bhú Mat. 28:1-8; ne bhú Mlk. 16:1-8; di ne bhú Luk. 24:1-12.)*

<sup>1</sup> Abhomu-o, bhú 'kpí yinga kòkpí má bhó-o, Malia , kpála na gúdhú na Magadala, anu abhú lata. A adu me ekpí nde nga bha ne biti. Aní au me teme inde adu li 'bhé lata-a nde ayie li bhèbhè ayie.

<sup>2</sup> Abhomu-o, aní anu ne holo, aní anu abhaka Simo Piele, di ne mukpata koko inde li Yesu adu akúnda e naali-o. Aní atsia apa pí uo me: «U agbe kuo Ngámá bhú lata-a agbe. La-a, ya mbila de me u a'o aní su-oie de.»

<sup>3</sup> Abhomu-o, Piele ne uo ne mukpata koko-o aholo 'nú, u atsia agbida abhú lata. <sup>4</sup> Ndu uo bhisi hana agu holo. Engú bini, mukpata bhe koko agu naae holo kpekpeke ane Piele mane. Kaka-a, aní atsia akolo abhú lata kalanu. <sup>5</sup> Aní akita ne kuto ngú natsia 'kpí bhúbhú. Aní au opapala bongo na lene me a nde a'o lie oo. La-a, aní li de. <sup>6</sup> Abhomu-o, Simo Piele inde adu akpata aní sidi-e, akolo di. Aní atsia alí abhú lata. Aní au opapala bongo na lene me a nde a'o lie oo, <sup>7</sup> la di ne bongo bhende adu me a nde abuku bhúla Yesu-o. Bongo angó-o du bhú dabili bini ne opapala bongo na lene de. Engú bini, a adu me a nde agagala naae lie kpi li bili koko. <sup>8</sup> Abhomu-o, mukpata koko inde akolo abhú lata kalanu-o, atsia alí di. Aní au, aní atsia abhuka. <sup>9</sup> Padhá de, anga nakolo li nedhinga bhomu-o, omukpata mbila nga nani ndjindji de, engú inde u aye e bhú Bhuku gba Ebhe-e me Masiya azúku bhú ká okpála inde amu-o mazuku. <sup>10</sup> Pita 'ngú bhomu-o, omukpata bhisi-e atsia agie lío agba o.

*Yesu akoto li Malia, kpála na kuti na Magadala*

*(Tsia bhú Mat. 28:9-10; di ne bhú Mlk. 16:9-11.)*

<sup>11</sup> Malia adu me aní nde alu akilidjo de lata-o. Aní adu naku 'gbá. Nedhinga inde aní adu nga bha lie naku 'gbá-a, aní

akita ne kuto ngúbula natsia 'kpí abhú lata. <sup>12</sup> Aní au oandjelu bhisi. U adyidyí obubu bongo. U adulu li bili inde u a'o nako kuo Yesu li e ko. Bini adu li pápá na 'ndji aní, koko atsia adu li pápá na 'dhu aní. <sup>13</sup> Oandjelu-o ayi Malia me: «Èlè-e, mu ngaku 'gba ngú ni?» Aní agie pí uo me: «U a'e kuo Ngámá gba ma-a a'e. Ma mbila de me u a'o su-oie de.»

<sup>14</sup> Pita aní apa 'ngú bhomu-o lie, aní adji lie, aní atsia au Yesu me aní nde alu oo. Engú bini, aní du ambila de me a ko Yesu-o de. <sup>15</sup> Yesu ayi aní me: «Èlè-e, mu ngaku 'gbá ngú ni? Mu ngagili da?» Malia abhundja me a ko kpála inde ngamene kulu bhú 'dyi-o. Kaka-a, aní apa pí aní me: «'Dyi ma, i du me mu nde a'e kuo Ngámá gba ma-a ngamu-o, suno bili mo o'o li e mu ma, amba ma nu ha.»

<sup>16</sup> Yesu apa pí aní me: «Malia!» Malia adji lie, aní atsia apa pí aní bhú eli na ebele me: «Laboni!» (A akúnda napa me «Musuno.») <sup>17</sup> Yesu apa pí aní me: «Mo obú 'kpa mu li ma de. Padhá de, anga ma nu nga agba 'Dyi ma abhúlá de. Engú bini, nu bhaka ondaise ma, amba mu pa pí uo me: «Ma adji abhúlá agba 'Dyi ma. A ko la di 'Dyi yi. Ma adji abhúlá agba Ebhe gba ma-o. A ko la di Ebhe gba yi-o.» <sup>18</sup> Abhomu-o, Malia, kpála na kuti na Magadala, atsia anu akpokpo pí omukpata me: «Ma au Ngámá au!» Aní atsia akpokpo 'ngú inde li Yesu apa e pí aní-e, pí uo.

*Yesu akoto li omukpata gba e-o*

*(Tsia bhú Mat. 28:16-20; ne bhú Mlk. 16:14-18; di ne bhú Luk. 24:36-49.)*

<sup>19</sup> Bha bhú 'kpí yinga bhomu-o tagolo-o, omukpata-a apo bhúla o bhú 'ti bini. U atsia adhodho obhe bhoti nganda o madhodho. Padhá de, anga u adu akpe ongámási gba omaYuda-o . Yesu ago alu tu uo. Aní atsia apa pí uo me: «Guo 'ngú du bhú dabili bini ne yi!» <sup>20</sup> Pita aní apa 'ngú bhomu-o lie, aní asuno 'kpa e, di ne pála kala e pí uo. Li omukpata au Ngámá lie, u abedhe ne djali bedhe. <sup>21</sup> Yesu atsia apa matá pí uo me: «Guo 'ngú du bhú dabili bini ne yi! Maka li 'Dyi ma atima

ma lie, ngama di-e, ma atima yi.» <sup>22</sup> Pita ani apa lie mo-o, ani a'ulu wo e pí uo, ani atsia apa pí uo me: «Yi sia Bu Bhobua ! <sup>23</sup> Okpála bhende yi ambú li siti 'ngú gba o-o, li Ebhe mbú di li siti 'ngú gba uo-o. Okpála bhende yi mbú li siti 'ngú gba o de-e, Ebhe mbú di tété de.»

*Yesu akoto li omukpata gba e pita Tuma*

<sup>24</sup> Nedhinga li Yesu akoto li omukpata gba e lie abhú 'ti-e, saka omukpata ndjikpa ne ká bhisi-e Tuma (inde u a'i di-e me Bhuko-o) da bhú dabili bini ne uo de. <sup>25</sup> Abhomu-o, omukpata koko atsia apa pí ani me: «Ya au Ngámá.» Engú bini, ani atsia agie pí uo me: «Ma akunda nau oeka na osete inde li okpa ani-o. Ma akunda na'o likpa ma li pokoli na osete ango-o. Ma akunda la di na'o 'kpa ma li pála kala ani. I da mo-o de-e, ma bhúka de.» <sup>26</sup> Pita 'kpí madjina, omukpata gba Yesu apo matá bhúla o abhú 'ti. Tuma adu bhú dabili bini ne uo. Obhe bhoti-e adu me a nde adhodho lie madhodho. Engú bini, Yesu ago, ani ala tu uo. Ani atsia apa pí uo me: «Guo 'ngú da bhú dabili bini ne yi!» <sup>27</sup> Pipita-a, ani apa pí Tuma me: «'O likpa mu si, amba mu tsia 'kpa ma. Go ne 'kpa mu, amba mu 'o li pála kala ma. Mo odú ne bua na bhisi bhisi de. Du mangbo ne nabhuka .» <sup>28</sup> Tuma agie pí ani me: «Ngámá gba ma, di ne Ebhe gba ma!» <sup>29</sup> Yesu apa pí ani me: «Mo obhuka ka mo ou ma lie? A ko djali pí okpála inde ngabhuka me u nde u ne djila o de ko.»

*A inde-e ta bhuku inde*

<sup>30</sup> Yesu amene matá ongamba 'ngú koko bhelé li djila omukpata gba e-o. La-a, u ye bhú bhuku inde-e de. <sup>31</sup> Engú bini, ongú inde aye lie bhúbhú-o, a ko ngubula me yi bhuka me Yesu ne Masiya, Ndili gba Ebhe, amba i da la me yi nde abhuka ani-e, yi de sia mukobho ka 'li ani.

## 21

*Yesu akoto li omukpata gba e lingo ekpe na Tibeliade*

<sup>1</sup> Ekpí koko pipita-a, Yesu akoto matá li omukpata gba e lingo ekpe na Tibeliade.

Lele maka ani akoto li uo lie, ngae inde: <sup>2</sup> a adu nani Simo Piele, ne Tuma, (inde u a'i e me Bhuko), ne Natanaele, (kpála na kuti na Kana, bhú ndu doto na Galilaya), ne ongisi gba Djebedayo, di ne omukpata koko bhisi gba Yesu-o. U adu bhú dabili bini. <sup>3</sup> Simo Piele apa pí uo me: «Ma adji nagbe sungu.» U agie pí ani me: «Ngaya di-e, ní anú ne yi bhú dabili bini.» Abhomu-o, u anu, u atsia a'u'u bhú zabu. Engú bini, sukpe bhomu-o, u gbe sungu belega de bini.

<sup>4</sup> Li ekpí aholo naseke lie, Yesu ala lingo 'ngu oo. Engú bini, omukpata-a da ambila de me a ko ani-e de. <sup>5</sup> Abhomu-o, Yesu atsia apa pí uo me: «Odi ma, yi aholo mbo sungu uu?» U agie pí ani me: «Ya holo de.» <sup>6</sup> Ani apa pí uo me: «Yi bhike nado lingo zabu-o ne li pápá na kokpa, amba yi holo sungu.» Abhomu-o, u atsia abhike nado-o bhú 'ngu. U ale nagbele nado ango-o bhú 'ngu pima. Padhá de, anga osungu adu bhúbhú bhibhiti naali. <sup>7</sup> Abhomu-o, mukpata inde li Yesu adu akunda e naali-e apa pí Piele me: «A ko Ngámá!»

Li Simo Piele adje lie me a ko Ngámá-a, ani adyi bongo . Padhá de, anga abhaka me ani nde agbe bongo-o magbe ngú nagbe sungu-o. Ani atsia agu 'i e bhú 'ngu. <sup>8</sup> Omukpata koko agie lio ne zabu-o me u nde ngagbele nado-o. Nado ango-o adu me a nde abedhe ne osungu bedhe. U da nani dengo 'ge-o tsutsu de. U adu masikpe de metele kámá bini.

<sup>9</sup> Nedhinga u aze lie apí 'ge-o, u au djua ne sungu pépé, di ne mapa. <sup>10</sup> Yesu apa pí uo me: «Yi go ne té osungu inde yi aholo e-o.» <sup>11</sup> Abhomu-o, Simo Piele a'u matá bhú zabu-o. Ani agbele nado apigo. Nado ango-o adu me a nde abedhe ne ongbengbe osungu kámá bini ndjikpa bhuluvue ne ká bata. Abana li osungu adu lie bhúbhú bhelé-e, nado ango-o tsotsolo de. <sup>12</sup> Yesu apa pí uo me: «Yi go zu 'he.» Kpála bini bhú ká omukpata-a le nayi ani de me: «Mu ne da?» Padhá de, anga u adu ambila hana me, a ko Ngámá. <sup>13</sup> Abhomu-o, Yesu adyudyo lie masikpe. Ani aha mapa, ani atsia agapa li uo. Ani

atsia aha di sungu-o pì uo. <sup>14</sup> A adu nani bhomu-o bhutsibhutsi na bata me Yesu koto li omukpata gba e, pita ani azuku lie bhú ká okpála bhende amu ko.

*Yesu ayi Piele bhutsibhutsi bata me ani kunda ni uu ie*

<sup>15</sup> Pita u azu 'he-e lie, Yesu ayi Simo Piele me: «Simo, ndili gba Djaa , mu kunda ma nane maka li okpála koko inde-e akunda ma lie mane?» Piele agie pì ani me: «Henì, Ngámá, mu mbila hana me ma kunda mu.» Yesu apa pì ani me: «Ku ongisi kandole gba ma-o.» <sup>16</sup> Yesu ayi matá ani bhutsibhutsi na bhisi-e me: «Simo, ndili gba Djaa, mu kunda ma uu?» Piele agie pì ani me: «Henì, Ngámá, mu mbila hana me ma kunda mu.» Yesu apa pì ani me: «Lila okandole gba ma-o.» <sup>17</sup> Yesu ayi matá ani bhutsibhutsi na bata-a me: «Simo, ndili gba Djaa, mu kunda ma uu?» Piele asia likabhu li bua e. Padhá de, anga Yesu ayi ani bhutsibhutsi na bata me: «Mu kunda ma uu?» Ani atsia apa pì Yesu me: «Ngámá, mu mbila ndu 'ngú hana. Mu mbila bhadi hana me ma kunda mu!» Yesu apa pì ani me: «Ku okandole gba ma-o.

<sup>18</sup> A moko, ma apa pì mu na paká me, nedhinga nani mo odu lie makombi-e, mo odu agbite ekpu gba mu-o ludu mu ngamu makpe. Mo odu la di anu li bili inde mo odu akunda nanu li e-o. Engú bini, nedhinga mo okólo lie 'gbé kpála-a, mo o'é'e 'kpa mu abhúla, li kpála koko tsia gbite 'kpú gba mu-o ludu mu ngae. Ani tsia nú di ne mu li bili inde mu kunda nanu li e de.» <sup>19</sup> Yesu adu apa mo-o ngubula nasuno lele maka li Piele akpí lie, ani tsia há la di sanga pì Ebhe ko. Pipita-a, Yesu apa pì ani me: «Kpata ma!»

*Piele ayi 'ngú pindji mukpata inde li Yesu adu akunda e naali-o*

<sup>20</sup> Li Piele adji lie lie, ani au mukpata li Yesu adu akunda e-o, (kpála inde aseke nani 'ndji e pí mbulu Yesu, nedhinga inde u adu azu 'he lie-o, inde atsia ayi di nani Yesu me: «Ngámá, kpála bhende apu mu-o, a ko da?») <sup>21</sup> Abhomu-o, Piele au mukpata ang-o, ani atsia ayi Yesu me:

«Ngámá, a la ani-e, a akólo li ani ne mangua 'ngú dho?»

<sup>22</sup> Yesu agie pì ani me: «I du me ma nde akunda me ani du, akolo li nedhinga inde ma agó matá lie, a ko naamu 'ngú? Ngamu-o, kpata ma!» <sup>23</sup> Abhomu-o, ngali atsia ayangba bhú ká omabhuka me, mukpata ang-o kpí naae de. La-a, Yesu pa nani pì Piele de me: «Ani kpí de-e de.» Engú bini, ani apa nani mangbo me: «I du me ma nde akunda me ani du akólo li nedhinga inde ma agó matá lie, a ko naamu 'ngú?» <sup>24</sup> Mukpata ang-o ngakpokpo ongu inde-e ngae makpe. Ani aye la di bhú bhuku ngae. Ya mbila la di ndjindji me engú inde ani ngakpokpo e, a ko kukulu 'ngú. <sup>25</sup> Yesu amene di nani ongu koko bhelé. I dú me u yé ongu ang-o bini ne bini hana-a, ma abhundja me doto libhomu de tí ne obhuku inde i de yé lie de.

## Kulu gba obhulũ Titima gba Yesu Eli na kalanũ

Kulu gba obhulũ Titima gba Yesu ne bhuku na bhisi inde li Luka aye e-o.

Engũ na ngbéngbé inde bhũ bhuku inde-e, a ko nakpokpo lele maka li omũkpata gba Yesu na kalanũ adũ adhũkũ bhũ angu gba Bu Bhobua, u atsia adũ akpokpo Bádha Ngali pindji Yesu inde adũ ayangba abhũ: «Yelusalema, ne bhũ Yudaya, ne abhũ Samalia nakolo makolo abhũ dje doto» (1:8). A ko Ngali gba Kilisito inde akpo lita e agba omaYuda atsia akolo nabhuka pi ndũ okpála na pĩla doto hana.

Engũ na ngbéngbé inde bhũ bhuku gba obhulũ titima-a, a ko kulu gba Bu Bhobua inde ago ne angu pí omabhuka abhũ Yelusalema li 'kpĩ na Patekote. Bu Bhobua ang-o, la di ngateteke ne naha angu pi Piga gba Ebhe ne okpála inde ngadjedjele, nakpata lele ongũ inde u aye e bhũ bhuku ang-o. Engũ na kalanũ inde atsia omakilisito akpokpo lie bhelé bhũ eli gba Ebhe inde u adũ aha e pi okpála-o. A la di ongũ inde u aye e bhũ bhuku gba obhulũ titima gba Yesu ngasuno angu na ongũ ang-o bhũ mũkobho gba omabhuka, la di bhũ makpõtse inde bhũ Piga gba Ebhe-o.

### **Ongbengbe ongũ inde bhũ bhuku inde-e ngae inde:**

Naleke lio ngũ nakpokpo 'ngũ pindji 'ngũ mo ue ne bhe mo adje e 1:1-26

(1) Lili na soso ne engũ inde li Yesu apa me ni amene e 1:1-14

(2) Kpála inde aha da Yuda-o 1:15-26

Okpála inde akpokpo 'ngũ pindji 'ngũ inde u au e ne bhe u adje e abhũ Yelusalema 2:1 - 8:3

Okpála inde akpokpo 'ngũ pindji 'ngũ inde u au e ne bhe u adje e abhũ Yudaya ne abhũ Samalia 8:4 - 12:25

Kulu gba Polo 13:1 - 28:31

(1) Dholo gba Polo na kalanũ ngũbula nakpokpo Bádha Ngali 13:1 - 14:28

(2) Bula abhũ Yelusalema 15:1-35

(3) Dholo gba Polo na bhisi ngũbula nakpokpo Bádha Ngali 15:36 - 18:22

(4) Dholo gba Polo na bata ngũbula nakpokpo Bádha Ngali 18:23 - 21:16

(5) Polo bhũ tikpũ abhũ Yelusalema, ne bhũ Sedjale a la di-e bhũ Loma 21:17 - 28:31

### *Yesu apa me: «Yi asia Bu Bhobua»*

<sup>1</sup> Ndai ma na mũkũnda Tiofile,

Bhũ bhuku gba ma na kalanũ-o,\* ma akpokpo ndũ 'ngũ hana inde li Yesu amene e di ne bhende ani asuno e ko. Ma akpokpo nayie li lilita<sup>†</sup> <sup>2</sup> akolo li 'kpĩ li Ebhe aha ani lie abhũlá ko. Kala nanũ ka ani abhũlá-a, bhũ angu gba Bu Bhobua-a, ani aha olili gba e pi okpála inde ani alo nani o maka obhulũ titima-o. <sup>3</sup> Pita nakpi ka ani-e, ani apana lie pi obhulũ titima gba e-o. Ani asuno pi uo li okpadji bhelé me ni bhũ mũkobho. Ani asuno lie pi uo ngũbula 'kpĩ ndjikpa badha. Ani atsia akpokpo di 'ngũ pi uo pindji Nau gba Ebhe. <sup>4</sup> Ekpĩ bini, li ani adũ azũ 'he lie bhũ dabili bini ne uo-o, ani atsia aha lili inde-e pi uo me: «Yi ayie bhũ Yelusalema de, engũ bini, yi djeke ehe inde li 'Dyi ma apa me ni ahá e pi yi ko. A ko ehe inde ma apa 'ngũ pi yi pindji e ko. <sup>5</sup> Padhá de, anga Djaa abatisa nani okpála ne engu. Engũ bini ngayi-e, pita 'kpĩ masudha-a, yi asia batisimo na Bu Bhobua.»

### *Ebhe aha Yesu abhũlá*

<sup>6</sup> Li obhulũ titima adũ apo bhũla o lie de Yesu-o, ekpĩ koko-o, u atsia ayi ani me: «Ngámá, mo ogbégbé omafosalaele bhũ bali, mũ tsia há ngámá pi uo mbia inde-e?» <sup>7</sup> Yesu atsia agie pi uo me: «A ko engũ ka yi de ngũ nambila nedhinga di

\* 1:1 1:1 Bhuku na kalanũ: A akũnda napa me Bádha Ngali gba Yesu Kilisito maka li Luka aye lie ko. Kulu gba obhulũ titima gba Yesu ne bhuku na bhisi gba ani-o. † 1:1 1:1 Lilita: A akũnda napa me a ko nayie li lita kulu gba Yesu Kilisito li 'kpĩ ani asia batisimo lie ko.

ne oekpí ang-o. Padhá de, anga Ebhe ne angu gba e makpe, a'o oekpí ang-o maka aní akúnda lie ko. <sup>8</sup> Engú bini, yi asía angu, li nedhinga li Bu Bhobua aké pí yi lie-o. Yi tsia kpókpo 'ngú gba ma inde yi au e ne bhe yi adje di e bhú gúdhú na Yelusalema, bhú ndu doto na Yudaya libhomu, ne bhende na Samalia, akólo makolo ali dje doto.»

<sup>9</sup> Li Yesu andjia nakpokpo 'ngú bhomú-o lie, Ebhe atsia aha aní abhúlá me ndu uo hana nde ngatsia aní. Abhomú-o, ndindi atsia abuku aní. U u matá aní de, <sup>10</sup> Nedhinga u adu nga bha lie atsia 'kpí abhúlá-a, li pápá li Yesu atapa lie, kolo me-e, okpála bhisi aze li uo. U adyidyí bubu bongo. <sup>11</sup> U atsia apa pí uo me: «Ngayi okpála na Galilaya, yi alulú si ne natsia 'kpí abhúlá ka ní? Yesu inde li Ebhe aha e abhúlá bhomú-o, aní agié bhadi lie maka yi au aní lie anu abhúlá ko.»

### *Libi obhulú titima gba Yesu*

<sup>12</sup> Abhomú-o, obhulú titima-a ayie pí eta u a'i e me eta na ondula na Olive, u atsia agie lío bhú gúdhú na Yelusalema. Eta ang-o adu de Yelusalema masikpe de kilometele bini.† <sup>13</sup> U akolo lie bhú Yelusalema-a, u a'ú bhú tina 'ti bhe abhúlá, bili inde u adu adulú lie-o. A adu nani: Piele ne Djaa, ne Djaki di ne Andili, ne Filipo di ne Tuma, ne Batelemi di ne Matié, ne Djaki ndili gba Alafayo, ne Simo kpála nakúnda doto gba o, la di ne Djude ndili gba Djaki. <sup>14</sup> Ndu uo hana, adu apo bhúla o ne bua bini, ndu nedhinga hana ngú nayo Ebhe. U adu bhú dabili bini ne olisi koko, ne Malia 'hi Yesu, di ne ondaise Yesu.

### *U agbe kpála bhú dá Yuda*

<sup>15</sup> Bhú oekpí bhomú-o, ekpí bini, omabhuka apo bhúla o. U adu masikpe de kámá ne ndjikpa bhisi. Abhomú-o, Piele ayie bhúlá bhú ká uo. Aní atsia apa pí uo me: <sup>16</sup> «Ondaise ma, engú inde u aye e bhú Bhuku gba Ebhe-e, a ayo me amene

lie. Bu Bhobua apa 'ngú ang-o bhú 'li Davidi pindji Yuda, kpála inde ago nani ne okpála inde aholo Yesu-o. <sup>17</sup> Yuda nako ne suka ní. Ngámá abhú aní ngú namene kulu maka ní adu di ne di lie-o.»

<sup>18</sup> (Aní akala edyi ne tia inde u aha e pí aní li aní abhòlò kpála lie-o. Bhú edyi ang-o, aní ati adji 'ndji e ne kuto. 'Bu aní aupa. 'Ndja aní atsia aze kuto. <sup>19</sup> Ndu okpála hana na Yelusalema ambila 'ngú ang-o ndjindji. Kaka-a, u a'o nani 'ili li edyi ang-o bhú eli na gba o me «Akeledama», a akúnda napa me «edyi na Ngute».)

<sup>20</sup> Pipita-a, Piele apa matá me: «Padhá de, anga u aye bhú bhuku na oEtsi gba omaYuda-a me:

<A ayo me kuti gba ani-e kolo mili bili, kpála bini adú bhúbhú de.>

U atsia aye matá me:

<A ayo me kpála koko ha kulu gba ani-o.†>

<sup>21-22</sup> Kaka-a, a ayo me kpála bini li bhú ká ní, amba aní du akpokpo ngali nazuku gba Ngámá Yesu-o. A ayo me kpála ang-o du suka okpála inde adhuku bhú dabili bini ne ní ndu nedhinga hana li Ngámá Yesu adhuku lie ne ní píla doto ko. Kpála ang-o du kpála inde adhuku bhú dabili bini ne ní nayie li nedhinga li Djaa abatisa Yesu lie,§ akolo li ekpí li Ebhe aha aní lie ngú nanu abhúlá-o.»

<sup>23</sup> Abhomú-o, u atsia agbe okpála bhisi. A adu 'li bhe bini-e me Djodjefu, inde u a'i e me Balasabasi. 'Ili koko gba ani-e matá me Djusitisi. A adu 'li bhe koko me Matiasi. <sup>24</sup> U atsia ayo Ebhe me: «Ngámá, mu mbila bua ndu okpála hana. Pana kpála inde mo obhu e bhú ká okpála bhisi inde-e pí ya. <sup>25</sup> Aní adú bhulú titima gba Yesu. Aní ahá kulu inde li Yuda a'o ká e ngú nanu li bili gba e makpe ko.» <sup>26</sup> Pita u ayo Ebhe lie, u agu gbanda.\* Gbanda asuno Matiasi. Abhomú-o, u atsia ato aní bhú ká obhulú titima ndjikpa ne ká bini-o.

‡ **1:12** 1:12 Masikpe de kilometele bini: U aye bhú obhuku koko me «maka enú na ekpí naguo gba omaYuda.»

† **1:20** 1:20 Tsia bhú Ets. 69:26, 109:8. § **1:21-22** 1:21-22 Nayie li nedhinga li Djaa abatisa Yesu lie: U aye bhú obhuku koko me «nayie li nedhinga inde li Djaa adu abatisa okpála lie-o.» \* **1:26** 1:26 U agu gbanda: U du nani agu gbanda ang-o pí Ebhe, ngú nambila engú inde aní akúnda e-o.

## 2

*Bu Bhobua akẹ pí omabhuka*

<sup>1</sup> Li ekpí na Patekote akolo lie, ndu omabhuka hana apo bhúla o li bili bini. <sup>2</sup> Má gala kolo me-e, tolo ayie abhúla maka anvi na kpekpeke. Tolo ango-o aha bili bhú 'ti inde u adu bhú e hana. <sup>3</sup> Abhomu-o, u au oehe maka dingidhi djua. Oehe ango-o agbogbo bhusu e, atsia adulu pí 'ndji ndu uo hana bini ne bini. <sup>4</sup> Ndu uo hana abedhe ne Bu Bhobua . U atsia aholo agama 'ngú bhú oeli koko, maka li Bu Bhobua adu ahaha pí uo lie ngú nagagama ko.

<sup>5</sup> Bhú gudhu na Yelusalema-a, omaYuda inde ayie bhú ndu okuti hana\* píla doto libhomu adu oo. A adu okpála inde adu akpe Ebhe. <sup>6</sup> Li u adje tolo ango-o lie, bhiti okpála ango-o ago apo bhúla o. U atsia adu angamba naali. Padhá de, anga kpála ne kpála adu adje omabhuka agama 'ngú bhú eli gba e makpe. <sup>7</sup> U abedhe ne nangamba, di ne nakiaka. U atsia adu apa me: «Okpála i ngagama 'ngú inde-e, ndu uo hana ne okpála na ndu doto na Galilaya adi? <sup>8</sup> Lele pí ndu ní hana bini ne bini, ní ngadje uo lie ngagama 'ngú bhú eli gba ní makpe na kuti-e?»

<sup>9-10</sup> Bhú ká ní si-e, okpála koko ayie bhú doto na Palate. Okoko ayie bhú Media. Okoko ayie bhú Elama. Okoko ayie bhú Edjipeto. Okoko ne okpála na Medjopotami. Okoko ayie bhú ndu doto na Yudaya. Okoko ayie bhú Kapadose. Okoko ayie bhú Pote di ne Adjia. Okoko ayie bhú Filidjia. Okoko ayie bhú Pamifilia. Okoko ayie lingo gudhu na Silene inde bhú doto na Libi ko. Okoko ayie bhú gudhu na Loma . <sup>11</sup> Okoko ayie bhú kpemə na Kelete. Okoko ayie bhú doto na Alabi. U azu okoko omaYuda. Okoko-o, a ko ogandji okpála inde abhuka Ebhe gba omaYuda-o. La-a, lele pí ní ngadje uo ngakpokpo 'ngú pindji ongamba 'ngú gba Ebhe bhú eli gba ní na kuti lie bini ne bini-e!» <sup>12</sup> Ndu uo hana adu ne nangamba naali. Mabhundja gba uo-o

angbingi. Abhomu-o, u atsia apa sunda o me: «Engú inde-e akunda napa pí?» <sup>13</sup> Engú bini, okoko adu amu omabhuka. U atsia adu apa me: «Pandi aholo uo e-e ngae bha-a!»

*Piele akpokpo eli gba Ebhe-e pí bhiti okpála*

<sup>14</sup> Piele ayie bhúla bhú dabili bini ne obhulu titima ndjikpa ne ká bini koko-o. Ani aholo agama 'ngú kpekpeke pí bhiti okpála me: «Ngayi omaYuda, di ne ndu yi okpála hana inde ngadulu bhú gudhu na Yelusalema-a, yi dje ma ndjindji, amba yi mbila la di engú i ngakodho 'kpí inde. <sup>15</sup> Okpála inde-e, a holo uo ne pandi maka yi ngabhubhundja lie de. Padhá de, anga a ko nga bha saa na odukpabini na kəkpi. <sup>16</sup> Engú bini, engú i ngakodho 'kpí mbia inde-e, a ko engú inde li polofeta Djuele apa nani e-o. Engú inde me:

<sup>17</sup> «Ebhe apa me: li sokpi-e, ma atúko Bua† gba ma-a pí ndu okpála hana.

Ongisi gba yi na obhosibhosi, di ne obhe na olisilisi akpokpo ongú inde ma akunda e-o.

Omakombise gba yi-e aú ongú inde ma akunda nasuno e bhú loto.

Ogbegbe okpála gba yi-e atsia alóto oloto inde ma atíma e pí uo ko.

<sup>18</sup> Li oekpi ango-o, ma atúko belegu di Bua gba ma-a

pí okpála na kulu gba ma na obhosibhosi, di ne obhe na olisilisi.

U tsia kpokpo ongú inde ma akunda e-o.

<sup>19</sup> Ma améne ongamba 'ngú abhúla.

Ma tsia méne ongamba 'ngú kuto píla doto.

Ngute atúko, li djua tsí, a adú di ne ndindi nguwa.

<sup>20</sup> Kala me ekpi gba Ngámá-a kolo-o, ekpi na ngbéngbé,

di ne ekpi na asasua-a,

ela adjí lie bití.

Li epe djí lie maka ngute.

\* **2:5** 2:5 OmaYuda inde ayie bhú ndu okuti hana: U adu nani ago bhú Yelusalema ngú nadhøge Ebhe bhú anokomia na Patekote . † **2:17** 2:17 Bua: † du me u nde aye ne 'dhu balua na ngbéngbé-e (madjisikile), amba a ko Bu Bhobua.

21 Abhomu-o, kpála ne kpála inde abhu 'li Ngámá-a,

tsia sía mukobho.†»

22 Abhomu-o, Piele atsia apa me: «Ngayi okpála na Isalaele, yi dje nga engú ma adji apa e pi yi inde: Ebhe apana pi yi mbámhá me ni atima Yesu, kpála na kuti na Nadjaleta-a, pi yi. Aní apana li namene ongamba 'ngú sunda yi bhú aní. Aní amene okiaka 'ngú, di ne oehe na tsulutsulu bhú aní. Ngayi makpe-e, yi mbila 'ngú tété ndjindji. 23 Kpála bhomu-o, u apu aní pi yi. Ebhe ambila nani 'ngú tété kalanu. Aní atsia akunda me amene lie moko. Yi abhelo aní. Padhá de, anga yi aha aní pi okpála na sisiti. U agi aní li kulusi, u atsia abhelo aní. 24 Engú bini, Ebhe azuku aní, aní atsia a'e aní bhú likabhu na kuo. Padhá de, anga a ayo nani de me kuo to aní bhú tikpu gba e-e de. 25 Kaka-a, Davidi apa li 'ngú gba aní-e me:

«Ma adu au Ngámá Ebhe kala ma ndu nedhinga hana.

Padhá de, anga aní li pá 'kpa ma na kokpa, amba ma aguku de.

26 Kaka-a, bua ma abedhe ne djali bedhe. Ma la di ngali 'tsi ne djali hana.

Ekpi ma akpi lie,

ma adu ne 'to ma me ma akobho makobho.

27 Padhá de, anga mu 'o ká ma de me ma du li bili gba okpála inde amu-o de.

Mu kunda de me kpála gba mu na ngbingbili-e zi bhú lata-a de.

28 Mo osuno muma okpadji na mukobho. Mo obédhe ma ne djali, anga ní ne mu bhú dabili bini.†»

29 Piele apa matá me: «Ondaise ma, ma ti da napa engú pi yi mbámhá pindji ogbi ní Davidi. Aní akpi, u atsia azi aní. Lata aní bhú ká ní akolo pi naki. 30 Engú bini, a ko nani polofeta. Aní ambila me Ebhe apa nani ne natu silika me: «Ma a'ó suka ongisi gba mu-o bini ngámá bhú da mu.»

31 Davidi au nani engú inde agó-o kalanu. Kaka-a, aní atsia apa engú nazuku gba Masiya me:

«Ebhe 'o ká aní li bili gba okpála inde amu-o de.

Aní 'o la di de me aní zi bhú lata-a de.»

32 Yesu inde ma ngapa 'ngú gba e-e, Ebhe azuku aní. Ndu ya hana, ya au engú angoo ne djila ya. 33 Pipita-a, Ebhe a'e aní abhúla, aní atsia a'o aní li pá 'kpa e na kokpa. 'Dyi ní Ebhe aha Bu Bhobua pi aní maka aní apa nani lie kalanu ko. Aní atsia atuko Bu Bhobua angoo pí ya. A ko bhende yi ngau e, di ne bhende yi ngadje e mbia inde-e ko. 34 Padhá de, anga Davidi ngae makpe 'u nani abhúla de. Engú bini, aní apa ngae me:

«Ngámá Ebhe apa nani pi Ngámá gba ma-a me:

Du li pá 'kpa ma na kokpa,

35 akólo li 'kpi ma a'ó obhulu yala gba mu-o lie sa 'dhu mu ko.†»

36 A ayo me ndu okpála hana na Isalaele mbila engú inde-e ndjindji me: Yesu inde-e, inde yi abhelo e li kulusi-e, Ebhe a'o aní Ngámá, aní atsia a'o di aní Masiya!»

37 Li u adje engú bhomu-o lie, bua uo asia likabhu naali. U atsia ayi Piele di ne obhulu titima koko-o me: «Ondaise ya, a ayo me ya mene pi?» 38 Abhomu-o, Piele atsia agie pi uo me: «Kpála ne kpála dji bua e, aní sia batisimo ne 'li Yesu Kilisito, amba Ebhe 'e siti 'ngú gba aní-o. Abhomu-o, yi tsia sía la di Bu Bhobua padhá. 39 Padhá de, anga aní apa nani kalanu me ni améne pi yi ne ongisi gba yi-e moko. Aní atsia apa me ni améne di pi okpála bhende ngadulu tsutsutsu,‡ di ne pi ndu okpála hana bhende li Ngámá gba ni-e a'í o-o.»

40 Abhomu-o, Piele atsia akpo 'ngú koko pi uo bhelé ngú naha pi uo gumu me u bhuka, di me u du ne nalila lio malila. Aní adu apa pi uo me: «Okpála na naki inde-e sisiti. Yi yie bhú ká uo mayie, amba Ebhe kobho yi.» 41 Okpála bhelé inde adje 'li Piele-e, aziba. U atsia asia batisimo. Li ekpi angoo, okpála masikpe de kutu bata ali bhú ká omabhuka.

† 2:21 2:17-21 Tsia bhú Djl. 3:1-5. † 2:28 2:25-28 Tsia bhú Ets. 16:8-11. † 2:35 2:34-35 Tsia bhú Ets. 110:1.

‡ 2:39 2:39 Okpála bhende ngadulu tsutsutsu: A akunda napa me ogandji okpála, okpála bhende ne omaYuda ade.

*Omabhuka na kalanu-o adu nani lele o pi?*

<sup>42</sup> U adu aha lio ndu 'kpí hana ngú nadjé nasuno gba obhulú titima gba Yesu-o. U adu nadu sùnda o bhú mukúnda maka ondaise. U adu azu 'he bhú dabilí bini, § u atsia adu di ayo Ebhe bhú dabilí bini. <sup>43</sup> Ndu okpála hana adu ne tsulú. Padhá de, anga obhulú titima-a adu amene ongu na ngangamba, di ne okiaka 'ngú naali. <sup>44</sup> Ndu omabhuka hana adu adulu bhú dabilí bini. Ndu 'he gba uo-o hana adu bhadi bhú dabilí bini. U atsia adu agbogbo bhusu bhusu li o. <sup>45</sup> U adu atsindji oedyi gba o, di ne oehe koko gba o-o. U atsia adu agbogbo bhusu tia angoo li ndu okpála hana, maka li gumu gba kpála bini ne bini adu lie ko. <sup>46</sup> Ekpí bini ne bini hana, u adu apo bhúla o bhú dabilí bini, u adu ali bhú 'ngbé 'ti Ebhe gba omaYuda. U adu agumu mapa bhú eti gba o, u atsia adu azu 'he ne djali, di ne bua na bhubhuku. <sup>47</sup> U adu atoko Ebhe. Engú inde u adu amene e-e bhú bádha bhú 'bu gba Ebhe-e, a adu anga li okpála naali. Abhomu-o, ndu 'kpí hana, Ngámá atsia adu ato okpála koko bhende asia mukobho-o bhú ká uo.

### 3

*Dukuto adhuku*

<sup>1</sup> Ekpí bini, pita tulukpe, Piele ne Djaa adu anu bhú 'ngbé 'ti Ebhe gba omaYuda, ngú nayo Ebhe inde u adu ayo e bhú saa na bata-o. <sup>2</sup> De 'bhé 'ngbé 'ti Ebhe gba omaYuda angoo inde u a'i e me «Babadha-a», kpála bini inde i dhuku de nayie maka u azu ani lie adu oo. Ndu 'kpí hana, u adu ago a'o ani oo ngubula me ani du ayo tia ka okpála inde ngali bhú 'ti Ebhe ko. <sup>3</sup> Li ani au Piele ne Djaa lie me u nde adji ali bhú 'ngbé 'ti Ebhe-e, ani atsia ayo tia ka uo.

<sup>4</sup> Piele ne Djaa abanga djila o li ani. Abhomu-o, Piele atsia apa pi ani me: «Tsia ya!» <sup>5</sup> Kpála angoo atsia a'o mabhundja gba e-e hana pí uo. Padhá de, anga ani adu abhundja me ni asia 'he ka uo masia.

<sup>6</sup> Abhomu-o, Piele atsia apa pi ani me: «Falanga ka ma ade. Olo la di ka ma ade. Engú bini, ma ahá pi mu ehe inde ka ma-o: ne 'li Yesu Kilisito na Nadjaleta-a, yie bhúlá, amba mu dhuku!» <sup>7</sup> Pipita-a, Piele aholo 'kpa ani na kokpa, ani atsia a'e ani bhúlá. Má gala kolo me-e, obiki na 'dhu ani akolo kpekpeke. <sup>8</sup> Ani a'ulu, aké má kprii! Ani atsia aholo nadhuku. Pipita-a, ani ali bhú 'ngbé 'ti Ebhe bhú dabilí bini ne Piele ne Djaa. Ani adu adhuku. Ani adu a'u'ulu. Ani atsia adu adhögö Ebhe. <sup>9</sup> Ndu okpála hana au ani me ani nde ngadhuku, ani nde ngadhögö Ebhe. <sup>10</sup> U atsia ambila me, a ko kpála inde adu nadu li 'bhé 'ngbé 'ti Ebhe, li bhèbhè bhende u a'i e me «Babadha», ngubula nayo 'he. Abhomu-o, ndu uo hana angamba, u atsia akiaka naali ka engú inde akolo li kute dukuto-o.

*Piele akpokpo 'ngú pi bhiti okpála bhú 'ngbé 'ti Ebhe gba omaYuda*

<sup>11</sup> Abhomu-o, kpála angoo du ayie de Piele ne Djaa de. Ndu okpála hana angamba naali ka engú inde akodho 'kpí-o. U ago ne holo, u atsia apo bhúla o de uo sa basa inde u a'i e me «Sa ngba 'ti gba Salomo.\*»

<sup>12</sup> Li Piele au lie mo-o, do ani pi bhiti okpála bhomu-o me: «Ngayi okpála na Isalaele, yi ngangamba li nakobho ka kpála inde-e ka ni? Li yi abanga djila yi lie li ya mugito me ya amene ngaya ne angu gba ya makpe me kpála inde-e dhuku-o? La di mugito me a ko anga ya ngakpata engú gba Ebhe-e? A mo-o ade. <sup>13</sup> Ebhe gba Abalahama, Ebhe gba Isaka, Ebhe gba Yakobho, Ebhe gba onguo ogbi ní amene me 'li bali gba ni Yesu-o adhögö lie. La-a, ngayi makpe-e, yi apu ani pi ongámási. Yi atsia ayala ani kala Pilate me ani nde adu akúnda la me ni tse 'kpa li ani-o.

<sup>14</sup> Ngayi-e, yi ayala Kpála bhende bubu, inde di ngbingbili. Yi atsia ayo me Pilate suno bádha bhú 'bu pi kpála bhende ngabhili okpála-o. <sup>15</sup> Yi abhèlè kpála inde

§ 2:42 2:42 Nazu 'he bhú dabilí bini: A ko nazu komonyo. A ko la di nazu 'he bhú dabilí bini. \* 3:11 3:11 Sa ngba 'ti gba Salomo: A ko sa ngba 'ngbé 'ti Ebhe gba omaYuda-o.



ngaha makobho. Engú bini, Ebhe azuku ani bhú ká okpála bhende amu-o. Ya au engú ango-o ne djila ya makpe. <sup>16</sup> Mbia inde-e, yi ngau kpála inde, yi mbila la di hana me a ko nako dukuto. Ani akobho ka 'li Yesu. Padhá de, anga ya abhuka ani. A ko ka nabhuka bhú Yesu, ani atsia akobho hana maka yi ngau ani lie inde.

<sup>17</sup> Engú bini, ondaise ma, ma ambila ndjindji me ngayi ne ongámási gba yi-e, yi amene li Yesu mo-o, anga yi mbila nani kukulu 'ngú-o de. <sup>18</sup> La-a, Ebhe ngae makpe amene mo-o ngubula nasuno mbámbá engú inde ani apa nani e kalanu bhú 'li ndu opolofeta hana ko. Ani apa nani me Masiya gba ni-e azú likabhu. <sup>19</sup> Kaka-a, yi dji bua yi. Yi gie liyi li pápá gba Ebhe, amba ani 'e siti 'ngú gba yi-o. <sup>20</sup> Abhomu-o, Ebhe ahá onedhinga naguo pi yi. Ani tsia tíma matá Masiya inde ani abhu nani e kalanu-o pi yi. A akunda napa me Yesu.

<sup>21</sup> Engú bini, mbia inde-e, a ayo me Yesu Kilisito du ngaiza abhúlá. Ani du oo akólo li nedhinga inde li ndu 'ngú hana akólo lie na mbia-o. Nayie didili naali-e, Ebhe apa nani engú ango-o bhú 'li obubu opolofeta-o. <sup>22</sup> Maka li Moidje apa la di nani lie me: <Ebhe Ngámá gba yi-e atíma polofeta pi yi maka ma. A adú suka ondaise yi. A ayo me yi dje ndu 'ngú hana inde ani apa e pi yi ko. <sup>23</sup> La-a, kpála bhende i djé 'li ani de-e, u agbé ani bhú ká okpála gba Ebhe, u tsia bhéle ani.†>

<sup>24</sup> La di-e, ndu opolofeta hana inde akpokpo 'ngú gba Ebhe-e, nayie li Samuele, akpo engú ndu o hana bini ne bini pindji engú inde-e akolo li 'kpí ango-o ko. <sup>25</sup> Engú li Ebhe apa nani e kalanu bhú 'bhé opolofeta-a, a pi yi. La di-e, gandja inde li Ebhe akodho nani e kalanu-o ne onguo ogbi yi-e, a di pi yi. Ani apa nani kalanu pi Abalahama me: <Ma atúko bisagu pí ndu opiga hana píla doto li pápá gba ongisi gba mu-o.†> <sup>26</sup> Kaka-a, Ebhe abhu bali gba e, ani atsia atima ngaiza ani pi yi omafsalaele. Ani atima ani me ani

tuko bisagu pí yi. Ani agbé kpála ne kpála bhú siti 'ngú gba e-o.»

## 4

*Libi okpála natsia 'kpí li 'ngú gba omaYuda aholo Piele ne Djaa*

<sup>1</sup> Li Piele ne Djaa adu akpo 'ngú lie pi okpála-a, odimandé gba Ebhe-e ago bhú dabili bini ne ngámá gba okpála nalila 'ngbé 'ti Ebhe gba omaYuda di ne oSadukai. <sup>2</sup> U adje siti bua naali. Padhá de, anga Piele ne Djaa adu asuno pi bhiti okpála. U adu akpokpo pi uo me okpála inde amu-o azúku di mazuku, maka li Yesu azuku lie ko. <sup>3</sup> Abhomu-o, u aholo Piele ne Djaa. U atsia ato uo bhú tikpu akolo pi kèkpí, anga adu me ekpí nde ngabi. <sup>4</sup> La-a, bhelé na okpála inde adje nani eli gba Ebhe-e, akolo omabhuka. Abhomu-o, omabhuka abe ndu o, u atsia akolo masikpe de okpála kutu bhuluvue.

<sup>5</sup> Li ekpí aseke lie, ongámási gba omaYuda, ne obhelesi okpála di ne omusuno na líli gba Moidje, apo bhúla o bhú gudhu na Yelusalema. <sup>6</sup> A adu nani: bhele kpála gba odimandé Ana, ne Kaifa, ne Djaa, ne Alekidjandele di ne ndu okpála hana inde bhú piga gba bhele kpála gba odimandé gba Ebhe-o. <sup>7</sup> Abhomu-o, okpála inde aholo Piele ne Djaa, atsia agbe Piele ne Djaa kala uo. U atsia ayi uo me: «Yi akobho kpála inde ne mangua angu dho? La di ne 'li da?»

<sup>8</sup> Abhomu-o, Piele inde abedhe nani ne Bu Bhobua-a atsia apa pi uo me: «Ngayi ongámási, di ne yi obhelesi okpála-a, <sup>9</sup> ya amene bádha 'ngú pi dukuto inde. La naki-e, u ngayi ya me ani akobho lele pi. <sup>10</sup> A ayo me ndu yi hana, di ne ndu okpála na Isalaele hana, yi mbila engú inde-e ndjindji: kpála inde-e alu kala yi ne kute na angu ka angu gba Yesu Kilisito, kpála na Nadjaleta. A ko Yesu inde yi agi nani e li kulusi, Ebhe atsia azuku ani-o. <sup>11</sup> Yesu ne kpála inde li Bhuku gba Ebhe-e apa nani engú gba e me Ebhe apa me:

<Ani ne teme inde li ngayi okpála nayiki 'ti-e abhike e-o.

† 3:23 3:22-23 Tsia bhú Det. 18:15, 18, 19. † 3:25 3:25 Tsia bhú Dje. 22:18. † 4:11 4:11 Tsia bhú Ets. 118:22.

La-a, teme ang-o akolo teme inde abi eti-e libhomu.†>

12 Ani ti bha da nakobho okpála ngae kpi e kpi. Padhá de, anga píla doto libhomu, Ebhe ha 'li kpála koko bini de inde u ti da nakobho ka e.»

13 Li Libi okpála natsia 'kpí li 'ngú gba omaYuda au lie me Piele ne Djaa ngagama 'ngú ne tsulú ade-e, u angamba naali. Padhá de, anga u adu ambila ndjindji me Piele ne Djaa ne okpála na padhá. U mene balua bhelé de. La di-e, u adu ambila ndjindji me, u adu adhuku nani bhú dabili bini ne Yesu. 14 Engú bini, u adu di au kpála inde akobho-o alu de uo. U tsia du ne engú nagigie pi uo de. 15 Abhomu-o, ongámási aha líli me obhulu titima ze kilidjo. U atsia aholo nagama 'ngú sunda o. 16 U adu apa me: «Ní améne ngú okpála inde-e pi? Padhá de, anga ndu okpála hana na Yelusalema ambila ndjindji me, u amene ngamba 'ngú inde-e ngao. Ní ti la di da nayayala de. 17 Engú bini, ngubula me ngali ang-o ayángba naali sunda okpála de-e, a ayo me ní gbele 'dje uo kpekpeke me u apá matá engú ne 'li Yesu pi kpála belegu de bini.»

18 Abhomu-o, u a'i matá obhulu titima-o. U atsia aha líli pi uo kpekpeke me, u agáma 'ngú di ne me u asúno ne 'li Yesu matá-a de. 19 Engú bini, Piele ne Djaa agie pi uo me: «Yi kodho 'ngú inde-e ngayi makpe. Bhú djila Ebhe-e, a ngbingbili ne bhedho? Ne me ya mene líli gba yi, ne me ya mene mangbo líli gba Ebhe! 20 La pi ya-a, ya ti da na'o nakpokpo ngali na engú inde ya au e ne bhende ya adje e de.» 21 Abhomu-o, Libi okpála natsia 'kpí li 'ngú gba omaYuda agama matá engú pi uo kpekpeke. Pipita-a, u atsia atse 'kpa li uo. La-a, u u nani engú inde u ti da namene uo sisiti ka e de. Padhá de, anga ndu okpála hana adu adhögö Ebhe ka engú inde akodho 'kpí-o. 22 Dukuto li nakobho gba e adu ngangamba bhomu-o, adu nani ne kalanga nane ndjikpa badha mane.

### *Omabhuka ayo Ebhe*

23 Li u atse 'kpa li Piele ne Djaa lie, u anu abhaka obi o. U atsia akpokpo ndu 'ngú hana inde li ongbengbe odimandö gba Ebhe di ne obhelesi okpála apa e-e pi uo. 24 Pita u adje engú bhomu-o lie, omabhuka ayo Ebhe ne bua bini me: «Ngámá, mo obho ekpí ne ndu 'he inde bhúbhú-o hana ngamu. Mo obho doto ne ndu 'he inde bhúbhú-o hana ngamu. Mo obho la di 'ngbé 'ngu ne ndu 'he inde bhúbhú-o hana ngamu. 25 Mo opa nani ngamu bhú angu gba Bu Bhobua, bhú 'li ogbi ya Davidi, bali gba mu-o, me:

<Opiga inde ne omaYuda ade-e abedhe ne siti bua ka ni?

Okpála na kuti koko adje lio ngú namene ongú na padhá padhá ka ni?

26 Ongbengbe ongámási na doto aleke lio ngú egú.

Ongámási apo bhúla o bhú dabili bini ngú nagu Ngámá Ebhe,

di ne kpála inde li Ebhe abhu e-o.\*>

27 Padhá de, anga a na paká me ngámá Elode Atipasi ne Pose Pilatö apo nani bhúla o bhú gudhu inde, bhú dabili bini ne opiga inde ne omaYuda ade, di ne opiga na Isalaele. U apo bhúla o ngubula me o gu Yesu, bali na bubu gba mu, inde mo obhu e maka Masiya-o . 28 U amene bhomu-o ndu 'ngú hana inde mo opa nani e didili ne angu gba mu-o me améne lie mamene ko. 29 La mbia inde-e, Ngámá, tsia nga maka u ngato mbolo li ya lie-o. Kaka-a, ha angu pi ya, obalise gba mu, amba ya akpokpo eli gba mu-o ne tsulu de. 30 Ha angu gba mu-o pi ya, ngubula me ya akobho okpála, amba ya mene ongamba 'ngú di ne okiaka 'ngú ne 'li Yesu, bali gba mu na bubu-o.» 31 Li u andjia nayo Ebhe lie, bili inde u apo bhúla o lie adyiki má djigi djigi! Ndu uo hana abedhe ne Bu Bhobua. U tsia du akpokpo eli gba Ebhe-e ne tsulu de.

### *Omabhuka abu 'he gba o bhú dabili bini*

\* 4:26 4:25-26 Kpála inde li Ebhe abhu e-o: A akunda napa me Kilisito. Tsia bhú Ets. 2:1-2.

<sup>32</sup> Ndụ omabhuka hana adụ ne bua bini. U adụ di ne nabhundja bini. Bhú ká uo-o, kpála bini dụ abhundja de me ehe gba ni-e bha pí ni kpi ni kpi-e de. Engú bini, oehe gba uo-o adụ bha pí ndụ uo hana. <sup>33</sup> Obhulụ titima gba Yesu adụ akpokpo ne angu hana me Ngámá Yesu azuku. Abhomụ-o, bádha bhú 'bu gba Ebhe-e atsia adụ pí ndụ uo hana. <sup>34</sup> Bhú ká uo-o, kpála bini dụ aneke 'he de. Padhá de, anga ndụ okpála hana inde adụ ne oedyi di ne oeti-e adụ atsitsindji, u adụ ago ne tia ango-o. <sup>35</sup> U atsia adụ ahaha pí obhulụ titima. Pipita-a, u atsia adụ agbogbo bhusu tia ango-o li kpála bini ne bini maka li gumu gba ani adụ lie ko.

<sup>36</sup> Kpála bini adụ nani bhú ká uo, a adụ 'li ani me Djodjefa . Ani adụ kpála na piga gba Levi. U azu nani ani bhú kpomə na Sipele. Obhulụ titima agisila nani 'ili koko li ani me Balanabasi (inde akunda napa me «Kpála inde ngato masi»). <sup>37</sup> Ani atsindji edyi gba e. Ani ago ne tia ango-o, ani atsia a'o kala obhulụ titima.

## 5

### *Siti 'ngú gba Anania ne Safila*

<sup>1</sup> Abhomụ-o, kpála bini inde adụ 'li e me Anania, adje lie ne wala e Safila. U atsindji edyi gba o-o. <sup>2</sup> Ani aha té tia ango-o, a'o pí e. Ani atsia anụ a'o dudu-o kala obhulụ titima gba Yesu-o . Wala ani adụ ambila 'ngú tété ndjindji. <sup>3</sup> Abhomụ-o, Piele apa pí ani me: «Anania, mo oziba me Satana pite ni ngú ni? Mo opa eu pí Bu Bhobua , anga mo oha té tia na edyi-e, mo o'o pí mụ. <sup>4</sup> Kala me mụ tsindji edyi ango-o, a ko nako naamụ di? La di-e, mo otsindji lie, tia ango-o, a ko nako naamụ di? Mo oziba me ni mene ngua 'ngú inde e ka ni? Mụ pite okpála de, engú bini, mo opite bhomụ-o Ebhe.» <sup>5</sup> Bha li nedhinga inde li Anania adje engú bhomụ-o lie, ani ati, ani atsia akpi. Ndụ okpála hana inde adje engú ango-o, adụ ne tsulụ naali. <sup>6</sup> Abhomụ-o, omakombise ago. U agala kuo ani ne bongo , u a'e, u atsia anụ azi.

<sup>7</sup> Masikpe de pita saa bata-a, wala Anania ago ali oo me ani nde mbila engú inde akodho 'kpí-e de. <sup>8</sup> Piele ayi ani me:

«Pa nga mụma, yi atsindji bha ndjụ edyi gba yi-e bhú mase inde-e?» Òlè-o agie me: «A moko, ya atsindji bhú mase bhomụ-o.» <sup>9</sup> Abhomụ-o, Piele atsia apa pí ani me: «Yi adje liyi ne 'ko mụ ngú nale Bua gba Ngámá-a ngú ni? Djedje nga! Okpála inde i kolo nazi 'ko mụ-o, u alulụ li bhoti bhomụ. U abí bhadi mụ moko!» <sup>10</sup> Bha li nedhinga bhomụ-o, òlè-o ati kuto bhú li 'dhụ Piele, ani atsia akpi. Omakombise ali, u abhaka me ani nde akpi. Abhomụ-o, u a'e kuo ani, u atsia anụ azi ani denko 'ko e. <sup>11</sup> Ndụ okpála na Piga gba Ebhe-e hana, di ne ndụ okpála hana inde adje engú inde akodho 'kpí-e, adje tsulụ naali.

### *Obhulụ titima gba Yesu-o amene ongamba 'ngú bhelé*

<sup>12</sup> Obhulụ titima gba Yesu-o adụ amene nani ongamba 'ngú di ne okiaka 'ngú bhelé bhú ká okpála. Ndụ omabhuka hana adụ apo bhúla o sa basa inde u a'i e me «Sa ngba 'ti gba Salomo.» <sup>13</sup> Kpála bini bhú ká okpála bhende i bhuka de-e le nani nali bhú ká uo de, abana li ndụ okpála hana adụ apa 'ngú gba uo-o lie ndjindji-o. <sup>14</sup> Obhosi bhelé naali di ne olisi bhelé naali inde abhuka Ngámá-a, adụ ali bhú ká omabhuka, u atsia adụ abe ndụ o. <sup>15</sup> U aholo belegu apandja okpála na kuo li okpadji. U adụ aseke uo pí okalagba di ne pí otsala. U adụ amene mo-o, anga u adụ abhundja me i dụ me Piele nde akodho 'kpí oo, kulu ani de pụ mbo pí sũka uo, amba ani kobho. <sup>16</sup> Okpála bhelé adụ di ayie bhú okuti na ngo Yelusalema, u adụ ago ne okpála na kuo di ne okpála inde adụ ne osisiti bua bhú o-o. Ndụ uo hana atsia adụ akobho.

### *U aholo obhulụ titima gba Yesu*

<sup>17</sup> Abhomụ-o, bhele kpála gba odimandə gba Ebhe-e di ne ndụ okpála hana inde adụ bhú dabili bini ne ani-e, a akunda napa me libi oSadukai , adje siti bua naali pindji obhulụ titima gba Yesu. U atsia apa me, a ayo namene uo sisiti. <sup>18</sup> U aholo obhulụ titima-o, u atsia ato uo bhú tikpu bhe na ngbéngbé-o. <sup>19</sup> La sukpe-e, andjelu bini gba Ngámá a'u obhe bhoti na tikpu-o. Ani apandja obhulụ titima-o. Ani

atsia apa pi uo me: <sup>20</sup> «Yi n̄ bhú 'ngbé 'ti Ebhe gba omaYuda. Oo, yi kpokpo pi okpála nd̄ 'ngú hana inde atsia mukobho na mbia-o.» <sup>21</sup> Obh̄l̄l̄ titima-a amene bhadi mo-o. K̄kp̄i naali-e, u an̄ bhú 'ngbé 'ti Ebhe, u atsia aholo nasuno pi okpála.

Li nedhinga bhom̄-o, bhele kpála gba odimand̄ gba Ebhe-e bhú dabil̄i bini ne okpála gba e-e, u a'i Libi okpála natsia 'kp̄i li 'ngú gba omaIsalaele-o. U atsia atima okpála me u n̄ ha obh̄l̄l̄ titima-a bhú tikp̄, amba u go ne uo. <sup>22</sup> Engú bini, li okpála ango-o an̄ lie, u bhaka uo bhú tikp̄ de. U agie lio, u atsia apa pi Libi okpála natsia 'kp̄i li 'ngú gba omaYuda-a me: <sup>23</sup> «Ya abhaka me 'bh̄o tikp̄-o nde ani lie ndjindji. Okpála nalila tikp̄-o nde ad̄l̄u li obh̄b̄h̄. La-a, ya a'u bhoti-e lie, ya abhaka kpála bhúbhú oo beleḡ de bini!» <sup>24</sup> Li ngámá gba okpála nalila 'ngbé 'ti Ebhe-e, di ne ongbengbe odimand̄ gba Ebhe, adje engú ango-o lie-e, mabhundja gba uo angingi naali. U mbila de me a akolo li obh̄l̄l̄ titima-a ne mangua 'ngú dho-ie de. <sup>25</sup> Pipita-a, kpála bini ago, ani apa pi uo me: «Yi djedje nga! Okpála inde yi abu nako o bhú tikp̄-o, uo mbia inde e bhú 'ngbé 'ti Ebhe. U al̄l̄u mal̄l̄u, u ngasuno pi okpála.»

<sup>26</sup> Abhom̄-o, ngámá gba om̄lila-a an̄ ne osudha gba e-o. Ani aha obh̄l̄l̄ titima-a, ani ago ne uo. Engú bini, u mene uo sisiti de. Padhá de, anga u ad̄ akpe me okpála abh̄li o ne teme de. <sup>27</sup> Pita ani ago ne uo lie, ani a'o uo kala Libi okpála natsia 'kp̄i li 'ngú gba omaYuda-o. Abhom̄-o, bhele kpála gba odimand̄ gba Ebhe-e aholo nayiyi uo me: <sup>28</sup> «Ya aha nako líli pi yi kpekpeke me yi asúno ne 'li kpála bhom̄-o de. La-a, nasuno gba yi-e aha Yelusalema libhomu! Yi ngakunda me ngute kpála bhom̄-o tuko pí ya!»

<sup>29</sup> Piele di ne obh̄l̄l̄ titima koko agie me: «A ayo me ya mene líli gba Ebhe ane líli gba okpála. <sup>30</sup> Ngayi-e, yi abh̄l̄o Yesu li kulusi. Engú bini, Ebhe gba ogbi ní-e azuku ani bhú ká okpála inde amu. <sup>31</sup> Ebhe a'e'e ani abh̄l̄á li pá 'kpa e na

kokpa, ani a'o ani Ngámá di ne Mukobho. Ani amene mo-o ngubula me okpála na Isalaele dji bua o, amba Ebhe 'e siti 'ngú gba uo-o. <sup>32</sup> Ya au ongú bhom̄-o ne djila ya makpe. Bu Bhobua, inde li Ebhe ngaha e pi okpála inde ngamene líli gba ani-e, au di.»

<sup>33</sup> Li Libi okpála natsia 'kp̄i li 'ngú gba omaYuda adje engú ango-o lie, u abi 'gú naali. U di me bhili obh̄l̄l̄ titima gba Yesu-o. <sup>34</sup> Engú bini m̄Falisi bini inde ad̄ 'li e me Gamaliele, a ad̄ bhú ká uo. A ad̄ m̄suno na líli. Nd̄ okpála hana ad̄ amanga ani ndjindji. Ani ayie bh̄l̄á. Ani ayo me u pandja nga obh̄l̄l̄ titima-a kilidjo. <sup>35</sup> Pipita-a, ani atsia apa me: «Ngayi okpála na Isalaele, yi lila liyi ndjindji li 'ngú inde yi adji amene e li kute okpála inde-o! <sup>36</sup> Padhá de, anga ane nga ekp̄i bhel̄ de, kpála bini akoto nako, a ad̄ 'li ani me Teudasi. Ani ad̄ apa me ni ne 'ngbé kpála. Okpála masikpe de kámá badha ad̄ akpata ani. Engú bini, u abh̄l̄o ani lie, nd̄ okpála hana inde ad̄ akpata ani-e atsia atsambala. Abhom̄-o, engú gba ani-e atsia andjia.

<sup>37</sup> Pita ani-e, li nedhinga u ad̄ atanga okpála lie, Yuda, kpála na Galilaya, akoto. Ani agbele okpála nganda e bhel̄. Ngaani di-e, u abh̄l̄o ani. Abhom̄-o, okpála inde ad̄ akpata ani-e atsia atsambala. <sup>38</sup> Kaka mbia inde-e, ma apa pi yi me yi adhd̄e li okpála inde-e de. Yi 'o uo. Padhá de, anga i d̄ me mabhundja di ne ongú gba uo nde ayie ka okpála-a, i kólo padhá. <sup>39</sup> Engú bini, i d̄ la me ongú bhom̄-o nde ayie ka Ebhe-e, yi tí da nabh̄b̄h̄l̄o de. 'E-e! Yi agú gbele ne Ebhe de.»

Abhom̄-o, Libi okpála natsia 'kp̄i li 'ngú gba omaYuda atsia aziba mabhundja gba Gamaliele-o. <sup>40</sup> U a'i obh̄l̄l̄ titima-o. U aha líli me u bhi uo ne fimbo. U aha di líli pi uo kpekpeke me u akpó 'ngú matá ne 'li Yesu beleḡ de bini. Pipita-a, u atsia atse 'kpa li uo. <sup>41</sup> Abhom̄-o, obh̄l̄l̄ titima-a akoto me u nde abedhe ne djali bedhe. Padhá de, anga Ebhe au ndjindji me u z̄ likabhu ngubula 'li Yesu. <sup>42</sup> Ekp̄i bini ne bini hana, u ad̄ bha nasuno di ne

nakpokpo Bádha Ngali gba Yesu Masiya bhú 'ngbé 'ti Ebhe di ne bhú oti gba o-o.

## 6

*U alo okpála mananika ngú nateteke obhulú titima gba Yesu*

<sup>1</sup> Li nedhinga ango-o, omukpata adu akolo bhelé. Engú bini, omaYuda inde adu nadi eli na giliki-e, atsia aholo nadi mutokono li obhende adu nadi eli na ebele-o. U adu apa me: «Ndu 'kpí hana nedhinga nagapa 'zu-o, u ngaha ezú pi oekesi na libi gba ya-a ndjindji ade.»

<sup>2</sup> Abhomu-o, obhulú titima ndjikpa ne ká bhisi gba Yesu-o apokobhò bhúla ndu omabhuka hana. U atsia apa pi uo me: «A ayo de me ya 'o ká nakpokpo eli gba Ebhe-e ngú nagapa 'zu-o de. <sup>3</sup> Kaka-a, ondaise ya, yi gili okpála mananika inde li okpála ngaziba o ndjindji, inde abedhe ne Bu Bhobua di ne imbilangu bhú ká yi, amba ya ha kulu bhomu-o pi uo. <sup>4</sup> Abhomu-o ngaya-a, ya tí da naha ndu nedhinga gba ya-a hana ngubula nayo di ne nakpokpo Bádha Ngali gba Ebhe-o.»

<sup>5</sup> Ndu okpála hana aziba engú inde li obhulú titima apa e ko. Abhomu-o, u alo Etieni, kpála inde abedhe ne nabhuka di ne Bu Bhobua, ne Filipino, ne Polokole, ne Nikanola, ne Timoni, ne Palamenasi, ne Nikola, kpála na kuti na Atiokia inde abhuka nani Ebhe gba omaYuda ko.\* <sup>6</sup> U anu ne uo kala obhulú titima. Abhomu-o, obhulú titima a'o 'kpa o pí uo, u atsia ayo Ebhe pi uo.

<sup>7</sup> Eli gba Ebhe-e adu bha naya ne kalanu. Abhomu-o, alo gba omabhuka atsia adu a'u ne bhúla naali bhú Yelusalema. Odimandò gba Ebhe bhelé atsia abhuka di.

*U aholo Etieni*

<sup>8</sup> Etieni abedhe nani ne angu ka bádha bhú 'bu gba Ebhe . Abhomu-o, ani atsia adu amene ongbengbe 'ngú di ne ongu na ngangamba bhú ká okpála. <sup>9</sup> Okpála koko ago ngú namene kpekebhe ne Etieni. Bhú ká uo-o, okoko adu okpála inde adu

apo bhúla o bhú eti nadjé líli gba Moidje , inde u a'i e me «Eti nadjé líli gba okpála inde aze bhú bali-o.» Okoko ayie nani bhú gudhu na Silene, ne bhú gudhu na Alekidjandili, ne bhú ndu doto na Silisia di ne bhú ndu doto na Adjia. <sup>10</sup> Engú bini, imbilangu gba uo ti nani da nakolo li bhe gba ani-e de. Padhá de, anga ani adu agama 'ngú ne imbilangu di ne angu inde li Bu Bhobua adu aha e pi ani ngae ko.

<sup>11</sup> Abhomu-o, u aha tia pi okpála, amba u pa eu li ani me: «Ya adje ani me ani nde ngasobho Moidje di ne Ebhe!» <sup>12</sup> U amene moko ngubula me okpála, ne obhelesi okpála di ne omusuno na líli-e , bi 'gú ngú Etieni. Pipita-a, u aze li Etieni, u aholo ani. U atsia anu ne ani kala Libi okpála natsia 'kpí li 'ngú gba omaYuda ko. <sup>13</sup> Oo, u anu di ne okpála inde adu apa 'ngú li Etieni ne eu. Okpála ango-o atsia adu apa me: «Kpála inde-e, ndu 'kpí hana, ngapa bha bini 'ngú sisiti li kute 'ngbé 'ti Ebhe na bubu gba ní, di ne li kute líli gba Moidje-o .

<sup>14</sup> Ya adje ani me ani nde ngapa me: «Yesu ango-o, kpála na Nadjaleta, abhéle 'ngbé 'ti Ebhe inde, ani tsia dí di odasundu inde ya asia e ka Moidje ko.» <sup>15</sup> Ndu okpála inde adu bhú 'ti oo hana abanga djila o li Etieni. U atsia au me bhúla ani adu asu maka bhúla andjelu .

## 7

*Etieni akpokpo 'ngú kala okpála*

<sup>1</sup> Abhomu-o, bhele kpála gba odimandò ayi Etieni me: «Engú inde u ngapa e li mu bhomu-o, a ko bha ndju kukulu 'ngú?»

<sup>2</sup> Etieni atsia agie me: «Odyi ma di ne ondaise ma, yi djedje nga! Ebhe na sangu akoto nani li ogbi ní Abalahama bhú ndu doto na Medjopotami kala me ani nu nasi kuti bhú ndu doto na Alana. <sup>3</sup> Ani atsia apa pi ani me: «'O ká doto gba mu di ne piga gba mu-o, amba mu nu bhú doto inde ma asúno e pi mu ko.†»

<sup>4</sup> Abhomu-o, Abalahama ayie bhú doto gba oKaladea, ani atsia anu nasi kuti bhú Alana. Pita li 'dyi ani akpi lie, Ebhe a'e

\* **6:5** 6:5 Nabhuka Ebhe gba omaYuda: A akunda napa me okpála koko, inde ne omaYuda ade-e, adjí nani bua o, u atsia abhuka Ebhe gba omaYuda-o. Nikola inde-e, atsia abhuka di nani Yesu. † **7:3** 7:3 Tsia bhú Dje. 12:1.

ani bhú Alana, ani atsia ago a'o ani bhú doto yi nde bhú e mbia inde-e ko. <sup>5</sup> Ebhe ha nga nani edyi pi ani sii de, belegu de mboye bili na'o 'dhu e ka ani tété. La-a, ani atsia apa nani pi ani kalanu me: <Ma ahá doto inde-e pi mu, li ongisi gba mu-o\* tsia tígala ne di pita mu-o ngao.> La-a, li nedhinga bhomu-o, ndili du nga nani ka ani de.

<sup>6</sup> Ebhe apa pi ani bhomu-o me: <Ongisi gba ongisi gba mu-o anu adulu bhú doto na gandji gandji. Oo, u akólo obalise gba okpála na doto ango-o. Li okpála ango-o méne uo sisiti ngubula kalanga kámá badha.> <sup>7</sup> La-a, Ebhe apa matá di me: <Ma akódho 'ngú gba okpála inde u akólo obalise pi o-o ngama. Pipita-a, u zé oo, u tsia gó dú adhogé ma li bili inde.†> <sup>8</sup> Abhomu-o, Ebhe atsia akodho gandja ne Abalahama. Li Abalahama azu Isaka lie, ani atsia ato ani bhú gandja bhú 'kpí na madjina nayie li 'kpí u azu ani lie-o. Isaka amene bhadi moko pi Yakobho. Yakobho atsia amene bhadi moko pi onguo ogbi ní ndjikpa ne ká bhisi-o.

<sup>9</sup> Pipita-a, onguo ogbi ní ango-o adje siti bua naali pi Djodjefu, ndindili pita o-o. Abhomu-o, u atsia atsi ndji ani me u nu ne ani bhú bali bhú Edjipeto. La-a, Ebhe adu bhú dabili bini ne ani. <sup>10</sup> Ebhe agbegbe Djodjefu bhú likabhu gba e hana. Ani asuno badha bhú 'bu gba e pi ani ne imbilangu, ani atsia amene di me engú gba ani-e du anga li Falao, 'ngbé ngámá na doto na Edjipeto-o naali. Abhomu-o, Falao atsia a'o ani ngámá pí 'ndji Edjipeto di ne pí 'ndji eti gba e libhomu.

<sup>11</sup> Pipita-a, adyindi atsia ali bhú Edjipeto libhomu di ne bhú doto na Kanana. Likabhu adu naali. Kaka-a, onguo ogbi ní du asia ehe nazu mazú de. <sup>12</sup> Li Yakobho adje lie me ehe nazú mazú bhú Edjipeto-o, ani atsia atima ongisi gba e, onguo ogbi ní oo bhutsibhutsi na bini. <sup>13</sup> U anu lie bhutsibhutsi na bhisi-e, Djodjefu atsia asuno lie pi ondaise e. Abhomu-o, Falao atsia ambila piga gba Djodjefu-o. <sup>14</sup> Pipita-a, Djodjefu atima okpála me u nu

ha 'dyi ni Yakobho ne piga gba e hana. U adu nani ndu o hana okpála ndjikpa mananika ne ká bhuluvue. <sup>15</sup> Abhomu-o, Yakobho anu bhú dabili bini ne ongisi gba e, onguo ogbi ní, bhú Edjipeto. U atsia amu oo. <sup>16</sup> U abha kuo uo anu ne di bhú gudhu na Sikeme. Abhomu-o, u atsia azi bhú lata inde li Abalahama akala nani e ka ongisi gba Emola bhú Sikeme-o.

<sup>17</sup> Li nedhinga akolo lie masikpe ngubula me Ebhe mene engú inde ani apa nani e kalanu me ni améne e pi Abalahama, piga gba ní-e abe ndu e. Okpála atsia akolo bhelé bhú Edjipeto. <sup>18</sup> Pipita-a, ngámá koko aholo nau bhú Edjipeto. Ngámá ango-o mbila nani engú gba Djodjefu-o de. <sup>19</sup> Ani apite okpála gba ní-o, ani atsia amene onguo ogbi ní sisiti. Ani aholo uo ne kpéke me u 'o ká ongisi na ndjendje gba o-o, amba ongisi ango-o mu. <sup>20</sup> Li nedhinga bhomu-o, u azu Moidje. Ani adu babadha naali bhú djila Ebhe. U aku ani epe bata bhú 'bu 'ti gba 'dyi e. <sup>21</sup> Li u a'o ká ani lie, ndili na eole gba Falao aha ani, ani atsia aku ani maka ndili gba e makpe. <sup>22</sup> U asuno ndu imbilangu hana gba okpála na Edjipeto pi Moidje. Ani atsia akolo kpekpeke bhú nagama 'ngú di ne namene 'he.

<sup>23</sup> Li Moidje akolo lie ne kalanga ndjikpa badha-a, ani atsia abhundja li bua e me ni nu tsia ondaise ni, omafalaele. <sup>24</sup> Oo, ani au me maEdjipeto bini ngamene saka omafalaele sisiti. Abhomu-o, ngú nagie siti 'ngú bhomu-o, ani atsia abhelo maEdjipeto ango-o. <sup>25</sup> Moidje adu abhundja naae me ondaise ni omafalaele ambila me Ebhe alo ni ngú nakobho o. Engú bini ngauo-o, u mbila la mo-o de. <sup>26</sup> Li ekpi aseke lie, Moidje abhaka me omafalaele bhisi nde ngagu gbele sunda o. Abhomu-o, ani akunda nayoko uo. Do ani de: <Wai, yi ne ondaise. Yi ngamene liyi sisiti ka ni?> <sup>27</sup> Engú bini, kpála bhende adu amene kilí e sisiti-e andjimba Moidje, ani atsia apa me: <A ko da inde a'o mu ngámá di ne kpála nakodho 'ngú gba ya-a?> <sup>28</sup> Mo okunda nabhelo ma, maka

\* **7:5** 7:5 Ongisi gba mu: A akunda napa me ongisi gba ani na obhosibhosi. † **7:7** 7:6-7 Tsia bhú Dje. 15:13-14.

† **7:28** 7:27-28 Tsia bhú Eki. 2:14.

mo obhøle lili maEdjipeto lie?†> <sup>29</sup> Li Moidje adje eli bhomũ-o lie, ani ayie bhú Edjipeto, ani akpe, ani atsia anũ adũ bhú doto na Madiana. Oo, ani azu ongisi na obhosibhosi bhisi.

<sup>30</sup> Pita kalanga ndjikpa badha-a, andjelu bini akoto li Moidje bhú mili bili dengo eta na Sinai. Andjelu ango-o akoto li ani bhú djua me a nde ngatsi bhú tsá 'pó.

<sup>31</sup> Ani angamba naali ka engú inde ani au e-o. Nedhinga ani adũ adyudyo lie lie masikpe ngú natsitsia-a, ani atsia adje 'li Ngámá apa me: <sup>32</sup> <Ma ne Ebhe gba onguo ogbi mũ, Ebhe gba Abalahama, Ebhe gba Isaka, Ebhe gba Yakobho.†> Moidje aholo nagukũ ka tsulũ, ani le natsitsia de.

<sup>33</sup> Abhomũ-o, Ngámá atsia apa pi ani me: <Pandja maløkø bhú 'dhũ mũ, anga bili mo olũ lie inde-e, a ko bili na bubu. <sup>34</sup> Ma au maka u ngato mbolo li okpála gba ma bhú Edjipeto lie au. Ma atsia adje la di maka u ngalopolo lio lie adje. Ma ago ngú nagbegbe uo bhú bali ango-o. Mbia inde-e, ma ngatima mũ bhú Edjipeto, nũnũ.†>

<sup>35</sup> A ko Moidje inde li omařsalaele ayala e, inde u apa pi e me: <A'o mũ ngámá di ne kpála nakodho 'ngú gba ya-a da?> Ebhe atima ani me ani dũ ngámá di ne mukobho. Andjelu apa pi ani li nedhinga inde ani akoto li ani lie bhú tsá 'pó inde adũ atsi ko. <sup>36</sup> Moidje agbegbe omařsalaele bhú doto na Edjipeto ngae. Ani amene ongú na ngbengbengbe di na ngangamba bhú doto ango-o, bhú 'ngbé 'ngu na Mbembe di ne bhú 'gũ. Ani amene ongú ango-o bhú kalanga ndjikpa badha. <sup>37</sup> A ko matá bhadi Moidje inde apa pi omařsalaele me: <Ebhe agbé polofeta pi yi maka ma bhú ká ondaise yi.†> <sup>38</sup> Li onguo ogbi ní apekebhe bhúla o lie bhú 'gũ-o, Moidje adũ oo. Ani adũ bhú dabili bini ne onguo ogbi ní. Ani adũ la di bhú dabili bini ne andjelu inde adũ agama 'ngú pi ani apí 'ta na Sinai-o. Ani asia eli na mukobho-o ngú nakpokpokpo pi ní ngae.

<sup>39</sup> Engú bini, onguo ogbi ní dũ amene líli

gba ani-e de, u adũ ayala ani. Abhomũ-o, u adũ akũnda nagie lio bhú doto na Edjipeto. <sup>40</sup> U apa pi Alona me: <Bho oebhe pi ya, amba u dũ adholo kala ya. Padhá de, anga Moidje inde-e, inde apandja ya bhú doto na Edjipeto-o, ya mbila engú inde akolo li ani-e de.†> <sup>41</sup> Abhomũ-o, u abho kulu ndili bagala, bhú oekpi bhomũ, u atsia atsulu enũ pi ani. U amene anokomia kabula ehe inde u abho e ne 'kpa o-o. <sup>42</sup> Engú bini, Ebhe adji 'ngbũ e li uo, ani atsia a'o uo me u dhøgø oikũpala, maka u aye lie bhú bhuku gba opolofeta me:

<Ngayi okpála na Isalaele-e, yi atsulu nani oenũ mũma uu?

Yi aha la di oehe koko mũma uu sũnda kalanga ndjikpa badha bhú 'gũ-o?

A mo-o ade.

<sup>43</sup> Yi abi mangbo wema gba ebhe Moloko, di ne kulu ikũpala gba ebhe gba yi Lefana-o.

A bhomũ-o kulu oehe na padhá padhá, inde yi abho o ngũbula nadhøgø o-o.

Kaka-a, ma ambá yi tsutsu nane Babilona mane.†>

<sup>44</sup> Onguo ogbi ní, bhú 'gũ-o, adũ nani ka uo ne 'ti ngbangbali li Ebhe adũ asuno lie bhú e-o. Moidje abho nani maka bhende li Ebhe asuno nani e pi ani-o. <sup>45</sup> Abhomũ-o, u atsia aha 'ti ngbangbali ango-o pi ongisi gba onguo ogbi ní, inde adũ li nedhinga li Djodjue adũ lie ngámá-o. U atsia adũ ali ne di bhú odoto gba opiga inde li Ebhe ato nani holo bhú 'dhũ o kala uo-o. U adũ oo akolo bhú nedhinga gba 'ngbé ngámá Davidi. <sup>46</sup> Engú gba Davidi inde asia nani bádha bhú 'bu gba Ebhe-e, adũ bhú djila Ebhe ndjindji. Ani atsia ayo nani kpadji me ni yiki eti pi Ebhe gba Yakobho. <sup>47</sup> Engú bini, Salomo, ndili gba Davidi-e, ayiki mangbo nani eti pi ani ngae. <sup>48</sup> La-a, Ebhe Apí 'Kpí dũdũ bhú 'ti inde li okpála ayiki e ne 'kpa o-o de. Maka li polofeta apa lie me:

<sup>49</sup> <Ngámá apa me: ekpi ne dabili na ngámá gba ma-o.

† 7:32 7:32 Tsia bhú Eki. 3:6. † 7:34 7:33-34 Tsia bhú Eki. 3:5, 7, 8, 10. † 7:37 7:37 Tsia bhú Det. 18:15, 18.

† 7:40 7:40 Tsia bhú Eki. 32:1. † 7:43 7:42-43 Tsia bhú Ams. 5:25-27.

Doto ne dabili na sa 'dhu ma.  
Mangua 'ti dho yi ayiki e muma?

Bili ma aguo lie su?

50 Ma bho ndu 'he bhomu-o hana ngama di?†»

51 Pipita-a, Etieni atsia apa me: «Ngayi-e, yi ne okpala na kpekpeke 'ndji! Bua yi agbigbite lie, 'dje yi atsia anini! Ndu 'kpi hana yi ngamene kpekebhe ne Bu Bhobua maka onguo ogbi yi! 52 A ko polofeta bhedho inde li onguo ogbi yi to mbolo li e de-e? U abhelo belegu obhende akpokpo 'ngú pindji nago ka Kpala na Ngingbili-o. Mbia inde-e, kpala ango-o, yi apu ani, yi atsia abhelo ani. 53 Ngayi okpala inde asia lili gba Ebhe-e ka oandjelu-o, engu bini, yi mene la lili ango-o de!»

#### *U abhelo Etieni*

54 Li okpala inde adu li bili nakodho 'ngú-o adje engu li Etieni apa e lie, u abi 'gu li bua o. U atsia aholo nazu tate o ngubula ani. 55 Engu bini, Etieni inde adu me ani nde abedhe ne Bu Bhobua-a, atsia 'kpi ne abhula, ani au zi Ebhe. Ani atsia au di Yesu me ani nde alu li pa 'kpa na kokpa gba Ebhe-o. 56 Ani atsia apa me: «Yi djedje nga! Ma au kokpi abhulu lie, Ndili gba kpala alu li pa 'kpa na kokpa gba Ebhe!»

57 Ndu okpala hana inde adu oo adje engu bhomu-o lie, u asula ne 'ue kpekpeke, u anini 'dje o. U anu ndu o hana bhú dabili bini, u atsia atuko pi Etieni. 58 U agbe ani bhú gudhu-o, u atsia aholo natutulú ani ne oteme ngu nabhelo ani. Okpala inde adu apa 'ngú li ani ne eu-o, abhu nani makombi bini. U atsia abu obongo gba o-o bhú li 'dhu ani ngu nalilila. A adu 'li makombi ango-o me Saulo.† 59 Nedhinga u adu atutulú Etieni lie ne teme ngu nabhelo ani-e, ani atsia ayo Ebhe me: «Ngamá Yesu, ha bua ma haha!» 60 Abhomu-o, ani akikita lipuku e kuto, ani asula kpekpeke me: «Ngamá, mo otsia siti 'ngú gba uo-o de!» Pita ani apa 'ngú bhomu-o lie, ani atsia andala 'kpa li bua e.

## 8

1 Abhomu-o, Saulo atsia aziba me u bhelo Etieni.

#### *U aholo nato mbolo li okpala na Piga gba Ebhe*

Bha li 'kpi ango-o, u aholo nato mbolo naali li okpala na Piga gba Ebhe na gudhu na Yelusalema. Ndu omabhuka hana akpe, naneke bha bini obhulu titima gba Yesu-o. U atsia atsambala bhú ndu doto na Yudaya ne bhú ndu doto na Samalia. 2 Okpala koko bhende adu akpe Ebhe-e aku 'gba Etieni naali. U aha kuo ani, u atsia anu azi. 3 La-a, Saulo aholo nato mbolo li Piga gba Ebhe-e ngu nabhelo. Ani adu nali bhú 'ti bini ne bini. Ani adu napandja omabhuka, olisi di ne obhosi, ani atsia adu namba uo bhú tikpu.

#### *Filipo akpokpo Bádha Ngali bhú Samalia*

4 Omabhuka inde atsambala adu anu ne ndu bili hana me u nde ne kpokpo Bádha Ngali. 5 Abhomu-o, Filipo anu bhú suka gudhu bini na Samalia. Oo-o, ani atsia akpokpo ngali gba Masiya-o. 6 Okpala bhelé ne bua bini abhuka 'li Filipo. Padhá de, anga u adu adje ngali ongu na ngangamba inde ani adu amene e-o. U atsia adu la di auu ne djila o. 7 Osisiti bua bhelé aze bhú okpala. Osisiti bua ango-o adu aze me u nde ngatu 'ue kpekpeke. Okpala bhelé inde adu odukuto, di ne obhende adu ne eze li 'dhu o-o, atsia akobho. 8 Abhomu-o, djali atsia adu naali bhú gudhu ango-o.

9 Kpala bini adu nani bhú gudhu ango-o, a adu 'li ani me Simo. Nayie didili naali, ani adu amene 'ngú na mambengu mambengu. Ndu okpala hana na ndu doto na Samalia adu angamba ka ani naali. Ani atsia adu apa me ni ne 'ngbé kpala. 10 Ndu okpala hana adu aha lio ngu naje ani, nayie li okpala na padhá, akolo li okpala na ngbengbenge. U adu napa me: «Kpala inde-e, a ko angu gba Ebhe, angu inde u a'i e me <Angu na ngbéngbé.>» 11 U adu nakpata ani, anga

† 7:50 7:49-50 Tsia bhú Isa. 66:1-2. † 7:58 7:58 Saulo: A ko 'ili na ebele. Polo: a ko 'ili na giliki. U aholo na'i ani me Polo li nedhinga ani aholo nakpokpo Bádha Ngali lie pi ogandji okpala ko.



nayie didili naali, ongu na mambengu gba ani-e adu angamba uo naali. <sup>12</sup> Engu bini, li Filipo adu akpokpo Bádha Ngali Naú gba Ebhe , di ne Yesu Kilisito lie pi uo-o, olisi ne obhosi abhuka. Pipita-a, u atsia asia batisimo. <sup>13</sup> Simo abhuka belegu di ngae, ani atsia asia batisimo. Ani du matá nayie de Filipo de. Ani adu nangamba naali li oehe di ne ongamba 'ngú na ngbengbengbe inde li Filipo adu namene e-o.

<sup>14</sup> Obhulu titima gba Yesu abhu gudhu na Yelusalema adje me okpála na ndu doto na Samalia asia eli gba Ebhe-o . Abhomu-o, u atima Piele di ne Djaa pi uo. <sup>15</sup> U akolo lie bhú ndu doto na Samalia oo, u atsia ayo Ebhe pi uo ngubula me u sia Bu Bhobua . <sup>16</sup> Padhá de, anga Bu Bhobua ke nga nani pi suka uo bini de. U asia nga bha nani batisimo ne 'li Ngámá Yesu. <sup>17</sup> Abhomu-o, Piele ne Djaa a'o 'kpa o pi 'ndji uo, u atsia asia Bu Bhobua.

<sup>18</sup> Simo au me Bu Bhobua aké pi okpála inde li obhulu titima a'o 'kpa o pi 'ndji o-o. Abhomu-o, ani ago ne tia me ni ngaha makiso pi Piele ne Djaa. <sup>19</sup> Do ani de me: «Yi ha di angu angu-o muma, amba kpála bhende ma a'ó 'kpa ma pi 'ndji e, ani de sia Bu Bhobua.» <sup>20</sup> Engu bini, Piele agie pi ani me: «Siti de bhaka bhado bha mu bhú dabili bini ne tia gba mu-o! Padhá de, anga mo obhundja me mu ti da nakala ehe inde li Ebhe ngaha e padhá-a ne tia. <sup>21</sup> Ndu 'ngú inde ngakodho 'kpí inde-e hana, a pi mu ade. Mu ti la di da nali bhúbhú de. Padhá de, anga bua mu kala Ebhe ngbingbili ade. <sup>22</sup> La-a, dji bua mu ka siti 'ngú inde mo obhundja e li bua mu ko. Yo ka Ngámá ngubula me, i du me ani nde akunda-a, ani de 'e siti 'ngú angu-o. <sup>23</sup> Padhá de, anga ma au me mo obedhe bhú mu ne gamu 'he. Mu la di bhú 'kpú gba siti.» <sup>24</sup> Abhomu-o, Simo apa pi Piele ne Djaa me: «Ngayi makpe-e, yi yo mangbo Ngámá ngú ma ngayi, ngubula me ngua 'ngú yi apa e bhomu-o, akólo li ma de.»

<sup>25</sup> Pipita-a, Piele ne Djaa akpokpo ongu

inde li Ngámá Yesu amene e li djila uo-o. U asuno eli gba ani-e pi okpála. Abhomu-o, u atsia agie lio bhú Yelusalema. Li kpadji-e, u akpokpo Bádha Ngali bhú okuti bhelé na ndu doto na Samalia.

### *Kpála bini na Etiopi adji bua e*

<sup>26</sup> Pipita-a, andjelu bini gba Ngámá-a apa pi Filipo me: «Yie bhúlá, amba mu ke li pápá na yoyoko, li kpadji inde ayie bhú gudhu na Yelusalema, atsia aké bhú Gadja ko. Kpadji angu-o apu bhú mili bili.» <sup>27</sup> Abhomu-o, Filipo ayie bhúlá, ani atsia aholo ne enú li kpadji angu-o. Li kpadji-e, bhoko bini akoto. A adu nani eniki,\* 'ngbé kpála na doto na Etiopi. Ani adu nalila ndu tia hana gba Kandase, ngámá na eole na Etiopi-o. Ani anu nani bhú Yelusalema ngú nadhogé Ebhe, <sup>28</sup> ani atsia adu nagie lie agba e. Ani adu kuto bhú kpulukpulu gba e-o. Ani atsia adu natanga bhuku gba polofeta Isaya.

<sup>29</sup> Bu Bhobua apa pi Filipo me: «Nu de kpulukpulu bhomu, amba yi nu ne bhúbhulu-o.» <sup>30</sup> Filipo anu bhú holo, ani atsia adje kpála na Etiopi bhomu-o ngatanga bhú bhuku gba polofeta Isaya. Abhomu-o, Filipo ayi ani me: «Engu inde mu ngatanga e bhomu-o, mu ngadje tata-a uu?» <sup>31</sup> Kpála angu-o agie me: «Ma ambíla la tata-a lele pi, i du me kpála nde kpokpo kúkú muma de-e?» Abhomu-o, ani a'i Filipo me ani 'u bhú kpulukpulu-o, amba ani du de ni. <sup>32</sup> Eli inde ani adu atanga e bhú bhuku gba Isaya ngae inde: «U adu nana ne ani maka kandole inde u adji nabhole e,

maka ndili kandole inde agbite 'bhe e li nedhinga u ngaka su ani lie-o.

Ani 'u 'bhe e de.

<sup>33</sup> U aké ani ne kuto, u kodho 'ngú gba ni-e ngbingbili de.

A ko da inde i ti da napa 'ngú gba ongisi gba ani-e?

Padhá de, anga u a'e mukobho gba ani-e píla doto a'e.†»

<sup>34</sup> Bhoko na Etiopi angu-o ayi Filipo me: «Ma ayo ka mu me pa nga muma:

\* **8:27** 8:27 Eniki: A ko bhoko inde i ti da nakanda ole de, anga angu na bhoko bhú ani ade. Tsia bhú Mat. 19:12.

† **8:33** 8:32-33 Tsia bhú Isa. 53:7-8.

polofeta ngapa 'ngú bhomu-o li da? Ne me aní ngapapa lí e, ne me aní ngapapa lí kpála koko?» <sup>35</sup> Abhomu-o, Filipino aholo na'o'o tata pí aní lí Bádha Ngali gba Yesu-o nayie lí Eli inde aní adu atanga e-o.

<sup>36</sup> U adu anu lie lí kpadji-e, u akolo lí bili bini, adu oo ne engu. Abhomu-o, 'ngbé kpála ango-o apa pí Filipino me: «Tsia nga engu ii! Nasia batisimo ka ma-a, a adha mbia inde-e lí ní?» [ <sup>37</sup> Filipino atsia apa pí aní me: «Í dā me mē nde abhuka ne bua mē hana-a, mē tí da nasia batisimo.» Kpála ango-o agie pí aní me: «Ma abhuka me Yesu Kilisito ne Ndili gba Ebhe.»] <sup>38</sup> Abhomu-o, aní atsia apa me kpulukpulu-o lulu. Pipita-a, ndu uo bhisi hana, Filipino ne kpála ango-o, akə bhú 'ngu. Filipino atsia abatisa aní. <sup>39</sup> Lí u aze lie bhú 'ngu-o me-e, Bua gba Ngámá-a atsia adhepe Filipino. Kpála na Etiopi u matá aní de. Kpála na Etiopi ango-o aholo bha ibili enú kpi e kpi me aní nde ngakpi djali. <sup>40</sup> La pí Filipino-o, u anu au bha ibili aní bhú gudhu na Adjota. Pipita-a, aní apu bhú ndu ogudhu hana me aní nde ngakpokpo Bádha Ngali akólo bha bini lí nedhinga aní akolo lie bhú Sedjale ko.

## 9

### *Saulo adji bua e*

*(Tsia bhú Kul. 22:6-16, 26:12-18.)*

<sup>1</sup> Lí nedhinga bhomu-o, Saulo adu nagili omukpata gba Ngámá Yesu ngú nabhili uo. Ekpí koko aní anu nabhaka bhele kpála gba odimandə gba Ebhe-o . <sup>2</sup> Aní anu nayo balua me ní nu ne di ngú nali bhú otí nadjé líli gba Moidje inde bhú gudhu na Damasi. Ní nu oo, amba í dā me ní nde abhaka okpála inde ngakpata 'ngú gba Yesu-o, obhosi di ne olisi, ní de holo uo, amba ní nu ne uo bhú gudhu na Yelusalema.

<sup>3</sup> Nedhinga aní adu anu lie, aní akolo lie de Damasi masikpe-e, má gala kolo me-e, zì 'kpí bini ayie abhúlá, a ago asa ngo aní ngbalina. <sup>4</sup> Aní atsokodho atí kuto má ngbi! Aní atsia adje eli bini apa pí aní me: «Saulo, Saulo, mē ngato mbolo lí ma ngú ní?» <sup>5</sup> Abhomu-o, Saulo atsia ayi me:

«Ngámá, a ko mē da?» Eli atsia akoto matá pí aní me: «A ko ma Yesu, mē ngato mbolo e lí ma. <sup>6</sup> La-a, yie bhúlá yiyie, amba mē nu bhú gudhu. Engú inde ayo me mē mene e-e, u apá pí mē oo ko.»

<sup>7</sup> Okpála inde adu anu ne aní bhú dabili bini-e alulu. Bhú 'bhe uo akpina má ndje ka tsulu. U adu adje eli, engú bini, u dā au kpála inde adu agama 'ngú-o de. <sup>8</sup> Abhomu-o, Saulo ayie bhúlá, aní abhulu djila e, engú bini, aní u la 'kpí de. U atsia aholo 'kpa aní ngú nanu ne aní bhú Damasi. <sup>9</sup> Oo, aní amene ngbolo 'kpí bata. Aní u 'kpí de, aní zū 'he de, aní ndji la di ehe nandji mandji de.

<sup>10</sup> Mukpata bini adu bhú Damasi oo, a adu 'lí aní me Anania. Ngámá a'í aní bhú ehe maka loto me: «Anania!» Anania atsia abhuka me: «Ma ii, Ngámá!»

<sup>11</sup> Abhomu-o, Ngámá atsia apa pí aní me: «Mbia inde-e, a ayo me mē nu lí kpadji inde u a'í e me Ngbili kpadji bhú 'tí gba kpála bini inde u a'í e me Yuda. Yi Saulo, kpála na gudhu na Talasi. Lí nedhinga inde-e, aní ngayo Ebhe. <sup>12</sup> Aní atsia au bhú 'he maka loto kpála bini, inde 'lí e me Anania, ali bhú 'tí nganda ní. Kpála ango-o atsia a'o 'kpa e pí 'ndji aní ngú napa me aní u matá 'kpí.»

<sup>13</sup> Anania atsia agie me: «Ngámá, okpála bhelé apa 'ngú mēma píndji bhoko bhomu. Ma mbila la di ndu siti 'ngú hana inde aní amene e lí kute okpála na bububu gba mē bhú Yelusalema-o.

<sup>14</sup> Ongbengbe odimandə aha la di kpadji pí aní me aní go ei ngú naholo ndu okpála hana inde ngabhuka mē-o.» <sup>15</sup> Engú bini, Ngámá apa pí aní me: «Nunu, anga bhoko bhomu-o, ma abhu aní ngú kulu gba ma-o. Aní anú nakpokpo engú gba ma-a pí opiga inde í mbila ma de, pí ongbengbe ongámási gba uo, di ne pí omafsalaele.

<sup>16</sup> Ma asúno pí aní, ngama makpe, ndu likabhu hana inde a ayo me aní zū e kabula 'lí ma-o.»

<sup>17</sup> Abhomu-o, Anania anu, aní ali bhú 'tí oo, aní abhaka Saulo, aní a'o 'kpa e pí aní. Aní atsia apa me: «Ndai ma Saulo, Ngámá atima ma ngae. A ko Yesu inde akoto lí

m̄ li kpadji nedhinga mo odu nago lie-o. An̄i atima ma, ngubula me m̄ u matá 'kpí, amba m̄ bedhe di ne Bu Bhobua .»  
<sup>18</sup> Kolo má gala me-e, ehe maka kudh̄u 'he ayie bhú djila Saulo, abala kuto. An̄i atsia aholo nau matá 'kpí. Abhom̄-o, an̄i ayie bhúlá, an̄i atsia asia batisimo. <sup>19</sup> Pipita-a, an̄i azu 'he, an̄i atsia asia angu.

### *Saulo akpokpo Bádha Ngali bhú gudh̄u na Damasi*

Saulo amene mbo ekpí bhú dabili bini ne om̄kpata na Damasi. <sup>20</sup> Kolo má gala me-e, an̄i aholo nakpokpo pi omaYuda bhú oeti nadge líli gba Moidje me Yesu ne Ndili gba Ebhe. <sup>21</sup> Ndu okpála hana inde adu nadge an̄i-e adu angamba naali. U adu nayi me: «A inde-e bhulu nato mbolo li okpála inde ngabhuka Yesu abhú gudh̄u na Yelusalema di? An̄i go nako e ngu naholo uo, di ne nanu ne uo pi ongbengbe odimandø gba Ebhe di?»

<sup>22</sup> Engú bini, Saulo adu akolo ne angu bhú nasuno. An̄i adu asuno mbámá pi omaYuda na Damasi me Yesu ne Masiya . Kaka-a, u du nambila matá engú inde u agie e pi an̄i-e de.

<sup>23</sup> Pita ekpí bhelé, omaYuda adje lio me o bhøle Saulo. <sup>24</sup> Engú bini, Saulo ambila siti mabhundja gba uo-o. U atsia adu di nalila obhoti na gudh̄u-o sukpe ne ngbikpi ngubula nato an̄i, amba o bhøle an̄i. <sup>25</sup> Sukpe bini-e, ngaani ne om̄kpata gba e, u anu li malilisa na aga na gudh̄u-o. U ato an̄i bhú kili, u atsia akø an̄i ne di kuto akilidjo.

### *Saulo bhú gudh̄u na Yelusalema*

<sup>26</sup> Li Saulo akolo lie bhú Yelusalema-a, an̄i adu nale nagbite lie li om̄kpata, engú bini, ndu uo hana adu nadge tsulu. Padhá de, anga u du nabhuka de me a ko ndju kukulu mukpata-a de. <sup>27</sup> La-a, Balanabasi anu aha Saulo, an̄i atsia anu ne an̄i pi obhulu titima gba Yesu-o . Oo, Balanabasi akpokpo pi uo maka li Saulo au Ngámá Yesu lie li kpadji, di ne maka li Ngámá agama 'ngú lie pi an̄i-o. An̄i atsia akpokpo di maka li Saulo du nasuno 'ngú lie ne tsulu de ne 'li Yesu bhú Damasi-o. <sup>28</sup> Abhom̄-o, obhulu titima atsia aziba

Saulo. Nayie li nedhinga bhom̄-o, Saulo du matá na'o ká obhulu titima-a de. U adu adhuku bhú Yelusalema bhú dabili bini. An̄i tsia du nasuno ne 'li Yesu ne tsulu de. <sup>29</sup> An̄i adu di nasuno pi omaYuda inde adu nadi eli na giliki-o, an̄i atsia adu namene kpekebhe ne uo. Engú bini, ngauo-o, u adu agili nabhele an̄i. <sup>30</sup> Li ondaise Saulo, omabhuka adje lie, u anu na'o Saulo bhú Sedjale. Oo, u atsia atima an̄i bhú Talasi.

<sup>31</sup> Abhom̄-o, omabhuka bhú ndu doto na Yudaya, bhú ndu doto na Galilaya, di ne bhú ndu doto na Samalia libhomu adu bhú guo 'ngú . U adu akolo kpekepe bhú nabhuka. U adu amanga Ngámá mamanga. U atsia adu nabe ndu o, ka angu gba Bu Bhobua.

### *Piele akobho Ene*

<sup>32</sup> Piele adu napu ne ndu bili hana. Abhom̄-o, ekpí bini, an̄i anu natsia omabhuka inde adu bhú gudh̄u na Lida-o. <sup>33</sup> Oo-o, an̄i abhaka bhoko bini, a adu 'li an̄i me Ene. Sunda kalanga madjina, an̄i adu me an̄i nde asi kuto pi kalagba gba e-o. Padhá de, anga adu nani dukuto. <sup>34</sup> Li Piele au an̄i lie, an̄i atsia apa pi an̄i me: «Ene, Yesu Kilisito akobho m̄ mbia inde akobho! Yie bhúlá, amba m̄ leke dabili gba m̄-o, ngamu makpe.» Kolo má gala me-e, Ene ayie bhúlá. <sup>35</sup> Ndu okpála hana na Lida, di ne egu na Salona au lie mo-o, u adji bua o, u atsia abhuka Ngámá

### *Piele azuku Tabita*

<sup>36</sup> Li nedhinga bhom̄-o, mukpata bini na øle adu nani bhú gudh̄u na Djope, a adu 'li an̄i me Tabita (bhú eli gba oGiliki-e me «Dolokasi», a akunda napa me «gbelende»). An̄i adu amene obabadha 'ngú, an̄i atsia adu ateteke di obhulu ndibhili ndu 'kpí hana. <sup>37</sup> Ekpí bini, an̄i asi kuo, an̄i atsia akpi. U avulu kate kuo an̄i, u atsia a'o bhú tina 'ti bini abhúlá.

<sup>38</sup> Gudh̄u na Lida masikpe de gudh̄u na Djope. Kaka-a, li om̄kpata adje lie me Piele bhú Lida-a, u atsia atima okpála bhisi ngu napa pi an̄i me: «Kikiliako, ya ayo ka m̄ me go nga gba ya ei má gala!» <sup>39</sup> Piele ayie bhúlá kolo má gala, an̄i atsia anu bhú dabili bini ne okpála inde u atima o-o. An̄i akolo lie oo-o, u

anɔ na'o ani bhú tina 'ti inde abhúlá-o. Ndɔ oøkəsi hana na gɔdhɔ ango-o ago de Piele me u nde ngaku 'gbá. U adɔ asuno obongo na mbulu, di ne okoti inde li Tabita adɔ amene e nedhinga ani adɔ lie bhú mukobho-o pi ani.

<sup>40</sup> Piele apandja ndɔ okpála hana kilidjo, ani akikita lipukɔ e kuto, ani atsia ayo Ebhe. Pipita-a, ani adji bhúla e ne apí kuo-o, ani atsia apa me: «Tabita, yie bhúlá!» Abhomɔ-o, Tabita a'ɔ djila e. Li ani au Piele lie, ani atsia adɔ madɔ. <sup>41</sup> Piele aholo 'kpa ani, ani atsia a'e ani bhúlá. Pipita-a, Piele a'i omabhuka koko di ne oøkəsi na olisilisi, ani atsia asuno ani pi uo me ani nde ɔ. <sup>42</sup> Ndɔ okpála hana na Djope adje engú inde akodho 'kpí-o. Abhomɔ-o, okpála bhelé atsia abhuka Ngámá. <sup>43</sup> Piele amene bhú Djope ekpí bhelé. Ani adɔ nadɔ gba kpála bini inde li 'li e adɔ me Simo. Kpála ango-o adɔ namene kulu na kó 'nɔ.

## 10

### *Koloneli a'i Piele agba e*

<sup>1</sup> Kpála bini adɔ nani bhú gɔdhɔ na Sedjale, a adɔ 'li ani me Koloneli. Ani adɔ ngámá pí 'ndji osudha kámá bini. Libi osudha ango-o inde u a'i e bhú dabili bini ne osudha koko-o me «Libi osudha na Itali.» <sup>2</sup> Kpála ango-o adɔ amanga Ebhe di ne nakpe Ebhe bhú dabili bini ne piga gba e libhomu. Ani adɔ ateteke obhulɔ ndibhili inde adɔ bhú ká omaYuda-a naali. Ani atsia adɔ ayo Ebhe piko.

<sup>3</sup> Ekpí bini, masikpe de saa na bata pita tulukpe-e, ani au mbámbá bhú 'he maka loto me andjelu bini gba Ebhe-e nde ngali agba ani. Andjelu ango-o a'i ani me: «Koloneli!» <sup>4</sup> Ani atsia andjelu ango-o ne tsulɔ hana. Ani atsia apa pi ani me: «A ko mangua 'ngú dho, Ngámá?» Andjelu-o agie pi ani me: «Ebhe adje nayo gba mɔ-o adje. Ani aziba di oehe inde mɔ ngaha e pi obhulɔ ndibhili-o. Kaka-a, 'to ani 'ili li mɔ de. <sup>5</sup> Mbia inde-e, tima okpála bhú Djope ngubula na'i kpála bini inde u agisila 'li e me Simo

Piele-o. <sup>6</sup> Ani ngasi agba kpála bini inde 'li e me Simo, kpála namene kulu na kó 'nɔ. Kutu gba ani-e a de 'ngbé 'ngu.»

<sup>7</sup> Pipita-a, andjelu inde agama 'ngú pi ani-e atapa. Abhomɔ-o, Koloneli atsia a'i okpála na kulu gba e bhisi, di ne sudha bini. Sudha ango-o adɔ kpála nakpe Ebhe. Ani atsia asi di nani bhú kulu gba ani-e naali. <sup>8</sup> Koloneli akpokpo ndɔ 'ngú inde akodho 'kpí-e hana pi uo. Pipita-a, ani atsia atima uo bhú Djope. Abhomɔ-o, u atsia agbida.

### *Piele anɔ agba Koloneli*

<sup>9</sup> Li ekpí aseke lie, okpála u atima o-o adɔ nga bha lie li kpadji-e, u akolo de gɔdhɔ na Djope. A abhaka me Piele nde a'ɔ apí 'ngbɔ 'ti ngú nayo Ebhe masikpe de tulukpe. <sup>10</sup> La-a, gumɔ aholo amene ani, ani adɔ akunda nazɔ 'he. Nedhinga u adɔ alɔ 'zɔ-o lie pi ani-e, ani atsia au engú maka loto. <sup>11</sup> Ani au kokpí abhulu lie. Ani au ehe bini maka 'ngbé 'kpá bongo. U ahoholo li odjedje badha. A ayie abhúlá, atsia adɔ akɔ kuto.

<sup>12</sup> Bhú 'ngbé 'kpá bongo ango-o, ndɔ djua onɔ hana na 'dɔ badha, ne ndɔ djua onɔ inde ngagbele lio ne 'bu o kuto, di ne ndɔ djua odhu hana adɔ bhúbhú.

<sup>13</sup> Abhomɔ-o, ani adje eli bini inde apa pi ani me: «Piele, yie bhúlá! Bhɔbhɔ, amba mɔ zɔ!» <sup>14</sup> Engú bini, Piele agie me: «A mo-o ade, Ngámá! Padhá de, anga ma zɔ nga ezɔ inde li líli gba Moidje ayala e, di ne bhende na sisiti kala Ebhe belegu de bini.\*» <sup>15</sup> Ani adje matá eli ango-o bhutsibhutsi na bhisi-e me: «Ehe inde li Ebhe adji e akolo bubu-o, mo opá de me a sisiti-e de.» <sup>16</sup> Engú ango-o amene lie bhutsibhutsi bata. Pipita-a, má gala kolo me-e, bongo ango-o atsia agie lie abhúlá.

<sup>17</sup> Abhomɔ-o, mabhundja gba Piele atsia angbingi ka engú inde ani au e-o. Ani adɔ ayi bua e me: «Tata-a pi?» Bha li nedhinga li Piele adɔ ayi bua e lie bhomɔ-o, okpála inde li Koloneli atima o akolo li bhoti gba Simo-o. A adɔ me u nde ayi okpála me eti gba Simo-o su. <sup>18</sup> U a'i kpála bini, u atsia ayi ani me: «A inde-e bili

\* **10:14** 10:14 Líli gba omaYuda adɔ nani nayala nazɔ onɔ koko maka pame mayala.

li Simo u agisila 'li e me Piele asisi lie?»  
 19 Li nedhinga bhomu-o, Piele adu nga bha nabhundja pindji engu inde ani au e-o. Abhomu-o, Bu Bhobua atsia apa pi ani me: «Tsitsia nga, okpala bata† ngagili mu. 20 Yie bhula, ke akuto, amba yi nu bhú dabili bini ne uo. Mo odjidi limu de. Padha de, anga ma atima uo ngama.»

21 Abhomu-o, Piele ake, ani abhaka okpala ang-o. Do ani pi uo me: «Kpala inde yi ngagili e-e, a ko ma. Yi ago la ngu ni?» 22 U agie pi ani me: «Ngama gba osudha, inde 'li e me Koloneli-e atima ya ngae. A ko kpala na ngbingbili, inde di ngadhoge Ebhe. Ndu omaYuda hana ngapa 'ngu gba ani-e ndjindji. Andjelu bini gba Ebhe-e akoto li ani, ani atsia apa pi ani me: «Tima okpala ngu na'i Piele, amba mu dje engu inde ani akpokpo e pi mu ko.» 23 Abhomu-o, Piele ato okpala ang-o abhu 'ti. Ani atsia asuno dabili u asi lie pi uo. U atsia asi tete.

Li ekpi aseke lie, Piele anu bhú dabili bini ne uo. Abhomu-o, omabhuka koko na Djope atsia anu na'o Piele. 24 Pita 'kpi bini-e, u atsia akolo bhú Sedjale. A abhaka me Koloneli nde apo bhula omaha e di ne obi e na mukunda. Ani atsia adu adjeke uo oo. 25 Li Piele akolo lie, Koloneli ago nakeli ne ani. Ani ati bhú li 'dhu ani. Ani atsia atu bhula e ne kuto ngu namanga ani. 26 Engu bini, Piele a'e ani bhula. Ani atsia apa pi ani me: «Lu malu! Padha de, anga ngama-a, ma bhadi ne kpala na padha!» 27 Ani adu agama 'ngu lie ne Koloneli-e, ani atsia ali abhu 'ti. Oo, ani abhaka me bhiti okpala nde apo bhula o. 28 Ani apa pi uo me: «Yi ambila ndjindji me lili ziba de me maYuda bini du bhú dabili bini ne gandji kpala-a de. A ziba la di de me ani nu agba ani-e de. Engu bini, ngama-a, Ebhe asuno mu ma me ma a'i kpala bini de me a ko kpala na sisiti kala Ebhe-e de. 29 Kaka-a, mo o'i ma lie, ma yala de. Mbila inde-e, ma akunda nambila ta 'ngu inde mo o'i ma ngu e-o.»

30 Abhomu-o, Koloneli agie pi ani me: «A ane nga ekpi bata, masikpe de li

ngua nedhinga inde, bhú saa na bata pita tulukpe, ma adu nayo Ebhe bhú 'ti gba ma-o. Kolo me-e, kpala bini alu kala ma. Ani adyi bongo inde adu li e ne zizi. 31 Ani atsia apa mu ma me: «Koloneli, Ebhe adje nayo gba mu-o adje. Ani atsia abhundja di maka mu ngateteke obhulu ndibhili lie ko. 32 Mbila inde-e, tima okpala bhú Djope ngu na'i Simo inde u agisila 'li e me Piele. Ani ngadu gba Simo, inde adudu dengo 'ngbe 'ngu, kpala namene kulu na ko 'nu.» 33 Abhomu-o, ma atima bha kolo okpala ngu na'i mu ma gala! Heni naali! A ndjindji maka mo ogo lie-o. Mbila inde-e, ndu ni hana ni kala Ebhe si ngu nadje ndu 'ngu hana inde li Ngama akpokpo e pi mu me mu pa e pi ya-o.»

### *Piele akpokpo Bádha Ngali pi ogandji okpala*

34 Abhomu-o, Piele aholo nakpokpo me: «Mbila inde-e, ma ambila ndjindji me Ebhe gbogbo bhusu okpala de. 35 Engu bini, bhú ka ndu opiga hana, kpala inde ngamanga Ebhe, inde di ngamene engu na ngbingbili-e, kpala ang-o bhú djila Ebhe ndjindji. 36 Yi mbila ndjindji me Ebhe atima eli gba e pi omafalaale. A ko Bádha Ngali na guo 'ngu inde ni asia e ka Yesu Kilisito-o. Ngaani-e, a ko Ngama gba ndu okpala hana. 37 Yi mbila ndu 'ngu hana inde akodho 'kpi nayie bhú ndu doto na Galilaya, akolo bhú ndu doto na Yudaya libhomu, pita li Djaa akpokpo eli gba Ebhe, di ne nabatisa okpala lie ko.

38 Yi mbila hana me Ebhe abhu nani Yesu, kpala na Nadjaleta-a kalanu. Ani atsia aha Bu Bhobua di ne angu pi ani ngu namene kulu gba e-o. Ani apu ne ndu bili hana me ani nde ngamene badha 'ngu. Ani atsia adu di nakobho ndu okpala hana inde li Djabulu agbigbite o-o. Padha de, anga Ebhe adu bhú dabili bini ne ani. 39 Ngaya makpe, obhulu titima gba Yesu-o, ya au ndu 'ngu hana inde ani amene e bhú kuti gba omaYuda di ne bhú Yelusalema ne djila ya. U abhelo ani me u nde agi ani li kulusi. 40 Engu bini, Ebhe

† 10:19 10:19 U aye bhú obhuku koko me «kpala bini.» U aye bhú okoko me «okpala bhisi.» U atsia aye bhú okoko me «okpala.»

azuku ani bhú 'kpí na bata. Ani aha angu pi ani ngú napana lie pi okpála me ni uu.

<sup>41</sup> Ani pana lie pi ndu okpála hana de. Engú bini, ani apana bha lie pi ya okpála inde li Ebhe abhu o kalanu, inde au 'ngú angoo ne djila o-o. Pita ani azuku lie, ya azu 'he, ya atsia andji di ehe bhe nandji mandji ne uo bhú dabili bini. <sup>42</sup> Abhomu-o, ani atsia atima ya me ya nu ne kpokpo Bádha Ngali pi okpála. Ani atima ya me ya apa pi okpála me, a ko kpála inde li Ebhe a'o e ngú nakodho 'ngú gba okpála inde uu di ne okpála bhende amu-o. <sup>43</sup> Ndu opolofeta hana akpokpo 'ngú gba ani-o. U akpokpo me kpála ne kpála inde abhuka Yesu-o, Ebhe a'é siti 'ngú gba ani-e ka Yesu.»

### *Ogandji okpála asia Bu Bhobua*

<sup>44</sup> Bha li nedhinga li Piele adu akpokpo 'ngú bhomu-o lie, Bu Bhobua atsia akè pí ndu okpála hana inde adu adje ani-o. <sup>45</sup> OmaYuda koko inde abhuka Yesu-o, ago bhú dabili bini ne Piele. U angamba naali, anga u au me Ebhe atuko di Bu Bhobua pí ogandji okpála. <sup>46</sup> Padhá de, anga u adu adje uo ngagama 'ngú bhú odikongu koko. U adu adhögö Ebhe maka ani nde lie ngbéngbé-o. Abhomu-o, Piele atsia apa me: <sup>47</sup> «Mbia inde-e, li okpála inde asia di Bu Bhobua lie maka ní-e, kpála bini ti da nayoko me u abátisa uo ne engu di?» <sup>48</sup> Ani aha líli me u batisa uo ne 'li Yesu Kilisito. Abhomu-o, u atsia ayo ka ani me ani du nga mbo ne o ngubula mbo 'kpí bedi.

## 11

### *Piele akpokpo maka li ogandji okpála asia Bu Bhobua lie ko*

<sup>1</sup> Obhulu titima gba Yesu, di ne omabhuka inde bhú ndu doto na Yudaya-a, adje me ogandji okpála asia di eli gba Ebhe, u atsia abhuka Yesu Kilisito. <sup>2</sup> Li Piele agie lie lie bhú gudhu na Yelusalema-a, omaYuda inde abhuka\* aholo namene kpekebhe ne ani. <sup>3</sup> U adu apa me: «Lele

pi ngamu kpála inde ali gandja mo oli lie bhú 'ti gba okpála inde i li gandja de-e, mo otsia azu belegu di 'he ne uo bhú dabili bini-e?†»

<sup>4</sup> Abhomu-o, Piele atsia aholo akpokpo kúkú pi uo nayie li lilita. Ani pi uo me: <sup>5</sup> «Ngama-a, ma adu bhú gudhu na Djope. Nedhinga ma adu ayo Ebhe lie, ma au engú maka loto. Ehe bini ayie abhúlá maka 'ngbé 'kpá bongo. U aholo li odjedje badha. A ayie abhúlá, atsia akè kuto li bili ma adu lie-o. <sup>6</sup> Ma atsia 'kpí bhúbhú ne kpéke djila. Ma au onu na kuti, ma au onu na bili, ma au onu bhende ngagbele lio ne 'bu o kuto di ne odhu. <sup>7</sup> Ma atsia adje di eli bini inde apa muma me: «Piele, yie bhúlá! Bhèbhèlè amba mu zu!» <sup>8</sup> Abhomu-o, ma atsia apa me: «A mo-o ade, Ngámá! Padhá de, anga ezu inde li líli gba Moidje ziba e de-e, di ne bhende na sisiti kala Ebhe li nga bhú 'bhè ma belegu de bini.» <sup>9</sup> Bhutsibhutsi na bhisí, ma adje matá eli ayie abhúlá, a apa muma me: «Ehe inde li Ebhe apa li e me a bubu-o, mo opá de me a sisiti-e de.» <sup>10</sup> Engú angoo, amene lie bhutsibhutsi bata. Pipita-a, bongo angoo ne ndu 'he inde bhúbhú-o hana atsia agie lie abhúlá.

<sup>11</sup> Bha li nedhinga bhomu-o, obhosi bata akolo li bili inde ya adu li e-o. Kpála bini na gudhu na Sedjale atima uo me u go bhaka ma. <sup>12</sup> Abhomu-o, Bu Bhobua apa muma me: «Nu bhú dabili bini ne uo, mo opá de me a ko ogandji okpála-a de.» Ondaise ma madhia inde-e atsia anu bhú dabili bini ne ma. Ndu ya hana, ya ali bhú 'ti gba kpála inde a'i ya-o. <sup>13</sup> Abhomu-o, ani akpokpo pi ya maka li andjelu akoto li ani lie abhú 'ti gba ani-o. Andjelu angoo atsia apa pi ani me: «Tima okpála bhú gudhu na Djope ngú na'i Simo inde u agisila 'li e me Piele-o. <sup>14</sup> Ani akpokpo pi mu, ngamu di ne okpála inde bhú 'ti gba mu-o, eli gba Ebhe inde akóbho mu-o.»

<sup>15</sup> Li nedhinga li ngama Piele, ma aholo nagama 'ngú lie, Bu Bhobua atsia akè pí uo maka ani akè nani di lie pí ní li

\* **11:2** 11:2 Okpála koko na imbilangu adu nabhundja me té omaYuda bedi adu apa me a ayo me ogandji okpála li bhú gandja ngú nakolo omakilisito. † **11:3** 11:3 Líli gba omaYuda ziba nani de me u du bhú dabili bini ne ogandji okpála de.

'kpí na Patekote ko. <sup>16</sup> Abhomu-o, ma atsia abhundja eli gba Ngámá inde apa me: «Djaa abatisa nani okpála ne engu, engú bini ngayi-e, yi asía batisimo na Bu Bhobua.» <sup>17</sup> Ma au mbámbá me Ebhe aha Bu Bhobua pí ogandji okpála bhomu-o, maka ani aha di nani koli Bu Bhobua bini bhomu-o pí ní, li nedhinga inde ní abhuka Ngámá Yesu Kilisito lie-o. La-a, ngama-a, ma ne da me ma yoko Ebhe li engú inde ani akúnda namene e?» <sup>18</sup> Li omaYuda inde abhuka bhomu-o adje lie, u adhege Ebhe, u atsia apa me: «A na paká me Ebhe aha di nadji bua o pí ogandji okpála, amba u sia di mukobho na dudu.»

*Lita Dadjua gba Ebhe na gudhu na Atiokia bhú ndu doto na Silia*

<sup>19</sup> Pita u abhelo Etieni lie, u aholo namene omabhuka sisiti. Abhomu-o, omabhuka bhelé atsia atsambala.‡ Okoko bhú ká uo agbida bhú ndu doto na Fenisia, di ne bhú kpemè na Sipele, di ne bhú gudhu na Atiokia. U atsia adu nakpokpo Bádha Ngali gba Yesu-o bha bini pí omaYuda. <sup>20</sup> Okoko bhú ká uo adu okpála na kpemè na Sipele, di ne gudhu na Silene. U anu bhú gudhu na Atiokia. Abhomu-o ngauo, u atsia aholo nakpokpo Bádha Ngali gba Ngámá Yesu di pí ogandji okpála. <sup>21</sup> Angu gba Ngámá-a adu bhú dabili bini ne uo. Kaka-a, ogandji okpála bhelé abhuka, u atsia adji lio pí Ngámá.

<sup>22</sup> Omabhuka na Yelusalema adje engú ang-o. Abhomu-o, u atsia atima Balanabasi bhú Atiokia. <sup>23-24</sup> Balanabasi nani ne bádha kpála. Ani abedhe nani ne Bu Bhobua di ne nabhuka bedhe. Ani akolo oo, ani atsia au me Ebhe atuko bisagu pí omabhuka. Abhomu-o, ani akpi djali, ani atsia ato masi bhú ndu uo hana me u ha lio pí Ngámá ne bua o bini. Abhomu-o, okpála bhelé atsia abhuka Ngámá.

<sup>25</sup> Pipita-a, Balanabasi anu nagili Saulo bhú gudhu na Talasi. <sup>26</sup> Li ani au ani lie, u atsia agie lio ne ani bhú gudhu na Atiokia. Ndu uo bhisi hana amene kalanga bini libhomu bhú ká omabhuka ang-o. U atsia adu asuno pí okpála bhelé. U agisila nani 'ili na omakilisito

li omabhuka bhutsibhutsi na bini bhú gudhu na Atiokia.

<sup>27</sup> Li nedhinga bhomu-o, opolofeta koko ayie bhú gudhu na Yelusalema, u atsia ago bhú gudhu na Atiokia. <sup>28</sup> Abhomu-o, saka uo bini, a adu 'li ani me Agabusi ayie bhúlá. Ani akpokpo bhú angu gba Bu Bhobua me: «Adyindi na ngbéngbé alí pála doto libhomu.» (Atsia amene lie bhú nedhinga li Kolode adu lie 'ngbé ngámá-o.) <sup>29</sup> Omabhuka atsia apa me kpála ne kpála ha tia bhende li angu ani akólo lie, ngubula natitima me ateteke omabhuka inde bhú ndu doto na Yudaya ko. <sup>30</sup> Abhomu-o, u amene bhadi mo-o. U atsia atima tia ang-o pí obhelesi okpála bhú Yelusalema sa 'kpa Balanabasi ne uo ne Saulo.

## 12

*Elode abhelo Djaki, ani atsia abhike Piele bhú tikpu*

<sup>1</sup> Bhú nedhinga bhomu-o, 'ngbé ngámá Elode Agilipa aholo amene okpála koko na Piga gba Ebhe-e sisiti. <sup>2</sup> Ani aha líli me u bhelo Djaki, ndai Djaa, ne mbotia. U atsia abhelo ani. <sup>3</sup> Li ani au lie me engú ang-o anga li omaYuda naali-e, ani atsia aha matá líli me u holo Piele. (A adu masikpe de nedhinga na anokomia na Pasika, di ne anokomia nazu mapa inde li levile nde bhú e ade ko.) <sup>4</sup> Li ani aholo Piele lie, ani abhike ani bhú tikpu. Abhomu-o, ani atsia a'o osudha badha badha bhú libi badha ngú nalila ani. Ani adu akúnda nakodho 'ngú gba ani-e bhú ká djila ndu okpála hana pita anokomia na Pasika-o. <sup>5</sup> Li Piele adu lie bhú tikpu-o, okpála na Piga gba Ebhe-e adu ayo Ebhe ne bua o hana ngubula ani.

*Piele akoto bhú tikpu maka ndjombe*

<sup>6</sup> Sukpe kala me Elode kodho 'ngú gba Piele, Piele adu ala sánda osudha bhisi. A adu me u nde agbigbite ani ne ogbindjili bhisi. Omulila atsia adu alila obhoti na tikpu-o. <sup>7</sup> Má gala kolo me-e, andjelu bini gba Ngámá-a akoto. Zi djua aha bili bhú tina 'ti ang-o hana. Andjelu-o adula Piele

‡ **11:19** 11:19 Pita nabhelo Etieni-e, u adu ato mbolo li omabhuka ane kalanga ndjikpa mane. Kaka-a, omabhuka bhelé atsia atsambala.

li kala e, ani azukú ani. Ani atsia apa pi ani me: «Yie bhúlá má gala!» Abhomu-o, ogbindjili-e abhulu bhú 'kpa ani, atsia abala kuto.

<sup>8</sup> Pipita-a, andjelu-o apa pi ani me: «Gbite 'kpú ludu mu, mu toto la di malokè gba mu-o bhú 'dhu mu.» Piele amene bhadi moko. Andjelu-o atsia apa matá pi ani me: «To koti gba mu-o, amba mu kpata ma.» <sup>9</sup> Piele aholo nakpata andjelu-o, ani atsia akoto bhú tina 'ti inde ani adu bhú e ko. Ani du ambila de me engú inde li andjelu ngamene e-e, a ko kukulu 'ngú-o de. Ani adu abhundja naae me a ko ehe maka loto. <sup>10</sup> U ane libi osudha na bini inde adu nalila tikpu-o. Pipita-a, u ane libi osudha bhende na bhisi-o. U akolo li 'ngbé bhoti na kalase inde nakoto bhú gudhu-o. Bhoti angoo a'u bha lie kala uo ne titi e, u atsia aze. U aholo 'nú, u akolo li kpadji bini. Má gala kolo me-e, andjelu-o angita li ani má pele!

<sup>11</sup> Abhomu-o, Piele ambila me engú inde amene lie-e, a ko kukulu 'ngú. Ani atsia apa me: «Mbia inde-e, ma ambila na paká me Ngámá atima andjelu gba e, ani atsia akobho ma sa 'kpa Elode di ne ndu osisiti 'ngú hana inde li omaYuda adu akunda namene e ngú ma ko.»

<sup>12</sup> Li imbilangu gba Piele abhulu lie lie, ani atsia anu bhú 'ti gba Malia , 'hi Djaa , kpála u agisila 'li e me Maloko-o. Oo, okpála bhelé apokèbhè nani bhúla o, u atsia adu ayo Ebhe. <sup>13</sup> Piele abhi bhoti na ngbéngbé-o. Abhomu-o, saka kpála bini na kulu na ølø adu oo, a adu 'li ani me Lode. Ani atsia ago ngú na'u bhoti-o. <sup>14</sup> Li ani ambila 'li Piele lie, ani tsia 'u bhoti-e de ka djali. Engú bini, ani agie lie ne holo abhú 'ti, ani atsia apa pi okpála inde adu bhú 'ti oo me: «Piele alu li bhoti akilidjo!»

<sup>15</sup> Okpála angoo atsia agie pi ani me: «Mu ne bhulu pele!» Engú bini, ani azi bha kekele tété me a ko kukulu 'ngú. Abhomu-o, u atsia apa pi ani me: «A ko andjelu gba ani ko.» <sup>16</sup> La-a, Piele adu bha nabhi bhoti-o. U a'u lie, u au ani, u atsia angamba naali. <sup>17</sup> Abhomu-o, Piele

amene 'kpa e pi uo me u ndjili nga má bulu! Ani atsia akpokpo pi uo maka li Ngámá agbe ani lie bhú tikpu-o. Ani atsia apa matá me: «Yi kpokpo pi Djaki\* di ne pi ondaise ní koko-o.» Pipita-a, ani akoto, ani atsia atapa li bili koko.

<sup>18</sup> Li ekpí aseke lie, osudha inde adu alila tikpu-o, aholo nazi tolo naali sunda o. Abhomu-o, u atsia adu ayi lio me: «A akolo li Piele ne mangua 'ngú dho?» <sup>19</sup> Elode atima okpála me u gili ani. Engú bini, u u ani de. Ani ayiyi osudha inde adu alila ani-o. Abhomu-o, ani atsia aha líli me u bhili uo. Pipita-a, Elode ayie bhú Yudaya, ani atsia anu bhú gudhu na Sedjale. Oo, ani adu mbo ngabula nedhinga.

### *'Ngbé ngámá Elode Agilipa akpi*

<sup>20</sup> La-a, Elode adu adje siti bua naali pi okpála na gudhu na Tile di ne Sidona. Okpála angoo adje lio. Pipita-a, u atima okpála ngú nanu nagama 'ngú ne 'ngbé ngámá Elode. Okpála angoo adje ngaiza lio ne Balasitusi, kpála natsia 'kpí li oehe gba 'ngbé ngámá Elode-o. U adu nayo ka 'ngbé ngámá guo 'ngú , anga ndu ezu gba uo-o hana adu nayie bhú doto gba ani-o.

<sup>21</sup> Abhomu-o, Elode a'o 'kpí ngú nagama 'ngú pi uo. Li 'kpí angoo, ani adyi bongo na ngámá, ani atsia adu pí kiti na ngámá gba e-o. Ani atsia aholo agama 'ngú pi uo bhú ká djila ndu okpála hana. <sup>22</sup> Ndu okpála hana asula me: «A ngagama 'ngú inde mboye ebhe, a ko kpála-kuti de!» <sup>23</sup> Li Elode adje lie mo-o, ani atsia aziba, ani dhøgø Ebhe de. Bha li nedhinga bhomu-o, andjelu bini gba Ngámá-a asu ani. Padhá de, anga ani dhøgø Ebhe de. Obangili aholo nazu ani, ani atsia akpi.

<sup>24</sup> Li nedhinga bhomu-o, eli gba Ebhe-e adu ayangba naali. <sup>25</sup> Li Balanabasi ne Saulo andjia kulu gba o-o lie bhú gudhu na Yelusalema-a, u atsia agie lio bhú Atiokia bhú dabili bini ne Djaa inde u agisila 'li e me Maloko-o.

\* **12:17** 12:17 Djaki: A ko Djaki bhende ndai Yesu, nani akolo bhele kpála na Piga gba Ebhe na Yelusalema ko. Tsia bhú Kul. 15:13.



## 13

### *U alo Balanabasi ne Saulo ngú kulu*

<sup>1</sup> Opolofeta di ne omusuno inde adu nani bhú Piga gba Ebhe na Atiokia, a ko nani Balanabasi, Simeo (inde u a'i e me Negele\*), Lukiusi (kpála na Silene), Manaene inde abhele bhú dabili bini ne ngámá Elode Atipasi, di ne Saulo. <sup>2</sup> Ekpí bini, nedhinga u adu nayo Ebhe lie di ne natse 'zɔ-o, Bu Bhobua atsia apa pi uo me: «Yi 'o Balanabasi ne Saulo mɔma kpi ngubula namene kulu inde ma a'i uo ngú e ko.» <sup>3</sup> Abhomu-o, pita natse 'zɔ di ne nayo Ebhe-e, u a'o 'kpa o pí 'ndji uo, u atsia aha kpadji pi uo me u nɔnɔ.

### *Balanabasi ne Saulo anu bhú Sipele*

<sup>4</sup> Li Bu Bhobua atima uo lie, u atsia anu bhú gudhu na Selusia. Oo, u a'u bhú 'ngbé zabu, u atsia atapa bhú Sipele. <sup>5</sup> U akolo lie bhú Salamine-e, u aholo nakpokpo eli gba Ebhe-e bhú oeti nadjé líli gba omaYuda-o . Dja Maloko adu bhú dabili bini ne uo ngú nateteke uo. <sup>6</sup> U agulu kpemə-o hana, u atsia akolo bhú Pafosi. Oo, u abhaka maYuda bini, bhulu mambengu inde adu 'li e me Bale-Yesu. Aní adu apa me ni ne polofeta. <sup>7</sup> Aní adu nadu agba Selugio Polo, kpála na imbilangɔ, inde adu ngámá na ndu doto ango-o. Ngámá ango-o a'i Balanabasi ne Saulo, anga aní akunda nani nadjé 'li Ebhe. <sup>8</sup> Engú bini, bhulu mambengu Elimasi (anga 'ili bhomu-o akunda napa bhú eli gba oGiliki moko) ayala. Aní adu agili me ni yoko ngámá na ndu doto ango-o me aní abhúka de.

<sup>9</sup> Abhomu-o, Saulo, inde li 'li e adu di me Polo-o,† abedhe ne Bu Bhobua, aní atsia aní ne kpéke djila. <sup>10</sup> Aní atsia apa me: «Ngamu siti kpála na kali inde ngapite okpála, ndili gba Djabulu, kpála nayala ndu 'ngú na babadha hana, mu 'ó nasiti okpadji na ngbingbili gba ngámá-a di! <sup>11</sup> Tsitsia, mbia inde-e, Ebhe asú mu. Djila mu aní. La di-e, mu ú matá

zindjila de ngubula mbo oekpí.» Kolo me-e, ndindi aní djila Elimasi. Biti atsia abuku aní hana, aní adu abubudha bili de e ngbalina nagili me kpála holo 'kpa ni ngú nateteke ni. <sup>12</sup> Li ngámá na ndu doto au engú akodho 'kpí-e lie me-e, aní atsia abhuka di ne nangamba naali ka nasuno inde u asuno e ne 'li Ngámá ko.

### *Polo ne Balanabasi bhú Atiokia inde abhú Pisidia*

<sup>13</sup> Polo di ne okpála inde adu adhuku bhú dabili bini ne aní-e, ayie bhú Pafosi ngú nanu bhú Peledje bhú ndu doto na Pamifilia. Engú bini, Dja Maloko a'o ká uo oo, aní atsia agie lie abhú Yelusalema. <sup>14</sup> Ngauo-o, u akpata bha kpadji gba o-o. U ayie bhú Peledje, u atsia akolo bhú Atiokia inde bhú Pisidia ko. Bhú 'kpí naguo gba omaYuda-a , Polo ngauo ne Balanabasi ali bhú 'ti nadjé líli gba Moidje , u atsia adulu kuto. <sup>15</sup> Pita natanga líli di ne obhuku gba opolofeta-a, ongámási na eti nadjé líli-e atsia atima eli pi uo me: «Ondaise ya, i du me yi nde ne engú ngú nateteke okpála ne di-e, yi de pa!»

<sup>16</sup> Polo ayie bhúlá, aní amene 'kpa e pi okpála, aní atsia apa me: «Ngayi okpála na Isalaele di ne yi okpála inde ngakpe Ebhe-e,‡ yi dje nga ma! <sup>17</sup> Ebhe gba okpála inde omaIsalaele, abhu nani onguo ogbi ní. Aní abe ndu uo bhú nedhinga u adu lie bhú bali bhú Edjipeto-o. Pipita-a, ne angu gba e-e, aní atsia agbe uo bhú doto na Edjipeto. <sup>18</sup> Aní akibila uo bhú mili bili ngubula kalanga masakpe de ndjikpa badha. <sup>19</sup> Pipita-a, aní abhili opiga mananika bhú doto na Kanana. Aní atsia aha doto gba uo-o pi onguo ogbi ní <sup>20</sup> ngubula kalanga masakpe de kámá badha ne ndjikpa bhuluvue.

Pipita-a, aní aha okpála nakodho mangimbo pi uo akolo bhú nedhinga gba polofeta Samuele. <sup>21</sup> Pipita-a, u ayo me o akunda 'ngbé ngámá. Abhomu-o, Ebhe atsia aha Saulo pi uo, ndili gba

\* **13:1** 13:1 Negele: U aye bhú obhuku koko me «Bibili.» † **13:9** 13:9 Polo: 'li na Saulo bhú eli gba omaYuda, bhende na Polo bhú eli gba oGiliki. U agisila nani 'li na Polo li aní nedhinga inde aní abhu ka nakpokpo Bádha Ngali gba Yesu Kilisito lie pi oGiliki ko. ‡ **13:16** 13:16 Okpála inde ngakpe Ebhe: A ko ogandji okpála inde abhuka Ebhe gba omaYuda ko.

Kisi, bhú piga gba Bendjamé. Aní aú nani pí 'ndji uo ngubula kalanga ndjikpa badha. <sup>22</sup> Pita li Ebhe ayala Saulo lie, aní atsia agbe 'ngbé ngámá Davidi pí uo. Aní atsia apa li 'ngú gba ani-e me: <Ma au Davidi, ndili gba Yese. A ko kpála na babadha bhú djila ma. Aní améne ndu 'ngú hana maka ma akunda lie.†> <sup>23</sup> Bhú piga gba Davidi-e, Ebhe agbe pí omafalaele Mukobho Yesu maka aní apa nani lie kalanu ko. <sup>24</sup> Kala nago ka ani-e, Dja akpokpo Bádha Ngali pí ndu okpála na Isalaele hana. Aní adu ayo ka uo me u dji bua o, amba u sia batisimo. <sup>25</sup> Li Dja akolo lie li 'so kulu gba e, aní adu apa me: <Yi ngabhundja me ma ne da? Ma ne kpála inde yi ngadjeke e ade! Engú bini, yi djedje, a ngago pita ma ne kpála. Ma ne tetele kpála ade ngubula me ma gbe malokesh bhú 'dhu ani.>

<sup>26</sup> Ondaise ma, ngayi okpála na piga gba Abalahama di ne yi okpála inde si-e, inde ngakpe Ebhe-e, Ebhe atima nani ngali na mukobho inde-e pí ní. <sup>27</sup> A na paká me okpála na Yelusalema di ne ongámási gba o-o mbila nani Yesu de. Bhú oekpí naguo gba omaYuda bini ne bini hana-a, u adu atanga obhuku gba opolofeta. La-a, u du ambimbila de. Engú bini u akodho 'ngú gba Yesu lie me u bhelè ani-e, u amene bhomu-o engú inde li opolofeta apa e ko. <sup>28</sup> Belegu u u nani engú bini inde u ti da nabhelè Yesu ka e lie de-e, u ayo ka Pilate me u bhelè ani. <sup>29</sup> Pita u amene ndu 'ngú hana maka li 'li Ebhe apa lie li 'ngú gba ani-e, u a'e ani li kulusi, u atsia anu ato ani bhú lata.

<sup>30</sup> Engú bini, Ebhe atsia azuku ani bhú ká okpála inde amu-o. <sup>31</sup> Yesu asuno lie pí okpála inde adu adholo ne ani bhú dabili bini nayie bhú Galilaya akólo bhú Yelusalema ngubula 'kpí bhelé. Mbia inde-e, okpála ango-o ngakpokpo 'ngú gba ani-e pí okpála na Isalaele ngao. <sup>32</sup> Ngaya makpe-e, ya ago ngú nakpokpo Bádha Ngali inde-e pí yi, Bádha Ngali inde

li Ebhe apa nani kalanu me ni apá e pí onguo ogbi ní-o. <sup>33</sup> Aní amene mbia inde-e pí ní ongisi gba uo-o, li kpadji nazuku Yesu bhú ká okpála inde amu, maka u aye nani lie bhú Etsi na bhisi gba omaYuda-me:

<Mu ne ndili gba ma na bhobhoko,

Ma azu mu naki ngama makpe.†>

<sup>34</sup> Ebhe apa nani me ni azúku Yesu bhú ká okpála inde amu-o mazuku, ngubula me aní akpí matá-a de. A ko engú inde aní apa nani e me:

<Ma ahá obisagu na bububu inde di na kukulu-o pí mu,

inde ma apana nani e pí Davidi ko.†>

<sup>35</sup> Kaka-a, aní apa matá li bili koko me:

<Mu 'ó de me kpála na ngbingbili gba mu-o zi bhú lata-a de.†>

<sup>36</sup> Padhá de, anga Davidi bhú nedhinga gba e, amene líli gba Ebhe-e hana. Pipita-a, aní akpi, u azi aní de onguo ogbi e, aní atsia azi. <sup>37</sup> Engú bini, kpála inde li Ebhe azuku e, aní zí naae de. <sup>38-39</sup> Ondaise ma, yi mbila ndjindji me u apa pí yi me u a'e osisiti 'ngú gba yi-e ka Yesu. Yi ti da nakobho ka namene líli gba Moidje-e de. Engú bini yi akóbho bha me yi nde abhuka Yesu. <sup>40</sup> 'E-e! Yi lila liyi uu me engú inde li opolofeta apa e akólo li yi de, engú inde me:

<sup>41</sup> <Yi tsitsia nga, ngayi okpála na 'ngbé 'ndji, yi ngamba naali, amba yi ngingita má pele pele!

Padhá de, anga bhú nedhinga gba yi-e, ma améne engú bini inde

yi ti da naziba e de,

abana i du me kpála bini nde apa nani engú ango-o pí yi kalanu.†>»

<sup>42</sup> Li Polo ne uo ne Balanabasi akoto lie bhú 'ti nadge líli-e, u atsia ayo ka uo me u go bhú 'kpí naguo na sidi, amba u kpokpo matá engú bini bhomu-o. <sup>43</sup> U atsambala lie bhú bula-a, bhelé na omaYuda ne ogandji okpála inde adu akpe Ebhe-e, akpata Polo ne uo ne Balanabasi. Abhomu-o, Polo ne uo ne Balanabasi, bhú nagama

† 13:22 13:22 Tsia bhú 1 Sam. 8:5, 19, 10:21, 13:14, 16:12. § 13:25 13:25 Nagbe maleke: Nani agba omaYuda-a, kulu nagbe maleke bhú 'dhu ogomago ne navulu 'dhu uo-o, a ko nani kulu ka obalise di ne okpála na padhá.

† 13:33 13:33 Tsia bhú Ets. 2:7. † 13:34 13:34 Tsia bhú Isa. 55:3. † 13:35 13:35 Tsia bhú Ets. 16:10. † 13:41 13:41 Tsia bhú Abk. 1:5.

'ngú gba o ne uo-o, u ato masi bhú uo me u holo lio li bádha bhú 'bu gba Ebhe-e kpekpeke.

<sup>44</sup> Ekpí nague na sidi-e, masikpe de ndu okpála na gudhu hana apo bhúla o ngú nadjé 'li Ebhe. <sup>45</sup> Li omaYuda au bhiti okpála ango-o lie, u asia siti bua , u atsia adu asobho Polo ka eli inde ani adu apa e ko. <sup>46</sup> La-a, Polo ne uo ne Balanabasi du nani nagama 'ngú pi uo ne tsulu de. U adu apa me: «A ayo nani me ya kpo ngaiza nakpokpo eli gba Ebhe-e kalanu pi yi. Engú bini, maka yi ayala lie, yi au la di me yi ti da nasia mukobho na duduma de. Kaka mbia inde-e, ya anu ibili agba ogandji okpála. <sup>47</sup> Padhá de, anga líli inde ya asia e ka Ngámá-a ngae inde:

<Ma a'o mu eke pi opiga,  
ngubula me mu gapa ngali na mukobho  
akólo bha bini ali 'dje doto!†>>

<sup>48</sup> Li ogandji okpála adje lie mo-o, u akpi djali, u atsia aholo nadhege 'li Ngámá. Ndu okpála hana li Ebhe alo o ngú nasia mukobho na duduma atsia abhuka.

<sup>49</sup> Abhomu-o, 'li Ngámá atsia adhuku bhú ndu doto ango-o libhomu. <sup>50</sup> Engú bini, omaYuda ato 'ngú bhú 'ndji olisi na tia inde adu adhege Ebhe di ne obhelesi okpála na kuti-o. Abhomu-o, u aholo amene Polo ne uo ne Balanabasi sisiti, u atsia agbe uo bhú doto gba o-o. <sup>51</sup> Abhomu-o, okpála bhisi ango-o apulu doto na kuti gba uo inde adhedhe li 'dhu o, ngubula nasuno pi uo me u amene siti 'ngú. U atsia agbida bhú Ikoniomu. <sup>52</sup> Engú bini, pi omukpata-a, u abedhe ne djali di ne Bu Bhobua bedhe.

## 14

### *Polo ne Balanabasi bhú Ikoniomu*

<sup>1</sup> Bhú Ikoniomu-o, a amene bhadi lie moko. Polo ne uo ne Balanabasi ali bhú 'ti nadjé líli gba omaYuda . OmaYuda bhelé di ne okpála inde ne omaYuda ade-e, akolo omabhuka ka engú inde u agama e ko. <sup>2</sup> Engú bini, omaYuda bhende i bhuka nani de-e, a ato bhú ogandji okpála

mabhundja na sisiti pindji ondaise ní, omabhuka. <sup>3</sup> La-a, Polo ne uo ne Balanabasi abhue mbo nani bhú Ikoniomu naali. U du agama 'ngú ne tsulu de anga u adu ne nabhuka bhú Ngámá, inde adu asuno me eli inde u adu akpokpo e pindji bádha bhú 'bu gba ni-e, adu kukulu 'ngú. Padhá de, anga ani adu aha angu pi uo ngú namene okiaka 'ngú di ne ongu na ngangamba. <sup>4</sup> Kaka-a, okpála na gudhu ango-o atsia agbo bhusu o: okoko adu pi omaYuda, okoko atsia adu pi obhulu titima gba Yesu .

<sup>5</sup> Abhomu-o, omaYuda di ne ogandji okpála bhú dabili bini ne ongámási gba o-o, atsia aleke lio ngú namene Polo ne Balanabasi sisiti, ngú nabhili uo ne teme. <sup>6</sup> Li okpála bhisi bhomu-o ambila 'ngú ango-o lie, u atsia akpe agbida bhú ogudhu na Lisitele ne Delebe, la di ne bhú okuti na ngongo, bhú ndu doto na Likaonia. <sup>7</sup> Oo di-e, u aholo akpokpo Bádha Ngali pi okpála.

### *Polo ne Balanabasi bhú Lisitele*

<sup>8</sup> Bhú Lisitele-e, kpála inde li eze adu li 'dhu e adu oo. Ani dhuku de nayie maka nani u azu ani lie-o. <sup>9</sup> Ani adu adje engú inde li Polo adu apa e ko. Polo atsia ani ne kpeke djila. Ani au me kpála ango-o abhuka me ni ti da nasia mukobho. <sup>10</sup> Abhomu-o, Polo atsia apa pi ani ne kpeke 'li me: «Yie bhúlá, lu ngbingbili!» Kpála ango-o ayie bhúlá, ani a'ulu aké má kprii! Ani atsia aholo nadhuku. <sup>11</sup> Li okpála bhelé au engú li Polo amene e lie, u asula bhú eli na kuti gba okpála na ndu doto na Likaonia me: «Oebhe akolo maka okpála-kuti, u atsia ago gba ní!» <sup>12</sup> U a'o 'li li Balanabasi me Djeusi,\* u atsia a'o 'li Polo me Elemesi, anga ani adu agama 'ngú-o ngae. <sup>13</sup> Dimandé gba ebhe Djeusi, inde li 'ti ebhe gba e adu li 'bhe gudhu-o, ago ne obagala na obhosibhosi li 'bhe bhoti na gudhu-o. Ani aha di 'i felele, bhú dabili bini ne okpála na kuti-o, ani atsia adu akunda me ni bhele onu ango-o ngú nahaha pi Balanabasi ne uo ne Polo.

† 13:47 13:47 Tsia bhú Isa. 49:6. \* 14:12 14:12 Djeusi: Bhú mabhundja gba oGiliki-e, Djeusi nani ne ngámá gba oebhe na eu. Elemesi atsia adu bhulu titima gba uo ko.

14 Li obhulũ titima gba Yesu adje engú bhomũ-o lie, u asisidha obongo li kũte o má tsæ tsæ!† U anũ ne holo bhú ká okpála ne nasusũla me: 15 «Ondaise ya, yi ngamene bhomũ-o ni? Ya bha ne okpála maka yi. Ya ago pi yi ne Bádha Ngali me yi 'o ká oebhe inde na padhá padhá bhomũ-o, inde li mbinimbini nde bhú o ade ko. La di me yi ha liyi pi Ebhe na mukobho inde abho ekpí, abho doto, abho 'ngbé 'ngu ne ndũ 'he inde bhúbhú-o hana ko. 16 Bhú nedhinga gba okpála na kalanũ-o, ani a'o me u kpata kpadji gba o makpe ko. 17 Engú bini, ani 'ili 'to e li napana lie ne namene babadha 'ngú pi uo de. Padhá de, anga ani ngatima pi yi ebha di ne onguwa bhú nedhinga gba o-o. Ani ngaha ezũ pi yi. Ani la di ngabedhe yi ne djali.» 18 Abana u adũ apapa lie mo-o, da me u yoko bhiti okpála adũ kpekpeke me u abhélø onũ pi o de ko.

19 Li nedhinga bhomũ-o, omaYuda inde ayie bhú Atiokia, bhú ndu doto na Pisidia, di ne bhú Ikoniomũ, apite bhiti okpála bhomũ-o me, u tutulũ Polo ne teme ngú nabhøø ani. U agbe ani ali ngo gũdhũ anga u adũ abhundja me ani akpi. 20 Engú bini, li omabhuka ago asa lio lie dengo ani-e, ani ayie bhúlá, ani atsia agie matá lie bhú gũdhũ. Li ekpí aseke lie, ngauo ne Balanabasi-e, u atsia atapa bhú Delebe.

### *Polo ne Balanabasi agie lio bhú Atiokia bhú ndu doto na Silia*

21 Bhú gũdhũ na Delebe, u akpokpo Bádha Ngali pi okpála, u atsia asia omũkpata bhibhiti. Pipíta-a, u agie lio bhú Lisitele, bhú Ikoniomũ di ne bhú Atiokia bhú ndu doto na Pisidia. 22 U a'e tsulũ li bua uo, u ato masi bhú uo me u lũ kpekpeke bhú nabhuka. U adũ apa pi uo me: «A ayo me ní dje likabhu naali ngú nali bhú kuti na Nau gba Ebhe ko.» 23 Bhú Dadjua gba Ebhe bini ne bini hana, u adũ alo obhelesi okpála . Pita u atse ezũ ngú nayo Ebhe lie, u atsia a'o uo sa 'kpa Ngámá inde u abhuka e ko.

24 U agulu Pisidia lie, u atsia akolo bhú Pamifilia. 25 Pita u akpokpo 'li Ebhe lie

pi okpála bhú Peledje-e, u atsia anũ bhú Atalia. 26 U ayie lie oo, u ali bhú zabũ, u atsia anũ bhú Atiokia. A bhomũ-o bili inde u a'o nani uo lie me u sia bádha bhú 'bu gba Ebhe ngubula kulu inde u amene e mbia inde-e ko.

27 U akolo lie oo, u apo bhúla okpála na Dadjua gba Ebhe-o. U atsia akpokpo pi uo ndũ 'ngú hana inde li Ebhe amene e bhú dabili bini ne uo-o. U atsia akpokpo di pi uo maka li Ebhe abhulu kpadji pi ogandji okpála lie ngú nabhuka di ani Ebhe ko. 28 Polo ne Balanabasi asi nani mbo ekpí bhelé bhú dabili bini ne omũkpata na Atiokia.

## 15

### *Kpekebhe pindji nakodho gandja*

1 Okpála koko inde ayie bhú Yudaya-a, akolo bhú Atiokia. U adũ asuno pi omabhuka me: «Yi ti da nasia mukobho de, i dũ me u nde kodho yi bhú gandja maka li líli gba Moidje apa lie de ko.» 2 Abhomũ-o, Polo ne Balanabasi agbe bhayiki, u atsia aholo amene kpekebhe ne uo naali pindji engú ango-o. U atsia adje lio me Polo ne Balanabasi, la di ne okpála koko na Atiokia, nũ bhú Yelusalema, amba u kpokpo 'ngú pindji 'ngú ango-o bhú dabili bini ne obhulũ titima gba Yesu di ne obhelesi okpála .

3 Abhomũ-o, ndũ okpála hana na Dadjua gba Ebhe atsia anũ a'o uo li kpadji. U apũ bhú ndu doto na Fenisia di ne bhú Samalia. U adũ akpokpo maka li ogandji okpála akolo omakilisito lie ko. Ngali ango-o aha djali naali pi ndũ omabhuka hana. 4 U akolo lie abhú Yelusalema-a, ndũ okpála hana na Dadjua gba Ebhe, ne obhulũ titima gba Yesu di ne obhelesi okpála-a, atsia asia uo. U atsia akpokpo pi uo ndũ 'ngú hana inde li Ebhe amene e bhú dabili bini ne uo-o. 5 Engú bini, okpála bini bini bhú ká omũFalisai , obhende akolo omabhuka-a, ayie bhúlá, u atsia apa me: «A ayo me omabhuka inde ne omaYuda de-e, u to uo bhú gandja, amba u pa pi uo me u mene líli gba Moidje ko.»

† 14:14 14:14 Li bili inde-e, nasidha bongo li kũte akũnda nasuno me nayala 'ngú.

<sup>6</sup> Abhomu-o, obhulu titima gba Yesu di ne obhelesi okpala apo bhula o ngu natsia 'kpi li engu ang-o. <sup>7</sup> Pita u amene kpekebhe lie naali-e, Piele ayie bhula, ani atsia apa me: «Ondaise ma, yi mbila hana me Ebhe abhu nani ma bhú ká yi bhutode ngubula me ma akpokpo Bádha Ngali pi okpala inde ne omaYuda ade ko. U dje, amba u bhuka di Ngali ang-o. <sup>8</sup> La di-e, Ebhe inde ambila bua okpala-a, asuno me ni aziba uo anga ani aha Bu Bhobua pi uo maka ani aha nani di lie pi ní ko. <sup>9</sup> Ani gbo bhusu ní ne uo de. Ani avulu bua uo anga u abhuka. <sup>10</sup> Mbia inde-e, ka ni yi ngale Ebhe lie ne na'o tili 'ngu pi omabhuka? Engu inde li onguo ogbi ní, abana ngani makpe, ní ti nani da nabi e de-e! <sup>11</sup> A mo-o ade! Engu bini, ní abhuka mangbo me ní akobho maka uo ka bádha bhú 'bu gba Ngámá Yesu.»

<sup>12</sup> Abhomu-o, ndu okpala hana andjili má bulu! U atsia adu adje engu inde li Balanabasi ne Polo adu akpokpo e ko. U adu adje okiaka 'ngu di ne ongu na ngangamba inde li Ebhe amene e bhú dabili bini ne uo bhú ká ogandji okpala ko. <sup>13</sup> U andjia nagama 'ngu lie, Djaki atsia apa me: «Ondaise ma, yi dje nga ma! <sup>14</sup> Simo akpokpo maka li Ebhe amene nani lie nayie li lilita pi okpala inde naao ne omaYuda ade-e, maka ani alo piga bini lie bhú ká uo ngu nakolo piga gba e-o.† <sup>15</sup> La di-e, engu inde li opolofeta apa e aviti bini ne di, anga u aye bhú Bhuku gba Ebhe-e me:

<sup>16</sup> <Pita bhobhomu-o, ma agó matá,  
Ngámá apa moko,  
ngu nayiki eti gba Davidi inde atuko-  
o.

Ma aléke obili bhende asisiti-e,  
ma atsia líli ngbingbili.

<sup>17</sup> Ndu okpala koko hana agili ma, Ngámá,  
bhú dabili bini ne ndu okpala hana  
inde nani ma alo o-o.

<sup>18</sup> A bhomu-o eli inde li Ngámá apa nani  
e ko.

Ngaani inde i ngamene engu inde ani  
apa nani e didili-o.†>>

<sup>19</sup> Djaki atsia apa matá me: «Kaka-a, ma abhundja me, a ayo nani kpadji pi ogandji okpala inde ngabhuka Ebhe-e de. <sup>20</sup> Engu bini, ní ye mangbo balua pi uo amba ní yo ka uo me, u 'o nazu so 'nu inde u abhelo e pi oebhe na padhá padhá-a ma'o. U 'o nakunda olisi di ne obhosi ngangá ma'o. U 'o di nazu so 'nu inde akpi ne ngute bhú e hana, amba u 'o di nazu ngute ma'o.† <sup>21</sup> Padhá de, anga nani bhutode, bhú ogudhu bini ne bini hana, okpala ngasuno líli gba Moidje. U la di ngatatanga bhú oti nadje líli-e ndu 'kpi nago hana.»

*Balua pi omabhuka inde naao ne omaYuda ade*

<sup>22</sup> Abhomu-o, obhulu titima gba Yesu ne obhelesi okpala, bhú dabili bini ne ndu okpala na Dadjua gba Ebhe hana, atsia aziba me u gbe okpala koko bhú ká o. U tima uo bhú Atiokia bhú dabili bini ne Polo ne Balanabasi. U atsia alo Djude inde u a'i e me Balasabasi, di ne Sila, okpala bhisi inde li ndu okpala koko hana adu amanga o ko. <sup>23</sup> Balua u atima uo ne e, a ngae inde:

«Obhulu titima gba Yesu di ne obhelesi okpala na Dadjua gba Ebhe, ondaise yi-e, u apa me o yi ondaise o inde naao ne omaYuda ade inde ngadulu bhú Atiokia, bhú Silia di ne bhú Silisia mayi. <sup>24</sup> Ya adje me okpala koko inde ayie bhú ká ya ei-e, ato kpekebhe bhú ká yi ne 'li o, u atsia angbingi bua yi. Engu bini, yi mbila ndjindji me ya tima uo ngaya de. <sup>25</sup> Kaka-a, ya adje liya ne bua bini me ya alo okpala, amba ya tima uo gba yi oo. U anu bhú dabili bini ne ondaise ya na mukunda, Balanabasi ne Polo. <sup>26</sup> Okpala inde aha lio libhomu ngubula kulu gba Ngámá gba ní Yesu Kilisito ko.

<sup>27</sup> Kaka-a, ya atima pi yi Djude ne uo ne Sila, u akpokpo ndu 'ngu hana inde ya aye e si-e pi yi ndjindji. <sup>28</sup> Padhá de, anga Bu Bhobua di ne ya makpe-e, ya abhundja me, a ayo na'o tili 'ngu koko pi yi de, bha bini bhende a ayo

† 15:14 15:14 Tsia bhú Kul. 10:34-48. † 15:18 15:16-18 Tsia bhú Ams. 9:11-12. † 15:20 15:20 Tsia bhú Eki. 34:15-16; di ne bhú Lev. 18:6-20, 17:10-14.

me yi mene e ko: <sup>29</sup> yi azú so 'nú inde u abhelo e pi oebhe na eu-o de. Yi azú ngute de. Yi azú so 'nú inde akpi ne ngute bhú e hana-a de. Yi adú akunda olisi di ne obhosi ngangá de. I dú me yi nde alila liyi makpe ne ndú 'ngú bhomu-o hana-a, bhobhomu-o dú ndjindji. Yi dú ndjindji.»

<sup>30</sup> Abhomu-o, u aha kpadji pi uo, u atsia agbida bhú Atiokia. Oo, u apo bhúla omabhuka hana, u atsia aha balua pi uo. <sup>31</sup> U atanga balua-o. Ndu uo hana akpi djali naali ka masi inde li balua ango-o ato e bhú uo ko. <sup>32</sup> La-a, li Yuda ne Sila adu di lie ngao makpe opolofeta-a, u agama 'ngú pi omabhuka ngengele ngubula nato masi bhú uo, di ne naha angu pi uo. <sup>33</sup> Mbo pita 'kpí bedi-e, omabhuka atsia a'o uo me u gie lio ne guo 'ngú agba okpála inde atima uo ko. [ <sup>34</sup> \* ] <sup>35</sup> Abhomu-o, Polo ne Balanabasi atigala bhú Atiokia. U atsia adu asuno di ne nakpokpo Bádha Ngali gba Ngámá-a bhú dabili bini, di ne okpála koko bhelé.

### *Polo ne Balanabasi agbo bhusu o*

<sup>36</sup> Pita mbo 'kpí masudha, Polo apa pi Balanabasi me: «Ní gie liní bhú ndu okuti hana inde ní akpokpo nako eli gba Ngámá-a bhú e-o, amba ní mbila maka li omabhuka nde lie oo ko.» <sup>37</sup> Balanabasi adu akunda me o nu bhú dabili bini ne Djaa inde u agisila 'li e me Maloko-o. <sup>38</sup> Engú bini, Polo tsia ziba naha ani de, anga ani a'o nani ká uo bhú Pamifilia. Ani tsia du di matá namene kulu ne uo bhú dabili bini de. <sup>39</sup> U amene kpekebhe sunda o naali. Kaka-a, u atsia agbogbo bhusu o. Abhomu-o, Balanabasi aha Maloko, u a'u bhú zabu, u atsia agbida bhú Sipele. <sup>40</sup> Pita li omabhuka ayo lie me Polo sia bádha bhú 'bu gba Ebhe-e, ani aha Sila, ani atsia atapa. <sup>41</sup> Ani apu bhú ndu doto na Silia di ne Silisia. Ani atsia adu nateteke omabhuka na oDadjua gba Ebhe-o.

\* **15:34** 15:34 Lukuluku inde-e, a bhú obhuku koko na didili u aye e bhú eli na giliki ade. [Engú bini, Sila atsia au ndjindji me ni tigala ne ani oo.] \* **16:3** 16:3 'Dyi Timoté nani ne maYuda ade. Kaka-a, Timoté li nga nani bhú gandja kalanu de.

## 16

### *Timoté anu bhú dabili bini ne Polo di ne Sila*

<sup>1</sup> Abhomu-o, Polo akolo bhú Delebe, pipita-a, bhú Lisitele. Mukpata bini adu nani oo, a adu 'li ani me Timoté. 'Hi ani adu ne maYuda inde abhuka Ebhe. Engú bini, 'dyi ani nani naae ne Giliki. <sup>2</sup> Omabhuka na Lisitele di ne Ikoniomu adu apa 'ngú gba ani-e ndjindji naali. <sup>3</sup> Polo adu akunda me ni ha ani ngú nadhuku bhú dabili bini ne ani. Ani aha ani, ani atsia ato ani bhú gandja. Ani amene nani mo-o ka omaYuda inde adu oo, anga ndu okpála hana adu ambila ndjindji me 'dyi Timoté nani ne Giliki.\* <sup>4</sup> Bhú ndu ogudhu inde u adu apu bhú e hana-a, u adu akpokpo pi omabhuka líli inde li obhulu titima gba Yesu di ne obhelesi okpála na Yelusalema aha e-o. U atsia adu ayo ka uo me u mene líli ango-o ko. <sup>5</sup> ODadjua gba Ebhe-e adu akolo kpekpeke bhú nabhuka. Alo gba omabhuka atsia adu abe ndu e ndu 'kpí hana.

### *Polo apu bhú Adjia*

<sup>6</sup> La li Bu Bhobua ayoko uo lie me u akpokpo 'ngú gba Ebhe bhú ndu doto na Adjia de-e, u atsia apu bhú ndu doto na Filidjia di ne Galatia. <sup>7</sup> U akolo lie de ndu doto na Misia-a, u adu ale nanu bhú Bitinia. Engú bini, Bua gba Yesu atsia ayoko uo. <sup>8</sup> Abhomu-o, u agulu Misia, u atsia aké bhú gudhu na Tulasi. <sup>9</sup> A akolo lie sukpe-e, Polo au engú maka loto: kpála bini na Makedonia alu kala ani. Ani atsia adu akikiliki lie pi ani me: «Kodho 'ngbé 'ngu-o, nu bhú Makedonia, amba mu teteke ya!» <sup>10</sup> Pita engú inde li Polo au e, ya agili bha kolo má gala me ya anu bhú Makedonia. Padhá de, anga ya ambila na paká me Ebhe a'i ya ngú nakpokpo Bádha Ngali pi okpála na kuti ango-o.

### *U akolo bhú gudhu na Filipoi*

<sup>11</sup> Ya a'u bhú zabu bhú Tulasi, ya anu ngbingbili bhú Samutalasi. Li ekpi aseke

lie, ya atsia anu bhú Neapolisi. <sup>12</sup> Ya ayie lie oo, ya atsia akolo bhú gudhu na Filipoi, gina kuti na ndu doto na Makedonia inde adu sa oLoma-o . Ya amene mbo ekpi bhelé bhú gudhu ango-o. <sup>13</sup> Bhú 'kpi naguo gba omaYuda-a , ya akoto bhú gudhu ngu nanu ali ngo 'ngu. Padhá de, anga ya adu abhundja me dabili gba omaYuda ngu nayo Ebhe oo. Ya adulu kuto, ya atsia akpokpo 'ngu pi olisi inde apokobhe bhula o oo. <sup>14</sup> A adu 'li suka olisi ango-o me Lidia. Ani ayie nani bhú gudhu na Tiatile. Ani adu nani atsindji ombembe obongo na mase naali. Ani adu nani adhege Ebhe. Maka ani adu adje ya lie, Ngamá atsia abhulu bua ani ngu nabhuka engu inde li Polo adu apa e-o. <sup>15</sup> Abhomu-o, ani atsia asia batisimo bhú dabili bini ne piga gba e-o. Pipita-a, ani atsia ayo ka ya me: «f du me yi nde au me ma abhuka Ebhe kukulu-o, yi de go du gba ma.» Ani atsia agbite ya ne kpeke ngu naziziba.

### *U aholo Polo ne Sila*

<sup>16</sup> Ekpi bini, ya adu anu lie li bili nayo Ebhe-e, ndili na oelo bini na kulu ago abhaka ya. Bua na madhoko adu bhú ani. Ani atsia adu asia tia pi omakulasi e naali. <sup>17</sup> Ngaya ne Polo-o, ani aholo akpata ya. Ani atsia adu asusula me: «Okpála inde-e, a ko okpála na kulu gba Ebhe Apí 'Kpi! U ngasuno pi yi kpadji na makobho.» <sup>18</sup> Ani amene engu ango-o ngubula ekpi bhelé. Li engu ango-o andala Polo lie naali-e, ani adji lie, ani atsia apa pi bua ango-o me: «Ne 'li Yesu Kilisito , ma apa pi mu me: koto bhú ani!» Abhomu-o, bua na madhoko ango-o atsia akoto bha kolo bhú ani bhú nedhinga ango-o. <sup>19</sup> Li omakulasi ani au lie me o sia matá tia ka ani de-e, u aholo Polo ne Sila, u atsia agbele uo bhú mbadhasu kala okpála nakodho 'ngu. <sup>20</sup> U atsia anu ne uo kala ongamási na Loma, do uo de-e: «Okpála inde-e, a ko omaYuda. U ngato mbedhembede bhú gudhu gba ya-o. <sup>21</sup> U ngasuno ongu. La-a, líli gba ní okpála na Loma ziba nasia ongu ango-o ne namemene de.»

<sup>22</sup> Abhomu-o, ndu okpála hana atsia abi di 'gu ne uo. Ongamási aha líli me u pandja bongo li kute uo, amba u bhi uo ne fimbo. <sup>23</sup> Pita u abhi uo lie ne fimbo naali-e, u atsia abhike uo bhú tikpu. U atsia aha líli pi mulila na tikpu-o me ani lila uo ndjindji. <sup>24</sup> Li mulila asia líli ango-o lie, ani ato uo bhú tina tikpu bhe na tutu-o. Ani atsia atoto 'dhu uo bhú kpekpe.

### *Polo ne Sila aze bhú tikpu*

<sup>25</sup> Masikpe de tutu sukpe-e, Polo ne Sila adu ayo Ebhe di ne nadhege ani bhú etsi. Okpála koko na tikpu-o adu adje uo. <sup>26</sup> Má gala kolo me-e, doto adyiki ne adjigidjo na ngbéngbé má djigi djigi, masikpe de me tikpu-o tuko kuto! Ndu obhoti na tikpu-o hana akolo abhubhulu lie. Ogbindjili inde u agbigbite ndu okpála hana na tikpu-o ne e-e, atsia abhubhulu di lie.

<sup>27</sup> Li mulila agbungbua lie lie tila-a, ani au me ndu obhoti-e hana baba. Abhomu-o, ani agbe mbotia me ni ngabhelo lini ne di, anga ani adu abhundja me ndu okpála na tikpu-o hana akpekpe. <sup>28</sup> Engu bini, Polo atsia asula pi ani kpekpeke me: «Mo oméne limu sisiti de, anga ndu ya hana bha si!» <sup>29</sup> Abhomu-o, mulila-a ayo eke, ani ali kolo má gala abhu 'ti me ani nde ngaguku ka tsulu má kpi kpi kpi! Ani atsia ati bhú li 'dhu Polo ne Sila. <sup>30</sup> Pipita-a, ani apandja uo kilidjo. Ani atsia ayi uo me: «Odyi ma, a ayo me ma mene pi ngubula me ma kobho?»

<sup>31</sup> U atsia agie pi ani me: «Bhuka Ngamá Yesu, amba mu kobho, ngamu di ne piga gba mu-o hana.» <sup>32</sup> Abhomu-o, u atsia akpokpo eli gba Ngamá Ebhe-e pi ani, di ne pi ndu okpála hana inde adu bhú 'ti gba ani-o. <sup>33</sup> Bha sukpe bhomu-o, mulila na tikpu-o abha uo, ani atsia avulu oeka gba uo-o. Pipita-a, ani asia bha kolo batisimo má gala, bhú dabili bini ne okpála gba e hana. <sup>34</sup> Pipita-a, ani anu ne uo agba e. Ani atsia aha ezu pi uo. Ngaani ne piga gba e-e, u akpi djali naali, anga u abhuka Ebhe.

<sup>35</sup> Li ekpi aseke lie, ongamási gba okpála na Loma atima okpála me u nu pa pi mulila na tikpu-o me: «Pandja okpála

bhomu-o bhú tikpu-o, amba mu 'o uo, u gbida.» <sup>36</sup> Abhomu-o, mulila atsia ago apa pi Polo me: «Ongámási atima eli me ma apandja yi bhú tikpu papandja. Yi zeze, amba yi nu ne guo 'ngú .» <sup>37</sup> Do Polo pi okpála ango-o me: «Ya ne okpála na Loma! U aha líli me u bhi ya bhú ká djila okpála me u nde kpokpo 'ngú li 'ngú gba ya-a de. U abhike ya bhú tikpu. La mbia inde-e, u ngakunda napandja ya bhú pepe? Belegu de bini, u go gbegbe bha ya ngao makpe!» <sup>38</sup> Okpála ango-o atsia anu apa eli ango-o pi ongámási na Loma. Li ongámási na Loma adje lie me Polo ne Sila a ko okpála na Loma-a, u atsia adje tsulu. <sup>39</sup> Abhomu-o, ongámási ago nakikiliki lio pi uo. U atsia ayo ka uo me u yie bhú kuti ango-o yiyie. <sup>40</sup> Li Polo ne Sila aze lie bhú tikpu-o, u atsia anu agba Lidia. Pita u au omabhuka lie, u ato masi bhú uo, u atsia agbida.

## 17

### *Polo ne Sila bhú gudhu na Tesalonike*

<sup>1</sup> Li Polo ne Sila agulu gudhu na Afipolisi ne Apolonia lie, u atsia akolo bhú gudhu na Tesalonike. A bhomu-o bili inde li omaYuda adu ne eti nadje líli gba Moidje lie ko. <sup>2</sup> Polo amene maka ani amemene lie-o. Ani adu anu abhaka uo bhú 'ti nadje líli-e ngubula poso bata bhú 'kpí naguo gba omaYuda-o . Ani atsia adu amene kpekebhe ne uo pindji Bhuku gba Ebhe-o . <sup>3</sup> Ani adu abhulu tata pi uo mbámábá, di ne nasuno pi uo me bhuku apa me a ayo me Kilisito zu likabhu, amba ani zuku. Ani adu apa pi uo me: «Yesu inde ma ngakpokpo 'ngú gba e pi yi-e, a ko Kilisito ngae.» <sup>4</sup> Okpála koko bhú ká uo abhuka, u atsia akpata Polo ne Sila. OGiliki bhelé, inde adu adhögö Ebhe-e, amene bhadi moko bhú dabili bini ne bhiti olisi inde adu ne tia naali-o.

<sup>5</sup> Engú bini, omaYuda abi 'gú naali. U abha okpála koko na sisiti inde adu adjakadha li okpadji, u apekebhe bhúla uo. U agbe tolo bhú ká okpála, u atsia ato mbedhembedhe bhú 'ndji okpála bhú gudhu. U anu nagili Polo ne Sila bhú 'ti gba Djasone ngubula me o gbe uo kala

okpála na kuti bhomu-o. <sup>6</sup> U bhaka la uo lie de-e, u aha Djasone di ne omabhuka koko, u atsia anu ne uo kala ongámási. U aholo asusula me: «Okpála inde angbingi 'ndji okpála pila doto libhomu. Mbia inde-e, u akolo ibili si! <sup>7</sup> Djasone asia uo agba e! Ndu uo hana ngayala namene líli gba 'ngbé ngámá Kaisala . U ngapa me ngámá koko uu! A 'li ani me Yesu.» <sup>8</sup> Li bhiti okpála di ne ongámási na kuti ango-o adje eli ango-o lie, bua uo atsia ake. <sup>9</sup> Pita li Djasone di ne okpála koko akakala lio lie ka uo, u atsia atse 'kpa li uo.

### *Polo ne Sila bhú gudhu na Beloya*

<sup>10</sup> A akolo lie sukpe-e, omabhuka anu a'o bha kolo Polo ne Sila bhú Beloya má gala! U akolo lie oo, u atsia ali bhú 'ti nadje líli gba Moidje-o. <sup>11</sup> Okpála ango-o adu ne bádha bua nane okpála na Tesalonike. U asia eli gba Ebhe-e ne gugumu naali. Ndu 'kpí hana, u adu atsia 'kpí bhú Bhuku gba Ebhe ngú nambila me ongú ango-o, a ko 'ngú na paká. <sup>12</sup> Abhomu-o, okpála bhelé bhú ká uo atsia abhuka. Olisi na Giliki inde adu ne tia naali-e abhuka. Bhiti obhosi inde adu oo atsia abhuka di. <sup>13</sup> Engú bini, li omaYuda na Tesalonike adje lie me Polo ngakpokpo eli gba Ebhe-e di bhú Beloya-a, u atsia ago di oo. U ato mbedhembedhe bhú ká okpála bhomu-o, u atsia angbingi di 'ndji uo. <sup>14</sup> Abhomu-o, omabhuka anu bha kolo a'o Polo me ani nu ali ngo 'ngbé 'ngu. Engú bini, Sila ne Timoté atsia atigala naao abhú Beloya. <sup>15</sup> Obhende anu na'o Polo-o, u akolo ne ani bhú gudhu na Atene. Pipita-a, u adu agie lio lie, Polo atsia atima eli me Sila ne Timoté kpata ni má gala! U atsia agbida.

### *Polo akolo bhú gudhu na Atene*

<sup>16</sup> Bhú nedhinga li Polo adu adjeke Sila ne Timoté lie bhú Atene-e, ani au me gudhu ango-o abedhe ne oebhe na eu bedhe. Kaka-a, bua ani adu ne likabhu naali. <sup>17</sup> Abhomu-o, ani adu amene kpekebhe ne omaYuda di ne okpála koko inde adu adhögö Ebhe bhú 'ti nadje líli gba Moidje-o. Ndu 'kpí hana, ani adu



amene bhadi moko ne okpála inde ani adu akè lie ne o oo. <sup>18</sup> Okpála na imbilangu koko oEpikulo\* ne oSatua† adu di agama 'ngú ne ani. Okoko adu ayi me: «Bhulu agelè inde-e ngapa-e pi?» Li okpála koko adje Polo ngakpokpo 'ngú pindji Yesu di ne nazuku ka ani-e lie, u atsia adu apa me: «A amana mugito me ani ngasuno bhomu-o oebhe na gandji gandji.»

<sup>19</sup> Abhomu-o, u aholo ani, u anu ne ani kala okpála inde adu atsia 'kpí li 'ngú na gudhu na Atene-o. U adu a'i uo me Aliopadje.‡ U atsia apa pi ani me: «Ya ti da nambila engú na mbia inde mu ngasuno e uu? <sup>20</sup> Ya akunda nambila tata-o. Padhá de, anga mu ngandala 'dje ya ne ndu 'ngú na gandji gandji.» <sup>21</sup> (Ndu okpála na Atene hana di ne okpála na gandji gandji inde adu nadu oo, adu abholè nedhinga gba o-o bha li nakpokpo 'ngú di ne naje engú na mbia.)

<sup>22</sup> Abhomu-o, Polo ayie bhúlá tu Aliopadje-o, ani atsia apa me: «Ngayi okpála na Atene, ma au me yi kpekpeke li engú gba oebhe ane ndu 'ngú hana. <sup>23</sup> Padhá de, anga ma adu adhuku lie bhú gudhu gba yi-e, ma atsia okulu oebhe gba yi-o. Ma au belegu bili bini inde u ngatsulu enu lie pi Ebhe. U aye tété me: <Pi EBHE INDE YA AMBILA E DE.> A moko, ma ago asuno pi yi ebhe inde yi ngadhoge e me yi nde mbila e de ko. <sup>24</sup> Ebhe inde abho doto di ne ndu 'he inde bhúbhú-o hana-a, a ko Ngámá na abhúlá di ne Ngámá na doto. Ani dudu bhú oeti inde li okpála ayiki e ne 'kpa o-o de. <sup>25</sup> Ani ne gumu ade me okpála mene ehe pi ni-e de, anga ani ne gumu 'he bini ade. Ani ngaha mukobho, ewo di ne ndu 'he koko pi ndu okpála hana ngae. <sup>26</sup> Ani abho kpála bini inde li ndu opiga hana aze bhú e-e ngae. Ani atsia abu uo pála doto libhomu. Ani agbo bhusu kalanga ne gbokokpi. Ani atsia akokodho okozie li bili inde ayo me

u sili kuti lie ko.

<sup>27</sup> Ebhe amene mo-o ngubula me okpála gili ni amba u le nau ni, i du me u nde ti da nau ni uu ko. A na paká me Ebhe de ní bini ne bini tsutsu ade. <sup>28</sup> Padhá de, anga ani ngaha mukobho ne angu ngú namene ehe di ne maka ní nde lie pi ní ngae. La di maka li okpála koko na etsi gba yi-e apa lie me: «Ní di ne ongisi gba ani.» <sup>29</sup> La-a, ka ní nde lie ne ongisi gba Ebhe-e, a ayo nabhundja de me Ebhe maka ebhe na padhá u abho e li olo, li aladja di ne teme-e de. A ayo la di nabhundja de me Ebhe maka ebhe inde akoto li kulu di ne mabhundja gba kpála-a de.

<sup>30</sup> Nani-e, okpála du ambila Ebhe de. Ani tsia matá 'kpí li nedhinga ango-o de. Engú bini mbia inde-e, ani nga'i ndu okpála hana ne ndu bili hana me u dji bua o. <sup>31</sup> Padhá de, anga ani a'o ekpí bini inde ani akódho 'ngú gba okpála na doto libhomu lie ngbingbili ko. Ani abhu kpála bini inde akódho 'ngú ango-o. Ani asuno engú ango-o pi ndu okpála hana li nedhinga inde ani azuku kpála ango-o lie ko!»

<sup>32</sup> U adje Polo lie apa me okpála inde amu-o azúku mazuku-o, u aholo amu ani. Okoko atsia apa me: «Ya adjé nga matá mu pindji 'ngú ango-o li 'kpí koko.» <sup>33</sup> Abhomu-o, Polo atsia a'o ká uo. <sup>34</sup> Abana mo-o, okpála koko aziba ani, u atsia abhuka. Bhú ká uo adu nani Denisi, saka okpála na Aliopadje, ne elè bini inde adu 'li e me Damalisi di ne okpála koko.

## 18

### *Polo akpo lita Dadjua na gudhu na Kolito*

<sup>1</sup> Pipita-a, Polo ayie bhú gudhu na Atene, ani atsia atapa bhú gudhu na Kolito. <sup>2</sup> Oo, ani abhaka maYuda bini, a adu 'li ani me Akuila, kpála na ndu doto na Pote. Ngaani-e, ani ayie nani bhú Itali, bhú dabili bini ne wala e Pilisila,

\* **17:18** 17:18 OEpikulo: A ko nani omukpata gba Giliki bini inde adu 'li e me Epikulo. Ani adu asuno me engú na ngbéngbé bhú mukobho gba kpála, a ko nadu ndjindji, nadu ne likabhu de. † **17:18** 17:18 OSatua: A ko nani omukpata gba Giliki bini inde adu 'li e me Djeno. U adu nani nau engú nadu bhú djali bhú djila o padhá. U atsia adu bha bini akpata 'ngú pindji imbilangu inde bhú kpála. ‡ **17:19** 17:19 Aliopadje: A adu nga nani kalanu 'li eta inde li okpála ango-o adu apekobho bhúla o pí e-o.

anga 'ngbé ngámá Kolode aha nani líli me ndu omaYuda hana ze bhú Loma maze. Abhomu-o, Polo atsia anu nabhaka uo. <sup>3</sup> Ani adu la lie amene ngua kulu bini ne uo (u adu abho eti inde u a'i e me 'ti ngbangbali), ani adu nadu agba uo, u atsia adu amene kulu bhú dabili bini. <sup>4</sup> Polo adu nasuno eli gba Ebhe-e bhú ndu 'kpi nago gba omaYuda hana bhú eti nadje líli gba Moidje-o . Ani atsia adu di namene ne kpeke me omaYuda di ne oGiliki ziba 'li ni.

<sup>5</sup> Li Sila ne uo ne Timoté ayie lie bhú ndu doto na Makedonia, u atsia akolo bhú gudhu na Kolito. Polo aha nedhinga gba e hana ngu nakpokpo Bádha Ngali gba Ebhe-e pi okpála. Ani adu asuno pi omaYuda me Yesu ne Masiya . <sup>6</sup> Engú bini, omaYuda adu ayayala, u atsia adu di nasobho Ebhe. Abhomu-o, ani apulu doto li bongo gba e, ani atsia apa pi uo me: «A ayo me ngute gba yi-e, tuko pi 'ndji yi. A ko matá naama 'ngú de. Nayie pi mbia inde-e, ma anu ibili agba ogandji okpála .» <sup>7</sup> Abhomu-o, Polo ayie oo, ani atsia anu agba kpála bini inde li 'li e adu me Tito Djusitusi. Kpála ango-o adu kpála nadhege Ebhe. Kutu gba ani-e adu de eti nadje líli gba Moidje-o. <sup>8</sup> Kilisipisi, ngámá na eti nadje líli-e, abhuka Ebhe di ne piga gba e libhomu. Okpála bhelé na gudhu na Kolito adje Polo lie, u abhuka, u atsia asia di batisimo.

<sup>9</sup> Ekpí bini sukpe-e, Ebhe apa pi Polo bhú ehe maka loto me: «Mo odjé tsulu de. Engú bini, du bha nagama 'ngú, mo ondjili má bulu de. <sup>10</sup> Padhá de, anga ma bhú dabili bini ne mu. Kpála bini bú 'kpa e li mu ngu namene mu sisiti de, anga okpála gba ma bhú gudhu inde-e bhelé.» <sup>11</sup> Abhomu-o, Polo asi bhú gudhu na Kolito oo kalanga bini ne epe madhia. Ani adu asuno eli gba Ebhe-e pi ndu okpála hana.

#### *OmaYuda asungula Polo pi ongámási*

<sup>12</sup> Bhú nedhinga inde li okpála na Loma a'o Galio lie ngámá na ndu doto na Akai-e, omaYuda adje lio bhú dabili bini me o mene Polo sisiti. Abhomu-o, u atsia agbe ani kala okpála nakodho 'ngú. <sup>13</sup> Do uo de

me: «Kpála inde ngagili nagbele okpála ngu nadhege Ebhe li kpadji bhende li líli ziba e de.» <sup>14</sup> Li Polo di me gama 'ngú lie, Galio atsia apa pi omaYuda me: «Ngayi omaYuda-a, i dú igini me kpála inde-e bhéle kpála, ani méne di engú na sisiti naali-e, ma de adje yi ndjindji. <sup>15</sup> La-a, i nde lie me yi nde ngamene kpekebhe pindji oeli ne o'ili di ne líli gba yi makpe-e, atsia bha-a yi! Ma akunda naama nakodho 'ngú li ngua 'ngú bhomu-o de!» <sup>16</sup> Ani atsambala uo li bili nakodho 'ngú-o. <sup>17</sup> Abhomu-o, ndu uo hana aholo Sosekene, ngámá na eti nadje líli gba Moidje, u atsia aholo nabhi ani bhú mbadhasu li bili nakodho 'ngú-o. Engú bini, Galio adu bha au 'ngú ango-o bhú djila e padhá.

#### *Polo agie lie bhú gudhu na Atiokia*

<sup>18</sup> Polo adu matá mbo ngengele bhú gudhu na Kolito. Pipita-a, ani a'o ká omabhuka , ani a'u bhú zabu, ani atsia atapa bhú ndu doto na Silia bhú dabili bini ne Pilisila di ne Akuila. Kala me ani 'u bhú zabu-o, u aka ngaiza 'ndji ani bhú gudhu na Sekele, anga ani asili nani ndjinga me ni aha lini pi Ebhe. <sup>19</sup> U akolo bhú gudhu na Efeso. Oo, Polo a'o ká Pilisila ne Akuila. Ani ali bhú 'ti nadje líli gba Moidje, ani atsia adu akpokpo 'ngú ne omaYuda.

<sup>20</sup> La-a, u ayo ka ani lie me o du nga matá mbo ne ani ngengele-e, ani atsia ayala. <sup>21</sup> Engú bini, nedhinga inde ani adu a'e ne enú lie, ani atsia apa me: «I du me Ebhe nde akunda-a, ma agó matá agba yi mago.» Ani a'u bhú zabu. Ani ayie bhú gudhu na Efeso, <sup>22</sup> ani atsia atapa bhú gudhu na Sedjale. Oo, ani a'u bhú gudhu na Yelusalema ngu nabhana lie pi omabhuka. Pipita-a, ani atsia aké bhú gudhu na Atiokia. <sup>23</sup> Ani abhue oo mbo ekpi bedi, abhomu-o, ani atsia atapa. Ani agulu ndu doto na Galatia ne ndu doto na Filidjia me ani nde ngato masi bhú omabhuka.

*Apolosi anu bhú gudhu na Efeso, di ne bhú gudhu na Kolito*

<sup>24</sup> MaYuda bini akolo bhú gúdhú na Efeso, a adú 'li ani me Apolosi, kpála na gúdhú na Alekidjandili. Ani mbila nani nagama 'ngú ndjindji. Ani mbila di nani Bhuku gba Ebhe-e ndjindji. <sup>25</sup> U asuno nani kpadji gba Ngámá pi ani ndjindji. Ani adú ne bua na masi, ani atsia adú akpokpo di ne nasuno engú pindji Yesu ngbingbili. Engú bini, ani ambila bha nani naae batisimo gba Djaa-o .

<sup>26</sup> Abhomú-o, ani aholo nakpokpo 'ngú ango-o bhú 'ti nadjé líli gba Moidje. Ani dú ne tsulú de. Li Pilisila ne Akuila adje engú ani apa e lie, u aha ani, u anú ne ani. U atsia asuno kpadji gba Ebhe-e pi ani ndjindji. <sup>27</sup> Pipita-a, Apolosi adú akúnda nanú bhú ndu doto na Akai. Abhomú-o, omabhuka ato masi bhú ani, u atsia aye balú pi omabhuka na ndu doto ango-o me, u sia ani ndjindji. Ani akolo lie oo, ani ateteke okpála inde abhuka ka bádha bhú 'bu gba Ebhe-e ndjindji naali. <sup>28</sup> Padhá de, anga ani adú asuno mbámbá ne angu hana bhú ká djila ndú okpála hana me omaYuda lí ngbili kpadji ade. Ani atsia adú apana pi uo bhú Bhuku gba Ebhe-e me Yesu ne Masiya.

## 19

### *Polo akpokpo 'ngú gba Ebhe-e bhú gúdhú na Efeso*

<sup>1</sup> Nedhinga lí Apolosi adú lie bhú gúdhú na Kolito-o, Polo agulu ndu doto na ndú ká eta na Adjia, ani atsia akolo bhú gúdhú na Efeso. Ani abhaka omúkpata koko oo. <sup>2</sup> Ani atsia ayi uo me: «Yi akolo omabhuka lie, yi asia Bu Bhobua uu?» U atsia agie pi ani me: «Ya adje nga engú pindji Bu Bhobua belegú de bini.» <sup>3</sup> Abhomú-o, Polo atsia ayi uo me: «Yi asia la mangua batisimo dho?» U agie pi ani me: «Batisimo bhende gba Djaa ko.» <sup>4</sup> Polo atsia apa pi uo me: «Djaa adú abatisa okpála inde adú aziba nadjí bua o. Ani atsia adú apa pi okpála na Ísalaele me: <Yi bhuka kpála inde ngago pita ma ko.> A akúnda napa me Yesu.» <sup>5</sup> U adje engú bhomú-o lie, Polo atsia abatisa uo ne 'li Ngámá Yesu. <sup>6</sup> Pipita-a, ani a'o

'kpa e pí 'ndji uo, u atsia asia Bu Bhobua. U aholo agama 'ngú bhú odikongú koko di ne nakpokpo 'ngú maka opolofeta . <sup>7</sup> Ndú obhosi bhomú-o hana adú masíkpe de ndjikpa ne ká bhisi.

<sup>8</sup> Polo adú ali piko bhú 'ti nadjé líli gba Moidje , sùnda epe bata, ani dú akpokpo 'ngú pindji Nau gba Ebhe-e ne tsulú de. Ani atsia adú amene ne kpéke ngúbula me okpála bhuka Yesu. <sup>9</sup> Engú bini, okpála koko adú ne kpéke 'ndji. U ayala nabhuka . U atsia adú apa sisiti 'ngú lí kúte okpála inde adú akpata kpadji gba Yesu-o kala ndú okpála hana. Abhomú-o, Polo a'o ká uo, ani anú ne omúkpata-a bhú 'ti balú gba Tulanisi. Oo, ani atsia adú asuno pi uo ndú 'kpí hana. <sup>10</sup> Ani amene mo-o ngúbula kalanga bhisi. Abhomú-o ndú okpála hana na ndu doto na Adjia, omaYuda di ne oGiliki, atsia adje eli gba Ngámá-o.

### *Engú inde akolo lí ongisi na obhosibhosi gba Seva*

<sup>11</sup> Ebhe adú amene ongamba 'ngú na ngbengbengbe pi okpála bhú Polo. <sup>12</sup> Kaka-a, okitambala di ne obongo inde atunú lie lí kúte Polo-o, u adú ago ne di, a'o'o lí kúte okpála na kuo. Abhomú-o, okpála na kuo ango-o adú akobho, osisiti bua atsia adú di aze bhú uo.

<sup>13</sup> OmaYuda koko, inde adú anú lí obili koko hana ngúbula napandja osisiti bua bhú okpála-a, ale di napandja osisiti bua ne 'li Ngámá Yesu. U adú apa pi osisiti bua ango-o me: «Ma aha líli pi yi ne 'li Yesu, inde lí Polo ngakpokpo 'ngú gba e me, yi zeze.» <sup>14</sup> Ongisi na obhosibhosi mananika gba Seva, saka 'ngbé dimandé bini gba omaYuda-a adú amemene moko. <sup>15</sup> Engú bini, siti bua-a agie pi uo me: «Ma mbila Yesu hana. Ma mbila la di hana me Polo ne da-ie. Ngayi-e, yi la naayi ne oda?»

<sup>16</sup> Abhomú-o, kpála inde lí siti bua adú bhú e, ati pi uo ne gbele, angu gba ani ane bhende gba uo-o mane. Ani amene uo sisiti naali. Kaka-a, u atsia aze bhú 'ti ango-o ndumbu di ne oeka lí kúte o. <sup>17</sup> Ndú okpála na gúdhú na Efeso hana, omaYuda di ne oGiliki, adje engú ango-o.

Ndu uo hana adje tsulu naali. Abhomu-o, u atsia adhege 'li Ngámá Yesu. <sup>18</sup> Bhiti okpála inde abhuka adu ago ambamba ta osisiti 'ngú inde u amene e ko. <sup>19</sup> Bhelé bhú ká uo adu obhulu mambengu. U ago ne obhuku gba o-o, u atsia atsulu kala ndu okpála hana. U ako masemase-e lie, u atsia au me a akoto olí falanga kutu ndjikpa bhuluvue. <sup>20</sup> Abhomu-o, ka angu gba Ngámá-a, eli-e adu ayangba, atsia adu akolo kpekpeke.

### *Tolo akoto bhú ká okpála na gudhu na Efeso*

<sup>21</sup> Pita ongu bhomu-o, Polo atsia abhundja me ni gulu ondu doto na Makedonia di ne Akai ngu nanu bhú gudhu na Yelusalema. Ani adu apa me: «I du me ma nde akolo oo, a ayo me ma akolo di bhú gudhu na Loma .» <sup>22</sup> Abhomu-o, ani atima okpála bhisi bhú ká okpála inde adu ateteke ani-e, Timoté di ne Elaste, bhú gudhu na Makedonia. Engú bini, ani atsia adu mbo matá naae bhú ndu doto na Adjia ngubula nedhinga bedi.

<sup>23</sup> Bha li nedhinga bhomu-o, tolo na ngbéngbé atsia akoto bhú gudhu na Efeso pindji kpadji gba Ngámá Yesu-o. <sup>24</sup> Kpála bini adu oo, a adu 'li ani me Demetiliusi. Ani adu abho djedje kulu eti gba ebhe na eole Alate mi li teme inde u a'i e me aladja. Okpála na kulu ango-o adu asia tia tété naali.

<sup>25</sup> Abhomu-o, ani apo bhúla uo bhú dabili bini ne okpála inde adu amene di ngua kulu ango-o. Ani atsia apa pi uo me: «Ondaise ma, yi mbila ndjindji me ní ngakobho ka kulu inde. <sup>26</sup> Yi ngauu, yi la di ngadjedje, engú li Polo inde-e ngamene e-o. Ani ngapa me oebhe inde li okpála amene e ne 'kpa-a, a ko oebhe de. Ani agbele okpála nganda e bhelé. Ani mene mo-o, bha bini bhú gudhu na Efeso sii de, engú bini, masikpe de bhú ndu doto na Adjia libhomu. <sup>27</sup> Eli ango-o ti da nasiti bha bini kulu gba ní-e de, engú bini, a ti da nayaka di sa eti gba 'ngbé ebhe na eole Alitemi. Abhomu-o, li okpála 'ó nadhege Alitemi, ebhe na eole inde li okpála na

ndu doto na Adjia di ne pála doto libhomu ngadhège e-o.»

<sup>28</sup> Li okpála inde adu oo adje engú bhomu-o lie, u abi 'gú naali. U atsia aholo nasusula me: «Alitemi gba okpála na gudhu na Efeso-o ngbéngbé!» <sup>29</sup> Abhomu-o, tolo aha gudhu libhomu. U aholo Gayusi, ngauo ne Alisitaluka, okpála bhisi na gudhu na Makedonia inde adu adhuku bhú dabili bini ne Polo-o. U atsia anu ne uo bhú holo li bili li okpála apépekèbhè bhúla o lie ko. <sup>30</sup> Kaka-a, Polo me ni ngakoto kala ndu okpála hana, engú bini, omakpata atsia ayoko ani. <sup>31</sup> Okpála koko di na ndu doto na Adjia inde adu akunda ani-e, atima eli pi ani me, ngaani makpe-e, ani anu li bili li okpála apépekèbhè bhúla o lie de.

<sup>32</sup> Li nedhinga ango-o, tolo adu naali. Abhomu-o, okpála dje lio de. Okoko adu asusula ne engú kpi, okoko atsia adu di asusula ne engú koko. Bhelé na uo du ambila ta 'ngú inde u apépekèbhè bhúla o ngú e de. <sup>33</sup> Okpála koko bhú ká bhiti okpála bhomu-o, akpokpo pi Alekidjandele inde adu bhú ká uo-o, u atsia adyudyo ani ne akalanu. Abhomu-o, ani a'e 'kpa e bhúla, ngubula nasuno me ni ngakunda nagama 'ngú kala okpála. <sup>34</sup> Engú bini, li okpála ambila lie me a ko maYuda-a, ndu uo hana aholo asusula bhú dabili bini ngubula nedhinga masikpe de saa bhisi me: «Alitemi gba okpála na gudhu na Efeso-o ngbéngbé!»

<sup>35</sup> Ali soso-o, ndombi bini na gudhu ango-o ayoko uo, ani atsia apa me: «Ngayi okpála na gudhu na Efeso-o, ndu okpála hana mbila ndjindji me gudhu na Efeso ngalila 'ti ebhe gba 'ngbé ebhe na eole Alitemi, di ne kulu ani inde ayie nani abhúla atsia ati kuto-o. <sup>36</sup> Kpála bini ti da nayayala de. Kaka-a, a ayo me yi 'o bua yi kuto. Yi améne 'ngú bhú holo de.

<sup>37</sup> Yi ago ne okpála inde-e ei. Ngauo-o, u zi 'he bhú 'ti ebhe na eole gba ní-e de. U tsia sobho la di ani de. <sup>38</sup> I du me Demetelisi ne okpála na kulu gba e nde ne engú sunda o ne kpála bini-e, a ne oekpi di ne ongámási ngu nakodho 'ngú ango-o. A bhomu-o bili inde a ayo me u nu

kpokpo 'ngú sunda o lie ko. <sup>39</sup> I du me a nde matá ne engú koko inde a ayo me u gama 'ngú lie, ya apékèbhè bhúla ya maka li líli apa lie, ya tsia kpókpo 'ngú tété. <sup>40</sup> Atigala bedi me u pa li ní me, ní ngaha kpéke 'ndji pi okpála li 'ngú inde akodho 'kpí naki-o. Padhá de, anga tata li napékèbhè bhúla ní me-e ade. Ní ti la di da nakpokpo 'ngú tété pi okpála ndjindji de.» [ <sup>41</sup> \*]

## 20

### *Polo ayie bhú gúdhú na Efeso*

<sup>1</sup> Li tolo andjia lie, Polo a'i oməkpatá-o, ani atsia ato masi bhú uo. Pipita-a, ani abhana lie pi uo, ani atsia atapa bhú ndu doto na Makedonia. <sup>2</sup> Ani agulu ndu doto ango-o, ani ato masi bhú omabhuka ne oeli bhelé. Pipita-a, ani atsia akolo bhú ndu doto gba oGiliki. <sup>3</sup> Oo, ani asi epe bata. Li nedhinga inde ani adu akunda lie naha 'ngbé zabu ngú nanu bhú ndu doto na Silia, ani adje me omaYuda apo bhúla o ngú namene ni sisiti. Abhomu-o, ani atsia au ndjindji me ni gie lini, amba ni pu ne abhú ndu doto na Makedonia. <sup>4</sup> Okpála inde adu nani adhuku ne ani bhú dabili bini-e, adu nani: Sopatolosi, ndili gba Pilusi, kpála na gúdhú na Beloya; Alisitaluka ngauo ne Sekundusi, okpála na gúdhú na Tesalonike; Gayusi, kpála na gúdhú na Delebe, ne uo ne Timoté; Tisike ngauo ne Tolofime, okpála na ndu doto na Adjia. <sup>5</sup> Okpála bhomu-o agbida kalanu, u atsia adu adjeke ya bhú gúdhú na Tuluasi. <sup>6</sup> Engú bini, ngaya-a, ya aha 'ngbé zabu bhú gúdhú na Filipoi. Pita anokomia nazu mapa inde li levile nde bhú e ade-e, ya atsia anu abhaka uo bhú gúdhú na Tuluasi, pita ekpi bhuluvue. Oo, ya asi poso bini.

### *Polo akpokpo 'ngú gba Ebhe-e bhú gúdhú na Tuluasi*

<sup>7</sup> Bhú 'kpí kulu madhia tagolo-o,\* ya apo bhúla ya ngú nazu mapa-o. Polo adu

agama 'ngú pi uo, anga ani adu akunda nanu pita 'kpí ango-o. Ani atsia agama 'ngú ngengele akolo tutu sukpe. <sup>8</sup> Ya apo bhúla ya bhú tina 'ti bhende na abhúla-o. Oo, oeke adu bhelé. <sup>9</sup> Makombi bini, a adu 'li ani me Etikusi, ani adu li malilisa. Li Polo adu la lie agama 'ngú ngengele-e, ani ati ne ela má kolio! Abhomu-o, ani atsokodho abhúla bhú tina 'ti na bata-a, ani atsia ati kuto má kpu! U a'e bha ibili ani me ani nde akpi. <sup>10</sup> Polo akè, ani angumba pí ani, ani aha ani, abi ani sa 'kpa e. Ani atsia apa me: «Yi adjé tsulu de. Ani kpi de.» <sup>11</sup> Pipita-a, Polo agie matá lie abhúla, ani aha mapa-o, ani agumu, ani atsia azu. Abhomu-o, ani agama matá 'ngú ngengele akolo bhú sikikpi. Pipita-a, ani atsia atapa. <sup>12</sup> La-a, pi makombi bhomu-o, u anu ne ani me ani nde nu. Engú bhomu-o ateteke okpála naali.

### *Polo anu bhú gúdhú na Milete*

<sup>13</sup> Ya ayie kalanu, ya aha 'ngbé zabu ngú nanu bhú gúdhú na Asosa. A bhomu-o bili inde a ayo lie me ya ha Polo bhú 'ngbé zabu-o. Padhá de, anga ani apa pi ya mo-o ngae me, ni anu naani ne 'dhu ni. <sup>14</sup> Ani ago abhaka ya lie bhú gúdhú na Asosa-a, ya aha ani bhú 'ngbé zabu, ya atsia atapa bhú gúdhú na Mitilene. <sup>15</sup> Li ekpi aseke lie, ya ayie oo, ya akolo bhúla kpemè na Kio. Ekpi na bhisi-e, ya akolo bhú kpemè na Samosi. Ekpi na bata-a, ya atsia akolo bhú gúdhú na Milete. <sup>16</sup> Polo abhundja me ni lu bhú gúdhú na Efeso de. Padhá de, anga ani du akunda de me ni bhue bhú ndu doto na Adjia ngengele-e de. Ani adu agbene lie ngubula me, i du me nedhinga nde u-o, ni de du bhú gúdhú na Yelusalema bhú anokomia na Patekote .

### *Polo abhana lie pi obhelesi okpála na gúdhú na Efeso*

<sup>17</sup> Li Polo adu lie bhú gúdhú na Milete-e, ani atima okpála bhú gúdhú na Efeso me u nu 'i obhelesi okpála na Dadjua gba

\* **19:41** 19:41 Lukuluku inde-e, a bhú obhuku koko na didili u aye e bhú eli na giliki ade. [Pita li ani andjia nakpo 'ngú bhomu-o lie, ani atsia aha kpadji pi okpála.] \* **20:7** 20:7 'Kpí kulu madhia tagolo: U aye bhú obhuku koko me «Ekpi na kalanu.» Pi omaYuda-a, ekpi na kalanu-o, a ko 'kpí kulu madhia. La pi ní-e, ekpi na kalanu-o, a ko 'kpí yinga.

Ebhe-o. <sup>18</sup> U akolo lie de ani-e, ani atsia apa pi uo me: «Yi mbila maka ma adu nadu lie bhú ká yi, nayie li 'kpí ma akolo lie bhú ndu doto na Adjia hana. <sup>19</sup> Ma amene kulu gba Ngámá me ma nde aké lima ne kuto. Ma adu aku 'gbá, ma atsia adu di adje likabhu ka li omaYuda adu adje lio lie ngú namene ma sisiti-o. <sup>20</sup> Yi mbila hana me ma wo 'he bini inde i ti da nadu pi yi ndjindji-e belegu de bini. Ma akpokpo Bádha Ngali gba Yesu-o. Ma atsia asuno la di pi yi mbámbá bhú ká okpála, ne bhú oeti gba yi-o. <sup>21</sup> Ma apa pi omaYuda di ne oGiliki me u dji lio pi Ebhe, amba u bhuka Yesu Ngámá gba ní ko.

<sup>22</sup> Mbia inde-e, ma adji bhú gudhu na Yelusalema maka li Bu Bhobua aha líli muma lie ngú namemene ko. Ma mbila de me abháka ma oo ne mangua 'ngú dho-ie de. <sup>23</sup> Ma ambila bha bini me Bu Bhobua ngapa muma me bhú gudhu bini ne bini-e, tikpu di ne likabhu ngadjeke ma. <sup>24</sup> La-a, mukobho gba ma makpe-e, bhú djila ma ngbéngbé ade. Padhá de, anga ma akunda namene kulu inde li Ngámá Yesu aha e muma-a, akólo bha bini alí soso: nakpokpo Bádha Ngali na bádha bhú 'bu gba Ebhe ko.

<sup>25</sup> Ma apu bhú okuti gba yi, ma akpokpo 'ngú pindji Nau gba Ebhe . Engú bini mbia inde-e, ma ambila me yi ú matá ma de. <sup>26</sup> Kaka-a, ma apa pi yi naki me: i du me kpála bini bhú ká yi nde angita-a, a ko matá naama 'ngú de. <sup>27</sup> Padhá de, anga ma akpokpo ndu 'ngú gba Ebhe-e pi yi hana. Ma wo engú belegu de bini. <sup>28</sup> Yi lila liyi ngayi makpe, di ne ndu piga hana inde li Bu Bhobua a'o e sa 'kpa yi me yi lila e ko. Yi lila Piga gba Ebhe inde ani akala e ne ngute Ndili gba e makpe ko. <sup>29</sup> Padhá de, anga ma ambila ndjindji me pita ma-a, okpála inde maka onute-e alí bhú ká yi. U tsia bhéle piga gba Ebhe-o. <sup>30</sup> Abana bha bhú ká yi makpe-e, okpála koko azé, u adú apa eu, u tsia gbéle omabhuka bhelé nganda o. <sup>31</sup> 'E-e! Yi lila liyi, amba yi bhundja la di me, bhú sunda kalanga bata, sukpe ne ngbikpi, ma ndala li nasuno pi kpála bini ne bini de.

Ma adu asuno belegu ne ngala bhú djila ma.

<sup>32</sup> Mbia inde-e, ma nga'o yi sa 'kpa Ebhe, di ne eli na bádha bhú 'bu gba ani-o. A ko ani inde ngateteke yi ngubula me yi lu kpekpeke-o. Ani di ne angu ngú naha pi yi obabadha 'ngú inde ani awo e pi ndu obubu okpála gba e hana-o. <sup>33</sup> Ma du ne gumu tia de. Ma du ne gumu olo de. Ma du di ne gumu bongo gba kpála bini de. <sup>34</sup> Ngayi makpe, yi ambila ndjindji me ma amene kulu ne 'kpa ma ngubula me ngaya ne obi ma-a, ya sia 'he inde ya adu ne gumu e ko. <sup>35</sup> Ma apana pi yi bhú ndu 'ngú hana me a ayo namene kulu ngubula nateteke okpála bhende bhú ndibhili-o. Yi bhundja di eli inde li Ngámá Yesu apa e ngae makpe me: «Djali naali pi kpála inde ngaha 'he ane kpála inde ngasia 'he ko!»

<sup>36</sup> Pita ani apa 'ngú bhomu-o lie, ani atutu lipuku e kuto, ani atsia ayo Ebhe bhú dabili bini ne uo. <sup>37</sup> Ndu uo hana aholo naku 'gbá. U aga ngulu ani. U atsia apa pi ani me, ani nu ndjindji. <sup>38</sup> U adu ne likabhu naali, anga Polo apa pi uo me u ú matá ni de. Abhomu-o, u atsia anu a'o ani ade 'ngbé zabu-o.

## 21

### *Polo atapa bhú gudhu na Yelusalema*

<sup>1</sup> Pita ya agbo bhusu ya ne uo lie, ya aha 'ngbé zabu, ya anu bhú kpemø na Kosi. Li ekpi aseke lie, ya akolo bhú kpemø na Lodosi. Ya ayie lie oo, ya atsia anu akolo bhú gudhu na Patala. <sup>2</sup> Oo, ya abhaka me 'ngbé zabu bini nde adji bhú ndu doto na Fenisia. Abhomu-o, ya a'u bhúbhú, ya atsia atapa. <sup>3</sup> Ya akolo lie lingo kpemø na Sipele-e, ya nde ibili ngauu hana-a, ya a'o káká ne li pápá na gali ngú nanu li pápá na ndu doto na Silia. Ya akolo bhú gudhu na Tile, li bili inde a ayo lie me u pandja 'he bhú 'ngbé zabu-o. <sup>4</sup> Ya abhaka la omabhuka lie oo, ya amene ne uo poso bini. Abhomu-o, Bu Bhobua atsia apa pi uo me, u pa pi Polo me ani anu bhú gudhu na Yelusalema de. <sup>5</sup> Engú bini, li ekpi gba ya ale lie, ya atsia agbida. Ndu uo hana, ne olisi di ne ongisi gba o-o, anu na'o ya. Ya akoto bhú gudhu-o. Ya akolo lingo

'ngbé 'ngu, ya atutu lipaku ya kuto, ya atsia ayo Ebhe. <sup>6</sup> Kala me ya agbo bhusu ya ne uo-o, ya aholo 'kpa uo. Ya anu a'u bhú 'ngbé zabu-o. Abhomu-o, u atsia agie lio agba o.

<sup>7</sup> Ya ayie bhú gudhu na Tile, ya akodho 'ngbé 'ngu-o, ya atsia akolo bhú gudhu na Potolemaisí. Ya akolo lie oo, ya aholo 'kpa ondaise ya, ya atsia adu ne uo ekpí bini. <sup>8</sup> Li ekpí aseke lie, ya aholo ne enú, ya atsia akolo bhú gudhu na Sedjale. Oo, ya ali bhú 'ti gba Filipino, musuno na Bádha Ngali gba Ebhe, suka okpála mananika nani inde u abhu o bhú gudhu na Yelusalema ko. Ya atsia adu agba ani. <sup>9</sup> A adu nani ka ani ne ongisi na olisilisi badha inde i mbila nga nani engú na obhosi de. U adu nani akpokpo 'li Ebhe pi okpála.

<sup>10</sup> Ya adu oo ngubula ekpí bhelé. Li nedhinga ango-o, polofeta Agabusi ayie bhú ndu doto na Yudaya atsia ago oo. <sup>11</sup> Ani ago abhaka ya. Ani abhulu ekpí na ludu Polo. Ani agbigbite 'kpa e di ne 'dhu e ne di. Do ani de me: «Bu Bhobua apa me: «Bhulu ekpí inde-e, bhú gudhu na Yelusalema-a, omaYuda agbigbite bhadi ani moko, u tsia pí ani pi ogandji okpála .» <sup>12</sup> Ya adje engú bhomu-o lie, ngaya, di ne omabhuka na gudhu na Sedjale-e, ya akikiliki liya pi Polo me ani anu bhú gudhu na Yelusalema de. <sup>13</sup> Engú bini, Polo atsia agie me: «Yi ngamene bhomu-o ni? Yi ngaku 'gbá, di ne nangbingi bua ma lie mo-o! Ma bha bini bedhe ade ngubula me u mbimbi ma ne ekpu, engú bini, ma bedhe ngubula me ma kpi bhú gudhu na Yelusalema ngubula 'li Ngámá Yesu.» <sup>14</sup> Ya ale la nadjí mabhundja gba ani-e lie pima-a, ya tsia zi kekele tété de. Ya apa bha ibili me: «A ayo me Ngámá mene maka ani akunda lie ko!»

<sup>15</sup> Pita ekpí ya amene e li bili bhomu-o, ya aleke liya. Abhomu-o, ya atsia agbida bhú gudhu na Yelusalema. <sup>16</sup> Omukpata koko na gudhu na Sedjale anu bhú dabili bini ne ya. U anu a'o ya gba kpála bini inde a ayo me ya adu gba e-o. A adu 'li ani me Menaso, kpála na kpomò na Sipele, suka omukpata na kalanu ko.

### *Polo anu natsia obhelesi okpála bhú gudhu na Yelusalema*

<sup>17</sup> Ya akolo lie bhú gudhu na Yelusalema-a, omabhuka asia ya ne djali. <sup>18</sup> Li ekpí aseke lie, Polo anu bhú dabili bini ne ya agba Djaki. Oo, ndu obhelesi okpála hana na Dadjua gba Ebhe-e, atsia apokobhe bhála o. <sup>19</sup> Polo aholo 'kpa uo. Abhomu-o, ani atsia akpokpo ndu 'ngú hana bini ne bini maka li Ebhe adu amemene lie bhú kulu gba ani bhú ká ogandji okpála ko. <sup>20</sup> Li u adje lie-e, u atsia adhogo Ebhe. Pipita-a, u atsia apa pi ani me: «Ndai ya, mu ngauu! A ko omaYuda ketò ne ketò inde abhuka Ebhe, ndu uo hana agbite lio li líli. <sup>21</sup> La-a, u adje li 'ngú gba mu-o me, mu ngasuno pi ndu omaYuda hana inde ngadulu bhú ká ogandji okpála me, a ayo me u 'o nakpata líli gba Moidje-o . U adje di me mo opa di pi uo me, u 'o nato ongisi gba o-o bhú gandja, amba u 'o di nakpata dasundu gba omaYuda-o. <sup>22</sup> A ayo me ya mene pi? A na paká me, u adjé madje me mo okolo si.

<sup>23</sup> Mene bhende ya apá e pi mu ko. A ka ya si ne obhosi badha inde asili ndjinga me, o aha lio pi Ebhe. <sup>24</sup> Ha uo, yi nu ne uo, yi vulu liyi ngubula me yi kolo bubu kala Ebhe, amba mu ha tia ngubula me u ka 'ndji uo. Abhomu-o, li ndu okpála hana tsia mbila me engú inde u apa e li mu-o, a ko kukulu 'ngú de. Engú bini ngamu di-e, mu ngakpata líli gba Moidje ko. <sup>25</sup> La pi ogandji okpála inde abhuka-a, ya aye pi uo líli gba ya-o: u 'o nazu so 'nu inde u abhelo e pi oebhe na eu-o ma'o. U 'o nazu ngute di ne so 'nu inde akpi ne ngute bhú e hana, amba u 'o nakunda olisi di ne obhosi ngangá ma'o.»

<sup>26</sup> Abhomu-o, li ekpí aseke lie, Polo abha obhosi ango-o, ani anu avulu lie ne uo bhú dabili bini ngubula me o kolo bubu kala Ebhe. Pipita-a, ani ali bhú 'ngbé 'ti Ebhe gba omaYuda, ani atsia a'o ekpí inde li mavulu ango-o andjia lie, u tsia bhelo enu pi Ebhe ngubula ndu uo hana bini ne bini.

*U aholo Polo bhú 'ngbé 'ti Ebhe gba omaYuda*

<sup>27</sup> A akolo lie masikpe de me oekpí mananika-a ndjia, omaYuda koko na ndu doto na Adjia au Polo bhú 'ngbé 'ti Ebhe gba omaYuda. Abhomu-o, u ato siti 'ngú bhú 'ndji ndu okpála hana. U atsia aholo ani. <sup>28</sup> U adu asusula me: «Ngayi omaɓsalaele-e, yi go teteke ya! Yi tsia nga kpála inde ngasuno ne ndu bili hana pi ndu okpála hana me, u yala omaɓsalaele, u yala líli gba Moidje, di ne 'ngbé 'ti Ebhe gba omaYuda-o. Ani amba belegu oGiliki bhú 'ngbé 'ti Ebhe. Abhomu-o, ani atsia asiti di bili na bubu ango-o.» <sup>29</sup> (U adu apa mo-o, anga kalanu-o, u au Tolofime, kpála na gudhu na Efeso, bhú dabili bini ne Polo abhú gudhu. Kaka-a, u adu abhundja me Polo ato ani bhú 'ngbé 'ti Ebhe gba omaYuda.)

<sup>30</sup> U aholo amene tolo bhú gudhu libhomu. Abhomu-o, okpála ayie ne ndu bili hana, u ago apokobhe bhúla o. U aholo Polo, u agbele ani akilidjo, u atsia anini kolo obhoti na 'ngbé 'ti Ebhe gba omaYuda-o. <sup>31</sup> Li u adu agili nabhole Polo lie, ngali ango-o atsia akolo li 'ngbé ngámá gba osudha na gudhu na Loma me okpála bhú gudhu na Yelusalema libhomu ngazi tolo. <sup>32</sup> Kolo má gala me-e, ani abha ongámási gba osudha di ne osudha, ani anu ne uo li bili li okpála adu azi tolo lie-o. U au 'ngbé ngámá di ne osudha-a lie, u atsia a'o nabhi Polo. <sup>33</sup> Abhomu-o, 'ngbé ngámá-a adyudyo lie de Polo. Ani me u holo ani, ani atsia aha líli me u gbigbite ani ne gbindjili bhisi. Pipita-a, ani ayi me: «A ko naae da, ani amene la di ni?» <sup>34</sup> Bhú ká bhiti okpála bhomu-o, okpála adu asusula ne engú ngangá, u dje lio de. Li tolo adu lie naali-e, 'ngbé ngámá-a tsia dje ta 'ngú ango-o de. Abhomu-o, ani atsia aha líli me u nu ne Polo bhú 'ti inde li osudha nalila gudhu adu lie ko.

<sup>35</sup> Ani akolo lie li ngba 'ti-e, osudha atsia abi ani ka li bhiti okpála bhomu-o adu amene ani lie sisiti-o. <sup>36</sup> Padhá de, anga ndu uo hana adu akpata ani. U atsia adu atu 'ue me u bhole ani.

*Polo akpokpo 'ngú gba e-o*

<sup>37</sup> Nedhinga u adu akunda nato Polo lie abhú 'ti-e, Polo apa pi 'ngbé ngámá-a me: «Mu ti da naziba uu me ma pa mbo engú pi mu?» 'Ngbé ngámá-a atsia ayi ani me: «Mu mbila eli gba oGiliki-e hana? <sup>38</sup> A ko ndi mu di maEdjipeto inde ato kpéke 'ndji bhú okpála sunda 'kpí inde-e? Ani atsia anu di ne okpála kete badha bhú 'gu-o?» <sup>39</sup> Abhomu-o, Polo agie me: «Ngama-a, ma ne maYuda. U azu ma bhú gudhu na Talasi bhú ndu doto na Silisia. Ma ne kpála na gudhu na padhá padhá ade. Kikiliako, ha kpadji muma, ma gama 'ngú pi okpála.» <sup>40</sup> 'Ngbé ngámá-a atsia aziba pi ani. Abhomu-o, Polo alu li ngba 'ti-o, ani amene 'kpa e me ni akunda nagama 'ngú pi okpála. Ndu okpála hana andjili má bulu! Abhomu-o, Polo aholo nagama 'ngú pi uo bhú eli gba omaYuda me:

## 22

<sup>1</sup> «Odyi ma, di ne ondaise ma, yi dje engú inde ma adji apa e pi yi mbia inde-e ndjindji, amba yi mbila me ma mene 'ngú bhomu-o de.» <sup>2</sup> Li u adje lie me ani ngagama 'ngú pi o bhú eli gba omaYuda-a, u atsia andjili la matá má bulu! Polo atsia apa me: <sup>3</sup> «Ngama-a, ma ne maYuda. U azu ma bhú gudhu na Talasi, bhú ndu doto na Silisia. Ma abhele bhú gudhu na Yelusalema inde. Musuno gba ma Gamaliele asuno nambila líli gba onguo ogbi ní-e muma ndjindji. Ma aha nani lima pi Ebhe ne bua ma bini maka ndu yi hana yi ngamemene lie naki ko.

<sup>4</sup> Ma adu ato mbolo li okpála inde adu akpata kpadji gba Ngámá-o, ma atsia adu agili nabhili uo. Ma azumu obhosi di ne olisi, ma atsia amba uo bhú tikpu. <sup>5</sup> Bhele kpála gba odimandø gba Ebhe di ne obhelesi okpála mbila ndjindji me ma ngapa e kukulu 'ngú. U aha belegu obalua muma ngubula me ma nu ne di pi ondaise ní inde bhú gudhu na Damasi. Ma anu oo me ma holo omabhuka inde oo, ma gbigbite uo ne gbindjili, amba ma mba uo bhú gudhu na Yelusalema ngubula me u mene uo sisiti.»



*Polo akpokpo maka ani adji bua e lie ko (Tsia bhú Kul. 9:1-19, 26:12-18.)*

<sup>6</sup> «Abhomu-o, ma adu lie li kpadji-e, masikpe de nakolo bhú gudhu na Damasi de tulukpe-e, kolo me-e, zi 'kpí na kpekpeke ayie abhúlá, a ago asa ma ngbalina. <sup>7</sup> Ma agu 'i ma kuto má gbwæ! Ma atsia adje eli bini inde apa muma me: <Saulo, Saulo, mu ngato mbolo li ma ngu ni?> <sup>8</sup> Abhomu-o, ma atsia agie me: <A ko mu da, Ngámá?> Ani atsia agie muma me: <A ko ma Yesu, kpála na kuti na Nadjaleta, inde mu ngato mbolo lie ko.> <sup>9</sup> Okpála inde adu bhú dabili bini ne ma-a, au zi 'kpí ang-o. Engú bini, u dje 'li kpála inde adu agama 'ngú muma-a de. <sup>10</sup> Abhomu-o, ma atsia ayi matá me: <Ngámá, a ayo la me ma mene pi?> Ngámá agie muma me: <Yie bhúlá, nu bhú gudhu na Damasi. Oo, u apá pi mu ndu 'ngú hana inde li Ebhe akunda me mu mene e ko.> <sup>11</sup> La-a, ma du au 'kpí ka kpéke zi 'kpí bhomu-o lie de-e, okpála inde adu bhú dabili bini ne ma-a, aholo 'kpa ma, u atsia anu ne ma bhú gudhu na Damasi.

<sup>12</sup> Kpála bini adu nani oo, a adu 'li ani me Anania. Ani adu akpe Ebhe, ani atsia adu di akpata líli gba ní-e ndjindji. Ndu omaYuda hana na gudhu na Damasi adu apa 'ngú gba ani-e ndjindji. <sup>13</sup> Ani ago natsia ma. Ani akolo lie de ma-a, ani atsia apa muma me: <Ndai ma Saulo, u matá 'kpí uu!> Bha li nedhinga bhomu-o, djila ma abhulu, ma atsia au ani. <sup>14</sup> Abhomu-o, ani atsia apa muma me: <Ebhe gba onguo ogbi ní abhu nani mu didili ngubula me mu mbila engú inde ani akunda e-o. Ani abhu mu ngubula me mu mbila Kpála inde ngbingbili-o, amba mu dje di 'li ani makpe. <sup>15</sup> Padhá de, anga pi ani-e, mo odú akpokpo ongu gba ani bhende mo ou e, di ne bhende mo odje e pi ndu okpála hana. <sup>16</sup> Mbia inde-e, mu matá ngadjeke ni? Yie bhúlá, sia batisimo, mu yo Ebhe, amba ani 'e siti 'ngú gba mu ko.>

*Polo akpokpo maka li Ebhe atima ani lie agba ogandji okpála-o*

<sup>17</sup> Abhomu-o, ma agie lima bhú gudhu na Yelusalema. Ekpí bini, ma adu ayo

Ebhe bhú 'ngbé 'ti Ebhe gba omaYuda, ma atsia au engú maka loto. <sup>18</sup> Ma au Ngámá, ani atsia apa muma me: <Yaka! Koto bhú gudhu na Yelusalema má gala, anga okpála na gudhu inde-e, u ziba engú gba ma inde mo opá e pi uo-o de.> <sup>19</sup> Abhomu-o, ma atsia apa me: <Ngámá, u mbila hana me ma adu nako nanu bhú oti nadje líli gba Moidje, ma adu aholo okpála inde abhuka mu-o. Ma adu amba uo bhú tikpu, ma atsia adu di abhi uo ne fimbo. <sup>20</sup> Nedhinga u adu abhelo Etieni, kpála nakpokpo Bádha Ngali gba mu-o lie, ma adu di oo. Ma aziba okpála inde adu abhelo ani-o. Ma atsia adu alila obongo gba uo-o.> <sup>21</sup> Abhomu-o, Ngámá atsia apa muma me: <Nunu, anga ma atima mu tsutsu agba ogandji okpála .>»

*Polo apa me, ni ne kpála na gudhu na Loma*

<sup>22</sup> Bhiti okpála bhomu-o adu nga bha nadje ani akolo li engú inde ani apa e bhomu-o. Abhomu-o, u atsia aholo asusula me: «Yi bhelo kpála bhomu-o mabhelo! Ani ti da nadu pila doto de!» <sup>23</sup> U adu asusula kpekpeke. U adu ape obongo gba o, u atsia adu abala ndju doto ne abhúlá. <sup>24</sup> Abhomu-o, 'ngbé ngámá gba osudha aha líli me u to Polo abhú 'ti gba osudha. Ani atsia apa me u bhi ani ne fimbo, amba ani pa ta 'ngú inde li okpála ngasusula lie me u mene ani sisiti-o. <sup>25</sup> Li u agbigbite ani lie ne ekpú ngubula nabhi ani ne fimbo-o, abhomu-o, ani atsia apa pi ngámá gba osudha inde adu oo me: «A ayo bha ndju uu me, yi bhi ndili na kuti na Loma ne fimbo me, u nde kodho nga 'ngú gba ani-e di?»

<sup>26</sup> Li ngámá bhomu-o adje engú li Polo ayi e lie, ani atsia anu abhaka 'ngbé ngámá gba osudha-o. Ani atsia ayi ani me: «Mo oméne pi, anga kpála bhomu-o, a ko ndili na kuti na Loma!» <sup>27</sup> 'Ngbé ngámá-a ago abhaka Polo, ani atsia ayi ani me: «Pa nga muma, mu ne ndili na kuti na Loma na paká?» Polo atsia agie pi ani me: «Heni, a na paká.» <sup>28</sup> Abhomu-o, 'ngbé ngámá-a atsia apa me: «Ma aha nani tia bhelé ngubula me ma kolo kpála

na kuti na Loma.» Polo atsia apa naae me: «Ngama-a, u azu ma kpála na kuti na Loma.» <sup>29</sup> Kolo má gala me-e, okpála inde i di me bhi ani ngubula me ani gama 'ngú-o, u atsia atsambala de ani. Abhomu-o, 'ngbé ngámá gba osudha-a aholo adje tsulɔ, li ani ambila lie me ni aha líli ngani me u gbigbite ndili na kuti na Loma-o.

*Polo kala Libi okpála natsia 'kpí lí 'ngú gba omaYuda*

<sup>30</sup> Abhomu-o, 'ngbé ngámá gba osudha-a adu akunda me, ni mbila kukulu ta 'ngú inde li omaYuda asungula Polo lie pi ongámási-o. Kaka-a, li ekpí aseke lie, ani aha líli me u bhuhulu Polo, di me ongbengbe odimandɔ gba Ebhe , di ne Libi okpála natsia 'kpí lí 'ngú gba omaYuda pɔkɔbhɔ bhúla o. Pipita-a, ani ago ne Polo, ani atsia a'o ani kala uo.

## 23

<sup>1</sup> Abhomu-o, Polo atsia Libi okpála natsia 'kpí lí 'ngú gba omaYuda ne kpéke djila. Do ani de-e: «Ondaise ma, nakolo pi mbia inde-e, ma adhuku kala Ebhe ndjindji.» <sup>2</sup> Engú bini, bhele kpála gba odimandɔ Anania aha líli pi okpála inde adu de ani-e me u su 'bhɔ ani. <sup>3</sup> Abhomu-o, Polo atsia apa pi ani me: «Ebhe asú mu ngae, ngamu kpála inde maka pabu 'ti inde u ato embú lie! Mo odu oo ngú nakodho 'ngú gba ma-a maka li líli apa lie. Engú bini, mo ogumu líli anga mo opa me u su ma!» <sup>4</sup> Abhomu-o, okpála inde adu de Polo atsia apa pi Polo me: «Mu ngasobho bhele kpála gba odimandɔ gba Ebhe!» <sup>5</sup> Polo agie me: «Ondaise ma, ma mbila igini de me a ko bhele kpála gba odimandɔ gba Ebhe-e de. Padhá de, anga Bhuku gba Ebhe-e apa me: «Mo osóbho ngámá gba okpála na doto gba mu-o de.»

<sup>6</sup> Li Polo ambila la nani lie me bhú ká okpála inde apo bhúla o bhomu-o, okoko adu oSadukai , okoko adu omuFalisai-e , ani atsia asula bhú ká uo me: «Ondaise ma, ma ne muFalisai, ndili gba omuFalisai. † du me u nde

nga'o 'ngú pí ma me-e, a ko anga ní ne 'to ní me okpála inde amu-o, azúku mazuku.» <sup>7</sup> Li ani apa 'ngú bhomu-o lie, omuFalisai ne oSadukai aholo natsi sunda o. Abhomu-o, okpála atsia agbo bhusu o bhisi. <sup>8</sup> (Padhá de, anga oSadukai ziba nani naao de me okpála azúku mazuku-o de. U atsia apa di nani matá me andjelu ade, bua di ade. Engú bini, omuFalisai atsia aziba nani naao ndu 'ngú bhomu-o hana.) <sup>9</sup> Abhomu-o, tolo atsia akolo naali. Omusuno na líli koko inde adu bhú ká omuFalisai-e ayie bhúla, u atsia apa ne angu hana me: «Ya u siti 'ngú bhú kpála inde-e belegu de bini. A mana mugito me andjelu bini, i du di-e bua, agama 'ngú pí ani ngae!»

<sup>10</sup> Li okpála adu alo 'bhɔ lie sunda o naali-e, 'ngbé ngámá gba osudha-a aholo adje tsulɔ me u adji adolo Polo. Kaka-a, ani aha líli pi osudha-a me, u kɔ, u nu ha Polo bhú ká uo, amba u gie ani abhú 'ti gba osudha inde ngalila gudhu-o.

<sup>11</sup> Sukpe-e, Ngámá akoto li Polo, ani atsia apa pi ani me: «Atou! Padhá de, anga maka mo okpokpo 'ngú gba ma lie bhú gudhu na Yelusalema-a, a ayo bhadi me mu nu kpokpo bhú gudhu na Loma moko.»

*OmaYuda adje lio ngú nabhɔlɔ Polo*

<sup>12</sup> Li ekpí aseke lie, omaYuda adje lio pindji Polo, u atsia atu silika me o zú bha bini 'he, li o ndjí la bhadi 'he bhe nandji mandji-e me, o nde abhɔlɔ bha bini ani kalanu. <sup>13</sup> Okpála inde nani adje lio bhomu-o ane nani ndjikpa badha mane. <sup>14</sup> U anu abhaka ongbengbe odimandɔ di ne obhelesi okpála, u atsia apa pi uo me: «Ya atu silika me ya azú bha 'he me ya nde abhɔlɔ Polo kalanu. <sup>15</sup> Mbía inde-e, a ayo me ngayi ne Libi okpála natsia 'kpí lí 'ngú gba omaYuda-a, yi yo ka 'ngbé ngámá gba osudha-a me, ani go ne Polo kala yi si. Yi mene mugito me yi akunda atsia 'kpí lí engú gba ani-e ndjindji. La pi ya-a, ya bedhe ngú nabhɔlɔ ani me ani nde kolo ngae.»

† 23:5 23:5 Tsia bhú Eki. 22:27.

<sup>16</sup> Engú bini, ndili na bhobhoko gba ndai Polo na øelø-o adje engú ango-o. Aní anu, aní alí bhú 'tí gba osudha inde ngalila gudhu-o. Aní atsia apa pí Polo. <sup>17</sup> Abhomu-o, Polo a'i suka ongámási gba osudha-o. Do aní pí aní me: «Nu ne makombi inde-e pí 'ngbé ngámá gba osudha-o. Padhá de, anga aní ne engú napapa pí aní.» <sup>18</sup> Ngámá gba osudha-a aha aní, aní anu ne aní pí 'ngbé ngámá gba osudha-o. Aní atsia apa me: «Bhulu 'kpú Polo a'i ma, aní atsia ayo ka ma me, ma go ne makombi inde-e pí mu. Padhá de, anga aní ne engú napapa pí mu.»

<sup>19</sup> Abhomu-o, 'ngbé ngámá gba osudha-a aha 'kpa makombi-o. Aní anu ne aní ne lí ngongo, aní atsia ayi aní me: «Mo okunda napa muma mangua 'ngú dho?» <sup>20</sup> Aní atsia apa me: «OmaYuda adje lío me, o yo ka mu me ha Polo, amba mu go mambi ne aní kala Libi okpála natsia 'kpí lí 'ngú gba omaYuda-o. U améne mugito me u ngakunda atsia 'kpí lí 'ngú gba aní-e ndjindji. <sup>21</sup> Engú bini, mo obhúka uo de. Padhá de, anga okpála nane ndjikpa badha bhú ká uo, adje lío ngú namene aní sisiti. U atú silika me o zú bha bini 'he, lí o ndjí la bhadi 'he bhe nandji mandji-e me, o nde abhøø bha bini Polo kalanu. Mbia inde-e, uo bedhe. U ngadjeke bha maka mo opá lie ko.» <sup>22</sup> 'Ngbé ngámá gba osudha-a apa pí makombi ango-o me: «Mo opá pí kpála bini de me, ní apa engú inde-e muma apa-a de.» Pípita-a, 'ngbé ngámá gba osudha-a atsia agie aní sídì.

### *U atima Polo bhú gudhu na Sedjale*

<sup>23</sup> Pípita-a, 'ngbé ngámá gba osudha-a a'i ongámási na sudha gba e-e bhisi. Aní atsia apa pí uo me: «Yi po bhúla osudha kámá bhisi, dí ne obhende ndjikpa mananika inde adhudhuku pí 'ngbu opunda, amba yi po la dí bhúla obhende na mandambi-e kámá bhisi. Ndu yi hana yi du bedhe ngú nanu bhú gudhu na Sedjale tagolo bhú saa na odukpabini. <sup>24</sup> Yi leke dí punda ngú nabí Polo. Yi mene me

aní kolo lí bílí lí ngámá Felikisi nde lie ndjindji me ehe bini nde mene aní de.»

<sup>25</sup> Abhomu-o, aní atsia aye balua me:

<sup>26</sup> «Kolode Lisiasi apa me, ní yi Felikisi, ngámá na asasaua, mayi.

<sup>27</sup> OmaYuda aholo nako kpála inde ma atima e pí mu inde-e ngao. U adu akunda nabhøø aní. La-a, ma adje lie me a ko ndili na kuti na Loma-a, ngama ne osudha gba ma-a, ya atsia agbulu aní ka uo. <sup>28</sup> Maka ma adu akunda nambila ta 'ngú inde u aholo aní ngú e lie, ma atsia anu ne aní kala Libi okpála natsia 'kpí lí 'ngú gba uo-o. <sup>29</sup> Ma au me, u aholo aní pindji ongú inde atsia lílí gba uo-o. La-a, ma u aní ne engú bini inde u tí da nabhøø aní, dí ne bhende u tí da naholo aní ka e de. <sup>30</sup> Lí u apa muma lie me u adu agili nabhøø aní-e, ma atsia atima aní pí mu kolo má gala! Ma atsia apa dí pí okpála inde a'o 'ngú pí aní-e me, u nu kpokpo 'ngú gba aní-e pí mu.»

<sup>31</sup> Abhomu-o, osudha-a atsia amene maka lí 'ngbé ngámá gba uo apa pí uo lie ko. U aha Polo, u atsia anu bha ne aní sukpe bhomu bhú gudhu na Atipatili. <sup>32</sup> Lí ekpí aseke lie, osudha bhende adhuku ne 'dhu o agie lío lí bílí lí osudha nalila gudhu-o adudu lie ko. U atsia a'o obhende adu adhuku pí 'ngbu opunda-a me, u nu ne Polo. <sup>33</sup> U akolo lie bhú gudhu na Sedjale-e, osudha-a aha balua pí ngámá na ndu doto ango-o. U atsia a'o dí Polo sa 'kpa aní. <sup>34</sup> Abhomu-o, ngámá-a atanga balua-o. Aní atsia ayi me Polo ne kpála na ndu doto bhedho. Aní adje la lie me a ko kpála na ndu doto na Silisia-a, <sup>35</sup> aní atsia apa pí aní me: «Ma adjé engú gba mu-o me okpála inde yi nde ne o bhú 'ngú-o nde akolo.» Abhomu-o, aní atsia aha lílí me u lila Polo bhú eti gba 'ngbé ngámá Elode. \*

## 24

*OmaYuda agbe Polo kala ngámá Felikisi*

<sup>1</sup> Pita ekpí bhuluvue, bhele kpála gba odimandø Anania akolo bhú gudhu na

\* **23:35** 23:35 Eti gba 'ngbé ngámá Elode: A adu nani bhú Sedjale. Elode Ngbéngbé ayiki nani ngae. Ongámási na Loma atsia adji nani dabilí nadu ka o tété.

Sedjale, bhú dabili bini ne obhelesi okpála koko di ne avuka bini inde adu 'li e me Teletulusi. U atsia ato siti 'ngú ne 'li Polo pi Felikisi, ngámá na ndu doto ango-o. <sup>2</sup> U a'i Polo. Abhomu-o, Teletulusi atsia aholo akpokpo li ani me: «Ngámá na asasaua, Felikisi, mo oto guo 'ngú bhú ndu doto inde-e ngamu. Mu di aleke ongu bhelé bhú doto gba ya ne imbilangu gba mu-o. <sup>3</sup> Ndu 'kpí hana di ne ndu bili hana, ngámá na asasaua, Felikisi, ya ngagie heni ngú ndu 'ngú bhomu-o hana. <sup>4</sup> Engú bini, ma kunda nabhele nedhinga gba mu-o de. Kaka-a, ma ayo ka mu me dje nga mbo ya bedi ne bádha bua.

<sup>5</sup> Ya au me kpála inde-e, a ko kpála na mugwe. Ani ngato kpéke 'ndji bhú 'ndji ndu omaYuda hana píla doto libhomu. A ko la di ngámá na Dadjua bini na Ebhe gba okpála na kuti na Nadjaleta. <sup>6</sup> Ani ale belegu nasiti 'ngbé 'ti Ebhe gba omaYuda-o. Abhomu-o, ya atsia aholo ani. [Ya akunda nako me kodho 'ngú gba ani-e maka li líli gba ya apa lie-o. <sup>7</sup> Engú bini, Lisiasi, 'ngbé ngámá gba osudha-a, atsia ayoko. Ani atsia agbulu ani ka ya. <sup>8</sup> Pipita-a, ani atsia aha líli pi ya me ya go ne ani kala mu.] I du me mu nde ayi ani ngamu makpe-e, mu tsia mbila me ndu 'ngú hana inde ya apa e li ani-e, a ko kukulu 'ngú.» <sup>9</sup> OmaYuda atsia aziba di ongu ango-o. Do uo me: «A ko kukulu 'ngú.»

### *Polo akpokpo 'ngú gba e kala ngámá Felikisi*

<sup>10</sup> Abhomu-o, ngámá Felikisi amene 'kpa e pi Polo me ani kpokpo 'ngú gba e-o. Polo atsia apa me: «Ma mbila ndjindji me, ngubula kalanga bhelé-e, mu ngakodho 'ngú gba ya okpála na kuti inde-e ngbingbili. Kaka-a, ma ne djali naali ngú nakpokpo 'ngú gba ma-a pi mu. <sup>11</sup> Mu ti da nambila bha ngamu makpe me ane nga ekpi ndjikpa ne ká bhisi de maka ma anu nako lie bhú gudhu na Yelusalema ngú nadhøge Ebhe-o. <sup>12</sup> Kpála bini bhaka ma namene kpekebhe ne kpála bini na 'ngbé 'ti Ebhe gba omaYuda-a de. Kpála bini bhaka la di ma nato kpéke 'ndji bhú

'ndji okpála bhú 'ti nadge líli gba Moidje , di ne li kpadji de.

<sup>13</sup> Okpála ago ne ma kala mu inde-e ne engú bini ade inde i ti da nasuno me engú inde u ngapa e li ma inde-e, a ko kukulu 'ngú. <sup>14</sup> Ma aziba kala mu si me ma ngakpata kpadji na mbia inde ngauo, u ngau e me a sisiti-o. La-a, ma ngadhøge Ebhe gba onguo ogbi ní. Ma la di ngabhuka ndu 'ngú inde u aye e bhú obhuku na líli di ne bhe gba opolofeta-a hana. <sup>15</sup> Ma ne nabhuka bhú Ebhe bhadi maka uo me, okpála na ngbingbili di ne obhende ngbingbili ade-e azúku mazuku. <sup>16</sup> Kaka-a, ma ngamene ndu 'kpí hana ne kpéke me, bua ma du ndjindji kala Ebhe, di ne kala okpála.

<sup>17</sup> Ma du lie de bhú gudhu na Yelusalema ngubula kalanga bhelé-e, ma atsia agie lima oo ngú nateteke obhulu ndibhili na doto gba ma-a ne tia, di ne naha makiso gba ma-a pi Ebhe. <sup>18</sup> Kaka-a, u abhaka ma bhú 'ngbé 'ti Ebhe gba omaYuda me, ma nde avulu lima ngú nakolo bubu kala Ebhe avulu. Ma bha ká okpála de. Ma to la di kpéke 'ndji bhú 'ndji okpála de. <sup>19</sup> OmaYuda koko bhú ká obhende ayie bhú ndu doto na Adjia, adu oo. A ayo nako me u gbe ma kala mu ngao, i du me u nde ne engú li pápá gba ma-o. <sup>20</sup> I du mo-o de-e, a ayo me okpála inde si-e suno siti 'ngú inde u au ma ne e, nedhinga inde u agbe nako ma lie kala Libi okpála natsia 'kpí li 'ngú gba omaYuda-o .

<sup>21</sup> Padhá de, anga ma amene bha koli 'he bini. Ma apa kpekpeke kala uo me: «Yi agbe naki ma kala yi ngú nakpokpo 'ngú anga ma abhuka me okpála inde amu-o, azúku mazuku!» <sup>22</sup> La-a, pi ngámá Felikisi-e, ani adu ambila kpadji gba Yesu-o ndjindji. Abhomu-o, ani agie engú ango-o me ni akódho sidi. Ani atsia apa pi uo me: «Ma akódho 'ngú gba yi-e, li nedhinga li 'ngbé ngámá gba osudha Lisiasi agó lie ko.» <sup>23</sup> Ani atsia aha líli pi ngámá gba osudha-a me u lila Polo, kpála na 'kpá-o, malila. Engú la bini, u 'o ani me ani du mbo bhú ngu e. U ayoko di omaha ani ngú nateteke ani de.

*U agbe matá Polo kala ngámá Felikisi ne Dulusile*

<sup>24</sup> Pita mbo ekpí bedi-e, ngámá Felikisi ago ne wala e Dulusile. Òlò ango-o adu maYuda. Ngámá Felikisi atima okpála me u nu 'i Polo. Abhomu-o, ani atsia adje engú li Polo akpokpo e pindji nabhuka Yesu Kilisito-o. <sup>25</sup> Pipita-a, Polo aholo akpokpo lele maka a ayo lie nadu ngbingbili, ne nane gumu kute di ne me ekpí koko akólo makolo, ekpí inde li Ebhe akódho 'ngú gba okpála lie ko. Abhomu-o, ngámá Felikisi aholo adje tsulu. Ani atsia apa me: «Mbia inde-e, mu ti da nanu. I du me ma nde asia nedhinga-a, ma tsia 'i matá mu.» <sup>26</sup> Ani adu di ne 'to e me ni asia tia ka Polo. Kaka-a, ani adu a'i Polo piko ngú nakpokpo 'ngú ne ani.

<sup>27</sup> Pita kalanga bhisi-e, Polosiusi Fesitusi akolo ngámá bhú da ngámá Felikisi. Engú bini, ngámá Felikisi a'o ká Polo bhú tikpu, anga ani adu amene me omaYuda u ni ndjindji.

## 25

*Polo ayo me 'ngbé ngámá Kaisala kodho 'ngú gba ni-e ngae*

<sup>1</sup> Li ngámá Fesitusi akolo lie bhú ndu doto ango-o, pita 'kpí bata-a, ani ayie bhú gudhu na Sedjale, ani atsia anu bhú gudhu na Yelusalema. <sup>2</sup> Ongbengbe odimandò, di ne ongámási gba omaYuda-a, ago kala ani. U atsia ato siti 'ngú ne 'li Polo pi ani. U akikiliki liò pi ani me, <sup>3</sup> ani ziba pi o me o nu ne Polo bhú gudhu na Yelusalema. U adje liò me, li o kolo li kpadji-e, o de bhelò ani. <sup>4</sup> Engú bini, ngámá Fesitusi agie pi uo me: «Bili na tikpu gba Polo-o, a ko Sedjale. La-a, ngama makpe-e, ma adji bhadi oo mbia inde.» <sup>5</sup> Ani atsia apa matá me: «A ayo me ongbengbe okpála gba yi-e nu bhú dabili bini ne ma. I du me kpála bhomu-o nde amene siti 'ngú-o, u de kpokpo oo ko.»

<sup>6</sup> Ngámá Fesitusi amene agba uo ekpí nayie bhú madjina masikpe de nakolo bhú ndjikpa. Pipita-a, ani atsia agie lie bhú gudhu na Sedjale. Li ekpí aseke

lie, ani atsia anu li bili nakodho 'ngú-o. Abhomu-o, ani atsia aha líli me u go ne Polo. <sup>7</sup> Li Polo ago lie, omaYuda inde ayie bhú gudhu na Yelusalema-a, asa liò dengo ani. Abhomu-o, u aholo apa osisiti 'ngú na ngbengbengbe li ani bhelé bhelé. La-a, u du ambila nakpokpo ta ongu ango-o de, anga a adu eu. <sup>8</sup> Abhomu-o, Polo atsia aholo nakpokpo 'ngú gba e me: «Ma mene siti 'ngú bini de. Ma gumu líli gba omaYuda-a de. Ma siti 'ngbé 'ti Ebhe gba omaYuda-a de. Ma mene la di siti 'ngú li 'ngbé ngámá Kaisala de.» <sup>9</sup> Ngámá Fesitusi adu amene me omaYuda u ni ndjindji. Kaka-a, ani atsia ayi Polo me: «Mo kanda nanu bhú gudhu na Yelusalema, ngabula me u kodho 'ngú gba mu-o kala ma oo?»

<sup>10</sup> Engú bini, Polo agie me: «Ma alu e bhú ndende gba 'ngbé ngámá Kaisala-o. A ayo me u kodho 'ngú gba ma-a bha si. Ma mene siti 'ngú li omaYuda belegu de bini. Ngamu makpe-e, mo ombila 'ngú tété ndjindji. <sup>11</sup> I du me ma nde atu 'ngú, i du di me ma nde amene siti 'ngú inde ayo me u bhelò ma ka e-e, ma yala nakpi de. Engú bini, i du la me, kukulu 'ngú nde bhú ká ongu inde u ngapa e li ma ade-e, kpála bini ti da natse 'kpa li ma pi uo de. Ma ayo me 'ngbé ngámá Kaisala kodho bha 'ngú gba ma-a ngae.» <sup>12</sup> Abhomu-o, pita li ngámá Fesitusi agama 'ngú ne obhelesi okpála gba e lie, ani atsia apa me: «Mo oyo lie me 'ngbé ngámá Kaisala kodho bha 'ngú gba mu-o ngae, mo onú agba ani.»

*Polo akpokpo 'ngú gba e kala 'ngbé ngámá Agilipa*

<sup>13</sup> Pita mbo oekpí, 'ngbé ngámá Agilipa ne ndai e na eelò Belenise, akolo bhú gudhu na Sedjale. U anu natsia ngámá Fesitusi. <sup>14</sup> U asi oo mbo ekpí bhelé. Abhomu-o, ngámá Fesitusi atsia akpokpo 'ngú gba Polo pi 'ngbé ngámá Agilipa me: «Kpála bini bhú tikpu si, ngámá Felikisi a'o nani ka ani ngae. <sup>15</sup> Ma anu nako lie bhú gudhu na Yelusalema-a, ongbengbe odimandò gba Ebhe di ne obhelesi okpála gba omaYuda-a, ato siti 'ngú ne 'li ani

muma. U atsia apa muma me, ma 'o 'ngú pí aní. <sup>16</sup> Ma agie pí uo me: <Agba ya okpála na Loma-a, kala me u 'o 'ngú pí kpála-a, ayo me u dúlú ngaiza kala ongámási ne okpála inde agbe aní kala uo-o bhú dabili bini. Aní kpokpo 'ngú gba e ngú nagbegbe lie bhú 'ngú ango-o ko.>

<sup>17</sup> Ya atsia ago si ne uo bhú dabili bini. Ma djeke de, li ekpí aseke lie, ma aha líli me u go ne kpála ango-o kala ma li bíli nakodho 'ngú-o. <sup>18</sup> Okpála inde ato siti 'ngú li aní pí ongámási-e ago. Engú bini, ma u siti 'ngú inde u asungula aní pí ongámási ngú e maka bhende ma adu abhundja e de. <sup>19</sup> La-a, u adu amene kpekebhe pindji 'ngú na Ebhe gba o di ne pindji 'ngú gba kpála bini inde 'li e me Yesu. Padhá de, anga kpála ango-o akpi, engú bini, Polo la ngapa me aní uu.

<sup>20</sup> Muma-a, ma mbila 'ngú ma akódho e li ngua 'ngú bhomu-o de. Kaka-a, ma ayi Polo atigala aní ziba nanu bhú gudhu na Yelusalema, amba u kodho 'ngú gba aní-e oo. <sup>21</sup> Engú bini, Polo ayo me 'ngbé ngámá na gudhu na Loma kodho bha engú gba ní-e ngae. Abhomu-o, ma atsia aha líli me u lila aní bhú tikpu akolo li 'kpí ma atíma aní lie pí 'ngbé ngámá Kaisala ko.» <sup>22</sup> 'Ngbé ngámá Agilipa atsia apa pí ngámá Fesitisi me: «Ngama di-e, ma akunda nga di me ma dje kpála ango-o.» Ngámá Fesitisi atsia agie pí aní me: «Mo odjé aní mambi.»

<sup>23</sup> Abhomu-o, li ekpí aseke lie, 'ngbé ngámá Agilipa ne Belenise ago bhú asasaua ne bhiti okpála. U alí bhú 'tí nakodho 'ngú bhú dabili bini ne ongámási gba osudha di ne ongbengbe okpála na gudhu-o. Ngámá Fesitisi atsia aha líli me u go ne Polo. <sup>24</sup> Pipita-a, ngámá Fesitisi atsia apa me: «'Ngbé ngámá Agilipa di ne ndu yi okpála hana inde bhú dabili bini ne ya si-e, yi tsia nga kpála inde. Ndu omaYuda hana ago akpokpo 'ngú gba aní-e muma. U abhaka ma bhú gudhu na Yelusalema, u atsia ago belegu ei ne nasusula me: <A ayo me u bhelo aní!>

<sup>25</sup> Muma-a, ma u siti 'ngú inde ayo me u bhelo aní ka e de. La-a, aní ayo lie me 'ngbé ngámá na Loma kodho bha 'ngú gba ní-e ngae, ma atsia aziba me ma tima aní pí aní. <sup>26</sup> Ma mbila engú inde ma tí da naye e pí 'ngbé ngámá lí engú gba aní-e de. Kaka-a, ma agbe aní kala yí, la ndju makpe kala mu, 'ngbé ngámá Agilipa. Yí aní, amba ma sia engú inde ma ayé e ko. <sup>27</sup> Padhá de, anga a ko muma engú na ngingi me, ma tima kpála na tikpu pí 'ngbé ngámá Kaisala me, ma nde suno ta 'ngú inde u aholo aní ngú e pí aní de ko.»

## 26

### *Polo akpokpo 'ngú gba e kala 'ngbé ngámá Agilipa*

<sup>1</sup> 'Ngbé ngámá Agilipa atsia apa pí Polo me: «Mu tí da nakpokpo 'ngú gba mu-o.» Abhomu-o, Polo a'e 'kpa e, aní atsia akpokpo 'ngú gba e me: <sup>2</sup> «'Ngbé ngámá Agilipa, naki-e, ma ne djali naali ngubula nakpokpo 'ngú gba ma kala mu lí ndu 'ngú hana inde lí omaYuda apa e lí ma ko. <sup>3</sup> Padhá de, anga mu mbila dasundu di ne kpekebhe gba omaYuda hana. Kaka-a, ma ayo ka mu me, dje nga mbo ma ne 'ndjá bua.

<sup>4</sup> Ndu omaYuda hana mbila mukobho gba ma-a ndjindji nayie lí nedhinga ma adu lie makombi-o. U mbila maka ma adu akobho lie bhú ká okpála na doto gba ma di ne bhú gudhu na Yelusalema ndjindji. <sup>5</sup> U ambila nani ma didili. U tí da napapa ngao, i du me u nde akunda-o. Ma du nani ne suka omuFalisai inde adu alila líli nadhogø Ebhe gba ní-e ndjindji-o. <sup>6</sup> La mbia inde-e, u agbe ma lí bíli nakodho 'ngú-o anga ma ne 'to ma 'to engú inde lí Ebhe apa nani kalanu me ní améne e pí onguo ogbi ní-o. <sup>7</sup> Okpála na piga ndjikpa ne ká bhisi gba ní-e, nga'o 'to o me engú ango-o améne lie mamene. Ka 'ngú ango-o, u ngamene kulu kpekpeke pí Ebhe, sukpe ne ngbikpi. 'Ngbé ngámá Agilipa, ngama di-e, ma bhadi ngabhuka moko. Kaka-a, omaYuda atsia ato siti 'ngú ne 'lí ma pí ongámási. <sup>8</sup> Ka ní ngayi omaYuda, yí tí da nabhuka lie de me, Ebhe azúku okpála inde amu-o mazuku-o?

<sup>9</sup> Ngama makpe, ma adu abhundja nani me, ma mene ne kpéke me okpála abhúka Yesu, kpála na kuti Nadjaleta de. <sup>10</sup> A ko engú inde ma amene di-e bhú gudhu na Yelusalema ko. Ongbengbe odimandé aha kpadji muma ngao. Ma amba omabhuka bhelé bhú tikpu. U adu akodho 'ngú gba uo lie me u bhili uo, ma atsia adu aziziba. <sup>11</sup> Ma adu apu piko bhú oti nadjé líli gba Moidje-o. Ma adu amene uo sisiti ngubula me u sobho Yesu. Bhú nabi 'gú gba ma-a, ma adu belegu nakpata uo bhú ogudhu gba ogandji okpála .»

*Polo akpokpo maka ani adji bua e lie-o*

<sup>12</sup> Kaka-a, ekpí bini ma adu anu bhú gudhu na Damasi. Ongbengbe odimandé aha angu muma, u atsia atima ma oo. <sup>13</sup> Li kpadji-e, bhú nedhinga na tulukpe-e, 'ngbé ngámá Agilipa, ma au zi 'kpí ayie abhúlá. Zi 'kpí ango-o adu kpekpeke naali ane zi ela mane. Zi 'kpí ango-o aholo aziga ma ngbalina bhú dabili bini ne okpála inde ya adu ne o ko. <sup>14</sup> Ndu ya hana, ya atuko kuto má dhululu! Abhomu-o, ma atsia adje eli bini apa muma bhú eli gba omaYuda me: «Saulo, Saulo, mu ngato mbolo li ma ka ni? Mu ngaha likabhu pi mu makpe maka enu inde atu lie li ndula gba mulila gba e-o.» <sup>15</sup> Ma atsia ayi me: «A ko mu da, Ngámá?» Abhomu-o, Ngámá atsia agie muma me: «Ngama-a, ma ne Yesu inde mu ngato mbolo lie ko.

<sup>16</sup> Engú bini, yie bhúlá, amba mu lu malu. Padhá de, anga ma akoto li mu ngubula me mu kolo kpála na kulu gba ma-o. Mo okpókpo pi okpála me mo ou ma naki. Mo okpókpo di matá pi okpála ndu 'ngú hana inde ma asúno e pi mu sidi ko. <sup>17</sup> Ma alila mu ka omaYuda di ne ogandji okpála inde ma atima mu agba o-o. <sup>18</sup> Mo obhúlu djila uo, u zé bhú biti, u tsia lí li zi 'kpí. U dú matá sa líli gba Satana de. Engú bini, u adjí ibili lío pi Ebhe. I du me u nde abhuka ma-a, u tsia sía nambu li siti 'ngú gba o-o. U tsia dú la di bhú dabili bini ne okpála na bububu gba Ebhe-o.»

*Polo akpokpo 'ngú pindji engú inde ani amene e-o*

<sup>19</sup> «Kaka-a, 'ngbé ngámá Agilipa, nayie li nedhinga bhomu-o, ma yala titima na engú ma au e inde ayie ka Ebhe-e de. <sup>20</sup> Engú bini, ma akpokpo ngaiza pi okpála na gudhu na Damasi, ne okpála na gudhu na Yelusalema, ne okpála na ndu doto na Yudaya libhomu, la di ne pi ndu okpála hana na gandjigandji. Ma akpokpo pi uo me: «Yi dji bua yi, amba yi gie liyi li pápá gba Ebhe.» La matá di me: «Yi mene bádha kulu inde asúno me yi adji bua yi kakulu.» <sup>21</sup> Ka 'ngú ango-o, omaYuda aholo ma bhú 'ngbé 'ti Ebhe gba omaYuda, u di me bhelo ma. <sup>22</sup> Engú bini, Ebhe alila ma nakolo pi naki. Padhá de, anga ma ngakpokpo engú gba Yesu-o pi ndu okpála hana, pi ongisi di ne pi obhelesi okpála. Ma pa 'ngú koko de, bha bini bhende li opolofeta di ne Moidje apa nani e me akólo makolo-o. <sup>23</sup> U apa nani me Masiya azú likabhu, ani tsia dú kpála na bini inde azúku bhú ká okpála inde amu-o. Ani akpókpo pi ndu okpála na piga gba ní-e hana di ne pi ogandji okpála ngali na zi 'kpí na mukobho.»

*Eli gba Polo ale nagbele bua 'ngbé ngámá Agilipa*

<sup>24</sup> Li nedhinga li Polo adu akpokpo 'ngú gba e lie, ngámá Fesitisi atsia asula me: «Polo, mu ne bhulu pele! Balua mo omene e naali-e ato bhú djila mu pele!» <sup>25</sup> Abhomu-o, Polo atsia agie pi ani me: «Ngámá Fesitisi, ma ne bhulu pele ade. Engú inde ma ngapa e, a ko 'ngú na kakulu di na imbilangu.» <sup>26</sup> 'Ngbé ngámá Agilipa mbila ndu 'ngú bhomu-o hana ndjindji. Kaka-a, ma ngakpokpokpo pi ani ne tsulu ade. Ma aziba me ani mbu li susuka bini de. Padhá de, anga ndu 'ngú bhomu-o hana mene lie bhú pepe de. <sup>27</sup> 'Ngbé ngámá Agilipa, mo obhuka engú inde li opolofeta apa e uu? Ma ambila me mo obhuka!»

<sup>28</sup> Abhomu-o, 'ngbé ngámá Agilipa ayi Polo me: «Mo obhundja naamu me ni ti da nadjí ma makilisito bhú nedhinga bedi mo-o?» <sup>29</sup> Polo atsia agie me: «Belegu

i da ngubula nedhinga bedi, belegu i da di ngubula nedhinga bhelé-e, ma ngayo Ebhe bha ngubula mu kpi mu kpi ade. Engú bini, ma ngayo Ebhe ngubula ndu yi okpála hana inde ngadje ma li 'kpí na naki. Ma ngayo Ebhe ngú yi me, yi kolo di maka ma nde lie, naneke bha bini ogbindjili inde bhú 'kpa ma inde.»

<sup>30</sup> Abhomu-o, 'ngbé ngámá Agilipa, ne ngámá Fesitisi, ne Belenise di ne ndu okpála hana inde adu bhú dabili bini ne uo-o, ayie bhúlá. <sup>31</sup> U agbe lio ne li ngongo, u atsia akpokpo sunda o me: «Kpála inde-e mene siti 'ngú bini de inde ayo me, u to ani bhú tikpu di me u bhøle ani ka e-o.» <sup>32</sup> 'Ngbé ngámá Agilipa apa pi ngámá Fesitisi me: «Í dú me kpála inde-e yó nako de me 'ngbé ngámá Kaisala kodho bha 'ngú gba ni-e ngae de-e, mu de agbe ani bhú tikpu agbe .»

## 27

### *U atima Polo bhú gudhu na Loma*

<sup>1</sup> Li u apa lie me ya nu bhú doto na Itali bhú 'ngbé zabu-o, u atsia aha Polo di ne okpála koko na tikpu-o pi ngámá bini gba osudha. A adu 'li ani me Djuliusi. Ani adu ngámá pí 'ndji libi osudha inde u adu a'i o me «Osudha gba 'ngbé ngámá Kaisala-o .» <sup>2</sup> Ya aha 'ngbé zabu na gudhu na Adalamite. 'Ngbé zabu ango-o adu anu li pápá li obili li ozabu alulu lie bhú ndu doto na Adjia-o. Abhomu-o, ya atsia agbida. Kpála bini na gudhu na Tesalonike, bhú ndu doto na Makedonia, anu bhú dabili bini ne ya. A adu 'li ani me Alisitaluka.

<sup>3</sup> Li ekpí aseke lie, ya akolo bhú gudhu na Sidona. Djuliusi adu ne bádha bua li pápá gba Polo. Abhomu-o, ani atsia aha kpadji pi Polo me ani nu agba obi e, amba u teteke ani ne oehe inde ani nde ne gumu e-o. <sup>4</sup> Ya yie lie oo, ya apu lingo kpemø na Sipele, anga anvi adu akunda nagie ya ne sidi. <sup>5</sup> Ya agulu 'ngbé 'ngu inde lingo ndu doto na Silisia di ne Pamifilia ko. Abhomu-o, ya atsia akolo bhú gudhu na Mila bhú ndu doto na Lisia. <sup>6</sup> Oo, ngámá gba osudha-a abhaka 'ngbé zabu bini na

gudhu na Alekidjandili me a nde adji bhú doto na Itali, ani atsia abu ya bhúbhú.

<sup>7</sup> 'Ngbé zabu-o adu adhuku bhubhuku naali. Kaka-a, ya amene 'kpí bhelé, ya atsia adje likabhu naali ngubula nakolo lingo gudhu na Sinide. La ya ale lie nanu li pápá bhomu-o pima ka anvi-e, ya atsia apu lingo doto na Salamone inde ali ne abhú 'ngu bhú kpemø na Kelete ne asage-o. <sup>8</sup> Ya adhuku má tili tili lingo kpemø-o, ya atsia akolo li bili inde u a'i e me «Babadha ngo 'gø», masikpe de gudhu na Ladje.

<sup>9</sup> Abhomu-o, da nadhuku bhú 'ngbé zabu-o atsia akolo sisiti, masikpe de namu ka okpála. Padhá de, anga nedhinga na anokomia natse 'zu na epe na odukpabini-e adu me a nde ane. Kaka-a, Polo atsia apa pi uo me: <sup>10</sup> «Ondaise ma, ma ngau me enú inde-e adú sisiti. 'Ngbé zabu ne oehe inde bhúbhú-o asíti masiti, abana nganí makpe-e, ní akólo masikpe de namu.»

<sup>11</sup> Engú bini, ngámá gba osudha adu aziba naae naali mabhundja gba kpála inde adu adjele 'ngbé zabu-o, di ne bhe gba bhulu 'ngbé zabu-o. Ani tsia ziba bhe gba Polo-o de. <sup>12</sup> Matá di-e, kuti ango-o ti ne nabhue bhúbhú bhú nedhinga na zini de. Abhomu-o, masikpe de ndu okpála hana inde adu bhú 'ngbé zabu-o atsia apa me o yie oo mayie. U adu akunda di me, i da me o nde ne ngasa-a, o de kolo bhú gudhu na Fenikisi. A ko suka gudhu na ngo 'ngu na kpemø na Kelete. A ngatsia 'kpí ne li pápá na sunda yoyoko ne akati, di ne sunda abebe ne akati. U adu akunda me o kolo oo ngubula me nedhinga na zini-e kodho 'kpí me o nde oo ko.

### *Anvi na kpekpeke ape pí 'ngu*

<sup>13</sup> Abhomu-o, anvi na bhubhuku aholo nape nayie ne li pápá na yoyoko. U atsia aziba me mabhundja gba o-o akódho 'kpí ndjindji. U agbe kalase inde u agbite e li 'kpí ngú nalu ka 'ngbé zabu-o bhú 'ngu, u atsia aholo akpangba ngo kpemø na Kelete. <sup>14</sup> Kolo pita nedhinga bedi-e, anvi na kpekpeke inde u a'i e me «Elakele», ayie bhú kpemø, atsia aholo nape. <sup>15</sup> Anvi



ango-o aholo atumba 'ngbé zabu-o. Da napa me 'ngbé zabu-o lu kakala-a adu kpekpeke. Abhomu-o, ya atsia a'o me 'ngbé zabu-o nu ibili bha ne ya li pápá inde li anvi adu atumba ya lie ko.

<sup>16</sup> Ya akolo lingo mboye kpemø u a'i e me Kauda inde alila mbo ya bedi ka anvi-o. Abhomu-o, ya atsia amene ne kpéke ngú nagbili mboye kókó-o ne bhúlá. <sup>17</sup> U aha, u ato bhú 'ngbé zabu-o. Pipita-a, u agbigbite ngo 'ngbé zabu-o hana ne ekpú ngú nalilila. U adu la lie ne tsulu me 'ngbé zabu anú atu lie li sike, i tsia bála o lingo doto na Libi de-e, u a'e bongo inde pí 'ngbu 'ngbé zabu-o, u atsia a'o me anvi du ibili adyudyo o ngae. <sup>18</sup> Li ekpí aseke lie, anvi adu bha adyiki 'ngbé zabu-o ne ya kpekpeke. Kaka-a, u atsia aholo apandja oehe inde adu bhúbhú-o, ababala bhú 'ngu. <sup>19</sup> Bhú 'kpí na bata-a, okpála na kulu ngao makpe-e, u abha oehe inde nadjele 'ngbé zabu-o, u atsia abala bhú 'ngu. <sup>20</sup> Sunda 'kpí bhelé, ya u ela de. Ya u di okupala de. Anvi adu bha nape kpekpeke. Ya du matá ne 'to ya de me ya akóbho makobho-o de.

<sup>21</sup> Okpála inde adu bhú 'ngbé zabu-o zu 'he de ngubula 'kpí bhelé. Abhomu-o, Polo ayie bhúlá, aní alu bhú ká uo. Aní atsia apa me: «Ondaise ma, i dú nako me yi djé ma uu me ní ayie bhú kpemø na Kelete de-e, ní de sia ngua likabhu inde-e de. Oehe-e de siti la di-i de. <sup>22</sup> La mbia inde-e, yi sia kpéke bua. Padhá de, anga suka yi bini kpí-i de, engú bini, asíti bha bini ne 'ngbé zabu-o. <sup>23</sup> Sukpe na naki-e, Ebhe inde ma nde ne bali gba e-e, ma nde la di ngamene kulu pí e-e, atima andjelu gba e muma. <sup>24</sup> Aní atsia apa muma me: <Polo, mo odjé tsulu de. A ayo me mu kpokpo 'ngú gba mu-o kala 'ngbé ngámá Kaisala. Kaka-a, Ebhe bhú bádha bhú 'bu gba e akóbho mu di ne okpála inde yi nde ngadholo bhú dabili bini ne o bhú 'ngbé zabu-o.> <sup>25</sup> Ka 'ngú ango-o, ondaise ma, atou! Padhá de, anga ma ngabhuka me,

Ebhe améne maka aní apa lie muma ko. <sup>26</sup> Engú bini, 'ngbé zabu anú atu lie ne ní lingo kpemø bini.»

<sup>27</sup> Sukpe na ekpí na ndjikpa ne ká badha, anvi adu adyudyo 'ngbé zabu-o ne ya pí 'ngbé 'ngu inde 'li e me Adiliatike.\* Abhomu-o, tutu sukpe-e, okpála nadjele 'ngbé zabu-o abhundja naao me ya akolo dengo 'gø. <sup>28</sup> U aha ekpú inde u agbite tili 'he li 'ndji e, u abhike bhú 'ngu. U atsia au me engu-o tsutsu metele ndjikpa bata ne ká mananika. U adyudyo mbo lio ne kalanu masudha, u atsia abhike matá bhú 'ngu. U au me engu-o tsutsu metele ndjikpa bhisi ne ká madjina.

<sup>29</sup> U adu adje tsulu me 'ngbé zabu-o atú lie li oteme de. Kaka-a, u atsia abala okalase badha inde u agbigbite e li okpu-o bhú 'ngu ne akele 'ngbé zabu-o, ngubula me alu bhú da e bini. U atsia adu ne gumu me ekpí seke bhado má gala! <sup>30</sup> Okpála nadjele 'ngbé zabu-o adu agili kpadji ngú nakpe. Abhomu-o, u agbe mboye kókó-o, u abhike pí 'ngu. U amene mugito me u adji abala okalase inde u agbigbite e li 'kpu-o, ngú nalu ka 'ngbé zabu-o ne akalá zabu-o. <sup>31</sup> Polo atsia apa pí ngámá gba osudha di ne pí osudha-a me: «Li okpála inde-e du bhú 'ngbé zabu-o de-e, yi ti da nakobho de.» <sup>32</sup> Abhomu-o, osudha-a atsia atsotsolo okpu na mboye kókó-o, atsia atapa.

<sup>33</sup> Kala me ekpí seke-e, Polo ayo ka ndu okpála hana me u zu 'he. Aní atsia apa pí uo me: «A ko naki ekpí ndjikpa ne ká badha, yi ngadjeke. Yi ngasi gumu. Yi le ku 'he belegu de bini. <sup>34</sup> Kaka-a, ma ayo ka yi me yi zu 'he. Padhá de, anga yi ne gugumu ngubula me yi kobho. Kpála bini bhú ká yi kpí-i de.» <sup>35</sup> Pita aní apa lie mo-o, aní aha mapa, aní agie heni pí Ebhe bhú ká djila ndu okpála hana. Pipita-a, aní agumu mapa-o, aní atsia aholo nazuzu. <sup>36</sup> Abhomu-o, ndu uo hana asia kpéke bua, u atsia aholo di nazu 'he. <sup>37</sup> Bhú 'ngbé zabu-o, ya adu hana okpála kámá bhisi

\* **27:27** 27:27 Adiliatike: 'Ngbé 'ngu ango-o sunda doto na Itali ne bhende gba oGiliki. U aye bhú obhuku koko me «'ngbé 'ngu na Meditelani». † **27:37** 27:37 Kámá bhisi ne ndjikpa mananika ne ká madhia: U aye bhú obhuku koko me «kámá bhisi ne ndjikpa mananika ne ká bhuluvue.»

ndjikpa mananika ne ká madhia.† 38 U a'u'u lie, u atsia abala ngano bhú 'ngu ngubula me 'ngbé zabu-o kolo yayaka.

### 'Ngbé zabu-o alinda bhú 'ngu

39 Li ekpí aseke lie, okpála nadjele 'ngbé zabu-o mbila de me o bhú mangua doto dho-ie de. Engú bini, u au ngo 'gø di ne sike. U atsia abhundja me o ti da nadyudyo 'ngbé zabu-o li bili angoo. 40 U abhubhulu okalase-o, u atse 'kpa tété bhú 'ngu. U abhubhulu di ekpú na oehe inde adu amene me 'ngbé zabu-o dhuku-o. Pipita-a, u abhulu bongo inde li bhúla 'ngbé zabu-o ngubula me anvi holo nadyudyudyo. Abhomu-o, u atsia aholo nanu ne li pápá na ngo 'gø. 41 Engú bini, 'ngbé zabu-o anu atu lie li 'ta sike, li bili inde li engu ngago lie ne ndu pasu bhisi hana-o. Bhúla 'ngbé zabu-o adha bhú 'ta sike-o, a ale adula lie pima. Tabhu tabhu-o atsia agumu. Padhá de, anga engu-o atu lie tété kpekpeke.

42 Osudha adu akunda nabhili okpála na tikpu-o, amba suka uo bini akpé ne akango de. 43 Engú bini, ngámá gba osudha-a adu akunda nakobho Polo. Abhomu-o, ani ayoko uo me u améne mo-o de. Ani atsia aha líli pi okpála bhende ambila nati akango me u bala bhú 'ngu kalanu, amba u ze apí 'gø. 44 Okpála koko akpáta uo sidi me u nde ahoholo lio li opalangí di ne opapala 'he na 'ngbé zabu-o. Abhomu-o, ndu uo hana atsia akolo apí 'gø ndjindji.

## 28

### Polo bhú kpemø na Maletè

1 Pita ya akobho lie, ya atsia adje me a 'li kpemø angoo me Maletè. 2 Okpála na kpemø angoo asia ya ndjindji. Li ebha aholo adhi lie, zini aholo amene ya. Abhomu-o, u akpo djua má tu tu tu! Ya atsia ago adulu ndu ya hana dede. 3 Polo akuo 'i 'wa, ani abu bhú djua. Engú la bini, mbuma akoto bhúbhú ka wowo djua, ani atsia adhedhe li 'kpa ani. 4 Li okpála na kpemø angoo au lie me kpulu

adhedhe li 'kpa ani mo-o, u atsia apa sunda o me: «Kpála inde-e bha ndju ne bhulu nabhelo kpála kukulu. Padhá de, anga belegu ani akobho lie bhú 'ngu-o, Ebhe inde 'li e me ngbili 'ngú ziba de me ani du bhú mukobho-o de.»

5 Engú bini, Polo adyiki 'kpa e, kpulu-o atsia ati bhú djua, ehe bini mene ani de. 6 La-a, u adu adjeke me 'kpa ani adji asika di ne me ani atí kuto ne nakpi ka e bini. U adjeke ngengele, u au la lie me ehe bini mene ani de-e, u adji mabhundja gba oo. U atsia apa me: «A ko ebhe!» 7 Ngámá na kpemø inde adu 'li e me Pubiliusi adu ne kuti gba e na ngbéngbé de bili angoo. Ani asia ya ndjindji, ya atsia asi agba ani ekpí bata. 8 Bhú nedhinga bhomu-o, 'dyi Pubiliusi adu ne kuo pí mako. Ani adu ne bandji, ani atsia adu di agie ngute. Abhomu-o, Polo anu natsia ani. Ani ayo Ebhe pi ani. Ani a'o 'kpa e pí 'ndji ani. Ani atsia akobho ani. 9 Pipita-a, okpála koko inde adu ne kuo bhú kpemø bhomu-o, ago di nabhaka ani, ani atsia akobho uo. 10 U adhege ya naali. Nedhinga nayie ka ya oo, u aha ndu 'he hana inde a ti ne ya ngubula kpadji-e pi ya.

### Polo akolo bhú gudhu na Loma

11 Pita epe bata-a, ya a'u bhú 'ngbé zabu na Alekidjandili. A adu 'li 'li me «Diosikulese.\*» Nedhinga na zini ane nani 'ngbé zabu angoo bhú kpemø oo. 12 Ya akolo lie bhú gudhu na Silakusi, ya asi oo ekpí bata. 13 Ya ayie oo, ya aholo nakpangba ngo 'ngu, ya atsia akolo bhú gudhu na Ledjio. Li ekpí aseke lie, anvi ayie ne li pápá na yoyoko, aholo nape. Abhomu-o, pita 'kpí bhisi-e, ya atsia akolo bhú gudhu na Pudjole. 14 Bhú gudhu angoo, ya abhaka ondaise ya omabhuka oo. U atsia ayo ka ya me ya du mbo ne o ngubula poso bini. Abhomu-o, ya atsia anu bhú gudhu na Loma. 15 Ondaise ya na gudhu na Loma adje me ya akolo. Kaka-a, u ago akolo bhú gudhu inde 'li e me Daposo na Apiusi, di ne bhende 'li e me Oeti Bata, ngú nake lio ne ya. Li

\* 28:11 28:11 Diosikulese: A ko nani oebhe obhukosi inde li oGiliki adu aha o maka oebhe gba o. Okpála nadhuku bhú 'ngu aha nani uo maka oebhe inde adu alila o ko.

Polo au uo lie, ani agie heni pi Ebhe, ani atsia asia kpéke bua. <sup>16</sup> Abhomu-o, ya akolo bhú gudhu na Loma. U aha dabili pi Polo kpi bhú dabili bini ne sudha inde adu atsia 'kpí li ani-o.

*Polo akpokpo 'ngú gba e bhú gudhu na Loma*

<sup>17</sup> Abhomu-o, pita ekpí bata-a, Polo a'i ongámási gba omaYuda inde ngadulu bhú gudhu na Loma-a agba e. U apo bhúla o lie, ani atsia apa pi uo me: «Ondaise ma, ma mene okpála na kuti gba ní-e sisiti de. Ma siti la di dasundu gba onguo ogbi ní-e de. Abana mo-o, u aholo ma bhú gudhu na Yelusalema, u atsia apu ma pi okpála na gudhu na Loma. <sup>18</sup> U ayiyi ma li ongu. Engú bini, u u ma ne engú bini inde u ti da nabhele ma ka e de. Kaka-a, u adu akunda me o tse 'kpa li ma. <sup>19</sup> La li omaYuda ayala lie, ma atsia au ndjindji me 'ngbé ngámá Kaisala kodho 'ngú gba ma-a ngae. Engú la bini, ma du akunda na'o 'ngú pí okpála na kuti gba ma-a de. <sup>20</sup> Kaka-a, ma akunda nako me ma u yi, amba ní gama la di 'ngú ne yi. Padhá de, anga u agbite ma ne gbindjili inde-e kabula kpála inde li omafsalaele nde ne 'to o me Ebhe atíma e-o.»

<sup>21</sup> U agie pi ani me: «Ya sia balua bini nayie bhú ndu doto na Yudaya inde akpokpo 'ngú pindji 'ngú gba mu-o de. Suka ondaise ya bini yie oo go ei de ne engú gba mu, di go kpokpo 'ngú na sisiti li kute mu de. <sup>22</sup> Engú bini, ya akunda me kpokpo nga bha ngamu makpe, engú inde mu ngabhundja e ko. Padhá de, anga ya ambila me ne ndu bili hana, okpála ngapa 'ngú sisiti li libi okpála gba mu-o.»

*Polo akpokpo Bádha Ngali pi omaYuda na gudhu na Loma*

<sup>23</sup> Abhomu-o, omaYuda a'o matá ekpí bini ngú nake lio ne Polo. Li 'kpí ango-o, u ago bhelé naali li bili inde ani adu asi lie ko. Nayie kekpi nakolo tagolo-o, Polo adu akpokpo 'ngú pi uo pindji Nau gba Ebhe-o. Ani adu amene ne kpéke me u ziba Yesu. Bhú nakpokpo 'ngú ango-o, ani adu atanga pi uo líli gba Moidje di ne obhuku

gba opolofeta. <sup>24</sup> Okpála koko aziba engú inde ani akpokpo e-o. Engú bini, okoko tsia bhuka de. <sup>25</sup> Abhomu-o, u agbo bhusu o me u nde dje lio sunda o de. Polo atsia apa bha pi uo me: «Engú nani inde li Bu Bhobua apa e bhú 'li polofeta Isaya pi onguo ogbi yi-e, a ko kukulu 'ngú! <sup>26</sup> Ani apa nani me:

<Na pa pi okpála bhomu-o me:

Yi adjé 'kpí ndjindji, engú la bini, yi mbila tata-a de.

Yi atsia 'kpí ndjindji, engú la bini, yi ú 'kpí de.

<sup>27</sup> Padhá de, anga bua uo akolo maka teme.

U anini 'dje o, u agbagba djila o, ngabula me, djila o au 'kpí de,

'dje o adjé 'kpí de,

imbilangu gba o-o ambila tata-a de, u adjí bua o de,

amba ma akóbho uo de. Ebhe apa mo-o.†»

<sup>28</sup> Do Polo matá me: «Yi mbila me, Ebhe atima ngali na mukobho gba e pi ogandji okpála. Ngauo di-e, u adjé madje.» [

<sup>29</sup> Li u adje engú inde li Polo apa e lie, omaYuda atsambala me u nde ngamene kpekebhe sunda o kpekpeke.]

<sup>30</sup> Abhomu-o, Polo asi kalanga bhisi libhomu bhú eti inde ani adu nadu bhú e me ani nde ngaha pi bhuhulu-o falanga ko. Oo, ani atsia adu asia ndu okpála hana inde adu ago atsia ani-o. <sup>31</sup> Ani adu akpokpo ngali Nau gba Ebhe, di ne nasuno ne angu hana engú gba Ngámá Yesu Kilisito-o. Ehe bini ni kpadji pi ani de.

† 28:27 28:26-27 Tsia bhú Isa. 6:9-10.

## Balua gba Polo pi omabhuka na gũdhũ na Loma Eli na kalanũ

Balua inde li Polo aye nani e pi omabhuka na Loma-a , ani aye nani ngũ napa pi uo me ni ne gũmũ ngũ nanũ atsia Dadjua na gũdhũ na Loma. Gũmũ gba ani adũ me ni mene mbo kulu ne omabhuka inde oo, ngũbula nedhinga bedi amba u teteke di ni ngũbula nanũ abhũ Esipanye. Ani aye balua ango-o ngũ nakpokpo lele maka ani ambila lele nabhuka bhũ Yesu nde lie di ne ongũ inde li nabhuka ango-o ngamene e, ngũbula mukobho gba omakilisito. Engũ li Polo akpokpo e hana abhũ bhuku inde.

Pita li Polo ayi okpála na Dadjua na gũdhũ na Loma di ne ani ayo Ebhe pi uo lie-e, ani akpokpo engũ na ngbéngbé inde bhũ balua pi uo, engũ inde me: Bádha Ngali ngasuno maka li Ebhe ngamene lie me okpála kolo ngbingbili: a ko ka nabhuka, nayie li lilita akolo ali soso (1:17).

Pipita-a, Polo atsia abhulu 'ngũ ango-o. Ani apa me: i dũ omaYuda, i dũ die omupagano, a ayo me u kolo ngbingbili kala Ebhe. Padhá de, anga ndũ uo hana amene siti 'ngũ. Abhomũ-o, li soso, Polo aye ongũ pindji lele nadũ ka mukobho gba omakilisito, ane la mane li kpadji na mukunda bhũ nadũ nadje lio ne okpála koko. Ani atsia agama matá 'ngũ pindji ongũ maka kulu gba Ebhe, ne engũ inde a ayo me omakilisito mene e pi ongámási na doto, ne bhende gba okpála sũnda o. Ani abu ta balua gba e ne nakpokpo 'ngũ gba e makpe di ne oeli bhe nadhögø Ebhe. **Ongbengbe ongũ inde bhũ bhuku inde-e ngae inde:**

Eli na kalanũ ne engũ na ngbéngbé inde bhũ bhuku inde 1:1-17  
Gũmũ nasia mukobho 1:18 - 3:20  
Mabhundja gba Ebhe ngũbula mukobho 3:21 - 4:25  
Mukobho na mbia bhũ Kilisito 5:1 - 8:39

Isalaele bhũ mabhundja gba Ebhe 9:1 - 11:36  
Lele dasũndũ gba omakilisito 12:1 - 15:13  
Eli na soso ne nayi okpála 15:14 - 16:27

*Polo yi omabhuka na gũdhũ na Loma mayi*

<sup>1</sup> Ma aye balua inde-e ngama Polo. Ma ne bali gba Yesu Kilisito . Ebhe a'i ma me ma dũ ne bhũlũ titima gba ni, ani atsia a'o ma kpi pi e ngũ nanũ nakpokpo Bádha Ngali gba ni-e pi okpála.

<sup>2</sup> Ebhe apa nani bhũtode me ni atĩma Bádha Ngali bhomũ-o pi okpála li kpadji gba opolofeta gba ni-o. Ani apa nani engũ ango-o bhũ Bhuku gba e-o. <sup>3</sup> Bádha Ngali ango-o pindji ndili gba ani Yesu Kilisito inde Ngámá gba ni-o. U azu ani bhũ kũte bhũ piga gba 'ngbé ngámá Davidi. <sup>4</sup> Engũ bini, li kpadji gba Bu Bhobua-a , ani asuno lie maka Ndili gba Ebhe bhũ angu nedhinga ani azuku lie bhũ ká okpála inde amu-o. <sup>5</sup> Li kpadji gba ani-e, Ebhe asuno bádha bhũ 'bu mũma me ma kolo bhũlũ titima gba ani. Ma ne bhũlũ titima ngũbula me ma gbele ndũ okpála inde ne omaYuda ade-e hana me u bhuka Yesu Kilisito, u manga ani, amba u toko la di ani. <sup>6</sup> Ngayi okpála na Loma-a , yi di bhũ ká okpála bhomũ-o, ngayi okpála inde li Ebhe a'i o me yi kolo di okpála gba Yesu Kilisito-o.

<sup>7</sup> Ma aye balua inde-e pi ndũ yi hana, ngayi okpála inde li Ebhe nde ne mukunda pi o-o, ani atsia a'i o me yi dũ bhũ mukobho pi ni-o. A ayo me Ebhe 'Dyi ní, ne Ngámá gba ní Yesu Kilisito suno bádha bhũ 'bu gba o-o pi yi, amba u ha di guo 'ngũ pi yi.

*Polo apa me ni ne gũmũ nakpokpo Bádha Ngali gba Ebhe-e pi ndũ okpála hana*

<sup>8</sup> Kala ndũ 'ngũ hana-a, ma ngagie heni pi Ebhe gba ma li kpadji gba Yesu Kilisito. Ma ngagie heni pi ani li 'ngũ gba ndũ yi hana, anga okpála na pĩla doto libhomu ngakpokpo 'ngũ pindji nabhuka gba yi-o. <sup>9</sup> Ndũ nedhinga hana, ma dũ nayo Ebhe-e, ma ngayo ani ngũbula yi. Ebhe apá

li ma ngae me a ko kùkùlù 'ngú. Ma ngamene kulu lima pi Ebhe bhómù-o li kpadji nakpokpo Bádha Ngali inde atsia Ndili gba aní-o. <sup>10</sup> Ma ngayo Ebhe ndù 'kpí hana me aní kùnda-a, aní de bhulu kpadji mùmá me ma kolo li yi. <sup>11</sup> Padhá de, anga ma ne gùmù naali me ma u yi ngùbula me yi sia di bádha bhú 'bu inde ayie ka Bu Bhobua-a, amba yi sia angu li bua yi. <sup>12</sup> Ma akùnda mangbo napa me ma ne gùmù nakolo li yi ngùbula napa me ní to angu bhú ní sùnda ní ne yi. Ka nabhuka ní nde ne e bhú Kilisito-o, ma to angu bhú yi, amba yi to di angu bhú ma.

<sup>13</sup> Ondaise ma, yi mbila me bhùtsibhùtsi, ma adù ne mabhundja nanù agba yi, engú bini, ma sia nga kpadji de nato pi naki. Ma ne gùmù nago gba yi ngùbula me kulu gba ma-a zu di nguwa agba yi maka a azu di nguwa lie agba opiga koko inde ne omaYuda ade-o. <sup>14</sup> Kaka-a, a ayo me ma kpokpo Bádha Ngali pi ndù okpála hana, abana i dù pi oGiliki di ne pi okpála inde ne oGiliki ade-o. Ma akpókpo Bádha Ngali bhómù-o pi okpála inde amene balùá di ne obhende i mene balùá de. Ebhe aha bhobhómù-o mùmá ngae. <sup>15</sup> A bhómù-o ta 'ngú inde ma nde lie ne gùmù nago nakpokpo di Bádha Ngali pi yi, ngayi okpála inde ngadulù bhú gùdhù na Loma-o.

<sup>16</sup> Ma belegù ne nùmù ade ngú nakpokpo Bádha Ngali-o. Padhá de, anga a bhùbhù ne angu inde li Ebhe ngamene kulu ne e ngú nakobho ndù okpála hana inde ngabhuka-o. Ebhe ade kpadji ango-o ngú nakobho ngaiza omaYuda, pipita-a, okpála inde ne omaYuda ade ko. <sup>17</sup> Padhá de, anga Bádha Ngali ango-o ngasuno lele maka li Ebhe nga'o okpála lie ngbingbili bhú djila e-o. Kpadji ango-o ngakpo lita e bhú nabhuka, engú koko kekele ade. A maka li Bhuku gba Ebhe-e apa lie me: «Kpála inde abhuka Ebhe-e, Ebhe méne me aní kolo bhú djila ní ngbingbili, a ko kpála inde bhú kùkùlù mukobho.†»

*Bua Ebhe ngake ne osisiti 'ngú gba okpála make*

† 1:17 1:17 Tsia bhú Abk. 2:4.

<sup>18</sup> Li Ebhe nde lie abhúlá-a, aní ngasuno mbámbá me ní ngazi mbùtù li ndù osisiti 'ngú hana inde li okpála ngamene e li aní-o di ne bhe li okpála ngamene e sùnda o-o. Aní ngazi mbùtù anga ndù osisiti 'ngú li okpála ngamene e ngani kpadji me okpála koko ambíla kùkùlù 'ngú de. <sup>19</sup> La-a, engú inde ayo me okpála mbíla e li pápá gba Ebhe-e mbámbá pi ndù okpála hana. Ebhe ngae makpe apana pi uo mbámbá.

<sup>20</sup> Padhá de, anga nayie maka li Ebhe abho kokpí ne doto lie nakolo pi naki-e, ndù oehe inde aní abho e hana ngasuno aní mbámbá me aní maka da-ie. Oehe bhómù-o ngasuno me a bhú aní ne angu na dùdùma, oehe bhómù-o la bhadi ngasuno mbámbá me a ko Ebhe. Kaka-a, Ebhe ti da nambu li okpála inde aziba siti 'ngú-o de. <sup>21</sup> Padhá de, anga abana u ngambila lie hana me Ebhe ù-o, u dhөгө aní de, u gie la di heni pi aní de maka ayo lie me u mene pi aní-o. Engú bini, mabhundja gba uo-o ati ngingi, bua uo bhú biti, u mbila matá bádha 'ngú de. <sup>22</sup> U ngapa me a bhú 'ndji o ne imbilangu, engú bini, u akolo obhùlù pele. <sup>23</sup> Pi uo-o, ngú napa me u dhөгө sangu gba Ebhe inde bhú mukobho dùdùma ne dùdùma-a, u mene mo-o de. U mangbo ngadhөгө okulu 'he inde li okpála abho o maka o-o. La-a, kpála bhú mukobho dùdùma ne dùdùma ade. U di ngadhөгө okulu 'he inde li okpála abho o maka oedhu, maka onù di ne obhende ngagbeke lio ne 'bu o kuto.

<sup>24</sup> Kaka-a, Ebhe atse 'kpa li uo me u mene ongú na sisiti inde li bua uo ngakùnda me u mene e-o. U ngamene lie mo-o, u bhómù-o ngamene engú na nùmù lio sùnda o. <sup>25</sup> Ngauo-o, u a'o nabhuka kùkùlù 'ngú inde atsia Ebhe-e li ngongo, u atsia abhuka eu. U ngadhөгө oehe inde li Ebhe abho o, uo di ngamene kulu lio pi oehe ango-o, engú bini u dhөгө Ebhe inde abho ndù 'he hana ngae de. A ayo la me u de atoko mangbo aní dùdùma ne dùdùma. A adù moko!

<sup>26</sup> Kaka-a, Ebhe atse 'kpa li uo me u mene ongú na nùmù li gùmù e asi bhú uo

bedhe-o. Olisi gba uo-o nga'o ká obhosi, u ngadhuku ne obi o olisi mada obhosi. <sup>27</sup> A bhadi pi obhosi moko. U di nga'o ká nadhuku ne olisi, u abedhe mangbo ne gumu nadhuku ne obi o obhosi mada olisi. Obhosi ngamene engú na numu ne obi o obhosi koko. U ngagbele pí o makpe bhomu-o ke 'ngú gba Ebhe inde ati ne ngua siti 'ngú u amene e bhomu-o.

<sup>28</sup> Maka li okpála bhomu-o ayala lie nambila kukulu 'ngú inde atsia Ebhe-e, Ebhe atse 'kpa li uo me u abhúndja matá ndjindji de, di ne me u mene engú inde ayo de me u mene e mo-o de. <sup>29</sup> Sisiti 'ngú abedhe li bua uo bedhe, u abedhe ne gumu 'he gba okpála koko, a ko okpála na siti bua , u ngadje siti bua li obi o naali, u ngabhili obi o, a ko obhulu nagbe bhayiki, a ko obhulu kali, a ko obhulu napa eu ne 'li obi o. <sup>30</sup> U ngapa 'ngú lio sánda o sisiti, a ko obhulu yala gba Ebhe, u ngasobho obi o, u ngadje kute o, u ngapa 'li o, u ndu 'kpí hana bedhe 'ngú nabhundja siti 'ngú koko na mbia, u manga okpála azu o-o de.

<sup>31</sup> Bubua li uo ade, u ngapa 'ngú ne 'li o bhisi bhisi, u ne mukunda pi obi o ade, ndjinga bhú uo ade. <sup>32</sup> U mbila hana me 'li Ebhe apa me okpála inde ngadhuku li ngua kpadji bhomu-o ati ne nakpi. Abana u ambila lie mo-o hana-a, u bha bini nganu ne kalanu bhú namene ngua osisiti 'ngú bhomu-o. Bhe ane la matá mane-e, u ngakpi ndjili li okpála inde ngamene ngua osisiti 'ngú bhomu-o.

## 2

### *Ebhe ngakodho 'ngú gba okpála li lelele*

<sup>1</sup> Ngamu kpála bhende a'o lie bhú dá djudji ngú nakodho 'ngú gba okpála koko-o, abana mu du bha ne da-ie, Ebhe mbú li mu de. Padhá de, anga nedhinga mu ngakodho 'ngú gba okpála koko lie me mu nde bhadi ngamene 'ngú maka uo-o, mu ngato ngulu mu bhú 'kpú bhomu-o ngamu makpe. <sup>2</sup> Ní mbila hana me Ebhe ngakodho 'ngú gba okpála inde ngamene ngua sisiti 'ngú bhomu-o li

lelele. <sup>3</sup> Ngamu kpála inde ngakodho 'ngú gba okpála koko li ngua siti 'ngú inde ngamu makpe mu ngamene e-e, mo obhundja naamu me mo onéke mangimbo gba Ebhe-e maneke?

<sup>4</sup> Nedhinga koko-o, mu ngau Ebhe bhú djila mu padhá, anga ani babadha naali, ani di ne 'ndjá bua, ani di ngandjili má bulu li osisiti 'ngú mu ngamene e-o. Mu u de me ani ngamene mu ndjindji ngubula me mu dji bua mu-o di? <sup>5</sup> Ngamu-o, mu ne kpéke 'ndji, mu kunda nadi bua mu de. Kaka-a, mu bhomu-o ngagbele pí 'ndji mu mangimbo bhende ane la matá mane bhú ekpí inde li Ebhe asúno ke 'ngú gba e lie, ani tsia kódho di engú gba okpála hana ngbingbili-o. <sup>6</sup> Ekpí ang-o, ani ahá makalá pi kpála ne kpála li lele kulu gba e inde ani amene e-o.† <sup>7</sup> Ani ahá mukobho na duduma pi okpála bhende adhedhe li namene bádha 'ngú-o. Okpála ang-o ngagili sangu sakpa ani, u ngagili me ani pa 'ngú gba o-o ndjindji, di ne me o sia mukobho na duduma.

<sup>8</sup> Engú bini, ani asúno ke 'ngú gba e pi okpála bhende agbe kpéke 'ndji li ani-o, okpála inde ayala kukulu 'ngú inde di ngaziba namene siti 'ngú-o. Ani aké 'ngú lie pi uo na kuo kuo! <sup>9</sup> Ndu okpála hana inde ngamene siti 'ngú-o, asia likabhu bhe na kuo kuo! Likabhu ang-o akpó ngaiza li omaYuda, pipita-a i ké di li okpála inde ne omaYuda ade-o. <sup>10</sup> Engú bini, Ebhe ahá sangu pi kpála ne kpála inde ngamene bádha 'ngú, ani apá 'ngú gba uo-o ndjindji, ani tsia há di guo 'ngú pi uo. Ndu babadha 'ngú bhomu-o hana, Ebhe ahá ngaiza pi omaYuda, pipita-a ani tsia há di pi okpála inde ne omaYuda ade-o. <sup>11</sup> Padhá de, anga Ebhe ngakodho 'ngú gba kpála ne kpála li lelele, ani tsia bhúla kpála de.

<sup>12</sup> Ndu okpála hana inde ngamene siti 'ngú mandí nambila líli gba Moidje-e , amú mamu, nakpi gba uo kpáta la lele líli gba Moidje de. Engú bini, ndu okpála hana inde ngamene siti 'ngú me u nde ambila líli gba Moidje hana-a, Ebhe

† 2:6 2:6 Tsia bhú Ets. 62:13; di ne bhú Gbt. 24:12.

akódho bhadi 'ngú gba uo-o nakpata lele líli bhomu-o.

<sup>13</sup> Padhá de, anga okpála inde ngbingbili bhú djila Ebhe-e, a ko obhende ngadje líli gba Moidje ne 'dje o-o de, engú bini, okpála inde ngbingbili bhú djila Ebhe-e, a ko obhende ngamene engú maka lí líli-e aziba lie-o. <sup>14</sup> Okpála inde ne omaYuda ade-e, u mbila líli gba Moidje de. Nedhinga koko, u la ngamene 'ngú maka lí líli apa lie. Bhobhomu-o asuno me líli ango-o asi kúti e abhú uo, belegu u mbila lie de-o. <sup>15</sup> U bhomu-o ngasuno me engú inde lí líli-e apa e asi kúti e lí bua o. Bua nakpokpo ku 'ngú ne mabhundja gba uo-o bhadi ngasuno moko. Nedhinga koko-o, u ngambila me o omene engú ndjindji ne me o omene sisiti. <sup>16</sup> A bhomu-o engú inde akóto ekpí inde lí Ebhe akódho 'ngú gba okpála lie lí kpadji gba Yesu Kilisito-o. Ekpí ango-o, Ebhe akódho 'ngú gba okpála maka lí Bádha Ngali inde ma ngakpokpo e ngapapa lie-o. Ebhe akódho 'ngú ango-o pindji ongú inde awo lie mawo, inde lí okpála ngabhundja e lí bua o-o.

### *OmaYuda na kukulú-o ngao dho?*

<sup>17</sup> La ngamu kpála inde ngapa me ní ne maYuda-a, mu ngalu pí líli gba Moidje-o, mu di ngabhi 'kpa mu pí mbulu mu me ní ne kpála gba Ebhe. <sup>18</sup> Mu mbila engú lí Ebhe akunda e hana, líli gba Moidje asuno la bhadi pí mu ndjindji me engú inde babadha ngae dho-ie. <sup>19</sup> Mu ngabhundja lí bua mu me ní ngasuno kpadji pí okpála inde i u kpí de. Mu di ngabhundja lí bua mu me ní ne zì 'kpí pí okpála inde bhú bití-o. <sup>20</sup> Mu ngabhundja lí bua mu me ní tí da nasuno 'ngú pí okpála bhende imbila 'ngú de-o. Mu di ngabhundja lí bua mu me ní tí da nasuno 'ngú pí okpála bhe i bhele nga lí kpadji gba Ebhe-e de-o. Mu ngabhundja me líli gba Ebhe-e asuno imbilangú ne kukulú 'ngú pí ní hana.

<sup>21</sup> Kaka-a, ma ngayi mu me, ngamu kpála inde ngasuno 'ngú pí okpála koko-o, mu suno 'ngú ango-o pí mu ngamu bhuhhulu de ka ní? Ngamu kpála inde

ngapa pí okpála me u azí 'he de-e, mu ngazi 'he ka ní? <sup>22</sup> Ngamu kpála inde ngapa pí okpála me u akúnda eḷe, i du di-e bhoko gba kpála koko de-e, mu la ngakunda eḷe, i du di-e bhoko gba kpála koko ka ní? Ngamu kpála inde ngayala engú na oebhe na eu-o, mu la ngabha oehe bhú 'tí nayo gba uo-o ngú ní? <sup>23</sup> Ngamu kpála inde ngabhi 'kpa mu pí mbulu mu me ní mbila líli gba Ebhe-e hana-a, mu nde la ngandjo líli ango-o, okpála ngasiti 'lí Ebhe ka mu, anga mu ngamene engú maka lí líli gba aní-e apa lie ade. <sup>24</sup> A maka u aye lie bhú Bhuku gba Ebhe-e me: «Okpála inde ne omaYuda ade-e ngasobho 'lí Ebhe ka engú lí ngayi omaYuda yí ngamene e-o.†»

<sup>25</sup> I du me mu nde ngamene engú maka lí líli-e apa lie, nali gandja pí mu ne tata. La-a, i du me mu nde mene engú maka lí líli-e apa lie de-e, a mana mugito me mu lí gandja de. <sup>26</sup> La di-e, lí kpála inde i lí gandja de-e du namene engú maka lí líli-e apa lie, Ebhe ú aní mugito me a ko kpála bhe alí gandja. <sup>27</sup> Kpála inde i lí gandja bhú kute de, engú bini, inde i ngamene engú maka lí líli-e apa lie, akódho 'ngú gba mu-o ngae, ngamu kpála inde i kpata líli-e de, abana inde lie me a ka mu ne líli, mu nde alí la di gandja-o.

<sup>28</sup> Padhá de, anga a ko de me kukulú maYuda-a, a ko bha bhende lí okpála ngau e lí kute e de, inde alí di gandja bha lí kute e de, ngú napa me okpála u ne djila o-o de. <sup>29</sup> La-a, kukulú maYuda-a, a ko bhende ne maYuda lí bua e, inde alí gandja lí lele Bua gba Ebhe, inde i lí gandja bha bini ka líli-e de. Kpála ango-o, Ebhe ngatoko aní ngae, okpála toko aní ngao de.

## 3

### *Ebhe ndu 'kpí hana bedhe ngú namene engú inde aní apa me ní améne e-o*

<sup>1</sup> I du me a nde mo-o, ta nadu ne maYuda ne ní? Nali gandja ngateteke kpála lele pí? <sup>2</sup> Ndu 'ngú bhomu-o hana bha ndjindji! Ebhe ambamba ngaíza nani

† 2:24 2:24 Tsia bhú isa. 52:5.

ta engú gba e pi uo omaYuda. <sup>3</sup> A na paká me okpála koko bhú ká uo kpata nani ongú li Ebhe apa e ne bua bini-e de. La-a, Ebhe amene bha naae engú inde ani apa nani me ni améne e pi uo-o. <sup>4</sup> Abana li ndu okpála hana du bha ne obhulu eu-o, Ebhe papa bha naae kukulu 'ngú. A maka u aye lie bhú Bhuku gba ani-e me:

«Ngamu Ebhe, nedhinga mu ngagama 'ngú lie,

ndu okpála hana ngambila me mu ne ngbili kpála .

I du di me u nde anu ne mu gba okpála nakodho 'ngú-o,

u ú ehe inde ayo me u holo mu li e belegu de bini.†»

<sup>5</sup> Ma gama nga 'ngú nakpata lele maka okpála-kuti agagama 'ngú lie. Nedhinga koko, okpála koko pá me siti 'ngú ní ngamene e ngateteke okpála ngú nambila me Ebhe ne ngbili kpála. U pa mo-o, ní gie pi uo mangua 'ngú dho? Ní gie pi uo me a ko paká, Ebhe ne ngbili kpála, anga ani nga'o mangimbo pí 'ndji ní ade. <sup>6</sup> Ebhe bha ndu 'kpí hana ne ngbili kpála, ani ngakodho 'ngú gba okpála na doto kaka.

<sup>7</sup> Engú bini, okpála koko ti da napa me eu o ngapa e ngagbe kukulu 'ngú gba Ebhe bhú mbasu, a di ngaha sangu pi ani. A ko la ni li Ebhe nga'o 'ngú lie pí o magito me o ne osisiti okpála? <sup>8</sup> Okpála koko ngasobho ya. U ngapa li ya me ya apa me: «Ní mene siti 'ngú, amba ní u lele bádha 'ngú inde akóto bhúbhú-o.» Ebhe a'o mangimbo pí okpála bhomu-o a'o. U ati la bhadi ne di.

### *Ndu okpála hana ngamene siti 'ngú*

<sup>9</sup> Ngani omaYuda-a, ní belegu bhú djila Ebhe ngbéngbé ade da nane opiga koko. Ma apa igini apa me ndu ní okpála hana ní sa líli gba siti 'ngú. <sup>10</sup> A maka u aye lie bhú Bhuku gba Ebhe-e me:

«Ngbili kpála ade, belegu de bini.

<sup>11</sup> Kpála inde ngakø mboli 'ngú ade, kpála inde ngagili Ebhe-e belegu ade bini.

<sup>12</sup> Ndu okpála hana a'o ká kpadji gba Ebhe-e a'o, ndu uo hana angita.

Kpála inde ngamene bádha 'ngú-o ade, belegu de bini!†

<sup>13</sup> Tangulu uo mana lata inde li 'bhø e nde bábá.

'Mi uo ngapa 'ngú napite okpála.

Eli inde ngaze bhú 'bhø uo mana sili kpulu inde ngabhili okpála.†

<sup>14</sup> U ngatu pødjo li okpála ndu 'kpí hana ne 'bhø o,

u di ngapa oeli na susu pi uo.†

<sup>15</sup> U ngagu holo ne angu o hana ngú nanu nabhili okpála.

<sup>16</sup> Ndu bili u ngapu li e hana-a, u ngasiti ohe, u di ngato mbolo li okpála.

<sup>17</sup> U mbila kpadji na guo 'ngú de.†

<sup>18</sup> Tsulu Ebhe bhú uo belegu ade bini.†»

<sup>19</sup> Ní mbila hana me ndu 'ngú inde u aye e bhú líli-e hana, u aye pi okpála inde li Ebhe aha nani líli ango-o pi o-o. Ebhe amene mo-o ngubula nagbite 'bhø ndu okpála hana ne napa me ni 'o mangimbo pí 'ndji ndu uo hana. <sup>20</sup> Padhá de, anga kpála bini belegu ade inde i ti da nakoto ngbili kpála kala Ebhe ka namene líli-o. Kulu gba líli-e bha bini ne nateteke okpála ngú nambila me siti 'ngú ngae dho-ie.

### *Kpála ngakolo ngbingbili bhú djila Ebhe ka nabhuka*

<sup>21</sup> Mbia inde-e, Ebhe apana kpadji inde ngamene lie me okpála kolo ngbingbili kala ni-o. Kpadji ango-o kpi, a koto li líli de. Obhuku na olíli di ne obhuku gba opolofeta apa nani engú ango-o kalanu.

<sup>22</sup> Kpadji ango-o me, Ebhe nga'o okpála ngbingbili kala e li kpadji nabhuka Yesu Kilisito ka uo-o. Ani ngamene mo-o pi ndu okpála hana inde ngabhuka ani-o. Ndu uo hana ngasia mukobho bha li koli kpadji bini inde gba Yesu Kilisito-o. <sup>23</sup> Padhá de, anga ndu okpála hana amene siti 'ngú, kaka-a, Ebhe bhú sangu gba e adji 'ngbu e li uo adji.

† **3:4** 3:4 Tsia bhú Ets. 51:6. † **3:12** 3:10-12 Tsia bhú Ets. 14:1-3, 53:1-3; di ne bhú Ekl. 7:20. † **3:13** 3:13 Tsia bhú Ets. 5:10, 140:3. † **3:14** 3:14 Tsia bhú Ets. 10:7. † **3:17** 3:15-17 Tsia bhú Isa. 59:7-8. † **3:18** 3:18 Tsia bhú Ets. 36:2.



<sup>24</sup> Engú bini, Ebhe bhú bádha bhú 'bu gba e amene me u kolo ngbingbili bhú djila ni padhá. Aní amene mo-o li kpadji gba Yesu Kilisito inde ngagbegbe uo sakpa siti-o. <sup>25-26</sup> Yesu Kilisito ne kpála inde li Ebhe abhú e me aní kpi mada ní ka siti 'ngú gba ní-o. Aní tuko ngute e ngú na'e siti 'ngú gba ní-o. Kpadji ango-o Ebhe aleke pi okpála bhende abhuka-o. Ebhe amene mo-o ngubula me ní mbila me ni ne ngbili kpála. Bhú nedhinga na kalanu-o, nedhinga li okpála adu namene siti 'ngú lie, aní adu ne 'ndjá bua pi uo, aní adu atsia siti 'ngú inde u adu amene e mugito me aní u de. Bhú nedhinga na mbia inde-e, aní ngasuno me ni ne ngbili kpála. Kaka-a, aní a'o ndu okpála hana inde abhuka Yesu-o me u du ngbingbili bhú djila ni.

<sup>27</sup> I nde lie mo-o, engú bini belegu ade inde i ti da naha 'ngbé 'ndji pi ní. Ka ni? Anga ehe bhende ane ne engbé-e, a ko matá namene líli-e de, engú bini, a ko bha bini nabhuka. <sup>28</sup> Padhá de, anga ya au me kpála-kuti ngakolo ngbingbili kala Ebhe ka nabhuka gba e. A ko de me anga aní amene líli-e hana-a de. <sup>29</sup> Yi abhundja naayi me Ebhe bha ne Ebhe ka omaYuda? A ko di Ebhe gba okpála inde ne omaYuda ade-e di? A mo-o ade. A ko di Ebhe gba okpála inde ne omaYuda ade-o. <sup>30</sup> Padhá de, anga koli Ebhe bha bini. Aní amene me ni 'o omaYuda kala ni ngbingbili li kpadji na nabhuka. Aní améne bhadi pi okpála inde ne omaYuda ade-e moko. <sup>31</sup> I du me a nde mo-o, a kunda napa me ní u ibili líli-e padhá? A mo-o ade, ní mangbo bhomu-o nga'o líli-e bhú da e.

## 4

### *Nabhuka gba Abalahama*

<sup>1</sup> Ní bhundja nga pindji ogbi ní Abalahama. Ní apá li 'ngú gba aní-e pi? A akolo nani li aní ne mangua 'ngú dho? <sup>2</sup> Li Ebhe ú nani aní me a ko ngbili kpála bhú djila ni ka obabadha kulu inde aní adu amene e, Abalahama de adú ne engú inde aní ti da nabhi 'kpa e pí mbulu e ka e-o. La-a,

ani ti da namene bhú djila Ebhe mo-o de. <sup>3</sup> Padhá de, anga Bhuku gba Ebhe ngapa me: «Abalahama abhuka Ebhe, abhomu-o Ebhe atsia au aní me a ko ngbili kpála ka natsia nabhuka gba aní-o.†» <sup>4</sup> Ní mbila hana me li kpála mene kulu-o, u há kuo 'kpa pi aní tété, kuo 'kpa bhomu-o ha lie pi aní padhá de. Aní amene nganga kulu. <sup>5</sup> La-a, li kpála mene kulu de, aní bhuka me Ebhe ngasia obhulu namene siti 'ngú-o, nabhuka gba aní-e nga'o aní ngbingbili bhú djila Ebhe. <sup>6</sup> Kaka-a, Davidi ngapa 'ngú na djali gba kpála inde li Ebhe au e maka ngbili kpála bhú djila e-o, inde aní tsia okulu gba e de-o. <sup>7</sup> Davidi apa me:

«A ko djali pi okpála inde li Ebhe ambu li ndjondjo gba o ambu,  
okpála inde li Ebhe a'e osisiti 'ngú gba o a'e-o!

<sup>8</sup> A ko djali pi okpála inde li Ebhe Ngámá lila  
osisiti 'ngú gba o li bua e de-o!†»

<sup>9</sup> Engú li Davidi apa e bhomu-o, ne me a atsia bha bini okpála bhende ali gandja, ne me a atsia di obhende i li gandja de-o? Ní de ngapa me: «Ebhe au Abalahama ngbingbili bhú djila e, anga Abalahama abhuka aní.» <sup>10</sup> Engú bhomu-o akodho 'kpí nadho? Ne me a ko me Abalahama nde ali gandja ali, ne me a ko me aní nde li nga gandja de? A mo-o ade, a ko kala me Abalahama li gandja.

<sup>11</sup> Kala me Abalahama li gandja-a, Ebhe au aní bhú djila e me a ko ngbili kpála. Pipita-a, Ebhe apa pi aní me aní li gandja. Gandja bhomu-o adu maka ehe inde asuno me aní ngbingbili bhú djila Ebhe kabula nabhuka gba e-o. Kaka-a, Abalahama akolo 'dyi ndu okpála hana inde ngabhuka Ebhe mandí nali gandja. Ebhe ngau ndu okpála bhomu-o hana bhú djila e ngbingbili maka aní au nani Abalahama lie-o. <sup>12</sup> Abalahama di ne 'dyi okpála bhende ali gandja-o. A akunda napa me Abalahama di ne 'dyi okpála inde ngakpi bha bini ndjili li nali gandja ade, engú bini, inde ngakpata lele nabhuka inde adu

† 4:3 4:3 Tsia bhú Dje. 15:6. † 4:8 4:7-8 Tsia bhú Ets. 32:1-2.

nani bhú ogbi ní Abalahama kala me ani li gandja-o.

<sup>13</sup> Ebhe apa nani pi Abalahama ne odi e me ni ahá doto pi uo. A ko de me Ebhe apa nani engú bhomu-o ka anga Abalahama amene líli-e de, a ko mangbo anga Ebhe au nani ani ngbingbili bhú djila e ka nabhuka gba e-o. <sup>14</sup> I du me okpála bhende ngamene líli-e nde asia bha bini ohe li Ebhe apana e ngao, a akúnda napa me tata li nabhuka ade. La di-e, engú inde li Ebhe apa nani me ni amene e pi uo, a ko 'ngú na padhá. <sup>15</sup> Padhá de, anga nedhinga li okpála adje líli lie, i du me u nde kpata de-e, li Ebhe ké 'ngú lie. La-a, bili li líli nde li e ade-e, u agumu líli-e lele pi?

<sup>16</sup> A bhomu-o engú yi ngau lie me Ebhe apa nani me ni ahá doto pi Abalahama ne odi e kabula nabhuka gba e ngubula me a adu pi uo maka ehe ani aha e pi uo padhá bhú bádha bhú 'bu gba e-o. Oehe li Ebhe apa me ni ahá e pi okpála-a, a bha bini pi obhende ngakpata líli-e ade, engú bini, a di pi okpála inde abhuka Ebhe maka Abalahama abhuka lie-o. Kaka-a, Abalahama ne 'dyi ndu ní hana. <sup>17</sup> A maka u aye lie bhú Bhuku gba Ebhe-e me Ebhe apa pi Abalahama me: «Ma a'o mu 'dyi okpála na opiga bhelé.†» Abalahama ne 'dyi ní bhú djila Ebhe inde ani abhuka e-o. A ko Ebhe inde ngazuku okpála inde amu, inde di ngabho oehe inde nga ade-o.

<sup>18</sup> Abalahama adu bha ne nabhuka bhú Ebhe, ani atsia adu bha na'o 'to e 'to ani. Natsia la lele ani-e, a ko nani kpála inde i ti matá nani da na'o 'to e 'to ehe inde li Ebhe apa me ni ahá e pi ani-e de. Abhomu-o, Ebhe amene engú ani apa nani me ni améne e pi ani-o. Ani atsia akolo 'dyi okpála na opiga bhelé maka li Ebhe apa nani lie pi ani me: «Opiga gba mu-o adú bhelé.†» <sup>19</sup> A abhaka me ani nde ne kalanga masikpe de kámá bini. Ani adu nambila ndjindji me ni agbe, ani adu di nambila hana me wala ni Sala ne izude, engú bini, nabhuka gba ani-e gie lie ne sidi de. <sup>20</sup> Ani adu bha nabhuka me Ebhe ahá ehe inde ani apa me ni ahá e

pi ni-e maha. Ani du ne bua bhisi bhisi de da napa me ni gbe 'to ni 'to Ebhe-e de. Engú bini, nabhuka inde ani adu ne e bhú Ebhe-e, adu bha naha angu pi ani ngú nanu ne kalanu, ani atsia adu adhogo Ebhe. <sup>21</sup> Ani adu nabhuka na paká me Ebhe ne angu ngú namene engú inde ani apa me ni améne e-o.

<sup>22</sup> Ka nabhuka gba Abalahama-a, Ebhe au ani bhú djila e me a ko ngbili kpála. <sup>23</sup> I du me Bhuku gba Ebhe-e nde apa me, Ebhe au ani bhú djila e me, a ko ngbili kpála-a, a ko bha bini pi ani kpi e kpi de. <sup>24</sup> Eli bhomu-o aye di lie pi ní okpála inde li Ebhe aú o bhú djila e me ní ne okpála na ngbingbili-o. Padhá de, anga ní ne nabhuka bhú Ebhe inde azuku Yesu Ngámá gba ní-e bhú ká okpála inde amu-o. <sup>25</sup> Ebhe apu Yesu pi okpála ngubula me u bhelo ani li 'ngú na siti 'ngú gba ní-o. Ebhe atsia azuku ani bhú ká okpála inde amu-o ngú napa me ní kolo ngbingbili bhú djila ni.

## 5

### *Yesu ato guo 'ngú sunda ní ne Ebhe*

<sup>1</sup> I nde lie me Ebhe au ní me ní ne okpála na ngbingbili bhú djila e ka ní abhuka ani lie, ní mbia inde-e ne guo 'ngú sunda ní ne Ebhe li kpadji gba Yesu Kilisito , Ngámá gba ní-o. <sup>2</sup> Yesu abhulu kpadji pi ní ngae ngubula me Ebhe suno bádha bhú 'bu gba e pi ní li kpadji na nabhuka . Nabhuka gba ní-e alu pi bádha bhú 'bu bhomu-o. Ní la bhadi ngakpi djali anga ní nga'o 'to ní me Ebhe ahá di sangu pi ní maka ani aha pi Yesu lie-o. <sup>3</sup> A pise bha bini li bhobhomu-o de. Ní di ngakpi ndjili bhú likabhu ní ngazu e anga ní ambila me likabhu ngaha pi ní nambila nadu ne 'ndjá bua. <sup>4</sup> Nadu ne 'ndjá bua ngaha pi ní nasia angu bhú kpéke da 'ngú, ní sia angu bhú kpéke da 'ngú-o, bhobhomu-o ngaha pi ní me ní 'o 'to ní li engú li Ebhe apa me ni améne e-o. <sup>5</sup> Ní du na'o 'to ní 'to engú li Ebhe apa me ni améne e mo-o, a padhá ade. Padhá de, anga li kpadji gba Bu Bhobua-a , Ebhe

† 4:17 4:17 Tsia bhú Dje. 17:5. † 4:18 4:18 Tsia bhú Dje. 15:5.

asuno me ni abedhe ne mukunda pi ni bedhe.

<sup>6</sup> A ko paká, nedhinga ní adu lie me ní nde ti da nagbe 'ndji ní de-e, Yesu Kilisito akpi li 'ngú gba ní osisiti okpála li nedhinga inde li Ebhe a'o nani e-o. <sup>7</sup> Ní mbila hana me, da napa me kpála ziba nakpi li 'ngú gba ngbili kpála kpekpeke. Nedhinga koko-o, kpála ti da naziba mangbo nakpi li 'ngú gba kpála na bádha 'ngú. <sup>8</sup> Engú bini, ehe inde asuno me Ebhe ne mukunda pi ní-e ngae inde: nedhinga ní adu nga bha lie bhú siti 'ngú-o, Yesu Kilisito akpi li 'ngú gba ní-o.

<sup>9</sup> I nde la lie me mbia inde-e Ebhe au ní okpála na ngbingbili bhú djila e li kpadji na ngute ani-e, ní mbila me ní akóbho bhú 'bhé ke 'ngú gba Ebhe-e li kpadji na ngute ani. <sup>10</sup> Nani kalanu, nedhinga ní adu lie nayala Ebhe-e, Ebhe ato guo 'ngú sunda ní ne o li kpadji nakpi gba Ndili gba e-o. Kaka-a, ní mbila ndjindji me maka li Ebhe ato guo 'ngú lie sunda ní ne o ato-o, ani akóbho bhadi ní li kpadji gba Ndili gba e, anga Ndili ango-o bhú mukobho. <sup>11</sup> La matá pépé-e, ní ngakpi djali li 'ngú li Ebhe amene e li kpadji gba Ngámá gba ní Yesu Kilisito-o. Padhá de, anga ani amene me guo 'ngú li sunda ní mbia inde-e ne Ebhe.

*Ní ali bhú mangimbo ka Adamu , ní akobho ka Yesu*

<sup>12</sup> Ní mbila hana me, siti 'ngú ali píla doto ka koli kpála bini má kpikili! A 'li kpála ango-o me Adamu . Siti 'ngú ango-o atsia azu kuo. Ka li ndu okpála hana amene siti 'ngú lie, kuo atsia akolo li ndu uo hana. <sup>13</sup> Kala me Ebhe ha líli gba e pi Moidje-e, siti 'ngú adu nani píla doto. Engú bini, inde lie me Ebhe nde ha nga nani líli gba e pi okpála de-e, ani du na'o 'to e 'to siti 'ngú gba uo de. <sup>14</sup> La-a, abana a adu lie mo-o, nayie li Adamu, nakolo li Moidje , kuo adu ne angu pí ndu okpála hana, abana pí okpála bhende i mene siti 'ngú maka Adamu andjo nani 'li Ebhe lie de-o. Adamu nani ne kulu kpála inde a ayo nani me ani go-o.

<sup>15</sup> Engú bini, siti 'ngú gba Adamu-o kpo 'ndji e ne bisagu li Ebhe aha e padhá-a

de. Eu ade, okpála bhelé amu kabula siti 'ngú gba koli kpála bini bhomu-o. Engú bini, bádha bhú 'bu gba Ebhe-e ane ne engbé. La di-e, bisagu inde ani aha e padhá pi okpála bhelé li kpadji gba koli kpála bini inde 'li e me Yesu Kilisito-o, ane di ne engbé. <sup>16</sup> Bádha bhú 'bu li Ebhe aha e pi okpála-a naae ngazu ngua koko. A viti bini ne siti 'ngú inde li koli kpála bini bhomu-o amene e de. Siti 'ngú li koli kpála bini bhomu-o amene e, amene me Ebhe 'o 'ngú pí okpála. La-a, bádha bhú 'bu li Ebhe aha e pi okpála padhá pita u amene siti 'ngú lie bhelé-e aha pi uo me u kolo ngbingbili kala Ebhe.

<sup>17</sup> A na paká me kuo apa lie li okpála ka siti 'ngú gba koli kpála bini. Engú bini, kpála bhe koko inde 'li e me Yesu Kilisito-o ngamene naae okulu na ngbengbengbe. Li kpadji gba ani-e, Ebhe ngasuno bádha bhú 'bu gba e inde ane mane-e pi okpála padhá, ani di ngau uo bhú djila e me a ko okpála na ngbingbili. Bha li kpadji gba ani-e, u asia mukobho na duduma, u aú di ngámá ka ani.

<sup>18</sup> Ní au me kabula siti 'ngú gba koli kpála bini inde 'li e me Adamu-o, mangimbo gba Ebhe-e ati pí ndu okpála hana. A bhadi moko, kabula bádha kulu gba kpála bini inde 'li e me Yesu Kilisito-o, okpála hana akolo ngbingbili bhú djila Ebhe. Bádha kulu gba Yesu Kilisito di ngaha mukobho pi okpála ngae. <sup>19</sup> Ka li kpála bini andjo 'li Ebhe lie, okpála bhelé ati bhú siti 'ngú. A bhadi moko, ka li kpála bini adje 'li Ebhe lie, okpála bhelé akolo ngbingbili bhú djila ani.

<sup>20</sup> Pindji bhende atsia líli gba Moidje-e , Ebhe aha nani pi okpála ngae. La natsitsia-a, siti 'ngú atsia abe matá ndu e naali. Engú bini, li bíli inde li siti 'ngú abe ndu e lie, bádha bhú 'bu gba Ebhe abe la matá ndu e ane mane. <sup>21</sup> A bhadi moko, maka li siti 'ngú apana angu e pi okpála lie li kpadji gba nakpi-e, bádha bhú 'bu gba Ebhe-e apána bhadi angu e pi okpála li kpadji nakobho uo. Bádha bhú 'bu ango-o améne me ní kolo bhú

mukobho na duduṃa li kpadji gba Yesu Kilisito, Ngámá gba ní-o.

## 6

*Ní akpi bhú dabilì bini ne Yesu, ní azúku bhadi maka ani*

<sup>1</sup> Ní apá la ibili pi? Ní mene bha ibili siti 'ngú ne kalanu, amba bádha bhú 'bu gba Ebhe-e nu ne kalanu? <sup>2</sup> Belegu de bini! Ní amu li pabili gba siti 'ngú amu. Lele pi ní ti lie matá da nanu bhú siti 'ngú ne kalanu-o? <sup>3</sup> Yi mbila de me nedhinga ní asia batisimo lie, ndu ní hana ní akpètse liní bhú dabilì bini ne Yesu Kilisito bhú nakpi ka e di? <sup>4</sup> Li kpadji na batisimo-o, ní amu ne ani bhú dabilì bini, u atsia azi ní ne ani bhú lata bhú dabilì bini ngubula me Ebhe 'dyi ní zuku di ní bhú ká okpála inde amu-o maka ani azuku Yesu Kilisito lie bhú angu gba e inde ane mane-o. Ani azuku ní ngubula me ní du di ne lele mukobho na mbia.

<sup>5</sup> Padhá de, anga maka ní akpètse liní ne ani lie bhú ngua nakpi inde ani akpi e-e, ní azúku bhadi ngua nazuku inde ani azuku e-o. <sup>6</sup> Ní mbila ndjindji me, nedhinga li Yesu Kilisito akpi lie li kulusi-e, Ebhe agi lele mukobho gba ní na kalanu-o bhadi li kulusi oo ngubula me lele mukobho bhomu-o kpi di, amba ní adú matá obalise gba siti 'ngú de. <sup>7</sup> Padhá de, anga kpála inde akpi-e, akoto bhú bali gba siti 'ngú akoto. <sup>8</sup> I du me ní nde akpi bhú dabilì bini ne Yesu Kilisito akpi-e, ní bhadi ne nabhuka me ní adú bhadi ne ani bhú mukobho. <sup>9</sup> Yesu Kilisito azuku nani azuku. Ní mbila hana me nayie li 'kpi bhomu-o, ani kpi matá-a de. Nakpi matá ne angu pi ani ade. <sup>10</sup> Bhú nakpi ka ani e-e, ani akpi li pápá na siti 'ngú bhutsibhutsi bini má kpikili! Ani nde lie bhú mukobho mbia inde-e, ani bhú mukobho pi Ebhe. <sup>11</sup> A viti bhadi bini, ngayi di-e, yi 'o liyi mugito me yi amu li pápá gba siti 'ngú-o amu. La mbia inde-e, yi bhú mukobho pi Ebhe li kpadji na makpètse gba yi ne Yesu Kilisito.

<sup>12</sup> I nde lie mo-o, a ayo matá de me siti 'ngú ko angu e pi kute yi na kukuo inde-e de. Yi adhuku li lele gamu na sisiti gba

kute yi bhomu-o de. <sup>13</sup> Yi a'ó matá oyá yi de me adu bhú kulu gba siti 'ngú maka otia kulu gba ani-e de. Yi ha mangbo liyi pi Ebhe maka okpála inde amu, u atsia azuku. Yi ha liyi libhomu ngú kulu gba Ebhe maka otia kulu ngú namene ngbili 'ngú. <sup>14</sup> Padhá de, anga a ayo de me siti 'ngú ko matá angu e pi yi-e de, anga yi matá sa líli ade, engú bini yi mangbo sa bádha bhú 'bu gba Ebhe-o.

*Ní matá ne obalise gba siti 'ngú ade, ní ibili ne obalise gba Ebhe*

<sup>15</sup> Mbia inde-e, ní matá ngadhuku sa líli ade, ní mangbo sa bádha bhú 'bu gba Ebhe. I nde li mo-o, a ayo me ní nu bha ne siti 'ngú ne kalanu anga ní nde sa bádha bhú 'bu gba Ebhe? Belegu de bini! <sup>16</sup> Yi mbila hana me i du me nu nde bhú kulu gba kpála bini ngú namene engú ani akunda e-e, nu ne bali gba kpála inde nu nde bhú kulu gba e-o. I du me nu nde bhú kulu gba siti 'ngú-o, nu ne bali gba ani. Nu du bhú kulu gba Ebhe-e, nu ne bali gba ani. Yi mbila la me, siti 'ngú ngato kpála bhú kuo. Engú bini, namanga Ebhe ngamene me Ebhe 'o kpála ngbingbili bhú djila e.

<sup>17</sup> Heni pi Ebhe, anga yi du nako ne obalise gba siti 'ngú, la mbia inde-e, yi abhuka Ebhe. Yi atsia aziba di ne bua yi bini nandu bhú mukobho nakpata lele nasuno inde u asuno e pi yi-o. <sup>18</sup> Ebhe agbegbe yi bhú bali gba siti 'ngú-o agbegbe, yi atsia akolo obalise gba ani ngú namene engú inde ngbingbili. <sup>19</sup> Ma ngakpokpo 'ngú bhomu-o pi yi ne nasusuno li kute obalise, anga yi ngakø mboli engú má gala ade. Nani kalanu-o, yi aha kute yi libhomu maka obalise inde bhú kulu gba siti 'ngú inde ngazu kpéke 'ndji li pabili gba Ebhe. Maka yi aha nani liyi lie libhomu pi siti 'ngú-o, mbia inde-e, yi ha di liyi libhomu pi Ebhe maka obalise inde bhú kulu gba ngbili 'ngú ngubula me lele mukobho gba yi-e du bhende nganga li Ebhe manga.

<sup>20</sup> Nedhinga yi adu nako lie obalise gba siti 'ngú-o, ehe bini ade inde i ti nako da natima yi me yi mene ngbili 'ngú. <sup>21</sup> Nedhinga yi adu lie amene osisiti 'ngú

inde nga'o naki nũmũ li yi bhomũ-o, yi asia bhũbhũ mangua bádha 'ngú dho? Ehe bini ade! Ongú bhomũ-o ngatima kpála bhũ kuo. <sup>22</sup> La mbia inde-e, Ebhe agbegbe yi bhũ siti 'ngú agbegbe, yi atsia akolo okpála na kulu gba anĩ-o. Li kpadji bhomũ-o, yi asia nadũ bhũ mukobho inde nganga li Ebhe-o. Ali soso-o, yi asia mukobho na dudũma. <sup>23</sup> Padhá de, anga makalá gba siti 'ngú-o, a ko nakpi, engú bini, Ebhe naae ngaha pi okpála mukobho na dudũma inde bhũ Yesu Kilisito Ngámá gba ní-e padhá.

## 7

### *Ní aze bhũ bali gba líli-e aze*

<sup>1</sup> Ondaise ma, yi mbila engú inde ma adji apa e hana, anga yi ambila líli-e ndjindji. Yi mbila hana me líli ngako angu e pí kpála bha bini li nedhinga ani nde lie bhũ mukobho-o. <sup>2</sup> Ní ha nga kukulu li ølø inde bhũ kũva. Nedhinga li 'ko ani nde lie tété-e, ani tí da na'o ká ani ngú nanũ naha bhoko koko de, anga líli ziba mo-o de. I dũ la me 'ko ani nde akpi-e, ehe bini inde aní matá kpadji pi ani ngú naha bhoko koko ade. <sup>3</sup> Bhobhomũ-o apa me, i dũ me ølø yie nũ ha bhoko koko me 'ko ani nde nga bha tété-e, líli apa me ølø bhomũ-o akũnda bhoko gba kpála koko. I dũ la me 'ko ani nde akpi ma kpi-e, líli ne engú bini pí ani ade. Kaka-a, ani tí da naha bhoko koko. U pá li ani de me ani aha bhoko gba kpála koko-o de.

<sup>4</sup> A bhadi pi yi moko, ngayi ondaise ma. Yi akolo li pabili gba líli maka okpála bhende amu, anga Yesu Kilisito akpi mada yi. Kaka-a, yi ibili ne okpála ka ani, ngaani kpála inde li Ebhe azuku e-o. Ebhe amene mo-o ngubula me ní dũ azu pi ni onguwa na babadha. <sup>5</sup> Nedhinga ní adũ nani akobho lie maka li osisiti gumũ na kũte ní adũ atima ní lie, líli adũ apana pi ní me, a inde-e siti 'ngú. La-a, ní dje mo-o, kũte ní adũ mangbo atima ní me ní mene osisiti 'ngú bhomũ-o. Osisiti 'ngú ango-o adũ atima ní ne kalanũ ngú nazu nguwa inde ngatima kpála bhũ kuo. <sup>6</sup> Engú bini,

mbia inde-e, maka ní amu lie li pápá gba ehe inde a'o nako ní bhũ bali-e amu-o, líli matá ne engú pí ní ade. Kaka-a, ní tí da namene kulu liní pi Ebhe li lele bhe na mbia. Ní améne kulu ango li kpadji gba Bu Bhobua , a adũ matá li lele bhe na kalanũ ní adũ amene e sa líli inde u aye e maye-e de.

### *Líli gba Ebhe-e asuno siti 'ngú gba ní-e mbámbá*

<sup>7</sup> I dũ mo-o, ní pa me líli ne ehe na sisiti? A mo-o ade! I dũ ka líli de-e, ma de mbila siti 'ngú de. U yé nani bhũ líli de me: «Mo odú ne gumũ 'he gba kpála de-e»,† ma de mbila de me nadũ ne gumũ 'he gba kpála ne siti 'ngú-o de. <sup>8</sup> Nedhinga ma ambila líli bhomũ-o lie, siti 'ngú au kpadji e abhũ ma. A tsia amba bhũla ma me ma dũ ne gumũ ohe gba okpála ngangá. Padhá de, anga li líli dũ de-e, siti 'ngú kó angu e pí ma de. <sup>9</sup> Nani kalanũ me ma nde mbila nga líli de-e, bua ma adũ má bii! La-a, nedhinga ma akø mboli engú li Ebhe akũnda e lie, siti 'ngú me ní ngani bhomũ, <sup>10</sup> ma atsia akpi. Líli inde li Ebhe aha e ngubula me aha mukobho pi okpála-a, aha naae mũma nakpi. <sup>11</sup> Padhá de, anga ma ambila líli-e lie, siti 'ngú au kpadji e bhũ ma. A apite bua ma, ma atsia akpi kaka.

<sup>12</sup> Bhobhomũ-o atima ní naziba me ndũ líli-e hana ayie ka Ebhe, la di-e ndũ ongú inde u aye e bhũbhũ-o hana ayie ka ani. Ehe na sisiti bhũbhũ belegũ ade bini.

<sup>13</sup> A akũnda napa me ehe na babadha-a abhølø ma ngae? A mo-o ade! A abhølø mangbo ma ne siti 'ngú. Siti 'ngú-o aha líli, ani atsia abhølø ma nedi. A mene lie mo-o ngubula me okpála mbila me siti 'ngú bha ne siti 'ngú. Li kpadji gba líli-e, siti 'ngú atsia asuno la ibili me ní ane ne siti mane.

### *Nganí okpála-kũti-e, ní ngagũ gbele ne siti 'ngú inde abedhe bhũ ní bedhe-o*

<sup>14</sup> Ní mbila hana me líli-e ayie ka Ebhe. La ngama-a, ma ne kpála li angu nde bhũ e ade, ma ne bali gba siti 'ngú. <sup>15</sup> Ma ngakø mboli engú inde ma ngamene e

† 7:7 7:7 Tsia bhũ Eki. 20:17; di ne bhũ Det. 5:21.

ade. Padhá de, anga ma ngamene engú inde ma kúnda namene e de. Ma mangbo ngamene bhende ma ayala namene e-o. <sup>16</sup> I dɔ me ma nde ngamene engú inde ma ngayala e, bhobhomɔ-o asuno me ma abhuka me líli ne bádha 'he. <sup>17</sup> Bhobhomɔ-o apa me nedhinga ma ngamene siti 'ngú lie, a ko ma de, a ko mangbo siti 'ngú inde asi kuti e abhú ma ko. <sup>18</sup> Padhá de, anga ma ambila me bádha 'ngú si kuti e bhú ma de, a akúnda napa me bhú kute ma, ngama kpála inde li angu nde bhú e ade-o. A na paká me a bhú ma ne gumu namene bádha 'ngú, engú bini angu namemene la bhú ma ade. <sup>19</sup> Padhá de, anga bádha 'ngú inde ma akúnda namene e-e, ma ngamemene ade. Siti 'ngú inde ma ayala namene e-e, ma mangbo ngamene e. <sup>20</sup> Li ma dɔ amene engú inde ma akúnda namene e de-e, a kúnda napa me, a ko ma de, a ko mangbo siti 'ngú inde asi kuti e abhú ma-o.

<sup>21</sup> I nde lie mo-o, engú ma ngau e ndu 'kpí hana ngae inde: ngama kpála inde ne gumu namene bádha 'ngú-o, a bha bini bhú ma ne angu namene siti 'ngú. <sup>22</sup> A li bua ma-a, ma ngakpi ndjili li líli gba Ebhe-o. <sup>23</sup> Engú bini, a bhú kute ma-a, ma ngau líli koko inde ngagu gbele ne líli inde li bua ma ngaziba e-o. Líli inde bhú kute ma-a nga'o ma bali gba líli na siti 'ngú inde abhú ma-o. <sup>24</sup> A ko likabhu muma! A agbégbé ma sakpa kute ma inde ngato ma li kpadji nakpi inde-e da? <sup>25</sup> Heni pi Ebhe li kpadji gba Yesu Kilisito, Ngámá gba ní-o!

Ma ti da nabu 'li ma me, li bua ma-a, ma ne bali gba líli gba Ebhe, engú bini, li kute ma-a, ma ne bali gba líli gba siti 'ngú.

## 8

### *Nadu bhú mukobho inde li Bu Bhobua aziba e*

<sup>1</sup> Mbia inde-e, engú na'o'o matá pi okpála inde akpɔtsɔ lio bhú dabili bini ne Yesu Kilisito ade. <sup>2</sup> Padhá de, anga líli gba Bu Bhobua inde ngaha mukobho pi kpála li kpadji gba Yesu Kilisito agbegbe ma bhú bali gba líli na siti 'ngú bhú dabili bini ne bali gba nakpi-e agbegbe. <sup>3</sup> Líli gba

Moidje ti nako da naha mukobho pi ní de, anga nganí okpála-kuti-e, angu bhú ní ngú namene olíli-e hana-a de. Engú bini, Ebhe amene ehe inde li líli-e ti nako da namene e de-o. Ngú na'e osisiti 'ngú gba ní-e, ani atima Ndili gba e makpe me ani go kobho maka ní osisiti okpála. Bhobhomɔ-o akúnda napa me Ebhe kúnda siti 'ngú inde li okpála ngamene e belegu de bini.

<sup>4</sup> Ebhe amene mo-o ngabula me nganí okpála inde ngakobho maka Bu Bhobua akúnda lie, ní mene ndu 'ngú hana inde li líli-e aziba e, ní améne matá ongú maka li kute ní aziba lie de. <sup>5</sup> Padhá de, anga mɔ dɔ akobho nakpata ongú inde li kute mɔ aziba e, mɔ dú bha nabhundja engú na kute. Engú bini, mɔ dɔ akobho nakpata ongú inde li Bu Bhobua akúnda e-e, mɔ dú bhadi nabhundja ongú gba Bu Bhobua. <sup>6</sup> I dɔ me mɔ nde ngabhundja bha bini pi ongú inde li kute mɔ akúnda e-e, mɔ kpí. Engú bini, li mɔ dɔ abhundja bha bini pi bhende li Bu Bhobua gba Ebhe-e ngakúnda e, Ebhe méne me mɔ dɔ bhú mukobho bhú dabili bini ne guo 'ngú.

<sup>7</sup> Okpála bhende ngabhundja bha bini ongú li kute o aziba e, a ko obhulu yala gba Ebhe. U ngamene líli gba Ebhe-e ade, u ti la di da namemene de. <sup>8</sup> Okpála bhende ngamene mo-o, u ti da nanga li Ebhe de.

<sup>9</sup> La ngayi-e, yi ngamene engú maka li kute yi aziba lie ade. Yi ngamene engú maka li Bu Bhobua aziba lie-o. Padhá de, anga Bu Bhobua gba Ebhe ngadu bhú yi. Kpála inde li Bua gba Ebhe-e ngadu bhú e ade-e, a ko makilisito de. <sup>10</sup> Li Yesu Kilisito dɔ bhú yi-e, li pápá na kute yi-e, yi amú mamu, anga yi nde amene siti 'ngú. La li pápá na bua yi-e, Bua gba ani-e ngaha mukobho pi yi, anga yi akolo ngbingbili bhú djila Ebhe. <sup>11</sup> La di-e, li Bua gba Ebhe inde azuku nani Yesu bhú ká okpála inde amu-o dɔ bhú yi-e, a na paká me Ebhe bini bhomɔ-o ahá di mukobho pi okute yi na kukuo bhomɔ li kpadji gba Bua gba ani inde ngadu bhú yi-o.

<sup>12</sup> Kaka-a, ondaise ma, a ayo me ní dɔ akobho maka li Bu Bhobua akúnda lie, a

ayo de me ní dū akobho maka li kute ní akunda lie de. <sup>13</sup> Padhá de, anga yi dū akobho maka li kute yi makpe ngatima yi lie, yi mú. Engú bini, li Bu Bhobua teteke yi me yi 'o namene siti 'ngú na paká-a, yi sía mukobho. <sup>14</sup> Padhá de, anga ndū okpála hana inde ngadhuku maka li Bua gba Ebhe-e akunda lie, a ko ongisi gba Ebhe.

<sup>15</sup> Bu Bhobua inde li Ebhe aha e pi yi-e nga'o yi bhú bali ade, ani di ngabedhe matá yi ne tsulú ade. A ko mangbo Bua inde ngamene me yi kolo ongisi gba Ebhe. Ka angu gba Bua bhomu-o, ní ti da nagama 'ngú pi Ebhe ne na'i ani me: «Aba, 'Dyi ya!» <sup>16</sup> Bua gba Ebhe-e belegu ngapapa ngae makpe pi ní abhú ní me ní ne ongisi gba Ebhe. <sup>17</sup> Ní ne ongisi gba ani-e na paká. A akunda napa me ní asía obabadha 'ngú inde li Ebhe apa me ni ahá e pi ní-e masia. Ní asía obabadha 'ngú bhomu-o nganí bhú dabili bini ne Yesu Kilisito. Maka ní ngazú likabhu lie bhú dabili bini ne ani-e, ní adú bhadi bhú dabili bini ne ani li bili gba ani na sangu-o

*Sangu inde ní nga'o 'to ní 'to e-o*

<sup>18</sup> Ma ambila na paká me olikabhu ní ngazú e mbia inde-e kpo 'ndji e ne sangu inde li Ebhe ambamba galikpe 'ta e pi ní-e belegu de bini. <sup>19</sup> Padhá de, anga ndū 'he inde li Ebhe abho e hana ngadjeke ne gugumu hana ekpi inde li Ebhe asúno lie mbámbá me okukulu ongisi gba ni-e ngao dho. <sup>20</sup> Padhá de, anga ndū 'he inde li Ebhe abho e hana ati sakpa angu na padhá. A ko de me ohe bhomu-o akunda ngao-o de, a ko mangbo anga Ebhe ato uo sa angu bhomu-o ngae. Engú bini, ohe li Ebhe abho e ti da na'o nga matá 'to e 'to engú bini. <sup>21</sup> Engú ang-o me, ekpi akólo makolo li Ebhe tsía gbégbe bhú bali gba kuo ndū ohe inde ani abho e hana. U kpi matá-a de, u asía sangu maka ongisi gba Ebhe-o.

<sup>22</sup> Ní mbila hana me nayie nani aoo, nakolo pi mbia inde-e, ndū ohe li Ebhe abho e hana-a, ngazú likabhu, u di ngazú tate o maka ele inde li bhú 'bu e nde ngazú ka ezú. <sup>23</sup> Ohe inde li Ebhe abho

e bha bini ngazú likabhu kpi e kpi ade, abana nganí okpála inde asía Bu Bhobua maka gina 'he inde li Ebhe aha e pi ní-e, ní di ngazú likabhu. Ní ngazú likabhu ali bua ní nedhinga ní ngadjeke lie me Ebhe mene me ní kolo ongisi gba ni, amba ani gbegbe la di ní libhomu bhú bali. <sup>24</sup> Ebhe akobho nani ní akobho, ní u nga la sangu ang-o de, ní bha nga'o 'to ní toto. Li ní dū au ongú inde ní nga'o 'to ní 'to e ne djila ní-e, a bhomu-o matá na'o 'to o 'to 'ngú de, anga a nde sakpa ní. Padhá de, anga kpála 'o'o 'to e 'to ehe inde ani au e ne djila e au-o de. <sup>25</sup> Engú bini, i dū me ní nde u nga ehe inde ní nga'o 'to ní 'to e de-e, ní dū nadjedjeke ne 'ndjá bua.

<sup>26</sup> Engú koko di ngae inde, Bu Bhobua ngateteke ní li kpadji gba Ebhe-o, anga angu nde bhú ní ade. Padhá de, anga ní mbila nayo Ebhe li lelele de. Bu Bhobua mangbo ngayo Ebhe mada ní ngae makpe. Ani ngayo Ebhe ne bua e hana da napa me u ti da napapa ne ebhe de. <sup>27</sup> Ebhe mbila ndū 'ngú hana inde bhú kpála. Ani ngambila di engú inde li Bu Bhobua ngakunda napa e hana. Padhá de, anga Bu Bhobua ngayo Ebhe mada omaha Ebhe maka li Ebhe akunda lie ngae.

<sup>28</sup> Ní mbila hana me ndū 'ngú li Bu Bhobua ngamene e hana-a, ani ngamemene ngubula me okpála bhende ne mukunda pi Ebhe-e sia bádha 'ngú. A ko okpála inde li Ebhe a'i nani o me u mene engú inde ni akunda e. <sup>29</sup> Padhá de, anga Ebhe abhu nani uo kalanu, ani atsia apa di kalanu me ni améne me u kolo maka Ndili gba ni, ngubula me Ndili gba ni-e dū ne gina 'zu bhú ká ongisi bhelé. <sup>30</sup> Obhe li Ebhe amene engú bhomu-o pi o-o, ani a'i di uo. Obhe ani a'i o-o, ani amene di me u kolo bhú djila ni okpála na ngbingbili . Obhe ani amene me u kolo bhú djila ni okpála na ngbingbili-e, ani amene di me u sia sangu gba ni-o.

*Ehe bini gbó bhusu ní ne mukunda li Ebhe nde ne e pi ní-e de*

<sup>31</sup> Nakpata ndū 'ngú bhomu-o hana-a, ya ti da nabu tata-a me: «Li Ebhe nde

lie pi ní-e, kpála bini ti da naha angu ní de.»<sup>32</sup> Ngaani Ebhe-e, ani gili Ndili gba e makpe pi ní de. Ani apu ani ngu napa me ani go kpi pi ndu ní hana. Maka ani apu Ndili gba e lie pi ní-e, ani ahá di ondu 'he koko-o hana pi ní bhú bádha bhú 'bu gba e-o.<sup>33</sup> Kpála bini ne engú napa mapa li okpála li Ebhe abhu o ade. Padhá de, anga Ebhe ngae makpe au uo me u bhú djila ni ngbingbili.

<sup>34</sup> Kpála bini ti da na'o 'ngú pí okpála li Ebhe abhu o de. Padhá de, anga Yesu Kilisito ngae makpe akpi pi ní. Pépé-e, ani azuku, ani ali li pá 'kpa na kokpa gba Ebhe. Ani di ngayo Ebhe ngabula ní.<sup>35</sup> A ti da nagbo bhusu ní ne mukunda li Yesu Kilisito nde ne e pi ní-e da? Abana ní du bhú likabhu, abana ní du bhú kpéke da 'ngú, abana li okpála du nato mbolo li ní, abana ní du bhú ndibhili, abana li kpéke 'ngú du nago ngu ní, abana li okpála du nakodho ngulu ní, abana li gumu du namene ní, ehe bini inde ayoko mukunda li Yesu Kilisito nde ne e pi ní-e belegu ade bini.<sup>36</sup> A maka u aye lie bhú bhuku gba Ebhe-e me:

«Okpála ngagili ndu 'kpi hana me o bhelo ya

kabula 'ngú gba mu-o.

Okpála ngau ya mugito me

ya ne okandelo inde u adjí abhili o.†»

<sup>37</sup> La bhú ndu 'ngú bhomu-o hana-a, ya ngaha angu ndu ongu bhomu-o hana ka angu gba kpála inde ne mukunda pi ya-o.<sup>38</sup> Padhá de, anga ma ambila na paká me ehe bini inde agbo bhusu ní ne mukunda li Yesu Kilisito nde ne e pi ní-e ade. Abana i du me ní nde bhú mukobho, abana i du me ní nde amu, a viti bha bini. Abana i du oandjelu, abana i du di ongu na biti, abana ongu na naki, abana ongu inde ngago, bini bhú káká-a gbó bhusu ní ne mukunda gba Yesu Kilisito de.<sup>39</sup> Abana i du ohe inde ngadu abhúla, abana ohe bhende ngadu asa doto, abana ndu ohe koko hana inde li Ebhe abho e, ehe bini ade inde i ti da nagbo bhusu ní

ne mukunda inde li Ebhe nde ne e pi ní li kpadji gba Yesu Kilisito, Ngamá gba ní-o.

## 9

*Ebhe ngamene ndu 'ngú hana bhú ngu e*

<sup>1</sup> Ma ne kpála gba Yesu Kilisito ! Engú ma adjí apa e inde-e, a ko kukulu 'ngú, ma pa eu de. Bu Bhobua ngasuno muma me 'li ma-a, a ko paká, bua nakpokpo kú 'ngú gba ma la bhadi ngaziziba moko me a ko paká.<sup>2</sup> A ko paká me bua ma ne likabhu naali, likabhu inde li bua ma-a ndjindjia di-i de.<sup>3</sup> Li kpadji dú uu-o, ngama makpe, ma de ayó me Ebhe tu pedje li ma, amba ani gbo bhusu ya ne Yesu Kilisito i du me a nde ti da nateteke ondaise ma omaYuda u-o, anga a ko ondaise ma na piga.<sup>4</sup> A ko okpála na piga gba Isalaele. Ebhe abhu uo me u kolo ongisi gba ni, ani aha pi uo me u u sangu gba ni-o, ani akodho gandja ne uo bhutsibhutsi, ani aha líli gba e pi uo, ani asuno lele nayo pi uo, ani apa me ni améne obabadha 'ngú pi uo.<sup>5</sup> A ko odi Abalahama ne ongisi gba e-o. La di-e Yesu Kilisito ngae makpe li pápá na kute-e, a ko kpála na piga gba uo. Ngaani, a ko Ebhe inde pí 'ndji ndu 'he hana-o. A ayo me okpála toko ani duduma ne duduma. A adu moko.

<sup>6</sup> Ma pa de me engú li Ebhe apa me ni améne e, aneke de. Ní mbila hana me a ko de me ndu odi Isalaele hana bha ne ongisi gba ani makpe-e de.<sup>7</sup> La di-e, ndu odi Abalahama hana bha ne ndu ongisi gba ani makpe ade. Padhá de, anga Ebhe apa pi Abalahama me: «Odi mu akoto li kpadji gba Isaka.†»<sup>8</sup> A akunda napa me ndu ongisi li Abalahama azu o hana ne ongisi gba Ebhe ade. Pi Ebhe-e, kukulu odi Abalahama bha bini ne ongisi inde ani azu o nakpata lele maka li Ebhe apa nani lie me ni ahá pi ani-o.<sup>9</sup> Padhá de, anga Ebhe apa nani engú na ongisi ango-o pi ani me: «Bhú kalanga na sidi-e, bhú ngua onedhinga inde-e, ma agie matá lima, ma abháka me Sala nde azu ndili na bhobhoko.†»

† 8:36 8:36 Tsia bhú Ets. 44:23. † 9:7 9:7 Tsia bhú Dje. 21:12. † 9:9 9:9 Tsia bhú Dje. 18:10-14.



<sup>10</sup> A viti bhadi bini ne bhe gba Lebeka-o. Ndu ongisi gba ani-e bhisi hana, koli 'dyi uo bha bini, ogbi ní Isaka. <sup>11-12</sup> La-a, kala napa me u zu uo-o, Ebhe apa me: «Bhebhele-e adú kpála na kulu gba ndindili-o.†» Ebhe apa 'ngú bhomu-o kala me saka uo mene bádha 'ngú, i du di-e siti 'ngú. Lebeka nde zu nga uo de. Ebhe amene mo-o ngú nasuno me ni memene bha bini engú maka ni akunda lie. Ani ngabhú okpála bha bhú ngu e. Ani tsia de me kpála ango-o amene bádha 'ngú ne me ani amene siti 'ngú-o de. <sup>13</sup> A maka u aye lie bhú bhuku gba Ebhe-e me Ebhe apa me:

«Ma ne mukunda pi Yakobho, ma ayala Esau.†»

<sup>14</sup> I du me a nde mo-o, ní pá me ngbili 'ngú bhú Ebhe adi? Belegu de bini!

<sup>15</sup> Padhá de, anga Ebhe apa pi Moidje me: «Ma kunda namene bádha 'ngú pi kpála-a,

ma méne.

I du di me ma nde akunda nadge ndjinga kpála-a,

ma djé.†»

<sup>16</sup> Bhobhomu-o akunda napa me, li Ebhe mene bádha 'ngú pi kpála-a, ani amene bha pi ani anga ani adje ndjinga ani. A ko de me ani amene pi ani anga kpála ango-o akunda ngae, ne me ani amene tété kulu-o de. <sup>17</sup> A maka engú inde ani apa nani e bhú Bhuku gba e pi 'ngbé ngámá na Edjipito me: «Ma a'o mu 'ngbé ngámá ngubula me ngama Ebhe-e ma pana angu gba ma bhú mu, di ne ngubula me ndu okpála na píla doto libhomu mbila me ma ne da-ie.†» <sup>18</sup> Kaka-a, ní ngau me li Ebhe kunda nadge ndjinga kpála-a, ani djé, ani kunda nato kpéke 'ndji bhú 'ndji kpála-a, ani tó.

### *Ní ti da nadjidji 'ngú sa 'li Ebhe de*

<sup>19</sup> Nedhinga koko-o, kpála bini ti da nayi ma me: «Li Ebhe dú nabhu okpála maka ani akunda lie, ka ni ani nde lie nga'o 'ngú pí okpála, u nde bha ngamene bhomu-o bhende ani akata uo me u mene

e?» <sup>20</sup> Ngamu kpála inde ngayi ma mo-o, mu ne da ngú nadjidji 'ngú sa 'li Ebhe? Madakpa ti da nayi kpála inde apo ani-e uu me: «Mo omene ma me-e ka ni?» Belegu de bini!† <sup>21</sup> Bhulu napo lusa ti da namene engú inde ani akunda e ne doto na lusa-a hana. Ani ti da nagbo bhusu doto na lusa-a bhisi. Ani há bhe bini-e, ani méne tété lusa na kpéke mase, ani há bhe koko-o, ani méne tété lusa u amemene kulu ne e ndu 'kpí hana.

<sup>22</sup> Li Ebhe kunda nadu maka bhulu napo lusa-a, naamu bhúbhú ne ni? Ani amene mo-o ngubula nasuno ke 'ngú gba e, di ne me a bhú ni ne angu. La-a, ani akibila nani ne 'ndjá bua okpála inde a ayo nani me u sia ke 'ngú gba ani-o, inde adu nako masikpe de napa me ani bhili o-o. <sup>23</sup> Ebhe amene mo-o ngubula me okpála mbila me sangu abedhe bhú ni bedhe pi okpála inde ni nde ne ndjinga pi o-o. Ani aleke uo kalanu me u sia sangu gba ni-o. <sup>24</sup> Ní di ne okpála inde ani a'i o pi e. Ani bhú bha bini okpála ani a'i o pi e bhú ká omaYuda de, ani abhu di uo bhú ká opiga inde ne omaYuda ade-e uu. <sup>25</sup> A bhomu-o engú ani apa e bhú bhuku gba polofeta Oze me:

«Okpála inde nani i du okpála ka ma de-e, ma a'í uo me a ko okpála ka ma.

Okpála inde nani ma du ne mukunda pi o de-e,

ma apá me ma ne mukunda pi uo.†

<sup>26</sup> Li bili nako ma apa pi uo lie me:

<Ngayi-e, yi ne okpála ka ma ade-e>,

bha li bili bini bhomu-o, ma apá pi uo me:

<Yi ne ongisi gba ma, Ebhe na mukobho-o.†>>

<sup>27</sup> La pi okpála na Isalaele-e, polofeta Isaya agama di 'ngú li 'ngú gba uo-o. Ani atsia apa me: «Abana li omaIsalaele du bha bhelé maka sike abhú 'ngbé 'ngu-o, yi mbila me obhe li Ebhe akóbho o-o bhelé ade. <sup>28</sup> Padhá de, anga engú li Ebhe apa me ni améne e píla doto-o, ani améne bha hana má kpekobhe! Ani améne la di má

† 9:11-12 9:11-12 Tsia bhú Dje. 25:23. † 9:13 9:13 Tsia bhú Mal. 1:2-3. † 9:15 9:15 Tsia bhú Eki. 33:19.

† 9:17 9:17 Tsia bhú Eki. 9:16. † 9:20 9:20 Tsia bhú Isa. 29:16, 45:9. † 9:25 9:25 Tsia bhú Oz. 2:25. † 9:26

9:26 Tsia bhú Oz. 2:1. † 9:28 9:28 Tsia bhú Isa. 10:22-23.

gala!†» <sup>29</sup> A di maka polofeta Isaya apa matá nani lie me:  
«Li Ebhe Ngámá Apí 'Kpí bhíli nani  
ongisi gba ní-e hana-a,  
ní de andjulu maka okpála na Sodomo ne  
Gomolo  
andjulu nani lie-o.†»

*Okpála koko bhú ká omaɬsalaele  
bhuka de*

<sup>30</sup> I dɛ mo-o, ní ti da nabu tata pi? Engú inde ya akunda nabu tata ne e ngae inde, okpála inde bhú piga gba omaɬsalaele ade-e, gili nako nadu ngbingbili kala Ebhe de. La-a, Ebhe au uo me a ko okpála na ngbingbili bhú djila e ka u abhuka ni lie-o. <sup>31</sup> La-a, okpála na Isalaele inde adu agili me o kolo ngbingbili bhú djila Ebhe li kpadji namene líli-e, kolo nedi ali soso de. <sup>32</sup> U kolo nedi ali soso de ka ní? U kolo de, anga u adu abhundja me o kólo ngbingbili bhú djila Ebhe ka okulu gba o-o. U dɛ abhuka de me kpála ngakolo ngbingbili bhú djila Ebhe ka nabhuka gba e de. U atsia ado 'dhu o li teme inde ngagbo 'i kpála-o. <sup>33</sup> Bhuku gba Ebhe-e ngapa 'ngú na teme ango-o me:  
«Yi gbo 'dje yi!

Ma nga'o bhú gudhu na Siona teme  
bini inde  
li okpála ngado 'dhu o lie.

A ko teme inde ngagbo 'i kpála.  
La-a, kpála abhuka ani-e,  
ani dji 'ngbu e li ani 'kpí bini de.†»

## 10

<sup>1</sup> Ondaise ma, engú inde ma ngakunda e ne bua ma hana-a, a ko me omaɬsalaele sia mukobho. Ma ngayo Ebhe pi uo ngánga. <sup>2</sup> Ma au me u akunda namene kulu lio pi Ebhe na paká. Engú bini, u mbila kpadji ango-o de. <sup>3</sup> U mbila kpadji li Ebhe ngau kpála li e bhú djila e ngbingbili-e de. U agili nade kpadji bhe gba o ngao makpe. Kaka-a, u ayala nakpata kpadji li Ebhe ngau kpála li e bhú djila e ngbingbili-o. <sup>4</sup> Padhá de, anga li

Yesu Kilisito ago lie, ani andjia angu líli gba Moidje-o . Ani amene mo-o ngubula me ndu okpála hana inde abhuka ni-e kolo ngbingbili bhú djila Ebhe.

*Ebhe ngakobho ndu okpála hana inde  
abhuka Yesu*

<sup>5</sup> Moidje aye engú pindji lele maka li Ebhe ngau okpála lie bhú djila e ngbingbili ka nakpata líli-o. Ani me: «Kpála inde akpáta ndu líli-e hana-a, adu bhadi bhú mukobho kaka.†» <sup>6</sup> Engú bini, u papa pindji lele maka li Ebhe ngau okpála lie bhú djila e ngbingbili ka nabhuka me: «Mo opá li bua mu de me: «A a'ú abhúlá da?†»» Padhá de, anga li mu pa mo-o, a akunda napa me, mu ngayi li bua mu me: «A a'ú abhúlá da ngú napa pi Yesu Kilisito me ani go bhaka ní kuto ei.» <sup>7</sup> Mo opá di li bua mu de me: «A aké asatə da?» Padhá de, anga li mu pa mo-o, a akunda napa me, mu ngayi li bua mu me: «A aké asatə da ngú nagbegbe Yesu Kilisito bhú ká okpála inde amu-o?†» <sup>8</sup> Bhuku gba Ebhe-e apa mangbo me:  
«'Li Ebhe dengo mu masikpe.

A bhú 'bhə mu, a di li bua mu.†»  
Engú ya ngakpokpo e-e, a pindji eli bhomu, a ayo me okpála bhuka eli ango-o. <sup>9</sup> Li mu pa ne 'bhə mu kala ndu okpála hana me Yesu ne Ngámá-a, li mu bhuka di ne bua bini me Ebhe azuku ani bhú ká okpála inde amu-o, Ebhe kóbho mu. <sup>10</sup> Padhá de, anga ní bhuka Yesu Kilisito li bua ní-e, ní kólo ngbingbili bhú djila Ebhe. Ní pa ne 'bhə ní mbámbá me Yesu Kilisito ne Ngámá-a, Ebhe kóbho ní. <sup>11</sup> A maka u aye lie bhú Bhuku gba Ebhe-e me: «Ndu okpála hana inde abhuka ani-e, ani dji 'ngbu e li uo 'kpí bini de.†» <sup>12</sup> Ka 'ngú ango-o, abana omaYuda, abana di okpála bhende ne omaYuda ade-e, u viti bha bini. Koli Ngámá gba uo bha bini. Ani ngaha obabadha 'ngú gba e bhelé pi ndu okpála hana inde ngayo ka ani me ani teteke o-o. <sup>13</sup> A maka u aye lie bhú Bhuku gba Ebhe-e me: «Ndu okpála hana inde ayó ka Ebhe

† 9:29 9:29 Tsia bhú Isa. 1:9. † 9:33 9:33 Tsia bhú Isa. 8:14-15, 28:16. † 10:5 10:5 Tsia bhú Lev. 18:5.  
† 10:6 10:6 Tsia bhú Det. 30:13. † 10:7 10:7 Tsia bhú Det. 30:13. † 10:8 10:8 Tsia bhú Det. 30:14. † 10:11  
10:11 Tsia bhú Isa. 28:16. † 10:13 10:13 Tsia bhú Djl. 3:5.

Ngámá me ani teteke o-o, ani akóbho uo makobho.†»

14 A moko. Engú bini, li okpála bhuka ani de-e, u ayó ani lele pí? Li okpála dje engú gba ani-e de-e, u abhúka ani lele pí? Li kpála kpokpo 'ngú gba ani-e de-e, okpála adjé engú gba ani-e lele pí? 15 Li ani tima okpála de-e, u anú nakpokpo 'ngú gba ani-e lele pí? U aye di bhú Bhuku gba ani-e me: «Tsitsia nga, a ko djali nau okpála inde ngakpokpo obabadha ngali-e nago ne kpokpokpo!†» 16 Engú bini, a ko de me ndu okpála hana abhuka Bádha Ngali-e de. Padhá de, anga Isaya ayi nani belegu me: «Ngámá, a abhuka ngali ya akpokpo e pí okpála da?†» 17 Ní mbila me, kpála ngabhuka nedhinga inde ani adje ngali lie-o. Ngali bhomu-o, a ko bhende ngalu pí 'li Yesu Kilisito-o.

18 † Nde lie mo-o, ma ngayi me, a akúnda napa me omaYuda dje nga ngali bhomu-o di? A mo-o ade, u adje! Bhuku gba Ebhe-e ngapa me:

«Ngbikpi ne sukpe u ngakpokpo 'li Ebhe ne ndu bilí hana píla doto.

'Li uo akolo ne li ndu 'dje doto badha hana.†»

19 Ma ngayi matá engú bini, okpála na Isalaele kə mboli engú u adje e di? A mo-o ade, u akə mbolimboli akə! Ngaiza kalanu-o, Moidje apa nani me:

«Ebhe apa me:

<Ma améne engú da napa me ngayi okpála gba ma-a yi kolo ne siti bua pí okpála inde ne okpála gba ma ade-o.

Ma améne engú da napa me yi kolo ne ke 'ngú pí opiga inde li imbilangú

nde bhú 'ndji o ade-o.†»

20 Pipita-a, polofeta Isaya apa belegu me: «Ebhe apa me:

<Okpála inde i du agili ma de-e, au ma.

Ma asuno lima pí okpála inde

i du ayo ma de-o.†»

21 La li 'ngú gba omaIsalaele-e, Ebhe apa me:

«Ekpí libhomu, ma ato 'kpa ma pí omaha ma me u gogo,

engú bini, u amene kpéke 'ndji,

u ayala engú inde ma adu napa e-o.†»

## 11

### *Ebhe ne ndjinga pí omaIsalaele*

1 Ma ngayi me, i nde lie mo-o, Ebhe abala omaha e abala? A mo-o ade! Padhá de, anga ngama makpe-e, ma ne maIsalaele. Abalahama ne ogbi ma, u azu ma bhú piga gba Bendjame. 2 Ebhe bala omaha e inde ani abhu nani o pí e bhutode-e de. Yi mbila engú inde li Bhuku gba Ebhe apa e hana li bilí inde li polofeta Eliya adu alopola lie lie kala Ebhe li 'ngú gba okpála na Isalaele-o. 3 Eliya adu alopola lie me: «Ngámá, u abhili opolofeta gba mu-o. U atsia agugumu di odabili inde ya tsutsulu 'he pí mu pí e-o. Ma atigala bha koli ma kpi ma kpi. U la bhadi ngagili nabhəle ma.†»

4 Ebhe atsia agie pí ani pí? Ebhe agie pí ani me: «A mo-o ade, mu kpi mu kpi ade. Ma alila okpála kətə mananika pí ma makpe. U tutu lipaku o kala Bala inde li okpála ngau e maka Ebhe-e de.†»

5 Bhú okpí na naki inde-e, a bhadi moko. Dú omaIsalaele koko atigala, inde li Ebhe abhu o pí e ka bádha bhú 'bu gba e-o.

6 Ani bhú uo ka babadha okulu gba uo de, ani abhu uo ka bádha bhú 'bu gba e-o. Li Ebhe bhú uo ka obabadha okulu gba uo-o, ní de apá me bádha bhú 'bu gba ani-e, a ko bádha bhú 'bu de.

7 Bhobhomu-o akúnda napa me okpála na Isalaele sia ehe inde u adu nagili e de. Okpála bini bini bhú ká uo inde li Ebhe abhu o-o asia ehe inde u adu nagili e bha bini ngao. La pí okpála koko-o, Ebhe ato kpéke 'ndji bhú uo. 8 A maka u aye lie bhú Bhuku gba Ebhe-e me:

«Ebhe amene me u aké mboli 'ngú bini de.

Ani ani djila uo me u aú kpí de.

† 10:15 10:15 Tsia bhú Isa. 52:7. † 10:16 10:16 Tsia bhú Isa. 53:1. † 10:18 10:18 Tsia bhú Ets. 19:5. † 10:19 10:19 Tsia bhú Det. 32:21. † 10:20 10:20 Tsia bhú Isa. 65:1. † 10:21 10:21 Tsia bhú Isa. 65:1-2. † 11:3 11:3 Tsia bhú 1 Ong. 19:10, 14. † 11:4 11:4 Tsia bhú 1 Ong. 19:18. † 11:8 11:8 Tsia bhú Det. 29:3; di ne bhú Isa. 6:10, 29:10.

Ani atsia abuku di 'dje uo me u adjé 'kpí de nakolo pí naki.†»

<sup>9</sup> Davidi atɔ di nani 'kpa e li uo me:

«Oanokomia gba uo dɔ pí uo maka ekú, a adú pí uo maka ndjukudu li kpadji, amba u sia mbini kulu inde u ngamene e-o.

<sup>10</sup> A ayo me Ebhe dɔdɔ djila uo me u aú 'kpí de.

A ayo me Ebhe ha likabhu pí uo, me 'ngbɔ uo kodho.†»

<sup>11</sup> Ma atsia ayi matá me, li okpála na Isalaele ati lie, u ati bha na paká-a? A mo-o ade! Engú bini, ka u ati lie, okpála inde ne omaɟsalaele ade atsia asia mukobho. Ebhe amene mo-o ngubula napa me omaɟsalaele dɔ ne siti bua li okpála inde ne omaɟsalaele ade-o. <sup>12</sup> Li omaɟsalaele amene siti 'ngú lie, Ebhe amene bádha 'ngú pí ndɔ okpála na doto hana. Li omaɟsalaele ati lie, Ebhe aha tia pí okpála inde ne omaɟsalaele ade-o. † dɔ me Ebhe nde amene bádha 'ngú pí ndɔ okpála na doto hana nedhinga inde li omaɟsalaele andjo 'li ani lie, ani améne la matá bádha 'ngú pí uo ane mane, nedhinga li ndɔ omaɟsalaele hana agie lio lie li pápá gba ani-o.

*Lele maka li Ebhe akobho okpála inde ne omaYuda ade-e lie-o*

<sup>13</sup> Mbia inde-e, ma ngagama 'ngú inde-e pí yi okpála inde ne omaYuda ade-o. Ma ne bhulɔ titima inde li Ebhe atima e pí okpála inde ne omaYuda ade-o. Kaka-a, ma ngau kulu inde li Ebhe aha e mɔma ne tata. <sup>14</sup> Ka ma ngau kulu ango-o lie ne tata-a, ma abhundja me okpála na piga gba ma-a adjé siti bua li ma tété, li Ebhe tsia kóbho di bini bini bhú ká uo. <sup>15</sup> Li Ebhe abala omaYuda lie, okpála na opiga koko atsia apo bhúla o de ani. Li Ebhe ató guo 'ngú sɔnda o ne omaYuda lie, adú djali na ngbéngbé. A adú maka kpála inde akoto bhú kuo, ani atsia agie lie bhú mukobho!

<sup>16</sup> † dɔ me u nde aha ndu mapa na kalanɔ-o pí Ebhe-e, a akɔnda napa me mapa bhomɔ-o libhomu ne naani. Li u ha sie ndula pí Ebhe-e, a akɔnda napa

me oyáyá-a hana di ne naani. <sup>17</sup> Okpála na Isalaele maka 'lá ndula na olive. Ebhe ava oyáyá bini bini. Ani atsia ato yi, opiga koko inde ne omaYuda ade-e, bhú da oyáyá bhomɔ-o. Obabadha ohe inde li omaYuda adɔ asia e-e, ngayi omatobhukayi-e, yi di ngasisia maka li oyá ndula asisia angu lie ka sie e-o.

<sup>18</sup> Kaka-a, a ayo de me yi u okpála inde maka oyá ndula inde u ava e padhá-a de. Yi nga'o liyi ne bhúlá ka ni? Sie ndula-a dha bhú yá e de, yá ndula adha mangbo bhú sie ndula ko. <sup>19</sup> Eu ade, Mɔ ti da napa me: «Ebhe ava nani oyáyá bhomɔ-o ngubula napa me, ngama-a, ani to ma mada uo-o.» <sup>20</sup> A ko paká me, Ebhe ava nani uo anga u bhuka nani ani de. Mo osia dabili bhomɔ-o anga mo obhuka ani. Engú bini, mo o'ó limɔ kaka abhúlá naali de. Dɔ mangbo ne tsulɔ Ebhe. <sup>21</sup> Padhá de, anga Ebhe va nani omaYuda padhá de, a asi la masi maka mɔ. OmaYuda la nani ne okukulɔ oyá ndula na olive ngao. Mɔ lila limɔ de-e, Ebhe akódho bhadi mɔ maka ani ava uo lie-o. <sup>22</sup> Mbila me Ebhe babadha, ani la di ngakodho 'ngú gba okpála ngbingbili. Ani ngakodho 'ngú gba okpála bhende nga'o ká kpadji gba ani-o. Ani la babadha li pápá gba mɔ-o. La-a, a ayo me nɔ bha li kpadji gba ani-e ne kalanɔ. † dɔ mo-o de-e, ani akódho di mɔ maka ani ava oyá ndula koko lie-o.

<sup>23</sup> La pí omaYuda-a, † dɔ me u nde a'o kpéke 'ndji gba o-o, Ebhe gie matá uo li bili u adɔ nako lie-o. Padhá de, anga Ebhe ne angu ngú nagie uo matá bhú da o ne toto. <sup>24</sup> Ngayi okpála inde ne omaYuda ade-e, yi maka oyá ndula na olive inde u lu e malu de. Ebhe atsia ava yi, ani ago a'o yi li kute 'lá olive bhende u alu e malu. U memene la mo-o de. La pí omaYuda-a, uo maka oyá ndula na olive bhe u a lu e malu. Kaka-a, dá napa me Ebhe gie uo bhú dá o-o kpekpeke ade.

*Ndjinga gba Ebhe-e pí ndɔ okpála hana*

<sup>25</sup> Ondaise ma, ma akɔnda me yi mbila engú inde li Ebhe awo e mawo-o, ngubula me yi aú liyi mugito de me yi ne obhulɔ

† 11:10 11:9-10 Tsia bhú Ets. 69:23-24.

imbilangu-o de. Yi mbila me té okpála na fsalaele adú nagbe kpéke 'ndji li 'ngú gba Ebhe-o, nakolo li 'kpí inde li ndu okpála inde ne omaYuda ade-e hana agie lió lie agba Ebhe-o. <sup>26</sup> Abhomu-o li 'kpí angoo, li omafsalaele hana tsia kóbho maka li Bhuku gba Ebhe-e apa lie me:

«Kpála inde akóbho okpála ayie bhú Siona .

Ani a'é osisiti 'ngú gba odi Yakobho.

<sup>27</sup> A bhomu-o gandja inde ya akódho e ne uo-o,

nedhinga ma a'é osisiti 'ngú gba uo lie-o.†»

<sup>28</sup> Li ní tsia maka li omaYuda ayala Bádha Ngali-e lie, a ko obhulu yala gba Ebhe. Engú bhomu-o amene lie lie mo-o, ngayi okpála inde ne omaYuda ade-e, yi atsia asia bádha 'ngú gba Ebhe-o. Engú bini, ní tsia maka li Ebhe abhu uo lie me u du bhú ngu ni-e, Ebhe ndu 'kpí hana ne mukunda pi uo ka gandja nani u akodho e ne onguo ogbi uo mo-o. <sup>29</sup> Padhá de, anga li Ebhe ha 'he pi kpála-a, ani gbúlu matá ka ani de. Ani 'i di kpála-a, ani dji matá mabhundja gba e li pabili gba ani-e de. <sup>30</sup> Nani kalanu-o, ngayi di-e, yi andjo 'li Ebhe. Engú bini mbia inde-e, yi ambila ndjinga gba Ebhe anga omaYuda andjo di 'li ani. <sup>31</sup> A bhadi moko. U andjo bhadi 'li Ebhe mbia inde-e ngubula me Ebhe dje ndjinga yi. Ebhe amene mo-o ngubula me ngauo di-e ni dje ndjinga uo mbia inde. <sup>32</sup> Padhá de, anga ka li ndu okpála hana andjo 'li Ebhe lie, u akolo maka obhulu tikpu. Ebhe amene mo-o ngubula me ni dje ndjinga ndu uo hana.

### *Ebhe ngbéngbé ane ndu 'he hana*

<sup>33</sup> A na paká me bádha bhú 'bu gba Ebhe ane ne engbé mane! Imbilangu gba ani-e ane ndu 'ngú hana! Ani mbila ndu 'ngú hana! Engú inde ani ngabhundja e li bua e, kpála bini ti da nakpokpo kúkú de. Kpála bini ti da naké mboli okpadji gba ani-e de. <sup>34</sup> A maka u aye lie bhú Bhuku gba ani-e me:

«Kpála bini mbila mabhundja gba Ebhe Ngámá-a de.

Kpála bini ade inde i ti da nakpokpo pi Ebhe

lele engú inde ayo me ani mene e-o.†

<sup>35</sup> Kpála bini ade inde akpo naha 'he pi Ebhe

ngubula napa me ani du adjeke

me Ebhe gie pi ni-o.†»

<sup>36</sup> Padhá de, anga ani abho ndu 'he hana ngae. Ani ngamene me ndu 'he ni abho e hana du bhú mukobho. Ndundu hana ngagie lie agba ani. A ayo me okpála dhogö Ebhe duduma ne duduma! A adu moko.

## 12

### *Ebhe aha kulu pi okpála kpikpikpi*

<sup>1</sup> Ondaise ma, i nde lie me Ebhe nde adje ndjinga ní mo-o, ma ayo ka yi me yi ha liyi ngayi makpe pi Ebhe maka makiso inde na uu. Yi du libhomu pi ani ngú nanga li ani. Pi yi-e, a bhomu-o kukulu lele nadhogö Ebhe-o. <sup>2</sup> Yi adú amene 'he maka okpála na doto inde-e de. Yi 'o mangbo me Ebhe dji yi, amba ani ha pi yi imbilangu na mbia. Yi mene mo-o, yi tsia mbila me Ebhe akunda ni i-e. A akunda napa me yi ambila engú inde na babadha, engú inde anga li ani, engú inde li kpadji.

<sup>3</sup> Kabula kulu inde li Ebhe aha e muma ka bádha bhú 'bu gba e-e, ma ngapa pi ndu yi hana me: yi aú liyi ne bhúlá nane mane de. Yi mbila mangbo lele yi makpe, maka yi nde lie-o. Yi tsia lele nabhuka li Ebhe aha e pi yi ngú nambila me da yi ngae dho-ie. <sup>4</sup> Koli 'lá kpála bha bini, engú bini oyáyá tété bhelé inde ngamene okulu kpikpikpi. <sup>5</sup> A viti bhadi pi ní bini. Abana ní nde lie bhelé-e, ní akolo koli kpála bini bhú nakpotse liní ne Yesu Kilisito-o . Ní atsia akpotse liní maka oyá kpála-kuti akpotse lie lie-o.

<sup>6</sup> Ebhe aha pi ní oangu ngangá ngú namene kulu nedi. Ani aha pi ní padhá bhú bádha bhú 'bu gba e, li lele maka anga li bua ani lie-o. Kaka-a, li suka ní sia angu nakpokpo eli inde ayie ka Ebhe-e, a ayo me, ani kpokpo nakpata lele nabhuka gba e-o. <sup>7</sup> Li Ebhe ha pi kpála koko angu

† 11:27 11:26-27 Tsia bhú Isa. 59:20-21, 27:9. † 11:34 11:34 Tsia bhú Isa. 40:13. † 11:35 11:34-35 Tsia bhú Isa. 40:13; di ne bhú Dj. 41:3.

nateteke obi e, a ayo me ani teteke uo. Li Ebhe ha pi koko angu nasuno 'ngú pi okpála koko-o, a ayo me ani suno. <sup>8</sup> Li Ebhe ha pi kpála koko angu nato masi bhú obi e-e, a ayo me ani to masi bhú uo. Li Ebhe ha pi kpála koko angu napu 'he pi obi e-e, a ayo me ani pu ne bua e hana. Li Ebhe ha pi kpála koko angu nau pí 'ndji obi e-e, a ayo me ani mene kulu ango-o ne bádha bua. Li Ebhe ha pi kpála koko angu nateteke obhulu ndibhili-e, a ayo me ani mene ne djali.

### *Lele nakobho gba omabhuka*

<sup>9</sup> Yi du ne mukunda pi ndu okpála hana ne bua bini. Yi adú apa 'ngú na mukunda bha ne 'bhø yi de. Yi yala siti 'ngú, yi dhedhe li bádha 'ngú. <sup>10</sup> Yi du ne mukunda sunda yi maka a ayo lie me ondaise du ne mukunda sunda o. Yi du ne mazima sunda yi na paká paká. <sup>11</sup> Yi ha liyi pi kulu ne angu yi hana. Yi adú ne obhulu ipio de. Yi mene kulu liyi pi Ngámá ne bua yi hana. <sup>12</sup> Yi du bhú djali kabula yi nga'o 'to yi lie 'to ohe li Ebhe apa me ni ahá e pi yi-o. Yi kibila okpekpeke da 'ngú ne 'ndjá bua. Yi ayó Ebhe ne ndala tété de. <sup>13</sup> Yi teteke ondaise yi inde bhú ndibhili-o. Yi sia obhende ngago li yi-e ndjindji.

<sup>14</sup> Yi yo Ebhe me ani tuko bisagu pí okpála bhende ngato mbolo li yi-o. Yi ayó de me Ebhe tu pødjø li uo de. <sup>15</sup> Yi kpi djali bhú dabili bini ne obhende bhú djali-o. Yi ku 'gbá bhú dabili bini ne obhende bhú 'gbá-o. <sup>16</sup> Yi du nadje liyi sunda yi ne obi yi ndjindji. Yi adú ne 'ngbé 'ndji de, engú bini, yi ziba ndu kulu hana inde u ahá e pi yi-o, abana i du bha kulu li okpála ngau e padhá. Yi aú liyi de me ni ambila ndu 'ngú hana-a de.

<sup>17</sup> Yi agie siti pi siti de. Yi le ne kpéke me yi mene bádha 'ngú kala ndu okpála hana. <sup>18</sup> I du li naayi-e, yi mene ne kpéke me yi du bhú guo 'ngú ne ndu okpála hana. <sup>19</sup> Ngayi okpála na mukunda gba ma-a, yi agie siti pi okpála de, yi 'o mangbo me Ebhe gie siti pi uo ngae.

Padhá de, anga Ngámá Ebhe apa bhú Bhuku gba e me:

«Ngama-a, ma agie siti 'ngú li okpála amene e li yi-e ngama.

Ngama makpe,

ma améne uo nakpata lele engú u amene e li yi-o.†»

<sup>20</sup> Engú bini, pi yi-e, yi mene mangbo maka li Bhuku gba Ebhe-e apa lie me:

«I du me a nde li bhulu yala gba mu-o ne gumu-o,

mu de ha ezu pi ani.

I du li ani ne gumu 'ngu-o,

mu de ha engu nandji mandji pi ani.

Padhá de, anga mu mene mo-o, a adú mugito me mu ngabu

ndjekedhe djua na déde pí 'ndji ani.†»

<sup>21</sup> Mo o'ó de me siti 'ngú ha angu ni-e de. Engú bini, ha mangbo angu siti 'ngú ne namene bádha 'ngú.

## 13

### *A ayo me ní manga ongámási ma-manga*

<sup>1</sup> A ayo me ndu yi hana, yi manga ongámási inde pí 'ndji ní-e mamanga. Padhá de, anga ndu okpála hana inde ngau ngámá-a, u au ka Ebhe. Ani a'o okpála inde ngau ngámá-a ngae. <sup>2</sup> Kpála inde ngagbe kpéke 'ndji li ongámási-e ngagbe bhomu-o kpéke 'ndji li líli inde li Ebhe a'o e-o. Okpála inde ngamene mo-o agbéle ke 'ngú gba Ebhe-e pí o makpe. <sup>3</sup> Okpála inde ngamene ngbili 'ngú kpekpe ongámási de, engú bini, a kpekpe mangbo ongámási ne okpála inde ngamene siti 'ngú-o. Kaka-a, li mu kunda me ni adú nakpe ongámási de-e, mene bádha 'ngú ngubula me mu du nanga bhú djila ongámási manga.

<sup>4</sup> A mo-o. Padhá de, anga ongámási ngamene kulu inde li Ebhe aha e pi uo-o ngubula me u teteke yi, amba yi du amene bádha 'ngú. I du la me mu nde ngamene siti 'ngú-o, mu de kpe ongámási makpe! Padhá de, anga angu li Ebhe aha e pi uo-o, ani ha padhá de. Ani aha pi uo, anga ani a'o uo bhú kulu gba e ngú nasuno

† 12:19 12:19 Tsia bhú Det. 32:35. † 12:20 12:20 Tsia bhú Gbt. 25:21, 22.

ke 'ngú gba e pi okpála inde ngamene siti 'ngú. <sup>5</sup> Kaka-a, a ayo me yi manga ongámási mamanga. Yi amánga bha bini uo ka nakpe ke 'ngú gba Ebhe-e de, engú bini, yi manga di uo ka anga yi ambila li bua nakpokpo kú 'ngú gba yi-e ndjindji me, a ko bádha 'ngú.

<sup>6</sup> A di bhomu-o ta 'ngú yi ngakala mandjandja ka e ko. Padhá de, anga Ebhe a'o ondombi na mandjandja ngubula me u mene kulu bhomu-o. <sup>7</sup> Yi ha pi kpála ne kpála ehe inde ati ne ani-o. Yi futa ndu mandjandja hana inde a ayo me yi futa e-o. Yi manga ongámási inde a ayo me yi manga o-o mamanga.

#### *Ndu líli hana agbite lie bhú mukunda*

<sup>8</sup> Yi adú ne bopulu gba kpála bini de. Yi du bha bini ne koli bopulu bini na mukunda inde yi nde ne e sunda yi-o. Kpála inde ne mukunda pi obi e-e, ani amene bhomu-o ndu líli gba Ebhe-e hana má kpekəbhə! <sup>9</sup> Líli gba Ebhe-e apa me: «Mo okúnda ələ, i du di-e bhoko gba kpála koko de, mo obhéle kpála de, mo ozi 'he de, mo odú ne gumu 'he gba kpála koko de.» Olíli bhomu-o ne ndu olíli koko hana agbite lie bhú koli líli bini inde me: «A ayo me kunda kilí mu maka mo okunda limu lie ngamu makpe.†» <sup>10</sup> Kpála inde ne mukunda pi kilí e, ani méne ani sisiti belegu de bini. Kaka-a, mu du ne mukunda pi kilí mu-o, mo omene bhomu-o ndu líli-e hana.

#### *A ayo me ní du bedhe ndu nedhinga hana*

<sup>11</sup> Yi 'o 'ngú bhomu-o li bua yi, anga yi mbila nedhinga ní nde bhú e hana. A inde-e nedhinga ayo lie me yi du li zuku. Nedhinga inde li Ebhe akóbho ní lie akolo masikpe, a matá tsutsu maka nedhinga nani ní abhuka lie ade. <sup>12</sup> Ekpí-e abi abhue, ngbikpi ibili masikpe. Kaka-a, ní adú matá namene engú na biti de. Ní dyi li kute ní otia 'gú inde u agúgu 'gú ne e ne ngbikpi-o. <sup>13</sup> Ní mene 'he liní ndjindji maka okpála inde ngamene 'he ne ngbikpi. Ní adú nadho osisiti 'bi de, ní

adú nalangba ne pandi de. Ní adú nasi ne olisi, i du di-e obhosi ngangá de. Ní adú nagbe bhayiki de, ní adú di ne 'ngbé bua li okpála koko de. <sup>14</sup> Yi dyi mangbo Ngámá Yesu Kilisito li kute yi maka tia 'gú. Yi adú nadhuku maka li kute yi akunda lie de.

## 14

#### *Yi aú okpála koko bhú djila yi padhá de*

<sup>1</sup> Yi sia kpála inde bhəbhuku bhú 'bu nabhuka-o, yi abi bhayiki ne ani pindji engú bhende atsia mabhundja gba ani-e de. <sup>2</sup> Ní ha nga kukulu pindji engú na ezu. Okpála koko ngabhuka me o ti da nazu ndu 'he hana. La-a, okoko inde bhəbhuku bhú nabhuka-a ngabhundja me a ndjindji bha bini ne nazu okpála. <sup>3</sup> A ayo de me kpála bhende ngazu ndu 'he hana-a u kilí e inde i zu mbilika de-e padhá-a de. A ayo di de me kpála bhende i zu mbilika de-e u di bhende ngazu ndu 'he hana-a padhá-a de. Padhá de, anga Ebhe aziba di ani. <sup>4</sup> Ngamu-o, mu ne da ngú nakodho 'ngú gba kpála na kulu gba kpála koko-o? Ngámá na kulu ne angu nakodho 'ngú gba kpála na kulu gba e ngae, abana ani mene babadha, ne me ani ti li kpadji na kulu gba e-o. Ma au la bhadi me ani alú kpekpeke, anga Ngámá Yesu ne angu ngú nali ani me ani atí-i de.

<sup>5</sup> Okpála koko ngabhundja me oekpi koko ane okoko ne tata. La pi okpála koko, ndu 'kpi hana viti bha bini. A ayo me kpála ne kpála kə mboli engú ani ngabhundja e li bua e ndjindji me a ko kukulu 'ngú. <sup>6</sup> Kpála inde ngau ekpi koko ngbéngbé-e, ngadhəgə Ngámá gba ní-o. Kpála inde ngazu ndu 'he hana-a, ngadhəgə di bhomu-o Ngámá gba ní-o. Padhá de, anga ani ngagie heni pi Ebhe pindji ezu inde ani ngazu e-o. Kpála inde i zu ndu 'he hana de-e ngamene mo-o ngú nadhəgə Ngámá gba ní-o. Ani di ngagie heni pi Ebhe pindji ezu inde ani ngazu e-o.

<sup>7</sup> Yi mbila ndjindji me kpála bini ade bhú ká ní inde ngakobho ka e makpe. Kpála bini la di ade inde ngakpi ka e

† 13:9 13:9 Tsia bhú Eki. 20:13-17; ne bhú Det. 5:17-21; di ne bhú Lev. 19:18.

makpe. <sup>8</sup> I du me ní nde bhú mukobho-o, ní ngakobho ngubula me ní toko Ngámá gba ní-o. I du me ní mu di-e, ní amu ngú naha sangu pi Ngámá gba ní-o. Kaka-a, belegu ní du bhú mukobho, belegu ní mu di mamu-o, ndu ní hana, ní ne okpála gba Ngámá Yesu. <sup>9</sup> Padhá de, anga Yesu Kilisito akpi, ani atsia azuku ngubula nadu ngámá gba okpála inde bhú mukobho bhú dabili bini ne obhende amu-o. <sup>10</sup> I nde lie mo-o, ngamu-o, mu ngakodho 'ngú gba ndai mu-o ka ni? Ngamu-o, mu ngau ndai mu bhú djila mu padhá ka ni? Ndu ní hana, ní alú kala Ebhe ngú napa me ani kodho 'ngú gba ní-o. <sup>11</sup> Padhá de, anga Bhuku gba Ebhe-e apa me:

«Ngama Ebhe Ngámá inde mu-o, ma apa pi yi na paká me ndu okpála hana atutu lipaku o kuto kala ma.

Ndu uo hana tsia pá me ma ne Ebhe.†»

<sup>12</sup> Bhobhomu-o akunda napa me kpála ne kpála bhú ká ní akpókpo engú inde ani amene e ngae makpe-e pi Ebhe.

### *Mo otó kilí mu bhú siti 'ngú de*

<sup>13</sup> I nde lie mo-o, yi 'o nakodho 'ngú gba obi yi-e ma'o. Yi 'o mangbo li bua yi me a ayo de me ní mene engú inde li kilí ní asendele ka e de, ngú napa me ani li bhú siti 'ngú-o de. <sup>14</sup> Bhú makpøtø gba ya ne Ngámá Yesu Kilisito-o, ma ambila na paká me ezu na ligina ade. Engú bini, li kpála bini bhundja me ezu inde-e sisiti-e, ezu bhomu-o akolo ligina pi ani. <sup>15</sup> I du me mu nde ngato likabhu li bua ndai mu pindji ezu inde mu ngazu e-e, bhobhomu-o a akunda napa me mu ne mukunda pi ani ade. Kaka-a, lila limu me ni ató kpála inde li Kilisito akpi pi e bhú ngita kabula 'ngú na ezu de. <sup>16</sup> Li ehe du bhú djila mu ndjindji-e, mo oméne de, i du me mu nde au me, li mu mene e li okpála koko pá 'ngú tété sisiti-o.

<sup>17</sup> Padhá de, anga Nau gba Ebhe-e , a ko engú na ezu, i du di-e engú na pandi de. Engú bini, Nau gba Ebhe-e mangbo

ne engú inde atsia kulu li Bu Bhobua ngamene e bhú ní-o. Bu Bhobua ngaha pi ní engú inde ngbingbili, ani ngaha pi ní nadu ne guo 'ngú sunda ní, ne nadu bhú djali. <sup>18</sup> Kpála inde ngamene kulu gba Yesu Kilisito li kpadji bhomu-o nganga li Ebhe ngae. Okpála ngapa di li ani me ani ngamene bádha 'ngú. <sup>19</sup> I nde lie mo-o, a ayo me ní gili namene engú inde ngato guo 'ngú sunda ní, engú inde ngamene me ní teteke liní li kpadji gba Ebhe-o.

<sup>20</sup> Mo obhólø kulu gba Ebhe-e ka engú na ezu de. A na paká me ndu ezu hana ndjindji ngú nazuzu. La-a, a ndjindji ade me ní du nazu 'he inde ngato kpála bhú siti 'ngú-o de. <sup>21</sup> Engú inde ndjindji-e ngae inde: a ayo natse nazu mbilika, a ayo natse nandji pandi, a ayo natse ndu 'he hana inde i ti da nato kilí mu bhú siti 'ngú. <sup>22</sup> Lila engú inde li bua mu ngapa e pi mu pindji engú na ezu di ne bhe na pandi-e pi mu makpe. Mo opá pi kpála koko de, engú angu-o du bha sunda mu ne Ebhe. A ko djali pi kpála inde li bua e yoko e li 'ngú bini de bhú ká ongú inde li bua ani ngatima ani me ani mene e-o. <sup>23</sup> La-a, Ebhe a'ó 'ngú pí kpála inde ngazu 'he inde li bua nakpokpo kú 'ngú gba e ngayoko e li e-o. Padhá de, anga ani ngamene engú inde i lu pí nabhuka de. Yi mbila hana me, ndu 'ngú hana inde li kpála ngamene e me a nde lu pí nabhuka de-e, a ko siti 'ngú.

## 15

### *A ayo me ní mene engú inde nganga li obi ní manga-o*

<sup>1</sup> A ayo me nganí okpála inde alu kpekpeke bhú nabhuka-a , ní teteke di okpála bhende kpekpeke ade-o. A ayo de me ní du bha bini namene engú bhende nganga li ní-e de. <sup>2</sup> A ayo me ní mene engú inde nganga li obi ní ngubula nateteke uo, amba u nu li kpadji gba Ebhe-e ne kalanu. <sup>3</sup> Padhá de, anga Yesu Kilisito ngae makpe gili nani engú inde adu anga lie de. Engú bini, a akolo li ani maka u aye lie bhú

† 14:11 14:11 Tsia bhú Isa. 45:23. † 15:3 15:3 Tsia bhú Ets. 69:10.



Bhuku gba Ebhe-e me: «Okpála asobho m̄, Ebhe, abhom̄-o, sobho ango-o atsia aku li kute ma.†»

<sup>4</sup> Nd̄ ongú hana inde u aye nani e bhú Bhuku gba Ebhe-e , u aye ngubula nasuno pi ní kukul̄ 'ngú, ngú napa me ní d̄ na'o 'to ní 'to Ebhe. Padhá de, anga Bhuku ango-o ngato bhú ní masi, a la di ngaha pi ní nad̄ ne 'ndjá bua. <sup>5</sup> A ayo me Ebhe inde ngato masi bhú okpála-a, inde di ngaha 'ndjá bua pi uo-o mene me yi d̄ ne mabhundja bini, nakpata lele mukobho gba Yesu Kilisito. <sup>6</sup> Abhom̄-o, nd̄ yi hana bhú dabil̄i bini, ne koli eli bini, yi tsia dhéḡo Ebhe, 'Dyi Ngámá gba ní Yesu Kilisito-o.

#### *Nd̄ okpála hana atóko Ebhe*

<sup>7</sup> Kaka-a, yi d̄ nasia liyi s̄nda yi ne bua yi bini maka li Yesu Kilisito asia di yi lie-o. Yi mene mo-o ngubula me okpála dhéḡo Ebhe. <sup>8</sup> Ma apa pi yi na paká me, Yesu Kilisito akolo nani kpála na kulu gba omaYuda, ngubula me ani suno pi uo me Ebhe papa naae eu de. Ani ago nani ngú nabadhe 'bh̄o engú inde li Ebhe apa nani me, ni améne e pi onguo ogbi uo-o. <sup>9</sup> A ayo nani di me okpála inde ne omaYuda ade-e, toko Ebhe kabula ndjinga gba ani-o. A maka u aye lie bhú Bhuku gba Ebhe-e me:

«Kaka-a, ma atóko m̄ bhú ká okpála inde ne omaYuda ade,  
ma alí oetsi pi m̄.†»

<sup>10</sup> Bhuku gba Ebhe-e apa matá di me:

«Ngayi okpála inde ne omaYuda ade-e,  
a ayo me yi kpi djali bhú dabil̄i bini  
ne okpála gba Ebhe-o.†»

<sup>11</sup> A atsia apa matá di li bili koko me:

«Ngayi, nd̄ yi hana okpála inde ne  
omaYuda ade-e,  
a ayo me yi toko Ngámá Ebhe.

A ayo me nd̄ okpála hana toko ani.†»

<sup>12</sup> Polofeta Isaya apa di me:

«Kpála bini akóto bhú piga gba Yese,  
ani agó ngubula nau ngámá pí 'ndj̄i  
okpála inde ne omaYuda ade-o.

Okpála ango-o a'ó 'to o 'to ani.†»

<sup>13</sup> A ayo me Ebhe inde amemene me okpála d̄ na'o 'to o 'to ni-e bedhe yi ne djali bedhe di ne guo 'ngú , anga yi abhuka ani. Abhom̄-o, yi tsia d̄ na'o 'to yi 'to ani na pakápaká bhú angu gba Bu Bhobua-o .

#### *Polo akpokpo 'ngú pindji kulu gba e*

<sup>14</sup> Ondaise ma, ma ambila mbámábá me yi abedhe ne bádha 'ngú bhú yi bedhe. Ma mbila di hana me yi ambila nd̄ 'ngú inde a ayo me yi mbila e hana, di ne me yi ti da nasusuno s̄nda yi. <sup>15</sup> Beleḡu inde lie mo-o, ongú bini bini bhú bal̄u inde-e, ma al̄u pépé kpekpeke ngubula me 'ndj̄i yi ayie tété de. Ma aye mo-o kabula bádha bhú 'bu inde li Ebhe asuno e m̄ma-o. <sup>16</sup> Ebhe a'o ma kpála na kulu gba Yesu Kilisito bhú ká okpála inde ne omaYuda ade-o. Ma aha lima libhomu pi Ebhe ngubula nakpokpo Bádha Ngali gba ani-e pi uo ngubula me u bhuka ani, amba u d̄ maka makiso inde nganḡa li ani manga. Makiso ango-o, Bu Bhobua a'o kpi pi ani.

<sup>17</sup> I nde lie mo-o, ma ne gindaginda bhú kulu inde ma ngamene e pi Ebhe-o, anga ya akp̄t̄s̄o liya ne Yesu Kilisito bhú dabil̄i bini. <sup>18</sup> Ma ti da napa 'ngú koko bini de. Ma apá bha bini engú inde li Yesu Kilisito amene e li kpadj̄i gba ma-o. Ani amene me ma gbele okpála inde ne omaYuda ade-e kala Ebhe ngubula me u d̄ namanga ani. Ani amene mo-o bhú oeli inde ma akpokpo e-o, di ne bhú okulu inde ma amene e-o. <sup>19</sup> Ani amene di mo-o bhú ongamba 'ngú nganḡá di ne bhú nau maka li Bu Bhobua gba ani-e ad̄ nasuno angu gba e lie-o. Abhom̄-o, ma atsia akpokpo Bádha Ngali gba Yesu Kilisito pi okpála ne nd̄ bili hana, nayie bhú Yelusalema nakolo makolo bhú ndu doto na Ilili. <sup>20</sup> Ma ad̄ nakunda nd̄ 'kp̄i hana nakpokpo Bádha Ngali-e li bili inde li okpála dje nga engú gba Yesu Kilisito lie de-o. Ma d̄ nakunda nakpokpokpo li bili inde u adje engú gba ani-e lie adje-e de, ngubula me ma ayiki eti li bili li kpála koko abh̄u ka kulu lie abh̄u-o de.

† 15:9 15:9 Tsia bhú Ets. 18:50. † 15:10 15:10 Tsia bhú Det. 32:43. † 15:11 15:11 Tsia bhú Ets. 117:1.

† 15:12 15:12 Tsia bhú Isa. 11:10.

21 Ma amene maka u aye lie bhú Bhuku gba Ebhe-e me:

«Obhende u kpokpo nga nani engú gba ani-e pi o de-e,  
u aú ani.

Obhende i dje nga nani engú gba ani-e de-  
e,

u aké mbolimboli.†»

22 A bhomu-o engú inde ani kpadji muma bhutsibhutsi me, ma akólo li yi de-o.

### *Gumú gba Polo ngú nanu bhú gudhu na Loma*

23 Kalanga bhelé ane, ma adu ne gumú nakolo li yi, engú bini, kulu adu nani kpadji muma. La mbia inde-e, kulu gba ma bhú ondu doto ango-o andjia. 24 Sunda 'kpí inde-e, ma adjí bhú Esipanye. Li ma du nanu-o, ma apú bhú Loma ngubula me ní si mbo ne yi ekpí bhisi. Pipita-a, yi téteke ma me ma kodho 'kpí.

25 La-a pi mbia inde-e, ma adjí nga bhú Yelusalema ngubula nateteke okpála gba Ebhe inde oo-o. 26 Padhá de, anga omabhuka na Makedonia di ne Akai au ndjindji me o po bhúla tia ngubula nateteke omabhuka inde bhú ndibhili bhú Yelusalema ne di. 27 U abhundja engú ango-o bhú ngu o, a ayo la bhadi nako me u mene moko. OmaYuda ateteke okpála bhende ne omaYuda ade-e ngubula me u sia bádha bhú 'bu gba Ebhe . Kaka-a, a ayo bhadi me okpála inde ne omaYuda ade-e teteke omaYuda ne oehe inde aneke ka uo-o. 28 Abhomu-o, i du me ma nde andjia kulu bhomu-o andjia-a, ma kóldho 'kpí bhú Esipanye. A akunda napa me pita nandjia nagapa tia u apo bhúla e li uo-o. Kala nakodho 'kpí ka ma-a, ma apú ngaiza agba yi. 29 Ma ambila me ma akólo lie agba yi-e, Yesu Kilisito asúno bádha bhú 'bu gba e pi ní na kuo kuo.

30 Ondaise ma, ma ngayo ka yi ne 'li Ngámá gba ní Yesu Kilisito, di ne 'li mukunda inde li Bu Bhobua ngaha e me, yi kpetse liyi ne ma bhú gbele inde ma ngagu e ne nayo Ebhe muma.

31 Yi yo Ebhe me nedhinga ma akólo lie

bhú Yudaya-a, okpála inde i bhuka Yesu Kilisito de-e ató mbolo li ma de. Yi yo di Ebhe me, omabhuka inde bhú Yelusalema sia oehe inde ma adjí ne e pi uo-o ne bádha bua. 32 Abhomu-o, i du me Ebhe nde akunda-a, ma kólo agba yi ne djali li bua ma, ní tsia dú ne yi bhú dabili bini. 33 A ayo me Ebhe inde ahaha guo 'ngú-o du bhú dabili bini ne ndu yi hana. A adu moko.

## 16

### *Polo yi okpála bini bini na Loma mayi*

1 Ma ngakpokpo 'ngú pi yi pindji ndai ní na eole Foebe. Ani ngamene kulu bhú Dadjua gba Ebhe inde bhú Sekele-o. 2 Li ani akólo lie agba yi-e, yi de sia ani ndjindji kabula 'li Ngámá gba ní Yesu Kilisito . A ayo me okpála gba Ebhe-e du namene moko. Yi teteke ani ne ndu 'he hana inde ani nde ne gumu e-o, anga ani ateteke okpála bhelé, ani atsia ateteke belegu di ma.

3 Ma yi Pilisila ne 'ko e Akuila mayi. Ngaya ne uo-o, ya amene kulu gba Yesu Kilisito bhú dabili bini. 4 U di me mu ngubula nakobho ma. Ma ngagie heni pi uo naali. A ko la bha bini ma kpi ma kpi de, engú bini, ndu oDadjua gba Ebhe hana inde bhú ndu doto gba omaYuda ade-e di ngagie heni pi uo. 5 Ma yi di okpála na Dadjua inde apopokobhe bhúla o ngubula nayo Ebhe bhú 'ti gba uo-o mayi.

Ma yi ndai ma na mukunda Epainete mayi. A ko kpála na kalanu inde abhuka Yesu Kilisito bhú ndu doto na Adjia-o. 6 Ma yi di Malia inde amene kulu pi yi naali-e mayi. 7 Ma yi di okpála gba ma, Adolonikasi ne uo ne Djuniasi\* mayi. Ngaya ne uo-o, ya adu nako bhú tikpu bhú dabili bini. A ko obhulu titima inde li okpála mbila o ndjindji naali. U abhuka nani Yesu Kilisito muma kalanu.

8 Ma yi di ndai ma na mukunda Apil-iatusi mayi. Ya akpetse liya ne ani bhú 'bu Ngámá gba ní-o. 9 Ma yi di Ulubano mayi. Ya ngamene kulu gba Yesu Kilisito

† 15:21 15:21 Tsia bhú Isa. 52:15. \* 16:7 16:7 Okpála bhelé ngabundja me Adolonikasi nani ne 'ko Djuniasi. Okoko ngabundja naao me a ko nani ondaise.

ne ani bhú dabilì bini. Ma yi di ndai ma na mukunda Sitakisi mayi. <sup>10</sup> Ma yi Apelesi mayi. Anì azu likabhu kabula Yesu Kilisito, anì atsia alu kpekpeke. Ma yi di okpála na piga gba Alisitobile mayi. <sup>11</sup> Ma yi di Elodiona mayi. A ko kpála na piga gba ma. Ma yi di okpála gba Ebhe inde bhú piga gba Nalasisè mayi. <sup>12</sup> Ma yi di Tilifene ne Tilifose† mayi. U aha lio ngú namene kulu gba Ngámá gba ní-e ne bua o bini. Ma yi di ndai ní na eelè na mukunda inde 'lì e me Peleside mayi. Anì aha di lie ngú namene kulu gba Ngámá gba ní-e ne bua bini. <sup>13</sup> Ma yi Lufusi, kukulu bádha kpála na kulu gba Ngámá gba ní-e mayi. Ma yi di 'hi anì, inde ateteke ma maka kukulu ndilì gba e makpe mayi.

<sup>14</sup> Ma yi di Asikilite ne Felegone ne Elemesi ne Patalobasi ne Elemasi di ne ndu ondaisè ní hana inde bhú dabilì bini ne uo-o mayi. <sup>15</sup> Ma yi di Filologe ne Djulie ne Nele di ne ndai e na eelè-o mayi. Ma yi di Olipasi di ne ndu okpála gba Ebhe-e hana inde ne uo-o mayi.

<sup>16</sup> Yi yi liyi sunda yi bhú dabilì bini ne mukunda gba omabhuka-o. Ndu oDadjua gba Yesu Kilisito-o hana yi yi mayi.

*Polo aha olíli na soso pi omabhuka na Loma*

<sup>17</sup> Ondaisè ma, ma ngagbele 'dje yi me: yi lila liyi ka okpála inde ngabi bhayiki li ongú inde u asuno e pi yi-e malila. Uo ngagbogbo bhusu okpála, u tsia mbá bhúla uo li osisiti kpadji. Yi gbe liyi de uo magbe. <sup>18</sup> Padhá de, anga ongua okpála bhomu-o ngamene kulu gba Ngámá gba ní Yesu Kilisito ade. Engú bini, uo mangbo ngamene engú bhende a nga li o makpe. U ngapite okpála inde i mbila kali de e ne obabadha oeli di ne oeli ngú nabo kpála. <sup>19</sup> La pi yi-e, ndu omabhuka hana ambila me, yi ngamanga Ngámá gba ní-o. Abhomu-o, ma ngakpi djali naali kabula yi, ma akunda la di me yi mbila engú inde babadha ngubula namemene, di ne me yi améne siti 'ngú de. <sup>20</sup> Ebhe inde ahaha guo 'ngú-o teteke yi me yi dedele Satana

† 16:12 16:12 Tilifene ne Tilifose nani ne olisi.

ne 'dhu yi má gala! A ayo me Yesu Ngámá gba ní-e suno bádha bhú 'bu gba e pi yi!

<sup>21</sup> Timoté, inde ngamene kulu bhú dabilì bini ne ma-a, yi yi mayi. Okpála gba ma, Lukiusi ne Djasone ne Sosipatele, yi di yi mayi.

<sup>22</sup> Ngama Teletiusi-e, Polo apa mama ngae me ma ye balua inde-e pi yi. Ma yi di yi mayi ne 'lì Ngámá.

<sup>23</sup> Gayusi, inde ma ngadu gba e-e, yi di yi mayi. Okpála na Dadjua gba Ebhe inde ei-e ngapo bhúla o bhú 'ti gba anì. Elaside, inde alilila tia na gudhu-o bhú dabilì bini ne ndai ní Kualatusi, yi di yi mayi. [ <sup>24</sup> A ayo me bádha bhú 'bu gba Ngámá gba ní Yesu Kilisito du bhú dabilì bini ne ndu yi hana! A adu moko.]

<sup>25</sup> A ayo me ní dhègè Ebhe! Anì ti da naha angu pi yi ngubula me yi lu kpekpeke li kpadji gba ni-o, maka Bádha Ngali inde ma ngakpokpo e pi okpála pindji Yesu Kilisito apa lie-o. Ebhe mbamba nga nani ta Bádha Ngali angoo pi okpála kalanu de. <sup>26</sup> La mbia inde-e, anì ambamba tata pi okpála. Okpála la bhadi ngakpokpokpo maka li opolofeta aye nani lie-o. Ebhe inde ngadu duduma ne duduma akata nani opolofeta me u ye me ndu opiga hana dje Bádha Ngali bhomu, ngubula me okpála bhuka anì, amba u manga di anì. <sup>27</sup> A ayo me ní dhègè Ebhe duduma ne duduma! Kukulu imbilangu makpe bha ka anì kpi e kpi. A ayo me ní dhègè anì kabula Yesu Kilisito! A adu moko.

**Balua na bini  
gba Polo pi omabhuka na  
gudhu na  
Kolito  
Eli na kalanu**

Balua na bini inde li Polo aye nani e pi okpala na Kolito-o, ani aye nani pindji ongu atsia mukobho gba omakilisito di ne nabhuka inde ali bhú Piga gba Ebhe nani li Polo a'o e bhú gudhu na Kolito-o. Bhú nedhinga ango-o, Kolito nani ne gudhu na ngbéngbé gba oGiliki inde li okpala ngangá apo bhula o bhú e-o, a ko 'ngbé gudhu na ndu doto na Akayi inde bhú nau na Loma-o . 'Li gudhu na Kolito au nani naali ka oehe na mase inde adu bhúbhú bhele-o, ne ka dasundu gba okpala ango-o, ne engú na zabhe inde adu bhúbhú naali-o, a la di-e ongangá engú na ebhe inde abedhe nani bhúbhú bedhe-o. Engú na ngbéngbé inde li Polo adu agu gbele ne e, a ko engú nagbo bhusu o, engú na zabhe inde adu bhú Dadjua gba Ebhe-o, ne ongu inde u ayi e pindji bhoko ne elo, ne pindji naha lio, pindji bua nakpokpo kú 'ngú, pindji namene 'ngú li kúku bhú Dadjua gba Ebhe, pindji ehe li Bu Bhobua ngaha e padhá, a la di-e pindji nazuku gba okpala-o. La, Polo atsia asuno imbilangu gba e ne nasuno lele maka li Bádha Ngali ngagama 'ngú li ongu ango-o lie-o.

Alo na (13) inde ngasuno mukunda maka ehe na babadha naali inde li Ebhe ngaha e pi omaha e padhá-a, okpala mbila 'ngú pindji alo (13) ndjikpa ne ká bata-a naali ane oalo koko hana bhú bhuku inde. A ko engú inde li okpala ambila e ane mane bhú bhuku inde ngae.

**Ongbengbe ongu inde bhú bhuku inde-e ngae inde:**

Eli na kalanu 1:1-9

Nagbogbo bhusu o bhú Dadjua gba Ebhe 1:10 - 4:21

Dasundu na ndjindji gba elo ne bhoko, di ne piga gba e 5:1 - 7:40

Omakilisito a la di-e omupagano 8:1 - 11:1

Mukobho na Dadjua gba Ebhe a la di-e engú na Ebhe 11:2 - 14:40

Nazuku gba Kilisito a la di-e nazuku gba omabhuka 15:1-58

Naha makiso pi omakilisito na Yudaya 16:1-4

Engú nanyi mayi a la di-e engú bhe na soso 16:5-24

*Polo yi omabhuka na gudhu na Kolito mayi*

<sup>1</sup> Ngama Polo, Ebhe a'i ma bhú ngu e me ma kolo bhulu titima gba YesuKilisito . Ya aye balua inde bhú dabili bini ne ndai ní Sosotene. <sup>2</sup> Ya aye pi yi okpala na Dadjua gba Ebhe inde bhú gudhu na Kolito, ngayi okpala inde li Ebhe a'o o kpi pi e. Yi akolo okpala gba ani ka nabhuka Yesu Kilisito, bhú dabili bini ne ndu okpala hana inde ngabhu 'li Ngámá gba ní Yesu Kilisito ne ndu bili hana-o. Yesu ne Ngámá gba uo, a ko la di Ngámá gba ní-o. <sup>3</sup> Bádha bhú 'bu ne guo 'ngú gba 'Dyi ní Ebhe di ne Ngámá gba ní Yesu Kilisito-o du ne yi bhú dabili bini.

*Obabadha 'ngú inde li Ebhe aha e pi okpala na Kolito bhú bádha bhú 'bu gba e-o*

<sup>4</sup> Ma ngagie heni pi Ebhe ndu nedhinga hana ngubula yi kabula bádha bhú 'bu inde ani aha e pi yi li kpadji gba Yesu Kilisito-o. <sup>5</sup> Bhú makpetse gba yi ne Yesu Kilisito-o, Ebhe abedhe yi ne ndu obabadha ongu hana. Kaka-a, yi mbila nadi mabelu li eli gba ani-e ndjindji, a la di bhú 'ndji yi ne imbilangu bhú ndu 'ngú hana. <sup>6</sup> Ngali gba Yesu Kilisito inde ya akpokpo e pi yi-e, asia dabili li bua yi ndjindji. <sup>7</sup> Kaka-a, yi asia ndu 'he hana inde li Ebhe ngaha e pi okpala bhú bádha bhú 'bu gba e-o, ngayi okpala inde ngadjeke ekpi li Ngámá gba ní Yesu Kilisito asuno matá lie lie pi okpala-o. <sup>8</sup> Ani atéteke yi ngae me yi lu kpekpeke akólo li soso, amba kpala bini adu ne engú na sisiti napapa li yi de, li 'kpi li Ngámá gba ní Yesu Kilisito agó lie-o. <sup>9</sup> Ebhe gba ní-e djidji 'li e de. Ani a'i yi me yi kpetse liyi ne Ndili gba ni Yesu Kilisito, Ngámá gba ní-o, ani dji 'li e bhomu-o de.

*Omakilisito na Kolito agbogbo bhṣu o*

<sup>10</sup> Ondaise ma, ma ngakikiliki lima pi yi ne 'li Ngámá gba ní Yesu Kilisito me, yi dṣ ndṣ yi hana ne koli bua bini, yi agbógbo bhṣu yi de. Yi gbite 'ngbo yi bini ne nadṣ ne mabhundja bini di ne nabhuka bini. <sup>11</sup> Ondaise ma, ma pa mo-o padhá de, a ko anga okpála na piga gba Koloe apa mṣma me yi ngadje liyi ade. <sup>12</sup> Engú ma apa e bhomṣ-o, ma apa anga sṣnda yi-e, yi ngagbogbo bhṣu yi. Okpála koko ngapa me o ngakpata Polo. Okoko ngapa me o ngakpata Apolosi.† Okoko ngapa me o ngakpata Piele. Okoko ngapa me o ngakpata Kilisito. <sup>13</sup> Engú yi ngamene e mana mṣgito me Kilisito agbo bhṣu e magbo. Yi pa nga mṣma, u agi nani ma Polo li kulusi ngú nakobho yi uu? Yi asia nani batisimo ne 'li ma Polo? A mo-o ade.

<sup>14</sup> Ma ngagie heni pi Ebhe anga ma batisa kpála bini bhú ka yi de. Ma abatisa bha bini Kilisipusi ne uo ne Gayusi† <sup>15</sup> Kaka-a, kpála bini ti da napa de me u abatisa yi ne 'li ma-a de. <sup>16</sup> A ko paká! Ma abatisa di nani piga gba Setefanasi.† Engú bini, ma ziba de me ma abatisa kpála koko uu-o de. <sup>17</sup> Padhá de, anga Kilisito tima nani ma ngú nabatisa okpála de. Engú bini, ani atima ma ngú nakpokpo Bádha Ngali pi uo. Ma ngakpokpo Bádha Ngali ango-o ne mabelu má pṣa pṣa maka okpála koko ade. Li ma dú nakpokpokpo ne mabelu maka okpála koko-o, nakpi gba Kilisito li kulusi-e de matá ne tata ade.

*Yesu Kilisito pi ní ne angu di ne imbilangu inde ayie ka Ebhe*

<sup>18</sup> Padhá de, anga pi okpála bhende li kpadji na ngita-a, nakpokpo ngali pindji nakpi gba Yesu li kulusi-e, a ko 'ngú na pele. Engú bini, pi ní obhende li Ebhe ngakobho o-o, ní ngau angu gba Ebhe-e bhú ngali ango-o. <sup>19</sup> A maka u aye lie bhú Bhuku gba Ebhe-e me:

«Ma améne me imbilangu gba obhulṣ imbilangu-o kolo padhá.

Ma aú imbilangu gba uo bhú djila ma maka ehe

na padhá.†»

<sup>20</sup> † dṣ me Ebhe nde apa mo-o, a akṣnda napa me, okpála na imbilangu na doto inde-e, imbilangu gba uo bhṣ 'ngú de. Okpála inde ngasuno olili gba omaYuda-a, tata li nasuno gba uo ade. La di-e, obhulṣ nadi mabelu na sukṣ inde-e, mabelu gba uo-o, tata tété ade. Ebhe asuno bhomṣ-o me imbilangu na doto inde-e padhá. <sup>21</sup> Padhá de, anga okpála na doto ne imbilangu gba o na kpála-kuti-e ti da nani nambila imbilangu gba Ebhe-e de. Kaka-a, li kpadji na engú inde li okpála ngau e bhú djila o maka engú na pele-e, Ebhe au ndjindji me ni kobho okpála inde ngabhuka-o. Engú na pele ango-o, a ko Bádha Ngali inde ya ngakpokpo e-o.

<sup>22</sup> OmaYuda ngayo ongamba 'ngú kala me u bhuka, oGiliki naao ngagili imbilangu. <sup>23</sup> La pi ya-a, ya ngakpokpo 'ngú gba Kilisito inde u agi e li kulusi-o. Li omaYuda ngadje engú ango-o lie, a ngangbingi 'ndji uo mangbingi. Li okpála bhende ne omaYuda ade-e ngadjedje lie, a ngamene uo maka engú na pele. <sup>24</sup> Engú bini, pi okpála bhende li Ebhe alo o-o, i dṣ di-e omaYuda, i dṣ di-e obhende ne omaYuda ade-e, u ngambila ndjindji me Yesu Kilisito akolo pi o angu di ne imbilangu inde ayie ka Ebhe-e ngae. <sup>25</sup> Okpála koko ngapa me engú li Ebhe amene e bhú nakpi ka Yesu-o, a ko 'ngú na pele. Engú bini, engú inde u a'i e me a ko 'ngú na pele bhomṣ-o ane imbilangu gba kpála-kuti mane. † dṣ me u nde ngabhundja me Ebhe bhṣbhukṣ-o, a mo-o ade. Padhá de, anga bhukṣ gba Ebhe-e ane angu gba okpála-kuti ne kpéke.

*Ebhe nga'o tata li ehe inde li okpála ngau e bhú djila o padhá*

<sup>26</sup> Ondaise ma, ngayi okpála li Ebhe a'i o-o, yi bhundja nga me yi ne oda-ie! Nakpata mabhundja gba okpála na doto-o, okpála na imbilangu, ne obhende na angu, ne obhende azu lio bhú piga na tia bhú ká yi bhelé ade. <sup>27</sup> Engú bini, Ebhe alo engú li okpála na doto nga'i e me a ko

† **1:12** 1:12 Tsia bhú 1 Kol. 16:12; di ne bhú Kul. 18:24-28. † **1:14** 1:14 Tsia bhú Kul. 18:8, 19:29. † **1:16** 1:16 Tsia bhú 1 Kol. 16:15-17. † **1:19** 1:19 Tsia bhú Iša. 29:14.

engú na pele-e ngubula me imbilangu gba obhulu imbilangu-o kolo ehe na padhá. Aní alo ongú bhende lí okpála na doto ngau e me angu bhúbhú ade-e ngubula me angu gba bhulu angu-o kolo ehe na padhá. <sup>28</sup> Aní alo ohe inde lí tata nde lie e ade, inde lí okpála na doto ngamæ e, inde u ngau e bhú djila o padhá-o. Aní alo ngubula me ní bhili ohe bhende lí okpála ngau e me a tété ne tata-a ne di.

<sup>29</sup> Kaka-a, kpála bini tí da nadjé kúte e kala Ebhe de. <sup>30</sup> La ngayi-e, Ebhe akpõtse yi bhú dabilí bini ne Yesu Kilisito. Aní amene me Yesu kolo pí ní imbilangu inde ayie ka ní-o. Yesu amene ngæ me ní kolo ngbingbili bhú djila Ebhe. Aní amene me ní dæ libhomu pí Ebhe. Aní atsia agbegbe di ní bhú bali gba siti. <sup>31</sup> Kaka-a, a maka u aye lie bhú Bhuku gba Ebhe-e me: «Í dæ me kpála nde akúnda nau lie ngbéngbé-e, aní de u lie ngbéngbé bhú engú lí Ngámá Ebhe amene e ko.†»

## 2

### *Imbilangu lí Polo adu akpokpo 'ngú pindjí Yesu Kilisito ne e-o*

<sup>1</sup> Ondaise ma, ngama makpe-e, nedhinga ma anu nani lie agba yi ngubula nakpokpo engú inde lí Ebhe ambamba ta e lí kpadjí gba Kilisito-o , ma di pí yi mabelu bhe nane mane de. Ma gama di 'ngú pí yi ne imbilangu naali de. <sup>2</sup> Padhá de, anga nedhinga ma adu lie agba yi-e, ma gili nambila engú koko bhú ka yi de. Ma agili bha bini nambila Yesu Kilisito, ma agili bha nambila makpe me-e Yesu Kilisito inde u agi nani e lí kulusi-o. <sup>3</sup> Kaka-a, ma adu agba yi bhuku kpála, ma adu ne tsulu, ma atsia adu di naguku naali. <sup>4</sup> Bhú nasuno gba ma-a ne bhú nakpokpo Bádha Ngali-e , ma dæ nagama 'ngú ne imbilangu gba kpála-kúti de, ma dæ di nadi pí yi mabelu de. Engú bini, Bua gba Ebhe-e adu nani nasuno pí yi ne angu me engú ma adu akpokpo e adu kukulú 'ngú. <sup>5</sup> Ma adu akpokpo 'ngú pí yi mo-o ngubula me yi a'ó nabhuka gba yi-e bhú

imbangú gba okpála de, engú bini yi 'o mangbo bhú angu gba Ebhe-o.

### *Imbilangu lí Polo ngakpokpo 'ngú ne e ayie ka Ebhe*

<sup>6</sup> Nedhinga ya ngasuno lie pí okpála inde abhele lí kpadjí gba Ebhe-e abhele-e, ya ngasuno kukulú imbilangu, a ko imbilangu na doto inde-e de. A ko la di bhende gba ongámási na doto inde lí 'bhø ngámá gba o andjía mandjia de. <sup>7</sup> Imbilangu ya ngakpokpo 'ngú ne e inde-e, a ko mangbo imbilangu gba Ebhe. A ko ehe inde awo lie mawo, inde lí okpála dæ nani nambila e de. Kala me Ebhe bho doto-o, Ebhe a'o nani imbilangu angoo ngubula me ní sia té sangu gba ní-o. <sup>8</sup> Ongámási na doto inde-e mbila nani imbilangu angoo de. Í dæ me u mbila nani uu-o, u de bhøle nani Ngámá gba ní inde abedhe ne sangu bedhe lí kulusi de. <sup>9</sup> Ehe lí Ebhe amene e, a maka u aye lie bhú Bhuku gba aní-e me:

«Engú inde lí djila okpála u nga nani e de-e,  
lí 'dje okpála dje nga nani e de-e, di ne bhende lí okpála bhundja belegu engú lí e de-e, a la bhomu-o engú inde lí Ebhe aleke nani e pí okpála inde ne mukúnda pí aní-o.†»

<sup>10</sup> Pí ní-e, Ebhe ambamba ta engú angoo bhú angu gba Bhobua gba e-o. Bhobua angoo mbila ndæ 'ngú hana. Aní mbila belegu mabhundja gba Ebhe inde awo lie mawo-o. <sup>11</sup> Bhú ká okpála-a, a ko da inde ambila engú inde bhú kilí e? A ambila bha bini ne bua inde bhú kpála angoo. A bhadi moko, engú inde bhú Ebhe-e, ambila bha bini ne Bhobua gba Ebhe-o. <sup>12</sup> Pí ní-e, Bua inde bhú ní-e yie ka okpála na doto inde-e de, engú bini, a yie ka Ebhe. Ebhe aha pí ní ngubula me ní mbila ndæ 'he inde aní aha e pí ní bhú bádha bhú 'bu gba e hana. <sup>13</sup> Nedhinga ya ngakpokpo 'ngú lie pí okpála-a, ya ngakpokpo ne imbilangu gba okpála ade. Engú bini, ya ngakpokpokpo ne imbilangu inde ayie ka Bhobua gba

† 1:31 1:31 Tsia bhú Djlm. 9:22-23. † 2:9 2:9 Tsia bhú Isa. 64:3, 52:15.

Ebhe-o. A akunda napa me, ya ngambamba ta onǵú pindji Bhobua gba Ebhe-e pi okpála inde li Bua angoo-nde bhú o-o.\*

<sup>14</sup> Kpála bhende li Bhobua gba Ebhe-e nde bhú e ade-e ti da naziba obisagu inde li Bhobua angoo-ngaha e pi okpála-a de. Bisagu angoo-pi ani maka engú na pele. Imbilangu ngú nambila 'ngú angoo-bhú 'ndji ani ade. Padhá de, anga Bua gba Ebhe-e ti da nambamba ta 'ngú angoo-bha pi kpála ngae. <sup>15</sup> Kpála inde li Bua gba Ebhe-e nde bhú e mbila ndu 'ngú hana, bhende na babadha, ne bhende na sisiti. Engú bini, ngaani-e, kpála bini ti da nambila 'ngú inde bhú ani-e má kpulukutu de. <sup>16</sup> A maka u ye lie bhú Bhuku gba Ebhe-e me:

«Kpála bini mbila engú inde li Ebhe Ngámá ngabhundja e de.

Kpála bini ti da naha líli pi ani de.†»

Engú bini, ngaya okpála li Bua gba Ebhe nde bhú o-o, nambhundja gba ya viti ne bhe gba Kilisito bini.

### 3

#### *Omabhuka na ǵudhu na Kolito maka okpála inde ngakpata Yesu na mbia*

<sup>1</sup> Ondaise ma, pi ma-a, nedhinga ma adu lie agba yi-e, ma ti nani da nagama 'ngú pi yi maka okpála li Bua gba Ebhe-e nde bhú o-o de. Engú bini, ma agama bha ibili 'ngú pi yi maka okpála na doto inde. Padhá de, anga yi adu maka okpála inde i ngakpata nga Yesu Kilisito na mbia.

<sup>2</sup> Ongú inde ma asuno e pi yi-e adu maka miliki. A adu ezu na kpekpeke de. Belegu pi mbia inde-e, yi ti nga da nazu ezu na kpekpeke de. <sup>3</sup> Padhá de, anga yi nga bha ngakobho maka okpála na doto inde, anga yi ngamene 'he liyi sunda yi ne 'ngbé bua. Yi la di ngatsi sunda yi. † du me yi nde ngamene mo-o na paká-a, yi mbila de me bhobhomu-o ngasuno me yi nga bha ngadhuku maka li kute yi akunda lie di? <sup>4</sup> Nedhinga li kpála bini bhú ká yi ngapa lie me ni ngakpata Polo-o, li kpála koko pa me ni naani ngakpata Apolosi-e,

asuno me yi ne okpála inde na doto. A mo-o adi?

#### *Ebhe ne Ngámá na kulu gba ní-e ngae*

<sup>5</sup> Apolosi ne da? Polo la di ne da? Ya bha ne obalise gba Ebhe inde ani atima o ngú nakpokpo eli gba e pi yi, ngubula me yi bhuka Ngámá Yesu Kilisito. Kpála ne kpála bhú ká ya bha ngamene kulu inde li Kilisito aha e pi ani-o. <sup>6</sup> Ya adu maka okpála nalu nguwa. Ngama-a, ma akpo lita nakpokpo eli gba Ebhe-e bhú ká yi maka kpála inde ngalu nguwa. Apolosi anu ne di ne kalanu maka kpála inde ngabolo 'ngu pí 'zu-o. Engú bini, Ebhe amene ngae me ezu angoo-bhele. <sup>7</sup> Bhobhomu-o asuno me, ne kpála inde ngalu nguwa, ne bhende ngatuko 'ngu pépé-e, tetele kpála bhú ká uo ade. Engú bini, kpála na tetele mangbo ne Ebhe, anga ani ngamene ngae me ezu-o bhele. <sup>8</sup> Ne kpála inde ngalu nguwa, ne bhende ngatuko 'ngu pépé-e, u viti bini. Ebhe ahá makalá na kulu gba kpála ne kpála-a pi e li lele kulu gba e-o. <sup>9</sup> Ndu ya bhisi hana, ya ngamene kulu gba Ebhe-e bhú dabili bini. Ngayi-e, yi maka edyi gba Ebhe.

Yi la di maka eti li Ebhe ngayiki e-o. <sup>10</sup> Bhú bádha bhú 'bu gba Ebhe-e, Ebhe aha angu muma, ma atsia aholo namene kulu gba ani. Ma adu maka kpála nayiki eti ne imbilangu, inde ambila di nabanga 'dhu 'ti-e ndjindji, kpála na kulu koko atsia ago ngú nadyudyo kulu angoo-ne kalanu. A ayo me kpála ne kpála inde nga'o biliki pí 'dhu 'ti angoo-'o li lelele. <sup>11</sup> 'Dhu 'ti angoo-, a ko Yesu Kilisito inde yi nga'o nabhuka gba yi-e bhú e-o. Kaka-a, kpála bini ti da na'o matá 'dhu 'ti koko de. <sup>12</sup> Pí 'dhu 'ti angoo-, okpála koko ngayiyiki ne tia kulu inde ngabhue mabhue maka olo, aladja di ne teme na mase naali. Okpála koko ngayiyiki ne tia kulu inde i bhúe de maka ndula, ulu di ne soli.

<sup>13</sup> La-a, li 'kpí li Ebhe akódho 'ngú gba okpála na doto lie-e, kulu gba musuno bini ne bini akóto bhú mbasu. Okpála aú

\* **2:13** 2:13 Li bili inde-e, u ti da di napa me: «Ya ngakpokpo engú pindji Bhobua gba Ebhe-e pi okpála ne oeli inde ayie ka Bhobua angoo-». † **2:16** 2:16 Tsia bhú isa. 40:13.

kulu gba uo-o mbámhá. Padhá de, anga li kpí angoo, Ebhe alé kulu gba kpála ne kpála bhú djua ngú nambíla me ne me a ndjindji, ne me a sisiti. <sup>14</sup> I dũ me kulu inde li kpála amene e nde tsi bhú djua de-e, li Ebhe há makalá pí kpála angoo. <sup>15</sup> Engú bini, i dũ me kulu inde li kpála amene e nde atsi bhú djua-a, Ebhe há makalá pí ani de. Ebhe akóbho kpála angoo makobho, engú bini, kpála angoo avo kuku, ani de atsi bhú djua atsi.

<sup>16</sup> Yi mbíla de me yi maka Eti gba Ebhe, di ne me Bua gba ani-e ngadu bhú yi-e di? <sup>17</sup> I dũ me kpála nde abhelo Piga gba Ebhe-e, li Ebhe bhelo di kpála angoo. Padhá de, anga Ebhe a'o Dadjua angoo pí e. Piga inde ani ngadu bhú e-e, a ko yi.

#### *Imbilangu gba Ebhe-e kpi ne imbilangu gba okpála-kuti*

<sup>18</sup> Kpála bini apíte lie de. I dũ me kpála bini bhú ka yi nde ngabundja me ni ne imbilangu maka okpála na doto inde-e, ani de yala imbilangu gba e bhomu. Ani kolo mangbo bhú djila okpála na doto maka bhulu pele, amba ani sia imbilangu na kukulu. <sup>19</sup> Ma pa mo-o padhá de, a ko anga oehe li okpála na doto nga'i e me a ko imbilangu-o, a ko ongu na pele bhú djila Ebhe. A maka u aye bhú Bhuku gba Ebhe-e lie me:

«Ebhe ngaholo okpála i ngabhi 'kpa o pí mbulu o me  
o ne obhulu imbilangu bhú oeli na kali gba o-o.†»

<sup>20</sup> U aye di matá bhú bhuku gba Ebhe-e me:

«Ebhe mbíla mabundja gba okpála inde ngabhi 'kpa o pí mbulu o me  
o ne obhulu imbilangu-o hana.

Ani mbíla hana me a padhá.†»

<sup>21</sup> Kaka-a, ma apa pí yi me kpála bini bhú ka yi abhi 'kpa e pí mbulu e bhú nakpata musuno de. Padhá de, anga ndũ 'he hana ne naayi. <sup>22</sup> Ne ma Polo, ne Apolosi, di ne Piele-e, ya ndũ ya hana ne naayi okpála. Belegu doto, ne mukobho di ne kuo ne naayi 'he. Ongú na naki inde di ne ongu agó galikpe bhadi ne ndũ naayi

'he. <sup>23</sup> Engú bini ngayi-e, yi ne okpála ka Yesu Kilisito, Yesu Kilisito ne kpála ka Ebhe.

## 4

### *A ayo namanga obhulu titima gba Yesu-o mamanga*

<sup>1</sup> A ayo me okpála mbíla me, ngaya, obhulu titima gba YesuKilisito-o, ya ne okpála na kulu gba ani. Ebhe a'o ongu inde nani awo lie mawo-o sakpa ya ngubula me ya suno pí okpála. <sup>2</sup> Yi mbíla ndjindji me, engú inde u ngayo e ka kpála inde u a'o 'he sakpa e, a ko nadu ngbingbili. <sup>3</sup> La pí ma-a, belegu ngayi-e, yi pa me ma ne siti kpála, ne me ma ne siti kpála ade-e, a méne 'he bini ngú ma de. Abana li okpála nakodho 'ngu-o pa me nganda kulu gba ma-a a ndjindji, ne me a ndjindji ade-e, a méne 'he bini ngú ma de. Abana ngama makpe, ma pa de me nganda kulu gba ma-a ndjindji, ne me a sisiti-e de.

<sup>4</sup> Padhá de, anga pí ma-a, bua ma pa muma de me ma ngamene siti 'ngu-o de. Engú bini, bhobhomu-o kunda napa de me ma mene siti 'ngu de-e de. Ngámá Ebhe akódho mangbo engú gba ma-a ngae. A akódho ne kpála koko de. <sup>5</sup> Kaka-a, yi akódho 'ngu gba okpála koko de. Yi djeke mangbo me nedhinga li Ebhe a'o e ngú nakodho 'ngu gba okpála kolo paká. A ko okpí li Ngámá Yesu agie lie lie-o. Li 'kpí angoo, ani apándja ondu 'ngu hana inde awo lie naki mawo-o bhú mbasu. Ani agbé engú inde li okpála nde ngabundja e li bua o-o li zi 'kpí. Ekpí angoo, li Ebhe tsia dhégo kpála ne kpála li lele kulu gba e-o.

<sup>6</sup> Ondaise ma, ma apa ongu bhomu-o pí yi pindji ya ne Apolosi ngubula nateteke yi, amba yi mbíla ongu inde bhúbhú-o. Ma akunda me yi kpata nganda ya ngubula me yi ko mboli gbitaku inde-e me: «A ayo napise li kozie inde u a'o e-o.» A ayo de me kpála bini bhú ká yi sia 'ngbé 'ndji ne 'ili me ni naani ne kpála ka tsipakala, amba ani u okpála koko bhú

† 3:19 3:19 Tsia bhú Dj. 5:13. † 3:20 3:20 Tsia bhú Ets. 94:11.



djila e padhá-a de. <sup>7</sup> Ngamú kpála inde ngabhundja me ni ane okpála koko mane-e, mú naamú ne da? Ebhe ha ndú 'he inde ka mú-o hana pí mú ngae dí? † dú la me Ebhe nde aha pí mú ngae, mú ngamene 'ngbé 'ndjì tété mǔgito me mo osia ka angu gba mú-o ka ní?

*'Ngbé 'ndjì gba omabhuka na Kolito*

<sup>8</sup> A ndjindjì, anga yi asia naayi ndú 'he hana inde lí Ebhe ngaha e asia. Yi íbili ne obhúlú tia lí kpadjì na nabhuka . Yi ngapa me yi ndú yi hana ne ongámási, la ngaya obhúlú titima gba Yesu Kilisito-o, ya naaya ne ongámási ade. † dú me yi dú bhú djila Ebhe ne ongámási na paká-a, a de ndjindjì ngubula me ní ú ne yi bhú dabilì bini. <sup>9</sup> Ya ne obhúlú titima gba Yesu Kilisito. Engú bini, ma ngau mǔgito me Ebhe a'o ya asidi píta ndú okpála koko hana. Ya maka okpála bhende u akodho 'ngú gba o, inde u abhíli o kala ndú okpála hana. A akúnda napa me doto libhomu ne okpála-kutì la di ne oandjelu ngatú 'ue bhú 'ndjì ya maka bhú da ngeme.

<sup>10</sup> Ngaya-a, ya ne obhúlú pele kabula 'lí Yesu Kilisito! La ngayi-e, yi ne obhúlú ímbilangu kabula ani! Ngaya-a, ya ne okpála lí angu nde bhú o ade! Engú bini, ngayi-e, yi ne okpekpeke okpála! Ngaya-a, okpála ngau ya bhú djila o padhá, engú bini, ngayi-e u ngamanga yi mamanga! <sup>11</sup> Nakolo pí mbia inde-e, ya ngadje gumú di ne gumú 'ngu. Ya ngadyì obongo inde akadha. U ngato mbolo lí ya. Ya sili kutì de. <sup>12</sup> Ya ngamene kulu ne 'kpa ya kpekpeke. Nedhinga lí okpála ngasobho ya lie, ya ngayo Ebhe me ani tuko bisagu pí uo. Nedhinga lí okpála ngato mbolo lí ya lie, ya ngakikibila, ya gisila de. <sup>13</sup> Nedhinga lí okpála ngapa 'ngú gba ya lie sisiti-e, ya ngagie pí uo bhúku eli. Ya akolo maka oehe inde u abala e apí 'ká. Nakolo pí naki-e, ya akolo maka oehe inde lí tata nde lie ade.

*Polo asuno bua gba e na 'dyi ongisi-e pí omabhuka na Kolito*

<sup>14</sup> Ma ye engú inde-e de me yi sia nǔmú ká engú inde yi ngamene e de. Ma aye

mangbo ngubula me ma ha líli, anga yi ne ongisi gba ma na mǔkúnda. <sup>15</sup> Padhá de, anga abana lí omúsuno dú bha ka yi bhelé-e lí kpadjì gba Yesu Kilisito-o, koli 'dyì yi bha bini. 'Dyì yi ango-o, a ko ma. A akúnda napa me ma akpo lita nakpokpo Bádha Ngali gba Yesu Kilisito pí yi ngama. <sup>16</sup> Ma nde lie ne 'dyì yi-e, ma ngayo ka yi me yi mene engú inde ma ngamene e-o. <sup>17</sup> Ngubula nateteke yi-e, ma atima Timoté agba yi oo. Ma atima ani ngubula me ani nǔ suno pí yi ne toto lele maka ma ngadhúku lie lí kpadjì gba Yesu Kilisito-o. Ongú inde ani asúno e pí yi-e, a bhómú-o ongú inde ma susuno e pí okpála gba Ebhe ne ndú bili hana-o. Yi dje Timoté, a ko ndilì gba ma na mǔkúnda-o. Ani la di ngadhúku ngbingbili lí kpadjì gba Ngámá Yesu Kilisito.

<sup>18</sup> Okpála koko bhú ka yi ngabhi 'kpa o pí mbulu o anga u ngabhundja me ma agó matá gba yi oo de. <sup>19</sup> Engú bini, i dú me Ngámá gba ní-e nde azíba-a, ma agó oo ne 'kpí bhisi inde. Lí ma kolo oo, ma ú obhúlú 'ngbé 'ndjì bhómú. Ma tsia mbíla ne me u bha ngape 'lí o padhá, ne me abhú uo ne angu namene engú. <sup>20</sup> Padhá de, anga Nǔ gba Ebhe-e ne eli ade, a mangbo bhú angu gba Bu Bhobua . <sup>21</sup> Nedhinga ma agó lie agba yi-e, yi akúnda me ma go ne mangua 'ngú dho? Yi akúnda me ma ago sakpa ma ne fimbo? Ne me ma go ne bhúku bua ngú nasuno pí yi me ma kúnda yi naali?

## 5

*Polo apa pí omakilisito me u gbe kpála inde amene siti 'ngú bhú ka o magbe*

<sup>1</sup> Ma ngadje ngali gba yi-e ndú 'kpí hana. Okpála ngapa me bhú ká yi-e, okpála koko ngadhúku ne olisi, i dú di-e ne obhosi ngangá. A ko engú inde belegú okpála i bhuka Ebhe de-e tí da namene e de. A mana mǔgito me sǔka yi bini ngadhúku ne wala 'dyì e.† <sup>2</sup> Ngayi-e, engú ango-o ngaha pí yi 'ngbé 'ndjì. A ayo la ígini me yi de aku 'gbá ngubula siti 'ngú

† 5:1 5:1 Tsia bhú Lev. 18:8; di ne bhú Det. 23:1.

ango-o. A ayo la di igini me yi gbe ngua makilisito bhomu-o bhú ká yi magbe.

<sup>3</sup> Ngama-a, belegu ma nde lie bhú ka yi ade-e, bua ma ne yi bhú dabili bini. Ma akodho engú gba kpála inde amene engú bhomu-o akodho mugito me ma ne yi bhú dabili bini. <sup>4</sup> Ma akodho 'ngú bhomu-o ne 'li Ngámá gba ní Yesu. Ma ngapa pi yi me, yi po bhúla yi-e, li bua ma dú ne yi bhú dabili bini. Li angu gba Ngámá gba ní Yesu tsia súnó di lie. <sup>5</sup> Nedhinga yi apó bhúla yi lie, yi pu kpála bhomu-o pi Satana\* ngubula me siti 'ngú inde bhú ani-e koto hana má kpəkəbhə, amba Ebhe kobho bua ani li 'kpí li Ngámá gba ní Yesu agó lie ngú nakodho 'ngú gba okpála-o.

<sup>6</sup> A ndjindji ade me yi bhi 'kpa yi pí mbulu yi li siti 'ngú bhomu-o de. Yi mbila de me mboye ku levile bedi-e ngamene ngae me faline libhomu fuka di-i? <sup>7</sup> Yi 'e siti 'ngú bhomu-o bhú ka yi ma'e. I du me yi nde amene mo-o, yi kolo bubu maka faline inde u 'o levile bhú e de-o. Ma ambila ndjindji me Ebhe amene me yi kolo bubu li kpadji nakpi ka Yesu Kilisito . Yesu maka ndili kandələ inde u abhələ e ngubula me okpála zu bhú anokomia na Pasika . <sup>8</sup> Kaka-a, ní kpi djali kabula li Ebhe agbegbe ní lie bhú bali-o. Ní 'e osisiti 'ngú gba ní-e maka li omaYuda a'e nani dili levile gba o lie ngubula nazu anokomia nazu mapa inde li levile nde bhú e ade-o . Ní mene mo-o, ní dú bubu, di ngbingbili kala Ebhe.

<sup>9</sup> Bhú balua ma atima nako e pi yi kalanu-o, ma apa pi yi bhúbhú me yi adú bhú dabili bini ne okpála inde ngadhuku ne olisi, i du di-e ne obhosi ngangá-a de. <sup>10</sup> Ma pa engú bhomu-o pi yi pindji ndu okpála na doto inde-e hana de. Ma pa engú bhomu-o pindji okpála inde ngadhuku ne olisi, i du di-e obhosi ngangá-a de, ne pi obhende li gumu 'he gba okpála abedhe bhú o bedhe-e de. Ma pa la di engú bhomu-o pindji okpála inde ngazi 'he-e de, i du di-e obhende ngadhəgə ebhe na eu-o de. Li kpála kunda nadu bhú dabili bini ne okpála

bhomu-o de-e, kpála ango-o de yie pila doto mayie.

<sup>11</sup> Ma akunda mangbo nayoko yi me, yi akpətsə liyi ne kpála inde ngapa me ni ne makilisito me ani nde ngadhuku ne olisi, i du di-e ne obhosi ngangá-a de. Yi akpətsə liyi ne omakilisito bhende li gumu 'he gba okpála abedhe bhú o bedhe-e de. Yi akpətsə liyi ne omakilisito bhende ngayo ebhe na eu-o de, i du di-e makilisito inde ngasobho okpála koko, ne obhende ngalangba ne pandi, i du di-e bhulu 'zi-e de. Yi akpətsə liyi ne uo de. Yi azú 'he ne ngua kpála bhomu-o belegu de bini. <sup>12-13</sup> Padhá de, anga a ko 'ngú ka ma de me ma kodho 'ngú gba okpála inde ne omakilisito ade-o. Ebhe akódho 'ngú gba uo-o ngae. Engú bini ngayi-e, yi ti da nakodho 'ngú gba omakilisito yi nde ne o-o. Maka u aye lie bhú Bhuku gba Ebhe-e me: «Yi gbe kpála inde ngamene siti 'ngú bhú ká yi-e magbe.†»

## 6

### *Lele naleke 'ngú sunda omakilisito*

<sup>1</sup> I du me saka yi nde ne 'ngú sunda o ne ndai e-e, lele pi ani tí da nanu lie ne di kala ongámási na doto? A ayo mangbo igini me ani nu ne ani kala okpála gba Ebhe. <sup>2</sup> Yi mbila de me okpála gba Ebhe-e akódho 'ngú gba okpála na doto li sokpi-e ngao di? I du la me yi nde akódho 'ngú gba okpála na doto-o, lele pi yi tí da nakodho odjedje ongu inde-e lie de-e? <sup>3</sup> Yi mbila de me ní akódho belegu engú gba oandjelu-o nganí-e di? Ka ni la ní tí da nakodho odjedje 'ngú na naki inde-e lie de? <sup>4</sup> Li odjedje 'ngú du sunda yi-e, ka ni yi nganu lie ne di kala okpála inde bhú Piga gba Ebhe-e ade-e? <sup>5</sup> Ma ngapa 'ngú bhomu-o ngubula me yi sia numu. Kpála na imbilangú bini bhú ka yi adi ngubula me ani leke 'ngú sunda omakilisito-o? <sup>6</sup> A bha ndju ndjindji me li makilisito du ne engú sunda e ne makilisito-o, u de nu ne di kala okpála inde i bhuka Yesu di?

\* **5:5** 5:5 Napu kpála pi Satana: Ti da napa li bili inde-e me nagbe kpála bhú Piga gba Ebhe. † **5:12-13** 5:12-13 Tsia bhú Det. 17:7.

<sup>7</sup> A na paká me nadu ne engú sunda yi-e, a bhomu-o numu na ngbéngbé. I du me u nde mene ngbili 'ngú li pabili gba yi-e de-e, u nde ngazi 'he gba yi-e, ka ni yi tí da nakikibila lie ne 'ndjá bua de-e? <sup>8</sup> Engú bini, okpála inde i mene ngbili 'ngú pi okpála koko de-e ne yi! Yi la di ngazi 'he gba ondaise yi omakilisito!

<sup>9</sup> Yi mbila na paká me okpála inde ngamene osisiti 'ngú-o lí bhú Nau gba Ebhe-e de. Yi apíte liyi de, okpála inde ngakunda olisi, i du di-e ne obhosi ngangá-a, ne obhende ngadhögö oebhe na eu, ne obhende ngakunda olisi, i du di-e obhosi gba okpála koko, i du di-e obhende ngakunda lio sunda o maka elö ne bhoko, u li bhú Nau gba Ebhe-e de. <sup>10</sup> Yi apíte liyi de, obhulu 'zi, ne obhende li gumu 'he gba okpála abedhe bhú o bedhe, ne obhende ngalangba ne pandi, ne obhende ngadi okpála koko, ne obhende ngagbulu 'he gba okpála ne kpéke djila-a, lí bhú Nau gba Ebhe-e de. <sup>11</sup> A na paká me bhú ká yi-e, okpála koko adu nani namene osisiti 'ngú bhomu. Engú bini, mbia inde-e, Ebhe avulu yi bhú siti 'ngú gba yi-e avulu. Aní a'o yi kpi pi e, aní atsia amene me yi kolo ngbingbili kala ni. Aní amene ndu 'ngú bhomu-o hana li kpadji gba Ngámá gba ní Yesu Kilisito di ne bhe gba Bu Bhobua gba e-o.

### *Kute ní ne eti gba Bu Bhobua*

<sup>12</sup> Mu ti da napa me: «Ma nde lie ne makilisito-o, ma ti da namene ndu 'ngú hana.» A na paká moko, mu ti da namemene. Engú bini, ongu koko bhú ká ongu inde mu ngamene e bhomu-o ti da nateteke mu de. Ma aziba me, ma ti da namene ndu 'ngú hana. Engú bini ngama-a, ma kunda nadu bali na 'ngú bini de. <sup>13</sup> Mu ti da napa matá me: «Ebhe aha ezü ngubula nabeledhe ebu ne di. Aní atsia amene di ebu ngubula ezü.» A na paká moko. Engú bini, li sokpi-e, Ebhe abhölö ebu, aní tsia bhölö di ezü. Ndundu bhisi hana tsia ndjulu. Padhá de, anga Ebhe bho kute ní ngubula nadhuku ne

olisi, i du di-e ne obhosi ngangá de. Aní amene mangbo kute ní ngubula nakpata Ngámá Yesu ne di. Padhá de, anga a ko Ngámá na kute ní ngae. <sup>14</sup> Ebhe azuku Ngámá gba ní Yesu Kilisito bhú kuo. Aní azuku bhadi kute ní bhú angu gba e-o.

<sup>15</sup> Yi mbila de me, kute yi ne saka yá Kilisito di? Lele pi ma ahá kute ma inde saka yá Kilisito lie ngú nakpekpetse ne kute elö na zabhe-e? Bhobhomu-o méne lie belegu de bini! <sup>16</sup> Yi mbila de me, i du me kpála nde akpetse lie ne elö na zabhe-e, ndu uo bhisi hana akolo koli kute bini-e di? Padhá de, anga u aye bhú Bhuku gba Ebhe-e me: «Ndu uo bhisi hana akólo koli kpála bini.\*» <sup>17</sup> La-a, kpála bhende akpetse lie ne Ngámá-a, akolo ne aní ne koli bua bini. <sup>18</sup> Ka 'ngú ango-o, yi 'o nadhuku ne olisi, i du di-e ne obhosi ngangá ma'o. Ondu 'ngú na sisiti li kpála amemene e hana-a, aní memene ne kute e de. Engú bini, kpála inde ngakpetse lie ne elö na zabhe-e ngamene siti 'ngú ne kute e makpe. <sup>19</sup> Yi mbila de me kute yi ne eti gba Bu Bhobua-a di? Yi mbila la di de me Bu Bhobua ango-o ngadu bhú yi, Ebhe aha la di pi yi ngae di? Kute yi ne ehe ka yi ade. A ko na Ebhe. <sup>20</sup> Ebhe akala yi bhú kpéke mase. Kaka-a, kute yi dhögö Ebhe bhú ndu 'ngú hana inde yi ngamene e ne di-o.

## 7

### *Polo agie 'ngú pi omabhuka na gudhu na Kolito pindji 'ngú na kuvu*

<sup>1</sup> Mbia inde-e, ma ngagie 'ngú pi yi li ongu maka yi ayi ma lie bhú balua gba yi-o. Ngayi-e, yi ngapa me: «A ndjindji pi bhoko me aní abú 'kpa e li elö de.» <sup>2</sup> Abana mo-o, ma ngabhundja me, kabula nadu nadhuku ne olisi, i du di-e obhosi ngangá de-e maka okoko bhú ká yi ngamemene lie, a ndjindji me bhoko ha elö gba e, amba elö ha di bhoko gba e. <sup>3</sup> A ayo me bhoko mene pi elö gba e ehe inde li bhoko amemene e pi elö maka a ayo lie-o. A ayo la di me elö mene pi 'ko e engú inde li elö amemene e pi bhoko gba e ko.

\* **6:16** 6:16 Nakolo koli kpála bini inde si-e, a kpi ne nakolo koli kute bini. Tsia bhú Dje. 2:24.

<sup>4</sup> Өлө тi да namene ne күте e maka ani akunda lie de. Күте ani ne ehe ka 'ko ani. La di-e, bhoko тi да namene ne күте e maka ani akunda lie de. Күте ani ne ehe ka wala ani. <sup>5</sup> Kpála bini agbíte күте e pi kilí e de. Yi mene bha bini mo-o me yi nde adje liyi bhú dabili bini, ngú na'o mbo nedhinga ngubula nayo Ebhe. Pipita-a, amba yi gie liyi bhú dabili bini, anga yi mene mo-o de-e, yi tí bhú gumu күте, yi tsia tí bhú ekú gba Satana . <sup>6</sup> Engú nagbite күте o ngubula nedhinga bedi ma ngapa e pi yi inde-e, a ko líli de, a ko mangbo ngú napa pi yi me, i du me yi nde amene mo-o, a adú sisiti de.

<sup>7</sup> Ma akunda naali me ndu okpála hana du olingbangi maka ma. La-a, a ti да namene lie mo-o de, anga Ebhe aha makalá pi ní kpi kpi kpi. Ani aha pi okoko naha lio. Ani atsia aha pi okoko nadu olingbangi.

<sup>8</sup> Engú ma ngapa e pi olingbangi ne oekesi-e ngae inde: a ndjindji pi yi nadu kpi yi kpi maka ma. <sup>9</sup> Engú bini, yi u me yi ti да nadu kpi yi kpi de-e, yi de ha liyi. A ndjindji me yi ha liyi nane me gumu күте ha angu yi.

*A ayo me omabhuka inde bhú kuv-a-agbó bhusu o de*

<sup>10</sup> Pi okpála bhende bhú kuv-a, ma ngapa bhobhomu-o ngama Polo ade, a ko Ngámá Yesu Kilisito . Ani apa me, a ayo de me өлө yie bhú kuv-a de. <sup>11</sup> I du me өлө nde ayie bhú kuv-a, ani ahá matá bhoko koko de. I du me ani nde au me ni ti да nadu kpi ni kpi de-e, ani de gie lie bhú kuv-a gba e-o. Pi bhoko-o, a ayo de me ani gie wala e de.

<sup>12</sup> Pi okpála koko-o, ma ngapa 'ngú inde-e ngama, a ko Ngámá Yesu de. Ma ngapa me: i du me a nde ka makilisito na bhobhoko ne өлө inde mupagano-o, i du me өлө ango-o nde akunda nadu ne 'ko e-e, 'ko ani de du ne ani. <sup>13</sup> A bhadi moko pi өлө inde makilisito. I du me 'ko ani nde ne makilisito ade-e, li bhoko ango-o kunda nadu ne wala e-e, u de du ne ani. Өлө-o atsé ani de. <sup>14</sup> Padhá de, anga bhoko inde ne makilisito ade bhomu-o ti да nabhuka ka wala e inde ne makilisito-o. A bhadi moko pi өлө inde ne makilisito ade-o. I du

me 'ko ani nde ne makilisito-o, ani ti да nabhuka ka 'ko e inde makilisito-o. Padhá de, anga i du mo-o de-e, li ongisi gba u-o dú maka ongisi gba okpála inde i bhuka de. Engú bini, u ti да nabhuka ka 'dyi o, i du di-e ka 'hi o inde abhuka-o.

<sup>15</sup> La-a, kpála bhende ne makilisito ade-e kunda nagbo bhusu o ne makilisito-o, u de gbo bhusu o. A moko, kpála inde ne makilisito, i du bhoko, i du di-e өлө-o sa líli bini ngú nadu bha bhú kuv-a bhomu ade. La-a, yi mbila me Ebhe a'i ní me ní du bhú kuv-a bhú guo 'ngú . <sup>16</sup> Mu ti да nambila lele pi, ngamu өлө inde ne makilisito me ni ti да nakobho 'ko ni de-e? I du di-e ngamu bhoko inde makilisito-o, mu ti да nambila lele pi me ni ti да nakobho wala ni de-e?

*A ayo me kpála ne kpála du kala Ebhe lele maka ani adu nani lie-o*

<sup>17</sup> Engú na ngbéngbé inde bhú 'ngú bhomu-o, a ko me kpála ne kpála du maka li Ngámá Ebhe aha pi ani lie-o. A ayo la di me ani du maka ani adu nani lie nedhinga li Ebhe a'i ani lie-o. A bhomu-o líli inde ma aha e bhú ndu oDadjua gba Ebhe-e hana-o. <sup>18</sup> I du me Ebhe nde a'i kpála me ani nde ali gandja ali-e, a ayo de me ani wo gandja inde ani ali e bhomu-o de. I du la me Ebhe nde a'i kpála me ani nde li nga ngandja de-e, a ayo de me ani li gandja-a de. <sup>19</sup> Padhá de, anga li kpála li gandja-a, ani li di gandja de-e ne 'ngbé 'ngú ade. Engú na ngbéngbé-e, a ko namene líli gba Ebhe.

<sup>20</sup> A ayo me kpála ne kpála du lele maka ani adu nani lie li nedhinga li Ebhe a'i ani lie-o. <sup>21</sup> Mu du nani ne bali nedhinga li Ebhe a'i mu lie? Mo odjé tsulu de. Engú bini, i du me a nde pi mu nedhinga me mu koto bhú bali-e, mu de koto. <sup>22</sup> Kpála bhende adu nani bali li nedhinga li Ngámá a'i ani lie akoto mbia inde bhú bali-e akoto, anga ani akpøtø lie ne Ngámá. La-a, kpála bhende ne bali bhú 'ngú na doto ade-e, inde li Ebhe a'i e-e, ani akolo mbia inde-e bali gba Kilisito. <sup>23</sup> Ebhe akala yi ne mase naali. Kaka-a, a ayo de me yi kolo obalise gba okpála na doto de. <sup>24</sup> Ondaise ma, a ayo me kpála

ne kpála dɔ̄ kala Ebhe lele maka ani adɔ̄ nani lie li nedhinga li Ebhe a' i ani lie-o.

### *Engú pindji olingbangi*

<sup>25</sup> Pi okpála bhende i ha nga olisi de, ma ngaha pi yi-e mabhundja gba ma maka kpála inde u ti da naziba e ka bádha bhú 'bu gba Ebhe-o . Ebhe kata ma ngae de. <sup>26</sup> Ka likabhu inde na nedhinga inde, ma abhundja me a ndjindji pi kpála me ani dɔ̄ bha maka ani nde lie-o. <sup>27</sup> Mɔ̄ ngakunda naha ɔ̄lɔ̄? Mo oyála ani de. Mɔ̄ kunda naha ɔ̄lɔ̄ di? Dɔ̄ lingbangi. Mo ohá ɔ̄lɔ̄ de. <sup>28</sup> Engú bini, i dɔ̄ me mɔ̄ nde aha ɔ̄lɔ̄-o, mɔ̄ mene bhomɔ̄-o siti 'ngú de. I dɔ̄ la di me tsa ɔ̄lɔ̄ nde aha bhoko-o, ani mene siti 'ngú de. La-a, yi mbila ndjindji me okpála bhende ngaha olisi ngazɔ̄ likabhu pála doto naali. Ma akunda la de me yi zɔ̄ likabhu bhomɔ̄-o de.

<sup>29</sup> Ondaise ma, ma akunda napa pi yi me, nedhinga inde atigala pi ní-e bedi. Nayie pi mbia inde ngú nanɔ̄ ne kalanɔ̄-o, a ayo me okpála bhende ka o ne olisi dɔ̄ mɔ̄gito me olisi ka uo ade. <sup>30</sup> Okpála bhende ngaku 'gbá-a mene mɔ̄gito me uo bhú likabhu ade. Obhende ngamɔ̄ 'zo-o mene mɔ̄gito me uo bhú djali ade. Obhende ngakala 'he mene mɔ̄gito me ehe ka uo ade. <sup>31</sup> Obhende ngasia tia na doto inde-e mene mɔ̄gito me tia ka o ade. Padhá de, anga doto maka i ngau lie lie mbia inde-e, bhúe matá nedhinga bhelé de.

<sup>32</sup> Ma akunda me yi adú ne likabhu de. Bhoko bhende i ha ɔ̄lɔ̄ de-e gbite lie li engú gba Ebhe, ani ngagili nanga li Ebhe. <sup>33</sup> Engú bini, bhoko bhende aha ɔ̄lɔ̄-o, agbite lie li ongú na doto, ani ngagili namene engú inde anga li wala e. <sup>34</sup> Ani agbo la di bhɔ̄sɔ̄ e li di kulu bhisi. A bhadi moko pi ɔ̄lɔ̄ inde aha bhoko, ani ngagbite lie li 'ngú na doto. Ani ngagili namene engú inde nganga li 'ko e. Engú bini, pi ɔ̄lɔ̄, i dɔ̄ di-e tsa ɔ̄lɔ̄ bhende i ha nga bhoko de-e, ani ngagbite lie li engú gba Ngámá. Padhá de, anga ani akunda naha lie pi ani bhú ndɔ̄ 'ngú hana inde ani ngamene e, ne bhende ani ngabhundja e-o.

<sup>35</sup> Ma ngapa 'ngú bhomɔ̄-o ngabula bádha 'ngú gba yi, ma pa ngabula na'o tili kili li 'ngbu yi de. Engú bini, a ko ngabula me yi mene engú inde ndjindji, amba yi kpata la di Ngámá Yesu ne bua yi hana.

<sup>36</sup> La mbia inde-e, i dɔ̄ me makombi bini nde akpe namene siti 'ngú li pabili gba tsa ɔ̄lɔ̄ inde ani abedhe ne gamɔ̄ naha e, ani bhundja me a ayo me engú ango-o kpata kpadji na ndjindji-e, ani de mene maka ani au lie. Ani mene siti 'ngú de. U de ha lio maka li bhoko-o akunda lie-o. <sup>37</sup> Engú bini, i dɔ̄ me makombi-e nde apa me ni ha tsa ɔ̄lɔ̄ bhomɔ̄-o de-e, i dɔ̄ me engú ango-o nde ayie li bua ani makpe me u nde kata ani tété gandji de-e, ani amene bhadi bádha 'ngú. <sup>38</sup> Bhoko bhende aha tsa ɔ̄lɔ̄ inde nako ani adɔ̄ nakunda naha e amene bádha 'ngú. Engú bini, bhoko bhende apa naae me ni ha ani de-e, amene bádha 'ngú naali.

### *Engú pindji oekesi*

<sup>39</sup> ɔ̄lɔ̄ inde li 'ko e nde bhú ka-a ti da nadɔ̄ ne bhoko koko de. Engú bini, i dɔ̄ me bhoko ango-o nde akpi-e, bhobhomɔ̄-o aha kpadji pi ani ngú naha bhoko koko maka ani akunda lie. La-a, a ayo me bhoko ango-o dɔ̄ ne makilisito. <sup>40</sup> Engú bini, ngama-a, ma abhundja me i dɔ̄ me ani nde adɔ̄ kpi e kpi-e, ani dú bhú djali nane me ani ha matá bhoko koko. Ma pa mo-o, ma abhundja me Bhobua gba Ebhe-e di bhú ma.

## 8

### *Kpadji na imbilangɔ̄ di ne kpadji na mukunda*

<sup>1</sup> Mbia inde-e, ní tsia nga 'ngú pindji so 'nɔ̄ inde u aha e pi oebhe na eu. A na paká me imbilangɔ̄ bhú ndɔ̄ ní hana, maka yi ngapapa lie-o. 'E-e! Imbilangɔ̄ ango-o ti da naha pi kpála 'ngbé 'ndji. Engú bini, mukunda naae ngadyudyo ní bhú nabhuka ne kalanɔ̄. <sup>2</sup> Kpála bhende ngabhundja me ni ambila 'ngú-o mbila nga maka a ayo lie me ani mbila-a de. <sup>3</sup> Engú bini, kpála kunda Ebhe na paká paká-a, Ebhe ambila kpála ango-o.

*Yi ató ondaise yi bhú ngita de*

<sup>4</sup> Píndjì 'ngú inde atsia so 'nú inde u aha e pí oebhe na eu-o, ní ti da nazuzu, ne me ní ti da nazuzu de? Ní mbila ndjindji me oebhe na eu ne oehe na kukulú ade. Ní ambila di me, Ebhe bha koli e bini kpi e kpi. <sup>5</sup> A na paká me a abhúlá di ne pála doto ne oehe inde li okpála ngadhègè o maka oebhe gba o. Ongua oebhe na eu bhomu-o bhelé, u di ngako pí okpála. <sup>6</sup> La pí ní-e, ní mbila ndjindji me koli Ebhe bha bini. A ko 'Dyi ní inde abho ndu 'he hana pála doto. Anì atsia abho di ní me ní du pí ní. Ní la bhadi ne koli Ngámá bini, a ko Yesu Kilisito . Ndu 'he hana ngayie ka anì, ní di ngasia mukobho ka anì.

<sup>7</sup> Engú bini, i du me ní nde ambila me mukobho bhú oebhe na eu ade-e, a ne okpála inde imbila nga kukulú 'ngú ango-o má kpulakutu de. Okpála koko bhú ká yi adu nadhègè oebhe na eu. La mbia inde-e, uo bha ngazu so 'nu ango-o ne nabhundja me oebhe na eu bhomu-o ne angu pépé. Okpála ango-o nga bha bhuhuku li kpadji gba Ebhe. Abhomu-o, u ngabhundja me so 'nu ango-o ngato o bhú siti 'ngú kala anì. <sup>8</sup> Ní mbila ndjindji me ezú bini ti da nadyudyo ní de Ebhe masikpe de. Belegu ní zu, belegu ní zu de-e, a méne 'ngú bini li ní de.

<sup>9</sup> 'E-e! Yi lila liyi me, kpadji inde u aha e pí yi ngú nazú ndu 'he hana-a, a tó okpála bhende bhuhuku bhú nabhuka bhú siti 'ngú de. <sup>10</sup> Padhá de, anga i du me kpála inde bhuhuku bhú nabhuka nde au mu, ngamu kpála inde ambila kukulú 'ngú ambila-a, mu nde ngazu so 'nu inde u abhelè e pí oebhe na eu bhú eti u adhedhègè uo bhú e, mo ombhundja naamu me anì ti da di nazuzu di? <sup>11</sup> Kaka-a, kpála inde bhuhuku ango-o, ndai mu inde li Kilisito akpi pí e tsia ngita ka mu, kabula engú nasisiti inde mo omene e, ngamu kpála ambila kukulú 'ngú má kpulakutu-o ambila-o! <sup>12</sup> Namene ngua siti 'ngú bhomu-o li pabili gba ondaise yi-e, di ne na'o eka li bua uo inde nakpokpo kú 'ngú inde bhuhuku bhomu-o, a ko namene siti 'ngú li Kilisito ngae makpe.

<sup>13</sup> Kaka-a, i du me ezú bini nde ngato ndai ma bhú siti 'ngú-o, ma zú matá ezú ango-o de, amba ndai ma atí bhú siti 'ngú ka ma de.

## 9

### *Lele li Polo adu nakpokpo Bádha Ngali gba Yesu Kilisito lie-o*

<sup>1</sup> Ngama-a, ma ti da nasia ndu 'he hana maka suka obhulu titima gba Ngámá gba ní Yesu Kilisito di? Ngama-a, ma u anì ne djila ma makpe di? Ngayi-e, yi bhuka anì ka kulu gba anì inde ma amene e bhú ka yi-e di? <sup>2</sup> Belegu li okpála koko ziba de me ma ne suka obhulu titima gba Yesu-o di-e, la pí yi-e, ma ne bhulu titima gba anì. Padhá de, anga nau me yi akpètso liyi ne Ngámá-a asuno na paká me, ma ne bhulu titima gba anì, anga ma akpokpo Bádha Ngali-e pí yi ngama.

<sup>3</sup> Eli inde ma agie e pí okpála inde ngapa 'ngú li ma sisiti-e ngae inde: <sup>4</sup> A ayo di de me ya sia ezú di ne ehe nandji mandji kabula kulu inde ya ngamene e di? <sup>5</sup> Yi abhundja naayi me li ya ha elè inde makilisito me ya du nadhuku bhú dabili bini ne anì maka Piele ne obhulu titima koko gba Yesu, di ne ondaise Yesu-o, amba ko siti 'ngú? <sup>6</sup> Yi abhundja naayi me, okpála inde a ayo me u mene kulu ne 'kpa o ngú nakobho ka o-o bha ne ya ne Balabasi? <sup>7</sup> Kpála inde bhú kulu na sudha-a haha makalá gba e pí e ngae makpe uu? Belegu de bini. Li kpála lu edyi-e, anì zuzu ezú ango-o di, i du me kpála nde ngalila enu-o, anì ndjindji miliki na 'ka 'nu ango-o di?

<sup>8</sup> Ongú inde ma apa e bhomu-o, a ko bha bini bhende li okpála ngabhundja e ngao-o de. U aye bhadi bhú líli gba Moidje-e moko. <sup>9</sup> Padhá de, anga u aye bhú líli ango-o me: «I du me bagala nde ngatu ngano-o, mo ogbíte 'bhè anì de. 'O me anì zu mbo té ngano ango-o uu.†» Yi abhundja naayi me Ebhe apa 'ngú bhomu-o bha bini pí obagala? A mo-o ade. <sup>10</sup> Ebhe apa 'ngú bhomu-o pí ní makpe adi? A na paká me anì apa pí ní.

† 9:9 9:9 Tsia bhú Det. 25:4; di ne bhú 1 Tim. 5:18.

Padhá de, anga kpála inde ngalu 'dyi-e nga'o 'to e li ezú inde ani asía e-o. A bhadi ndjindji me kpála bhende nga'e nguwa abhiye-e sia té nguwa ango-o.

<sup>11</sup> Ya akpokpo Bádha Ngali pi yi maka u alulu nguwa lie abhiye-o. I dú la me yi nde ateteke ya ne tia na doto-o, amba a ko siti 'ngú? <sup>12</sup> I dú me okpála koko nde ngasia tia na doto ka yi-e, ka ni ngaya-a, ya ti da nasisia ka yi lie de-e? Engú bini, ya tsia yo ehe ka yi de. Ya ngakibila ndú líkabhu hana inde ngakolo lí kúte ya-a, anga ya kúnda namene engú inde i ní kpadji pi okpála me u adjé Bádha Ngali gba Yesu Kilisito-o de-e de.

<sup>13</sup> Yi mbíla de me okpála inde ngamene kulu bhú 'ngbé 'ti Ebhe-e ngasia ezú gba o bhú kulu inde u ngamene e adi? Obhende ngatsulu enú pi Ebhe-e ngasia tété ngú nazuzú adi? <sup>14</sup> A bhadi moko pi okpála bhende ngakpokpo Bádha Ngali-o. Ngámá gba ní-e apa me, okpála inde ngakpokpo Bádha Ngali-e, akóbho bhadi lí Bádha Ngali.†

<sup>15</sup> Engú bini, belegú inde lie mo-o, ngama-a, ma yo ehe bini ka yi de. Ma pa pi yi de me, ma aye balúá inde-e pi yi me yi tima 'he muma-a de. A ndjindji muma naali me ma kpi ne gumú! A ayo de me kpála bhélé engú inde ma nde ne gindaginda ka e de. <sup>16</sup> Nakpokpo Bádha Ngali ma ngakpokpo e-e ha kpadji muma de me 'ndji ma be-e de. Padhá de, anga Ebhe ngae makpe apa muma me ma kpokpo Bádha Ngali ango-o. A moko, a ko líkabhu muma i dú me ma nde kpokpo Bádha Ngali-e de ko. <sup>17</sup> I dú nani me ma alo kulu ango-o ngama-a, a de adú ndjindji me u ha makalá muma tété. A la mo-o ade. Ma lo kulu ango-o ngama makpe de. Ma ngamemene anga Ebhe a'o kulu ango-o sakpa ma. <sup>18</sup> Makalá ma ngasia e lí kulu ango-o ne ní? Makalá gba ma ne nakpokpo Bádha Ngali-e mandí nayo 'he. Maka kpála nakpokpo Bádha Ngali-e, ma ti da nayo 'he ka yi, la-a ma yó ehe bini de.

*Polo ateteke kpála ne kpála bhú dasúndú gba e ngú nabhuka Ngámá Yesu*

<sup>19</sup> Ma bhú ngú ma, ma ne bali gba kpála bini ade. La-a, ma atsia a'o lima bali gba ndú okpála hana, ngubula me ma sia okpála bhelé ngú nabhuka Ngámá Yesu. <sup>20</sup> Lí ma dú bhú ká omaYuda-a, ma dú maka uo ngubula me ma teteke uo ngú nabhuka Ngámá Yesu. Ma ambíla ndjindji me líli gba Moidje ne angu pí ma ade. Engú bini, i dú me ma nde bhú ká okpála inde ngamene líli ango-o, ma améne múgito me ma sa líli ango-o ngubula me ma teteke uo ngú nabhuka Ngámá Yesu.

<sup>21</sup> Lí ma dú bhú ká okpála bhende i mbíla líli gba Moidje de-e, ma adú bhadi maka uo ngubula me ma teteke uo ngú nabhuka di Ngámá Yesu. Bhobhomú-o kúnda napa de me ma mene líli gba Ebhe de-e de. Ma ngamemene anga ma ngamene líli gba Ngámá Yesu Kilisito. <sup>22</sup> Lí ma dú bhú ka okpála inde bhúbhukú lí kpadji gba Ebhe-e, lí ma 'ó di lima bhúbhukú ngú nateteke uo ngubula me u kolo kpekpeke bhú nabhuka Ngámá Yesu. Belegú lí okpála dú lele pi-ie, i dú me ma nde akolo bhú ká uo-o, ma dú bhadi maka uo ngubula me ma teteke okpála koko bhú ká uo ngú nabhuka Ngámá Yesu, amba u kobho. <sup>23</sup> Ma ngamene ndú 'ngú bhomú-o hana ngubula me Bádha Ngali-e nú ne kalanú, amba Ebhe tuko bisagu pí ma bhú kulu ango-o.

*A ayo natsia 'kpí lío ndjindji bhú nabhuka*

<sup>24</sup> Yi mbíla de me, okpála inde agugu holo-o, u dúdú okpála bhelé, engú bini kpála bhende akokoto kalanú-o sisia makalá ngae. Yi mene ne kpéke maka okpála inde ngagu holo, amba yi sia di makalá. <sup>25</sup> Ndú okpála hana inde agugu holo-o dúdú sa líli nakpekpeke. U ngamene mo-o ngubula nasia makalá. La-a, makalá ango-o bhúe de. Engú bini nganí-e, ní ngamene ngubula nasia makalá inde adú dúdúma ne dúdúma. <sup>26</sup> Kaka-a ngama-a, ma ngagu holo nganga

† 9:14 9:14 Tsia bhú Luk. 10:7; di ne bhú Mat. 10:10.

ade. Ma la di maka kpála inde ngagu gbele me ani nde ngatsia 'kpí lie ndjindji. <sup>27</sup> Ma ngamene kute ma kpekpeke ngú napa me kute ma mene líli gba ma-o, amba li sokpí-e, Ebhe abhíke ma de, pita nakpokpo Bádha Ngali pi okpála koko-o.

## 10

### *Yi lila liyi ka nale-e malila*

<sup>1</sup> Ondaise ma, ma ngagbele 'dje yi mo-o, ngubula me yi bhundja nga matá engú inde akolo nani li onguo ogbi ní bhú nedhinga u adu adhúku lie nganda Moidje-o. † Ebhe abuku nani ndu uo hana ne ndindi ngú nalila uo. Ndu uo hana agulu nani 'ngbé 'ngu na Mbembe. <sup>2</sup> Nabuku uo ne ndindi ne nakodho 'kpí ka uo bhú 'ngu-o amana mugito me Ebhe aha pi uo bhomu-o Batisimo, ngubula me u kpetsə lio bini ne Moidje. <sup>3</sup> Ndu uo hana azu ezu inde adu ayie ka Ebhe. † <sup>4</sup> Ndu uo hana andji engu inde adu akoto bhú teme. Teme ango-o, a ko kulu Yesu Kilisito inde adu adhúku ne uo bhú dabili bini-o. <sup>5</sup> La-a, belegu u au ongamba 'ngú bhomu-o lie hana-a, okpála bhelé bhú ká uo du amene engú inde anga li Ebhe-e de. Kaka-a, u amu, u atsia atigala bhú 'gu. †

<sup>6</sup> Ongú bhomu-o ngasuno pi ní me, ní adú ne gumu namene siti 'ngú maka onguo ogbi ní de. † <sup>7</sup> Yi ayó oebhe na eu maka okoko bhú ká uo amene nani lie de. Padhá de, anga u aye bhú Bhuku gba Ebhe-e me: «Okpála adulu kuto ngubula nazu anokomia. Pipita-a, u atsia ayie bhúlá ngú nadho 'bi kala kulu ebhe na eu. †» <sup>8</sup> Okpála koko bhú ká uo adu adhúku ne olisi ngangá. Kaka-a, okpála ketə ndjikpa bhisi ne ká bata atsia amu bhú koli 'kpí bini. Pi ní-e, ní améne maka uo de. † <sup>9</sup> Okpála koko bhú ká uo ale Ngámá. Kaka-a, okpulu adolo uo má bi bi bi, uo atsia amu. Pi ní-e, ní améne maka uo de. † <sup>10</sup> Okpála koko bhú ká uo adu adi mutokono li Ebhe. Kaka-a, andjelu gba Ebhe inde abhəbhələ kpála-a, a atsia ago

abhili uo. Pi yi-e, yi adí mutokono li Ebhe maka uo de. †

<sup>11</sup> Ndu ongú bhomu-o hana akolo li uo ngubula nateteke okpála koko me u améne maka uo de. U aye ongú ango-o bhú Bhuku gba Ebhe ngubula me asuno kpadji pi ní, nganí inde ngakobho li sokpí-o. <sup>12</sup> Kaka-a, kpála bhende ngabhundja me ni alu bhú nabhuka kpekpeke-e lila lie ndjindji me ni atí-i de. <sup>13</sup> Nale inde ngabhaka yi-e, a ko nale inde ngakolo bha li ndu okpála hana. Ebhe atéteke yi maka ani apa lie-o. Ani ti da naka kpadji de me engú inde akólo li yi-e ha angu yi-e de. Engú bini, i du me nale nde akolo li yi-e, Ebhe há angu pi yi ngú nakikibila. Ani tsia téteke yi me yi atí-i de.

### *Yi lila liyi ka oebhe na eu-o malila*

<sup>14</sup> Kaka-a, ondaise ma na mukunda, yi 'o nadhege oebhe na eu ma'o. <sup>15</sup> Ma ngagama 'ngú pi yi maka okpála na imbilangu. Yi aló doto bhú 'ngú ma ngapa e ngayi makpe. <sup>16</sup> Nedhinga ní adulu lie pi misa gba Ngámá-a bhú dabili bini-e, ní ngandji vino inde ní ngagie heni pi Ebhe ngú e-o. Ní akpetsə liní bhomu-o ne Yesu Kilisito bhú ngute e. Li ní gumu mapa-a ngú nazuzu-o, ní akpetsə bhomu-o liní bhú kute Yesu Kilisito. <sup>17</sup> Koli mapa-a bha bini. Belegu ní nde lie bhelé-e, ndu ní hana ní ngazu koli mapa bini bhomu. Bhobhomu-o ngasuno me ní akpetsə liní, ní akolo bini.

<sup>18</sup> Yi bhundja nga okpála na Isalaele. Nedhinga u ngazu enu inde u aha e pi Ebhe lie, u akpetsə lio bhomu bhú dabili bini ne Ebhe inde u aha enu bhomu-o pi e-o. A mo-o adi? <sup>19</sup> Ma akunda napa bhomu-o pi? Ma akunda napa me, ebhe na eu di ne enu inde u ha e pi ani-e, a ne tata? <sup>20</sup> A mo-o ade. Ma apa mangbo me, li okpála bhende imbila Ebhe de-e du naha 'he bhú 'ti oebhe gba o-o, u haha pi odjabulu. U haha pi Ebhe de. La-a, ma kunda de me yi kpetsə liyi ne odjabulu-o de. <sup>21</sup> Yi ti da nandji vino bhú kópo gba

† **10:1** 10:1 Tsia bhú Eki. 13:21-22, 14:19-29. † **10:3** 10:3 Tsia bhú Eki. 16:35. † **10:5** 10:5 Tsia bhú Nom. 14:16, 29-30. † **10:6** 10:6 Tsia bhú Nom. 11:4, 34. † **10:7** 10:7 Tsia bhú Eki. 32:6. † **10:8** 10:8 Tsia bhú Nom. 25:1-18. † **10:9** 10:9 Tsia bhú Nom. 21:5-6. † **10:10** 10:10 Tsia bhú Nom. 17:6-14.



Ngámá Yesu, yi tsia ndjí di bhú bhende gba odjabulú-o de. Yi ti da nazú 'he pí misa gba Ngámá, yi tsia zú di pí misa gba odjabulú-o de. <sup>22</sup> Yi abhundja me ní kpekpeke ane Ngámá-a? Ní akúnda me bua ani ke ne ní?

*Yi mene ndú 'ngú hana ngúbula nadhögö Ebhe*

<sup>23</sup> Okpála koko bhú ká yi ngapa me: «Ya ne omakilisito, ya ti da namene ndú 'ngú hana.» A na paká, engú bini, ongú koko ti da nateteke ní de. Yi ngapa me: «Ní ti da namene ndú 'ngú hana.» La-a, ongú koko ti da namene de me okpála koko bhele li kpadji gba Ebhe-e de. <sup>24</sup> A ayo de me kpála 'o bha 'to e 'to e makpe de, engú bini, a ayo me ani 'o di 'to e 'to okpála koko.

<sup>25</sup> Yi ti da nazú ndú enú hana inde u ngatsindji e bhú daposó me yi nde yi 'ngú tété de kabula bua nakpokpo ku 'ngú gba yi-o. <sup>26</sup> Padhá de, anga Bhuku gba Ebhe-e apa me: «Doto ne ndú 'he inde bhúbhú-o hana ne tia ka Ngámá.†»

<sup>27</sup> † dú me mupagano nde a'i mú agba e ngú nazú 'he-e, i dú me mú nde akúnda nanú-o, li mú kolo-o, mú de zú ndú 'he hana u ahá e pí mú-o, mo oyí 'ngú bini de kabula bua nakpokpo ku 'ngú gba mú-o. <sup>28</sup> La-a, i dú me kpála nde apa pí mú me enú inde mú ngazú e bhomú-o, a ko enú inde u aha e pí oebhe na eu-o, mo ozú-ú de, amba bua nakpokpo kú 'ngú gba kpála inde apa 'ngú ango-o pí mú-o asíti de. <sup>29</sup> Ma ngapa 'ngú bhomú-o pindji 'ngú inde li kpála bhomú-o ti da nabhundja e li bua nakpokpo kú 'ngú gba e-o. Ma pa ngúbula bua nakpokpo kú 'ngú gba mú-o de. Ka ní ma améne 'ngú lie li lele mabhundja gba kpála koko, ma nde mene mangbo maka ma ngabhundja lie ngama makpe-e di-e? <sup>30</sup> † dú me ma nde agie heni pí Ebhe ngúbula ezú-o, ka ní li kpála koko nga uu lie sisiti-e?

<sup>31</sup> Abhomú-o, i dú me yi nde ngazú 'he, i dú di-e me yi nde ngandji 'he nandji mandji, i dú di-e me yi nde ngamene mangua 'ngú koko dho i-e, yi de mene

ndú 'ngú bhomú-o hana ngú nadhögö 'li Ebhe. <sup>32</sup> Yi améne engú inde li okpála koko ti da nati ka e de, abana omaYuda, abana obhende ne omaYuda ade, abana okpála na Piga gba Ebhe. <sup>33</sup> Ngama-a, ma bhadi ngamene mo-o. Ndu 'ngú ma ngamene e hana, ma ngamemene me a nga li ndú okpála hana. Ma bha ngabhundja engú inde atéteke ma-a ade. Ma ngabhundja mangbo pindji engú inde i ti da nateteke okpála bhelé, amba Ebhe kobho uo.

## 11

<sup>1</sup> Yi kpata engú inde ma ngamene e maka ma ngakpata bhende gba Kilisito lie-o.

*Lele nadú ka obhosi di ne olisi bhú nedhinga nayo Ebhe*

<sup>2</sup> Ma ngaha apepe pí yi, anga yi ngabhundja ma bhú ndú 'ngú hana. Yi la di ngamene olíli gba omabhuka inde ma asuno e pí yi-o. <sup>3</sup> La-a, ma akúnda me yi mbíla engú inde: Kilisito ne Ngámá pí 'ndji bhoko. Bhoko ne ngámá pí 'ndji elö. Ebhe ne Ngámá pí 'ndji Yesu Kilisito. <sup>4</sup> † dú me bhú nedhinga nayo Ebhe, li bhoko dú nayo Ebhe, ani dú di-e nakpokpo eli inde ani asia e ka Ebhe me ani nde adyi ndata-a, amba ani ngaha bhomú-o numú pí Ngámá gba e-o. <sup>5</sup> Engú bini, i dú me bhú nedhinga na mayo-o, li elö 'o 'ndji e padhá li nedhinga ani ngayo Ebhe lie, i dú di-e li nedhinga ani ngakpokpo eli inde ani asia e ka Ebhe-e lie-e, elö ango-o ngaha numú pí ngámá gba e-o. Ani maka elö inde aka 'ndji e maka. <sup>6</sup> † dú me elö nde ga kitambala bhú 'ndji e de-e, amana mugito bhomú-o me ani aka 'ndji e maka. † nde la lie me a nde numú pí elö ngú naka 'ndji e ndundundu, i dú di-e ma ngbidhidhi-e, a ayo me ani ga kitambala bhú 'ndji e.

<sup>7</sup> La pí bhoko nedhinga ani ngayo Ebhe lie-e, a ayo de me ani dyi ndata-a de, anga Ebhe abho ani li kulu e. Ani ngasuno sangu gba Ebhe. La pí elö-o, ani ngasuno sangu gba bhoko. <sup>8</sup> Yi mbíla ndjindji me,

† 10:26 10:26 Tsia bhú Ets. 24:1.

Ebhe bho gina bhoko li ɛlə de, engú bini ani abho mangbo gina ɛlə li bhoko. <sup>9</sup> La di-e, Ebhe bho bhoko pi ɛlə de, ani abho mangbo ɛlə pi bhoko. <sup>10</sup> Kaka-a, i nde lie me Ebhe abho ɛlə mo-o, a ayo me ani ga kitambala bhú 'ndji e ngú nasuno me ani ti da nayo Ebhe, amba oandjelu mbila me ndu 'ngú hana li lelele.

<sup>11</sup> Ní mbila ndjindji me kala Ngámá-a, olisi ne gumu obhosi, obhosi la di ne gumu olisi. <sup>12</sup> Padhá de, anga maka u abho nani ɛlə lie li bhoko-o, a bhadi moko a ngazu bhoko ne ɛlə, la di-e, ndu 'he hana ngayie ka Ebhe.

<sup>13</sup> Yi pa nga ngayi, a pi ɛlə ndjindji nayo Ebhe me ani nde buku 'ndji e di? <sup>14</sup> Ndu okpála na píla doto hana mbila ndjindji me a ko nümü pi bhoko ngú na'o sundjo e ndjandjandja. <sup>15</sup> La pi ɛlə-o, ndjandja sundjo-o, a ko bádha 'ngú naali. Padhá de, anga Ebhe aha nani sundjo pi ɛlə ngú nabuku 'ndji e ne di. <sup>16</sup> I du me kpála nde akunda nabi bhayiki li 'ngú bhomu-o, a ayo me ani mbila me lele dasundu gba ní-e ngae bhomu. Piga gba Ebhe-e alu la bhadi pí 'ngú bini bhomu.

*Polo agbele 'dje omabhuka li lele nazu komonyo*

*(Tsia bhú Mat. 26:26-29; ne bhú Mlk. 14:22-25; di ne bhú Luk. 22:15-20.)*

<sup>17</sup> Ní kodho 'kpí li 'ngú koko. Ma ti da nadhögø yi tété de. Padhá de, anga nedhinga yi ngakpøtsø liyi lie ngú nayo Ebhe-e, engú yi ngamene e ngagie mangbo yi ne sidi. A dyudyo yi ne kalanu de. <sup>18</sup> Na bini-e, u apa muma me nedhinga yi ngakø liyi lie bhú dabili bini-e, yi ngagbogbo bhusu yi. Ma abhundja me a ti la bhadi nadu moko. <sup>19</sup> A ayo la bhadi me nagbo bhusu o du bhú ká yi, amba okpála mbila obhende ngakpata Yesu Kilisito ne bua o bini-o. A mo-o adi! <sup>20</sup> Nedhinga yi ngakpøtsø liyi lie ngú nazu ezu gba Ngámá-a, yi ngabhundja ani bhúbhú ade. <sup>21</sup> Okpála koko bha bini ngagbene lio ngú nazu 'he gba o makpe. Ka 'ngú ango-o, okoko ngalangba, okoko la ngadulu gumu. <sup>22</sup> Gbágbá li yi ade ngú nazu 'he di ne ngú nandji pandi tété-e?

Ne me yi ngau Dadjua gba Ebhe-e padhá. Yi atsia akunda naha nümü pi okpála inde li ehe nde ka o ade. Yi nga'o 'to yi me ma pá pi yi pi? Ma adhögø yi lele pi me yi ngamene bádha 'ngú-o? A mo-o ade. Ma adhögø yi tété de.

*Lele nazu komonyo*

<sup>23</sup> Ongú inde ma asuno e pi yi ngama makpe-e, ma asia ka Ngámá Yesu. Engú ango-o me: sukpe inde u adjí apú ani lie pi obhulu yala-a, Ngámá Yesu aha mapa, <sup>24</sup> ani agie heni pi Ebhe, ani agugumu, ani atsia apa me: «A inde-e kute ma inde ma aha e pi yi-o. Yi du amene me-e, ngú nakina ma.» <sup>25</sup> Pita u andjia nazu 'he-e lie, ani aha bhadi kópo na vino moko. Ani atsia apa me: «Vino inde-e, ngasuno gandja na mbia inde li Ebhe akodho e ne yi-o. Gandja ango-o alu pí ngute ma. Ndu nedhinga hana inde yi adú andjindji lie, yi du andjindji ngú nakina ma.» <sup>26</sup> Li bili bhomu-o, Ngámá Yesu akunda napa me: ndu nedhinga hana inde yi azú mapa lie di ne nedhinga inde yi andjí vino lie mo-o, yi bhomu-o ngakpokpo pi okpála mbámbá nakpi ka ani akolo li 'kpí inde ani agie lie lie-o.

<sup>27</sup> Kaka-a, kpála inde azú mapa gba Ngámá Yesu, inde andjí la di vino gba ani-e li lelele de-e, asia mangimbo anga ani andjo kute Ngámá Yesu, ani atsia andjo di ngute ani. <sup>28</sup> A ayo me kpála ne kpála tsia lie makpe ngae bhúbhulu, amba pipita-a, ani tsia zu mapa, amba ani ndji di vino gba ani-o. <sup>29</sup> Padhá de, anga li kpála zu mapa gba Ngámá Yesu, ani tsia ndji di vino gba ani-e me ani nde ngauu maka i de ehe na padhá-a, ani bhomu-o ngagbele mangimbo pí e ngae makpe. <sup>30</sup> A bhomu-o, engú inde yi ngau ka e me okpála bhelé bhú ká yi ne kuo, okoko bhúbhuku, la di-e, okoko bhelé amu. <sup>31</sup> I dú me ní dú atsia bua ní nganí makpe kala nazuzu-o, Ngámá de kódho 'ngú gba ní-e de. <sup>32</sup> Engú bini, Ngámá ngakodho 'ngú gba ní-o, ani di ngalili ní ngubula me ani a'ó galikpe engú pí 'ndji ní bhú dabili bini ne pí 'ndji okpála koko de.

<sup>33</sup> Ka 'ngú ango-o, ondaise ma, nedhinga yi ngakpɔtsɔ liyi lie ngú nazɔ ezɔ gba Ngámá-a, yi dje liyi sɔnda yi. <sup>34</sup> Ɔ dɔ me sɔka yi nde ne gɔmɔ-o, a ayo me ani zɔ ngaiza 'he agba e, ngɔbɔla me yi agbéle mangimbo gba Ebhe-e pí yi de bhú nakpɔtsɔ lie gba yi-o. Pɔndji ongú koko inde yi ayi e-e, ma agíe 'ngú pí yi pépé nedhinga ma akólo lie agba yi-o.

## 12

*Angu inde li Bu Bhobua ngaha e pi kpála ne kpála ngú nateteke Piga gba Ebhe-o*

<sup>1</sup> Ondaise ma, pɔndji engú bhende atsia angu li Bu Bhobua ngaha e pi kpála ne kpála ngú nateteke Piga gba Ebhe-e, ma akɔnda me yi mbila 'ngú tété. <sup>2</sup> Yi mbila ndjɔndji me nedhinga yi adɔ nga lie ne omɔpagano-o, osisiti bua adɔ agbele yi li pápá gba oebhe na eu inde i gama 'ngú de-o. U atsia amba bhúla yi li okpadji ngangá. <sup>3</sup> Kaka-a, ma apa pí yi mbámbá lele nambila me kpála ngagama 'ngú bhú angu gba Bu Bhobua. Kpála dɔ nagama 'ngú bhú angu gba Bu Bhobua-a, ani ti da napa de me a ayo me u tɔ pɔdjo li Yesu-o de. Engú bini, li kpála pa me: «Yesu ne Ngámá-a», a akɔnda napa me Bu Bhobua akata ani ngae.

<sup>4</sup> Angu li Bu Bhobua ngaha e pi kpála ne kpála ngú nateteke Piga gba Ebhe-e kpi kpi kpi, la-a, ngaani Bu Bhobua inde ngaha angu ango-o, koli ani bha bini má kpikili! <sup>5</sup> Ní ti da namene kulu pí Ngámá Yesu li okpadji ngangá, la-a, ngaani Ngámá Yesu inde ní ngamene kulu ango-o pí e-e, koli ani bha bini má kpikili! <sup>6</sup> Ebhe ngaha angu pí okpála kpikpikpi ngú namene kulu gba ani-e ne di. La-a, Ebhe bhulɔ naha angu bhomɔ-o pí okpála-a, koli ani bha bini má kpikili!

<sup>7</sup> Angu gba Bu Bhobua-a ngasuno lie bhú kpála ne kpála ngɔbɔla me ani teteke okpála koko ne angu ango-o. <sup>8</sup> Bu Bhobua ngaha pí okpála koko-o angu nagama 'ngú ne imbilangɔ. Pí okpála koko-o, Bu Bhobua bini bhomɔ-o ngaha angu nasuno 'ngú gba Ebhe-e pí okpála. <sup>9</sup> Bu

Bhobua bini bhomɔ-o ngaha pí okpála koko angu nadɔ ne nabhuka na kpekpeke. Koli Bu Bhobua bini bhomɔ-o ngaha pí okpála koko angu nadɔ nakobho okuo li okpála. <sup>10</sup> Bu Bhobua ngaha pí okpála koko angu namene ongamba 'ngú . Pí okoko-o, ani ngaha angu nakpokpo engú maka opolofeta . Pí okoko-o, ani ngaha angu nambila nagbogbo bhɔsɔ osisiti bua ne Bu Bhobua. Pí okoko-o, ani ngaha angu nagama 'ngú bhú eli gba oandjelu. Pí okoko-o, ani ngaha angu nambamba tata. <sup>11</sup> Ndɔ 'ngú bhomɔ-o hana ngayie ka koli Bu Bhobua bini. Ani ngaha pí kpála bini ne bini angu maka ani akɔnda lie.

*Piga gba Ebhe-e maka kute kpála inde ne oyáyá lie bhelé*

<sup>12</sup> Kute Yesu Kilisito maka kute kpála-kuti inde li oyáyá nde lie bhelé. Mɔ tsia 'lá kpála-kuti-e, yáyá li ani bhelé, kute ani la bha koli e bini má kpikili! Abana li yá kpála nde lie bhelé-e, ndɔndɔ hana amene bha koli kute bini. <sup>13</sup> Ndɔ ní hana, abana omaYuda ne okpála inde ne omaYuda ade, abana okpála inde bhú bali ne obhende bhú ngu o, ndɔ ní hana ní asia nani batisimo ngú napa me ní kolo maka kute bini li kpadji gba Bu Bhobua bini. Ndɔ ní hana, ní atsia asia bhadi angu gba Bu Bhobua bhomɔ-o.

<sup>14</sup> Mɔ tsia kute kpála-kuti-e, oyáyá tété bhelé, a bha koli e bini ade. <sup>15</sup> Li 'dɔ kpála pa me: «Ma ne yá kpála ade anga ma nde ne kpele kpála ade-e», a ko de me ani ayie yá kpála kaka-a de. <sup>16</sup> Li 'dje kpála pa me: «Ma ne yá kpála ade, anga ma ne djila kpála ade-e», a ko de me ani ayie yá kpála kaka-a de. <sup>17</sup> Ɔ dɔ me 'lá kpála-kuti libhomu dɔ bha ne djila-a, kpála de adú nadjé 'kpí lele pí? Ɔ dɔ di me 'lá kpála-kuti libhomu nde bha ne edje-e, kpála de adú nadjé se 'he lele pí? <sup>18</sup> A na paká me Ebhe a'o nani oyá kpála-kuti maka ani akɔnda lie. <sup>19</sup> Ɔ dɔ me Ebhe 'ó nani li kpála bha koli yáyá bini-e, u de 'í de me a ko kpála-kuti-e de. <sup>20</sup> Engú bini, a mo-o ade. Oyáyá li kute koli kpála bini-e bhelé.

<sup>21</sup> Kaka-a, djila ti da napa pi ekpa de me: «Ma ne gumu mu ade-e de.» La di-e, endji ti da napa pi odhu de me: «Ma ne gumu yi ade-e de.» <sup>22</sup> Engu bini, oyá kpála bhende ní ngau e me abhubhuku-o, pi ní ne tata. <sup>23</sup> Obhe ní ngau e me tata tété naali ade-e, ní ngalilila nane okoko mane. Obhe ní ngadje numu li napa 'ngú o-o, ní ngatsia 'kpí tété ndjindji. <sup>24</sup> Oyá ní bhe li numu nde li ní lie ade-e, ní nga'o 'to ní tété naali ade. Engu bini, Ebhe abho 'lá kpála-kuti da napa me ní du atsia 'kpí li oyá ní bhe nga'o numu li ní-e ndjindji. <sup>25</sup> Ani amene mo-o ngubula me nagbo bhusu o adú bhú kute ní de, engu bini, oyá ní hana du nateteke lio sunda o. <sup>26</sup> I du me yá kpála bini nde ngazu likabhu-o, ndu okoko hana ngazu likabhu bhú dabili bini ne ani. I du me u nde ngadhogo yá kpála-kuti bini-e, ndu okoko hana ngakpi ndjili ne ani bhú dabili bini.

<sup>27</sup> Pi yi-e, yi ndu yi hana ne kute Kilisito, akunda napa me, yi ne oyá ani. Kpála ne kpála ne da e bhú kute Yesu Kilisito. <sup>28</sup> Kaka-a, bhú Piga gba Ebhe-e, Ebhe a'o ngaiza na bini obhulu titima gba Yesu, na bhisi-e, ani a'o okpála bhende ngakpokpo 'ngú maka opolofeta, na bata ani a'o omusuno. Pipita-a, ani a'o okpála inde ngamene ongamba 'ngú. Pipita-a, ani a'o okpála bhende ngakobho obhulu kuo. Ebhe atsia aha di angu pi okpála koko ngu natsia 'kpí li obi o di ne nateteke uo. Ani a'o okpála inde ngasuno kpadji pi okpála koko. Ani atsia aha di angu pi okpála ngu nagama 'ngú bhú oeli gba oandjelu.

<sup>29</sup> Ndu okpála hana ne obhulu titima gba Yesu? Ndu okpála hana ne okpála nakpokpo 'ngú maka opolofeta? Ndu okpála hana ne omusuno? Ndu okpála hana ne angu namene ngamba 'ngú? <sup>30</sup> Ndu okpála hana di ne angu ngu nakobho okpála na kuo? Ndu okpála hana di ne angu ngu nagama 'ngú bhú oeli gba oandjelu? Ndu okpála hana di ne angu ngu nambamba ta 'ngú? <sup>31</sup> Kaka-a, a ayo me yi bedhe ne gumu namene ongu inde lie ne tata ngu nateteke okpála koko.

Mbia inde-e, ma adji asuno pi yi kpadji

inde ane okoko ne bádha ngubula me yi teteke Piga gba Ebhe-e tete.

## 13

*Polo akpo 'ngú pindji mukunda bhú Piga gba Ebhe*

<sup>1</sup> Abana i du me ma nde ne angu nadi ndu eli gba okpála hana, i du di-e bhe gba oandjelu, i du me mukunda nde bhú ma ade-e, ma bha bini maka mangbou inde li gili e ngau, i du di-e mbulu ngbongbé inde li gili e ngau kpekpeke. <sup>2</sup> I du me ma nde ne angu nakpokpo 'ngú maka polofeta, i du me ma nde ne imbilang na ndu ongu hana, i du me ma nde ne angu nak mboli ndu ongu li Ebhe awo e mawo, i du me ma nde di ne nabhuka inde i ti da napa me ma 'e ne di eta, i du la me mukunda nde bhú ma ade-e, ma ne ehe na padhá. <sup>3</sup> I du me ma nde apu ndu 'he gba ma-a hana pi obhulu ndibhili, i du me ma nde atse belegu kute ma me u tsulu bhú djua, i du la me mukunda nde bhú ma ade-e, bhobhomu-o ne tata pi ma ade.

<sup>4</sup> Kpála inde ne mukunda pi obi e-e, bua ani ndjandjá, ani di ngamene babadha 'ngú pi obi e. Ani ne 'ngbé bua li 'he gba okpála koko ade, a ko pa 'li e de, ani di ne 'ngbé 'ndji ade. <sup>5</sup> Kpála inde ne mukunda pi obi e méne engu na numu de. Ani bhúndja bha bini engu gba e kpi e kpi de. Ani ké di 'ngú lie de. Ani gbite di bua e pi obi e de. <sup>6</sup> Kpála inde ne mukunda pi obi e kpí djali li siti 'ngú de. Ani ngakpi mangbo djali li bádha 'ngú. <sup>7</sup> Kpála inde ne mukunda pi obi e ngakibila ndu 'ngú hana li okpála amene e li ani-o. Ani ngabhuka ndu 'ngú hana, ani nga'o 'to e ndu nedhinga hana 'to Ebhe, ani di ngagbite bua e ka ndu 'ngú hana magbite.

<sup>8</sup> Mukunda ndjia 'kpí bini de. La-a, nedhinga akolo makolo li ongu inde li okpála ngakpokpo e maka opolofeta andjia mandjia. Nagama 'ngú bhú oeli gba oandjelu-o andjia mandjia. Angu nasuno 'ngú gba Ebhe-e pi okpála-a andjia mandjia. <sup>9</sup> Padhá de, anga angu nasuno 'ngú gba Ebhe-e pi okpála píla doto

akódho 'kpí makodho. La di-e, angu gba ní nakpokpo 'ngú maka opolofeta akódho 'kpí makodho. <sup>10</sup> Engú bini, ekpí li Ebhe ambámba ta ongú na babadha pí ní lie, li ongú bhende libhomu ade-e tsia ndjía.

<sup>11</sup> Nani ma adu lie bhú ndili-e, ma adu agama 'ngú maka ndili, ma adu abhundja maka ndili, ma adu di akè mboli 'ngú maka ndili. Engú bini, nedhinga ma abhele lie, ma a'o namene engú bhe na ndili-o. <sup>12</sup> A la bhadi pí ní moko. Bhú mbia inde-e, ní ngau ohe bulusu bulusu mugito me ní ngatsia 'kpí bhú bitolobi bhende na didili. Engú bini, ekpí akólo makolo ní aú ndu 'he hana má ngilili ne djila ní! Bhú mbia inde-e, imbilangu gba ma-a mbila ndu 'ngú hana de. Engú bini, ekpí akólo makolo ma tsia mbila ndu 'ngú hana má ngilili maka Ebhe ambila ma lie ngae makpe-o!

<sup>13</sup> Ngú nabu tata-a, ní mbila me ongú bata inde-e yíe bhú da o de. Ongú ango-o ngae inde: nabhuka Ebhe, na'o 'to o 'to ani, a la di-e nadu ne mukunda pí ani di ne pí obi o. La-a, bhú káká hana-a, nadu ne mukunda pí Ebhe di ne pí obi o, ane ndu obhe bhisi bhomu-o hana.

## 14

### *Nakpokpo 'ngú maka polofeta ane nakpokpo 'ngú bhú oeli gba oandjelu*

<sup>1</sup> Yi mene ne kpéke me yi du ne mukunda pí obi yi. Yi du ne gumu angu li Bu Bhobua ngaha e pí kpála ne kpála ngú nateteke Piga gba Ebhe-o, ane la mane angu nakpokpo 'ngú maka polofeta . <sup>2</sup> Kpála inde ngakpokpo 'ngú bhú oeli gba oandjelu ngakpokpokpo pí Ebhe. Ani kpo pí okpála de, anga kpála bini kè mboli engú ani ngakpokpo e de. Ani ngakpokpo bhú angu gba Bu Bhobua ta ongú inde li Ebhe awo ta e mawo-o.

<sup>3</sup> Engú bini, kpála inde ngakpokpo 'ngú maka polofeta-a, ngakpokpokpo pí okpála ngabula nabe ndu nabhuka gba uo-o, ngú nato masi bhú uo di ne ngú nateteke bua uo. <sup>4</sup> Kpála inde ngagama 'ngú bhú eli gba oandjelu-o ngabe ndu nabhuka gba e kpi e kpi. Engú bini, kpála inde

ngakpokpo 'ngú maka polofeta bhú oeli li ndu okpála hana ngadje e-e, ngabe ndu nabhuka gba okpála na Piga gba Ebhe-e libhomu. <sup>5</sup> Ma ne gumu me ndu yi hana yi du nagama 'ngú bhú oeli u mbila e de. La-a, a nga matá li ma naali me yi du nakpokpo ongú maka opolofeta. Padhá de, anga kpála du nakpokpo 'ngú bhú oeli gba oandjelu-o, a ayo me kpála koko du ngú nambamba tata. I du mo-o de-e, kpála bhende ngakpokpo 'ngú maka polofeta ngabe ndu nabhuka gba okpála na Piga gba Ebhe-e libhomu ane mane.

<sup>6</sup> Ondaise ma, ma yi nga yi: i du me ma nde ago agba yi, ma nde ngagama 'ngú pí yi bhú oeli gba oandjelu-o, tata pí yi tété ne ní? Tata bini ade. A ayo mangbo me ma go kpokpo 'ngú pí yi bhú eli inde yi ambila e, belegu i du engú li Ebhe ambamba ta e muma, i du di-e me ma go ha pí yi imbilangu na mbia, i du di-e me ma go kpokpo 'ngú pí yi maka polofeta, ne me ma go suno 'ngú pí yi, a ayo me yi mbila tata-a ndjindji.

<sup>7</sup> Yi bhundja nga pindji omavulu mbálá. U du na'u mbálá-a, u 'u li lelele de-e, mo ombila salisali-e lele pí? A bhadi moko pí dumu. <sup>8</sup> La di-e, i du me bhulu na'u mbala nde 'u li lelele de-e, okpála aléke lio ngú egú lele pí? <sup>9</sup> A bhadi pí yi moko. Okpála aké mboli engú yi ngapa e bhú eli na gandji gandji-e lele pí, i du me u nde mbila eli bhomu-o de-e? A mana me yi ngagama 'ngú pí anvi. <sup>10</sup> Oeli píla doto kpikpikpi. Engú bini, ndundu hana abhú 'ngú. <sup>11</sup> La-a, li kpála du nagama 'ngú bhú eli inde ma mbila e de-e, kpála bhomu muma ne gandji kpála , ma di pí ani ne gandji kpála. <sup>12</sup> A bhadi pí yi moko. Maka yi akunda lie ne bua yi hana nasia angu gba Bu Bhobua-a, yi gili naali nadu okpála inde ngabe ndu nabhuka gba okpála na Piga gba Ebhe-o.

<sup>13</sup> Kaka-a, kpála bhende ngagama 'ngú bhú eli gba oandjelu-o, a ayo me ani yo ka Ebhe angu nambamba ta eli ango-o. <sup>14</sup> Padhá de, anga i du me ma nde ngayo Ebhe bhú ngua eli bhomu-o, bua ma bhú mayo na paká paká, engú bini, imbilangu

gba ma-a li kulu bini ade. <sup>15</sup> I ɗu mo-o, a ayo me ma mene pi? A ayo me ma yo Ebhe bhú eli gba oandjelu, engú bini, ma ayó di ani ne imbilangu gba ma-o. A ayo me ma li 'tsi bhú eli gba oandjelu-o, engú bini, ma alí di ne imbilangu gba ma-o. <sup>16</sup> Padhá de, anga i ɗu me mu nde ngagie heni pi Ebhe bha bhú oeli gba oandjelu-o, kpála bhe yi nde ne e bhú 'ti Ebhe-e apá me: «A adu moko» li mayo gba mu nagie heni-e lele pi me, ani nde mbila engú mu ngapa e de-e? <sup>17</sup> A bana i ɗu me mayo gba mu nagie heni-e nde bha babadha naali-e, i ɗu bhú oeli gba oandjelu-o, a be ndu nabhuka gba kilí mu yi nde ne e bhú 'ti Ebhe-e de.

<sup>18</sup> Ma ngagie heni pi Ebhe anga ma ngagama 'ngú bhú oeli gba oandjelu-o ane ndu yi hana. <sup>19</sup> Engú bini, i ɗu me ya nde apo bhúla ya ne omaha Ebhe-e, ma uu ndjindji me ma pa engú bhuluvue inde li okpála adjé e ne tata ngubula nasuno 'ngú pi uo, ane me ma pa engú kote ndjikpa bhú oeli gba oandjelu.

*Pindji nakpokpo 'ngú bhú eli gba oandjelu-o, yi ɗu nabhundja maka obhelesi okpála*

<sup>20</sup> Ondaise ma, pindji ongú ma apa e pi yi bhomu-o, yi adú abhundja pépé maka ongisi de. Yi ɗu ne odjedje ongisi li pápá na siti 'ngú. Engú bini, yi ɗu ne obhelesi okpála li pápá na nabhundja 'ngú. <sup>21</sup> U aye bhú Bhuku gba Ebhe-e me, Ebhe Ngámá apa me:

«Li kpadji gba ogandji okpála ne bhú 'li uo-o, ma agáma 'ngú pi omaha ma.

Abana mo-o, u djé ma de.†»

<sup>22</sup> Kaka-a, nagama 'ngú bhú oeli na gandji gandji-e, a ko ehe inde ngasuno mangimbo gba Ebhe-e pi okpála inde i bhuka de-o. La-a, pi okpála bhende abhuka-a, a pi uo ade. Nakpokpo 'ngú maka polofeta-a, a pi omabhuka. La-a, pi obhende i bhuka de-e, a pi uo ade.

<sup>23</sup> I ɗu me yi nde apo bhúla yi ngú nayo Ebhe-e, li ndu yi hana holo nagama 'ngú bhú oeli gba oandjelu-o, i ɗu me okpála bhende i mbila 'ngú bhomu-o de-e, i ɗu

di-e obhende i bhuka de-e go oo, u pá de me yi ne obhulu pele-e di? <sup>24</sup> La-a, i ɗu me yi nde ngakpokpo 'ngú maka opolofeta-a, li okpála bhe imbila engú bhomu-o de, i ɗu di-e okpála bhe i bhuka de-e go li bhú ká yi-e, u tsia ké mboli siti 'ngú gba o-o. Engú inde u ngadje e hólo bua uo. <sup>25</sup> Ongú inde awo lie li bua uo-o zé li zi 'kpí. Abhomu-o, u tú 'ndji o ne kuto. U tsia dhégo Ebhe ne napa me: «Ebhe bhú ká yi na paká!»

*Yi ɗu amene 'ngú bhú Piga gba Ebhe-e li lelele*

<sup>26</sup> Ondaise ma, ní abú tata-a lele pi? Nedhinga yi apo bhúla yi lie ngú nadhogo Ebhe-e, kpála bini bhú ká yi ti da nali etsi, koko ti da nasuno eli gba Ebhe pi okpála, koko ti da nakpokpo engú li Ebhe ambamba ta e pi ani, koko ti da nagama 'ngú bhú oeli gba oandjelu, li koko tsia mbamba tata. A ayo me yi mene ndu 'ngú bhomu-o hana da napa me abe ndu nabhuka gba okpála gba Ebhe-o.

<sup>27</sup> I ɗu me okpála holo nagama 'ngú bhú ká yi bhú oeli gba oandjelu-o, a ayo me a de ɗu okpála bhisi, i ɗu bhisi de-e, a de pise bhú bata. A ayo la di me u ɗu agagama bini bini, kpála bini nde ngambamba ta 'ngú u ngagama e-o. <sup>28</sup> Li kpála nambamba ta 'ngú bhomu-o ɗu de-e, a ayo me kpála inde i di me gama 'ngú bhomu-o ndjili bhú ká yi má bulu! Ani nu gama bha bini pi Ebhe agba e. <sup>29</sup> Pi okpála bhe ngakpokpo 'ngú maka opolofeta-a, a ayo me okpála bhisi, i ɗu di-e bata gama 'ngú, amba okpála koko lo doto bhú 'ngú u ngakpokpo e-o. <sup>30</sup> La-a, i ɗu me Ebhe nde asuno engú koko na mbia pi saka yi inde bhú ká yi oo, a ayo me kpála bhende ngagama 'ngú-o 'o nga nagagama, ngubula me kilí ani-e gama 'ngú.

<sup>31</sup> Kaka-a, yi ɗu nagama 'ngú maka opolofeta, a ayo me yi gama bini bini. Yi mene mo-o ngubula me ndu omaha Ebhe hana sia imbilangu, amba yi to di masi bhú ndu uo hana. <sup>32</sup> Okpála inde ngakpokpo 'ngú maka opolofeta-a, a di bhú uo ne angu ngú nagbite

† 14:21 14:21 Tsia bhú Isa. 28:11-12.

'bhe o pí engú li Ebhe asuno e pí uo-o. <sup>33</sup> Padhá de, anga Ebhe kunda de me ní dɔ amene 'ngú pupulɔ-o de. Engú bini, ani akunda mangbo me ní dɔ amene 'ngú li kúkú. Maka u amemene lie bhú ndɔ oDadjua gba Ebhe-e hana, <sup>34</sup> nedhinga yi apekebhe bhúla yi lie ngú nayo Ebhe-e, a ayo me olisi\* ndjili má bulu! U ha kpadji pí uo ngú nagama 'ngú oo de. A ayo me u ndjili ma bulu ngú nadje 'ngú u ngakpokpo e-o, maka li líli gba Moidje apa lie-o. <sup>35</sup> † dɔ me u nde akunda nambila 'ngú pindji ongú bini bini-e, u de yi obhosi gba o-o akuti. A ndjindji ade me elɔ gama 'ngú bhú makpɔsɔ gba omabhuka.

<sup>36</sup> Aiya! Ne me yi ngabhundja me eli gba Ebhe-e ayie agba yi, ne me eli ango-o, a ko bha bini na yi 'he kpi yi kpi? <sup>37</sup> Li kpála bhundja me ní ne polofeta-a, ne me ani bhundja me ní asia angu gba Bu Bhobua-a ngú nabe ndɔ nabhuka gba okpála gba Ebhe-e, a ayo me ani mbila me engú inde ma aye e pí yi inde-e, a ko líli ayie ka Ngámá. <sup>38</sup> Engú bini, ani bhuka mo-o de-e, Ngámá mbila di ani de.

<sup>39</sup> Kaka-a, ondaise ma, yi gili ne bua bini nadɔ nakpokpo 'ngú maka opolofeta. La-a, yi ayóko okpála de me u agáma 'ngú bhú oeli gba oandjelu-o de-e de. <sup>40</sup> A ayo mangbo me ndɔ 'ngú bhomɔ-o dhuku li lelele, yi améne bhú tolo de.

## 15

### *Nabhuka gba ní-e alɔ pí nazuku gba Yesu Kilisito*

<sup>1</sup> Ondaise ma, ma akunda matá nakpokpo pí yi Bádha Ngali inde yi asia e, inde yi adhedhe di lie má kpakala-o! <sup>2</sup> Bádha Ngali ango-o ngakobho yi, † dɔ me yi nde ngalilila maka nako ma akpokpo pí yi lie-o. † dɔ mo-o de-e, tata li nabhuka gba yi-e ade.

<sup>3</sup> Ma asuno pí yi ongú na ngbeng-bengbe inde ma asia e ka Yesu Kilisito-o. Engú ango-o me: Yesu Kilisito akpi pindji mugwe gba ní-o, maka u aye lie bhú

Bhuku† gba Ebhe-o. <sup>4</sup> U azi ani, ani atsia azuku bhú 'kpi na bata maka li Bhuku gba Ebhe-e apa lie-o.† <sup>5</sup> Ani azuku lie, ani akoto li Piele. Pipita-a, ani akoto li obhulɔ titima ndjikpa ne ká bhisi gba e-o.

<sup>6</sup> Pipita-a, ani akoto li omɔkpata gba e nane kámá bhuluvue mane bhú nedhinga bini. Bhelé na uo nga bha bhúka, okoko amu. <sup>7</sup> Pipita-a, ani akoto li Djaki, ani atsia akoto di li ndɔ obhulɔ titima gba e hana.

<sup>8</sup> Pita ndɔ uo hana-a, ani akoto di li ma, belegu ma dɔ lie ne tetele kpála de-o. <sup>9</sup> Ma ne bhulɔ titima na yeye ane mane bhú ká obhulɔ titima-o. A na paká me, ma ti belegu da napa de me kpála 'i ma me bhulɔ titima gba Yesu-o de. Padhá de, anga ma ato nani mbolo li Piga gba Ebhe-o. <sup>10</sup> Engú bini, bhú bádha bhú 'bu gba Ebhe-e, ma maka ma nde lie inde. Bádha bhú 'bu gba ani nani ani aha e mɔma bhomɔ-o padhá ade. La-a, ma amene kulu kaka naali nane obhulɔ titima koko hana. Angu ango-o yie ka ma de, bádha bhú 'bu gba Ebhe-e adú mangbo namene kulu bhú ma ngae. <sup>11</sup> Kaka-a, abana ma, abana obhulɔ titima koko-o, a bhomɔ-o Bádha Ngali inde ya ngakpokpo e-o, a la bhadi bhomɔ-o Bádha Ngali inde yi abhuka e-o.

### *A na paká me okpála azúku di mazuku*

<sup>12</sup> Bádha Ngali ya ngakpokpo e me Yesu Kilisito azuku. † dɔ la me a nde mo-o, lele pí li okpála koko bhú ká yi ti da napa lie me okpála inde amu-o zúku de-e? <sup>13</sup> † dɔ na paká me okpála inde amu-o nde zúku de-e, bhobhomɔ-o akunda napa di me Yesu Kilisito zuku de. <sup>14</sup> † dɔ la me Yesu Kilisito nde zuku de-e, akunda napa me tata bini li Bádha Ngali ya ngakpokpo e ade, tata bini la di li nabhuka gba yi-e ade.

<sup>15</sup> † dɔ me Yesu Kilisito nde zuku de-e, amba akunda napa me ní ngapa eu li Ebhe. Padhá de, anga ní ngapa pí okpála me Ebhe azuku Yesu Kilisito bhú ka okpála inde amu-o. La-a, ani mene

\* **14:34** 14:34 Abana li olisi nde lie ne angu ngú nayo Ebhe-e, di ne nagama 'ngú maka opolofeta-a bhú ká omabhuka-a, u ha nani kpadji pí uo ngú nalo doto bhú ongú li opolofeta adɔ apa e de. Tsia bhú 1 Kol. 1:11, 5. † **15:3** 15:3 Tsia bhú Isa. 53:5-12. † **15:4** 15:4 Tsia bhú Oz. 6:2; di ne bhú Luk. 24:34-49.

mo-o de, i dɔ me okpála nde zúku di de-o. <sup>16</sup> Padhá de, anga i dɔ me okpála nde zúku de-e, bhobhomɔ-o akúnda napa di me Yesu Kilisito zuku de. <sup>17</sup> I dɔ me Yesu Kilisito nde zuku de-e, bhobhomɔ-o akúnda napa me tata bini lí nabhuka gba yi-e ade, yi nga bha sa mangimbo gba Ebhe.† <sup>18</sup> A akúnda di napa me okpála bhende amu me u nde abhuka Kilisito-o, amu dɔdɔma ne dɔdɔma. <sup>19</sup> I dɔ me nganí omabhuka ní nde a'o 'to ní 'to Kilisito bha bini ngɔbula makobho inde-e, amba ní ne okpála na líkabhu naali nane okpála koko.

<sup>20</sup> La-a, a mo-o ade, a bha ndjɔ na paká me Kilisito azuku bhú ka okpála inde amu-o! A ko kpála na gígina inde azuku bhú kuo. <sup>21</sup> Padhá de, anga koli kpála bini amene nani me kuo lí pála doto, koli kpála bini koko atsia amene la bhadi me okpála amu-o zuku. <sup>22</sup> Ndɔ okpála hana ngamu, anga ní ne opiga gba Adamɔ. Ndɔ okpála hana inde abhuka Yesu Kilisito asía bhadi makobho ka aní. <sup>23</sup> Engú bini, kpála ne kpála azúku lí nedhinga gba e. Kilisito azuku nani kalanɔ. Lí nedhinga aní agó lie, lí okpála gba aní-e tsia zúku di.

<sup>24-25</sup> Abhomɔ-o, Yesu Kilisito méne me ndɔ osisiti angu hana kolo padhá. Aní tsia kó angu e pí ndɔ okpála na angu hana inde ngagɔ aní-o. Padhá de, anga a ayo me aní ɔ ngámá akólo bha makolo lí Ebhe a'ó ndɔ obhulɔ yala gba aní-e lie hana sa 'dhɔ aní-o. Pípíta-a, lí 'ngú na doto ndjía. Aní tsia gíe nau-o pí Ebhe 'Dyi e.† <sup>26</sup> Bhulɔ yala na soso inde lí Ebhe abhéle e-e, a ko kuo. <sup>27</sup> Padhá de, anga u aye bhú Bhuku gba Ebhe-e me: «Ebhe a'o ndɔ 'he hana má kpəkəbhə sa 'dhɔ aní!» Engú bini, i dɔ me u nde apa mo-o, a mbámbá me u to Ebhe bhúbhú de. Aní sa Ndili gba e ade. <sup>28</sup> Lí ndɔ 'he hana a akólo lie sa angu gba Kilisito-o, lí ngaani makpe Ndili-e, aní tsia 'ó lie makpe sa angu gba Ebhe, ngɔbula me Ebhe ɔ ngámá pí 'ndjɔ ndɔ 'he hana má da!

*Pindjɔ 'ngú nazuku ka okpála inde amu-o, yi apíte liyi de*

† 15:17 15:17 Tsia bhú Lom. 6:8-11. † 15:24-25 15:24-25 Tsia bhú Ets. 110:1. † 15:27 15:27 Tsia bhú Ets. 8:7.  
† 15:32 15:32 Tsia bhú Isa. 22:13.

<sup>29</sup> Okpála koko bhú ká yi ngasia batisimo mada okpála inde amu-o. Uo ngasia ní? I dɔ me okpála inde amu-o nde zúku de-e, uo la ngasia batisimo mada uo ka ní? <sup>30</sup> I dɔ me okpála nde zúku de-e, ka ní ya ngazɔ líkabhu lie ndɔ nedhinga hana-a? <sup>31</sup> Ondaise ma, a na paká me ndɔ 'kpí hana kuo de ma masíkpe. A la bhadi paká me ma ne gindaginda kabula yi akpətsə liyi lie ne Ngámá gba ní Yesu Kilisito-o. <sup>32</sup> A bhú gɔdhɔ na Efeso-o, ma azɔ líkabhu naali sakpa okpála. A mana mɔgito me ma adɔ agɔ gbele ne onɔ 'te. I dɔ me ma nde ngabhundja bha bini ndɔ ongú na doto-o, gbele angu-o atéteke ma lele pí? I dɔ me okpála inde amu-o nde zúku de-e, bhobhomɔ asuno me engú inde u apapa e me: «Ní zɔ 'he, amba ní ndjɔ di vino, anga ní amú mambi-e!» A ko kəkulɔ 'ngú.

<sup>33</sup> Yi apíte liyi de. Yi mbíla me, mɔ kə dhukɔ ne kpála na siti 'ngú-o, mɔ tágba di siti 'ngú. <sup>34</sup> Yi gie liyi lí ngbili kpadjɔ, amba yi améne matá siti 'ngú de. Okpála koko bhú ka yi mbíla Ebhe de. Ma ngapa mo-o, ngɔbula me yi sia nɔmɔ.

*Bhú nazuku ka okpála-a, kute ní adjɔ lie na mbía*

<sup>35</sup> Kpála bini tí da nayi ma me: «Okpála inde amu-o, azúku lele pí? Kute u azúku ne e adú lele pí?» <sup>36</sup> Ma gie pí aní me, ngamɔ-o, mɔ ne ngingi. Ngua inde mo olu e tí da nakə-ə de, i dɔ me a nde zi de ko. <sup>37</sup> Ngua inde mo olu e, i dɔ di-e dadha, i dɔ di-e ngua koko-o, mɔ ngalu bha bini lílí. Mɔ lu lálá bhende akə-o de, <sup>38</sup> Pita lí ngua akə lie, lí Ebhe há pípi lálá na mbía maka aní akúnda lie. Aní ngaha pí ngua ne ngua 'lá e makpe.

<sup>39</sup> Kute ndɔ 'he hana inde bhú makobho-o bhadi kpí kpí kpí. Kute kpála-kuti kpí ne bhende gba onɔ, bhende gba odhu di ne bhende gba osungu. <sup>40</sup> A ne oehe inde na abhúlá, a la di ne oehe na kuto ei. Bádha gba oehe na abhúlá-a kpí ne bhende gba oehe na kuto ei. <sup>41</sup> A lí éla ne zɔ e, a lí epe ne zɔ e, a la di lí oikupala



ne zi o. Belegu bhú ká oikupala-a, zi uo kpi kpi kpi.

<sup>42</sup> A adú bhadi moko li okpála amu-o azúku lie-o. Kute inde u azi e azi mazi. Kute inde azuku-o zi matá-a de. <sup>43</sup> U azi maka ehe li tata nde lie naali ade, li angu nde bhú e ade. Li azúku lie-e, a abédhe ne angu, i tsia dú di babadha. <sup>44</sup> Nedhinga nazizi-e, a ko kute na doto. Li azúku lie, a adú kute inde li Bu Bhobua ngaha mukobho pi e ngae. A ne kute na doto, a la di ne kute inde li Bu Bhobua ngaha mukobho pi e. <sup>45</sup> A maka u aye lie bhú Bhuku gba Ebhe-e me: «Adamu nani ne kpála-kuti na kalanu, ani asia mukobho ka Ebhe.†» La-a, Kilisito u a'i e me Adamu na bhisi-e abedhe ne Bu Bhobua, ngaani-e, ani ngaha mukobho pi okpála.

<sup>46</sup> Ehe na kalanu inde u ngau e-e, a ko kute na doto. Pipita-a, u tsia ú la kute inde li Bu Bhobua ngaha mukobho pi e-o.

<sup>47</sup> Adamu, kpála na kalanu li Ebhe abho e nani ne kpála-kuti, Ebhe abho ani li doto. Kilisito, Adamu na bhisi-e ayie naae abhúla. <sup>48</sup> Kute okpála-kuti maka kute kpála li Ebhe abho nani e li doto-o. La-a, kute okpála inde azúku ngú nanu abhúla-a, adú bhadi maka kute kpála inde ayie abhúla. <sup>49</sup> Mbia inde-e, ní maka kpála inde li Ebhe abho e li doto. Kpi bini, ní adú bhadi maka kpála bhende ayie abhúla-o.

### *Ngámá Yesu Kilisito aha angu kuo*

<sup>50</sup> Ondaise ma, ma apa pi yi me kpála-kuti lí bhú Nau gba Ebhe-e ne kute na doto inde-e de. Kute inde nazi mazi-e ti da nadu duduma ne duduma de.

<sup>51</sup> Yi gbo nga dje yi, ma adji nambamba pi yi inde ta 'ngú inde li Ebhe awo e nakolo pi mbia inde-o. Ní mú ndu ní hana de,† engú bini, ndu ní hana, kute ní adjí lie madji, i tsia kólo na mbia. <sup>52</sup> Engú ango-o améne lie bhú nedhinga bedi, maka nakopo ka djila, nedhinga u a'ú toti na soso lie-o. Li a aú lie, okpála inde amu-o azúku ne kute inde i kpi matá-a de. La nganí bhende bhú mukobho-o, kute ní adjí lie na mbia. <sup>53</sup> Padhá de, anga a ayo

me kute ní inde nakpi makpi inde-e dji lie, akolo kute inde i kpi matá-a de, i tsia zí la di matá de.

<sup>54</sup> Nedhinga li kute nakpi makpi-e akólo lie kute i kpi-i de-e, li kute nazi mazi-e akólo lie kute i zí-i de-e, li engú inde u aye e bhú Bhuku gba Ebhe-e tsia kólo mbámá. U aye bhúbhú me: «Ebhe aha angu kuo aha, kuo matá ade.†» <sup>55</sup> U aye mata di me:

«Oo kuo! Angu mu mo oko pi okpála ne e su?

Oo kuo! Angu mo obhibhili okpála ne e su?†»

<sup>56</sup> Angu li kuo ngabhili okpála ne e-e, ngayie ka siti 'ngú. Angu li siti 'ngú ngabhili okpála ne e-e, ngayie bhú líli gba Moidje . <sup>57</sup> La-a, a ayo me ní toko Ebhe inde amene me ní ha angu siti 'ngú di ne angu kuo kabula Ngámá gba ní Yesu Kilisito-o!

<sup>58</sup> Abhomu-o, ondaise ma na mukunda, yi lu kpekpeke, u apite yi de. Yi nu ndu kpi hana ne kulu gba Ngámá-a ne kalanu. Yi mbila hana me kulu inde yi ngamene e pi Ngámá-a, nú padhá de.

## 16

### *Tia inde ayo napa e pi omabhuka na Yelusalema*

<sup>1</sup> Ma adji apa mbo engú inde-e pi yi pindji tia inde yi ngapo e pi omaha Ebhe inde bhú Yelusalema-o. Yi mene matá maka ma aha nako líli lie pi omabhuka na ndu doto na Galatia-o.† <sup>2</sup> Ndu 'kpi yinga hana, a ayo me kpála ne kpála 'o mbo té tia inde ani asia e li ngongo, nakpata lele bhende li Ebhe aha e pi ani-o. Yi wo tia bhomu-o nganda yi, ngú napa me ma gó lie, ní apó matá bhúla tia de. <sup>3</sup> Nedhinga ma kólo lie agba yi-e, ma ayé balua pindji tia bhomu, ma tsia tíma okpála bhende yi alo o bhú ka yi-e ne di ngú nanu na'o'o abhú Yelusalema. <sup>4</sup> † yo me ma nu di-e, ya aná ne uo bhú dabili bini.

### *Onú inde ayo me Polo nu e-o*

<sup>5</sup> Ma agó agba yi pita nakodho 'kpi ka ma bhú ndu doto na Makedonia, anga ma

† 15:45 15:45 Tsia bhú Dje. 2:7. † 15:51 15:51 Tsia bhú 1 Tes. 4:15. † 15:54 15:54 Tsia bhú Isa. 25:8. † 15:55 15:55 Tsia bhú Oz. 13:14. † 16:1 16:1 Tsia bhú Lom. 15:25-26.

apú bhú ndu doto bhom̄. <sup>6</sup> Nedhinga koko-o, ní adú mbo ne yi ngú nedhinga bedi. Koko-o, ní adú ne yi oo ngú nadjeke me nedhinga na zini-e kodho 'kpí. I d̄u me ní nde asi ekpí bhe ayo me ní si e ne yi-e asi-e, yi tsia teteke ma ngú nan̄ li obili bhe ma adjí lie-o. <sup>7</sup> Padhá de, anga mbia inde-e, ma k̄unda bha nau yi ne nakodho 'kpí ka ma makodho de. Ma ngabhundja me, i d̄u me Ebhe nde ak̄unda-a, ma de go sisi, amba ní bhue mbo ne yi ngengele.

<sup>8</sup> Mbia inde-e, ma ngabhundja me ma d̄u nga bha bhú Efeso si nakolo bhú 'kpí na Patekote. <sup>9</sup> Padhá de, anga Ebhe abhulu 'bho 'tí m̄ma mbámbá ngú namene kulu gba an̄-e ne angu ma hana si, beleḡu li okpála bhelé nde lie ngaḡu kulu ma ngamene e lie-o.

<sup>10</sup> Kaka-a, li Timoté kolo-o, yi mene me ehe bini ato zini bhú an̄ agba yi oo de, anga an̄ ngamene kulu gba Ngámá-a maka ma ngamemene lie-o. <sup>11</sup> Kpála bini aú an̄ bhú djila e padhá de. Yi teteke mangbo an̄ me an̄ dh̄uk̄u bhú guo 'ngú ngú nakolo li bili ma nde lie-o, anga ma ngadjeke an̄ ne ondaise ní inde u agó ne o-o.

<sup>12</sup> Li 'ngú bhende atsia ndai ní Apolosi-e, ma ayo ka an̄ bh̄tsibh̄tsi me an̄ n̄ agba yi bhú dabili bini ne ondaise ní koko ngú natsia yi. La-a, an̄ k̄unda nga nan̄ oo mbia inde-e de. An̄ sia nedhinga-a, an̄ tsia n̄.

*Polo yi matá omabhuka na Kolito mayi*

<sup>13</sup> Yi d̄u li z̄uk̄u, yi l̄u kpekpeke bhú 'bu nabhuka , bua yi adú ne tsul̄u de, yi d̄u ne angu. <sup>14</sup> Yi mene nd̄u 'ngú yi ngamene e hana ne muk̄unda.

<sup>15</sup> Ondaise ma, yi mbila Etieni ne uo ne piga gba e hana. Yi mbila hana me u adjí nani bua o bhú ndu doto na Akai kalan̄ ngao, u atsia aha lio ngubula nateteke omabhuka. Kaka-a, ma ayo ka yi me: <sup>16</sup> yi manga ongua okpála bhom̄-o mamanga. Yi manga di okpála inde ngamene kulu ne kekele bhú dabili bini ne uo mamanga.

<sup>17</sup> Ma ne djali naali li nago nako ka Etieni, ne Folotunasi ne uo ne Akaikusi-o. Ma ngau uo lie, a mana mugito me ma ngau yi nd̄u yi hana. <sup>18</sup> U ato masi bhú

ma maka u ato di nako masi bhú yi lie-o. Ongua okpála bhom̄-o, a ayo bha ndj̄a namanga uo mamanga.

<sup>19</sup> ODadjua gba Ebhe inde bhú ndu doto na Adjia yi yi ma yi. Akwila ne Pilisila bhú dabili bini ne omabhuka inde ayoyo Ebhe agba uo-o, yi yi ne 'li Ngámá mayi. <sup>20</sup> Nd̄u ondaise ní inde ei hana yi yi ma yi. Yi li yi s̄unda yi ne nakama liyi li k̄ute yi.

<sup>21</sup> Ma yi yi ma yi. Engú inde ma aye e me ma yi yi mayi bhom̄-o, ma aye ne 'kpa ma makpe. <sup>22</sup> I d̄u me kpála nde kunda Ebhe de-e, u de t̄u p̄dj̄e li an̄! Malanata: a ayo me Ngámá gba ní-e gógo! <sup>23</sup> A ayo me bádha bhú 'bu gba Ngámá Yesu-o d̄u bhú dabili bini ne yi. <sup>24</sup> Ma kunda nd̄u yi hana naali ka ní akp̄et̄se liní ne yi lie bhú 'bu Yesu Kilisito-o .

## Balua na bhisi gba Polo pi omabhuka na gudhu na Kolito Eli na kalanu

Balua na bhisi inde li Polo aye nani e pi okpála na Kolito, ani aye bhú nedhinga inde u du adje lio lie ne omabhuka na Dadjua na gudhu na Kolito de-o. Omabhuka koko na Dadjua gba Ebhe adu nani nagu Polo naali. Engú bini, ani asuno 'ndjá bua gba e ngú nadjé lie ne uo, ani atsia adje djali naali li nedhinga li engú bhomu-o andjia lie sunda uo-o.

Engú na bini bhú balua inde-e, Polo ngakpo 'ngú pindji nadjé lio ne okpála na Dadjua na Kolito, ani akpo ta ani agie 'ngú lie kpekpeke li sobho inde adu bhú Dadjua gba Ebhe-o, ne nagu inde li okpála na Kolito adu agu Dadjua gba Ebhe-e ne e-o. Polo atsia asuno di djali gba e, padhá de, anga egú inde ani agu e, amene me okpála dji di bua o amba u tsia dje di lio. Pipita-a, ani atsia ayo ka okpála na Dadjua gba Ebhe-e me u ha makiso ne bádha bua, ngubula nateteke omabhuka inde bhú ndibhili bhú Dadjua na Yudaya ne di. Bhú oalo na soso-o, Polo ngakpokpo 'ngú pindji kulu gba e na bhulu titima pi okpála koko na Kolito inde ngau lio me ni ne obhulu titima na kaku lu gba Yesu ngaani. Padhá de, anga okpála ango-o adu apa me Polo ne bhulu titima na eu.

### **Ongbengbe ongú inde bhú bhuku inde-e ngae inde:**

Eli na kalanu 1:1-11

Polo a la di-e Dadjua gba Ebhe na Kolito 1:12 - 7:16

Makiso pi omabhuka na Yudaya 8:1 - 9:15

Nakpokpo 'ngú gba Polo ne angu maka bhulu titima gba Yesu 10:1 - 13:10

Eli na soso 13:11-13

*Polo yi omabhuka na gudhu na Kolito mayi*

<sup>1</sup> Ma aye balua inde-e ngama Polo bhú dabili bini ne ndai ní Timoté. Ma aye pi yi omabhuka na Dadjua gba Ebhe inde bhú gudhu na Kolito di ne pi yi obhende bhú ndu doto na Akai-e libhomu. Ebhe amene ngae me ma du ne bhulu titima gba Yesu Kilisito. <sup>2</sup> A ayo me Ebhe 'Dyi ní ne Ngámá Yesu Kilisito suno bádha bhú 'bu gba o-o pi yi, amba u ha di guo 'ngú pi yi.

### *Omabhuka na Kolito ngazu likabhu bhú dabili bini ne Polo*

<sup>3</sup> A ayo me u toko Ebhe. A ko 'dyi Ngámá gba ní Yesu Kilisito. A ko 'dyi ní inde abedhe ne ndjinga bedhe. A ko Ebhe inde ngateteke bua kpála bhú ndu 'ngú hana. <sup>4</sup> Ani ngateteke bua ní bhú ndu olikabhu gba ní-e hana, ngubula me ní teteke bua okpála bhende ngazu likabhu-o, li kpadji na angu inde, nganí makpe, ní asia e ka ani-o. <sup>5</sup> Maka ya nde lie ngazu likabhu ne Kilisito na paká paká-a, ani bhadi ngateteke bua ya na paká paká. <sup>6</sup> I du me ya nde bhú likabhu-o, a ko ngubula me yi sia angu di ne mukobho. I du me bua ya nde akə-o, a ko ngubula me yi sia di angu. Angu ango-o ngaha pi yi nakibila ngua olikabhu inde ya nde ngakibila e-o. <sup>7</sup> Ya nga'o to ya me Ebhe ateteke yi mateteke. Padhá de, anga ya ambila ndjindji me yi ngazu likabhu bhú dabili bini ne ya. Li Ebhe aké bua ya lie-e, bua yi aké bhadi moko.

<sup>8</sup> Ondaise ya, ya akunda me yi mbila ngua likabhu inde ya azu e bhú ndu doto na Adjia\* ndjindji. Ya azu likabhu naali, likabhu ango-o aha angu ya maha. Ya du abhundja de me ya akóto bhúbhú makoto de. <sup>9</sup> Ya adu abhundja li bua ya me ekpi gba ya-a ale. La-a, engú bhomu-o akolo li ya ngubula me ya a'ó nabhuka gba ya-a bhú ya makpe de, ya 'o bha bini bhú Ebhe kpi e kpi. Ani ngazuku okpála inde amu-o ngae. <sup>10</sup> Ani agbegbe ya bhú nakpi bhomu-o ngae. Ani agbégbe matá ya bhú okoko magbegbe. Ya la di nga'o 'to ya me ani agbégbe galikpe ya bhúbhú

\* 1:8 1:8 Adjia: A ko ndu doto adu nani bhú kuti na Tiliki na naki-o. Efeso du nani ne 'ngbé gudhu na kuti ango-o ngae.

magbegbe. <sup>11</sup> Ebhe améne bhobhomu-o, i du me yi nde akpɔtɔse liyi ne ya bhú dabili bini bhú mayo-o. Abhomu-o, nedhinga li Ebhe adjé mayo gba yi-e lie, ani tsia há bádha bhú 'bu gba e pí ní padhá, li okpála bhelé tsia gíe di heni pí ani.

*Polo apa me ni nú nga bhú Kolito mbia inde-e de*

<sup>12</sup> Ehe inde ya nde ka e bhú djali ngae inde: bua ya ngaziba me ya adhuku bhú ká okpála ne nako liya ne kuto bhú dabili bini ne nawo 'ngú de. Ebhe akunda me ya dhuku bhú ká yi moko. Ya dhuku bhú ka yi ne imbilangu inde i yie ka okpála de. Engú bini, ya ngadhuku ne bádha bhú 'bu li Ebhe ngaha e pí ya ngae. <sup>13-14</sup> A ayo me yi mbila engú bhomu, anga bhú obalua ya aye e pí yi-e, ya aye bha engú inde yi ti da natanga e, yi ti di da nako mboli e ndjindji. Nakolo pí mbia inde-e, yi dje nga ya má kpulukutu de! Engú bini, ma abhundja me yi ahólo nadjé ya má kpulukutu madje! Abhomu-o, li 'kpí li Ngámá Yesu agó lie, yi akpí djali li 'ngú gba ya maka ya nde di lie ngakpi djali li 'ngú gba yi-o.

<sup>15</sup> Ma adu nako ne nabhuka bhú 'ngú bhomu-o. Kaka-a, ma adu akunda me ma apu agba yi bhutsibhutsi bhisi, amba yi sia di bádha bhú 'bu bhutsibhutsi na bhisi. <sup>16</sup> A akunda napa me ma akunda nako nanu agba yi kala nanu bhú Makedonia.† Pipita-a, ma adu di akunda me ma gie matá lima agba yi ngubula me yi teteke ma ngubula nanu bhú Yudaya.

<sup>17</sup> Nedhinga ma apa lie pí yi me ma améne mo-o, ma apa ne 'li ma bhisi bhisi? A mo-o ade. Nedhinga ma nga'o oekpa gba ma-a lie, ma'o li mabhundja inde ayie ka ma makpe de, ngú napa me ma aziba engú ne nayayala bhú dabili bini. <sup>18</sup> Ebhe apá li ma ngae me engú ma apa e pí yi inde-e, ma pa ne eli bhisi bhisi de. <sup>19</sup> Padhá de, anga Yesu Kilisito, Ndili gba

Ebhe inde ya akpokpo engú gba e pí yi-e, ngama Polo, ne Sila bhú dabili bini ne Timoté, ani go nani ngú naziba 'ngú ne nayayala bhú dabili bini de. Engú bini, ani memene engú inde ani ngapa e-o.

<sup>20</sup> Ndu 'ngú li Ebhe apa me ni améne e pí ní-e, améne lie kabula Yesu. Kaka-a, ya ngaziba me adu moko ne 'li ani ngú nadhogo Ebhe. <sup>21</sup> Ebhe abhu ya ngae makpe, la di-e, ngaani makpe ngato angu bhú ya bhú dabili bini ne yi li kpadji gba Yesu Kilisito-o. <sup>22</sup> Ani a'o di Bu Bhobua gba e li bua ní ngú nasuno me ní ne naani okpála. Maka ani aha Bu Bhobua gba e lie pí ní-e, ní ambila bhadi me ani ahá di ndu ohe koko inde ani apana e pí ní-e maha.

<sup>23</sup> Ne 'li Ebhe, li ma pa eu-o, Ebhe de bhelo ma. Kabula nalila‡ yi-e, ma kunda nanu agba yi bhú Kolito mbia inde-e de. <sup>24</sup> A ko de me ya ngakunda nau ngámá pí nabhuka gba yi-e de ngú napa me yi bhuka bha bini bhende ya ngakunda e de. Padhá de, anga yi alu kpekpeke bhú nabhuka gba yi-o. Ya akunda mangbo namene kulu bhú dabili bini ne yi ngubula me bua yi du bhú djali.

## 2

<sup>1</sup> Abhomu-o, ngama-a, ma apa li bua ma me a ndjindji ade me ma nu nga agba yi-e de. Padhá de, anga ma asiti matá bua yi ne toto\* <sup>2</sup> Li ma ha siti pí bua yi-e, a há matá djali muma da? Padhá de, anga kpála inde li bua e asiti-e, tí matá da naha djali muma de. <sup>3</sup> Kaka-a, ma aye balua bhomu-o pí yi, maka ma aye nako lie bhú balua gba ma na kalanu-o.† Ma kunda nako de me ma kolo agba yi-e, bua ma de siti matá ka okpála inde ayo nako me u ha djali muma-a de. Ma ambila na paká me nedhinga ma nde lie bhú djali-e, ndu yi hana di bhú djali. <sup>4</sup> Nedhinga ma aye balua bhomu-o lie pí yi-e, bua ma adu me a nde abedhe ne líkabhu di ne tsulu

† **1:16** 1:16 Makedonia: A ko ndu doto bhú kuti gba oGiliki. A li pápá na Abebe. ‡ **1:23** 1:23 Nalila: Polo akunda me ni 'o nedhinga pí okpála na Kolito ngú nadjé bua o li 'ngú u amene e li ani-o. \* **2:1** 2:1 Ne toto: Polo anu nani bhú gudhu na Kolito, suka mabhuka bini na Dadjua gba Ebhe-e atsia asobho ani, engú bini Dadjua gba Ebhe-e tsia gama 'ngú tété de. † **2:3** 2:3 Balua na kalanu: A ko bha ndju balua na bini gba Polo pí omabhuka na Kolito de. A ko balua inde angita pí ní-o.

bedhe. Ma aku belegu egbá. Yi abhúndja de me ma aye balua bhomu-o pi yi ngú na siti bua yi-e de. Ma aye mangbo ngú nasuno pi yi lele mukunda ma nde pi yi ne e ko.

*Polo apa me u mbu li kpála inde amene siti 'ngú-o*

<sup>5</sup> Li 'ngú bhende atsia kpála inde amene siti 'ngú-o, ani asiti bua ndu yi hana ane ma mane. Engú bini, ma kunda napa 'ngú tété ne na'e'e bhú da e ma'e de. Ani siti bua ndu yi hana de, la-a, ani asiti bua té okpála bedi bhú ká yi. <sup>6</sup> Okpála bhelé bhú ká yi ambe bhú 'ndji kpála bhomu-o ambe. Ma abhundja me a pise moko. <sup>7</sup> A ayo ibili mangbo mbia inde-e me yi suno bádha bhú 'bu pi ani, amba yi to masi bhú ani, ngubula me likabhu ahá angu ani má tsitsidha de! <sup>8</sup> Kaka-a, ma ayo ka yi me yi suno mukunda gba yi-e pi ani. <sup>9</sup> Ta naye balua gba ma na kalanu-o pi yi-e, a ko ngubula nale yi, amba ma mbila me yi nani bedhe ngú namene ndu 'ngú inde ma apa e pi yi-e hana. <sup>10</sup> Yi suno bádha bhú 'bu pi kpála-a, ma asúno bhadi bádha bhú 'bu pi ani. Li ma mbu li siti 'ngú-o, i du me engú na sisiti ngú nambu tété ka ma nde uu-o, ma ambú tété ka yi kala Yesu Kilisito. <sup>11</sup> Ma amene mo-o ngubula me Satana apíte ní li 'ngú bini de. Padhá de, anga ní mbila engú inde ani akunda namene e ndjindji.

*Polo adu akunda me Tito go bhaka ni bhú gudhu na Tuluasi ne ngali gba omabhuka na Kolito*

<sup>12</sup> Nedhinga ma akolo lie bhú gudhu na Tuluasi ngú nakpokpo Bádha Ngali gba Yesu Kilisito-o, ma au me Ngámá abhulu 'bhe bhoti muma ngú nakpokpokpo abhulu. <sup>13</sup> Engú bini, ma azu likabhu li bua ma naali anga ma bhaka ndai ma Tito de. Kaka-a, ma abhana lima pi okpála na Tuluasi, ma atsia atapa bhú ndu doto na Makedonia.

‡ **2:14** 2:14 Bhú galasisi: Polo ngabhundja pindji 'ngbé ngámá gba osudha inde ngagie lie bhú 'gú me ani agboko 'gú-o agboko. Okpála ngabhia kuo li ani ne natsulu mungotsi. § **2:16** 2:16 Bhú kuo: Bhú galasisi-e, adu nani ne osudha inde agboko 'gú, adu la di ne obhende u agboko o bhú 'gú-o. Obhende u agboko-o, adu nani nadjeke kuo. † **3:3** 3:3 Tsia bhú Eki. 24:12. † **3:3** 3:3 Tsia bhú Djl. 31:33.

*Polo ngadhoge Ebhe kabula kulu gba e-o*

<sup>14</sup> Engú bini, a ayo me ya dhoge Ebhe, anga ani ngakø pi ya ndu 'kpí hana kalanu bhú galasisi‡ inde ngasuno me Yesu Kilisito agboko 'gú pí 'ndji ndu 'he hana agboko. Ani ngatima ya ne ndu bili hana ngubula nasuno Yesu Kilisito pi okpála. Nambila ani-e, a maka bádha se 'he inde ngapu ne ndu bili hana. <sup>15</sup> A ko paká. Ya maka mungotsi inde li se e nde babadha, inde li Yesu Kilisito aha e pi Ebhe. Se mungotsi ango-o ngapu pi okpála inde li Ebhe ngakobho o di ne okpála bhende ngangita. <sup>16</sup> Pi okpála bhende bhú ngita-a, se mungotsi bhomu-o sisiti, pi uo-o, se mungotsi ango-o ngatima uo bhú kuo. § Pi okpála bhende li Ebhe ngakobho o-o, se mungotsi bhomu-o babadha, a ngaha pi uo mukobho. A moko! A li nakpokpo Bádha Ngali-e ne tata na ngbéngbé. A ti da namemene da? <sup>17</sup> Ya maka okpála koko bhelé inde ngakpokpo eli gba Ebhe-e li nasia tia ade. Engú bini, ya mangbo ngakpokpo 'li Ebhe kala ani bhú ngbili 'ngú, bhú nakpøtø lio ne Yesu Kilisito.

### 3

*Omabhuka ne balua inde li Yesu Kilisito aye e-o*

<sup>1</sup> Engú inde ma aye e bhomu-o akunda napa me ya akunda matá na'o liya ngaya makpe abhúlá? Ya ne gumu balua ngú nasuno pi yi me ya ne obhulu titima gba Yesu ade. Ya di ne gumu ade me yi ye balua pi ya ngú nadhuku ne di me ya du nasusuno pi okpála. La pi obhulu titima koko-o, a ayo balua. Ya maka uo ade! <sup>2</sup> Yi ne balua gba ya-a inde li Yesu Kilisito aye e li bua ya-a ngayi makpe. Ndu kpála hana ti da nambimbila ne natatanga. <sup>3</sup> A ko paká, a mbámbá me yi ne balua inde li Yesu Kilisito aye e ngae, ani atsia atima sakpa ya. Ani ye ne 'ngu balua de. Ani

aye mangbo ne Bua gba Ebhe inde ɔ̃o. Aní ye pí opapala teme† de, aní aye mangbo lí bua okpála-kuti.†

*Polo ngamene kulu gba Ebhe-e lí lele gandja na mbia*

<sup>4</sup> Ya ngabhuka bhú ongú bhomu-o anga Yesu Kilisito apana pí ya me Ebhe atima ya ngae. <sup>5</sup> A ko de me ya ngamene ngua kulu bhomu-o ne angu gba ya makpe-e de, ya mene bhú 'ndji ya de. Ebhe ngaha angu bhomu-o pí ya ngú namemene ngae. <sup>6</sup> Ebhe aha angu pí ya ngú nadu okpála na kulu na gandja na mbia-a ngae. Gandja angu-o lu pí líli inde u aye nani e maye-e de, alu mangbo pí Bu Bhobua . Líli inde u aye nani e ngato kpála bhú kuo. La-a, Bu Bhobua naae ngaha pí okpála mukobho.

*Sangu na gandja na mbia ane bhende na didili-e mane*

<sup>7</sup> Nedhinga lí Ebhe aye nani líli lie pí opapala teme ngú nahaha pí Moidje-e , sangu gba Ebhe-e adu asu bhúla aní. Abana lí zizi adu andjia lie bhúla Moidje-e, a adu nga bha kpekpeke. Omaɔsalaele tí nani belegu da natsia bhúla aní de.† Ní au me belegu lí gandja na didili adu ato kpála lie bhú kuo-o, adu bhadi ne sangu. <sup>8</sup> I du mo-o, gandja na mbia inde lí Ebhe ngaha Bu Bhobua gba e pí ní bhú e asúno sangu gba Ebhe ane mane. A mo-o adi! <sup>9</sup> I du me kulu gba Moidje inde adu nato okpála bhú kuo nde nani ne sangu-o, asi la masi pí kulu na mbia gba Ebhe inde ngamene me okpála du ngbingbili-e, a asúno sangu gba aní-e ane mane di! <sup>10</sup> Ní tí belegu da napa me sangu inde akoto nani bhomu-o matá ngau lie ka sangu na naki inde-e ade, anga a ane bhe nani na kalanu-o mane. <sup>11</sup> Padhá de, anga i du me gandja na didili, inde akoto nani ngú nedhinga bedi-e nde akoto ne sangu-o, asi la masi maka gandja na mbia inde ngabhue duduma ne duduma-a?

<sup>12</sup> Ya ne nabhuka bhú gandja na mbia-o. Kaka-a, ya tí da napa 'ngú pí yi mbámbá. <sup>13</sup> Ya mene maka Moidje de. Padhá de, anga Moidje adu nani nabuku bhúla e ne

bongo ngubula me omaɔsalaele aú lele maka zi sangu gba Ebhe inde adu asu bhúla aní-e du abulu lie de-o. Zi sangu angu-o adu la bha nani ngú nedhinga bedi. <sup>14</sup> Omaɔsalaele angu-o, agbite nani bua o má ki! Ngú nakolo pí naki-e, lí ongisi gba uo du natanga ongú inde u aye e bhú gandja na didili-e, u ke mbolimboli de. A mana mugito me bongo ngabuku tata-a pí uo. Bongo bhomu-o bha bini nga'e lie me kpála nde akpɔtse lie ne Yesu Kilisito. <sup>15</sup> Abana pí naki, ndu nedhinga hana inde lí omaɔsalaele ngatanga obhuku gba Moidje lie, u ke mbolimboli de.

<sup>16</sup> Engú bini, maka u aye bhú bhuku gba Ebhe-e lie me, lí kpála dji bhúla e lí pápá gba Ngámá Ebhe-e, oehe inde lí pála bongo abuku e ú lie mbámbá. <sup>17</sup> A ko paká, Ngámá Ebhe-e, a ko Bu Bhobua. La-a, bili lí Bua gba Ngámá-a nde lí e, okpála inde oo bhú ngu o, a ko matá obalise na líli gba Moidje de. <sup>18</sup> Ndu ní hana inde lí bongo nabuku bhúla ní-e ayie bhúla o ayie, ní ngasuno sangu gba Ngámá maka bhú bitolobi. Abhomu-o, Ngámá inde di Bu Bhobua-a ngadji ní me ní kolo maka ní, ne sangu inde nganu bha ne kalanu.†

## 4

*Ebhe ngasuno angu gba e bhú bhuku gba obalise gba e-o*

<sup>1</sup> Ebhe bhú bádha bhú 'bu gba e aha pí ya kulu nakpokpo Bádha Ngali . Kaka-a, ya gie liya ne sidi de. <sup>2</sup> Ya ayala ndu 'ngú na pepe, i du di-e bhe na namu-o hana. Ya mene ehe bhú kali de, ya kpɔtse di 'lí Ebhe bhú dabili bini ne engú na eu de. Ya mangbo ngasuno ngbili 'ngú pí okpála mbámbá. Ya ngamene mo-o kala Ebhe ngubula me okpála hana mbila me lele nadhuku gba ya-a ngbingbili. <sup>3</sup> La-a, i du me Bádha Ngali inde ya ngakpokpo e nde mbámbá ade-e, a mbámbá ade bha bini pí okpála inde ngangita-o. <sup>4</sup> U ngabhuka ade anga Satana , ebhe na doto inde-e angbingi imbilangu gba uo-o angbingi. Ngaani ebhe angu-o amene me u aú zi

† 3:7 3:7 Tsia bhú Eki. 34:29. † 3:18 3:13-18 Tsia bhú Eki. 34:29-35.

'kpí inde bhú Bádha Ngali-e de. A ko zì 'kpí na sangu gba Kilisito . Ngaani-e, ani mana Ebhe libhomu. <sup>5</sup> Nedhinga ya ngakpokpo Bádha Ngali-e lie, a ko de me ya ngakpokpo engú gba ya makpe-e de. Ya ngakpokpo me Yesu Kilisito ne Ngámá ngae. La pí ya-a, ya bha naaya ne obalise gba yi kabula ani. <sup>6</sup> Padhá de, anga Ebhe apa nani me: «Zì 'kpí sù bhú bitil!†» Ani amene ngae makpe me zì 'kpí gba ni-e sù li bua ya ngubula me ya mbila sangu gba ni inde ngasù bhúla Yesu Kilisito-o.

<sup>7</sup> Oehe na babadha bhomu-o, Ebhe a'o bhú ya. Engú bini, ya bhùbhuku maka madakpa. Ebhe amene mo-o ngú nasuno me angu na ngangamba bhomu-o yie bhú ya de, ayie mangbo bhú ni. <sup>8</sup> Ya ngazù ndù ngua likabhu hana, engú bini, likabhu bini ha nga angu ya de. Bua ya angamba, engú bini, ya ngaholo bua ya. <sup>9</sup> Okpála ngato mbolo li ya, engú bini, Ebhe 'o ká ya de. U agbo 'i ya, engú bini, u bhòle ya de. <sup>10</sup> Ya ngadhuku ne kuo ndù 'kpí hana sa so ya maka Yesu, ngubula me mukobho gba ani u di lie bhú lele nadhuku gba ní-o. <sup>11</sup> Ndù nedhinga hana ya nde lie bhú mukobho-o, kuo de ya masikpe kabula Yesu. Abhomu-o, u tsia tí da di nau mukobho gba ani-e bhú lele nadhuku gba ní píla doto-o. <sup>12</sup> Kaka-a, kuo ngamene kulu bhú ya ngubula me mukobho dù namene kulu bhú yi.

<sup>13</sup> Bhuku gba Ebhe-e ngapa me: «Ma abhuka mù Ngámá, kaka-a, ma atsia agama 'ngú.†» Ngaya di-e, ya abhuka Ngámá, kaka-a, ya atsia agama di 'ngú. <sup>14</sup> Ya ambila me Ebhe inde azuku Ngámá Yesu bhú ká okpála inde amu-o, azúku di ya bhú dabili bini ne ani. Ani tsia 'ó di ya bhú dabili bini ne yi de e. <sup>15</sup> Ndù 'ngú ya ngakibila e hana-a, a ngubula yi, amba ngayi okpála inde li Ebhe ngasuno bádha bhú 'bu gba e pí yi-e, yi dù nabe ndù yi ane mane. Abhomu-o, mayo gba yi nagie heni pí ani-e tsia bé di ndù e. Bhobhomu-o tsia há sangu pí Ebhe.

<sup>16</sup> Kaka-a, ya gie liya ne sidi de. Abana li kute ya dù nandala-a, ya ambila me bua

ya ngasia angu na mbia ekpí bini ne bini hana. <sup>17</sup> Likabhu ya ngazù e mbia inde-e mbomboye, ní tsia sangu na ngbéngbé inde ngadjeke ní-o. Sangu ango-o ane ndù 'he hana, a la di ngabhue duduama ne duduama. Olikabhu ní ngazù e inde-e ngaleke ní ngú nasia sangu bhomu-o. <sup>18</sup> Padhá de, anga ní nga'o 'to ní 'to engú i u lie ne djila de-o. Ní 'o 'to ní 'to engú inde ngau lie ne djila de-e de. Ehe bhende ngau lie ne djila ngabhue naali ade, engú bini, ehe i u lie ne djila de-e, ngadu duduama ne duduama.

## 5

*Kute na mbia inde li omabhuka asía e abhúla-o*

<sup>1</sup> Ní mbila hana me li eti inde ní nde bhú e kpi-e, a ka ní ne eti koko abhúla a akunda napa me, ekpí bini, ní akpí makpi, ní tsia 'ó ka kute na doto inde. Eti li Ebhe aleke e pí ní-e, okpála yiki ngao de. Eti ango-o adú duduama ne duduama. <sup>2</sup> Nedhinga ní nde lie bhú kute inde-e, ní ngalopolo liní anga gumu gba ní na ngbéngbé-e me ní dyi kute na abhúla maka bongo na mbia. <sup>3</sup> Nedhinga ní a'ó ka kute na doto inde-e lie, ní dù abhúla mandi kute de. Ní asía kute na mbia. <sup>4</sup> Ní mbila hana me ní nde nga bha lie bhú kute na doto inde-e, ní ngalopolo liní mugito me ní abi tili 'he. A ko de me ní ngagili nadu mandi kute-e de. Ní mangbo ngagili me ní dyi kute na abhúla ngubula me mukobho ha angu ehe bhe na kukuo-o. <sup>5</sup> Ebhe aleke ní ngubula mukobho ango-o ngae makpe. Ani atsia aha ngaiza Bua gba e pí ní bhú ka ohe inde ani aleke e pí ní-o.

<sup>6</sup> Ní mbila hana me, nedhinga ní nde lie bhú kute na doto inde-e, ní nga bha tsutsu de bili li Ebhe Ngámá nde lie-o. Abana inde lie mo-o, ní abedhe ndù 'kpí hana ne masi. <sup>7</sup> Padhá de, anga ní ngadhuku li lele nabhuka makpe, ní dhuku li lele nakpata engú ní ngau e ne djila ní-e de. <sup>8</sup> A moko, ya abedhe ne masi bedhe. Ya la di ne gumu nayie bhú kute inde-e ngú nanu nadu dengo Ngámá gba ní-o. <sup>9</sup> Engú

† 4:6 4:6 Tsia bhú Dje. 1:3. † 4:13 4:13 Tsia bhú Ets. 116:10.

inde li bua ya ngae inde, a ayo me ya mene engú inde anga li Ebhe, abana ya ðu bhú kute inde, abana ya yie bhú kute ang-o. <sup>10</sup> Padhá de, anga a ayo me ndu ní hana ní ze bhú djila Yesu Kilisito ngú napa me aní kodho 'ngú gba ní-o. Abhomu-o, li kpála ne kpála tsia sía ehe inde atí ne engú li aní amene e li nedhinga aní adu lie bhú kute na doto-o. Kpála ne kpála asía makalá na bádha 'ngú, i ðu di-e bhe na siti 'ngú inde aní amene e-o.

### *Ebhe nga'i okpála bhú 'li ya*

<sup>11</sup> Ya mbíla hana me namanga Ebhe ne ní-ie. Kaka-a, ya ngagili me ya to bhú 'ndji okpála me u bhuka Bádha Ngali ya ngakpokpo e-o. Kala Ebhe-e, ní ti da nawo liní de. Ma ngabhundja la di me kala yi-e, ma wo lima de. <sup>12</sup> Ya kúnda matá de me ya kpokpo 'ngú gba ya-a pí yi ngaya makpe de. Engú bini, ya ngakúnda na'o yi me yi ðu ne gindaginda li 'ngú gba ya-o. Abhomu-o, yi ti da nagie 'ngú pí okpála inde ngau ngbengbe ongú bhende i ngau lie mbámhá, inde i tsia 'kpí li 'ngú bhende li bua kpála de-o.

<sup>13</sup> I ðu me ya nde ne obhulu pele maka li okpála koko ngabhubhundja lie-e, a ko kabula Ebhe. I ðu me ya nde ne obhulu pele ade-e, a ko ngubula nateteke yi. <sup>14</sup> Engú inde ngatima ya me ya mene kulu inde-e ne kekele-e, a ko mukúnda li Yesu Kilisito nde ne e pí ya-o. Ya ambíla ndjindji me Yesu Kilisito akpi mada ndu okpála hana. Kaka-a, bhú djila Ebhe-e, ndu okpála hana amu bhú dabili bini ne aní. <sup>15</sup> Aní akpi ngubula ndu okpála hana, amba ndu obhende bhú mukobho adú matá akobho bhú ngu o de, engú bini, u ðu akobho pí kpála inde akpi, atsia azuku pí uo-o.

<sup>16</sup> Kaka-a, ya matá ngatsia kpála ne djila bhe na kpála-kúti ade. A ko paká ya adu nako natsia Yesu Kilisito ne djila bhe na kpála-kúti, la mbia inde-e, ya matá ngatsia aní mo-o ade. <sup>17</sup> Nedhinga li kpála akpøtø lie lie ne Yesu Kilisito-o, aní akolo kpála na mbia. Lele dasundú gba aní na kalanu-o andjia. A íbili bhú aní ne lele

dasundú na mbia. <sup>18</sup> Ebhe ngamene ndu 'ngú bhomu-o hana ngae. Aní atima Yesu Kilisito me aní go to guo 'ngú sùnda ní ne o. Aní aha kulu bhomu-o pí ya ngae me ya nu gbele okpála koko de ní, amba ní to guo 'ngú sùnda ní ne uo. <sup>19</sup> Padhá de, anga Ebhe adu namene kulu ngú nato guo 'ngú sùnda o ne okpála-kúti li kpadji gba Kilisito. Aní tsia matá siti 'ngú gba uo de. Abhomu-o, Yesu Kilisito atsia atima ya me ya kpokpo pí okpála lele maka a ayo lie me u sia guo 'ngú sùnda o ne Ebhe-o.

<sup>20</sup> Bhobhomu-o akúnda napa me Yesu Kilisito atima ya ngae makpe. A na paká me Ebhe nga'i okpála bhú 'li ya. Kaka-a, ya ngayo ka uo ne 'li Yesu Kilisito me, u 'o me Ebhe to guo 'ngú sùnda o ne e. <sup>21</sup> Yesu Kilisito mene nani siti 'ngú belegu de bini. Engú bini, Ebhe a'o kili siti 'ngú gba ní-e li 'ngbu aní, ngubula me li kpadji gba aní-e, ní sia ngasa nakolo ngbingbili bhú djila Ebhe.

## 6

<sup>1</sup> Ya ngamene kulu bhú dabili bini ne Ebhe. Inde lie mo-o, ya ngayo ka yi me, yi aú bádha bhú 'bu li Ebhe apana e pí yi-e padhá de. <sup>2</sup> Padhá de, anga Ebhe apa bhú Bhuku gba e me:

«Nedhinga akolo lie me ma mene bádha 'ngú pí yi okpála gba ma-a, ma adje yi.

Nedhinga akolo lie me ma kobho yi-e, ma ateteke yi.»

Ondaise ma, yi gbo 'dje yi, a ko mbia inde-e nedhinga na babadha, a ko nedhinga na mukobho.

### *Likabhu li Polo azu e asuno me a ko kukulu bali gba Ebhe*

<sup>3</sup> Ya kúnda namene engú bini de inde améne me okpála ti ka e-o, anga i ðu mo-o de-e, u pá 'ngú li kulu gba ya-a sisiti.

<sup>4</sup> Bhú ndu 'ngú ya ngamene e hana-a, ya akúnda mangbo nasuno pí okpála me ya ne obalise na kukulu gba Ebhe. Abana ya ðu nasia mangua likabhu dho-ie, abana u ðu nato mbolo li ya, ya bha ngakikibila makibila. <sup>5</sup> U abhi ya, u amba ya bhú

† 6:2 6:2 Tsia bhú Isa. 49:8.



tikpa, u ato kpéke ndji bhú 'ndji okpála me u mene ya sisiti. Ya abhølo kuo ya ne kulu masakpe da napa me ya asia belegu nedhinga nala ne nazu 'he de. <sup>6</sup> Bua ya kala Ebhe bubu, ya ngasuno me ya ambila ongu gba Ebhe-e má kpulukutu! Ya ne 'ndjá bua, ya ne bádha bua, Bu Bhobua bhú ya, ya la di ne mukunda na kukulu.

<sup>7</sup> Ya ngakpokpo kukulu 'ngú pi okpála bhú angu gba Ebhe. Lele bádha nadhuku gba ya-a pi ya maka tia 'gú ngú naha 'gú ne obhulu yala gba ya-o. A di pi ya maka kopí ngú nalila liya ne di sakpa obhulu yala gba ya-o. <sup>8</sup> Okpála koko ngamanga ya, okoko ngau ya bhú djila o padhá. Okpála koko ngatoko ya, okoko ngasobho ya. Okpála ngau ya mugito me ya ne obhulu eu, ya nde la ngapa kukulu 'ngú-o. <sup>9</sup> Okpála koko ziba de me ya ne obhulu titima gba Yesu-o de, engú bini, okpála bhelé ngaziba ya. Okpála koko ngau ya mugito me ya ne omakpiakolo, ya nde la bhú mukobho-o. U ngato mbolo li ya, engú bini, ya mu de. <sup>10</sup> Abana li bua ya ngabi likabhu lie ka okpála naali-e, ya bha ndu 'kpí hana bhú djali. Ya bhú ndibhili, engú bini, ya ngamene me okpála bhelé kolo obhulu tia kala Ebhe. Ya ngau liya bhú djila okpála mugito me ehe bini ka ya píla doto inde-e ade. La-a, bhú ngbingbili-e, ndu 'he hana ne naaya 'he.

<sup>11</sup> Ngayi ondaise ya na Kolito-o, ya agama 'ngú pi yi mbámá. Ya wo engú inde li bua ya-a belegu de bini. <sup>12</sup> Pi ya-a, ya gbite bua ya pi yi de, yi agbite mangbo bua yi pi ya ngayi. <sup>13</sup> Ma ngagama 'ngú pi yi mugito me yi ne ongisi ka ma. Ma ngapa pi yi me: «Yi gie mukunda ya nde ne e pi yi-e pi ya. Yi awó engú inde li bua yi-e pi ya de.»

#### *Yi akpétse liyi ne omupagano de*

<sup>14</sup> Yi akpétse liyi bhú dabili bini ne omupagano ngu namene ehe ne uo de. Ehe inde ngbingbili-e ti da nakpétse lie bhú dabili bini ne ehe na sisiti-e lele pi? Zi 'kpí ti da nakpétse lie bhú dabili bini ne biti lele pi? <sup>15</sup> Yesu Kilisito ti da naje

lio ne djabulu lele pi? Kpála inde abhuka Yesu-o ti da nadu ne mabhundja bini ne kpála bhende i bhuka de-e uu? <sup>16</sup> Nganí-e, ní ne 'ngbé 'ti Ebhe inde uu. 'Ngbé 'ti Ebhe ti da nakpétse lie ne 'ti atolo belegu de bini. A maka li Ebhe apa lie li 'ngú gba omaha e me:

«Ma adú bhú ká uo,  
ma tsia dhuku bhú dabili bini ne uo.  
Ma adú ne Ebhe gba uo, u tsia dú ne omaha ma.†»

<sup>17</sup> Ka 'ngú ango-o, Ebhe Ngámá apa pi uo me:

«Yi ze bhú ká omupagano maze,  
yi adú ne uo bhú dabili bini de.

Yi abú 'kpa yi li 'he inde kala ma sisiti-e de,

abhomu-o ngama-a, ma tsia ziba yi.†

<sup>18</sup> Ma adú ne 'dyi yi,

yi tsia dú ne ongisi gba ma.

Ngámá Angbamili apa mo-o.†»

## 7

<sup>1</sup> Ondaise ma na mukunda, Ebhe apa me engú inde ni apa me ni améne e pi ní-e, ni améne mamene. † nde lie mo-o, a ayo me ní vulu liní bhú ndu osisiti 'ngú inde ngato zibotu li kate ní ne bua ní-e hana. Ní mene ne kpéke me ní du bubu kala Ebhe ne namanga ani mamanga.

*Polo akpi ndjili ka li omabhuka na gudhu na Kolito adji bua o lie-o*

<sup>2</sup> Ondaise ma, yi 'o ya li bua yi! Ya amene siti 'ngú li pabili gba kpála bini de. Ya a'e kpála bini li kpadji gba Ebhe-e de. Ya ha 'he ka kpála bini bhú napite ani de.

<sup>3</sup> A ko de me ma ngapa 'ngú bhomu-o ngu na'o mangimbo pi yi-e de. A maka ma de apa lie-o, ya ne mukunda pi yi naali. Ehe bini gbó bhusu mukunda ya nde ne e pi yi-e de, abana i du nakpi, abana i du me ní nde bhú mukobho. <sup>4</sup> Yi ne kpúkpú na bua ma. Ma ne gindaginda naali li 'ngú gba yi-o. Bhú ndu likabhu ya ngazu e hana, ya gie liya ne sidi de, ya abedhe mangbo ne djali bedhe.

† 6:16 6:16 Tsia bhú Lev. 26:11-12; ne bhú Edj. 37:27; di ne bhú Djlm. 32:28. † 6:17 6:17 Tsia bhú Isa. 52:11; di ne bhú Edj. 20:34, 41. † 6:18 6:18 Tsia bhú 2 Sam. 7:8, 14.

<sup>5</sup> A ko paká, abana nedhinga ya akolo lie bhú Makedonia, ya sia belegu nedhinga bedi ngú nago de. Ya asia okpekpeke da 'ngú ne ndu pasu hana. Ya du ne guo 'ngú sunda ya ne okpála koko de, ya atsia adu ne tsulu. <sup>6</sup> Engú bini, Ebhe inde atoto masi bhú okpála inde andala-a, abedhe matá ya ne masi li nedhinga li Tito agie lie lie-o. <sup>7</sup> Ya bedhe bha ne masi ka nago ka ani-e de, engú bini, ngali ani akpokpo e pi ya-a ato di masi bhú ya ngae. Ani akpokpo pi ya lele maka yi ato masi bhú ani lie-o. Ani akpokpo pi ya me yi abedhe ne gumu nau ma bedhe. Ani apa me yi ngakina liyi ka osisiti 'ngú yi amene e-o. Ani apa me yi ne gumu nago nateteke ma bhú egú ma ngagu e ne obhulu yala gba ma-o. Ma adje lie mo-o, ma abedhe matá ne djali bedhe.

<sup>8</sup> Ma ambila me balua\* inde ma aye nako e pi yi-e aha babuma pi yi naali. Ma ti nako da naje likabhu li bua ma tété, padhá de anga, ma ambila me balua bhomu-o aha likabhu pi yi ngú nedhinga bedi. Engú bini, bua ma ne likabhu tété mbia inde-e ade.

<sup>9</sup> A na paká me, ma mangbo ngakpi djali. Ma kpi djali ango-o ka babuma yi asia e ka ma-a de. Engú bini, ma ngakpi djali anga babuma yi asia e amene me yi dji bua yi. Babuma yi asia e bhomu-o, yi asia li lele maka li Ebhe akunda lie-o. Inde lie mo-o, ya mene yi sisiti de. <sup>10</sup> Padhá de, anga li kpála sia babuma li bua e li lele maka li Ebhe akunda lie-e, babuma ango-o há pi ani nadi bua e. Ani dji bua e-e, ani tsia kóbho. Ya ti da naje likabhu li bua ya tété lele pi? Engú bini, li kpála sia babuma li bua e, i du me ani nde dji bua e de-e, bhobhomu-o ngagbele pi ani nakpi.

<sup>11</sup> Babuma yi asia e, yi asia li lele maka li Ebhe akunda lie-o. Yi tsia nga obabadha 'ngú inde li babuma ango-o azu e bhú yi-o: a ngaha pi yi me yi du ne bádha bua ngú naleke 'ngú sunda yi má gala! Yi asuno mbámbá me yi li bhú siti 'ngú de.†

\* **7:8** 7:8 Balua: A ko balua na bini gba Polo pi omabhuka na Kolito de. A ko balua inde ani aye e atsia angita-o.

† **7:11** 7:11 Tsia bhú 2 Kol. 2:5-11. \* **8:1** 8:1 ODadjua gba Ebhe na Makedonia: A ko obhende bhú Filipoi, Tesalonike ne Beloya-o.

Yi ngake 'ngú liyi li siti 'ngú ango-o. Yi ne tsulu li 'ngú inde li siti 'ngú ango-o ti da nazu e-o. Yi abedhe ne gumu nau ma di ne namene engú li lele maka li Ebhe akunda lie bedhe. Yi bedhe ngú na'o 'ngú pi kpála inde amene siti 'ngú-o. Yi apana mbámbá me ngayi makpe-e, yi li bhú 'ngú bhomu-o de.

<sup>12</sup> Li ma ye balua pi yi-e, ma ye ka 'ngú gba kpála inde amene siti 'ngú-o de. Ma ye di ka 'ngú gba kpála bhe u amene siti 'ngú li e de. Ma aye mangbo ngú nasuno me yi mbila mbámbá kala Ebhe me yi ne mukunda pi ya li bua yi naali. <sup>13</sup> Kaka-a, engú yi amene e aké bua ya kuto.

Bua ya ké bha kuto ngae de, ya akpi di djali naali ka nau me Tito adu ne djali naali ka li ndu yi hana ato masi bhú ani lie-o. <sup>14</sup> Nedhinga ma atima ani lie agba yi-e, ma akpo 'ngú yi pi ani ndjindji. Mbia inde-e, yi tsia ha numu muma de. Maka ya akpokpo nako lie pi yi kukulu 'ngú ndu 'kpi hana-a, ndu babadha 'ngú ya akpokpo e li 'ngú gba yi pi Tito asuno me a ko kukulu 'ngú. <sup>15</sup> Nedhinga ani akolo lie agba yi-e, yi asia ani ndjindji. Ndu yi hana, yi amanga ani naali, yi au ani ne tsulu, yi atsia adu amene engú maka ani akunda lie-o. Ani bhundja engú bhomu-o, ani bédhe matá ne mukunda pi yi bedhe. <sup>16</sup> Ma ne djali, anga yi ne kpúkpú na bua ma bhú ndu 'ngú hana.

## 8

*Polo ato masi bhú omabhuka na gudhu na Kolito me u teteke ondaise o na Yelusalema*

<sup>1</sup> Ondaïse ya, ya akunda me yi mbila engú inde li Ebhe amene e bhú bádha bhú 'bu gba e pi okpála na oDadjua gba Ebhe na Makedonia.\* <sup>2</sup> Omabhuka inde oo azu nani likabhu naali, engú bini, u abedhe ne djali bedhe. U adu nani bhú ndibhili naali, engú bini, u du atsia bhúla 'he pi okpála de. <sup>3</sup> Ma au ne djila ma makpe. U apu 'he nakpata lele ehe inde adu ka uo-o. U apu belegu 'he nane dada mane. U aha

bhú ngu o, okpála kata uo tété gandji de. <sup>4</sup> U akikiliki lio pi ya naali me ya asuno bádha bhú 'bu pi o, ngabula me o to 'kpa o pi omabhuka na Yudaya ne natima tia pi uo. <sup>5</sup> Ehe inde u amene e ane bhende ya adu nabhundja e-o. U aha ngaiza lio libhomu ngabula kulu gba Ngámá Yesu. U atsia aha di lio ngu nateteke ya nakpata lele maka li Ebhe akunda lie-o.

<sup>6</sup> Kaka-a, ya ayo ka Tito ne kekele me ani gie lie agba yi ngu nandjia dú kulu na bádha bhú 'bu inde ani akpo nani lita e ko. <sup>7</sup> Yi ne obhulu tia kala Ebhe nane okpála koko. Nabhuka gba yi-e kpekpeke. Yi ngakpokpo Bádha Ngali gba Ebhe-e ndjindji. Yi mbila 'ngu gba Ebhe-e ndjindji. Yi aha liyi libhomu ngu kulu gba Ebhe-o. Yi ne mukunda naali li pabili gba ya. Ka 'ngu ango-o, yi mene ne kpeke me yi du ne obhulu tia li kpadji na ngua bádha bhú 'bu bhomu-o.

<sup>8</sup> Engu inde ma apa e pi yi bhomu-o, a ko de me ma aha pi yi maka líli-e de. Ma apa mangbo pi yi, ngabula nasuno lele maka li oDadjua gba Ebhe koko amene lie-o. I du me yi nde akpata lele maka u amene lie-e, yi suno me mukunda gba yi-e di kukulu. <sup>9</sup> Padhá de, anga yi mbila bádha bhú 'bu gba Ngámá gba ní Yesu Kilisito hana. Ngaani kpála inde adu bhulu tia, ani a'o lie bhulu ndibhili ngu nateteke yi. Ani amene mo-o ngu napa me, bhú ndibhili gba ni-e, yi kolo obhulu tia kala Ebhe.

<sup>10</sup> Ma ngaha pi yi mabhundja gba ma pindji napu 'he pi omabhuka inde bhú ndibhili-o. Bhú kalanga inde akodho 'kpi-e, yi adu nako okpála na kalanu ngu napu 'he. Yi du bha bini kalanu bhú napu 'he de, yi adu di ne okpála na kalanu nabhundja 'ngu ango-o. <sup>11</sup> Kaka-a, mbia inde-e, yi ndjia kulu bhomu-o ndjindji. Yi 'o bua yi ngu nanu ne 'ngu ango-o ne kalanu akolo a li soso, ne mukunda inde yi adu nani ne e ngu namemene, nakpata lele ehe inde ka yi-o.

<sup>12</sup> Padhá de, anga i du me yi nde apu 'he pi Ebhe ne bua yi bini-e, Ebhe ngaziziba bha bini li lele bhende ka yi-o. A ko de

me Ebhe nga'o 'to e me yi pu pi ni ehe bhende ka yi ade-e de. <sup>13</sup> A ko de me ma akunda na'o likabhu gba okpála koko pi 'ngbu yi ngu nato yi bhú ndibhili-e de. A ko mangbo me ndu yi hana yi du ne 'he inde ati ne yi-o. <sup>14</sup> Mbia inde-e, ehe ka yi bhelé. Kaka-a, yi ti da nateteke okpála bhende bhú ndibhili-o. Ekpí koko-o, yi du di bhú ndibhili me ehe nde ka uo bhelé-e, u ti da nateteke di yi. Li ndu yi hana tsia du ne 'he inde ati ne yi-o. <sup>15</sup> A maka u aye lie bhú bhuku gba Ebhe-e me:

«Okpála anu ngu nalo mana.

Okpála bhende alo bhelé-e, u azu lie, ale ne uo.

Okpála bhende i lo bhelé de-e, u azu lie, ale bhadi ne uo.†»

*Polo atima Tito ne obi e nalo tia*

<sup>16</sup> A ayo me ní dhogo Ebhe inde a'o li bua Tito me ani nu teteke yi maka ya amemene lie-o. <sup>17</sup> Tito aziba engu inde ya ayo e ka ani-o. Ani ziba bha bini 'li ya de, engu bini, ani aziba ne bua e makpe me ni nu agba yi anga ani ne mukunda pi yi. <sup>18</sup> Ya atima ani di bhú dabili bini ne ndai ní, inde li oDadjua gba Ebhe-e ngadhogo e kabula kulu inde ani ngamene e ngabula Bádha Ngali-o. <sup>19</sup> La matá di-e, oDadjua gba Ebhe abhu ani ngabula me ya anu ne uo bhú dabili bini ngu namene kulu na bádha bhú 'bu inde. A ko kulu inde a ayo me ní mene e ngu naha sangu pi Ngámá gba ní ngae makpe. Abhomu-o, i tsia suno di pi okpála bádha bua gba ní-o. <sup>20</sup> Otia inde ya apo bhúla e-e bhelé. Kaka-a, ya ngalilila ndjindji ngabula me okpála apá 'ngu na sisiti li ya tété de. <sup>21</sup> Ya ngagili ne kpeke me ya mene engu inde babadha bhú djila Ngámá gba ní di ne bhú djila ndu okpála hana.

<sup>22</sup> Ya di ngatima saka ndai ní bini bhú dabili bini ne obhe bhisi bhomu. Ya ale ani bhutsibhutsi, ya atsia au me ani ngaha lie ndu 'kpí hana ngu kulu gba Ebhe-o. La mbia inde-e, ani matá ngaha lie ane mane anga ani ngambila ndjindji me yi ne kpukpu na bua ni. <sup>23</sup> La pi Tito-o, a ko kpála inde ya ngamene kulu ne e bhú dabili bini. Ya ngamene kulu ne ani bhú

† 8:15 8:15 Tsia bhú Eki. 16:18.

ká yi bhú dabili bini. Okpála bhe bhisi inde adhuku ne ani-e, okpála na oDadjua gba Ebhe-e atima uo ngao. U ngamene kulu ngú naha sangu pi Yesu Kilisito. <sup>24</sup> Kaka-a, yi suno mukunda gba yi-e pi uo ne bua bini. Li okpála na oDadjua gba Ebhe-e aú lie mo-o, bhobhomu-o suno pi uo me ya pa 'ngú gba yi-e bhú djila uo bhú eu de.

## 9

*Ebhe ne mukunda naali pi okpála inde ngapu 'he ne djali-o*

<sup>1</sup> Tata ngú napa me ma ye 'ngú pi yi pindji kulu gba ní nateteke omabhuka inde bhú ndu doto na Yudaya ade. <sup>2</sup> Padhá de, anga ma mbila bádha bua yi nde ne e pi uo hana. Ma ngapa 'li ma tété de ondaise ní na Makedonia\* me, «ngayi ondaise ya na Akai, yi bedhe ngú nateteke omabhuka na Yudaya, nayie bha bini bhú kalanga inde akodho 'kpí-o.» Li okpála na Makedonia adje lie mo-o, okpála bhelé bhú ká uo asia di gumu nanu nateteke uo.

<sup>3</sup> La-a, ma ngatima ondaise ní bata agba yi ngú napa me yi po bhúla tia bhomu-o kalanu maka ma apa nako pi okpála koko lie me yi améne mamene-o. Abhomu-o, nedhinga ya akólo lie agba yi-e, engú ya apa e pindji yi pi uo-o, akóto eu de. <sup>4</sup> Ne ma ne okpála na Makedonia, li ya kolo agba yi, ya bhaka me yi nde nga bedhe ade-e, numu méne ya naali. Ma ambila la bhadi me numu bhe gba yi-e dú la matá bhe nane mane, anga ma apa pi uo me yi bedhe. <sup>5</sup> Kaka-a, ma au ndjindji me ma yo ka ondaise ní inde-e me, u nu pi ya agba yi kalanu ngú napa me u holo napo bhúla tia inde yi apa nako me yi ahá e-o. Abhomu-o, tia bhomu-o adú bedhe ngú nadjeke nakolo ka ma-o. A tsia suno me yi ngahaha ne bádha bua, yi ha ne siti bua de.

<sup>6</sup> Yi mbila ndjindji me: kpála inde alu ezu bedi-e, ani asía bhadi bedi. Kpála inde alu ezu bhelé-e, asía bhadi bhelé! <sup>7</sup> Kaka-a, a ayo me kpála ne kpála ha maka

ani abhundja lie-o. Ani apú ne bua na bhisi bhisi de, ani apú di de me anga u aholo ni tété ne kpéke-e de. Padhá de, anga Ebhe ne mukunda pi kpála inde ngapu 'he ne djali-o. <sup>8</sup> Yi mene mo-o, Ebhe ne angu ngú nabledhe yi ne ndu bádha bhú 'bu hana, ngubula me yi du ndu 'kpí hana ne ndu 'he hana inde yi nde ne gumu e ngú mukobho gba yi-o. I du mo-o, yi du di ne 'he inde yi ti da na'o e li tula ndu obabadha kulu hana. <sup>9</sup> A maka u aye lie bhú Bhuku gba Ebhe-e li 'ngú gba kpála inde ngbingbili-e me:

«Kpála inde ngapu 'he pi obhulu ndibhili ne bua e bini-e, bádha 'ngú gba ani-e ngadu duduma ne duduma.»

<sup>10</sup> Ebhe ngaha nguwa pi okpála ngú nalulu, di ne mapa ngú nazuzu. I nde lie mo-o, ani ahá ndu nguwa yi nde ne gumu e hana pi yi. Ani tsia méne di me a bhele ngubula me yi du napu 'he ne kalanu. <sup>11</sup> Ebhe améne me yi du ndu nedhinga hana ne obhulu tia ngubula me yi du napu 'he ndu 'kpí hana. Abhomu-o, li okpála bhelé gie heni pi Ebhe li ohe inde ya ahá e pi uo ne 'li yi-o. <sup>12</sup> Padhá de, anga ehe yi apú e tétéke bha bini omabhuka inde bhú ndibhili-e de. A méne di me okpála bhelé gie heni pi Ebhe bhú mayo gba o-o. <sup>13</sup> U aú kulu yi ngamene e ne tata naali. Kaka-a, u agie heni pi Ebhe ngú nau me yi ngamanga Bádha Ngali gba Yesu Kilisito, di ne me yi ngagbo bhasu 'he gba yi-e ne o, di ne okpála koko. <sup>14</sup> U asúno mukunda gba o-o pi yi bhú nayo Ebhe. U améne mo-o, anga bádha bhú 'bu gba Ebhe-e amene me yi bhulu 'kpa yi pi uo. <sup>15</sup> A ayo me ndu okpála hana dhogò Ebhe ngú bádha 'ngú gba e inde ane mane-o.

## 10

*Polo agie 'ngú pi okpála inde nga'o 'ngú pí ani-o*

<sup>1</sup> Ngama Polo-o, ma ngayo ka yi engú bini, ne 'li Yesu Kilisito kpála na bhuku 'ngú di ne bádha 'ngú-o. U ngapa li ma

\* **9:2** 9:2 ODadjua gba Ebhe na Makedonia: A ko obhende bhú Filipoi, Tesalonike ne Beloya-o. † **9:9** 9:9 Tsia bhú Ets. 112:9.

me ní dũ ne yi bhú dabili bini-e, ma ngake lima ne kuto, i dũ la me ma nde tsutsu-o, ma ngagama okpekpeke 'ngú pí yi bhú obalua gba ma-o. <sup>2</sup> Engú inde ma ngayo e ka yi-e, ma ngayo ka yi me, yi atíma ma de me ma gama okpekpeke 'ngú pí yi nedhinga ma akólo lie agba yi-e de. Okpála koko bhú ká yi ngabhundja me ya ngamene 'ngú maka okpála na doto. La-a, pí okpála bhomũ-o, ma asúno angu gba ma-a pí uo masuno.

<sup>3</sup> A na paká me ya ne okpála-kuti, engú bini, ya ngagũ gbele maka okpála-kuti ade. <sup>4</sup> Bhú gbele ya ngagũ e-e, otia 'gú ya ngagũ gbele ne e-e, a ko obhende na pía doto inde-e de. A ko okpekpeke tia 'gú inde ayie ka Ebhe. Otia 'gú bhomũ-o ne angu ngú nabhili okpála inde ngagũ Ebhe-o. Ya ngani ne di 'bhø obhulũ eu inde ngagbe kpekebhe-o. <sup>5</sup> Ya ngaha angu eu gba uo inde ngamene me u abhúka Ebhe de-o. Ya ngagili nadjí mabhundja gba uo-o ngubula me u manga Yesu Kilisito. <sup>6</sup> Nedhinga yi apána lie me yi ngamanga ya maka a ayo lie-e, ya 'ó 'ngú pí ndũ okpála koko hana inde i kũnda namanga ya de-o.

<sup>7</sup> Yi tsia 'ngú maka inde lie-o. Li okpála koko bhú ká yi pa me o ne okpála ka Yesu Kilisito-o, a ayo me u mbila me ya di ne okpála ka Yesu Kilisito maka uo. <sup>8</sup> Angu li Ngámá Yesu Kilisito aha e muma-a, a ngubula me ma teteke yi ne di. A ngubula nabhili yi ade. Nedhinga koko-o, ma ne gindaginda tété naali, ma dje nũmũ tété de. <sup>9</sup> Ma kũnda de me yi holo nabhundja me ma ngakũnda nabu tsulũ li yi, ne obalua gba ma, ma aye e pí yi-e de. <sup>10</sup> Padhá de, anga okpála bini bini ngapa me: «Li Polo ye balua pí ní-e, ani ngaye okpekpeke 'ngú, a ngandjia angu ní mandjia. Engú bini, ani kolo bhú ká ní ngae makpe-e, ani holo nagukũ, ani lé ngama 'ngú pima.» <sup>11</sup> A ayo me okpála inde ngapa ngua 'ngú bhomũ-o mbila me, engú inde ya ngaye e bhú obalua gba ya me ya nde de yi tsutsu-o, ya kolo gba yi-e, ya améne bha maka ya aye lie pí yi bhú

obalua-o.

<sup>12</sup> Okpála bhomũ-o ngau lio ne bhúlá naali. Ya pá de me ya viti ne uo bini-e de, ya kpó 'ndjii ya ne uo de. A ko ongingi. U ngapima lio ngao makpe, u ngakpo 'ndjii o li kute o makpe. <sup>13</sup> Li pápá gba ya-a, ya ti da napa 'li ya nane dada mane de. Nedhinga li Ebhe amba bhúla ya lie ne kulu agba yi-e, ani atsia akodho kozie tété. Ya apise bha ne kulu gba ya li kozie ango-o. <sup>14</sup> Ya gó nani ne Bádha Ngali gba Yesu Kilisito agba yi de-e, u de apá li ya me ya agulu kozie gba ya-a agulu. Engú bini, i nde la lie me ya nde ne okpála na kalanũ ngú nanũ ne Bádha Ngali pí yi-e, bhobhomũ-o asuno me ya gulu nga kozie gba ya-a de.

<sup>15</sup> Kaka-a, ya pá 'li ya li kulu inde li okpála koko amene e de. Engú bini, ya ne gumũ me nabhuka gba yi-e be ndũ e, ngubula me kulu gba ya bhú ká yi-e be di ndũ e. Ya abhundja me ya ne nga bíli inde li Ebhe apa me ya pise lie de. <sup>16</sup> Pipita-a, ya ti da nasia kpadjii ngú nanũ ne Bádha Ngali-e bhú ondu doto koko. Ya kũnda napa 'li ya li kulu li okpála koko amene e ngao li bíli li Ebhe atima uo lie de.

<sup>17</sup> Padhá de, anga Bhuku gba Ebhe-e apa me: «Li kpála kũnda napa lie-e, a ayo me ani de pa bha bini li engú inde li Ebhe Ngámá amene e-o.» <sup>18</sup> Padhá de, anga a ko de me Ebhe ngaziba okpála inde ngapa 'li o ngao makpe-e de. Engú bini, ani ngaziba obhende anga li ani-o.

## 11

*Polo akpo 'ndjii e ne okpála inde ngabhi 'kpa o pí mbulu o me o ne obhulũ titima-o*

<sup>1</sup> Yi ti da nadũ ne 'ndjá bua muma uu, ngubula me ma gama mbo 'ngú maka bhulũ pele! A moko, yi dũ ne 'ndjá bua muma. <sup>2</sup> Padhá de, anga ma ne botolo ngú yi ndũ nedhinga hana, maka li Ebhe nde di lie ne botolo ngú yi-o. Ma ngatsia 'kpí li yi ndjindjii ngubula me yi dũ bubu ngú kũva. Bhoko na kũva ango-o, a ko Yesu Kilisito. <sup>3</sup> Yi bhundja me kpulũ apite nani

† 10:17 10:17 Tsia bhú Djlm. 9:23; di ne bhú 1 Kol. 1:31.

Eva, ani atsia ayie li bádha kpadji. Kaka-a, ma ngakpe me kpála bini agó apíte yi de ngubula me mukunda gba yi pi Yesu Kilisito ndjia.

<sup>4</sup> Ma ngapa mo-o, anga li kpála bini go agba yi-e, yi bedhe ngú nabhuka ani má gala! Engú la li kpála angoo ngakpo e li 'ngú gba Yesu, ne li 'ngú gba Bu Bhobua, la di ne li 'ngú na Bádha Ngali-e kpi ne bhende ya asuno e pi yi-o. <sup>5</sup> Yi ngabhundja me okpála bhomu-o ne ongbengbe obhulu titima. La ngama-a, ma bhundja de me u ane ma-a de. <sup>6</sup> A na paká me pi yi-e, ma mbila nagama 'ngú bhú ká okpála ndjindji de. Engú bini, li pápá nambila Ebhe-e, ma mbila ani ndjindji. Ya asuno engú angoo pi yi mbánbá bhutsibhutsi bhú ndu 'ngú hana inde ya amene e-o.

<sup>7</sup> Nedhinga ma akpokpo Bádha Ngali gba Ebhe lie pi yi-e, ma dha bhú yi de. Ma akø lima ne kuto ngubula me yi 'u ne bhúlá. Bhobhomu-o apa me ma amene sisiti? A mo-o ade. <sup>8</sup> Ma adu lie oo-o, ma aziba me oDadjua koko bi mukobho gba ma ngao. Ma abha otia na oDadjua angoo ngú nateteke yi nedi! <sup>9</sup> Oo-o, ma dha bhú kpála bini bhú ká yi de, li ma adu lie ne gumu tia-o. Engú bini, omabhuka na Makedonia ago mumu ne ehe inde ma adu ne gumu e ngao. Ma alila lima bhú ndu 'ngú hana me ma adu pi yi maka tili kili de. Ma ayó la di galikpe ehe li yi de.

<sup>10</sup> Ne 'li Yesu Kilisito inde bhú ma-a, ma ngapa pi yi kukulu 'ngú: ma ne gindaginda naali anga ma nde ha 'he ka yi de. Bhú ndu doto gba yi na Akai libhomu-o, kpála bini ti da nayoko ma de me ma adu ne gindaginda tété de-e de. <sup>11</sup> Ma kunda nadu tili kili pi yi de ka ni? A ko anga ma ne mukunda pi yi adi? Ebhe apa bhobhomu-o li ma ngae! <sup>12</sup> Ma adu bha maka ma nde lie inde. Ma ziba tia ka yi de, ngubula me okpála bhe i ngabhi 'kpa o pi mbulu o me o ne obhulu titima au kpadji ngú napa 'li o de me o bhadi ngamene kulu maka ya-a de. <sup>13</sup> Okpála angoo, ngapite okpála. U ngamene 'he mugito me a ko obhulu titima gba Yesu Kilisito. <sup>14</sup> Engú angoo ahá nangamba pi

ní de, anga Satana ngae makpe ti bhadi da namene 'he mugito me a ko andjelu na zi 'kpi. <sup>15</sup> Kaka-a, li okpála na kulu gba ani-e mene 'he lio mugito me a ko kukulu okpála na kulu gba Ebhe inde ngbingbili-e, ní angamba tété de. Engú bini, li sokpi-e, u asia galikpe engú inde ati ne kulu inde u amene e-o.

*Polo apa 'li e li olikabhu ani azu e-o*

<sup>16</sup> Ma matá ngapapa ne toto, kpála bini apa li ma de me ma ne bhulu pele-e de. I du me okpála nde abhundja me ma ne bhulu pele-e, yi de ziba me ma ne bhulu pele ngú napa me ngama di-e ma pa mbo 'li ma bedi. <sup>17</sup> Engú ma adji apa inde-e, a ko de me ma adji napapa maka li Ngamá akunda lie de. Ma adji napa maka li bhulu pele agagama 'ngú lie-o. <sup>18</sup> Maka li okpála bhelé ngapa 'li o lie li ongu na doto-o, ngama di-e ma apa bhadi 'li ma tété moko. <sup>19</sup> Ngayi okpála na imbilangu-o, yi dje obhulu pele ngagama 'ngú-o, yi ngadje uo ne 'ndjá bua! <sup>20</sup> Yi ngakibila me okpála bhomu-o mene yi mugito me yi ne obalise. Yi ngakibila me u zi ohe gba yi-o. Yi ngakibila me u pite yi. Yi ngakibila me u u yi padhá. Yi ngakibila me u su bhúla yi. <sup>21</sup> Yi mbu li ya, anga ya adu nani bhubhuku ngú namene mo-o! Ma ne numu naali ngú napapa!

Mbia inde-e, ma adji agama 'ngú maka bhulu pele. Engú inde li okpála koko ngapa 'li o lie, ma apa nga bhadi 'li ma tété. <sup>22</sup> U ngapa me o ne omaYuda, ma di ne maYuda. U ngapa me o ne omaIsalaele, ma di ne maIsalaele. U ngapa me o ne odi Abalahama, ma di ne ye Abalahama. <sup>23</sup> U ngapa me o ne okpála na kulu gba Yesu Kilisito. Mbia inde-e, ma agama 'ngú maka bhulu pele. Ma belegu ngamemene ane uo mane. Ma mene kulu angoo ne ndala de. Ma ali bhú tikpu ane uo mane. Ma azu bhikpa ane uo mane. Ma akolo masikpe de nakpi bhutsibhutsi bhelé.

<sup>24</sup> Ma adu azu fimbo ndjikpa bata ne ká odukpabini, bhutsibhutsi bhuluvue sakpa ongamási gba omaYuda-o. <sup>25</sup> Ongamási gba okpála na Loma abhi ma ne fimbo

bhutsibhutsi bata. Okpála atutulu ma ne teme bhutsibhutsi bini ngú nabhøle ma. 'Ngbé zabu alinda ne ma bhú 'ngu bhutsibhutsi bata. Ekpí bini, ma alipila bhú 'ngu, ma asi di bhúbhú.

<sup>26</sup> Bhú odhuku ma adu adhuku e naali-e, ma adu ne tsulu ka nasi ka engu. Ma adu ne tsulu ka obhulu nagbulu 'he gba okpála ne kpéke. Ma adu ne tsulu ka ondaise ma omaYuda, la di ka obhende ne omaYuda ade-o. Ma adu ne tsulu bhú gudhu, di ne bhú omili bili. Ma adu ne tsulu pí 'ngbé 'ngu. Ma adu ne tsulu ka okpála inde ngapa me o ne omakilisito, a nde la mo-o ade-o. <sup>27</sup> Ma amene kulu kpekpeke. Ma asi ndi 'la bhutsibhutsi. Ma adje gumu bhú dabili bini ne gumu 'ngu. Bhutsibhutsi bhelé, ma sia kpadji nazu 'he de. Bongo du ka ma bhelé de, ma atsia adu adje zini. <sup>28</sup> Olikabhu ma azu e bhelé, ma ti da nakpokpokpo hana de. Engú bini, engú inde li bua ma ngalu pí e, a ko nabhundja oDadjua gba Ebhe-e ndu 'kpí hana. <sup>29</sup> Li kpála bini du bhubhuku li kpadji gba Yesu-o, a ngamene ma sisiti mugito me a ko ma. Li kpála bini ti bhú siti 'ngú-o, a ngamene bua ma sisiti naali.

<sup>30</sup> I du me a nde a ayo me ma pa 'li ma-a, ma apa bha bini li ongu inde ngasuno me ma bhubhuku-o. <sup>31</sup> A ayo me okpála dhøgø Ebhe inde 'Dyi Ngámá Yesu-o duduma ne duduma. Ani mbila hana me engú inde ma adji apa e pi yi inde-e, a ko eu de. <sup>32</sup> Yi tsia nga engú inde ngasuno me ma bhubhuku-o. Ekpi bini, nedhinga ma adu lie bhú gudhu na Damasi-e, ngámá na kuti bhomu-o, adu 'li ani me Alitasi. A adu ka ani ne guvelenele bini inde adu atsia 'kpí li gudhu bhomu-o. Ani a'o nani okpála gba e li okpadji nali bhú gudhu bhomu-o ngú napa me u u ma-a, u de holo ma. <sup>33</sup> Engú bini, okpála gba Ebhe-e ato ma bhú бага, u agbite ekpú tété, u atsia akø ma ne di li malilisa na aga asa kuti libhomu-o. Ma atsia akobho sakpa ani.†

## 12

*Polo apa 'li e pindji angu inde li Ebhe ngaha e pi ani bhú bhuku gba e-o*

<sup>1</sup> A ayo me ma pa matá 'li ma ne kalanu, abana li tata nde lie tété ade-o. Kaka-a, ma adji nagama 'ngú pindji ongu li Ngámá Yesu asuno e muma, ani atsia ambamba di ta e muma-o. <sup>2</sup> Ma ambila kpála bini\* inde agbite lie li Yesu Kilisito . A ane nga kalanga ndjikpa ne ká badha, Ebhe a'e kpála bhomu-o abhúla agba e, ani atsia agie ani kuto ei. Ma mbila de ne me ani aloto nani maloto, ne me Ebhe a'e ani abhúla na paká. Ebhe ambila bha ngae, ma mbila naama de. <sup>3</sup> Ma apa matá ne toto, ne me ani aloto maloto, ne me Ebhe a'e ani abhúla na paká. Ma mbila de, Ebhe ambila bha ngae.

<sup>4</sup> Ebhe a'e kpála bhomu-o abhú kuti na mundayi . Oo, ani atsia adje ongu inde li kpála-kuti ti da nakpokpo kú e de. <sup>5</sup> Ma ti da napa 'li ma li 'ngú akolo li kpála bhomu-o. Engú bini, pindji ongu bhe atsia ma makpe-e, ma ti da napa 'li ma bha bini li engú inde ngasuno me engú bhú ma ade. <sup>6</sup> La-a, i dú me ma kúnda napa 'li ma u-o, ma de dú ne bhulu pele de. Padhá de, anga ma de apa kukulu 'ngú. Engú bini, ma kúnda napa 'li ma de, anga ma kúnda de me okpála u ma mugito me ma ne 'ngbé kpála-a de. Ma akúnda mangbo me okpála manga ma ka ongu inde u ngadje ma me ma ngapa e ko.

<sup>7</sup> A ayo nako me 'ndji ma be naali ka ongu na ngangamba inde li Ebhe ambamba ta e muma-o. La-a, ngú napa me 'ndji ma abé naali de-e, Ebhe a'o ehe bini na ke make li kute ma. Ehe ango-o maka bhulu titima gba Satana . A ngabhi ma, a di ngayoko ma me ma abédhe ne 'ngbé 'ndji bedhe de. <sup>8</sup> Ma ayo ka Ngámá bhutsibhutsi bata me ani gbegbe ma bhú likabhu bhomu-o. <sup>9</sup> Ani agie muma me: «Ma ngaha bádha bhú 'bu gba ma-a pi mu ngubula me a teteke mu ngú nakibila likabhu bhomu-o. Padhá de, anga nedhinga li kpála nde lie bhubhuku-o, a bhomu-o nedhinga inde li angu gba ma-a ngamene kulu lie bhú kpála bhomu

† 11:33 11:32-33 Tsia bhú Kul. 9:23-25. \* 12:2 12:2 Ngú nambila kpála inde li Polo ngakpo 'ngú gba e si-e, tsia lukuluku 7.

libhomu-o.» I nde lie mo-o, ma akunda mangbo me ma pa 'li ma li ongu inde ngasuno me ma bhuhuku-o, ngubula me angu gba Yesu Kilisito mene kulu bhú ma.

<sup>10</sup> Kaka-a, ma tété ne djali li nedhinga ma nde lie bhuhuku-o. Abana li okpála sobho ma, abana ma zu likabhu, abana u to mbolo li ma, abana ma kibila olikabhu bhomu-o hana kabula 'li Yesu Kilisito-o, ma tété ne djali, anga nedhinga li angu nde lie bhú ma ade-e, a bhomu-o nedhinga ma nde lie kpekpeke-o.

*Polo alopole lie li 'ngú gba omabhuka na gúdhú na Kolito*

<sup>11</sup> Ma agama 'ngú bhomu-o mugito me ma ne bhulu pele. La-a, yi akata ma tété ngayi. A ayo me yi kpo 'ngú gba ma-a ngayi. Padhá de, anga abana ma du ne kpála na padhá-a, me obhende yi nga'i o me a ko ongbengbe obhulu titima bhomu-o, u ne ma ne 'ngbé de. <sup>12</sup> Okulu inde-e ngasuno me ma ne bhulu titima, ma amene bhú ká yi ne 'ndjá bua. Ongú ango-o, a ko ongamba 'ngú inde li Ebhe amene e-o. <sup>13</sup> Ongú bhende ma amene e pi obi yi omabhuka na Dadjua koko me ma nde mene agba yi de-e ngae dho? Belegu de bini! Ehe inde ma mene e agba yi de-e, a ko bha bini ma dha lie bhú yi de-o. Yi suno bádha bhú 'bu muma li siti 'ngú ma amene e li yi bhomu-o!

<sup>14</sup> Mbia inde-e, ma ngakunda nanu agba yi bhutsibhutsi na bata. Abana ma nu agba yi bhú dhuku inde-e, ma dhá bhú yi de. Ma ngakpata mangbo yi, ma kpata tia gba yi-e de. Yi mbila ndjindji me a ayo de me ongisi po tia pi okpála azu o de. A ayo mangbo me odyi ongisi, ne ohi ongisi po tia pi ongisi gba o-o. <sup>15</sup> Li pápá gba ma-a, abana ma pu ndu 'he inde ka ma-a hana ngubula yi, abana ma pu mukobho gba ma-a ngubula yi-e, ma dú bha tété bhú djali. Ma suno mukunda pi yi naali mo-o, yi tsia suno mukunda muma bedi?

<sup>16</sup> Ndu yi hana yi mbila ndjindji me ma dha nako bhú kpála bini bhú ká yi de. Engú bini, okpála koko bhú ká yi ngapa me: «Polo ne bhulu kali! Ani abha tia

gba ní-e bhú nyali.» <sup>17</sup> Ma apite yi lele pi? Ma azi yi li kpadji gba suka okpála ma atima o agba yi-e? <sup>18</sup> Ma ayo ka Tito ne kekele me ani nu agba yi. Ma atima di bhú dabili bini ne ani ndai ní inde yi mbila e ndjindji-o. Tito akolo lie agba yi-e, ani aha 'he li yi bhú kali? A mo-o ade! Ehe inde li Tito amene e ne bhende ma amene e-e, aviti bha bini, bua ya ne ani bhú dabili bini.

<sup>19</sup> Nedhinga koko, nayie nani bhutode yi ngabhundja me ya ngagili nabubuku nganda ya bhú djila yi. A mo-o ade! Ya mangbo ngakpokpo 'ngú inde-e kala Ebhe maka li Yesu Kilisito akunda lie-o. Ondaise ya, ya apa ndu ongu bhomu-o hana pi yi, anga ya akunda nateteke yi me yi bhele li kpadji gba Yesu Kilisito-o. <sup>20</sup> Ma ngakpe me nedhinga koko, li ma akólo lie agba yi-e, ma bhaka me yi ngakobho maka ma akunda lie de. Ma ngakpe di me lele dasundu gba ma-a ngá li yi de. Ma ngakpe me nedhinga ma akólo lie agba yi-e, yi du nagbe bhayiki sunda yi, yi du nadge gumu 'he liyi sunda yi, yi du nake 'ngú liyi sisiti, yi du nagbo bhusu yi, yi du nasobho li yi sunda yi, yi du napadha liyi sunda yi, yi du nadge kute yi, yi tsia du la di namene engú ngangá.

<sup>21</sup> Ma ngakpe me nedhinga ma agó lie agba yi bhe na sidi-e, Ebhe gba ní-e ha numu muma bhú djila yi. Ma ngakpe me ma ku 'gbá ka okpála bhelé inde ngamene siti 'ngú ne kalanu maka nako u adu namemene lie kalanu-o. Okpála ango-o, u dji nga bua o ne toto li namene siti 'ngú de, u ngakunda olisi, i du di-e obhosi ngangá, u ngamene ndu sisiti 'ngú hana.

## 13

*Polo agbele 'dje omabhuka na gúdhú na Kolito ne toto*

<sup>1</sup> A inde-e bhutsibhutsi na bata me ma go agba yi. A maka u aye lie bhú Bhuku gba Ebhe-e me: «Li kpála pa 'ngú li kilí e, a ayo mbo me okpála bhisi, i du di-e okpála bata de lu pi 'ngú ango-o. I du mo-o de, u kódho 'ngú tété de.» <sup>2</sup> Nako

† 13:1 13:1 Tsia bhú Det. 19:15; ne bhú Mat. 18:16; ne bhú 1 Tim. 5:19; ne bhú Ebe. 10:28; di ne bhú 2 Kol. 12:14.



ma ago lie agba yi bhutsibhutsi na bhisi-e, ma agbele 'dje okpála inde adu namene siti 'ngú-o bhú dabilì bini ne okpála koko hana. Mbia inde-e, ma nde lie tsutsu-o, ma matá ngagbele 'dje uo ne toto me nedhinga ma agó matá lie agba yi-e, ma djé ndjinga kpála bini bhú ká uo de.

<sup>3</sup> Yi ngagilì me yi u ehe inde ngasuno me Yesu Kilisito ngagama 'ngú bhú ma ngae-o. Ma asúno pí yi masuno. Yesu Kilisito bhú ká yi bhúbhuku ade. Engú bini, ani ngasuno angu gba e bhú ká yi. <sup>4</sup> A na paká me nedhinga u abhi ani ne nyeli lie li kulusi-e, angu du bhú ani de. Engú bini, mbia inde-e, ani bhú mukobho ka angu gba Ebhe. Maka ya akpètse liya lie ne ani-e, ngaya di-e, ya bhúbhuku maka ani adu nani lie-o. Engú bini, ya akpètse liya lie ne ani bhú mukobho gba e-e, lele nalilì okpála ka ya bhú ka yi adú bhadi ne angu gba ani-o.

<sup>5</sup> Yi tsia bua yi ngayi makpe ngú nambila me yi ngakobho maka omabhuka na paká. Yi mbila ndjindji me Yesu Kilisito bhú ka yi. A mo-o adi? I du mo-o de-e, u ú ehe inde ngasuno me yi abhuka de. La-a, a ko likabhu i du me ani nde bhú yi ade-o. <sup>6</sup> Engú bini, ma abhundja me yi mbila ndjindji me, pí ya-a, okpála ti da nau ehe inde asuno me ya ne kuku lu obhulu titima gba Yesu Kilisito.

<sup>7</sup> Ya ngayo Ebhe me yi améne siti 'ngú bini de ne nayala me ya li yi. A ko de me ya ngakunda bhomu-o nasuno me angu ya akolo de. Engú bini, ya ngakunda mangbo me ya du nau yi namene bádha 'ngú, abana i du me a nde ngau lie me angu ya kolo de-o. <sup>8</sup> Padhá de, anga ya ti da nagu yi de, i du me yi nde ngakpata nasuno na kuku lu gba Ebhe-o. I du me yi nde amene mo-o, a ayo mangbo me ya teteke yi ngú nanu ne kalanu. <sup>9</sup> Ya ngakpi djali ndu 'kpí hana nedhinga li ngaya-a, ya nde lie mandi angu, me a nde la bhú yi ne angu-o. Kaka-a, ya ngayo di bhú omayo gba ya-a me yi kolo ngbingbili ne ndu kpadji hana. <sup>10</sup> Ka 'ngú ango-o, ma ngaye ndu 'ngú bhomu-o hana pí yi nedhinga ma nde lie bhú ká yi ade-o.

A ko ngubula me nedhinga ma akólo lie bhú ká yi-e, ma améne yi kpekpeke de ne angu li Ngámá Yesu aha e muma-o. Angu ango-o ngateteke yi me Dadjua gba yi-e be ndu e ne kalanu, a ngubula nabhèbhèlè mabhèlè ade.

<sup>11</sup> Ngú nabu tata-a, ondaise ma, yi bedhe ne djali bedhe. Yi mene kulu ngú napa me yi du ngbingbili ne ndu kpadji hana, yi to masi bhú yi sùnda yi, yi du bhú nadjè liyi sùnda yi, yi du ne guo 'ngú sùnda yi. Yi mene mo-o, Ebhe inde ne Ebhe na mukunda di ne guo 'ngú-o tsia dú ne yi bhú dabilì bini. <sup>12</sup> Yi yi liyi sùnda yi ne nakama liyi maka ondaise. Ndu ondaise ní inde ei-e hana apa me o yi yi ma yi. <sup>13</sup> A ayo me bádha bhú 'bu gba Ngámá Yesu Kilisito, ne mukunda gba Ebhe, la di ne nakpètse lio gba Bu Bhobua-a du bhú dabilì bini ne ndu yi hana.

## **Balua gba Polo pi omabhuka na gudhu na Galate Eli na kalanu**

Li okpála inde ne omaYuda ade aholo aziba Bádha Ngali lie-e, abhomu-o, u atsia ayi ngú nambila me: ngú nakolo makilisito na kukulú-o, a ayo bha me kpála mene líli gba Moidje-e ? Polo atsia apa me a mo-o ade. Padhá de, anga engú na ngebéngbé inde bhú mukobho gba makilisito, a ko nabhuka inde li ndu okpála hana akolo ngbingbili kala Ebhe ka e-o. La-a, okpála koko adu agu Polo, u atsia adu apa me, a ayo me u mene di líli gba Moidje ngubula me u kolo ngbingbili kala Ebhe. Balua inde li Polo aye e pi okpála na Galate-e, ani aye nani ngubula me okpála inde ambu li kpadji ka omusuno na eu bhomu-o, u sia nabhuka na kukulú, amba u kolo la di li bádha kpadji. Polo aholo nakpokpo lele maka a ayo lie me u 'i ani me bhulu titima gba YesuKilisito . Ani atsia agama 'ngú pindji ngú napa me e'i ango-o ngú napa me ni kolo bhulu titima gba Yesu-o, ayie ka Ebhe, ayie ka angu gba kpála na doto belegu de bini. Ani atsia apa me kulu gba ni-e atsia naali okpála inde ne omaYuda ade-o. Bhú oalo na soso-o, Polo ngasuno me nabhuka bhú Kilisito ngaha mukunda, mukunda ngaha la di nadholo ndjindji bhú mukobho gba makilisito.

### **Ongbengbe ongú inde bhú bhuku inde-e ngae inde:**

Eli na kalanu 1:1-10

Angu gba Polo maka bhulu titima gba Yesu 1:11 - 2:21

Bádha Ngali na bádha bhú 'bu gba Ebhe 3:1 - 4:31

Nadu bhú ngu e gba makilisito a la di-e kulu gba ani 5:1 - 6:10

Eli na soso 6:11-18

*Polo yi omabhuka na ndu doto na Galatia mayi*

<sup>1</sup> Ma aye balua inde-e ngama Polo, ma ne bhulu titima gba YesuKilisito . Ma ne

bhulu titima gba kpála koko ade. Yesu Kilisito atima ma ngae, a la di-e 'Dyi ani inde azuku ani bhú ká okpála inde amu-o. <sup>2</sup> Ngama bhú dabili bini ne ndu ondaise ní hana inde ei-e, ya aye balua inde-e pi omabhuka na oDadjua gba Ebhe inde bhú ndu doto na Galatia. <sup>3</sup> A ayo me 'Dyi ní Ebhe bhú dabili bini ne Ngámá gba ní Yesu Kilisito suno bádha bhú 'bu gba o-o pi yi, amba u ha di guo 'ngú pi yi. <sup>4</sup> Yesu Kilisito andala 'kpa lie ngae makpe, ngubula nagbegbe ní bhú siti 'ngú gba ní, amba osisiti 'ngú na doto améne matá ehe bini ngú ní de. Ani amene mo-o nakpata lele maka li Ebhe 'Dyi ní akunda lie-o. <sup>5</sup> A ayo me okpála dhogø Ebhe duduma ne duduma. A adu moko!

### *Koli Bádha Ngali gba Yesu Kilisito-o bha bini*

<sup>6</sup> Ma ngangamba ka yi naali! Ebhe abhu yi me yi du ne okpála gba ni-e li kpadji gba Yesu Kilisito, ani atsia asuno bádha bhú 'bu gba e pi yi. La-a, belegu mo-o, yi akolo adji 'ngbu yi li ani má gala, yi atsia aholo nadje Bádha Ngali koko. <sup>7</sup> A la na paká me Bádha Ngali koko matá ade. Engú bini, okpála koko ngangbingi 'ndji yi. U ngakunda nasiti Bádha Ngali gba Kilisito-o. <sup>8</sup> I du me kpála koko, i du di-e ya, i du di-e suka andjelu bini ayie abhulá nde akpokpo Bádha Ngali koko kpí ne bhende ya akpokpo e pi yi-e, Ebhe de tu pedje li ani. <sup>9</sup> Ya apa, ma la matá mbia inde-e ngapapa me, i du me kpála koko nde akpokpo Bádha Ngali kpí ne bhende yi asia e-e, Ebhe de tu pedje li ani.

<sup>10</sup> La-a, yi abhundja naayi me ma ngagili me okpála ziba ma? A mo-o ade, ma akunda mangbo me Ebhe ziba ma ngae. Yi abhundja naayi me ma akunda nanga li okpála? A mo-o ade. I dú me ma kunda matá nanga li okpála-a, ma de ne bali gba Kilisito ade.

### *Polo akpokpo lele maka ani akolo lie bhulu titima gba Kilisito-o*

<sup>11</sup> Ondaise ma, ma akunda me yi mbila me Bádha Ngali inde ma ngakpokpo e, yie ka kpála-kuti de. <sup>12</sup> Ma sia ka kpála-kuti de, kpála bini suno la di mama ngae

de. Engú bini, Yesu Kilisito ambamba ta 'ngú inde awo lie mawo-o muma ngae. <sup>13</sup> Yi mbila lele nadholo gba ma nani na kalanu-o, nedhinga ma adu nakpata dasundu na Ebhe gba omaYuda lie hana. Li nedhinga bhomu-o, ma adu nato mbolo li omabhuka na Dadjua gba Ebhe-e nane dada mane. Ma adu nakunda nabhebhelo mabhelo. <sup>14</sup> Ma ane nani omaYuda bhelé, inde adu ne kalanga maka ma bhú lele nakpata dasundu gba omaYuda-o. Ma aha nani lima libhomu ngubula dasundu gba onguo ogbi ní-o.

<sup>15-16</sup> Belegu inde lie mo-o, Ebhe abhu nani ma. Ani abhu nani ma me ma nde ngabha bhú 'bu 'hi ma. Ani asuno nani badha bhú 'bu gba e muma, ani atsia a'i ma me ma mene kulu gba ni-o. Li nedhinga ani a'o nani e akolo lie, ani atsia amene me ma mbila Ndili gba ni-e, ngubula me ma kpokpo Bádha Ngali gba ani-e pi okpála inde ne omaYuda ade-o. Li nedhinga bhomu-o, ma nu bhaka kpála bini de. <sup>17</sup> Ma nu la di bhú Yelusalema ngú nabhaka okpála inde adu nani obhulu titima gba Yesu Kilisito muma kalanu-o de. Engú bini, ma anu bha kolo má gala bhú Alabia, pipita-a, ma agie lima bhú Damasi. <sup>18</sup> Pita kalanga bata-a, ma atsia anu bhú Yelusalema ngubula me ya u li ya ne Piele\* bhutsibhutsi na bini. Ma adu agba ani ngubula 'kpí ndjikpa ne ká bhuluvue. <sup>19</sup> Ma u bhulu titima koko bini de, ma au bha bini Djaki, ndai Ngámá. <sup>20</sup> Engú inde ma aye e inde-e, a ko kukulu 'ngú, kala Ebhe-e, ma apa eu de.

<sup>21</sup> Pipita-a, ma atsia anu bhú ndu doto na Silia di ne ndu doto na Silisia. <sup>22</sup> Omabhuka na oDadjua gba Kilisito na ndu doto na Yudaya u nga nani ma ne djila o de. <sup>23</sup> U adu bha nadje ongu inde li okpála koko adu napa e li 'ngú gba ma-o. U adu napa me: «Kpála inde adu nako nato mbolo li ya kalanu-o ayipa, ani ibili mbia inde-e ngakpokpo pi okpála Bádha Ngali inde ani adu nako nakunda nabhelo e-o.» <sup>24</sup> Abhomu-o, u atsia adu nadhege Ebhe kabula ma.

## 2

### *Polo agama 'ngú ne obhelesi okpála bhú gudhu na Yelusalema*

<sup>1</sup> Pita kalanga ndjikpa ne ká badha-a, ngaya ne Balanabasi, ya anu matá bhú gudhu na Yelusalema. Ma atsia aha di Tito bhú dabili bini ne ma. <sup>2</sup> Ma anu maka li Ebhe asuno muma lie mbámá me ma nu-o. Ma akolo lie, ngama bhú dabili ne obhelesi okpála-a, ya apokobhe bhúla ya li ngongo. Abhomu-o, ma atsia akpokpo kú Bádha Ngali inde ma ngakpokpo e-e pi omupagano-o pi uo. Ma du nakunda de me kulu inde ma amene e ne bhe ma nde ngamane e-e du padhá-a de.

<sup>3</sup> Tito ya adu ne e adu Giliki. La-a, u pa pi ani de me ani li gandja-a de. <sup>4</sup> Engú bini, omabhuka na eu ali bhú ká ya, u atsia adu napa me, a ayo me ani li gandja. Okpála ango-o ali bhú pepe ngú natsia lele maka ya nde lie matá sa líli ade-o, anga ya akpetse liya ne Yesu Kilisito . U ngakunda me ya kolo matá obalise na líli gba Moidje-o . <sup>5</sup> Ya 'o belegu nedhinga pi uo bedi de ngubula me ya lila kukulu 'ngú na Bádha Ngali-e pi yi malila.

<sup>6</sup> Engú bini, obhende li okpála ngau o bhú djila o maka ongamási na Piga gba Ebhe-e, muma-a, a ko 'ngbé 'ngú naali de. Padhá de, anga Ebhe tsia bhúla kpála de. Ongbengbe okpála bhomu-o, nedhinga ma akpokpo Bádha Ngali inde ma ngakpokpo e pi okpála lie pi uo-o, u 'o 'ngú koko pépé de. <sup>7</sup> Engú bini, u au me Ebhe a'o mangbo kulu na nakpokpo Bádha Ngali-e pi okpála inde ne omaYuda ade-e pí madhaka ma, maka ani a'o nani bhende nakpokpo Bádha Ngali pi omaYuda lie pí madhaka Piele-o. <sup>8</sup> Padhá de, anga u atsia ambila me a ko bha koli Ebhe bini inde nani aha angu pi Piele, atsia atima ani agba omaYuda-o. Ebhe ango-o aha di angu muma, ani atsia atima di ma agba okpála inde naao ne omaYuda ade-o.

<sup>9</sup> Djaki ne Piele di ne Djaa inde li okpála adu nau o maka onepanda-a, ambila me Ebhe asuno bádha bhú 'bu ango-o muma

\* 1:18 Bhú eli na giliki-e, Sefasi-e: A ko 'ili koko gba Piele.

na paká. Abhomu-o, u atsia aholo 'kpa ya ne Balanabasi. Bhobhomu-o asuno me ya akpøtsø liya ne uo bhú dabili bini. Ya atsia adje liya ne uo ndu ya hana me, ngaya-a, ya anú naaya namene kulu agba okpála inde naao ne omaYuda ade-o. La ngauo-o, u anú naao namene kulu agba omaYuda. <sup>10</sup> U apa bha pi ya koli engú bini. U apa pi ya me ya teteke obhulu ndibhili inde bhú ká omabhuka inde abhú Yelusalema-o. A la bhadi bhomu-o engú inde ma amene e ne bua ma bini-o.

*Polo ambe bhú 'ndji Piele bhú Atiokia kala okpála*

<sup>11</sup> Li Piele† ago bhú Atiokia lie, ma ambe bhú 'ndji ani kala okpála. Padhá de, anga ani amene pulu 'ngú. <sup>12</sup> Kala me okpála li Djaki atima o kolo-o, Piele adu nazu 'he ne okpála inde ne omaYuda ade-e bhú dabili bini. Li okpála ango-o akolo lie, Piele agbe lie bhú ká uo, ani zu matá 'he ne okpála bhende ne omaYuda ade-e de. Padhá de, anga ani adu nakpe okpála inde adu akpata líli nali gandja-a makpe. <sup>13</sup> Ndu omaYuda koko hana adu di namene maka Piele. Abhomu-o ngaani Balanabasi, ani amene bhadi engú na kali maka uo. <sup>14</sup> Li ma u lie me u dhuku li kpadji na ngbingbili, na kukulu Bádha Ngali-e de-e, ma atsia apa pi Piele me: «Mu ne maYuda, mo omene la 'ngú maka kpála inde ne maYuda ade. I nde lie mo-o, lele pi mu ngagbite okpála bhende ne omaYuda ade-e lie ne kpéke me u du namene e lio maka omaYuda?»

*A ayo nabhuka Kilisito ngubula nasia mukobho*

<sup>15</sup> Ngani-e, ní azu liní omaYuda, ní ne okpála na kuti koko ade, inde i mbila líli gba Ebhe-e de-o. <sup>16</sup> Ní mbila ndjindji me kpála inde ngbingbili bhú djila Ebhe-e, a ko kpála bhende abhuka Yesu Kilisito, a ko bhende ngamene líli gba Moidje-e de. Ngani di-e, ní abhuka Yesu Kilisito ngubula me ní kolo ngbingbili kala Ebhe ka nabhuka gba ní bhú Yesu Kilisito-o. A ko ka de me ní ngamene líli gba Moidje-

de. Padhá de, anga kpála bini ti da nakolo ngbingbili kabula namene líli de.

<sup>17</sup> Engú bini ngani-e, ní ngagili nadu ngbingbili kala Ebhe, anga ní abhuka Yesu Kilisito. Ní ngamene lie mo-o, ní maka okpála na sisiti. Bhobhomu-o akunda napa me Kilisito ngato ní bhú siti? A mo-o ade! <sup>18</sup> I du me ma nde akoto sa líli-e, pipita-a, ma gie matá lima sasa-a, ma akolo matá bhomu-o ngama makpe kpála inde i manga líli-e de. <sup>19</sup> Li bhende atsia líli-e, ma akpi kuo inde ayie ka líli makpe ngubula me ma du bhú mukobho pi Ebhe. U agi nani ya bhú dabili bini ne Kilisito li kulusi. <sup>20</sup> Kaka-a, mukobho inde ma nde bhú e-e, a ko matá ma de, Kilisito ngakobho bhú ma ngae. Padhá de, anga mukobho ma nde ne e bhú kute inde-e, ma bhúbhú anga ma abhuka Ndili gba Ebhe inde akunda ma, ani atsia andala di kpa li mukobho gba e muma. <sup>21</sup> Ma yala bádha bhú 'bu gba Ebhe-e de. I du me kpála nde ngbingbili kala Ebhe anga ani ngamene líli-e, bhobhomu-o akunda napa me tata li nakpi gba Kilisito-o ade.

### 3

*Ebhe ngakobho okpála li pápá na nabhuka*

<sup>1</sup> Ngayi okpála na Galatia, yi ne ongingi! Apite yi da? U akpokpo pi yi mbámbá lele maka li Yesu Kilisito akpi lie li kulusi-o. <sup>2</sup> Ma ngayi yi li koli engú bini. Bu Bhobua inde li Ebhe aha e pi yi-e, ani aha pi yi anga yi sa líli gba Moidje? Ne me ani aha pi yi anga yi adje, yi atsia abhuka la di Bádha Ngali-o. <sup>3</sup> Lele pi yi nde lie ne ongingi-e? Li lilita-a, yi akpo nani ne angu gba Bu Bhobua. Lele pi, yi ti da nabu tata lie ne angu gba kpála-kuti-e? <sup>4</sup> Engú apu pi yi bhelé. Yi abhundja naayi me a padhá? Ma abhundja naama me a padhá ade. <sup>5</sup> Ebhe ngaha Bua gba e pi yi, ani di ngamene ngamba 'ngú bhú ká yi. Ani ngamemene anga yi sa líli gba Moidje? Ani ngamemene anga yi adje, yi atsia abhuka la di Bádha Ngali-o?

† 2:11 2:11 Tsia bhú Gal. 1:18, 2:9, 14. † 3:6 3:6 Tsia bhú Dje. 15:6.

<sup>6</sup> Abalahama abhuka nani Ebhe. Kaka-a, Ebhe atsia au ani bhú djila e me a ko ngbili kpála.† <sup>7</sup> A ayo me yi mbila ndjindji me, okpála abhuka Ebhe-e ne kukulú ongisi gba Abalahama-a ngao. <sup>8</sup> U aye nani didili bhú Bhuku gba Ebhe-e me, okpála inde ne omaYuda ade-e, Ebhe aú uo ngbingbili bhú djila e ka nabhuka gba o-o. Kaka-a, Ebhe akpokpo nani Bádha Ngali inde-e pi Abalahama didili me: «Ma atúko bisagu pí ndú okpála na píla doto hana kabula mü.†» <sup>9</sup> Abalahama abhuka nani Ebhe, abhomú-o, Ebhe atsia atuko bisagu pí ani. Okpála inde abhuka Ebhe-e, ani atúko bhadi bisagu pí uo maka ani.

<sup>10</sup> La pi okpála bhende ngabundja me o dú ngbingbili kala Ebhe anga o ngamene engú inde li líli ngapa e, mangimbo gba Ebhe-e pí uo. Padhá de, anga Bhuku gba Ebhe-e apa me: «Ndú kpála hana inde i lila líli inde u aye e bhú bhuku-o ndú nedhinga hana de-e, a ayo me u tú pèdjø li ani.†» <sup>11</sup> A mbámbá me, kpála ngakolo kala Ebhe ngbingbili anga ani ngamene líli-e de. Ní ambila bhobhomú-o anga Bhuku gba Ebhe-e apa me: «Kpála inde ngbingbili kala Ebhe ka nabhuka-a, a kóbho makobho.†» <sup>12</sup> La-a, líli dha bhú nabhuka de. A la di maka engú inde u aye e me: «Kpála inde ngamene ongú inde li líli-e ngapa e akóbho kaka.†»

<sup>13</sup> Kilisito agbegbe ní sa pèdjø na líli-o. Abhomú-o, pèdjø ang-o atsia ati pí ani bhú da ní. Padhá de, anga u aye bhú Bhuku gba Ebhe-e me: «Kpála inde u agi e li ndula-a, a ayo me pèdjø ti pí ani.†» <sup>14</sup> Amene lie mo-o ngubula me bisagu nani li Ebhe apa me ni ahá e pi Abalahama-a, okpála inde ne omaYuda ade-e sia di li kpadji gba Yesu Kilisito. A ko la di me li pápá na nabhuka-a, ní sia Bu Bhobua inde li Ebhe apa nani me ni ahá e-o.

*Ebhe ngakobho okpála bhú gandja ani akodho e ne Abalahama-o*

† **3:8** 3:8 Tsia bhú Dje. 12:3, 18:18, 22:18. † **3:10** 3:10 Tsia bhú Det. 27:26. † **3:11** 3:11 Tsia bhú Abk. 2:4. † **3:12** 3:12 Tsia bhú Lev. 18:5. † **3:13** 3:13 Tsia bhú Det. 21:23. † **3:16** 3:16 Tsia bhú Dje. 12:7. \* **3:19** 3:19 Lúdu: A ko Moidje .

<sup>15</sup> Ondaise ma, ma ngaha kukulu pi yi li engú inde ní auu e piko piko-o. I dú me kpála bini nde apa ne bua e hana me ni améne engú inde ni abhundja namene e-e, i dú la di me ongámási nde aziba engú ang-o, kpála bini ti da nabhèbhèle de, ani 'ó la di engú koko pépé de. <sup>16</sup> Ebhe apa nani me ni améne 'ngú pi Abalahama, di ne pi ndili inde akóto bhú piga gba ani. Bhuku gba Ebhe-e pa de me: «pi ongisi inde azé bhú piga gba mü», mágito me a ko okpála bhelé-e de. A apa me: «ne pi ndili inde akóto bhú piga gba mü†», ngú nasuno koli kpála bini inde Kilisito.

<sup>17</sup> Engú inde ma ngakunda napa e ngae inde: Ebhe akodho nani gandja ne Abalahama, ani atsia apa me engú inde ni apa me ni améne e-e, ni améne mamene. Kalanga kámá badha ne ndjikpa bata pipita-a, líli gba Moidje atsia akoto. Líli ang-o ti da natú silika nani li Ebhe akodho e ne Abalahama de, a ti la di da nabhèle engú inde li Ebhe apa nani me ni améne e pi Abalahama de. <sup>18</sup> I dú me Ebhe nde ngamene bádha 'ngú pi okpála anga u ngakpata líli-e, amba a kpata engú inde li Ebhe apa me ni améne e pi okpála-a de. La-a, Ebhe asuno bádha bhú 'bu gba e pi Abalahama, anga ani apa nani me ni améne pi ani mamene.

*Ta líli li Ebhe aha e ne ni?*

<sup>19</sup> Ta líli-e ne ni? Ebhe aha nani líli-e ngubula me ní mbila me siti 'ngú ngae dho-ie. Ani aha nani ngú nadjeke nedhinga inde li Ndili gba Abalahama agó lie-o. A ko kpála inde li Ebhe apa nani me ni améne ehe pi e-o. Ebhe aha nani líli ang-o pi okpála li pápá gba oandjelu , u atsia akpokpo 'ngú tété pi okpála li pápá gba bhende adú maka lúdu\* sunda Ebhe ne okpála-o. <sup>20</sup> U dúdu ne gumú lúdu ngubula koli kpála bini de. La-a, Ebhe bha ngae kpi e kpi.

<sup>21</sup> A akunda napa me líli-e ngatú 'ndji e ne engú li Ebhe apa e? A mo-o ade. I dú ne líli inde i ti da naha mukobho na

kukulú pí okpála-a, a de tí da namene me u kolo di ngbingbili kala Ebhe. <sup>22</sup> Engú bini, a maka u aye lie bhú Bhuku gba Ebhe-e me, siti 'ngú ako angu e pí ndú okpála na p'la doto libhomu. Kaka-a, Ebhe aha ehe inde ani apa me ni ahá e pí omabhuka kabula nabhuka gba o bhú Yesu Kilisito-o.

<sup>23</sup> Nani kalanu me kpadji nde nga ade ngubula me okpála bhuka-a, ní adu maka okpála inde bhú tikpu sa líli, akolo li nedhinga li Ebhe asuno kpadji lie pí ní ngú nabhuka-o. <sup>24</sup> Líli-e adu nani pí ní maka mulila akolo li nedhinga li Yesu Kilisito ago lie-o. A adu mo-o ngubula me ní kolo ngbingbili bhú djila Ebhe, anga ní abhuka Yesu Kilisito. <sup>25</sup> Mbia inde-e, li kpadji abhulu lie lie me ní bhuka Yesu Kilisito-o, líli-e matá ne mulila gba ní ade. <sup>26</sup> Padhá de, anga ndu yi hana yi ne ongisi gba Ebhe, anga yi abhuka Yesu Kilisito. <sup>27</sup> Ndu yi hana inde asia batisimo bhú Kilisito-o, yi akolo maka ani. <sup>28</sup> Kaka-a, ndu yi hana, yi akolo kpála bini anga yi akpetse liyi ne Yesu Kilisito, maYuda, i du di-e kpála inde ne maYuda ade-e ade. Bali, i du di-e kpála inde ne bali ade-e ade. Bhoko, i du di-e olo ade. <sup>29</sup> I du me yi nde ne okpála gba Yesu Kilisito-o, amba yi ne odi Abalahama. Abhomu-o, yi asia ehe inde li Ebhe apa nani me ni ahá e pí Abalahama masia.

## 4

*Omakilisito matá bhú bali ade, engú bini, u akolo ongisi gba Ebhe*

<sup>1</sup> Engú inde ma akunda napa e ngae inde: a maka ndili inde asia tia gba 'dyi e-o. Nedhinga ani nde nga bha lie yeye-e, ani maka bali, belegu li ndu 'he hana nde lie naani-o. <sup>2</sup> Nedhinga ani nde nga bha lie yeye-e, okpála dú nalila ani, u tsia dú di natsia 'kpi li ongu gba ani-e akolo li ekpi li 'dyi ani a'o e-o. <sup>3</sup> A bhadi moko, li nedhinga ní adu nani lie maka ongisi-e, ní adu obalise gba osisiti bua inde ngau p'la doto-o. <sup>4</sup> Nedhinga inde li Ebhe a'o nani e akolo lie, Ebhe atsia atima Ndili gba e-o. Olo bini azu ani ngae. Ani adu nani sa líli

gba omaYuda-a, <sup>5</sup> ngubula me ani kobho okpála bhende adu sa líli-o, amba ní kolo ongisi gba Ebhe.

<sup>6</sup> Ka yi nde lie ne ongisi gba Ebhe-e, ani atima Bua gba Ndili gba e li bua ní. Bua ango-o ngapa me: «Aba, 'Dyi ma!» <sup>7</sup> Bhobhomu-o, akunda napa me, mu matá ne bali na líli gba Moidje ade, engú bini, mo okolo ndili gba Ebhe. Mu nde lie ne ndili gba ani-e, ani ahá obabadha 'ngú inde ani a'o e pí ongisi gba e pí mu maha.

*Omabhuka na Galatia masikpe de nagie matá lio bhú bali ne toto*

<sup>8</sup> Nani kalanu-o, yi mbila nga nani Ebhe de, yi atsia adu obalise gba oebhe na eu, inde ne okukulú Ebhe ade. <sup>9</sup> Engú bini, la mbia inde-e, yi ambila Ebhe, ne me ani ambila mangbo yi ngae. La-a, lele pí yi ti da matá lie nagie liyi li pápá gba osisiti bua na padhá, inde li angu nde bhú o ade-e, inde li tata nde la di li o ade-e? Ka ni yi akunda matá lie nakolo obalise gba uo-o? <sup>10</sup> Yi aholo matá namene olili inde atsia oekpi, ne oepe, ne onedhinga di ne okalanga. <sup>11</sup> Ma ngadje tsulu me ndala gba ma li ma amene kulu lie pí yi-e anu padhá de.

<sup>12</sup> Ondaise ma, ma ngakikiliki lima pí yi me, yi kolo maka ma, anga ma akolo di maka yi. Yi mene siti 'ngú li ma belegu de bini. <sup>13</sup> Yi ambila ndjindji me ma akpokpo Bádha Ngali-e pí yi bhatsibhatsi na bini-e anga adu li ma ne kuo. <sup>14</sup> Kaka-a, a ayo nako me kuo ango-o bu tsulu li yi, amba yi tse la di ma. La-a, yi u ma padhá de, yi tsia tse la di ma de. Yi asia ma maka andjelu gba Ebhe, mugito me yi asia Yesu Kilisito. <sup>15</sup> Li nedhinga bhomu-o, yi adu bhú djali. Akolo li yi ne mangua 'ngú dho? Ma ambila ndjindji me li kpadji du uu-o, yi de apandja odjila yi, yi tsia há mama. <sup>16</sup> La mbia inde-e, ma akolo bhulu yala gba yi, anga ma ngapa pí yi kukulu 'ngú?

<sup>17</sup> Obhulu eu bhomu-o ngakunda me o gbele yi li pápá gba o, engú bini, ta namene ka uo mo-o ndjindji ade. U ngamene mo-o ngubula me yi dji 'ngbu yi li ma, amba yi gbite liyi li o. <sup>18</sup> A ndjindji ne nagbite lio ndu 'kpi hana li bádha 'ngú.

Yi améne bha bini de me ma nde bhú ká yi-e de. <sup>19</sup> Odi ma, ma matá ngazú likabhu kabula yi ne toto maka ɔlɔ inde ngazu. Ma azú likabhu ango-o akólo li nedhinga inde yi akólo lie maka Kilisito-o. <sup>20</sup> Ma ne gumu me ma du de yi mbia inde-e ngubula me ma gama 'ngú pi yi kpi. Padhá de, anga bua ma alu ngú yi abhúlá má gba!

*Agala ne Sala ngasuno lele gandja bhisi gba Ebhe-o*

<sup>21</sup> Yi pa nga mu ma, ngayi okpála inde akunda nandu sa líli-o. Yi dje engú inde li líli ango-o ngapa e di? <sup>22</sup> U aye bhú Bhuku gba Ebhe-e me Abalahama azu nani ongisi na bhosi bhosi bhisi. Ani azu bini li Agala, ɔlɔ inde adu bhú bali, bhe koko-o, ani azu li Sala, ɔlɔ inde i du nae bhú bali de ko. <sup>23</sup> Ndili bhende ani azu e li ɔlɔ inde adu bali-e, ani azu ani maka u azuzu kpála-kuti lie-o. La-a, ndili bhende ani azu e li ɔlɔ inde i du bhú bali de-e, ani azu ani maka li Ebhe apa nani lie-o.

<sup>24</sup> Engú inde akodho 'kpi li bili bhomu-o ngasuno pi ní engú inde na ngbéngbé, li ta e awo di lie mawo. Olisi bhisi bhomu-o ngasuno gandja bhisi li Ebhe akodho nani e-o. ɔlɔ na kulu, Agala ngasuno gandja inde li Ebhe akodho nani e ne Moidje pí eta na Sinai-o. Ongisi gba Agala nani ne obalise. <sup>25</sup> Agala-a, a ko kulu eta u a'i e me Sinai bhú doto na Alabia. Eta ango-o mbia inde-e maka Yelusalema. Padhá de, anga Yelusalema bhú bali ne ongisi gba e-e hana. <sup>26</sup> Engú bini, Yelusalema na abhúlá-a bhú ngu e. A ko 'hi ní ngae. <sup>27</sup> Padhá de, anga u aye bhú Bhuku gba Ebhe-e me:

«Kpi djali, ngamu i zu de, ngamu ɔlɔ inde i zuzu de-o.

Sula ne djali, amba mu tu 'ue, ngamu ɔlɔ inde i dje likabhu nazu de-o!

Padhá de, anga ongisi gba ɔlɔ inde li 'ko e ngabundja e ade-e,

adú bhelé ane ongisi gba ɔlɔ inde bhú kava-o.†»

<sup>28</sup> Ngayi ondaise ma, maka Isaka-a, yi ne ongisi inde u azu o maka li Ebhe apa

nani lie-o. <sup>29</sup> Nani li nedhinga bhomu-o, ndili inde u azu e maka u azuzu kpála-kuti lie adu nato mbolo li ndili inde u azu e bhú angu gba Bu Bhobua-o. A bhadi li nedhinga na naki-e moko. <sup>30</sup> La-a, Bhuku gba Ebhe-e apa pi? A apa me: «To holo bhú 'dhu ɔlɔ na bali-e bhú dabili bini ne ndili gba e-o. Padhá de, anga a ayo de me ndili gba bali-e sia ohe gba 'dyi o-o bhú dabili bini ne ndili gba ɔlɔ inde bhú bali ade-e de.†» <sup>31</sup> Kaka-a ondaise ma, ní ne ongisi gba ɔlɔ na bali-e ade, ní mangbo ne ongisi gba ɔlɔ inde bhú bali ade ko.

## 5

*Kilisito agbegbe ní bhú bali-e agbegbe*

<sup>1</sup> Kilisito agbegbe ní bhú bali-e agbegbe ngubula me ní du bha ndju bhú ngu ní. Kaka-a, yi lu kpekpeke, yi a'ó matá de me yi gie liyi bhú bali-e de.

<sup>2</sup> Yi djedje! Ngama Polo-o, ma apa pi yi me, i du me yi nde ali gandja-a, Kilisito dú pi yi ne tata de. <sup>3</sup> Ma ngapa matá na paká paká pi ndu obhosi hana inde ali gandja-a me, a ayo me u manga ndu líli-e hana. <sup>4</sup> Ngayi okpála bhende ngabundja me Ebhe aú yi ngbingbili bhú djila e kabula namanga líli-e, yi agbo bhusu yi ne Kilisito agbo. Bádha bhú 'bu gba Ebhe-e aneke yi aneke. <sup>5</sup> La pi ya-a, ya nga'o 'to ya 'to Ebhe, inde améne me ya du bhú djila ni ngbingbili ko. A bhomu-o engú inde ya ngadjeke me amene lie má gala li pápá na angu gba Bu Bhobua, inde ngau lie bhú nabhuka gba ya-o. <sup>6</sup> Padhá de, anga pi kpála bhende akpɔtɔ lie ne Yesu Kilisito-o, nali gandja, i du di-e nali gandja de-e, a pi ani ne tata ade. Engú bini, ehe inde ne tata-a, a ko nabhuka inde ngamene kulu ne mukunda.

<sup>7</sup> Yi akpo lilita ndjindji. A ani kpadji pi yi da me yi amánga kukulu 'ngú-o de-e?

<sup>8</sup> Engú na sisiti inde u ato e bhú 'ndji yi bhomu-o yie ka Ebhe kpála inde a'i yi-e de. <sup>9</sup> Mboye ku levile\* bedi ngamene me ndu mapa hana fuka. <sup>10</sup> Ngama-a, ma nga'o 'to ma libhomu 'to Ngámá li 'ngú

† 4:27 4:27 Tsia bhú Isa. 54:1. † 4:30 4:30 Tsia bhú Dje. 21:9, 10. \* 5:9 5:9 Levile: Ngasuno lele kulu okpála inde apite omabhuka na Galatia-o.

gba yi-o, anga ma ambila na paká me yi bhundja 'ngú koko kpí ne ma de. Engú bini, kpála bhende ngangbingi 'ndji yi bhomu-o abí mangimbo gba Ebhe, belegu i du bha da-ie!

<sup>11</sup> Muma-a ondaise ma, i du me ma nde nga bha matá ngakpokpo 'ngú nali gandja-a, ka ni la u nde ngabha lie ngato mbolo li ma-a? I du mo-o, amba tata li nakpokpo 'ngú pindji nakpi gba Kilisito li kulusi-e ade. <sup>12</sup> A ayo me okpála inde ngangbingi 'ndji yi-e kolo maka oenike.†

<sup>13</sup> Pi yi-e ondaise ma, Ebhe a'i yi me yi adú matá obalise na líli gba Moidje de. Yi nde la lie bhú ngu yi-e, yi adú namene ogumu na sisiti gba yi na kalanu-o de. Engú bini, yi teteke liyi sunda yi ne mukunda. <sup>14</sup> Padhá de, anga ndu líli hana akpètse lie bhú koli líli bini inde me: «Kunda kilí mu maka mo okunda limu lie ngamu makpe ko.†» <sup>15</sup> Engú bini, i du me yi nde ngamene liyi maka onu 'te inde nganunumu lio di ne na'o'o 'ka lio sunda o-o, 'e-e la-e, yi abhíli liyi sunda yi mabhili.

*Yi 'o me Bu Bhobua suno kpadji pi yi ngae*

<sup>16</sup> Ma apa pi yi me, yi 'o me Bu Bhobua suno kpadji pi yi ngae. I du me yi nde amene mo-o, yi kpáta matá ogumu na sisiti gba yi na kalanu-o de. <sup>17</sup> Padhá de, anga ogumu na sisiti gba yi ngagu bhende gba Bu Bhobua-o. Gumu gba Bu Bhobua di ngagu bhende gba ní makpe-o. Ogumu bhomu-o ngatu 'ndji o sunda o, masikpe de napa me yi ti da namene engú inde yi akunda namene e-e de. <sup>18</sup> I du me Bu Bhobua nde ngasuno kpadji pi yi ngae-e, yi matá sa líli ade.

<sup>19</sup> Okulu gba kute ní makpe ngau lie mbámhá. A ngau lie bhú nakunda olisi, i du di-e obhosi ngangá, di ne ogumu ongú koko hana na sisiti. <sup>20</sup> A ko nadhøge oebhe na eu, a ko namene engú na kobha. U ngayala lio sunda o, u ngatsi, u ne 'ngbé bua, u ngake 'ngú lio, u bha bini ngabhundja engú gba o makpe. U ngagbogbo bhusu o, u dje lio de. <sup>21</sup> U

abedhe ne gumu 'he gba okpála koko bhú o bedhe, u akolo obalise na pandi, a ko obhulu kundu 'zu, u ngamene ongú koko bhelé bhelé maka ongú bhomu-o. Ma ngagbele 'dje yi mbia inde-e maka ma amene lie nako kalanu-o: okpála inde ngamene ongú mo-o, sia dabilí bhú Nau gba Ebhe-e de.

<sup>22</sup> Engú bini nguwa gba Bu Bhobua-a, a ko mukunda, djali, guo 'ngú, 'ndjá bua, bádha bua, namene bádha 'ngú, nadu ne kpála inde u ti da na'o 'to o 'to e, <sup>23</sup> nake lio ne kuto, naholo bua o ka 'ngú maholo. Líli bini yala ongú bhomu-o de. <sup>24</sup> Okpála gba Yesu Kilisito agi ogumu na sisiti gba o-o li kulusi. <sup>25</sup> Bu Bhobua ngaha mukobho pi ní ngae, kaka-a, a ayo me ní 'o me aní suno kpadji pi ní ngae. <sup>26</sup> Ní adú ne 'ngbé 'ndji de. Ní adú nake 'ngú liní sunda ní de. Ní adú la di ne 'ngbé bua sunda ní de.

## 6

*Ní teteke liní sunda ní*

<sup>1</sup> Ondaise ma, i du me kpála bini nde ati bhú siti 'ngú-o, ngayi okpála bhende li Bua gba Ebhe-e nde bhú o-o, yi de gie ani li ngbili kpadji ne bádha bua. Kpála ne kpála lila la di lie me ni atí bhú nale de. <sup>2</sup> Yi teteke liyi sunda yi bhú otitili 'ngú inde sunda yi-o. I du me yi nde ngamene mo-o, yi méne líli gba Kilisito. <sup>3</sup> I du me kpála bini nde ngabhundja me ni ne 'ngbé kpála, a nde la kpála na padhá-a, amba ani ngapite lie ngae makpe. <sup>4</sup> A ayo me kpála ne kpála tsia lele nadhuku gba e ngae makpe. I du me a nde ndjindji-e, ani tsia kpí djali li kulu gba e-o. Ani kpí djali de me anga ni akpo 'ndji ni ne kpála koko de. <sup>5</sup> Padhá de, anga a ayo me kpála ne kpála bi titili 'ngú gba e-o.

<sup>6</sup> Kpála inde u asuno eli gba Ebhe-e pi e-e, a ayo me ani gbogbo bhusu tia gba e ne musuno gba e-o.

<sup>7</sup> Yi apíte liyi de, u mumu Ebhe de. Kpála asía bha bini nguwa inde ani alu e-o. <sup>8</sup> I du me ani nde ngamene 'ngú maka li ogumu na sisiti ngatima ani lie-e, nguwa

† 5:12 5:12 Eniki: A ko bhoko inde i ti da nakunda øle de, anga angu na bhoko bhú ani ade. Tsia bhú Mat. 19:12.

† 5:14 5:14 Tsia bhú Lev. 19:18.



inde ani asía e-e, a dú kuo. Engú bini, ani mene engú inde nganga li Bu Bhobua-a , nguwa inde ani asía e-e, a dú mukobho na duduma. <sup>9</sup> Ní andála li namene babadha 'ngú de. Padhá de, anga ní zi kekele tété nakolo ali soso-o, ní sía nguwa gba ní-e li nedhinga ango-o. <sup>10</sup> Kaka-a, i du me kpadji nde u-o, a ayo me ní mene bádha 'ngú pi ndu okpála hana, a ne la mane pi ondaise ní bhende bhú 'bu nabhuka ko.

*Polo ngaha olíli na soso*

<sup>11</sup> Engú inde ma aye e pi yi mbia inde-e, ma aye ne 'kpa ma makpe, maka yi ngauu lie ne ngbengbe djila balua-o. <sup>12</sup> Okpála inde ngaholo yi ne kpéke me yi li gandja-a, a ko okpála inde ngakunda nanga li okpála. U ngamene mo-o ngubula me okpála ató mbolo lio kabula kulusi gba Kilisito de. <sup>13</sup> Okpála inde ngali gandja bhomu-o ngamanga líli ade. Uo ngaholo yi ne kpéke me yi li gandja, amba u bhi 'kpa o pí mbulu o me o to yi bhú gandja ne kpéke.

<sup>14</sup> La muma-a, ma ngabhi bha bini 'kpa ma pí mbulu ma kabula kulusi gba Ngámá gba ní Yesu Kilisito-o. Padhá de, anga li pápá na kulusi-e, ma au ongu na doto maka ehe na kukuo, la di-e, ma maka kpála inde akpi bhú ongu na doto akpi. <sup>15</sup> Kaka-a, nali gandja , i du di-e nali gandja de-e, tata tété ade. Engú inde ane mane-e, a ko mangbo me Ebhe dji kpála, amba ani kolo kpála na mbia. <sup>16</sup> Pi ndu okpála hana inde ngakpata engú inde ma ngasuno e-e, a ayo me Ebhe ha guo 'ngú pi uo, amba ani dje di ndjinga uo bhú dabili bini ne omafalaele na kukulu, inde okpála gba Ebhe ko.

<sup>17</sup> Nayie pi mbia inde-e, a ayo de me kpála bini 'o matá lungalu kala ma li 'ngú bini-e de. Padhá de, anga opokoli inde li kute ma inde-e ngasuno me ma ne kpála ka Yesu.

<sup>18</sup> Ondaise ma, a ayo me bádha bhú 'bu gba Ngámá gba ní Yesu Kilisito du bhú dabili bini ne ndu yi hana. A adu moko!

## Balua gba Polo pi omabhuka na gudhu na Efeso Eli na kalanu

Balua inde li Polo aye e pi omabhuka na Efeso-o, ngatsia ngaiza kalanu engu inde pindji mabhundja gba Ebhe, ngubula napo bhula ndu oehe hana inde ani abho e, ohe inde na abhula ne bhe na pala doto bhú dabili bini ne Kilisito maka ndjindji-o (1:10). Ani nga'i okpala gba Ebhe me u du akobho li lele mabhundja na ngbengbe bhomu inde pi ndu okpala hana bhú nakpøtse lio ne Kilisito.

Bhú balua inde ane okulu oehe bhelé inde ngasuno me, okpala gba Ebhe ngadu bini bhú makpøtse bhú dabili bini ne Kilisito: Piga gba Ebhe maka kate kpala inde li Kilisito nde ne 'ndji e. A di maka eti inde li Kilisito nde ne nepanda na e-o. A la matá di maka ølo inde li Kilisito nde maka ko e-o. Bhú nagama ongu gba Polo pindji mabhundja na badha bhú 'bu gba Ebhe inde bhú Kilisito-o, a ne oeli bhende ngatu kpala, a la di ne oeli inde nga'e bua kpala abhula má gba! Ndu 'ngu bhomu-o hana ngau lie li zi 'kpi na mukunda gba Kilisito, bhú makiso, bhú mambu, bhú badha bhú 'bu, a la di-e bhú navulu lio.

### **Ongbengbe ongu inde bhú bhuku inde-e ngae inde:**

Eli na kalanu 1:1-2

Kilisito a la di-e Dadjua gba Ebhe 1:3 - 3:21

Mukobho na mbia bhú Kilisito 4:1 - 6:20

Eli na soso 6:21-24

### *Polo yi omabhuka na Efeso mayi*

<sup>1</sup> Ngama Polo, ma ne bhulu titima gba YesuKilisito, anga Ebhe akunda mo-o. Ma aye balua inde-e pi okpala na bububu gba Ebhe inde bhú gudhu na Efeso, inde abhuka la di Yesu Kilisito-o. <sup>2</sup> A ayo me Ebhe 'Dyi ní, ne Ngamá gba ní Yesu Kilisito, suno badha bhú 'bu gba o-o pi yi, amba u ha di guo 'ngu pi yi.

### *Ebhe atuko bisagu pi ní bhú makpøtse gba ní ne Yesu Kilisito*

<sup>3</sup> Ní dhøge Ebhe, 'Dyi Ngamá gba ní Yesu Kilisito-o! Ani atuko bisagu pi ní bhú nakpøtse liní ne Yesu Kilisito, anga ani aha ndu bisagu hana na bhobua na abhula-a pi ní. <sup>4</sup> Kala me Ebhe bho doto-o, ani abhu nani ní bhutode ngubula me ní du ne okpala gba ni li papá gba Kilisito, amba ní du ne okpala inde bubu, u ti da nau siti 'ngu napapa li o de. Padhá de, anga ani akunda ní. <sup>5</sup> Kaka, nayie nani bhutode naali-e, ani amene me ní kolo ongisi gba ni li papá gba Yesu Kilisito. A bhomu-o engu inde ani amene e pi ní bhú badha bhú 'bu gba e-o. <sup>6</sup> Ní toko sangu gba Ebhe ngubula badha 'ngu inde ani amene e pi ní ne badha bua gba e, anga ani akunda me amene lie mo-o bhú Ndili gba e na mukunda-o.

<sup>7</sup> Padhá de, anga bhú nakpøtse liní ne Yesu-o, Ebhe agbegbe ní bhú siti 'ngu ka ngute ani. Ani atsia ambu li siti 'ngu gba ní-o. Ebhe asuno pi ní bhomu-o tia inde bhú badha bhú 'bu gba e, <sup>8</sup> inde ani aha e me a nde abedhe bedhe-o. Ani atsia aha di ndu imbilangu hana pi ní. <sup>9</sup> Ani asuno engu gba e inde awo lie mawo-o pi ní. Engu inde bhú badha bhú 'bu gba e inde ani apa nani bhutode me ni amene e bhú Kilisito-o. <sup>10</sup> Engu inde ani apa me ni amene e li nedhinga ani a'o e-e, a ko nakpøtse ndu 'ngu hana inde abhula, ne bhende pala doto-o sa koli Ngamá bini, Kilisito.

<sup>11</sup> Bhú nakpøtse liní ne Kilisito-o, ní asia ehe inde li Ebhe apa nani me ni ahá e pi ní-o. Padhá de, anga Ebhe alo nani ní kalanu didili naali maka ani akunda lie-o. La di-e, ani ngamene ndu 'ngu hana maka ani akunda nani lie, di ne maka ani apa lie-o. <sup>12</sup> Kaka-a, a ayo me ní toko sangu gba Ebhe, ngani okpala inde a'o 'to o nani bhutode bhú Kilisito-o.

<sup>13</sup> Ngayi di-e, li yi adje ngali na kukulu 'ngu-o lie, Badha Ngali inde aha mukobho pi yi-e, yi atsia abhuka Kilisito. Abhomu-o, Ebhe atsia atu kasé inde ngasuno me yi ne ongisi gba ni-e li kate yi, li ani aha Bu Bhobua inde ani apa nani me ni ahá e

pi yi-e lie-o. <sup>14</sup> Bu Bhobua ang-o ne ehe na kalanu bhú ka obabadha 'ngú inde li Ebhe aleke e pi omaha e-o. Aní ngapa pi ní me ní asía ongú ang-o masia li nedhinga li Ebhe agbégbe ní lie bhú siti 'ngú gba ní hana-o. Kaka-a, ayo me ní toko sangu gba Ebhe.

### *Polo ayo Ebhe ngú omabhuka*

<sup>15</sup> Kaka-a, mbia inde-e, li ma adje lie me yi abhuka Ngámá Yesu-o, di ne me yi ne mukunda pi ndu omabhuka hana-a, <sup>16</sup> ma'o nagie heni pi Ebhe li 'ngú gba yi-e de. Ma ngabhundja yi bhú omayo gba ma-o. <sup>17</sup> Ma ngayo ka Ebhe gba Ngámá gba ní Yesu Kilisito, 'Dyi ní na asasua me aní ha bua na imbilangu pi yi. Bua ang-o asúno Ebhe pi yi mbámá, aní tsia méne di me yi mbila aní na paká paká. <sup>18</sup> Ma ngayo me aní bhulu imbilangu gba yi ngú nambila obabadha 'ngú inde aní apa me ní ahá e pi okpála bhende aní a'i o-o. Ma la di ngakunda me yi mbila tia di ne sangu inde bhú obabadha 'ngú inde aní aleke e pi okpála gba e-o.

<sup>19</sup> Kaka-a, yi ambíla angu na kuo kuo inde aní nde ne e pi ní omabhuka-o. Angu ang-o, a ko bhende li Ebhe asuno e na paká paká, <sup>20</sup> nedhinga li aní azuku Yesu Kilisito lie, aní atsia a'o aní li pá 'kpa e na kokpa abhúlá-o. <sup>21</sup> Oo, aní a'o Kilisito pí 'ndji ndu obua hana, pí 'ndji ndu obua hana na angu, pí 'ndji ndu obua hana na kpekpeke ne pí 'ndji ndu o'ili hana inde u ti da na'i e bha bini naki de, engú bini, inde u ti da di na'i e bhú oekpi inde ngago ko. <sup>22</sup> Ebhe a'o ndu 'he hana sa 'dhu Kilisito. Aní atsia a'o aní Ngámá pí 'ndji ndu 'he hana di ne pí 'ndji Dadjua gba e-o. <sup>23</sup> Piga gba Ebhe-e, a ko kute Yesu Kilisito. Angu gba aní-e ngadu bhú Dadjua ang-o, ngaani-e, aní ne ndu bili hana.

## 2

### *Ní azuku bhú dabili bini ne Yesu Kilisito*

<sup>1</sup> Nani kalanu-o, yi amu li bua yi kabula pulu 'ngú di ne kabula siti 'ngú gba yi-o. <sup>2</sup> Yi adu nakobho bhú siti 'ngú

nakpata lele mukobho na doto inde. Yi adu namanga ngámá na angu gba osisiti bua inde atu 'kpi-o. Ngámá ang-o, a ko bua inde ngamene kulu bhú okpála inde ngagu Ebhe-o. <sup>3</sup> Ní adu bhadi nani ndu ní hana maka uo. Padhá de, anga ní adu nani nakobho bhú gumu na sisiti gba ní-o. Ní adu namene gumu na kute ní, di ne gumu na bua ní. Ka siti 'ngú gba ní-e, a ayo nani me ke 'ngú gba Ebhe-e go pí ní maka okpála koko.

<sup>4</sup> Engú bini, ndjinga gba Ebhe-e ngbéngbé, mukunda gba aní pi ní-e ngbéngbé naali. <sup>5</sup> Kaka-a, aní aha matá mukobho pi ní li pápá gba Kilisito, nganí okpála inde amu nani ka siti 'ngú gba ní-o. A na paká me ní akobho ka bádha bhú 'bu gba Ebhe. <sup>6</sup> Bhú makpøtø gba ní ne Yesu Kilisito-o, Ebhe azuku ní bhú kuo bhú dabili bini ne aní, ngubula me ní u bhú dabili bini ne aní abhúlá. <sup>7</sup> Bhú nasuno bádha bhú 'bu inde aní asuno e pi ní bhú Yesu Kilisito-o, Ebhe akunda nasuno bhomu-o ngubula ndu nedhinga hana inde ngago-o bádha bhú 'bu gba e na ngbéngbé ko. <sup>8</sup> Padhá de, anga yi akobho ka bádha bhú 'bu gba Ebhe kabula nabhuka. Mukobho ang-o yie ka yi de, a ko ehe inde li Ebhe aha e pi yi padhá. <sup>9</sup> Mukobho ang-o yie ka okulu gba yi-e de. Kaka-a, a ayo de me kpála bini pa 'li e tété-e de. <sup>10</sup> A na paká me Ebhe abho ní ngae. Aní abho ní bhú nakpøtø liní ne Yesu Kilisito ngubula me ní mene ongú na babadha. Obabadha 'ngú ang-o, Ebhe aleke nani pi ní bhutode me ní mene.

### *Yesu akpøtø omaYuda ne obhende ne omaYuda ade-e bhú nakpi gba e-o*

<sup>11</sup> Yi bhundja nga maka yi adu nani lie kalanu-o. Ngayi okpála inde li omaYuda adu na'i o me okpála inde i li gandja\* de, anga bhú nazu-o, yi ne omaYuda ade. U atsia adu na'i lio me o ne okpála inde ali gandja. A ko la ehe inde li okpála amene e li kute ne 'kpa o. <sup>12</sup> A na paká me bhú nedhinga bhomu-o, yi adu nani de

\* **2:11** 2:11 Gandja: A adu nani engú inde asuno me a inde-e kpála ka Ebhe.

Kilisito tsutsu. Yi adu ne ogandji okpála , yi da nani bhú piga gba omafalaale de. Gandja inde li engú li Ebhe apa nani lie me ni améne e pi okpála gba ni-e alu pí e, da pi yi de. Yi adu nani nadu pála doto me yi nde 'o 'to yi 'to Ebhe de. Ebhe da la di bhú yi de. <sup>13</sup> La mbia inde-e, bhú nakpètse liyi ne Yesu Kilisito-o, ngayi okpála inde adu nani de ani tsutsu-o, yi adyudyo liyi de ani masikpe kabula ngute ani-o.

<sup>14</sup> Padhá de, anga Kilisito ngae makpe aha guo 'ngú pi ní ngae bhú namene me omaYuda, ne okpála bhende ne omaYuda ade-e kolo koli okpála bini. Bhú nakpi ka ani-e, ani agugumu kozie inde adu nani nagbo bhasu uo-o. Kozie ango-o adu nani nayala lio sunda o. <sup>15</sup> Ani abulu líli gba Moidje ne odapo ango-o hana. Ani amene me omaYuda, di ne okpála bhende ne omaYuda ade-e kolo koli piga bini na mbia bhú nakpètse lio ne ani. Abhomu-o, ani atsia agie guo 'ngú. <sup>16</sup> Bhú nakpi ka ani li kulusi-e, Kilisito akpètse uo bhú koli kute bini. Ani atsia agie makpolia sunda uo ne Ebhe. Li pápá na kulusi-e, ani a'e yala sunda uo. <sup>17</sup> Kilisito ago ngubula nakpokpo Bádha Ngali na guo 'ngú pi yi okpála inde adu nani tsutsu de Ebhe, di pi okpála inde adu nani masikpe-o. <sup>18</sup> Li pápá gba Kilisito-o, ndu ní hana, omaYuda ne okpála bhende ne omaYuda ade-e, ní ti da nadyudyo liní de Ebhe, 'Dyi ní, ka koli Bu Bhobua bini.

<sup>19</sup> Kaka-a, ngayi okpála inde ne omaYuda ade-e, yi matá ne ogandji okpála ade, yi maka ogomago ade. Engú bini, yi mbia inde-e ne ongisi na kuti, yi bhú ká okpála gba Ebhe. Yi ne okpála na piga gba Ebhe. <sup>20</sup> Ngayi-e, yi akolo ndula na eti inde li 'dhu e nde ne obhulu titima gba Yesu , di ne opolofeta . Nepanda na eti ango-o, a ko Yesu Kilisito ngae makpe. <sup>21</sup> Ani ngamene ngae me eti-e lu kpekpeke. Ani la di ngamene me eti ango-o kolo 'ngbé 'ti Ebhe na bubu, inde u a'o e pi Ngámá. <sup>22</sup> Bhú nakpètse lio ne Kilisito-o, ngayi di-e, yi maka ndula na eti inde u ayiki e-o. Yi atsia akolo ne ndu okpála koko koli eti bini inde li Ebhe

ngadu bhú e li pápá gba Bu Bhobua.

### 3

*Polo akpokpo 'ngú pindji engú inde awo lie mawo gba Kilisito*

<sup>1</sup> Kaka-a, ngama Polo-o, ma ne kpála na tikpu gba Yesu Kilisito kabula yi okpála inde ne omaYuda ade-o. <sup>2</sup> A na paká me yi adje engú pindji kulu inde li Ebhe aha e bhú bádha bhú 'bu gba e me, ma mene e pi yi ko. <sup>3</sup> Ebhe ambamba ta 'ngú gba e inde awo lie mawo muma, ngubula me ma mbila tata-a ndjindji. Ma aye mbo 'ngú pi yi pépé bedi. <sup>4</sup> Nedhinga yi ngatanga balua inde-e lie, yi ti da nambila imbilangú inde ma nde ne e li engú inde awo lie mawo gba Kilisito-o. <sup>5</sup> Nani kalanu-o, Ebhe mbamba nga nani ta engú ango-o pi okpála na kalanu-o de. Engú bini, ani asuno mbia inde-e li pápá gba Bua gba e pi obhulu titima na bububu gba Yesu, di ne pi opolofeta . <sup>6</sup> Okpála inde ne omaYuda ade-e ngasia koli ehe bini ne omaYuda. Uo bhú koli kute bini. U asia la di ehe inde li Ebhe apa me ni améne e bhú Yesu Kilisito li pápá na Bádha Ngali-e masia.

<sup>7</sup> Ma akolo kpála na kulu na kpokpo Bádha Ngali ka bádha bhú 'bu gba Ebhe , inde ani aha e muma bhú angu gba e-o. <sup>8</sup> Ngama-a, ma ne mboye kpála bhú ká ndu okpála gba Ebhe-e hana. Engú bini, Ebhe atsia aha bádha bhú 'bu gba e muma ngubula me ma kpokpo Bádha Ngali pi okpála bhende ne omaYuda ade-e pindji tia na ngbéngbé gba Kilisito, inde ane mabhundja gba okpála mane-o.

<sup>9</sup> Ma ti da nasuno pi ndu okpála hana mbámabá maka li Ebhe ngamene engú gba e inde awo lie mawo lie-o. Ngaani-e, a ko kpála inde abho ndu 'he hana. Nayie nani didili naali-e, engú ango-o adu me a nde awo lie mawo, <sup>10</sup> ngubula me mbia inde-e, kabula engú li Ebhe amene e bhú Dadjua gba e-e, ndu obua hana, di ne ndu obua hana na angu inde abhúlá-a ti da nambila imbilangú gba Ebhe inde u ti da nambila alo na e de. <sup>11</sup> Ndu 'ngú bhomu-o amene lie li lele mabhundja li Ebhe adu nani ne

e nayie li lilita, inde aní amene e bhú Yesu Kilisito, Ngámá gba ní-o. <sup>12</sup> Ní akpètse liní ne Kilisito, ní atsia abhuka la di aní. Kaka-a, li ndu kpadji hana ní adú ne tsulú de ngú nadyudyo liní de Ebhe. <sup>13</sup> Kaka-a, ma ngayo ka yi me, bua yi asía ndala ka likabhu inde ma ngazu e ngubula yi-e de. Likabhu ango-o mangbo ngaha pi yi sangu .

*A ayo me omabhuka mbila lele mukunda gba Kilisito inde ane ndu 'ngú hana-o*

<sup>14</sup> Kaka-a, ma ngatutu lipuku ma kuto kala 'Dyi ní Ebhe, <sup>15</sup> li ndu piga hana inde abhúla ne píla doto adha bhú e-o. <sup>16</sup> Ma ngayo ka aní me aní ha angu pi yi li pápá na Bhobua gba e, anga sangu gba aní-e ne 'ngbé tia na ngbéngbé. Abhomu-o, yi tsia sia angu li bua yi. <sup>17</sup> A ayo me Kilisito si kuti e li bhobua yi li pápá bhe nabhuka . Ma ngayo me sie yi li bhú mukunda mali, la di me a lu bhú mukunda ango-o malu. <sup>18</sup> Abhomu-o, yi kólo ne angu ngú nambila bhú dabili bini ne ndu okpála gba Ebhe-e hana me lele mukunda gba Kilisito pi ní-e, ane mane! <sup>19</sup> Yi mbila lele mukunda gba Kilisito inde ane ndu 'ngú hana u ti da nambila e-o. Yi abédhe ne ndu 'ngú hana inde bhú Ebhe-e bedhe.

<sup>20</sup> Ebhe ngamene kulu bhú ní ne angu gba e-o. Li ní yo 'he ka aní-e, aní ti da nahaha pi ní bhelé ane mane, anga angu gba aní-e ane ndu 'ngú hana inde ní ti da nabhundja e. <sup>21</sup> A ayo me sangu du ne aní bhú Piga gba Ebhe di ne bhú Yesu Kilisito, ndu nedhinga hana, duduma ne duduma. A adu moko.

## 4

*Yi gili ndu 'kpí hana nadu bhú makpètse ne Kilisito*

<sup>1</sup> Ngama kpála inde bhú tikpu anga ma ngamene kulu pi Ngámá-a, engú inde ma ngayo e ka yi kpékpéke-e ngae inde: ngayi okpála inde li Ebhe a'i o-o, kaka-a, yi dhuku maka li okpála inde li Ebhe a'i o-o adhudhuku lie-o. <sup>2</sup> Yi du ndu 'kpí hana naké liyi ne kuto, yi du ne bhuku bua, di

ne 'ndjá bua. Yi kibila liyi bhú ongu inde sunda yi-e ne bua na mukunda. <sup>3</sup> Yi gili ne angu hana nadu bhú makpètse inde li Bu Bhobua ngaha e bhú guo 'ngú inde ngagbite yi bhú dabili bini ko. <sup>4</sup> A ne koli kute bini, di ne koli Bu Bhobua bini. Ebhe a'i la bhadi ní me ní 'o 'to ní to koli 'he bini. <sup>5</sup> Koli Ngámá bha bini, ne koli nabhuka bini, di ne koli batisimo bini. <sup>6</sup> Koli Ebhe bha bini, inde 'Dyi ndu okpála hana. Aní ngau pí 'ndji ndu okpála hana. Aní ngamene kulu bhú ndu okpála hana, aní la di ngadu bhú ndu omabhuka hana.

<sup>7</sup> La-a, Kilisito aha pi kpála ne kpála angu gba Bhobua ngú namene ehe. Aní atsia aha di bhe gba kpála ne kpála pi e ne bádha bua. <sup>8</sup> U aye me:

«Li aní a'u lie abhúla-a,  
aní abha okpála na tikpu ne angu,  
aní atsia aha angu gba Bhobua ngú  
namene ehe pi okpála.†»

<sup>9</sup> La-a, napa me «aní a'u abhúla-a», a akunda napa pi? Bhobhomu-o akunda napa me, kala na'u abhúla-a, Kilisito aké ngaiza a saté. <sup>10</sup> Kpála inde aké a saté-o, a ko di kpála inde a'u abhúla tsutsu ngubula me aní du bhú ndu 'he hana. <sup>11</sup> A ko aní inde aha kulu pi kpála ne kpála-o. Aní aha pi okoko nadu obhulu titima gba Yesu , okoko ne opolofeta . Okoko ne omusuno na Bádha Ngali , okoko ne odimandé, i du di-e omusuno. <sup>12</sup> Yesu amene me okpála gba Ebhe-e kolo bedhe ngú namene kulu gba aní, ne okulu inde li Kilisito aha e pi uo bhomu-o, ngubula me kute ni inde Piga gba Ebhe-e, kolo kpekpeke. <sup>13</sup> Ní mene mo-o, ndu ní hana ní kólo bhú makpètse bini bhú nabhuka ne nambila Ndili gba Ebhe-e ndjindji. Ní bhele bhú nabhuka ango-o, ní tsia kólo libhomu maka Kilisito.

<sup>14</sup> Abhomu-o, ní dú matá maka ongisi de. Ní dú la di maka zabu inde li anvi ngadyudyo e ne ndu pasu hana, di ne anvi na nasuno gba omusuno inde ngapite okpála-a de. <sup>15</sup> Engú bini, i du me ní nde ngapa kukulu 'ngú bhú mukunda-a, ní bhéle bhú ndu 'ngú hana li pápá

† 4:8 4:8 Tsia bhú Ets. 68:19.

gba Kilisito inde ne 'ndji Piga gba Ebhe-o. <sup>16</sup> Aní ngamene ngae me oyá ní dũ bini, aní atsia akpõtse di lie bhú dabili bini ne ní. Kute ní inde Piga gba Ebhe-e bhadi moko. I dũ me nganí inde ne okpála na Piga gba Ebhe-e ní nde ngamene kulu gba ní bhú dabili bini ne mukunda-a, li Dadjua ango-o bhéle.

*Yi koto bhú mukobho na kalanu, amba yi kolo okpála na mbia*

<sup>17</sup> Engú inde ma ngayo e ka yi ne kekele-e ne 'li Ngámá-a ngae inde: yi adú nadhuku matá maka omupagano de. Padhá de, anga mabhundja gba uo-o padhá. <sup>18</sup> Imbilangu gba uo-o bhú biti. Mukobho inde ngayie ka Ebhe-e pi uo ade. Padhá de, anga u mbila 'ngú bini de. U agbite la di bua o má ki! <sup>19</sup> U ngadje numu li 'ngú bini ade. U ngamene ndu 'ngú na sisiti hana inde u akunda namene e. U la di ngakunda olisi ne obhosi ngangá.

<sup>20</sup> Pi yi-e, a bhomu-o engú inde u apa e pi yi pindji Kilisito-o de. <sup>21</sup> A na paká me u apa ndu 'ngú gba Yesu-o pi yi hana. Maka omakilisito-o, u asuno pi yi kukulu 'ngú inde ní asia e ka ani-o. <sup>22</sup> Kaka-a, a ayo me yi tse mukobho gba yi na kalanu-o. Lele nani maka yi adu lie kalanu-o, yi koto bhúbhú makoto, anga ogumu ango-o ngapite okpála. A la di ngato okpála bhú kuo. <sup>23</sup> A ayo na'o me Bu Bhobua dji yi libhому, amba yi kolo okpála na mbia li bua yi, di ne bhú mabhundja gba yi ko. <sup>24</sup> Yi kolo okpála na mbia, inde li Ebhe abho o maka e makpe, inde la di ngau lie bhú mukobho na ngbingbili, inde di bubu li kukulu 'ngú ngagbe e-o.

<sup>25</sup> Kaka-a, yi 'o napa eu ma'o. A ayo me kpála ne kpála pa pi kilí e kukulu 'ngú. Padhá de, anga ní ndu ní hana ne yá koli kute bini. <sup>26</sup> I dũ me bua yi nde ake-e, yi alí bhú siti 'ngú de. A ayo me bua yi kə kala me ela ti.† <sup>27</sup> Yi aká kpadji pi Djabulu de me ani ko pi yi-e de. <sup>28</sup> A ayo me kpála inde adu nako nazi 'he-e, 'o nazi 'he ma'o. A ayo mangbo me ani mene kulu ne 'kpa e makpe, amba ani sia ezu pi e li bádha kpadji. Ani dũ la di ne ehe

ngú nateteke okpála inde li ehe aneke ka o-o. <sup>29</sup> Eli na sisiti bini akóto bhú 'bhe yi de. Yi pa bha bini eli na babadha inde i ti da nateteke okpála koko nakpata gumu gba uo-o, a la di ngamene bádha 'ngú pi obhende ngadjedje-o.

<sup>30</sup> Yi ahá likabhu pi Bu Bhobua inde li Ebhe aha e pi yi-e de. Padhá de, anga Bu Bhobua inde li Ebhe atu e li yi maka kasé-e ngapa pi yi ngae me bhú oekpi inde ngago-o, Ebhe agbégbe yi bhú siti 'ngú gba yi-e magbegbe. <sup>31</sup> Yi 'e ndu 'ngú hana na sisiti li bua yi ma'e. Yi 'e ndu bua bhú yi ma'e. Yi 'e ke 'ngú bhú yi ma'e. Yi 'o nasusula ma'o. Yi 'o la di nasobho sobho ma'o. Yi 'o namene ndu sisiti 'ngú hana má kpəkəbhə! <sup>32</sup> Yi dũ sunda yi ndjindji, amba yi bedhe ne mukunda bedhe. Yi mbu li sisiti 'ngú inde sunda yi maka li Ebhe ambu la di li yi lie kabula Kilisito-o.

## 5

*Yi dhuku maka okpála inde bhú zi 'kpi*

<sup>1</sup> I nde lie me yi nde ne ongisi li Ebhe-e akunda o-o, yi mene ne kpéke me yi dũ maka ani. <sup>2</sup> A ayo me yi dũ ne mukunda maka Kilisito. Padhá de, anga ani akunda ní. Ani atsia andala 'kpa li mukobho gba e pi ní maka makiso, maka enu inde u atsutsulu e pi Ebhe, inde li se e ngapu ndjindji.

<sup>3</sup> Yi ne okpála na bububu gba Ebhe. Kaka-a, a ayo de me u dje ongu nakunda olisi, di ne obhosi ngangá, di ne namene ndu ongu na sisiti hana, i dũ di-e gumu 'he naali bhú ka yi-e de. <sup>4</sup> A ayo de me siti 'li, ne engú na ngingi, ne zibotu koto bhú 'bhe yi-e de. Engú bini, yi gie mangbo heni pi Ebhe. <sup>5</sup> Yi mbila ndjindji me, kpála bini na zabhe, kpála na zibotu, i dũ di-e kpála na endju (padhá de, anga endju-o, a ko nayo ebhe na eu), ani lí bhú Nau gba Kilisito di ne Ebhe-e belegu de bini.

<sup>6</sup> Kpála bini apite yi ne 'li na padhá padhá de. Padhá de, anga ngua osisiti 'ngú bhomu-o ngagbele ke 'ngú gba Ebhe-e pi okpála inde ngayala namene líli gba ani-e ngae. <sup>7</sup> Kaka-a, yi akpõtse liyi ne

† 4:26 4:26 Tsia bhú Ets. 4:5.

ngua okpála bhomu-o de. <sup>8</sup> Yi adu nani kalanu-o bhú bití. La mbia inde-e, li yi akpɔtɔsɔ liyi lie ne Ngámá-a, yi akolo bhú zi 'kpí. Kaka-a, yi dhuku maka okpála inde bhú zi 'kpí. <sup>9</sup> Padhá de, anga zi 'kpí ngazu ndu 'ngú na babadha hana. A la di ngazu ngbili 'ngú ne kukulu 'ngú. <sup>10</sup> Yi gili ne kpéke ngú nalo engú inde li Ngámá akunda e-o. <sup>11</sup> Yi akpɔtɔsɔ liyi ne okpála bhende ngamene ongu na padhá padhá na sukpe-e de. Engú bini, yi gbe engú ang-o mbámbá bhú djila okpála. <sup>12</sup> Padhá de, anga a ko numu naali ngú nagama 'ngú li 'ngú inde li okpála ang-o ngamene e bhú pepe. <sup>13</sup> La-a, engú inde u agbe e pi okpála-a, akolo mbámbá. <sup>14</sup> La di-e, ndu 'ngú hana inde u agbe e li zi 'kpí-e, a akolo bhadi li zi 'kpí. Kaka-a, u apa me:

«Ngamu kpála inde ngala-a, zuzuku,

yie bhú ká okpála inde amu-o mayie,  
amba Kilisito suno zi 'kpí gba e pi mu.»

<sup>15</sup> Kaka-a, 'ee, yi lila liyi ndjindji bhú nakobho ka yi-o. Yi adú nakobho maka ongingi de. Engú bini, yi du nakobho maka okpála na imbilangu. <sup>16</sup> Yi djele onedhinga inde yi nde bhú e ndjindji. Padhá de, anga onedhinga inde ní nde bhú e sisiti. <sup>17</sup> Kaka-a, yi adú maka ongingi de. Engú bini, yi mene ne kpéke me yi mbila engú inde li Ngámá akunda me yi mene e-o.

<sup>18</sup> Yi alángba ne pandi de. Padhá de, anga pandi ngatima kpála bhú 'ngú na pupulu. Engú bini, yi bedhe mangbo ne Bu Bhobua. <sup>19</sup> Yi to masi bhú yi ne nali ndu odjua oetsi hana inde li Bu Bhobua ngaha e-o. Yi toko Ngámá ne bua yi hana. <sup>20</sup> Yi gie heni pi 'Dyi ní Ebhe ndu nedhinga hana, di ne ngú ndu 'ngú hana ne 'li Ngámá gba ní Yesu Kilisito.

*A ayo me elə ne bhoko manga lio sunda*  
o

<sup>21</sup> Yi manga liyi sunda yi kabula mazima yi nde ne e pi Kilisito ko.

<sup>22</sup> Ngayi olisi-e, yi manga obhosi gba yi-e maka yi ngamanga Ngámá lie-o. <sup>23</sup> Padhá

de, anga bhoko ne ngámá pí 'ndji wala e, maka li Kilisito nde lie ne Ngámá pí 'ndji Piga gba Ebhe-o. Kilisito ne Mukobho na Piga gba Ebhe. Piga ang-o maka kute ani. <sup>24</sup> A ayo me olisi manga obhosi gba o-o bhú ndu 'ngú hana, maka Piga gba Ebhe-e ngamanga Kilisito lie-o.

<sup>25</sup> Ngayi obhosi-e, yi du ne mukunda pi olisi gba yi, maka li Kilisito akunda Piga gba Ebhe-e lie-o. Ani asuno mukunda ang-o li nandala kpa li mukobho gba e ngubula Dadjua ang-o. <sup>26</sup> Ani akunda nani namene me Piga gba Ebhe-e kolo bubu, ani atsia avulu ne engu\* di ne 'li e. <sup>27</sup> Padhá de, anga ani akunda nani me Piga gba Ebhe-e koto kala ni ne sangu gba e hana. A adú ne doto bhú e de, ne engú na sisiti napapa tété de, di ne zibotu de. Dadjua ang-o du la di bubu, inde u ti da nau siti 'ngú napapa li e de.

<sup>28</sup> Kaka-a, a ayo me obhosi du ne mukunda pi olisi gba o maka u akunda kute o lie makpe-o. Padhá de, anga kpála inde ne mukunda pi wala e-e, ani ngakunda bhomu-o li e makpe. <sup>29</sup> Padhá de, anga kpála bini inde ayala kute e makpe ade. Engú bini, kpála ne kpála ngaku kute e, di ne nalilila ndjindji, maka Kilisito ngamemene lie bhú Piga gba Ebhe-e ko. <sup>30</sup> Padhá de, anga ní ne tika kute ani. <sup>31</sup> A maka u aye lie bhú bhuku gba Ebhe-e me: «Kaka-a, bhoko a'ó ká 'dyi e ne 'hi e ngubula nakpɔtɔsɔ lie ne wala e. U tsia kólo ndu o bhisi hana koli kute bini.†» <sup>32</sup> 'Ngbé 'ngú na kukulu awo lie bhú engú inde u apa e bhomu-o. Ngama-a, ma apa me u ngapa 'ngú bhomu-o li 'ngú gba Kilisito di ne Piga gba Ebhe. <sup>33</sup> Engú bini, u la di ngapa 'ngú ang-o pi yi: a ayo me bhoko ne bhoko du ne mukunda pi elə gba e maka ani akunda li e lie makpe-o. A ayo la di me elə ne elə manga 'ko e.

## 6

*Lele dasundu gba ongisi ne okpála azu*  
o-o

\* 5:26 5:26 Engu: A ko batisimo. Tsia bhú Tit. 3:5. † 5:31 5:31 Tsia bhú Dje. 2:24.

<sup>1</sup> Ngayi ongisi, engú inde a ayo me yi mene e maka li Ngámá akúnda lie ngae inde: yi manga okpála azu yi-e mamanga, anga bhobhomu-o ndjindji. <sup>2</sup> Lílí na kalanu inde li Ebhe asuno e di ne napa me ni améne ehe bhú e ngae inde: «Manga 'dyi mu ne 'hi mu mamanga, <sup>3</sup> amba mu du ne kpála na djali, mu tsia bhúe la di ngengele píla doto.†»

<sup>4</sup> Ngayi odyi ongisi, yi améne de me ongisi gba yi-e kolo ne kpéke 'ndji-e de. Engú bini, yi ku uo ne nalili uo di ne naha líli inde ayie ka Ngámá-a pi uo.

### *Lele dasundu gba obalise ne omakulasi*

<sup>5</sup> Ngayi obalise, yi manga omakulasi yi píla doto mamanga ne nazi uo ndjindji, ne koli bua bini mugito me yi ngamanga Kilisito. <sup>6</sup> Yi améne bha bini mo-o li nedhinga inde u ngatsia 'kpí li yi lie de. Padhá de, anga yi mene mo-o, i mána mugito me yi amene ngubula me okpála ziba yi. Engú bini, yi mene engú inde li Ebhe akúnda e ne koli bua bini, maka obalise gba Kilisito. <sup>7</sup> Yi mene kulu pi omakulasi yi ne bádha bua mugito me, yi ngamemene pi Ngámá ngae makpe, anga yi mene pi kpála de. <sup>8</sup> Padhá de, anga yi ambila me, abana i du bali, i du di-e bali de-e, kpála ne kpála asía makalá sakpa Ngámá li lele bádha kulu li kpála ango-o amene e-o.

<sup>9</sup> Ngayi, omakulasi okpála, yi mene bhadi moko pi obalise gba yi-o. Yi abú tsulu bhú uo ne napa de me yi ató mbolo li uo de. Yi mbila ndjindji me ngayi ne obalise gba yi-e, a ka yi ne koli Ngámá bini abhúlá. Aní gbogbo bhúsu okpála de.

### *Yi bi tia 'gu inde li Ebhe ngaha e pi yi-o*

<sup>10</sup> Ngú nabu tata-a, yi gili angu gba yi-e bhú nakpøtø liyi ne Ngámá, bhú angu na ngbéngbé gba ani-o. <sup>11</sup> Yi bi ndu tia 'gu hana inde li Ebhe ngaha e pi yi, ngubula me yi lu kpekpeke kala siti mabhundja gba djabulu-o. <sup>12</sup> Padhá de, anga ní ngagu gbele ne okpála-kuti ade. Engú bini, ní ngagu 'gú ne osisiti bua inde ne angu

abhúlá. Ní ngagu 'gú ne ongámási na angu di ne obhende na sukpe. <sup>13</sup> Kaka-a, yi ha ndu tia 'gú gba Ebhe-e hana, amba li nedhinga na sisiti akólo lie, yi de lu kala bhulu yala gba yi-e kpekpeke. La di-e, pita nagu gbele akolo ali soso-o, yi tsia lu li bili yi nde li e kpekpeke.

<sup>14</sup> Ka 'ngú ango-o, yi lu kpekpeke. Yi gbite kukulu 'ngú ludu yi maka mukabha. Yi holo ngbili 'ngú maka bongo na kó 'nu inde ngalila mbulu kpála. <sup>15</sup> Yi dyi gamu na nakpokpo Bádha Ngali na guo 'ngú maka maløke. <sup>16</sup> Yi holo nabhuka ndu 'kpí hana maka kopí. Bhobhomu-o ahá angu pi yi ngú nabulu ndu edji hana inde ne djua gba Satana. <sup>17</sup> Yi dyi mukobho maka ndata na kalase. Yi holo Eli gba Ebhe-e maka mbotia inde li Bu Bhobua ngaha e-o.† <sup>18</sup> Yi mene ndu 'ngú bhomu-o hana bhú mayo. A na paká, yi yo Ebhe bhú ndu 'ngú hana maka li Bu Bhobua atéteke yi lie-o. Kaka-a, yi alá-a de, yi yo Ebhe ndu 'kpí hana pi ndu okpála hana na bububu-o.

<sup>19</sup> Yi yo di Ebhe muma, amba Ebhe ha eli na ngbingbili muma nedhinga ma akúnda nagama 'ngú lie-o. La di-e, a ngubula me ma adú ne tsulu de nedhinga ma ngambamba ta ongu inde awo lie bhú Bádha Ngali-e lie-o. <sup>20</sup> Ma ne bhulu titima na Bádha Ngali inde ma nde bhú tikpu ngubula e-o. Kaka-a, yi yo Ebhe ngú ma, amba ma akpøkpo Ngali ango-o ne tsulu de, ma kpokpo mangbo maka a ayo lie-o.

### *Eli na soso*

<sup>21</sup> Tisiko, ndai ní na mukúnda, kpála inde di ngamene kulu gba Ngámá ndjindji akpøkpo ndu 'ngú hana inde atsia ma pi yi. Aní akpøkpo pi yi ngubula me yi mbila lele maka ma nde lie di ne ehe inde ma ngamene e-o. <sup>22</sup> Ma atima aní ngubula nakpokpo pi yi lele maka ya nde lie, amba aní to di masi bhú yi.

<sup>23</sup> A ayo me Ebhe 'Dyi ní, di ne Ngámá Yesu Kilisito ha guo 'ngú, ne mukúnda di ne nabhuka pi ndu ondaise ní hana.

<sup>24</sup> A ayo me bádha bhú 'bu gba Ebhe du

† 6:3 6:2-3 Tsia bhú Eki. 20:12; di ne bhú Det. 5:16. † 6:17 6:14-17 Tsia bhú Isa. 59:17, 11:5, 27:1, 34:5, 49:2; ne bhú Oz. 6:5; ne bhú Ebe. 4:12; di ne bhú Apok. 1:16, 19:15.



ne ndu okpála hana inde ne mukunda na  
duduma pi Ngamá gba ní Yesu Kilisito ko.

## Balua gba Polo pi omabhuka na gũdhu na Filipoi Eli na kalanu

Polo aye nani balua inde-e pi omabhuka na Dadjua na kalanu inde ani a'o nani e bhú putu-o, bhú ndu doto na ngámá gba okpála na Loma inde abhú Makedonia-o. Ani aye balua ango-o me ani nde bhú tikpũ. Li nedhinga inde ani adu lie me bua ani nde angamba ka nagu inde li obhelesi okpála koko na Dadjua gba Ebhe adu agu ne e-o, la di bua ani atsia alu bhúlá má gba ka onasuno na eu inde adu bhú Dadjua gba Ebhe inde abhú Filipoi-o.

Engú inde i ti da nau lie má gala bhú balua inde-e, a ko nagie heni pi omakilisito na Filipoi ngubula makiso inde u atima nani e pi ani ngú nateteke ani bhú ongú gba e ko. Polo aha nedhinga bhomu ngú nato masi bhú omakilisito na Filipoi ngubula me u andala bhú kulu gba Ebhe-e de, abana u adu ato mbolo lie li ndu uo hana-o.

Balua inde-e agama 'ngú kpekpeke pindji djali, naziba, nadu bini di ne 'ndjá bua inde bhú nabhuka a la di-e mukobho gba makilisito. Ani atsia asuno la di mukunda na kpekpeke inde li Polo adu ne e pi Dadjua na Filipoi-o.

### **Ongbengbe ongú inde bhú bhuku inde-e ngae inde:**

Eli na kalanu 1:1-11

Engú atsia Polo kpi e kpi 1:12-26

Mukobho inde bhú Kilisito-o 1:27 - 2:18

Mabhundja inde adu pi Timoté ngauo ne Epafolodite 2:19-30

Nalila lio ka obhulu yala di ne okpekpeke 'ngú inde ngago 3:1 - 4:9

Polo ngauo ne obi e na Filipoi 4:10-20

Eli na soso 4:21-23

*Polo yi omabhuka na gũdhu na Filipoi mayi*

<sup>1</sup> Ngama Polo, bhú dabili bini ne Timoté-e, ya yi yi mayi. Ya ne obalise gba Yesu Kilisito . Ma aye balua inde-e pi ndu

yi omabhuka inde bhú gũdhu na Filipoi hana, pi yi obhelesi okpála di ne pi yi okpála inde ngateteke kulu gba Ebhe, ndu yi hana inde akpõtse liyi bhú dabili bini ne Yesu Kilisito-o. <sup>2</sup> A ayo me Ebhe 'Dyi ní, bhú dabili bini ne Ngámá gba ní Yesu Kilisito suno bádha bhú 'bu gba o-o pi yi, amba u ha di guo 'ngú gba o-o pi yi.

*Polo agie heni, ani atsia ayo di Ebhe ngú omabhuka na gũdhu na Filipoi*

<sup>3</sup> Ma ngagie heni pi Ebhe, ndu nedhinga hana ma ngabhundja yi lie-o. <sup>4</sup> Ndu nedhinga hana ma ngayo Ebhe lie pi ndu yi hana-a, ma ngakpi djali. <sup>5</sup> Ma ngagie heni pi Ebhe anga yi akpõtse liyi ne ma bhú nakpokpo Bádha Ngali , nayie bha bini li 'kpí na kalanu yi abhuka lie, akolo makolo pi mbia inde. <sup>6</sup> Ma ambila ndjindji me Ebhe inde akpo nani lita bádha kulu li bua yi-e, anú bha ne di ne kalanu, ani tsia bú soso li 'kpí li Yesu Kilisito agó lie-o. <sup>7</sup> A ndjindji me ma bhundja bha pindji ndu yi hana mo-o. Padhá de, anga bua ma abedhe ne djali ka yi, anga Ebhe asuno bádha bhú 'bu muma di ne pi ndu yi hana, ngubula me yi teteke ma nedhinga ma nde lie mbia inde-e bhú tikpũ, di ne nedhinga inde ma ngakpokpo lie ne angu ma hana kukulu 'ngú pindji Bádha Ngali lie-e, kala okpála nakodho mangimbo-o. <sup>8</sup> Ebhe mbila hana me, ma ngapa kukulu 'ngú me ma ne mukunda pi yi naali. Mukunda inde ma akunda yi ne e-e, ayie ka Yesu Kilisito.

<sup>9</sup> Ehe inde ma ngayo Ebhe pi yi ngú e ngae inde: ma ngayo Ebhe me mukunda gba yi-e nu bha ne kalanu, amba ateteke yi me yi mbila engú na kukulu ne lele maka yi ngadu lie sũnda yi-o. <sup>10</sup> Abhomu-o, yi tsia mbila di nalo obabadha 'ngú. Ma ngayo ndu 'ngú bhomu-o hana ngubula me ekpi li Yesu Kilisito agie lie lie, bua yi de du má ngilili di ne me ehe bini na sisiti adú bhú yi de. <sup>11</sup> Nakolo li 'kpí ango-o, nadhuku gba yi-e du ndjindji bhú angu gba Yesu Kilisito, amba okpála dhẽgẽ Ebhe, u toko di ani.

*Polo akpi djali anga u ngakpokpo Bádha Ngali gba Kilisito*

<sup>12</sup> Ondaise ma, ma akunda me yi mbila ndjindji me ongu inde akolo li ma-a, amene mangbo me Bádha Ngali-e yangba ne kalanu. <sup>13</sup> Ka 'ngú ang-o, ndu osudha hana inde ngalila eti gba guvelenele, di ne ndu okpála koko hana ambila me ma bhú tikpu kabula kulu gba Kilisito ma ngamene e-o. <sup>14</sup> La matá di-e, nau ma me ma bhú tikpu-o, ato masi bhú omabhuka bhelé li kpadji gba Ngámá gba ní-o. Uo matá ne tsulu ngu nakpokpo Bádha Ngali-e ade.

<sup>15</sup> A na paká me okpála koko ngakpokpo Bádha Ngali gba Kilisito-o, anga u ne 'ngbé bua li kute ma, u ngakunda nagu ma. La-a, okoko di ngakpokpo engú gba ani-e ne bua bini. <sup>16</sup> Obhe ngamene ne bua o bini bhomu-o, ngamemene anga u ne mukunda li pabili gba ma, u mbila ndjindji me kulu gba ma li bili inde-e, a ko ngubula me ma akpokpo Bádha Ngali, amba ma suno di pi okpála me a ko kukulu 'ngú. <sup>17</sup> Okpála ma de apa 'ngú gba o kalanu-o, ngakpokpo Bádha Ngali gba Kilisito anga u ngakunda me ni du nagu ma. Engú inde u ngakpokpo e yie li bua uo de, u ngakunda me ma zu matá likabhu bhú tikpu ei ane mane.

<sup>18</sup> A mene 'he bini de. Belegu u du akpokpo Bádha Ngali gba Kilisito ne siti bua , i du di-e ne bádha bua, Bádha Ngali ang-o bha nae nganu ne kalanu. Kaka-a, ma ngakpi djali. La matá-a, ma adú bha ne djali, <sup>19</sup> padhá de, anga ma ambila me ndu okpekpeke da 'ngú bhomu-o hana améne me Ebhe kobho ma, anga yi ngayo ani ngu ma, Bu Bhobua inde nani li Yesu Kilisito atima e-e, la di ngateteke ma.

<sup>20</sup> Engú inde ma nga'o 'to ma 'to e naali-e, a ko me ma ahá galikpe numu pi Kilisito 'kpí bini de. La-a, mbia inde-e, maka ne ndu nedhinga hana-a, ma abhuka ne bua bini me, ma adú bha bini nadhege Kilisito belegu ma du bhú mukobho, belegu ma kpi makpi. <sup>21</sup> Padhá de, anga muma-a, ma du bhú mukobho-o, ehe inde ane ne engbé-e, a ko nadhege Kilisito. Ma kpi

makpi-e ane la matá ne bádha. <sup>22</sup> I du me nadu ka ma bhú mukobho pila doto ei nde ade kpadji muma na ateteke okpála-a, ma mbila kpadji bhende ayo nalo e de. <sup>23</sup> Ma ngadho 'bi sunda ongu bhisi bhomu. A nga lima naali ne nayie pila doto inde ngubula me ma nu du de Kilisito. <sup>24</sup> La-a, nadu ka ma bhú mukobho-o ndjindji kabula yi.

<sup>25</sup> Ma ambila ndjindji me, a la bhadi moko, ma du nga matá bhú mukobho, ní tsia dú ne yi bhú dabili bini ngubula me yi nu li kpadji gba Ebhe-e ne kalanu, amba yi tsia kpi di djali li kpadji ang-o. <sup>26</sup> Nedhinga ma akóto lie bhú tikpu-o, ní tsia dú matá ne yi bhú dabili bini-e, yi atoko Yesu Kilisito naali ka engú inde ani amene e muma-o.

*Yi lu kpekpeke bhú nabhuka*

<sup>27</sup> Engú inde ane la mane-e ngae inde: a ayo me nadhuku gba yi du li lelele maka li Bádha Ngali gba Kilisito apa lie-o, ngubula me, belegu ma go natsia yi, belegu ma go de-e, ma de dje me yi alu kpekpeke ne mabhundja bini, ne me yi ngalila ndu yi hana nabhuka gba yi inde alu pi Bádha Ngali-o. <sup>28</sup> Yi adjé tsulu ka obhulu yala gba yi-e belegu de bini. Bhobhomu-o asuno pi uo mbámá me, ngauo-o, u angita, la ngayi-e, yi li kpadji na mukobho. Ebhe asuno pi uo ngae. <sup>29</sup> Padhá de, anga Ebhe suno bha bini bádha bhú 'bu gba e pi yi ngu nabhuka Kilisito de, engú bini, ani asuno bádha bhú 'bu gba e pi yi ngu nazu di likabhu kabula Bádha Ngali gba ani-o. <sup>30</sup> Yi ngagu bhomu-o ngua gbele inde nako yi au me, ngama-a, ma adu agu e-o. Yi la di ngadje me, mbia inde-e, ma nga bha ngagu 'gu.

## 2

*Yi ko liyi ne kuto maka Yesu Kilisito*

<sup>1</sup> I nde lie me yi akpetse liyi bhú dabili bini ne Kilisito-o , bhobhomu-o ngaha angu pi yi. A mo-o adi! I nde lie me ani ne mukunda pi yi-e, bhobhomu-o ngaha angu pi yi ngu nakpata kpadji gba ani-o. A mo-o adi! A na paká me Bu Bhobua akpetse yi ngae. A mo-o adi! A

na paká me Ebhe la di ngasuno bádha bhú 'bu pi yi ngae. A mo-o adi! <sup>2</sup> I nde lie mo-o, yi bedhe bua ma ne djali bedhe li kpadji nadu, ne li kpadji nadu ne mukunda sunda yi, di ne li kpadji nadu ne makpetse na kukulu sunda yi. <sup>3</sup> Yi adu amene engu na bhayiki bhayiki de. Yi adu nabhi 'kpa yi pi mbulu yi li engu de. Engu bini, yi ke liyi ne kuto, yi du nau okpala koko me u ane yi mane. <sup>4</sup> Kpala ne kpala adu bha bini natsia engu gba e makpe de, engu bini, a ayo di natsia engu gba okpala koko uu.

<sup>5</sup> Yi du bhú ka yi ne ngua mabhundja li Yesu Kilisito adu nani ne e-o.

<sup>6</sup> Belegu u aviti nani lie ne Ebhe-e bhú dabili bini-e, ani kpo nani 'ndji e ne Ebhe de me ni du ndu 'kpi hana maka ani-e de.

<sup>7</sup> La-a, ani a'o ka ndu 'ngu bhomu-o hana, ani akolo bali, u atsia azu ani kpala-kuti.

Ndu okpala hana au me a ko kpala-kuti.

<sup>8</sup> Ani ke mata lie ne kuto, ani amanga Ebhe akolo bha makolo bhú nakpi ka e,\* inde u agi ani lie li kulusi-o.

<sup>9</sup> Ka 'ngu ango-o, Ebhe ngae makpe a'e'e ani ne abhula nane ndu ohe hana. Bhú bádha bhú 'bu gba e, ani atsia a'o 'ili li ani, inde ane ndu 'ili hana.

<sup>10</sup> Ani amene mo-o ngubula me ndu 'he hana inde abhula di ne pila doto di ne asa doto,†

kikita lipaku o kuto kala Yesu ngu nadhege ani ka 'li ani-o,

<sup>11</sup> amba ndu okpala hana kpokpo mbamba me Yesu Kilisito ne Ngama.

U mene mo-o, u tsia dhege di Ebhe 'Dyi ani.

### *Yi du maka zi 'ke pila doto*

<sup>12</sup> Kaka-a, ondaise ma na mukunda, maka yi amemene lie gemo gemo-o, yi manga Ebhe mamanga. Yi amanga bha bini ani ka de djila ma de. Engu bini, yi manga ani la mata ane mane nedhinga ni

nde lie ne yi bhú dabili bini ade ko. Yi mene kulu liyi pi Ebhe ngubula nasuno me yi akobho, yi mene kulu ango-o bhú dabili bini ne nakeli liyi ne kuto. <sup>13</sup> Padha de, anga Ebhe ngae makpe ngamene kulu li bua yi ngubula me yi du nakunda di ne namene ngu inde nganga li ni-o.

<sup>14</sup> Bhú ndu kulu hana inde yi ngamene e-e, yi adu nadi mutokono de, yi adu la di ne kpeke 'bhe de, <sup>15</sup> ngubula me kpala bini au engu na sisiti napapa li yi de, di ne me yi du libhomu hana ndjindji, amba yi du ne ongisi gba Ebhe, ongisi inde li siti 'ngu nde bhú o ade. Yi ngakobho bhú ka osisiti okpala na doto inde. Yi du bhú ka uo maka zi 'ke inde ngasu masu, <sup>16</sup> padha de, anga yi ngakpokpo pi uo eli na mukobho. Abhomu-o, li 'kpi li Kilisito ago lie, ma adu kala ani ne gindaginda kabula yi, anga bhobhomu-o asuno mbamba me kpeke kulu inde ma amene e bhú ka yi-e, ma mene padha de. <sup>17</sup> Engu bini, nabhuka gba yi-e, a ko makiso inde yi ngaha e pi Ebhe-o. I du me u nde abhele ma-a, bhobhomu-o du maka makiso gba ma inde ma a'o e pi bhende gba yi-o. I du mo-o, ma adu ne djali, ni tsia kpi djali ne ndu yi hana bhú dabili bini. <sup>18</sup> A ayo me ngayi di-e, yi du ne djali, amba yi kpi djali ne ma bhú dabili bini.

### *Polo atima Timote bhú Filipo*

<sup>19</sup> I du me Ngama Yesu nde akunda-a, ma ne 'to ma me ma tima Timote agba yi sunda 'kpi inde, ngubula me ani gie lie-e, ani de kpokpo ngali gba yi-e mama, amba ani teteke bua ma maka ani adji di nateteke bua yi lie-o. <sup>20</sup> Kpala koko ka ma ei ade inde ngabhundja maka ma, a ko bha bini ani. Ani a'o bua e kukulu li 'ngu gba yi-o. <sup>21</sup> Ndu okpala koko hana bha bini nga'o bua o li ngu gba o makpe, u bhundja bhende gba Yesu Kilisito-o de. <sup>22</sup> Timote makpe, yi mbila ndjindji me a ko bádha kpala. Ne ma ne ani-e, ya amene kulu nakpokpo Bádha Ngali. Ani ateteke ma bhú kulu ango-o maka li ndili ateteke 'dyi e lie-o. <sup>23</sup> Ma nga'o 'to ma

\* **2:8** 2:8 Nakpi ka e: Nani bhú nedhinga gba omaYuda-a, u adu bha nani nagi li kulusi ongbenge obhulu 'zi.

† **2:10** 2:10 Asa doto: A ngasuno kuti gba okpala inde amu.

me ma tima ani agba yi má gala, i dũ me u nde akodho 'ngú gba ma-a akodho-o. <sup>24</sup>Ma ne nabhuka me, i dũ me Ngámá nde akũnda-a, ngama di-e, ma anú agba yi oo má gala!

### *Polo agie Epafalodite bhú Filipino*

<sup>25</sup>Ndai ma Epafalodite inde yi atima nako e me ani go teteke ma li ndũ ongú bhende aneke ka ma-a, ya amene kulu ne ani bhú dabilì bini. Ya agũ egú ne ani bhú dabilì bini. La mbia inde-e, ma abhundja me a ndjindji me ma gie ani pi yi. <sup>26</sup>Ani ne gumũ naali me ni u matá ndũ yi hana. Bua ani adũ nako abhúlá, anga ani adje me yi ambila me adũ nako li ni ne kuo. <sup>27</sup>A na paká me a adũ nako li ani ne kuo masikpe de nakpi. La-a, Ebhe asuno bádha bhú 'bu gba e pi ani. Ebhe suno bha bini bádha bhú 'bu gba e pi ani de, ani asuno di mũma ngũbula me ma asia matá likabhu pí koko nane mane de.

<sup>28</sup>Kaka-a, bua ma alũ abhúlá má gba me ma gie ani pi yi, yi u matá ani, yi tsia kpi djali, amba mũma-a, bua ma tsia kũ. <sup>29</sup>Li ani akólo lie oo, yi de sia ani ne djali anga a ko ndai yi bhú 'bu Ngámá. A ayo me yi manga ngua okpála bhende maka ani-e mamanga, <sup>30</sup>anga ani di me kpi nako li tũla kulu gba Kilisito-o. Ani kpe kuo de, ani ateteke ma bhú da yi, maka a ayo nako lie me yi mene ngayi makpe, i dú me yi dú nako sii-o.

## 3

### *Lele nadũ ngbingbili kala Ebhe*

<sup>1</sup>Ondaise ma, 'li ma na soso pi yi-e ngae inde. Yi kpi djali anga yi ne okpála gba Ngámá. Ongú nako ma aye e pi yi kalanũ-o, ma matá bha ngayeye ne toto. Ndala li ma tété ade, la pi yi-e, a ngũbula nato masi bhú yi ne kalanũ. <sup>2</sup>Ma apa pi yi me, yi lila liyi ka okpála inde ngamene sisiti kulu-o malila. A ko obúlũ. U bha bini ngau ngbéngbé engú nato okpála bhú gandja. <sup>3</sup>Nganí-e, ní ne okpála inde ngakodho kũkũlũ gandja-a nganí, anga ní ngamene kulu liní pi Ebhe ne angu gba

Bu Bhobua . Ní ne gindaginda anga ní ne okpála ka Yesu Kilisito . Ní 'o bua ní li ongú inde ngayie ka okpála-a de.

<sup>4</sup>I dú me adũ li ongú ango-o ne tata-a, ma de a'ó di bua ma tété. I dũ me kpála bini nde abhundja me ni ti da na'o bua ni li ongú ango-o, ngama-a, ma ambila me ta na'o bua ma tété ane bhende gba ani-e mane. <sup>5</sup>Ngama-a, ma ne kũkũlũ Ebele, azu ma ne oEbele. Ma ne mafsalaele, bhú piga gba Bendjame. U azu ma lie, u ato ma bhú gandja pita 'kpí madjina.\* Li 'ngú bhende atsia líli gba omaYuda-a, ma nako ne mũFalisai . <sup>6</sup>Li 'ngú bhende atsia nakpata líli gba ní-e li lelele-e, ma adũ nako nato mbolo li omakilisito. Li 'ngú bhende atsia nadũ ngbingbili inde li u aye e bhú olíli gba ní omaYuda-a, ma akpata ndũndũ hana má kpøkøbhe, ma ti belegũ li sũsũka de bini.

<sup>7</sup>Ma adũ nako abhundja me ongú bhomũ-o ti da nateteke ma. La-a, kabula Kilisito, ma au ndũndũ hana padhá. <sup>8</sup>Ma au ndũ oehe inde adũ ka ma-a hana me tata tété ade. Padhá de, anga i dũ me ma nde ambila Ngámá gba ma Yesu Kilisito ndjindji-e, bhobhomũ-o ane mũma ne bádha ngae. Ma atse ndũ 'he hana kabula ani. Ma ngau ongú bhomũ-o bhú djila ma maka zibotũ ngũbula me ma sia Kilisito, <sup>9</sup>di ne me ma dũ libhomu hana pi ani. Ma pá matá de me ma ngbingbili kala Ebhe anga ma ngakpata líli gba omaYuda-a de. Ehe inde nga'o ma ngbingbili kala ani-e, a ko mangbo ma abhuka Kilisito lie-o. Ebhe amene ngae me ma kolo ngbingbili anga ma abhuka ani. <sup>10</sup>Ma akũnda bha koli 'he bini. Ma akũnda me ma mbila Kilisito, a la di-e me ma mbila angu inde azuku ani-o. Ma akũnda la di me ma zũ likabhu maka ani azũ nani lie-o. Ma tsia dũ bedhe ngú nakpi pi ani maka ani akpi nani lie mũma-o, <sup>11</sup>ngũbula me i dũ me Ebhe nde akũnda-a, ma de zuku di maka ani.

<sup>12</sup>Ma abhi 'kpa ma pí mbulu ma de me ma asia oehe bhomũ-o asia, di ne me ma akolo ali soso akolo-o de. Engú bini, ma ngamene ne kpéke me ma sia oehe bhomũ, anga Yesu Kilisito aholo 'kpa ma

\* 3:5 3:5 Pita 'kpí madjina: A akũnda napa me pita 'kpí mananika u azu ndili lie.

makpe ngae. <sup>13</sup> Ondaise ma, ngama-a, ma pa de me ma asia oehe bhomu-o asia de. Koli 'he bini inde ma ngamene e-e, a ko napa me ma 'ili 'to ma li ongu bhende akodho 'kpi akodho-o, amba ma mene ne kpeke me ma nu ne kalanu. <sup>14</sup> Ma ngagu holo ne kalanu ngubula me ma kolo li bili inde ma a'o bua ma lie-o, amba ma sia makala li Ebhe nga'i ni ngu e abhula, kabula engu inde li Yesu Kilisito amene e pi ni-o. <sup>15</sup> A ayo me, ngani obhende inde abhele li kpadji gba Ebhe-e abhele-e, ni du nabhundja moko. I du la me kpala koko nde ngabhundja kpi-e, Ebhe ambamba tata pi ani mambamba. <sup>16</sup> Belegu i du bha pi-ie, ni kpata bha kpadji inde ni akpata e nakolo pi mbia inde-e ko.

<sup>17</sup> Ondaise ma, ndu yi hana yi kpata nganda ma. Yi banga djila yi li okpala bhende ngadhuku maka ya apana lie pi yi ko. <sup>18</sup> Ma pa mo-o padha de, anga okpala bhele ngadholo maka obhulu yala gba Kilisito kabula nakpi ka ani li kulusi-o. Ma apa 'ngu bhomu-o pi yi bhutsibhutsi. La mbia inde-e, ma mata ngapapa ne ngula bhú djila ma. <sup>19</sup> Li 'so 'kpi-e, u anu bhú djua. Padha de, anga ebhe gba uo-o, a ko 'bu uo. Uo ne gindaginda li ongu inde a ayo me u dje numu li e-o. U bha bini ngabhundja ongu na doto. <sup>20</sup> La pi ni-e, kuti gba ni-e abhula. Ni ngadjeke Ngama gba ni Yesu Kilisito, inde di mukobho gba ni-e me ani yie abhula, amba ani go. <sup>21</sup> Ani ago lie, ani ayipa kute ni na mbolo inde-e me akolo maka kute ni na angu. Ani amene mo-o ne angu inde ani di ngako angu e pi ndu 'he hana ne e-o.

#### 4

<sup>1</sup> I du mo-o, ondaise ma na mukunda, yi lu kpekpeke bhú Ngama. Ma kunda yi naali, ma ne gumu me ma u mata yi. Ma ngakpi djali kabula yi, ma la di ne gindaginda kabula yi.

#### *Polo aha olili na soso*

<sup>2</sup> Kikiliako, Evodia ne Sitika, ma ayo ka yi me yi du ne guo 'ngu sunda yi, anga yi ne okpala gba Ngama. <sup>3</sup> Ma ayo di ka mu

ndai ma na mukunda, teteke olisi bhisi bhomu-o mateteke, anga ya amene kulu ne uo kpekpeke, ya atsia azu di likabhu ne uo bhú dabili bini ngubula Bada Ngali, di ne Kelema, a la di-e ndu ondaise ma koko hana inde ya amene kulu gba Ngama ne o ko. U aye ndu 'li uo hana bhú bhuku na mukobho.

<sup>4</sup> A ayo me yi kpi djali ndu 'kpi hana anga yi ne okpala gba Ngama. Ma mata ngapapa ne toto me, a ayo me yi 'kpi djali.

<sup>5</sup> A ayo me yi du ne bhuku bua pi ndu okpala hana. Yi mbila hana me Ngama ago mbia. <sup>6</sup> Bua yi aguku belegu ka 'ngu bini de, engu bini, yi yo mangbo ka Ebhe ndu 'he hana yi nde ne gumu e-o. Yi yo ani bhú nedhinga hana. Yi yo ani, amba yi gie heni pi ani. <sup>7</sup> I du me yi nde amene mo-o, li Ebhe ha guo 'ngu gba e inde ane ndu imbilangu hana-a pi yi. Guo 'ngu ango-o alila bhobua yi bhú dabili bini di ne mabhundja gba yi-e, anga yi ne okpala gba Yesu Kilisito.

<sup>8</sup> Ondaise ma, 'li ma na soso pi yi-e ngae inde: a ayo me yi mbila liyi ne nabhundja pindji obabadha ongu, li okpala atotoko e-o. A ko 'ngu inde li eu nde bhú e ade, engu inde ngbingbili, engu inde li zibotu nde bhú e ade. A ko 'ngu inde nganga li okpala, engu inde li lelele. <sup>9</sup> Ongu inde ma akpokpo e pi yi, inde yi aziba e, ongu inde yi adje e bhú 'bhe ma, yi au ma ngamene e-e, yi mene ongu bhomu. Abhomu-o, Ebhe indeahaha guo 'ngu pi ni-e du bhú dabili bini ne yi.

#### *Polo agie heni ngubula oehe inde u atima e pi ani-o*

<sup>10</sup> Ma ngakpi djali naali bhú Ngama anga yi amata abhundja ma. A na paká me yi adu nako nabhundja ma kalanu. Engu bini, kpadji du nako de me yi teteke ma-a de. Nedhinga ane la bhadi naali me yi nde teteke ma de. <sup>11</sup> Ma pa mo-o ka 'ili de me ma bhú ndibhili-e de. Padha de, anga ma ambila lima ne nagili nganda ma bhú ndu nedhinga hana. <sup>12</sup> Ma ambila lima ne nakobho bhú ndibhili, ma ambila di lima ne nakobho bhú nedhinga li ehe nde lie ka ma bhele. Ma ambila lima ne nandu ndjindji ne ndu bili hana, ne bhú

onedhinga hana, belegu li ehe nazu mazu du ka ma, belegu li nedhinga na gumu, belegu li ehe du ka ma bhelé, belegu ma du bhú ndibhili. <sup>13</sup> Ma ti da nakibila ndu ongu bhomu-o hana ka angu gba Yesu Kilisito inde bhú ma-o. <sup>14</sup> Belegu inde lie mo-o, yi amene ndjindji ngubula nateteke ma li nedhinga ma ngazu likabhu lie-o.

<sup>15</sup> Ondaise ma na gudhu na Filipoi, yi mbila hana me nedhinga ma abhuka nakpokpo Bádha Ngali lie bhú ndu doto gba yi na Makedonia-a, ateteke bha bini ma ne Dadjua gba yi-o. Dadjua koko bini ade inde ya amata 'kpa ya ne e. <sup>16</sup> Padhá de, anga ma adu lie bhú Tesalonike-e, yi atima ehe inde ma adu ne gumu e muma bhutsibhutsi. <sup>17</sup> A ko de me ma ngagili makalá-a de. Engu bini, ma ngagili mangbo me Ebhe suno bádha bhú 'bu gba e pi yi ane mane ka ohe yi ngapu e muma-o. <sup>18</sup> Ma asia ndu 'he hana inde yi atima e muma-a, ane belegu bhende ma adu ne gumu e-o. Li ma au oehe li Epafolodite ago muma ne e lie, ehe bini neke matá ka ma de. Oehe ango-o maka makiso inde u ahaha e pi Ebhe, inde li se e nde li Ebhe ndjindji, inde di nganga li Ebhe manga. <sup>19</sup> A ka Ebhe gba ma-a ne bhiti ehe na bhibhiti. Ani ahá pi yi ndu 'he hana yi nde ne gumu e-o. Ani ahá pi yi li kpadji gba Yesu Kilisito. <sup>20</sup> A ayo me u dhege Ebhe 'Dyi ní duduma ne duduma. A adu moko!

*Polo abhana lie pi omabhuka na Filipino*

<sup>21</sup> Yi yi ndu okpála hana inde li Yesu Kilisito abhu o me u du ne okpála gba ni-o. Ondaise ní ya nde ne o ei-e, yi di yi mayi. <sup>22</sup> Ndu omabhuka koko hana inde ei yi yi mayi, ane la mane obhende ngamene kulu bhú 'ti gba 'ngbé ngámá na LomaKaisala-o.

<sup>23</sup> A ayo me Ngámá Yesu Kilisito suno bádha bhú 'bu gba e pi yi.

## Balua gba Polo pi omabhuka na gudhu na Kolosai Eli na kalanu

Polo aye nani balua inde pi okpala na Dadjua na Kolosai, gudhu na Adji Minele ne Efeso. Dadjua ango-o, Polo 'o nani ngae de, la-a, adu nani bhú ndu doto inde li Polo adu atsia 'kpí lie ngae. Abhomu-o, ani atsia atima okpala na kulu nayie bhú Efeso, 'ngbé gudhu na ndu doto na ngámá gba okpala na Loma inde bhú Adji-o. Padhá de, anga Polo adje nani me omusuno na eu abhú Dadjua na Kolosai. Ta ngú nasuno ango-o adu me ngubula nambila Ebhe ne nandu ne mukobho na kukulu-o, a ayo nadhege obhelesi okpala koko di ne ongámási na Ebhe. La-a, omusuno bhomu-o apa me, a ayo naziba namene ongú koko maka nakodho gandja, amba u kpata li lelele ongú pindji oehe nazu mazú, ne pindji ongú koko.

Polo aye balua pindji nasuno na kukulu gba makilisito ngubula naboyo onasuno na eu ango-o ko. Engú na ngbéngbé ani agie e, a ko me Yesu Kilisito ne angu ngú naha mukobho na kukulu. La-a, omabhuka koko ne ndu ongú u ngamene e ngato bha kpala bhú ngita. Li pápá gba Kilisito, Ebhe abho doto. La di li pápá gba ani-e, Ebhe atsia agie ndu oehe na doto hana pi ani. Yi du bhú makpotse ne Kilisito de-e, mukobho dú pi okpala na doto de. Pipita-a, Polo ngapana mbámábá nasuno inde ngbéngbé inde pi omabhuka ngubula mukobho gba o-o.

Tisike inde anu ne balua gba Polo abhú Kolosai-e, adholo bhú dabili bini ne Onezime inde bali li Polo aye balua li 'ngú gba e pi Filemo-o.

**Ongbengbe ongú inde bhú bhuku inde-e ngae inde:**

Eli na kalanu 1:1-8

Mukobho gba Kilisito ne kulu gba e-o  
1:9 - 2:19

Mukobho na mbia bhú Kilisito 2:20 -  
4:6  
Eli na soso 4:7-18

*Polo yi omabhuka na gudhu na Kolosai mayi*

<sup>1</sup> Ngama Polo, ma ne bhulu titima gba YesuKilisito. Padhá de, anga Ebhe akunda ngae, a la die-e Timoté, ndai ní. Ya aye balua inde-e <sup>2</sup> pi okpala na bububu di na ngbingbili gba Ebhe inde bhú gudhu na Kolosai, ondaise ní na mukunda inde abhuka Kilisito. A ayo me Ebhe 'Dyi ní tuko bisagu pí yi, amba ani ha di guo 'ngú pi yi.

*Polo agie heni pi Ebhe*

<sup>3</sup> Ya ngagie heni pi Ebhe, 'Dyi Ngámá gba ní Yesu Kilisito ndu nedhinga hana ya ngayo Ebhe pi yi lie-o. <sup>4</sup> Padhá de, anga ya adje engú pindji nabhuka gba yi bhú Yesu Kilisito, di ne mukunda yi nde ne e pi ndu obubu okpala gba Ebhe-e hana-o. <sup>5</sup> Li ngali na kukulu 'ngú, inde Bádha Ngali akolo lie bhatsibhatsi na kalanu agba yi-e, yi atsia ambila 'ngú li engú inde li Ebhe awo e pi yi abhúla-o. Abhomu-o, nabhuka gba yi ne mukunda gba yi-e atsia alu pí engú inde yi nga'o 'to yi 'to e ango-o. <sup>6</sup> Bádha Ngali ango-o ngayangba, a la di ngazu nguwa píla doto libhomu. A amene bhadi pi yi moko li 'kpí inde yi adje engú lie pindji bádha bhú 'bu gba Ebhe-e lie-o, di ne yi ambila lie me bádha bhú 'bu ango-o kukulu-o. <sup>7</sup> Epafaladje, ndai ní na mukunda bhú kulu apa engú ango-o pi yi ngae. Ani ngamene kulu pi yi maka kpala na kulu na kukulu gba Kilisito. <sup>8</sup> Ani akpokpo 'ngú pi ya pindji mukunda inde li Bu Bhobua aha e pi yi-o.

<sup>9</sup> Kaka-a, nayie li ekpi ya adje engú gba yi-e lie-e, ya ndala li nayo Ebhe pi yi de. Ya la di ngayo ka Ebhe me ani ha imbilangu na kpokpo kú 'ngú inde ngayie ka Bu Bhobua gba ani-e pi yi. Abhomu-o, yi tsia mbila 'ngú inde ani akunda me yi mene e-o. <sup>10</sup> Yi tsia kóbho maka li Ngámá akunda lie-o. Yi tsia méne di ndu 'ngú hana inde ani akunda e-o. Yi méne ndu 'ngú na babadha hana, yi tsia mbila



Ebhe ndjindji. <sup>11</sup> Ya ngayo ka Ebhe me ani bedhe yi ne angu na asasaua gba e bhú ndu 'ngú hana, ngubula me yi kibila ndu 'ngú hana ne 'ndjá bua. <sup>12</sup> Yi gie heni pi 'Dyi ní Ebhe ne djali hana. Padhá de, anga ani aha angu pi yi ngú nasia tia inde ani awo e pi okpála gba e bhú kuti na mundeysi na zi 'ke-o. <sup>13</sup> Ani agbegbe ní bhú angu na biti, ani atsia a'o ní bhú kuti gba e na mundeysi gba Ndili gba e na mukunda-o. <sup>14</sup> Li pápá gba ani-e, Ebhe agbegbe ní bhú bali. Ani atsia ambu di li siti 'ngú gba ní-o.

*Lele maka li Yesu Kilisito nde lie, la di ne kulu gba e-o*

<sup>15</sup> Ebhe inde u ti da nau e de-e ngau lie bhú Kilisito.

A ko Ndili na kalanu,\*

inde di pí 'ndji ndu 'he hana li Ebhe abho e-o.

<sup>16</sup> Padhá de, anga Ebhe abho ndu 'he inde abhúlá ne bhende akuto-o hana li pápá gba ani:

oehe inde u ngau e,  
ne bhende u uu e de,  
osisiti bua inde ngau abhúlá, ne píla doto,  
inde la di ne angu.

Ebhe abho ndu 'he hana li pápá gba ani.

Ani abho la di ndu 'he ang-o hana pi ani.

<sup>17</sup> Kilisito bhú mukobho kala ndu 'he hana.

La di-e, ndu 'he hana inde bhú mukobho-o alu li kute ani.

<sup>18</sup> Ngaani-e, a ko 'ndji kute, inde Piga gba Ebhe-o.

Mukobho na mbia-a akpo lita e bhú ani, ani ne Ndili na kalanu-o ngae.

A ko kpála na kalanu inde u azuku e bhú ká okpála inde amu,

ngubula me ani du kpála na kalanu bhú ndu 'he hana ngae.

<sup>19</sup> Padhá de, anga Ebhe apa me ni adú ndu 'kpí hana bedhe má kpaka bhú Ndili gba ni-o.

<sup>20</sup> La di-e, ani agie nadjé lio ne ndu 'he hana li pápá gba Ndili gba e-o.

A na paká me li Kilisito atuko ngute e lie li kulusi-e,

ani agie nadjé lio ka Ebhe ne ndu 'he hana inde abhúlá,

di ne bhende píla doto-o.

<sup>21</sup> La ngayi-e, yi adu nani de Ebhe tsutsu. Yi adu obhulu yala gba ani ka ndu sisiti 'ngú hana inde yi adu abhundja e, di ne bhe yi adu amene e-o. <sup>22</sup> Engú bini, kabula nakpi inde li Ndili gba ani akpi e li kute e-e, Ebhe aholo matá nadjé lie ne yi. Ani amene mo-o ngubula me yi kolo kala ni bubu, amba yi adú bhú zibotu de, yi adú la di bhú siti 'ngú de. <sup>23</sup> Kaka-a, a ayo me yi lu kpekpeke bhú nabhuka. Yi ayie li kpadji na Bádha Ngali-e de, anga a ko ehe inde ní nga 'o 'to ní 'to e ko. Yi adje Ngali ang-o, u atsia akpokpo di pi ndu okpála hana. Ngama Polo, ma akolo kpála na kulu na Bádha Ngali ang-o.

*Polo ngadje likabhu, ani di ngagu gbele ngú omabhuka*

<sup>24</sup> Mbia inde-e, ma ngakpi djali ngú likabhu inde ma ngazu e ngubula yi ko. Padhá de, anga bhú kute ma-a, ma ngabedhe bhomu-o bho likabhu inde li Kilisito a neke e ngubula kute e, inde Piga gba Ebhe-o. <sup>25</sup> Ma akolo kpála na kulu na Piga gba Ebhe, nakpata lele kulu inde li Ebhe aha e muma ngubula yi-o. Ani aha muma kulu nakpokpo ngali gba e hana. <sup>26</sup> Ngali ang-o, a ko engú gba ani inde ani awo nani e bhutode pi ndu okpála hana. Engú bini, mbia inde-e, ani ambamba tata pi omabhuka gba e-o.

<sup>27</sup> Padhá de, anga Ebhe akunda nam-bamba ta engú gba e inde ani awo nani e mawo-o pi uo. A ko engú inde ndjindji naali, ne asasaua, inde ani aleke e pi ndu okpála hana. Engú ang-o ngae inde: Kilisito bhú yi, ani atsia apa pi yi ndjindji me yi alí bhú Asasaua gba Ebhe inde yi nga'o 'to yi 'to e-o. <sup>28</sup> Kaka-a, ya ngakpokpo ngali gba Kilisito pi ndu okpála hana. Ya ngagbele 'dje okpála ne naha líli pi uo ne imbilangú hana, amba kpála ne kpála bhele bhú nabhuka bhú nakpøtø lio ne Kilisito. <sup>29</sup> Kaka-a, ma ngamene kulu, ma la di ngagu gbele

\* **1:15** 1:15 Ndili na kalanu: A akunda napa me: ani adu nani bhú mukobho kala ndu 'he hana inde li Ebhe abho e-o.

ne angu inde ayie ka Kilisito, inde la di ngamene kulu bhú ma ne angu hana-o.

## 2

<sup>1</sup> Ma akunda me yi mbila ndjindji me gbele inde ma ngagu e ngú yi-e kpekpeke. Ma ngagu gbele ango-o pí okpála na Laodikia, la di pí okpála koko inde i u nga ma de-o. <sup>2</sup> Ma akunda me bua uo bedhe ne masi bedhe. U du bini bhú mukunda, u du la di ne djali hana bhú engú li imbilangú na kukulú-o ngaha e-o. U tsia ti da nambila engú gba Ebhe inde awo li e mawo-o. A akunda napa me, a ko Kilisito ngae makpe. <sup>3</sup> Ndu otia na imbilangú hana inde ayie ka Ebhe-e awo lie bhú ani. <sup>4</sup> Ma ngapa 'ngú bhomu-o, amba kpála bini apíte yi ne babadha eli na eu de. <sup>5</sup> Abana ma nde lie de yi tsutsu bhú kute-e, ma ne yi bhú dabili bini li bhobua. Ma la di ne djali ngú nau me agba yi-e, ndu 'ngú hana ngadholo li kúkú, yi alu la di kpekpeke bhú nabhuka bhú Kilisito.

*Yi lu kpekpeke bhú nabhuka inde u asuno e pí yi-o*

<sup>6</sup> A na paká me yi asia Yesu Kilisito maka Ngámá. Kaka-a, yi du bhú makpøtø ne ani. <sup>7</sup> Yi to sie yi bhú ani, mukobho gba yi du la di me a nde alu bhú ani. Yi du ndu 'kpí hana me yi nde alu kpekpeke bhú nabhuka, nakpata lele nasuno inde yi asia e-o. Yi bedhe ne nagie heni pí Ebhe.

<sup>8</sup> 'Ee! Yi lila liyi me kpála bini aholo yi li ekú ne obabadha oeli na eu, di ne imbilangú gba kpála-kuti de. Padhá de, anga a ngalu pí nasuno gba okpála, a di ngalu pí angu na obua na doto inde. A alu pí Kilisito de. <sup>9</sup> Padhá de, anga ndu 'ngú hana inde bhú Ebhe-e asia kute bhú Kilisito. A la di ngadu hana libhomu bhú ani. <sup>10</sup> Yi asia la di ndu 'ngú hana má kpekøbhe bhú Kilisito. Ngaani-e, ani ne angu pí 'ndji osisiti bua inde ngau, inde la di ne angu-o.

<sup>11</sup> Bhú nakpøtø liyi ne ani-e, yi ali gandja. Gandja ango-o, akodho ne 'kpa

kpála de. Engú bini, gandja ango-o ayie ka Kilisito, ngubula nagbegbe yi bhú 'ngú inde adu ato yi bhú siti 'ngú-o. <sup>12</sup> Padhá de, anga li yi asia batisimo lie-e, u azi yi bhú dabili bini ne Kilisito. Yi atsia azuku la di bhú dabili bini ne ani. Padhá de, anga yi abhuka angu gba Ebhe inde azuku ani bhú ká okpála inde amu-o.

<sup>13</sup> Nani kalanu-o, yi adu me yi nde amu li bhobua yi amu kabula siti 'ngú gba yi-o. Padhá de, anga yi adu me yi nde li gandja de. Yi adu la di omupagano. Engú bini, mbia inde-e, Ebhe amene me yi du bhú mukobho ne Kilisito. Ani ambu li sisiti 'ngú gba ni-e hana. <sup>14</sup> Ani abulu balu inde adu na'o 'ngú pí ní, inde adu di napa 'ngú li ní sisiti ka ongu inde u aye e bhúbhú-o. Ani abhøø engú ango-o li u abhi ani lie li kulusi-o. <sup>15</sup> Ka kulusi gba Kilisito-o, Ebhe a'e angu gba osisiti bua inde ngau, inde la di ne angu-o. Ani atsia asuno nayie ka uo mbámá maka okpála na 'kpú inde ngadhuku bhú galasisi li Ndili gba ani aha angu uo lie-o.

<sup>16</sup> Kaka-a, yi a'ó kpála bini de me ani 'o 'ngú pí yi pindji ezu inde yi nde ngazu e, di ne engu inde yi ngandji e, i du di-e pindji engú na anokomia, i du di-e ne epe inde akoto na mbia, di ne ekpí naguo de. <sup>17</sup> Ndu ongu bhomu-o hana ne kulu ongu na babadha inde ngago-o. Engú bini, engú na kukulú-o ne Kilisito. <sup>18</sup> Yi a'ó de me kpála bini 'o 'ngú pí yi-e de, okpála inde ngakpi djali bhú nakø lio ne kuto bhú namene ongu inde ngau lie mau-o de. La di ne bhú nayo oandjelu maka Ebhe-e, u ngaha lio pí ongu inde u ngau e-o. U abedhe ne 'ngbé 'ndji li tata nde lie ade, li mabhundja gba o na kpála-kuti ngatima me u mene e-o. <sup>19</sup> U ngayala nagbite lio li Kilisito inde maka endji na kute. Padhá de, anga kute ango-o libhomu ngasia angu ka Kilisito, a ngagbite la di lie bhú dabili bini maka li Ebhe akunda lie-o.

*Yi amu bhú dabili bini ne Kilisito, yi la di ngakobho bhú dabili bini ne ani*

<sup>20</sup> Li yi akpi lie bhú dabili bini ne Kilisito, yi atsia akoto bhú bali sakpa obua inde ngau pí doto-o, la ka ni yi ngamene

'ngú lie maka okpála na doto? Ka ni yi aziba lie me u ha olíli pi yi me: <sup>21</sup> mo ohá ehe inde-e de. Mo olé ehe inde-e de. Mo obú 'kpa m̄ tété de. <sup>22</sup> Angu na ndu 'he bhomu-o ngandjia hana má kpəkəbhə nedhinga li okpála ngamene kulu lie ne di-o. A bhomu-o olíli di ne nasuno gba okpála. <sup>23</sup> A na paká me olíli bhomu-o ngau lie maka bhende na imbilangu. Padhá de, anga a ngagama 'ngú pindji mayo gba okpála, di ne nakə lio ne kuto di ne namene kute o kpekpeke. Engú bini, olíli ango-o ne angu bini ade ngubula naha angu gumu na sisiti gba kute ní-o.

### 3

#### *Yi gili ongu inde abhúla*

<sup>1</sup> Yi azuku bhú dabili bini ne Kilisito. Kaka-a, yi gili ongu inde abhúla li bili li Kilisito adu lie li pá 'kpa na kokpa gba Ebhe-o. <sup>2</sup> Yi ha liyi libhому ngubula engú na abhúla. Yi adú ne naha liyi ngubula engú na pila doto inde-e de. <sup>3</sup> Padhá de, anga yi amu, mukobho gba yi atsia awo lie bhú dabili bini ne Kilisito bhú Ebhe. <sup>4</sup> Mukobho gba yi na kukulu-o ne Kilisito. La di-e, li ani asuno lie lie, yi azé bhadi ne uo bhú sangu-o bhú dabili bini.

<sup>5</sup> Kaka-a, yi bhələ ogumu na doto inde li bhobua yi-e mabhələ: a ko zabhe, zibotu, gumu kute, gumu na sisiti, gumu 'he inde maka nayo ebhe na eu-o. <sup>6</sup> Ongua ongu bhomu ngagbele ke 'ngú gba Ebhe-e pí okpála inde ngandjo 'li ani-e ngae. <sup>7</sup> A bhomu-o lele maka yi adu nani lie li nedhinga yi adu amene siti 'ngú lie-o.

<sup>8</sup> La mbia inde-e, yi bala ndu ongu bhomu-o hana: ndu bua, nake 'ngú lio, ne siti bua. Sobho ne siti 'li akoto bhú 'bhe yi de. <sup>9</sup> Yi apa eu sunda yi de, anga yi a'o ká mukobho gba yi na didili-e ne ndu 'ngú ango-o hana. <sup>10</sup> La di-e, yi akolo bhú mukobho na mbia, anga yi akolo okpála na mbia inde li Ebhe ngamene lie me u kolo maka ni Ebhe gba yi, amba u mbila ni ndjindji. <sup>11</sup> Kaka-a, mbia inde-e, angu napa me: a inde-e omaYuda, obhende ne omaYuda ade, a inde-e okpála ali gandja, obhende i li gandja de-e matá ade. Ogandji okpála, di ne obhende i

mbila lio ne nakobho ne okpála bhende bhú bali ade-e matá di ade. Obalise, ne okpála bhende bhú bali ade-e matá di ade. Engú inde pi ní ngbéngbé-e, a ko Kilisito, inde ale pi ní bhú ndu 'ngú hana.

<sup>12</sup> Yi ne okpála gba Ebhe. Ani abhu yi, ani la di ne mukunda pi yi. Kaka-a, a ayo me yi du ne ndjinga. Yi du ne bádha bua. Yi kə liyi ne kuto. Yi du ne guo 'ngú di ne 'ndjá bua. <sup>13</sup> Yi kibila liyi sunda yi makibila, amba yi du di ne mambu. Li kpála du ne engú ne kilí e-e, ani de mbu li ani maka Ngámá ambu nani li yi lie-o. <sup>14</sup> Bhú ndu 'ngú bhomu-o hana-a, yi du ne mukunda sunda yi, anga mukunda ne ekpú inde ngagbite yi bhú dabili bini. <sup>15</sup> A ayo me guo 'ngú gba Ebhe-e si kuti e li bua yi. Ebhe a'i yi kabula guo 'ngú ango-o me yi du bhú koli kute bini. Yi du okpála inde ngagie heni pi Ebhe. <sup>16</sup> A ayo me eli gba Kilisito ne obabadha ndu 'ngú gba ani-e hana adu li bua yi. Yi suno ongu sunda yi, amba yi ha la di líli sunda yi ne imbilangu hana. Yi li ndu oetsi hana pi Ebhe ne bua yi hana, di ne nagie heni pi ani. <sup>17</sup> Ndu 'ngú hana inde yi ngamene e, i du bhú nagama 'ngú, i du di-e bhú namene ehe-e, yi mene ne 'li ngámá Yesu, ne nagie heni pi 'Dyi ní Ebhe li pápá gba ani.

#### *Engú inde a ayo me omabhuka kpata e bhú mukobho na mbia-o*

<sup>18</sup> Ngayi olisi-e, yi manga obhosi gba yi-e mamanga maka a ayo lie me yi mene kala Ngámá-o. <sup>19</sup> Ngayi obhosi-e, yi du ne mukunda pi olisi gba yi-o. Yi aná bhúla yi pi uo de. <sup>20</sup> Ngayi ongisi-e, yi mene líli gba okpála inde azu yi-e bhú ndu 'ngú hana. Padhá de, anga a bhomu-o engú inde li Ngámá akunda e-o. <sup>21</sup> Ngayi odyi ongisi-e, yi adú nambembe bhú 'ndji ongisi gba yi-e de, amba bua uo asia ndala de.

<sup>22</sup> Ngayi obalise-e, yi mene líli gba omakulasi yi pila doto bhú ndu 'ngú hana. Yi améne bha bini li nedhinga u nde ngalila yi lie ngubula me u ziba yi-e de. Engú bini, yi mene líli gba uo-o ne bua bini kabula yi ngamanga Ngámá lie-o. <sup>23</sup> Bhú ndu 'ngú hana yi nde ngamene

e, yi mene ne bádha bua m̀gito me yi ngamemene pi Ngámá. A aú lie de me yi amene pi kpála de. <sup>24</sup> Yi mbila ndjindji me Ngámá ahá makalá pi yi maha. Yi asía bádha 'ngú inde aní a'o e pi okpála gba e masia. Padhá de, anga M̀suno na k̀k̀l̀u inde yi ngamene kulu pi e, a ko Kilisito. <sup>25</sup> Engú bini, kpála inde amemene siti 'ngú-o, asía makalá na siti 'ngú gba e-o. Padhá de, anga Ebhe gbogbo bh̀s̀u okpála de.

#### 4

<sup>1</sup> Ngayi omakulasi okpála-a, yi mene obalise gba yi-e ndjindji. Yi d̀u di pi uo ne ngbili 'ngú. Yi mbila ndjindji me ngayi-e, a di ka yi ne Mak̀la yi inde abh̀lá.

#### *Líli pi omabhuka*

<sup>2</sup> Yi gbite liyi li mayo. Yi d̀u li zuku bhú nayo Ebhe ne nagie heni pi aní. <sup>3</sup> Bhú mayo gba yi-e, yi yo Ebhe di pi ya, amba aní ha kpadji pi ya ngú nakpokpo eli gba aní, di ne nakpokpo engú inde awo\* lie bhú Kilisito-o. Padhá de, anga ma mbia inde bhú tikp̀u kabula 'ngú ango-o. <sup>4</sup> Yi yo ka Ebhe me ma kpokpo 'ngú li 'ngú inde awo lie bhom̀u, di ne me ma suno mbám̀bá maka a ayo lie-o.

<sup>5</sup> Yi dhuku bhú ká okpála inde ne omakilisito ade-e ne imbilangu, ne namene kulu ndjindji bhú nd̀u nedhinga gba yi-e hana. <sup>6</sup> A ayo me 'li yi d̀u nd̀u 'kpí hana ndjindji, ati la di li bua okpála. Yi mbila liyi ne nagie bádha 'li pi nd̀u okpála hana.

#### *Polo bhú dabili bini ne obi e yi omabhuka mayi*

<sup>7</sup> Tisiko akpókpo ngali gba ma pi yi ngae. A ko ndai ní na mukunda, a ko bádha kpála na kulu. A ko kpála na kulu na k̀k̀l̀u bhú dabili bini ne ma bhú kulu gba Ngámá-o. <sup>8</sup> Kaka-a, ma atima aní ngaani makpe agba yi ngú nakpokpo lele maka ya nde lie pi yi, di me aní to masi bhú yi. <sup>9</sup> U adhuku bhú dabili bini ne ndai ní na mukunda inde la di ngbingbili,

\* **4:3** 4:3 Engú inde awo lie: A ko ngali gba Ebhe inde u mbila nga nani e kalanu de-o. Ngali ango-o, a ko Kilisito.

† **4:13** 4:13 Ogudhu bhisi inde-e, a de gudhu na Kolosaí.

Onezime inde suka yi-o. U akpókpo nd̀u 'ngú inde ngakodho 'kpí ei-e pi yi hana.

<sup>10</sup> Alisitaluko inde bhú dabili bini ne ma bhú tikp̀u-o, yi yi mayi. A la di-e Maloko, dhongba gba Balanabasi-o. Yi adje engú pindji Maloko adje, i d̀u me aní nde anu agba yi oo, yi de sia aní ndjindji. <sup>11</sup> Yesu, inde u agisila 'li e me Djusitusi-e, yi di yi mayi. Bhú ká omaYuda inde abhuka-a, a ko bha bini okpála bata bhom̀u, inde ngamene kulu bhú dabili bini ne ma ngubula Nau gba Ebhe-o. U ateteke ma naali.

<sup>12</sup> Epafalasi, inde di ne suka yi-e, yi yi mayi. Ngaani inde kpála na kulu gba Yesu Kilisito-o, ndala li nayo Ebhe pi yi de. Aní ngayo Ebhe me yi d̀u omakilisito na k̀k̀l̀u, amba yi mene la di nd̀u 'kpí hana engú inde li Ebhe akunda e-o. <sup>13</sup> Ma ti da napa li aní pi yi me, aní ngadje likabhu naali pi yi, pi okpála na gudhu na Laodikia di ne pi obhende na Yelapolisi.† <sup>14</sup> Luka, mutia gba ní na mukunda, di ne Demasi yi yi mayi.

<sup>15</sup> Yi yi ondaise ní na Laodikia di ne obhende na Nimifia bhú dabili bini ne Dadjua gba Ebhe inde bhú 'ti gba aní-o. <sup>16</sup> I d̀u me yi nde atanga balua inde-e, yi de tima pi omabhuka na Dadjua na Laodikia, amba yi tanga di balua inde ayie ka uo oo-o. <sup>17</sup> Yi pa pi Alukipo me: «Mene kulu gba Ngámá inde u a'o e sakpa mu-o ndjindji.»

<sup>18</sup> Ma aye engú nayi yi bhom̀u-o ngama ne 'kpa ma makpe. Ma ayi yi mayi. Yi a'li 'to yi de me ma bhú tikp̀u-o de. A ayo me bádha bhú 'bu gba Ebhe-e d̀u bhú dabili bini ne yi.

## **Balua na bini gba Polo pi omabhuka na gudhu na Tesalonike Eli na kalanu**

Tesalonike ne 'ngbé gudhu ngámá gba okpála na Loma na Makedonia-o. Polo a'o nani Dadjua gba Ebhe oo pita nayie ka ani bhú Filipoi-o. Má gala kolo me-e, omaYuda adu ne botolo u atsia adu agu ani. Padhá de, anga engú gba Kilisito inde li Polo adu akpokpo e adu anu bha ne kalanu bhú ká okpála inde ne omaYuda ade inde aziba engú na Ebhe gba omaYuda-o. Kaka-a, Polo ayie bhú gudhu na Tesalonike ani akodho 'kpí bhú gudhu na Beloya. Pita ani akolo lie bhú gudhu na Kolito-o, Polo asia ngali ka kilí e Timoté inde u adu amene kulu ne e-e, pindji mukobho na Dadjua gba Ebhe inde abhú gudhu na Tesalonike-o.

Polo aye balua na kalanu pi omabhuka na Tesalonike ngú nato masi di ngú nake bua omakilisito kuto. Polo atsia asia nedhinga bhomu ngú napa pi uo me u du bha namene kulu me u nde a'o bua o kuto me u nde ne 'to o 'to nago gba Kilisito-o.  
**Ongbengbe ongú inde bhú bhuku inde-e ngae inde:**

Eli na kalanu 1:1

Nagie heni ne natoko 1:2 - 3:13

Líli ngú mukobho gba makilisito 4:1-12

Olíli pindji nago gba Kilisito 4:13 - 5:11

Nato masi na soso 5:12-22

Eli na soso 5:23-28

*Polo ne obi e yi omabhuka na gudhu na Tesalonike mayi*

<sup>1</sup> Ngayi omabhuka na Dadjua gba 'Dyi ní Ebhe, di ne Ngámá gba ní Yesu Kilisito na gudhu na Tesalonike-e, ya yi yi mayi. Ma aye balua inde-e ngama Polo bhú dabili bini ne Silivano di ne Timoté. A ayo me bádha bhú 'bu ne guo 'ngú gba 'Dyi ní Ebhe di ne Ngámá gba ní Yesu Kilisito-o du ne yi bhú dabili bini.

*Mukobho di ne nabhuka gba okpála na Tesalonike*

<sup>2</sup> Ya ngagie heni pi Ebhe piko ngubula ndu yi hana. Ya la di ngabhú 'li yi ndu nedhinga hana ya ngayo Ebhe lie-o. <sup>3</sup> Nedhinga ya ngayo Ebhe lie, ya ngagie heni pi Ebhe 'Dyi ní ndu nedhinga hana li ongú inde: yi ngamene kulu pi Ebhe anga yi abhuka Yesu, yi ngateteke okpála anga yi ne mukunda pi uo, yi alu kpekpeke bhú nabhuka gba yi nedhinga u ngato mbolo li yi lie, anga yi ngabhuka me Ngámá gba ní Yesu Kilisito agie lie magie.

<sup>4</sup> Ondaise ya, ya di ngagie heni pi Ebhe, anga ya ambila ndjindji me Ebhe akunda yi, ani atsia abhu di yi ngú nadu piga gba e makpe. <sup>5</sup> Padhá de, anga nedhinga ya adu lie agba yi-e, ya kpokpo bha bini Bádha Ngali pi yi ne 'li ya de, engú bini, ya akpokpo Bádha Ngali ango-o bhú dabili bini ne angu di ne Bu Bhobua . Ya adu ambila di ndjindji me engú inde ya adu apa e adu kukulu 'ngú. Yi mbila ndjindji lele maka ya adu nadu lie bhú ká yi ngubula me yi du ndjindji-o.

<sup>6</sup> Ngayi-e, yi asia Eli gba Ebhe-e ne djali inde ngayie ka Bu Bhobua, abana u adu ato mbolo li yi lie-o. Abhomu-o, yi amene 'ngú maka ya amene lie di ne maka li Ngámá gba ní Yesu Kilisito amene lie-o. <sup>7</sup> Kaka-a, yi akolo pi ndu omabhuka hana na ndu doto na Makedonia di ne Akai okpála inde li okpála koko ngakpata nganda o.

<sup>8</sup> Mbia inde-e, Eli gba Ngámá-a yangba bha bini nayie agba yi bhú ndu doto na Makedonia ne Akai de, engú bini, ngali pindji nabhuka gba yi bhú Ebhe-e ayangba di ne ndu bili hana. Kaka-a, ya matá ne gumu napa 'ngú gba yi-e pi okpála ade. <sup>9</sup> Padhá de, anga ndu uo hana ngakpokpo 'ngú pindji maka yi asia ya lie nedhinga ya akolo lie agba yi-o. U di ngakpokpo maka yi a'o nakpata oebhe na eu lie ngubula naha liyi pi Ebhe na kukulu inde na mukobho-o. Mbia inde-e, yi ngamene kulu liyi pi ani. <sup>10</sup> U di ngakpokpo me yi ngadjeke me Yesu, Ndili gba Ebhe-e yie abhúlá, go píla doto. A ko pála inde li Ebhe azuku e bhú ká

okpála inde amu, aní ngagbegbe ní bhú mangimbo li Ebhe akódho 'ngú lie-o. Ekpí nakodho 'ngú ango-o akolo masikpe.

## 2

### *Kulu gba Polo bhú gúdhú na Tesalonike*

<sup>1</sup> Ondaise ya, ngayi makpe-e, yi mbila ndjindji me enú ya anu e agba yi-e, adu enú na padhá padhá de. <sup>2</sup> Yi mbila la di ndjindji me, kalanu-o, u ato ngaiza mbolo li ya, ya atsia azu di likabhu bhú gúdhú na Filipoi. Engú bini, Ebhe gba ní-e atsia ato masi bhú ya ngubula me ya kpokpo Bádha Ngali gba ní-e pi yi, belegu u adu ale nani kpadji pi ya lie-o. <sup>3</sup> Padhá de, anga e'i inde ya nga'i okpála lie me u ziba Bádha Ngali-e, a ko eu de, a ko di kabula gumu na sisiti de, ya gili la di napite kpála bini de. <sup>4</sup> Engú bini, ya ngakpokpo Bádha Ngali anga Ebhe ale ya, aní atsia au me ya ti da nakpokpokpo li lelele. Abhomu-o, aní atsia aha Bádha Ngali ango-o pi ya me ya kpokpo pi okpála koko. Ya gili nanga li okpála de, ya ngagili mangbo nanga li Ebhe inde ngale bua ní ngú nambila engú inde bhúbhú-o.

<sup>5</sup> Yi mbila ndjindji me ya du apa 'ngú ka djila kpála 'kpí bini de. Ya pa di obabadha 'li ngú nasia ehe bini de. Ebhe apa bhobhomu-o li ya ngae. <sup>6</sup> Ya gili de me okpála dhogé ya-a de, abana i du yi, abana i du di okpála koko. <sup>7</sup> A ayo nako me ya du bhú ká yi maka ongbengbe okpála, anga ya ne obhulu titima gba Kilisito. Engú bini, ya adu bhú ká yi me ya nde abedhe ne bhuku 'ngú maka 'hi ongisi inde ngaku ongisi gba e.

<sup>8</sup> Ya kunda yi naali. Kaka-a, ya du bha bini bedhe de ngú nakpokpo pi yi Bádha Ngali gba Ebhe, engú bini ya adu bedhe ngú nateteke yi ne ndu kpadji hana, anga yi akolo kpúkpú na bua ya. <sup>9</sup> Ondaise ya, yi bhundja nga kulu di ne ndala gba ya-o. Nedhinga ya adu akpokpo Bádha Ngali gba Ebhe-e lie pi yi-e, ya amene kulu ngbikpi ne sukpe ngubula me ya adhá bhú kpála bini bhú ká yi de. <sup>10</sup> Yi apa li ya ngayi, li Ebhe tsia pá di li ya ngae me,

nedhinga ya adu lie bhú ká yi omabhuka-a, ya amene engú inde nganga li Ebhe, engú na ngbingbili, engú inde li okpála pá siti 'ngú li ya ka e de. <sup>11</sup> Yi mbila la di ndjindji me ya amene pi kpála bini bini bhú ká yi maka li 'dyi ongisi amemene pi ongisi gba e makpe lie-o. <sup>12</sup> Ya ato masi bhú yi, ya atsia apa di pi yi ne kekele me yi dholo maka li Ebhe akunda lie. Ngaani-e, aní nga'i yi me yi li bhú Nau gba ni, di me yi sia sangu gba ni-o.

<sup>13</sup> La di-e, ya ngagie heni pi Ebhe ndu 'kpí hana, anga yi asia eli gba Ebhe inde ya akpokpo e pi yi-e lie, yi aziba me a ko 'li okpála de. Engú bini, yi aziba me a ko eli gba Ebhe na paká, eli inde di ngamene kulu bhú yi okpála inde abhuka-o. <sup>14</sup> Ondaise ya, engú inde akolo li yi-e maka engú inde akolo li okpála abhuka Yesu Kilisito bhú oDadjua gba Ebhe bhú ndu doto na Yudaya-o. Padhá de, anga yi azu likabhu bhomu-o sakpa ondaise yi makpe na kuti bini maka u azu di lie sakpa omaYuda-o. <sup>15</sup> Ngauo-o, u abhelo Ngámá Yesu di ne opolofeta gba Ebhe, u atsia ato di mbolo li ya. U nga li Ebhe di ne li okpála de. <sup>16</sup> Padhá de, anga u ngamene ne kpéke me o ni kpadji pi ya me ya akpokpo Bádha Ngali pi okpála inde ne omaYuda ade-e de, ngubula me u akóbho de. U ngamene lie mo-o, u ngabe ndu siti 'ngú gba o ndu 'kpí hana. La ali soso-o, ke 'ngú gba Ebhe-e atí pi uo.

### *Gumu gba Polo ngú nau omabhuka na Tesalonike*

<sup>17</sup> Ondaise ya, pi ya-a, pita nedhinga bedi ní agbo bhusu ní lie ne yi bhú kute, bua ní nde bha ne yi bhú dabili bini-e, ya amene ne kpéke hana me ya nu u yi, anga ya adu ne gumu naali me ya u matá yi. <sup>18</sup> Ya adu ne gumu me ya gie liya agba yi. Ngama Polo, ma ale bhutsibhutsi. La-a, Satana ani kpadji pi ya. <sup>19</sup> A ko paká. Ta na'o 'to ya 'to Ngámá-a, a ko yi. Ta djali gba ya-a, a ko yi. Nedhinga li Ngámá gba ní Yesu Kilisito agó lie, yi adú pi ya maka ndata na ngámá inde u ahaha e pi okpála inde agboko 'gú-o. Ya tsia dú kala aní ne

gindaginda. <sup>20</sup> A moko, ya ne gindaginda kabula yi, ya la di ngakpi djali kabula yi.

### 3

<sup>1</sup> Abhomu-o, i nde lie me ya nde ti da nako nakibila nagbo bhusu ni ne yi de-e, ya au ndjindji me ya tigala bhú gudhu na Atene titi ya, <sup>2</sup> amba ya tima ndai ni Timote agba yi mada ya. Ani ngamene kulu bhú dabili bini ne Ebhe ngu nakpokpo Bádha Ngali gba Kilisito-o. Ya atima ani me ani be ndu nabhuka gba yi, amba ani tsia to di masi bhú yi, <sup>3</sup> ngabula me suka yi bini a'ó ká nabhuka gba e ka olikabhu yi ngazu e mbia inde-e de. Padhá de, anga ngayi makpe-e, yi mbila ndjindji me Ebhe aziba ngae me ni zu ngua likabhu bhomu. <sup>4</sup> A na paká me, nedhinga ya adu lie agba yi-e, ya adu apa pi yi me okpála ató mbolo li ni. Yi mbila me, a la bhadi ngae inde akolo li yi inde. <sup>5</sup> Li ma au lie me ma ti matá da nagbite bua ma de-e, ma atsia atima Timote me ani nu tsia lele nabhuka gba yi-o. Ma atima ani, anga ma adu akpe me djabulu alé yi de, di me kulu gba ya inde ya amene e bhú ká yi-e, akólo padhá de.

*Polo asia angu li bua e ka nabhuka gba okpála na Tesalonike*

<sup>6</sup> Engu bini, Timote akolo li ya mbia inde-e bhú 'nu ani ayie lie agba yi-o. Ani apa pi ya bádha ngali me yi alu kpekpeke bhú nabhuka di me yi ne mukunda sunda yi. Ani apa di pi ya me yi ngabundja ya ndu 'kpí hana ne bádha bua, yi la di ngakunda me yi u matá ya maka ya ngakunda di lie me ya u yi-o. <sup>7</sup> Ondaise ya, ka nadje engu li Timote apa e pi ya-a, abana ya ngazu likabhu di ne u ngato mbolo li ya lie, ya asia angu li bua ya ka yi. Padhá de, anga ya adje me yi ngalila nabhuka gba yi bhú Yesu-o ndjindji. <sup>8</sup> Mbia inde-e, ya abi matá angu, anga yi alu kpekpeke bhú nabhuka Ngámá. <sup>9</sup> Ya ti da nagie heni pi Ebhe lele pi ka ngua djali ya abedhe ne e li 'ngu gba yi kala ani-e? <sup>10</sup> Ngbikpi ne sukpe, ya

ngazi kekele li nayo Ebhe me ani mene me ni u matá liní ne yi, amba ya bedhe 'bhe 'he inde aneke bhú nabhuka gba yi-o.

<sup>11</sup> A ayo me Ebhe 'Dyi ni ngae makpe, di ne Ngámá gba ni Yesu bhulu kpadji pi ya li pápá gba yi. <sup>12</sup> A ayo me Ngámá be ndu mukunda yi nde ne e sunda yi di ne bhe yi nde ne e pi ndu okpála hana li lele mukunda ya nde di ne e pi yi ko. <sup>13</sup> A ayo me ani ha di angu pi yi li bua yi, amba yi du bubu, amba 'Dyi ni Ebhe au siti 'ngu napapa li yi de, bhú nedhinga li Ngámá gba ni Yesu agó lie bhú dabili bini ne okpála na bububu gba e hana-o. [A adu moko.]

### 4

*Nadu bhú mukobho inde ngaha djali pi Ebhe*

<sup>1</sup> Ngu nabu tata-a, ondaise ya, ya asuno pi yi lele maka ayo lie me mukobho gba yi-e ha djali pi Ebhe-o. A na paká me yi la bhadi ngamemene moko. Ya la ngayo ka yi di ne nakikiliki liya pi yi ne 'li Ngámá Yesu me, yi nu matá ne di ne kalanu ane bhende yi ngamene e ko. <sup>2</sup> Padhá de, anga yi mbila olili inde ya aha e pi yi bhú nasuno inde ya asuno e pi yi ne 'li Ngámá Yesu-o hana. <sup>3</sup> Ebhe akunda me yi du bubu ngu nasuno me yi libhomu pi ni. A akunda napa me, yi adu akunda olisi di ne obhosi ngangá de, <sup>4</sup> kpála bini ne bini bhú ká yi mbila nalila kute e\* me adu bubu da napa me u manga yi.

<sup>5</sup> Yi a'ó de me gamu kute ha angu yi maka li omupagano inde i mbila Ebhe de-e ngamemene lie de. <sup>6</sup> Bhú engu bhomu-o, a ayo de me kpála bini mene siti 'ngu li pá bili gba kilí e de. Ani apite la di ani de. Ya agbele nako 'dje yi tété kpekpeke me, Ngámá a'ó 'ngu pi okpála inde ngamene ngua 'ngu bhomu. <sup>7</sup> Padhá de, anga Ebhe 'i ni ngu nadu bhú zibotu de, ani a'i mangbo ni ngu nadu bubu kala ni. <sup>8</sup> Kaka-a, kpála inde ngandjo lili bhomu-o, ani ndjo kpála bini de, ani ngandjo mangbo Ebhe inde ngaha Bu Bhobua gba e pi yi-o.

\* 4:4 4:4 Nambila nalila kute o: A akunda napa me u manga yi. U ti da napa di li bili inde-e me: «Naha lio li lelele.»

<sup>9</sup> Pindji 'ngú bhe atsia mukunda sunda yi-e, yi ne gumu ade me ya ye engú pi yi pépé-e de. Padhá de, anga ngayi makpe-e, Ebhe asuno pi yi lele maka a ayo lie me yi kunda liyi-o. <sup>10</sup> A ko la bhadi koli mukunda bini inde yi ngasuno e pi ondaise ní hana na ndu doto na Makedonia-o. La-a, ya ngayo ka yi me yi nu ne di ne kalanu. <sup>11</sup> La di-e, yi du nadu ne guo 'ngú sunda yi. Yi adú ali bhú 'ngú bhe i tsia yi de-e de. Yi du amene kulu ne 'kpa yi makpe ngubula mukobho gba yi-e maka ya apa nako pi yi lie ko. <sup>12</sup> Yi mene mo-o, li omupagano mangua yi, yi dhá la di bhú kpála bini de.

### *Nagie lie ka Ngámá Yesu*

<sup>13</sup> Ondaise ya, ya akunda me yi mbila kukulu 'ngú pindji engú gba okpála inde amu, ngubula me yi adú ne likabhu maka okpála bhende i bhuka de-e de. Padhá de, anga pi uo-o, pita nakpi-e, okpála amu-o zúku de. <sup>14</sup> Ní abhuka me Yesu akpi, ani atsia azuku. Ní abhuka bhadi moko me Ebhe apó bhúla okpála inde amu me u nde abhuka Yesu-o bhú dabili bini ne ani.

<sup>15</sup> A inde-e engú ya ngapa e pi yi maka li Ngámá asuno lie me, li 'kpi nago ka ni-e, nganí okpála bhende adú nga nu-o, ní kódhó 'kpi kala okpála inde amu-o de. <sup>16</sup> Padhá de, anga Ngámá ayie abhúla ngae makpe ngú nako píla doto. Li nedhinga ango-o, ani há líli kpekpeke, li ngámá gba oandjelu-o bini tsia súla, li toti gba Ebhe 'ú lie. Abhomu-o, li okpála inde amu me u nde abhuka Kilisito tsia zúku ngaiza kalanu ngao. <sup>17</sup> Pipita-a, nganí okpála bhende adú bhú mukobho li nedhinga bhomu-o, Ebhe a'é ní bhú ndindi bhú dabili bini ne obhende azuku-o ngubula me ní nu ke liní ne Ngámá abhú 'kpi. Abhomu-o, ní tsia dú bhú dabili bini ne Ngámá duduma ne duduma. <sup>18</sup> Kaka-a, yi teteke liyi sunda yi ne oeli bhomu.

## 5

<sup>1</sup> Ondaise ya, li bhende atsia ekpi li Yesu

agie lie lie, yi ne gumu ade me u ye 'ngú pi yi pépé-e de. <sup>2</sup> Padhá de, anga yi mbila ndjindji me ekpi nago ka Ngámá-a akoto li ní bhú gbilikiti maka bhulu 'zi agogo lie sukpe me 'to kpála nde 'to ani ade-o. <sup>3</sup> Nedhinga li okpála apa lie me: «Egú ade, ní bhú guo 'ngú-o», a la bhomu-o nedhinga li likabhu atí pí uo lie má kii-o. A atí pí uo maka kuo nazu ká bhú 'bu ele na 'bhi adhidhika lie-o. Likabhu ango-o néke uo de.

<sup>4</sup> Engú bini, ngayi ondaise ya-a, yi bhú biti ade. Kaka-a, ekpi ango-o koto li yi bhú gbilikiti maka bhulu 'zi agogo lie de. <sup>5</sup> Ma apa pi yi mo-o, anga ndu yi hana yi ne okpála na zi 'kpi, yi la di ne okpála na ngbikpi. Ní ne okpála na sukpe ade, ní la di ne okpála na biti ade. <sup>6</sup> Kaka-a, a ayo de me ní du tila maka okpála koko-o de. Engú bini, a ayo me ní du li zuku, amba ní du bedhe ndu nedhinga hana. <sup>7</sup> Padhá de, anga obhulu nala ela, lala sukpe, obhulu nalangba, lalangba sukpe.

<sup>8</sup> Engú bini, nganí okpála na ngbikpi-e, a ayo me ní du bedhe ndu nedhinga hana. Ní ha nabhuka ne mukunda maka kopí. Ní abhuka me Yesu akobho ní makobho. Kaka-a, ní lila mabhundja bhomu-o maka ndata li osudha atoto e\* ngú nalila lie bhú 'gú-o. <sup>9</sup> Padhá de, anga Ebhe 'i ní ngú nasia ke 'ngú gba e de. Engú bini, ani a'i ní me ní sia mukobho li kpadji gba Ngámá gba ní Yesu Kilisito . <sup>10</sup> Yesu akpi pi ní ngubula me abana i du me ní nde nga bha tété, ne me ní mu-o, nedhinga ani agie lie lie, ní de du bhú mukobho bhú dabili bini ne ní. <sup>11</sup> Kaka-a, yi to masi bhú yi sunda yi, amba yi tsia teteke liyi bhú nabhuka maka yi nde ngamemene lie-o.

### *Polo aha olíli na soso*

<sup>12</sup> Ondaise ya, ya ngayo ka yi me yi du ne mazima pi obhende ngamene kpeke kulu bhú ká yi, inde li Ebhe a'o o me u du alu kala yi, inde di ngaha líli pi yi-o. <sup>13</sup> Yi du pi uo ne mazima di ne mukunda naali ka kulu gba uo-o. Yi du ne guo 'ngú sunda yi.

\* 5:8 5:8 Ndata li osudha atoto e: A ko ndata na kalase inde li osudha atoto e ngú nalila 'ndji o bhú 'gú-o.



<sup>14</sup> Ondaise ya, ya ngayo ka yi me yi gbele 'dje okpála bhe na ipio-o. Yi to masi bhú obhende ne tsulu-o. Yi teteke obhende bhúbhuku-o. Yi da ne 'ndjá bua pi nda okpála hana. <sup>15</sup> Yi lila liyi me kpála bini agie siti pi siti de. Engú bini, yi gili namene bádha 'ngú sunda yi nda 'kpí hana, di ne pi nda okpála hana.

<sup>16</sup> Yi da ne djali nda 'kpí hana. <sup>17</sup> Yi zi kekele li nayo Ebhe. <sup>18</sup> Yi gie heni pi Ebhe li nda 'ngú hana, anga a bhomu-o engú inde li Ebhe akunda me yi mene e bhú mukobho gba yi bhú Yesu Kilisito-o.

<sup>19</sup> Yi aní kpadji li kulu gba Bu Bhobua-a de. <sup>20</sup> Yi andjó 'li opolofeta de. <sup>21</sup> Engú bini, yi gili 'ngú pindji nda 'ngú hana, amba yi dhedhe li bhe na babadha-o. <sup>22</sup> Yi lila liyi ka nda osisiti 'ngú hana.

<sup>23</sup> A ayo me Ebhe ngae makpe inde bhulu guo 'ngú-o mene me yi da libhomu pi ni. Aní lila 'lá yi libhomu, ne bua yi, ne mukobho gba yi, ne kute yi me okpála aú engú na sisiti napapa li yi de, akólo li 'kpí li Ngámá gba ní Yesu Kilisito agie lie lie-o. <sup>24</sup> Ebhe inde nga'i yi-e améne me yi da libhomu pi ni, anga aní memene nda 'ngú hana inde aní apapa e-o.

<sup>25</sup> Ondaise ya, yi yo di Ebhe ngú ya.

<sup>26</sup> Yi yi nda ondaise ní hana ne nakama uo li kute yi.

<sup>27</sup> Ma ayo ka yi ne 'li Ngámá me, yi tanga balua inde-e pi nda ondaise ní hana.

<sup>28</sup> A ayo me bádha bhú 'bu gba Ngámá gba ní Yesu Kilisito-o da ne yi bhú dabili bini.

## Balua na bhisí gba Polo pí omabhuka na gudhú na Tesalonike Eli na kalanú

Li nadje lio de-e pindji nago gba Kilisito adu lie agbe tolo bhú Dadjua gba Ebhe na Tesalonike-e, Polo atsia aye balua na bhisí gba e inde-e pindji nabhuka inde me ekpí nago gba ngámá-a akolo. Aní atsia apa me a mo-o ade, do aní de-e, kala nago ka Kilisito-o, engú nasisiti di ne bhe nato mbolo lí okpála-a, inde ayie ka kpála na tsulutsulu u a'i me «Bhulú yala» adú naali ané mane (2:3). Kpála ango-o adú naga Kilisito.

Polo ngapa pí okpála i ngatanga balua inde-e me, u lu bha kpekpeke bhú nabhuka, abana okpekpeke da 'ngú ne olikabhu du bha pi-ie, u du bha namene kulu ngubula nasia mukobho maka lí Polo ne obi e ngamemene lie-o, amba u du ne 'ndjá bua ne namene bádha 'ngú.

### **Ongbengbe ongú inde bhú bhuku inde-e ngaie inde:**

Eli na kalanú 1:1-2

Natoko ne nadhөгө 1:3-12

Líli pindji nago gba Kilisito 2:1-17

Engú inde a ayo ngubula mukobho gba makilisito 3:1-15

Eli na soso 3:16-18

### *Polo ne obi e yi omabhuka na gudhú na Tesalonike mayi*

<sup>1</sup> Ngayi omabhuka na Dadjua gba 'Dyi ní Ebhe di ne Ngámá gba ní Yesu Kilisito na gudhú na Tesalonike-e, ya yi yi mayi. Ma aye balua inde-e ngama Polo, bhú dabili bini ne Silivano di ne Timoté. <sup>2</sup> A ayo me bádha bhú 'bu ne guo 'ngú gba 'Dyi ní Ebhe di ne Ngámá gba ní Yesu Kilisito-o du ne yi bhú dabili bini.

### *Polo agie heni pí Ebhe, aní atsia ato masi bhú omabhuka*

<sup>3</sup> A ayo me ya gie heni pí Ebhe ndu 'kpí hana ngubula yi ondaise ya. A la bhadi ndjindji me ya mene moko, anga nabhuka

gba yi-e nganu ne kalanu naali. La di-e, mukanda lí ndu yi hana nde ne e sunda yi-e nganu ne kalanu. <sup>4</sup> Kaka-a, ya ngapa 'ngú gba yi-e ne gindaginda bhú oDadjua gba Ebhe kabula kekele di ne nabhuka gba yi, abana u ngato mbolo lí yi lie di ne yi ngazu likabhu lie ne ndu kpadji hana-o.

<sup>5</sup> Bhobhomu-o ngasuno me Ebhe ngakodho 'ngú ngbingbili. Padhá de, anga ka olikabhu inde yi ngazu e-e, Ebhe aú me yi ati ne nali bhú Nau gba ni inde yi ngazu likabhu ngú e ko. <sup>6</sup> Lí Ebhe nde lie ne ngbili kpála-a , aní agie olikabhu pí okpála inde i ngaha likabhu pí yi ko.

<sup>7</sup> La di-e, aní ahá guo 'ngú pí yi okpála inde ngadje likabhu, aní tsia há di guo 'ngú pí ya. Aní améne ongú bhomu-o lí 'kpí lí Ngámá gba ní Yesu ayie lie abhúlá, aní tsia gó bhú dabili bini ne oandjelu na angu gba e-o. <sup>8</sup> Aní agó bhú dingidhi djua ngubula na'o 'ngú pí okpála inde i kunda nambila Ebhe de, inde ngayala di naziba Bádha Ngali gba Ngámá gba ní Yesu-o. <sup>9</sup> Makalá na siti 'ngú gba uo-o, adú likabhu na duduma, lí bilí inde u adú lie de Ngámá Yesu ne Nau na sangu di ne angu gba e tsutsu-o. <sup>10</sup> Engú ango-o akódho 'kpí lí 'kpí aní agó lie ngubula me ndu okpála gba ni hana inde abhuka ni-e, dhөгө ni, amba u toko di ni. Ngayi di-e, yi adú bhú ká okpála bhomu. Padhá de, anga yi abhuka ngali inde ya akpokpo e pí yi-o.

<sup>11</sup> Kaka-a, ya di ngayo Ebhe ndu 'kpí hana ngubula yi me Ebhe gba ní-e mene me yi dhuku lí lele maka aní a'i yi lie-o. Ya ngayo ka aní me bhú angu gba aní-e, aní ha angu pí yi ngú namene obabadha kulu inde yi akunda namene e akólo lí soso, kabula nabhuka gba yi bhú Yesu-o. <sup>12</sup> Ya la di ngayo Ebhe ngubula me, okpála dhөгө 'lí Ngámá gba ní Yesu kabula yi, amba u dhөгө di yi kabula aní. Bhobhomu-o améne lie ka bádha bhú 'bu inde lí 'Dyi ní Ebhe di ne Ngámá gba ní Yesu Kilisito asuno e pí yi-o.

## 2

*Bhulú Nayala líli gba Ebhe-e agó ngaiza*

*kalanu*

<sup>1</sup> Ondaise ya, Ngámá gba ní Yesu Kilisito agó mago, ní tsia pékèbhè bhúla ní de aní. Lí 'ngú angó-o, ya ngayo ka yi me, <sup>2</sup> bua yi angámba má gala de, 'ndji yi angbínjí di-de. Yi dje ka kpála bini me Bu Bhobua apa pí ní me: «Ekpí nago ka Ngámá akolo», ne me ya apa pí ní mo-o, i dú di-e me ya aye bhú balua mo-o, yi azíba de. <sup>3</sup> Kpála bini apíte belegu yi de má kpó! Padhá de, anga kala nago ka Ngámá Yesu-o, agó ngaíza ne nedhinga na kpéke 'ndji lí 'ngú gba Ebhe. Pipita-a, lí Bhulu Nayala líli gba Ebhe-e kóto. Kpála angó-o ngakpata kpadji na djua na duduama. Ebhe andjía engú gba aní-e mandjia. <sup>4</sup> Kpála angó-o ayíe bhúla, aní há 'gú ne Ebhe di ne ndu oehe koko hana inde lí okpála ngau e maka oebhe, inde u nde la di ngadhègè o-o. Aní tsia pá me ní ane ndu uo hana. Aní anú nadu belegu bhú 'ngbé 'tí Ebhe gba omaYuda, aní tsia pá me ní ne Ebhe.

<sup>5</sup> 'To yi a'íli de me nedhinga ní adu nga bha lie ne yi-e, ma adu apa engú inde-e pí yi uu-o de. <sup>6</sup> Yi mbila la bhadi hana me ehe inde ngani kpadji pí kpála angó-o me aní akóto mbia inde-e de-e ne ní-íe, amba aní koto bha bini lí nedhinga inde lí Ebhe a'o e pí aní-o. <sup>7</sup> Padhá de, anga angu inde awo lie mawo gba kpéke 'ndji bhomu-o akpo lita kulu akpo. Engú bini, kpála inde ngani kpadji pí aní-e adú nga bha o-o akólo lí nedhinga u a'é aní lie-o.

<sup>8</sup> Abhomu-o, lí Bhulu Nayala líli gba Ebhe-e tsia kóto. Ngámá Yesu bhéle aní bha ne mbulu 'wo e, aní tsia ndjía angu aní ne sangu inde aní agó ne e-o. <sup>9</sup> Bhulu Nayala líli angó-o agó bhú angu gba Satana, aní tsia méne ndu djua ongamba 'ngú, ne ndu okiaka 'ngú hana, di ne ongbengbe 'ngú ngú napite okpála. <sup>10</sup> Aní améne ndu djua osisiti 'ngú hana ngubula napite okpála bhende ngakpata kpadji na djua na duduama-o. Ebhe andjía engú gba uo-o mandjia, anga u kanda kuku 'ngú inde i tí da nako nakobho uo-o de, u tsia bhuka di kuku 'ngú angó-o de. <sup>11</sup> Kaka-a, Ebhe ató siti mabhundja bhú uo, i tsia píte uo ngubula me u bhuka

ongú na eu, <sup>12</sup> amba Ebhe 'o 'ngú pí ndu okpála hana inde i bhuka kuku 'ngú de-o, inde adu akpi mangbo ndjili lí siti 'ngú-o.

*Yi lu kpekpeke bhú 'bu nabhuka*

<sup>13</sup> Ondaise ya inde lí Ngámá akunda o, pí ya-a, a ayo me ya gie heni pí Ebhe ndu 'kpí hana lí 'ngú gba yi-o. Padhá de, anga Ebhe abhu nani yi nayie lí lilita ngubula me yi sia mukobho lí kpadji gba Bu Bhobua inde ngamene me yi dú bubu, di ne lí kpadji na nabhuka inde yi nde ne e bhú kuku 'ngú-o. <sup>14</sup> Ebhe a'í yi me yi sia mukobho bhomu-o lí kpadji na Bádha Ngali inde ya akpokpo e pí yi-o. Aní a'í yi me yi sia di sangu gba Ngámá gba ní Yesu Kilisito-o. <sup>15</sup> Kaka-a, ondaise ya, yi lu kpekpeke bhú 'bu nabhuka gba yi-o. Yi lila kpekpeke ongú inde ya asuno e pí yi nedhinga ya adu lie agba yi di ne bhe ya aye e pí yi bhú balua-o.

<sup>16-17</sup> A ayo me Ngámá gba ní Yesu Kilisito ngae makpe di ne 'Dyi ní Ebhe, bedhe bua yi ne masi. A ayo me u ha angu pí yi ngubula me yi dú namene ndu 'kpí hana bádha 'ngú, abana i dú bhú nagama 'ngú, abana i dú bhú namene kulu. Padhá de, anga Ebhe akunda ní, aní aha di kpéke bua na duduama pí ní ka bádha bhú 'bu gba e-o. Aní atsia amene di me ní 'o 'to ní 'to ní na paká paká.

**3***Polo apa pí omabhuka me u yo Ebhe ngú ní*

<sup>1</sup> Ngú nabu tata-a, ondaise ya, yi yo Ebhe ngú ya, amba eli gba Ngámá-a yangba má gala, amba okpála inde ngadjedje-e, mene engú inde lí eli angó-o ngapa e maka yi ngamemene lie-o. <sup>2</sup> Yi yo di Ebhe me aní kobho ya sakpa osisiti okpála na mbedhembedhe-o. Padhá de, anga a ko de me ndu okpála hana akunda nabhukaBádha Ngali-e de. <sup>3</sup> Engú bini, Ngámá Yesu ne kpála inde amemene engú maka aní apa lie-o. Aní ahá angu pí yi bhú nabhuka, aní tsia líla yi sakpa Siti. <sup>4</sup> Ya abhuka ne 'lí Ngámá Yesu me, engú inde ya ngapa e pí yi-e, yi ngamemene moko,

yi améne la bhadi mo-o ne kalanu. <sup>5</sup> A ayo me Ngámá leke bua yi ngú nambila lele maka li Ebhe akúnda yi lie, di ne lele maka li Kilisito ngaha kpéke bua pi yi lie bhú nabhuka-o.

*Polo agbele 'dje omabhuka li 'ngú na ipio*

<sup>6</sup> Ondaise ya, ya apa pi yi ne 'li Ngámá gba ní Yesu Kilisito me, yi akpótse liyi bhú dabili bini ne ondaise ní na ipio, inde i kpata líli inde ya aha e pi yi de-e de. <sup>7</sup> Padhá de, anga ngayi makpe-e, yi mbila maka a ayo lie me yi kpata lele mukobho gba ya-a ndjindji. Nedhinga ya adu lie agba yi-e, ya du ne ipio de. <sup>8</sup> Ya yo ka kpála bini de me ani ha 'zu pi ya padhá-a de. Engú bini, ya aziba ndala ne likabhu, ya atsia amene kulu ngbikpi ne sukpe ngú napa me ya adhá bhú kpála bini bhú ká yi de. <sup>9</sup> A ayo nako me ya sia 'he ka yi padhá, engú bini, ya mene nako mo-o de, anga ya akúnda me yi kpata lele mukobho gba ya-o. <sup>10</sup> Nedhinga ya adu lie agba yi-e, ya aha líli inde-e pi yi me: «Li kpála kúnda namene kulu de-e, a ayo di de me ani zu 'he-e de.»

<sup>11</sup> Ya ngapa mo-o, anga ya adje me okpála koko bhú ká yi ne ipio. U memene kulu de. U bha bini nga'o 'to o li 'ngú bhe i tsia o de. <sup>12</sup> Pi okpála bhomu-o, ya ngagbele 'dje uo, ya di ngayo ka uo ne 'li Ngámá Yesu Kilisito me, a ayo me u mene kulu maka ayo lie, amba u sia ezú inde akoto li 'kpa o makpe.

<sup>13</sup> La pi yi ondaise ya-a, yi andála li namene bádha 'ngú de. <sup>14</sup> Li kpála kpata engú inde ya aye e pi yi bhú balua inde-e de-e, yi de bhele djila yi li ani. Yi améne 'he bhú dabili bini ne ani de, ngubula me ani dje numu. <sup>15</sup> Engú bini, yi aú ani maka bhulu yala ka yi de. Yi gbele mangbo 'dje ani maka suka yi.

*Polo ayo bisagu pi omabhuka na gudhu na Tesalonike*

<sup>16</sup> A ayo me Ngámá na guo 'ngú-o, ha guo 'ngú pi yi ngae makpe ndu 'kpi hana ne bhú ndu 'ngú hana. A ayo me Ngámá du ne ndu yi hana bhú dabili bini.

<sup>17</sup> Ngama Polo, ma aye engú na soso inde apa me ma yi yi mayi inde-e ne 'kpa ma makpe. A bhomu-o lele nadele 'kpa ma bhú balua gba ma-o.

<sup>18</sup> A ayo me bádha bhú 'bu gba Ngámá gba ní Yesu Kilisito-o du bhú dabili bini ne ndu yi hana.

## Balua na bini gba Polo pi Timoté Eli na kalanu

Timoté ne makombi bini inde adu nani makilisito bhú Adji Minele. 'Hi ani nani ne maYuda, 'dyi ani atsia adu nani ne Giliki. Ani akolo nani kpála nateteke Polo bhú dholo gba e nakpokpo Bádha Ngali gba Yesu Kilisito . Balua na bini gba Polo pi Timoté-o, ngakpokpo 'ngú pindji ongbengbe 'ngú bata.

Balua ango-o ngakpo ngaiza 'ngú pindji nalila lio ka omusuno na eu inde bhú Piga gba Ebhe-o. Nasuno ango-o a ko nakpøtsø mabhundja pindji omaYuda ne okpála inde ne omaYuda ade inde adu nani pindji napa me bádha 'ngú píla doto ade. A la di ngapa me, u ti da bha nasia mukobho ka imbila 'ngú inde awo lie mawo, a la di ne nakpe nazu oeha koko, di ne naha lio maka ølø ne bhoko de.

**Ongbengbe ongú inde bhú bhuku inde-e ngae inde:**

Eli na kalanu 1:1-2

Líli pindji Piga gba Ebhe ne okpála inde ngadjedjele-o 1:3 - 3:16

Líli pi Timoté pindji kulu gba e-o 4:1 - 6:21

### *Polo yi Timoté mayi*

1-2 Timoté, kukulu ndili gba ma bhú 'bu nabhuka-a , a ayo me bádha bhú 'bu ne ndjinga di ne guo 'ngú gba 'Dyi ní Ebhe ne Yesu Kilisito , Ngámá gba ní-e du bhú dabili bini ne mu. Ma aye balua inde-e pi mu ngama Polo. Ma ne bhulu titima gba Yesu Kilisito maka li Ebhe, Mukobho gba ní, ngauo ne Yesu Kilisito inde ní nga'o 'to ní 'to e aha líli muma lie ngú nakpokpo Bádha Ngali ko.

*Polo apa me a ayo nayoko omusuno na eu-o mayoko*

3 Maka ma aha nako líli pi mu lie li nedhinga ma adu anu lie bhú ndu doto na Makedonia-a, du bha bhú gudhu na Efeso oo, amba mu pa pi omusuno na eu inde oo

me, u 'o nasuno bhomu-o ma'o. <sup>4</sup> Pa pi uo me, u 'o nakpokpo ongú na padhá padhá inde li okpála ngagbe e bhú 'ndji o ma'o. U 'o di nakpokpo ndjandja okpokpodumu ma'o. Padhá de, anga ongú bhomu-o ngagbe okpekebhe na padhá padhá inde i dyudyo kulu inde li Ebhe ngamene e bhú mukobho gba okpála de. Kulu ango-o ngadyudyo lie ne kalanu ka nabhuka.

<sup>5</sup> Olíli ma aha e pi mu bhomu-o, a ngubula me okpála du ne mukunda sunda o. Mukunda ango-o ngayie li bádha bua, li bua nakpokpo kú 'ngú ndjindji, la di ne bhú nabhuka na kukulu. <sup>6</sup> Okpála koko ayie li ngbili kpadji bhomu-o ayie, u atsia azi 'ndji o bhú namene okpekebhe na padhá padhá. <sup>7</sup> U ngapa me o ne omusuno na líli gba Ebhe, engú bini, ngauo makpe-e, u kø mboli engú inde u ngasuno e pi okpála koko ne angu o hana-a belegu de bini.

### *Ebhe aha líli gba e pi ní ngubula ní?*

<sup>8</sup> Ní mbila hana me líli gba Ebhe-e ndjindji, i du me u nde ngakpakpata maka a ayo lie ko. <sup>9</sup> Ní mbila la di hana me, Ebhe 'o líli pi okpála bhende ngadhuku ngbingbili-e de. Engú bini, ani a'o pi obhende ngau líli gba ani-e padhá di ne pi okpála na kpekpeke 'ndji. Ani a'o pi okpála bhende ngandjo 'li ani, di ne pi obhende ngamene siti 'ngú-o. Ani a'o pi okpála inde i manga ani de, i manga la di ohe na bububu gba ani-e de-o. Ani a'o pi okpála bhende ngabhili odyi o, i du di-e ohi o-o. Ani a'o pi okpála bhende ngabhili obi o bhú gandji.

<sup>10</sup> Ani a'o pi obhosi bhende ngakunda olisi di ne pi olisi bhende ngakunda obhosi ngangá-o. Ani a'o pi obhosi bhende ngakunda lio ne obi o obhosi, i du di-e olisi bhende ngakunda lio ne obi o olisi. Ani a'o pi okpála bhende ngatsindji obalise. Ani a'o pi obhulu eu di ne pi okpála bhende ngatmu silika pí eu. Ani a'o pi ndu okpála hana inde ngamene engú kpi ne bhende na kukulu ní ngasuno e ko. <sup>11</sup> Nasuno ango-o bhú Bádha Ngali inde li

Ebhe aha e m̄ma-o. Bádha Ngali angoo ngasuno sangu gba Ebhe inde ngaha bádha 'ngú p̄i okpála-o.

*Polo agie heni p̄i Ebhe*

<sup>12</sup> Ma ngagie heni p̄i Yesu Kilisito, Ngámá gba ní inde aha angu m̄ma ngú namene kulu gba e-o. Ma ngagie heni p̄i aní, anga aní au me ma ti da namemene. Abhom̄-o, aní atsia abh̄u ma ngánga.

<sup>13</sup> La nani kalan̄-o, ma ad̄u apa osisiti 'ngú li aní, ma ad̄u ato mbolo li okpála koko ka u abhuka aní lie-o, ma ad̄u la di asosobho aní. Abana ma ad̄u amene lie mo-o, aní adje ndjinga ma. Padhá de, anga ma bhuka nga nani aní de. Ma mbila la di nani de me Yesu ne Masiya-a de.

<sup>14</sup> Engú bini, Ngámá gba ní-e atsia asuno bádha bhú 'bu gba e m̄ma ane mane. Aní aha nabhuka m̄ma, di ne mukunda inde bhú nakp̄et̄se liní ne Yesu Kilisito-o. <sup>15</sup> Engú inde ma adjí apa e inde-e, a ko k̄ukul̄u 'ngú inde a ayo me nd̄u okpála hana bhuka e ne bua o bini. Engú angoo me, Yesu Kilisito ago nani p̄ila doto ngú nakobho okpála na sisiti. Yi mbila la me ngámá ngámá bhú ká uo ne ma. <sup>16</sup> Abana ma ad̄u lie ne ngámá ngámá bhú ká uo ngama-a, Ebhe adje ndjinga ma. Ebhe amene m̄ma mo-o ngubula me nd̄u okpála hana inde abhúka Yesu Kilisito-o, u u lele 'ndjá bua gba ní-o, amba u bhuka-a, u de sia mukobho na d̄ud̄uma. <sup>17</sup> A ayo me nd̄u okpála hana dh̄eḡe Ebhe, amba u toko aní d̄ud̄uma ne d̄ud̄uma. A ad̄u moko. A ko 'Ngbé Ngámá na d̄ud̄uma, i kpikpi de, li kpála uu di-e de. A ko bha koli Ebhe bha ngae kpi e kpi!

<sup>18</sup> Timoté, ndika ma, ma ngaha olíli bhom̄-o p̄i m̄u nakpata oeli inde li opolofeta akpokpo nani e li 'ngú gba m̄u-o. A ayo me oeli angoo-teteke m̄u ngubula nakpokpo Bádha Ngali-e ne angu, abana li okpála d̄u nayaya m̄u. <sup>19</sup> A ayo me m̄u ḡu egú angoo-ne nabhuka bhú dabili bini ne bua nakpokpo kú 'ngú ndjindji. Okpála koko a'o ká bua nakpokpo kú 'ngú gba o a'o. Kaka-a, u ayie li kpadji na nabhuka ayie. <sup>20</sup> Imene

ne uo ne Alekidjandele bhú ká ongua okpála bhom̄u. Ma atsia ap̄u uo p̄i Satana , \* amba u mbila lio ne napa me a ayo nasobho Ebhe de.

## 2

*A ayo nayo Ebhe ngubula nd̄u okpála hana*

<sup>1</sup> Kala nd̄u 'ngú hana-a, ma ngayo ka yi me yi 'o gum̄u gba nd̄u okpála hana kala Ebhe, yi yo Ebhe p̄i uo, yi kikiliki liyi p̄i aní ngubula uo, amba yi gie la di heni p̄i aní ngubula nd̄u uo hana. <sup>2</sup> Yi yo Ebhe p̄i ongbengbe ongámási, di ne p̄i nd̄u ongámási hana ngubula me kpéke 'ngú ad̄u-u de, amba ní d̄u bhú guo 'ngú , ní d̄u namanga Ebhe ne nagbite liní li aní na paká paká. <sup>3</sup> A bhom̄-o engú inde ndjindji, inde la di nganga li Ebhe, Mukobho gba ní-o.

<sup>4</sup> Aní akunda me nd̄u okpála hana kobho, amba u mbila la di k̄ukul̄u 'ngú. <sup>5</sup> Padhá de, anga koli Ebhe bha bini, a la bhadi ne koli kpála bini inde l̄adu s̄unda Ebhe ne okpála-kuti. Kpála angoo, a ko Yesu Kilisito , <sup>6</sup> inde ap̄u mukobho gba e ngubula nagbegbe nd̄u okpála hana bhú bali-o. Aní amene mo-o bhú nedhinga nani li Ebhe a'o e ngú nasuno me Ebhe akunda me nd̄u okpála hana kobho. <sup>7</sup> Ka 'ngú angoo, Ebhe abh̄u ma bh̄ulu titima gba Yesu di ne bh̄ulu nakpokpo Bádha Ngali . Aní abh̄u ma me ma suno nabhuka di ne k̄ukul̄u 'ngú p̄i okpála inde ne omaYuda ade-o, amba u bhuka. Ma ngapa k̄ukul̄u 'ngú, ma pa eu de.

<sup>8</sup> Kaka-a, ma akunda me obhosi yo Ebhe ne nd̄u bili hana. U yo Ebhe me u nde a'e'e 'kpa o ne abh̄ulá ne naha lio libhomu p̄i Ebhe. U ad̄u ne engú s̄unda o de, u ad̄u la di ne kpekebhe de.

<sup>9</sup> P̄i olisi-e, ma akunda me u d̄u adyi bongo maka a ayo lie. U ad̄u adyi bongo bhe a'é bua kpála bhú da e ma'e-e de. U d̄u adyi bongo li lelele. U ad̄u ap̄ulu sundjo o nane dada mane de. U ad̄u adyi omayaka ne omagege na olo di ne ohe na zizi de. U ad̄u di nadyi obongo na mase

\* 1:20 1:20 Napu kpála p̄i Satana: Ti da napa li bili inde-e me nagbe kpála bhú Piga gba Ebhe.

naali de. <sup>10</sup> Engú bini, u suno mangbo bádha gba o bhú obabadha kulu inde u ngamene e-o. A bhomu-o engú inde ati ne olisi inde ngasuno me o ngamanga Ebhe-o.

<sup>11</sup> Nedhinga li bhoko ngaha olíli lie bhú Piga gba Ebhe-e, a ayo me òlò ndjili má bulu, ani kò lie ne kuto. <sup>12</sup> Ma ha kpadji pí òlò ngú nasuno di ne nau pí 'ndji bhoko de. Engú bini, a ayo me ani ndjili má bulu! <sup>13</sup> Padhá de, anga Ebhe abho ngaiza nani kalanu-o Adamu, pípita-a ani atsia abho Eva. <sup>14</sup> La di-e, Satana pite nani Adamu de, engú bini, ani apite mangbo nani òlò-ò. Abhomu-o, òlò-o atsia andjo 'li Ebhe. <sup>15</sup> Abana i nde lie mo-o, Ebhe akóbho òlò ka ezu gba e-o. Ebhe akóbho ani i du me ani nde alu kpekpeke bhú 'bu nabhuka, ne mukunda, ne na'o lie bubu kala Ebhe, di ne na'o lie bhú da e.

### 3

#### *Líli pí okpála natsia 'kpí li Piga gba Ebhe*

<sup>1</sup> Engú ma adji apa e inde-e, a ko kukulu 'ngú: i du me kpála nde akunda natsia 'kpí li Piga gba Ebhe-e, ani akunda namene bhomu-o bádha kulu. <sup>2</sup> Kaka-a, a ayo de me u u kpála inde ngatsia 'kpí li Piga gba Ebhe-e ne siti 'ngú-o de. A ayo me ani du ne koli òlò bini. Ani du naholo bua e ka 'ngú maholo. A ayo me ani du namene 'ngú li lelele, ani du la di namene babadha 'ngú. Ani du nasia ogomago ndjindji, ani mbila la di nasuno 'ngú pí okpála. <sup>3</sup> Ani ahá lie pí pandi de, adú la di kpála nagu gbele de. Engú bini, a ayo me adu kpála na bhuku 'ngú. Adú kpála nagbe bhayiki ne okpála koko de, adú la di kpála na gumu tia naali de.

<sup>4</sup> A ayo me adu kpála inde ngatsia 'kpí li piga gba e makpe-e ndjindji, inde li ongisi gba e ngamanga e ne ndu kpadji hana.

<sup>5</sup> Padhá de, anga i du me kpála nde mbila natsia 'kpí li piga gba e makpe ndjindji de, ani ti da nalila Piga gba Ebhe-e lele pí?

<sup>6</sup> A ayo de me kpála natsia 'kpí li Piga gba Ebhe-e du kpála inde adji bua e na mbia de. Padhá de, anga i du me a nde kpála inde adji bua e na mbia-a, 'ngbé 'ndji ti

da nali bhú ani, ani tsia lí bhú mangimbo maka Djabulu ali nani lie-o. <sup>7</sup> La matá di-e, a ayo me adu kpála inde li okpála bhe i bhuka de-e ngakpo 'ngú gba e ndjindji, ka napa me okpála aú ani bhú djila o padhá de-o, la di ngubula me ani atí bhú oekú gba Djabulu-o de.

#### *Líli pí okpála nateteke kulu bhú Piga gba Ebhe*

<sup>8</sup> A bhadi moko, a ayo me okpála nateteke kulu bhú Piga gba Ebhe-e du okpála inde ngamene 'ngú inde li okpála ti da namanga o ka e. U adú la di ne eli bhisi bhisi de, u ahá lío pí pandi de, u adú di nagili tia li siti kpadji de. <sup>9</sup> A ayo me u gbite lío ne bua bini li kukulu 'ngú inde li Ebhe ambamba ta e-o. U gbite lío tété ne bua nakpokpo kú 'ngú inde ndjindji.

<sup>10</sup> Kala me u bua uo me u kolo okpála nateteke kulu bhú Piga gba Ebhe-e, a ayo ngaiza me okpála tsia uo ndjindji, pípita-a, i du me u nde u uo ne engú na sisiti de-e, u de bua uo ngú namene kulu ango-o. <sup>11</sup> A ayo me, olisi gba uo-o du bhadi namene engú inde li okpála ti da namanga uo ka e. U adú napa sisiti 'ngú li okpála koko de. U du naholo bua o ka 'ngú maholo. U du okpála inde li okpála koko ngaziba o bhú ndu 'ngú hana. <sup>12</sup> A ayo me, kpála nateteke kulu bhú Piga gba Ebhe-e du bha ne koli òlò bini. Adu kpála inde ngatsia 'kpí li ongisi gba e di ne piga gba e makpe-e ndjindji. <sup>13</sup> Padhá de, anga okpála inde ngamene kulu nateteke kulu bhú Piga gba Ebhe-e ndjindji-e, ndu okpála hana ngamanga uo mamanga, u gama la di engú píndji nabhuka gba o inde bhú Yesu Kilisito-o ne tsulu belegu de bini.

#### *Engú na ngbéngbé inde li Ebhe asuno e*

<sup>14</sup> Ma ngaye balua inde-e pí mu ne nabhundja me ma akólo li mu oo má gala!

<sup>15</sup> La-a, i du me ma nde kolo li mu oo má gala de-e, balua inde-e de suno pí mu lele maka a ayo lie me okpála dhuku bhú piga gba Ebhe-o. Piga ango-o, a ko Piga gba Ebhe inde uu-o. Dadjua ango-o ngabi

kukulú eli-e maka nepanda abibi eti lie-o. <sup>16</sup> A na paká me, engú inde li Ebhe ambamba ta e pi ní pindji nabhuka gba ní-e ngbéngbé. Engú ango-o me:

Kilisito ago pála doto bhú kute maka  
kpála-kuti,

Bu Bhobua asuno me, ani ngingbili,  
oandjelu atsia au ani.

U akpokpo engú gba ani-e pi okpála  
inde

ne omaYuda ade,

okpála na pála doto libhomu abhuka  
ani,

Ebhe atsia a'e ani abhúlá bhú sangu gba  
e-o.

#### 4

##### *Om̄suno na eu*

<sup>1</sup> Bu Bhobua apa mbámábá me bhú onedhinga na soso-o, okpála koko a'ó ká nabhuka gba o, u tsia kpáta osisiti bua na eu, u kpáta di ongú inde li osisiti bua ngato e bhú okpála me u suno e-o.

<sup>2</sup> Obhúlú kali inde ngapa eu-o apíte uo me u yie li ngbili kpadji-e mayie. Bua nakpokpo kú 'ngú gba obhúlú kali ango-o asiti m̄gito me u atsulu ne kalase inde u ato e bhú djua. <sup>3</sup> Okpála ango-o ngasuno me a ayo de me obhosi ne olisi d̄ naha lio-o de. U di ngapa me a ayo de me okpála d̄ naz̄u oz̄u koko de. Ebhe abho la nani oz̄u bhom̄u-o ngae. Omabhuka inde ambila kukulú 'ngú-o ti da naz̄uz̄u ne nagie heni pi ani. <sup>4</sup> Padhá de, anga nd̄u 'he hana inde li Ebhe abho e ndjindji. A ayo de me ní tse ehe bini bhú káká-a de. Engú bini, a ayo nahaha ne nagie heni pi Ebhe, <sup>5</sup> anga eli gba ani bhú dabili bini ne mayo ngamene me nd̄u 'he hana kolo bubu kala ani.

##### *Bádha kpála na kulu gba Yesu Kilisito*

<sup>6</sup> Suno ongú bhom̄u-o pi ondaise ní omabhuka. Li m̄u mene mo-o, m̄u d̄u bádha kpála na kulu gba Yesu Kilisito. M̄u tsia súno di me m̄u ngak̄u bua m̄u ne oeli na nabhuka, di ne nasuno na kukulú mo okpata e ko. <sup>7</sup> Engú bini, gbe lim̄u li otod̄u na padhá padhá inde i ti ne nabhuka de-e magbe. Mene mangbo ne kpéke me m̄u gbite lim̄u li namene

engú inde anga li Ebhe. <sup>8</sup> Namene ngeme ngú nakpekpeke kute-e, a ndjindji ngú ongú masudha. Engú bini, a ndjindji nane mane pi kpála ne nadhuk̄u maka li Ebhe akunda lie-o. Padhá de, anga namene mo-o, kpála ango-o ambila me ni asia inde-e mukobho na mbia, mukobho ango-o adú d̄ud̄uma ne d̄ud̄uma. <sup>9</sup> Eli inde ma apa e bhom̄u-o, a ko kukulú 'ngú inde ayo me nd̄u okpála hana ziba e ne bua bini. <sup>10</sup> Kaka-a, i d̄u me ní nde ngamene kulu kpekpeke di ne angu ní hana-a, a ko anga ní nga'o 'to ní li Ebhe inde u-o. A ko Mukobho gba nd̄u okpála hana, a ane la mane pi okpála bhende abhuka ani-o.

<sup>11</sup> A bhom̄u-o ongú inde a ayo me m̄u gbele 'dje okpála lie, amba m̄u suno di-e pi uo-o. <sup>12</sup> Mo oká kpadji pi kpála bini de me ani u m̄u padhá ka m̄u nde lie ne makombi-e de. Engú bini, d̄u mangbo ne kpála inde ngasuno kpadji pi omabhuka. D̄u nasuno kpadji pi uo bhú eli inde m̄u ngapa e, ne bhú lele namene 'ngú gba m̄u, ne bhú mukunda gba m̄u, ne bhú nabhuka, di ne bhú nad̄u ka m̄u bubu kala Ebhe.

<sup>13</sup> Nedhinga m̄u ngadjeke nago ka ma lie-e, ha lim̄u ngú natanga 'li Ebhe-e kala nd̄u okpála hana. To masi bhú uo, amba m̄u suno ta eli gba Ebhe-e pi uo. <sup>14</sup> Mo oú kulu li Ebhe aha e pi m̄u-o bhú bádha bhú 'bu gba e-e padhá de, kulu inde mo osia e nedhinga li opolofeta akpokpo 'ngú gba m̄u-o lie, la di ne li nedhinga li obhelesi okpála a'o 'kpa o pí 'ndji m̄u lie-o. <sup>15</sup> A bhom̄u-o kulu inde a ayo me m̄u 'o bua m̄u li e ko. Ha lim̄u ngú namemene ne bua m̄u hana, amba nd̄u okpála hana u me m̄u ngan̄u li kpadji gba Ebhe-e ne kalan̄u. <sup>16</sup> Lila lim̄u ngam̄u makpe ndjindji bhú ongú inde m̄u ngamene e di ne bhende m̄u ngasuno e pi okpála koko-o. N̄u ne di ne kalan̄u, anga i d̄u me m̄u nde amene mo-o, m̄u kóbho lim̄u ngam̄u makpe, m̄u tsia kóbho di okpála bhende ngadje m̄u-o.

#### 5

*Líli pi nd̄u omabhuka hana*



<sup>1</sup> I dɔ me mɔ nde ngali bhele kpála li 'ngú-o, mo ombémbe bhú 'ndji ani mambembe de, engú bini, gama 'ngú pi ani bhəbhuku mɔgito me a ko 'dyi mɔ. Gama 'ngú pi omakombise maka ondaise mɔ na obhosibhosi. <sup>2</sup> Pi olisi na obhelesibhelesi-e, gama 'ngú pi uo mɔgito me a ko ohi mɔ. Pi otsalisi-e, gama 'ngú pi uo maka ondaise mɔ na olisilisi me bua mɔ nde tuko li uo de.

### *Engú pindji oəkəsi na olisilisi*

<sup>3</sup> Teteke oəkəsi na olisilisi bhende li kpála nde ngú nateteke o ade-e mateteke. <sup>4</sup> Engú bini, i dɔ me a nde ka əkə na ələ bini ne ongisi, i dɔ di-e odi ye e, ngú nasuno me ongisi ango-o ngamene engú inde li Ebhe akunda e, a ayo me u teteke ngaiza opiga gba o makpe. U mene mo-o, u gíe bádha 'ngú pi okpála inde azu o, di ne pi onguo ogbi o bhú da bhende u amene nani e pi uo-o. Abhomu-o engú inde li Ebhe aziba e ko. <sup>5</sup> Əkə inde ngadu bha ndju kpi e kpi, li kpála bini nde ka e ngú nateteke e ade-e, ani nga'o 'to e 'to Ebhe. Ani ngazi kekele li nayo Ebhe sukpe ne ngbikpi ngubula me Ebhe teteke ni. <sup>6</sup> La-a, pi əkə bhende akunda bha naae odjali na doto-o, ani akpi li bua e akpi, abana ani nde lie u-o. <sup>7</sup> A bhomu-o engú inde a ayo me mɔ pa e pi uo ngubula me kpála bini apá 'ngú li uo sisiti de-o. <sup>8</sup> I dɔ me kpála nde teteke omaha e de-e, a ane la mane piga gba e makpe-e, ani abala 'kpa li nabhuka gba e abala, ani ane belegu mupagano ne siti.

<sup>9</sup> La di-e, ngú napa me u ye 'li əkə bini bhú ká obhende li Piga gba Ebhe-e ngabi o-o, a ayo me ani dɔ mbo ne kalanga ndjikpa madhia. Adu la bhadi ələ inde i kunda bhoko sa 'ku 'ko e de.\* <sup>10</sup> A ayo la di me okpála mbila ani ka obabadha kulu inde ani amene e-o. A akunda napa me, ani aku ongisi gba e ndjindji, ani asia ogomago, ani avulu 'dhu omabhuka, † ani ateteke okpála inde adu bhú mbolo. Adu

\* **5:9** 5:9 Ələ inde i kunda bhoko sa 'ku 'ko e de: A akunda napa me nedhinga li 'ko ani adu lie tété-e, ani kunda bhoko koko de. † **5:10** 5:10 Ani avulu 'dhu omabhuka: Nani agba omaYuda-a, kulu nagbe maləkə bhú 'dhu ogomago ne navulu 'dhu uo-o, a ko nani kulu ka obalise di ne okpála na padhá. A di ngú nasuno mukunda ne nakə lio ne kuto. Tsia bhú Dja. 13:1-17. † **5:18** 5:18 Tsia bhú Det. 25:4; ne bhú 1 Kol. 9:9; ne bhú Mat. 10:10; di ne bhú Luk. 10:7.

la di kpála inde amene ndu babadha kulu hana.

<sup>11</sup> Engú bini, pi oəkəsi bhende na otsalisi tsalisi-e, mo oyé 'li uo bhú ká obhende li Piga gba Ebhe-e ngabi o-o de. Padhá de, anga nedhinga li gumu naha bhoko koko alí bhú uo lie, i méne me u dji 'ngbu o li Kilisito. <sup>12</sup> Li u mene mo-o, u lí bhú mangimbo. Padhá de, anga u apa nani me o oha lio pi Kilisito, la mbia bhomu-o, u mene maka u apa lie de. <sup>13</sup> La di-e, mɔ ye 'li uo-o, u kólo obhulu ipio, u hóló nadjakadha gba okpála ngangá. U kólo bha bini obhulu ipio de, engú bini, u hóló nagama 'ngú naali, u hóló nali bhú ongú bhe i tsia o de, u tsia dú di nagama 'ngú gbəlongə. <sup>14</sup> Kaka-a, ma akunda me, oəkəsi bhende na otsalisi tsalisi-e ha matá obhosi, u zu ongisi, u tsia 'kpi li opiga gba o-o, amba u aká kpadji pi obhulu yala gba ní-e napa 'ngú li ní sisiti de. <sup>15</sup> Ma pa mo-o padhá de, a ko anga oəkəsi koko ayie li ngbili kpadji-e ayie, u atsia agbida nganda Satana.

<sup>16</sup> I dɔ me mabhuka bini na ələ nde ne oəkəsi na olisilisi bhú piga gba e-e, a ayo me ani teteke uo. Ani a'ó de me Piga gba Ebhe-e bi uo ngae de, amba Piga gba Ebhe-e bi obhende li okpála nde ka o ngubula nateteke o ade ko.

### *Engú pindji obhelesi okpála na Piga gba Ebhe*

<sup>17</sup> Obhelesi okpála inde ngatsia 'kpi li Piga gba Ebhe ndjindji-e, a ayo me u manga uo, amba u tsia ha di makalá na kulu gba uo-o pi uo li lelele. A ane la mane pi obhende ngatse kute o ngú nakpokpo di ne nasuno 'li Ebhe-o. <sup>18</sup> Padhá de, anga Bhuku gba Ebhe-e ngapa me: «Nedhinga li bagala ngatu ngano lie, mo ogbite 'bhə ani de.» A apa matá di me: «Kpála na kulu ati ne makalá na kulu gba e-o.†»

<sup>19</sup> I dɔ me, kpála bini nde apa 'ngú li bhele kpála na Piga gba Ebhe-e sisiti-e, mo obhúka de. Ziba bha bini me okpála bhisi

nde alu pí engú ango-o, i du okpála bhisi de-e, a de du okpála bata. <sup>20</sup> Mbe bhú 'ndji obhelesi okpála inde ngamene siti 'ngú-o bhú djila ndu okpála hana, amba okoko dje tsulu.

<sup>21</sup> Ma ngaha líli pí mụ kala Ebhe, ne kala Yesu Kilisito, di ne kala oandjelu gba Ebhe inde ani abhu o me, mene olíli inde-e hana bhú ngbili 'ngú, mụ nde kunda kpála bini ane okoko mane de. <sup>22</sup> Mo o'ó 'kpa mụ pí 'ndji kpála má gala de ngú naha kulu pí ani bhú Piga gba Ebhe-o. Mụ 'o 'kpa mụ pí 'ndji ani má gala-a, li okpála u sidi me ani bhú siti 'ngú-o, akunda napa bhomu-o me yi akpetse liyi ne ani bhú siti 'ngú gba e-o. Lila limu me ni du bubu kala Ebhe.

<sup>23</sup> Mo odú bha bini nandji engu de, engú bini, ndji mbo di vino bedi uu ka kuo na bhú 'bu inde ngaha bhuku kute pí mụ piko-o.

<sup>24</sup> Okpála koko ngamene siti 'ngú bhú mbasu, li okpála mbila kala nakpata 'ngú tété. Pí okoko-o, a ayo ngaiza nakpata 'ngú tété kalanu ngú nambimbila. <sup>25</sup> A bhadi moko pí obabadha kulu, a ngau lie li zi 'kpí, belegu obhende u u e gbulu de-e, a tí da nadu ndu 'kpí hana de me a nde awo lie mawo-o de.

## 6

### *Líli pí obalise*

<sup>1</sup> A ayo me omabhuka inde bhú bali-e manga omakulasi o ne ndu kpadji hana. U manga uo, amba kpála bini asóbho 'li Ebhe de, amba u asóbho la di nasuno gba ní-e de. <sup>2</sup> I du me, omakulasi uo nde ne omabhuka-a, u apá de me o mánga uo de-e de, anga a ko ondaise o-o de. Engú bini, a ayo me, u mene kulu pí omakulasi o ndjindji naali, anga okpála inde u ngamene kulu pí o bhomu-o, a ko omabhuka, a ko la di ondaise uo na mukunda. A bhomu-o líli inde ayo me mụ suno e pí okpála ne nato masi bhú uo me u mene e ko.

### *Engú pindji gumu tia*

<sup>3</sup> I du me kpála bini nde ngasuno engú koko kpi, ani dhika li okukulu oeli gba

Ngámá gba ní Yesu Kilisito di ne ongu inde ní ngasuno e pindji namanga Ebhe de-e, <sup>4</sup> a ko kpála na 'ngbé 'ndji, ani mbila la di 'ngú belegu de bini. Ani ambila lie bha bini ne namene kpekebhe di ne natsi pindji oeli. Ongú bhomu-o ngagbe gumu 'he, ne natsi, ne nasobho lio, ne nabhundja siti 'ngú pindji obi o, <sup>5</sup> di ne bhayiki inde i ndjindjia de-e sunda okpála inde li 'ndji o asiti-o. Okpála ango-o mbila la di matá kukulu 'ngú belegu de bini. U ngabhundja me nabhuka Ebhe-e, a ko kpadji nasia tia.

<sup>6</sup> A moko, nabhuka Ebhe-e, a ko tia na ngbéngbé, i du me kpála nde ngakpi djali li ehe inde ka e-o. <sup>7</sup> Padhá de, anga ní go nani píla doto inde-e ne ehe bini de, ní gie la di liní ne 'he bini na doto inde-e de. <sup>8</sup> Kaka-a, i du me a nde ka ní ne ehe nazu mazu di ne bongo ngú nadyidi-e, amba bhobhomu-o ale pí ní ale. <sup>9</sup> Engú bini, okpála bhende ngakunda nakpo-o, u ngali bhú nale ne bhú ogumu 'he bhelé na padhá padhá di na sisiti inde li okpála ngasiti ka e, inde li okpála nde di ngamu ka e-o. <sup>10</sup> Padhá de, anga gumu tia ngazu ndu ongu na sisiti hana. Okpála koko ka nakunda tia naali-e, u ayie li kpadji na nabhuka ayie, u atsia ali bhú likabhu naali ka o makpe.

### *Bádha gbele ní nde bhú e kabula nabhuka gba ní-o*

<sup>11</sup> Engú bini, ngamu kpála gba Ebhe-e, kpe ndu sisiti 'ngú bhomu-o hana makpe. Gbite limu li ngbili 'ngú, ha limu pí Ebhe, du ne nabhuka, ne mukunda, ne 'ndjá bua, di ne bhuku 'ngú. <sup>12</sup> Gu bádha gbele inde ní nde bhú e ka nabhuka gba ní-o. Lila mukobho na duduma ndjindji, anga Ebhe a'i nani mụ ngú mukobho ango-o, mo otsia apa ne djali kala okpála bhelé me ni abhuka. <sup>13</sup> Ma ngaha líli pí mụ kala Ebhe inde ngaha mukobho pí ndu 'he hana, di ne kala Yesu Kilisito inde akpokpo nani kukulu 'ngú pindji nabhuka kala Pose Pilate ndjindji-e me, <sup>14</sup> lila líli inde ma aha e pí mụ-o ndjindji, mene ndundu hana maka ma apa pí mụ lie. Mene me kpála bini agú líli ango-o de,

akólo li ekpí li Ngámá gba ní Yesu Kilisito agié lie lie-o.

<sup>15</sup> Ekpí ango-o, Ebhe a'o ngae. A ko Ebhe inde ngaha bádha 'ngú pí okpála, a ko koli Ngámá bini inde ngaṽ pí 'ndji ndṽ 'he hana. A ko 'ngbé Ngámá pí 'ndji ongbengbe ongámási, a ko la di Ngámá gba ongámási. <sup>16</sup> Ani kpikpi de, ani ngadṽ bhú zi 'kpí inde li kpála bini tí da nakolo li e de. Kpála bini u nga ani de, kpála bini tí la di da nau ani de. A ayo me okpála dhøgø ani! A ayo me ani ṽ dṽdṽma ne dṽdṽma! A adṽ moko.

*Líli pí obhṽṽ tia*

<sup>17</sup> Pa pí obhṽṽ tia na doto inde-e me, 'ndji uo abé kaka de, u a'ó la di 'to o 'to tia na doto inde-e de, anga tia ango-o ngakodho 'kpí makodho. Engú bini, u 'o mangbo 'to o 'to Ebhe inde ngaha ndṽ 'he hana pí ní bhibhiti, ngṽbula me ní kpi djali ne di ko. <sup>18</sup> Pa pí uo me, u mene bádha 'ngú, u dṽ mangbo obhṽṽ tia bhú namene obabadha 'ngú. U dṽ okpála napṽ 'he pí obi o ne bádha bua, u dṽ bedhe ngú naha 'he pí okpála koko. <sup>19</sup> U mene mo-o, u pó bhúla ohe na babadha inde di ngabhue mabhue pí o ngú okpí inde ngago-o. Abhomṽ-o, u tsia tí da nasia kukulu mukobho.

<sup>20</sup> Timoté, lila kulu inde li Ebhe aha e pí mṽ-o ndjindji. Kpe agøṽ na padhá padhá inde i tí ne nabhuka de-e makpe. Kpe di obhayiki li okpála koko nga'i e ne eu me a ko imbilangṽ-o makpe. <sup>21</sup> Okpála koko abhundja me o ne ngua imbilangṽ ango-o, u atsia ayie li kpadji na nabhuka-o.

A ayo me, bádha bhú 'bu gba Ebhe-e dṽ ne yi bhú dabili bini.

## Balua na bhisi gba Polo pi Timoté Eli na kalanu

Bhú balua na bhisi gba Polo pi Timoté-e, ani aha líli pi Timoté maka kilí e na kulu inde la di ngateteke ani. Engú na ngbéngbé a ko bua nakibila 'ngú. Polo aha líli pi Timoté ne nato masi bhú ani ngubula nakpokpo 'ngú gba Yesu Kilisito ngbingbili ne nasuno Bádha Ngali na Gandja na Didili di ne bhe na Mbia ndjindji. Pí bhobhomu-o, a ayo di me ani suno eli gba Ebhe-e ndjindji abana likabhu ani ngazu e di ne li okpála ngagu ani lie-o.

Polo atsia agbele 'dje Timoté pindji okpepeke da 'ngú inde i ti da nakolo li ani ka nali bhú okpekebhe na ngingi inde li tata nde lie ade (2:23) i zu la di ngua ade, a la nga'e okpála inde ngadjedje li ngbili kpadji.

Bhú ndu 'ngú bhomu-o hana-a, Polo ngayo ka Timoté me ani kpata nganda ni di ne namene ongu inde li Polo ngamene e maka nabhuka gba Polo, ne ndja bua gba ani, ne mukunda gba ani, ne nakibila 'ngú gba ani la di ne likabhu ani ngasia bhú mbolo u ngato e li ani-o.

### Ongbengbe ongu inde bhú bhuku inde-e ngae inde:

Eli na kalanu 1:1-2

Natoko ne 'he inde a ayo me u mene e

1:3 - 2:13

Líli ne nagbele 'dje ngú nalila li e 2:14

- 4:5

Ongu inde atsia bha Polo kpi e kpi 4:6-

18

Eli na soso 4:19-22

### *Polo yi Timoté mayi*

1-2 Timoté ndika ma na mukunda, ma aye balua inde-e pi mu ngama Polo. Ebhe abhu nani ma me ma du ne bhulu titima gba Yesu Kilisito ngu nakpokpo engu na mukobho na duduma. Ani apa nani me

ni ahá mukobho ango-o pi ní li kpadji gba Yesu Kilisito ko. A ayo me 'Dyi ní Ebhe ne Ngámá gba ní Yesu Kilisito suno bádha bhú 'bu gba o-o pi mu, u dje ndjinga mu, amba u ha di guo 'ngu pi mu.

### *Polo agie heni pi Ebhe, ani atsia ato di masi bhú Timoté*

<sup>3</sup> Ma ngagie heni pi Ebhe li 'ngu gba mu-o. Ma ngamene kulu lima pi ani maka onguo ogbi ma adu nani amemene lie-o. Ma ngamemene ne bua nakpokpo kú 'ngu ndjindji. Ma nga'o mu kala Ebhe ndu 'kpi hana. Ngbikpi ne sukpe, nedhinga ma ngayo Ebhe lie, ma nga'o mu kala ani.

<sup>4</sup> Ma bhundja egbá\* nani mo oku e, gamu nau mu má gala bédhe ma bedhe, amba ma bedhe ne djali bedhe. <sup>5</sup> 'To ma 'ili 'to nabhuka na kukulu inde bhú mu-o de. 'Hi mu Enise ne bhe azu ani na eole, Loisi abhuka ngaiza nani pi mu kalanu. Ma abhuka na paká me ngamu di-e, mu ne nabhuka ango-o.

<sup>6</sup> Kaka-a, ma matá ngapa engu inde-e pi mu ne toto: kpo djua bhú angu inde li Ebhe aha e pi mu-o bhú bádha bhú 'bu gba e-e ne kalanu. Ebhe aha nani angu ango-o pi mu nedhinga ma a'o 'kpa ma pi 'ndji mu lie ko. <sup>7</sup> Padhá de, anga Bua li Ebhe aha e pi ní-e, a ko bua na tsulu de. Engu bini, Bua ango-o ngabedhe mangbo ní ne angu, ne mukunda di ne namene 'ngu li lelele.

<sup>8</sup> Kaka-a, mo odje numu li nakpokpo 'ngu gba Ngámá gba ní-e de. Abana ma nde lie bhú tikpu li 'ngu gba ani-e, mo odje di numu ka bhobhomu-o de. Engu bini, ziba mangbo nazu likabhu ne ma bhú dabili bini ngubula Bádha Ngali ní ngakpokpo e-o. Zu likabhu ango-o me mu nde alu ne angu inde li Ebhe ahaha e ko. <sup>9</sup> Ebhe akobho ní ngae, ani atsia a'i ní me ní du ne piga gba ni-o. Ani kobho ní ka bádha 'ngu gba ní-e de, engu bini, ani akobho ní ka bádha bhú 'bu gba e di ne ka anga ani akunda nani me a adu moko. Kala me ani bho kokpi ne doto-o, ani atima Yesu Kilisito pi ní maka ani

\* 1:4 1:4 Egbá: Polo a'o nani ká Timoté bhú gudhu na Efeso, ani atsia atapa bhú ndu doto na Makedonia. Ekpi ango-o, Timoté aku nani egbá naali. Tsia bhú 1 Tim. 1:3.

abhundja lie, amba ní sia bádha bhú 'bu ang-o. <sup>10</sup> Bádha bhú 'bu bhom-u akoto mbia inde-e bhú mbas-u, anga Ngámá gba ní Yesu Kilisito ago. Aní andjia angu kuo ngae. Aní asuno pí ní bhú Bádha Ngali-e me ní asía mukobho na dudu-ma masia.

<sup>11</sup> Ngama-a, Ebhe abhu ma me ma du bhulu titima, ma du di ne bhulu nakpokpo Bádha Ngali ang-o pí okpála, amba ma suno di pí uo. <sup>12</sup> Ma bhadi ngazu likabhu inde-e kabula nakpokpo Bádha Ngali ang-o. Engú bini, ma tété ne numu ade, anga ma mbila kpála inde ma a'o 'to ma 'to e hana. Ma abhuka la bhadi na paká me aní ne angu ngú nalila kulu inde aní aha e mu-ma-a nakolo li 'kpí aní agó lie-o. <sup>13</sup> Ongú inde mo odje me ma nde ngasuno e-e, a ko ongú na kukulu inde a ayo me mu kpata e-o. Lu kpekpeke bhú nabhuka, ne bhú mukunda inde ní nde ne e bhú nakpotsé liní ne Yesu Kilisito-o. <sup>14</sup> Lila bádha nasuno inde li Ebhe aha e pí mu-o ndjindji. Lila nasuno ang-o ne angu gba Bu Bhobua inde ngadu bhú ní-o.

<sup>15</sup> Mu mbila hana me omabhuka bhelé na ndu doto na Adjia hana a'o ka ma a'o. Fidjele ne Elemodjene di bhú ká uo. <sup>16</sup> A ayo me Ngámá dje ndjinga piga gba Onesifole-o, anga aní ateteke ma bhutsibhutsi, aní dje di numu li naama 'ngú ka ma nde lie bhú tikpu-o de. <sup>17</sup> Engú bini, nedhinga aní akolo lie bhú gudhu na Loma-a , aní agili ma ne kekele hana nakolo bha bini li nedhinga aní au ma lie-o. <sup>18</sup> Mu mbila ndjindji me nedhinga ma adu lie bhú Efeso-o, aní ateteke ma naali. A ayo me, Ngámá gba ní-e gie bádha 'ngú pí aní li 'kpí inde aní akódho 'ngú gba okpála lie-o.

## 2

### *Lili pí sudha gba Yesu Kilisito*

<sup>1</sup> Ngamu Timoté ndika ma, sia angu bhú bádha bhú 'bu inde li Yesu Kilisito ngaha e pí ní-o. <sup>2</sup> Ongú inde mo odje ma me ma nde ngakpokpo e kala bhiti okpála inde adu adje ma-a, suno pí okpála li okpála koko ngaziba o, inde i ti da nasusuno di pí okpála koko.

<sup>3</sup> Kibila likabhu maka sudha na babadha gba Yesu Kilisito. <sup>4</sup> Kpála inde bhú kulu na sudha-a lili bhú ongú ngangá na doto inde-e de, i du me aní kunda me ní mene engú inde anga li ngámá gba ní-o. Mene bhadi moko. <sup>5</sup> Bhundja la di me, i du me okpála nde ngamene ngeme nagu holo-o, li kpála gu maka li lili na ngeme aziba lie de-e, aní sia makalá de. <sup>6</sup> Kpála inde ngamene kpeke kulu nalu edyi-e, asía ngaiza ez-u na edyi ang-o kalanu ngae. <sup>7</sup> Bhundja pindji ongú ma ngapa e pí mu inde-e ndjindji, mu mene mo-o, li Ngámá gba ní-e há angu pí mu ngú naké mboli ndu ongú hana.

<sup>8</sup> Bádha Ngali inde ma ngakpokpo e pí okpála-a, a me Yesu Kilisito ne ndili gba Davidi, Ebhe azuku aní bhú ká okpála inde amu-o. Mo o'ili 'to mu li aní de. <sup>9</sup> Ma ngazu likabhu inde-e kabula Bádha Ngali ang-o. U ato belegu ma bhú tikpu mugito me ma amene siti 'ngú. Engú bini, u to eli gba Ebhe-e bhú tikpu de, eli ang-o nganu bha bini ne kalanu. <sup>10</sup> Kaka-a, ma ngakibila ndu likabhu inde ma ngazu e hana ngubula nateteke okpála li Ebhe abhu o-o, amba ngauo di-e, u sia mukobho di ne sangu inde ngadu dudu-ma ne dudu-ma ka Yesu Kilisito-o. <sup>11</sup> Engú inde ma adjí apa e inde-e, a ko kukulu 'ngú. Engú ang-o ngae inde:

«I du me ní nde amu bhú dabili bini ne Yesu-o,

ní dú bhadi bhú mukobho bhú dabili bini ne aní.

<sup>12</sup> I du me ní nde alu kpekpeke bhú likabhu

ní ngazu e kabula Bádha Ngali-e,

ní ú bhadi ne aní bhú dabili bini.

Engú bini, i du me ní nde apa me ní mbila aní de-e,

ngaani di-e, aní pá bhadi me ní mbila ní de.

<sup>13</sup> I du me ní nde ngamene engú inde i nga li aní de-e,

ngaani-e, aní djidji lie de,

aní améne ndu 'ngú inde aní apa me ní améne e hana.

Padhá de, anga aní tí da namene 'ngú kpi ne bhende

aní ngapa e de.»

*Kpála na kulu inde li Ebhe abhuka e*

<sup>14</sup> Ongú inde ma apa e pi mu bhomu-o, kpokpo pi omabhuka ngubula me u bhundja pépé. Gbele 'dje uo li 'ngú inde-e ne 'li Ebhe me u atsi pindji oeli de. Padhá de, anga tata tété ade, a mangbo ngasiti bua okpála inde ngadjedje-o. <sup>15</sup> La ngamu makpe-e, mene ne kpéke ngú ndu maka li Ebhe akunda lie-o. Du maka kpála na kulu inde ne namu li kulu gba e ade, a akunda napa me, kpokpo eli na kukulu-o pi okpála koko li lelele.

<sup>16</sup> Kpe agelø na padhá padhá inde i ti ne nabhuka de-e makpe. Padhá de, anga okpála inde adhika li ngua ongú bhomu-o ngayie li kpadji gba Ebhe-e bhuhuku. <sup>17</sup> La di-e, 'li uo ngayangba bhú ká okpála maka eka inde ngazidhaka mazidhaka. Imene ne Filete bhú ká okpála ango-o. <sup>18</sup> U ayie li kpadji na kukulu 'ngú ayie. U ngapa eu pi okpála me nedhinga nazuku ka okpála akodho 'kpí akodho. Kaka-a, okpála koko ayie ka uo li kpadji na nabhuka ayie. <sup>19</sup> Engú bini, kukulu eli gba Ebhe-e yie bhú da e de. Eli ango-o maka nepanda inde alu kpekpeke. U atsia aye balua tété me: «Ngámá mbila okpála gba e hana.†» U atsia aye di me: «A ayo me ndu okpála hana inde ngapa me ni ne okpála gba Ngámá-a, 'o namene siti 'ngú ma'o.»

<sup>20</sup> Adudu bhú 'ngbé 'ti ne limbi osaani bhelé. U abho osaani koko li olo, u abho okoko li aladja, u agolo okoko li ndula. A pise bha bini li obhobhomu-o de, u abho matá okoko li doto. Osaani bhomu-o li okulu kpikpiki. U nga'o obhende na babadha-a ngú okpí na anokomia, okoko-o, u ngamene kulu ne di ndu 'kpí hana. <sup>21</sup> A bhadi pi ní moko. Li kpála 'o namene ndu sisiti 'ngú inde ma ngapa 'ngú lie bhomu-o hana-a, li Ebhe 'ó ani kpi pi e. Ani dú maka saani na olo, anga ngaani-e, ani bedhe ngú namene ndu obabadha kulu hana.

*Líli pi bádha kpála na kulu gba Ngámá*

<sup>22</sup> Timoté, gbe limu li osisiti 'ngú inde li omakombise koko ngamene e magbe.

† 2:19 2:19 Tsia bhú Nom. 16:5.

Ngamu bhú dabili bini ne okpála bhende ngayo Ngámá ne bua o bini-e, yi gili namene ngbili 'ngú, ne ndu ne nabhuka, ne mukunda di ne guo 'ngú sunda yi. <sup>23</sup> Gbe limu li otodu na padhá padhá li tata nde lie ade-e magbe. Padhá de, anga mu mbila ndjindji me ndu 'ngú bhomu-o hana ngagbe tolo. <sup>24</sup> A ayo de me kpála na kulu gba Ngámá-a du natsi-e de, a ayo mangbo me ani du ne guo 'ngú pi ndu okpála hana. Ani du kpála inde ngasuno 'ngú pi okpála ndjindji. Ani du la di kpála nakibila 'ngú nedhinga li okpála ziba engú ani ngapa e lie de ko. <sup>25</sup> A ayo me, ani suno 'ngú pi okpála bhende nga'o bhayiki li engú inde ani ngapa e ne bhuku bua. Padhá de, anga nedhinga koko-o, li Ebhe há kpadji pi uo ngú nadi mabhundja gba o ngubula me u mbila eli na kukulu-o. <sup>26</sup> Abhomu-o, u hólo matá nabhundja 'ngú ndjindji. U tsia zé bhú ekú gba Djabulu inde aholo uo, a atsia a'o di uo sa líli gba ani-o.

### 3

*Engú inde akódho 'kpí li sokpí-o*

<sup>1</sup> Mbila ndjindji me bhú onedhinga na sokpí-e, kpekpeke da 'ngú adú naali. <sup>2</sup> Padhá de, anga okpála adú nambila bha engú gba o makpe, u adú akunda tia naali, u adú apa 'li o, u adú obhulu 'ngbé 'ndji, u adú nasobho Ebhe, u dú nadi okpála inde azu o-o de. U gie heni pi okpála inde amene bádha 'ngú pi o-o de, u mánga ehe gba Ebhe-e de. <sup>3</sup> U dú ne mukunda pi okpála koko de, u djé ndjinga obi o de, u adú apa 'ngú li okpála koko sisiti. U hólo bua o ka 'ngú de, u akunda bha bini namene obi o sisiti, u kúnda bádha 'ngú de. <sup>4</sup> U apú obi o pi obhulu yala gba o, bua uo adú ape má pupupu, u tsia dú na'o lio ne abhúlá. U akúnda mangbo engú inde a nga li o, u kúnda Ebhe de. <sup>5</sup> U adú namene mugito me o ne okpála gba Ebhe, engú bini, u ziba angu gba ani-e de. Gbe limu de okpála bhomu-o magbe!

<sup>6</sup> Okpála koko bhú ká okpála bhomu-o ngali bhú okuti, u tsia hólo li ekú

gba o-o olisi na padhá padhá 'ngú inde oo. Olisi ango-o abedhe ne gumu 'he ngangá, u atsia abedhe di ne sisiti 'ngú bedhe. <sup>7</sup> U ngagili ndu 'kpí hana nambila 'ngú, engú bini, angu uo kolo li nambila kukulu 'ngú-o belegu de bini. <sup>8</sup> Okpála bhomu-o ngayala nakpata kukulu 'ngú maka Djanesi ne Djambelesi ayala nani nadje 'li Moidje lie-o. A ko okpála li 'ndji o asiti, u bhuka Ebhe na paká paká de. <sup>9</sup> La-a, u lúka matá ne di tsutsu de, anga ngingi 'ngú u ngamene e akóto bhú djila ndu okpála hana ngbadha, maka bhe nani i mene Djanesi ne Djambelesi-o.

### *Engú inde a ayo nabhundja pindji e*

<sup>10</sup> La ngamu-o, mo okpata ma ndjindji bhú nasuno gba ma-o, mo ou lele nadhuku gba ma-o, mu mbila mabhundja gba ma-a hana, mu mbila nabhuka gba ma-a hana, mu mbila 'ndjá bua gba ma-a hana, mu mbila mukunda gba ma-a hana, mu mbila kpéke bua gba ma-a hana. <sup>11</sup> Mu mbila likabhu ma azu e ne mbolo u ato e li ma-a hana. Mu mbila ndu 'ngú inde apu pi ma bhú Atiokia, ne bhú Ikoniomu di ne bhú Lisitele hana. Ma azu likabhu na paká paká, engú bini, Ngámá agbegbe ma bhú ndu likabhu bhomu-o hana. <sup>12</sup> A ne okpála koko inde akunda nakobho maka li Ebhe akunda lie, bhú makpøtø gba ní ne Yesu Kilisito-o . A na paká me u ató mbolo li ndu uo hana. <sup>13</sup> La-a, obhulu nazi 'gú, inde di ngapite okpála-a, anú bhú siti 'ngú ne kalanu. U ngapite okpála, li okpála koko pite di uo.

<sup>14</sup> Engú bini ngamu-o, lu kpekpeke bhú 'ngú inde mo okpata e, mo osia di-ne bua mu hana ko. Mu mbila okpála asuno pi mu-o hana. <sup>15</sup> Nayie bhú ndili li mu-o, mu mbila Bhuku gba Ebhe-e ndjindji. Bhuku ango-o ti da naha pi mu imbilangú inde ngato kpála bhú mukobho na daduma ka nabhuka Yesu Kilisito-o. <sup>16</sup> Ndu 'ngú inde u aye e bhú Bhuku gba Ebhe-e hana ayie ka Ebhe. A ne tata ngú nasuno ngbili 'ngú pi kpála, ngú napana pulu 'ngú gba kpála pi e, ngú nali kpála, di ne ngú nasuno pi kpála namene 'ngú maka li Ebhe akunda lie-o. <sup>17</sup> Ebhe amene mo-o ngubula me kpála gba ni-e du bedhe

na paká paká ngú namene ndu babadha 'ngú hana.

## 4

### *Kpokpo 'li Ebhe*

<sup>1</sup> Yesu Kilisito agó galikpe mago, ani tsia ú ngámá píla doto. Ani akódho 'ngú gba okpála inde uu ne obhende amu-o. Kaka-a, ma ngaha líli inde-e pi mu kala ani ne kala Ebhe me: <sup>2</sup> kpokpo 'li Ebhe, lu pépé kpekpeke bhú bádha nedhinga abana bhú siti nedhinga. Mbe bhú 'ndji okpála inde ngamene siti 'ngú-o, pa pi uo me u 'o namene siti 'ngú ma'o. To masi bhú okpála koko ngú namene bádha 'ngú. Suno ndu ongu bhomu-o pi uo hana li lelele di ne 'ndjá bua. <sup>3</sup> Padhá de, anga ekpi akólo makolo, okpála kúnda matá nadje nasuno pindji kukulu 'ngú de. Engú bini, u adú nakpata gumu gba o makpe, u tsia pó bhúla omusuno na eu de o. Omusuno ango-o adú apa pi uo ongu inde anga li uo-o. <sup>4</sup> U anini 'dje o li nadje kukulu 'ngú, u tsia kpáta ongu na padhá padhá inde li okpála ngagbe e bhú 'ndji o-o. <sup>5</sup> Engú bini ngamu-o, du naholo bua mu bhú ndu 'ngú hana maholo. Kibila nazu likabhu makibila. Mene kulu nakpokpo Bádha Ngali-e ndjindji. Ndjia kulu li Ebhe aha e pi mu-o.

<sup>6</sup> Muma-a, nedhinga nandala 'kpa li mukobho gba ma-a ngubula me u bhøle ma-a akolo masikpe. Nedhinga nabhana lima pi doto inde-e ale. <sup>7</sup> Ma agu bádha gbele, ma agu holo akolo ali soso. Ma ndala 'kpa li nabhuka de. <sup>8</sup> Mbia inde-e, Ebhe aleke makalá muma abhúlá. A ko ndata na 'ngbø ndua inde li Ngámá ahá e muma li 'kpí ani akódho 'ngú gba okpála lie-o. Ndata ango-o, a ko ndata na mukobho. Ngámá gba ní-e, a ko Ngámá inde ngakodho 'ngú gba okpála ngbingbili. Ani há bha ndata ango-o muma kpi ma kpi de, engú bini, ani ahá di pi ndu okpála hana inde ne djali li nago ka ani-o.

### *Polo apa pi Timoté me ani go bhaka ni*

<sup>9</sup> Mene ne kpéke me mu go bhaka ma má gala! <sup>10</sup> Padhá de, anga Demasi a'o ká

ma ka gũmũ 'he na doto na naki inde-e a'o. Anì atapa bhú gũdhũ na Tesalonike. Kelesasi atapa bhú gũdhũ na Galatia. Tito atapa bhú gũdhũ na Dalamatia. <sup>11</sup> Luka atigala ne ma si ngae kpi e kpi. Mũ dũ ago-o, ha Maloko, mũ go ne anì bhú dabili bini, anga anì tí da nateteke ma li kulu ma nde ne e ko. <sup>12</sup> Ma atima Tisike bhú gũdhũ na Efeso. <sup>13</sup> Li mũ dũ nago-o, mũ de go mũma ne koti gba ma inde ma 'o nako ká e bhú gũdhũ na Tuluasi agba Kalipusi ko. Go di mũma ne obhuku gba ma-o, ane la mane obhende u amene e li kó 'nũ-o.

<sup>14</sup> Alekidjandele, bhũlũ nabho bolo-o amene ma sisiti naali. Ngámá agie pi anì nakpata lele siti 'ngú anì amene e li ma-a ngae. <sup>15</sup> Lila di limũ ka anì malila, anga anì ngagũ nasuno gba ní-e kpekpeke.

<sup>16</sup> Nedhinga ma akpokpo 'ngú gba ma-a lie bhutsibhutsi na bini kala okpála nakodho 'ngú-o, kpála bini teteke ma de. Ndũ uo hana a'o ká ma. Ebhe mbu li uo tété. <sup>17</sup> Engú bini, Ngámá ateteke ma ngae, anì aha angu mũma ngubula me ma kpokpo eli gba ni-e ndjindji. Ndũ omupagano hana inde adũ oo adje. Anì atsia agbegbe ma sakpa kuo. <sup>18</sup> Ngámá agbégbé matá ma sakpa ndũ egú li okpála ngagũ ma ne e hana, anì tsia tó ma bhú Nau gba e na abhúlá-o. A ayo me u dhөгө Ngámá dũdũma ne dũdũma! A adũ moko.

### *Oeli na soso*

<sup>19</sup> Pa pi Pilisila ne Akuila, a la di-e piga gba Onesifole me ma yi uo mayi. <sup>20</sup> Elasi atigala bhú gũdhũ na Kolito. Ma a'o ká Tolofime bhú gũdhũ na Milete, anga adũ li anì ne kuo. <sup>21</sup> Mene ne kpéke me mũ go ei kala nedhinga na zini. Ebulosi, ne Pudene, ne Line ne uo ne Kolodia, a la di-e ondaise ní inde ei-e hana apa me o yi mũ mayi.

<sup>22</sup> Ngámá dũ ne mũ. A ayo me, bádha bhú 'bu gba Ebhe-e dũ ne yi.



## Balua gba Polo pi Tito Eli na kalanu

Tito inde akolo nani kpála na kulu bhú dabili bini ne Polo, ani atsia adu di ateteke ani bhú kulu gba e na Ebhe inde ani adu adholo ne e, ani adu nani mapagano inde adji bua e, ani atsia aziba Kilisito . Polo aye balua inde pi Tito, makombi inde adu ateteke ani bhú Dadjua gba Ebhe na Kelete-o. Polo a'o nani ka ani oo ngubula natsia 'kpi li kulu na Dadjua gba Ebhe ango-o. Ngbengbe 'ngú bhú balua inde bata.

Engú na kalanu u aye bhú balua inde-e, ko nasuno pi Tito dasundu inde a ayo me obhelesi okpála na Dadjua gba Ebhe du ne e, adu kpi ne bhe na sisiti inde li okpála na Kelete nde ne e ko. Pipita-a, Polo ngaha líli pi Tito me ani du masuno pi limbi okpála ngangá na Dadjua gba Ebhe-o. Limbi okpála maka: obhosi na bhelesibhelesi, omakombise, obalise ne olisi bhe na bhelesibhelesi (inde a ayo me u ha líli pi otsalisi). Li soso-o, Polo ngaha líli pi Tito pindji lele nadholo gba makilisito, ne nadu ne mukunda, ne nadu ne guo 'ngú ngubula nakpe yala, ne nakpe tolo, a la di na gbogbo bhusa bhú Piga gba Ebhe.

### **Ongbengbe ongú inde bhú bhuku inde-e ngae inde:**

Eli na kalanu 1:1-4

Obhelesi okpála na Piga gba Ebhe 1:5-16

Engú a ayo me limbi okpála mene e bhú

Piga gba Ebhe 2:1-15

Naha líli gba Ebhe ne napa me kpála du ne nalila li e 3:1-11

Eli na soso 3:12-15

### *Polo yi Tito mayi*

<sup>1</sup> Ma aye balua inde-e ngama Polo, bali gba Ebhe, la di bhulu titima gba YesuKilisito . Ebhe aha kulu napanu kpadji na nabhuka pi okpála inde ani abhu o-o muma ngubula me u bhuka ni, amba u ke di mboli kukulu nasuno

inde ati ne mukobho inde ngadhege ani-o. <sup>2</sup> Abhomu-o, u ti da nadu ne 'to o me o osia mukobho na daduma masia. Ebhe inde i papa eu de-e, apana nani mukobho ango-o pi omaha e bhutode kala me ani bho kokpi ne doto. <sup>3</sup> Nedhinga inde li Ebhe a'o e akolo lie, Ebhe, Mukobho gba ni-e amene me omaha ni mbila 'li ni li kpadji nakpokpo Bádha Ngali . A bhomu-o kulu inde ani aha líli me ma mene e-o.

<sup>4</sup> Ma ngaye balua inde-e pi mu Tito. Mu maka kukulu ndili gba ma bhú 'bu nabhuka inde ngakpøtse ni ko. A ayo me bádha bhú 'bu ne guo 'ngú gba 'Dyi ni Ebhe, di ne Yesu Kilisito Mukobho gba ni-e du ne mu bhú dabili bini.

### *Lele mukobho gba obhelesi okpála na Piga gba Ebhe*

<sup>5</sup> Ma a'o ka mu bhú kpøme na Kelete, amba mu ndjia naleke ndu 'ngú hana inde atigala-o. A ayo me mu bhú obhelesi okpála na Piga gba Ebhe-e bhú ndu gudhu hana bini ne bini nakpata olili nako ma aha e pi mu-o moko me, <sup>6</sup> a ayo de me u u bhele kpála na Piga gba Ebhe-e ne siti 'ngú-o de. Ani du ne koli øle bini. A ayo me ongisi gba ani-e du omabhuka . U amene engú bini de inde u 'i uo ka e me, a ko ongisi na sisiti, di ne me, a ko ongisi na ndjondjo.

<sup>7</sup> Bhele kpála na Piga gba Ebhe-e ngalila kulu gba Ebhe-e ngae. Kaka-a, a ayo de me u u ani ne siti 'ngú-o de. A adu kpála na 'ngbé 'ndji de. Ani adu nake 'ngú lie má gala de. Ani ahá lie pi pandi de. A adu bhulu naga gbele de. Ani adu nagili tia li siti kpadji de. <sup>8</sup> Engú bini, ani du nasia ogomago ndjindji. Ani kunda bádha 'ngú. Ani du nabhundja 'ngú ndjindji. Ani du ngbingbili. Ani du bubu kala okpála di ne kala Ebhe. Ani du kpála naholo bua e ka 'ngú maholo. <sup>9</sup> A ayo me ani gbite lie kpekpeke li Eli na kukulu inde ati ne engú inde ni asuno e pi ani-o. Abhomu-o, ani ti da nato masi bhú okpála koko ne nasuno na ngbingbili-o. Ani tsia ti la di da nasuno pi okpála inde nga'o bhayiki li nasuno gba ani-e me uo li pulu kpadji.

*Polo agbele 'dje Tito pindji nasuno na eu*

<sup>10</sup> Okpála bhelé ne kpéke 'ndji, a ane la mane bhú ká okpála inde ngasuno me a ayo me omakilisito kpata líli gba omaYuda lí kpadji nali gandja-o . U ngapite okpála koko, u di ngapa ongú na padhá padhá. <sup>11</sup> A ayo nagbite 'bhø uo, anga u ngangbingi 'ndji opiga libhomu ne nasuno ongú inde a ayo nasuno e de, ngubula nasia tia lí siti kpadji.

<sup>12</sup> Suka kpála bini na kpømø na Kelete-e, adu nani bhulu imbilangu. Ani apa nani ne 'bhø e me: «Okpála na Kelete-e, a ko odidili obhulu eu, uo maka onu na 'gú. A ko obhulu ipio, u ngabhundja bha bini bula 'ngú na 'z.» <sup>13</sup> Engú inde ani apa e bhomu-o, a ko kukulu 'ngú. Kaka-a, mbe bhú 'ndji uo tété kpekpeke, ngubula me u lu kpekpeke bhú nabhuka, <sup>14</sup> u a'ó la di 'ndji o lí ongú na padhá padhá inde lí omaYuda ngagbe e bhú 'ndji o de. U adú di namene líli gba okpála bhende ngayala kukulu 'ngú-o de. <sup>15</sup> Pi okpála bhende kala Ebhe bubu-o, ndu 'he hana bhadi bubu. La-a, pi okpála bhende kala Ebhe bubu ade-e, inde ayala nabhuka-a, ehe bini pi uo bubu belegu ade bini. Padhá de, anga imbilangu di ne bua nakpokpo kú 'ngú gba uo-o asiti. <sup>16</sup> U ngapa me, o mbila Ebhe hana, engú bini ongú inde u ngamene e ngasuno me u mbila ani de. Engú inde u ngamene e nga lí okpála de, a nga la di lí Ebhe de. A ko okpála na kpekpeke 'ndji. Uo la di ne angu namene bádha 'ngú belegu ade bini.

## 2

*Polo aha líli pi omabhuka*

<sup>1</sup> Engú bini, ngamu Tito-o, pa engú inde ati ne nasuno na ngbingbili-o. <sup>2</sup> Pa pi obhosi bhende na gbegegbe-e me, u du naholo bua o ka 'ngú maholo. U du ne okpála inde u ngamanga o mamanga. U du nabhundja 'ngú ndjindji. U lu la di ne angu bhú nabhuka , ne mukunda, di ne 'ndjá bua. <sup>3</sup> Ha di líli pi olisi bhe na obhelesibhelesi-o. Pa pi uo me mukobho gba uo-o du bubu kala Ebhe. U adú napa osisiti 'ngú lí okpála koko de. La di-e, u

adú obalise na pandi de. A ayo me u suno pi okpála koko ongú na ndjindji. <sup>4</sup> U mene mo-o, i tsia súno pi otsalisi me, u du ne mukunda pi obhosi gba o, di ne pi ongisi gba o, <sup>5</sup> u du nabhundja 'ngú ndjindji, u adú akunda obhosi ngangá de, u 'o 'to o 'to piga gba o, u du ndjindji. U mene la di olíli gba obhosi gba o makpe, ngubula me kpála bini asóbho eli gba Ebhe-e de.

<sup>6</sup> Ha di líli pi omakombise me, u du namene ndu 'ngú hana lí lelele. <sup>7</sup> Ngamu makpe-e, a ayo me mu suno bhú okulu gba mu-o ongú na ndjindji, inde lí okpála ti da nakpata nganda e. A ayo me nasuno gba mu-o du ngbingbili, amba adu di bhe lí okpála ti da namanga e. <sup>8</sup> A ayo me 'li mu du ngbingbili, eli inde lí okpála ti da naboyo e de, amba obhulu yala gba ní-e asia engú na sisiti napapa lí ní de. Abhomu-o, u tsia djé namu na paká paká.

<sup>9</sup> A ayo me, obalise mene líli gba omakulasi o bhú ndu 'ngú hana. A ayo me u du amene engú inde anga lí omakulasi o. U adú adjidji 'ngú sa 'li uo de. <sup>10</sup> U azí 'he gba omakulasi o de. Engú bini, u du ndu 'kpí hana ngbingbili lí pápá gba uo-o. U mene mo-o, lí okpála tsia ú me nasuno inde pindji Ebhe, Mukobho gba ní-e ndjindji ka nau lele maka u ngakobho lie-o.

*Yesu akunda me ní du piga gba ni*

<sup>11</sup> A moko, Ebhe asuno bádha bhú 'bu gba e inde ngakobho ndu okpála hana bhú siti 'ngú-o asuno. I dú kaka de-e, kpála bini de kóbho de. <sup>12</sup> Bádha bhú 'bu ango-o ngasuno pi ní nayala siti 'ngú. A la di ngasuno pi ní nayala ogumu ongú na doto, amba nedhinga ní nde nga lie pi doto inde-e, a ayo me ní du nabhundja 'ngú ndjindji, ní du namene engú inde ngbingbili, di ne bhende nganga lí Ebhe manga. <sup>13</sup> Ní du namene moko ngubula nadjeké ekpi na djali inde ní nga'o 'to ní 'to e-o. Lí 'kpí ango-o, Yesu Kilisito inde Ebhe gba ní na ngbéngbé, di ne Mukobho gba ní-e, agie lie píla doto bhú sangu gba e ko. <sup>14</sup> Ani aha mukobho gba e makpe pi ní ngubula nagbegbe ní bhú ndu osisiti 'ngú hana. Ani abhu ní me ní kolo piga gba

ni makpe, piga inde bubu kala ni-o, amba ní dɔ piga inde abedhe ne gɔmɔ namene babadha 'ngú.

<sup>15</sup> A bhomɔ-o engú inde ayo me mɔ suno e ne angu mɔ hana, nedhinga inde mɔ ngato masi lie bhú okpála inde ngadje mɔ, di ne nedhinga inde mɔ ngambe lie bhú 'ndji obhende i dje mɔ de ko. Mo oká kpadji pi kpála bini de me ani u mɔ padhá-a de.

### 3

#### *Lele nadɔ ka omabhuka bhú ká omɔpagano*

<sup>1</sup> Bhundja pi ndɔ omabhuka hana me, a ayo me u manga ongámási, di ne okpála bhende ngau pí 'ndji uo-o. A ayo me u mene líli gba uo-o, amba u dɔ bedhe ngú namene ndɔ ongú na babadha hana. <sup>2</sup> A ayo de me u di kpála-a de. U adɔ obhɔlɔ gbele de. A ayo me u dɔ okpála na guo 'ngú. A ayo me u dɔ ndɔ 'kpí hana ne bhɔkɔ bua pi ndɔ okpála hana. <sup>3</sup> Padhá de, anga nganí di-e, ní adɔ nani ongingi. Ní adɔ nani okpála na kpekpeke 'ndji. Ní adɔ nani li pɔlɔ kpadji. Ondɔ ngangá gɔmɔ 'he, di ne oehe nanga li ní manga a'o nani ní obalise. Mɔkobho gba ní-e adɔ nani sisiti. Ní abedhe di nani ne ogɔmɔ 'he bedhe. Ní adɔ ayala okpála koko, u atsia adɔ di ayala ní.

<sup>4</sup> Engú bini, nedhinga li Ebhe, Mɔkobho gba ní-e asuno bádha 'ngú di ne mɔkɔnda gba e lie pi okpála-a, <sup>5</sup> ani atsia akobho ní. Ani kobho ní ka ongú na ngbingbili inde ní amene e-e de. Engú bini, ani akobho ní ka ani adje ndjinga ní lie ko. Ani akobho ní li kpadji naha Bu Bhobua pi ní. Bu Bhobua ango-o a'e osisiti 'ngú gba ní-o, ani atsia aha mɔkobho na mbia pi ní, ne lele nadɔ na mbia. <sup>6</sup> Ebhe atuko Bu Bhobua ango-o pí ní bhelé li kpadji na okulu inde li Yesu Kilisito, Mɔkobho gba ní-e amene e ko. <sup>7</sup> Abhomɔ-o, Ebhe atsia amene me ní kolo ngbingbili ka bádha bhú 'bu gba ni ko, amba ní ti la di da nasia mɔkobho na dɔdɔma, inde ní nde ne 'to ní 'to e-o. <sup>8</sup> Eli bhomɔ-o, a ko eli na kɔkɔlɔ. Ma akɔnda la di me,

mɔ lɔ pépé kpekpeke, amba okpála hana inde abhuka Ebhe-e, ha lio ngú namene ongú na babadha. A bhomɔ-o engú inde ndjindji, inde di ne tata pi ndɔ okpála hana ko.

<sup>9</sup> Engú bini, mo odú namene obhayiki na ngingi de. Mo odú namene kpekebho li nakpokpo ndjándjá kpokpodɔmɔ de. Mo odú namene otolo di ne bhayiki pindji líli gba Moidje-e de. Padhá de, anga ndɔ ongú bhomɔ-o hana padhá, tata la di tété ade. <sup>10</sup> Mbe bhú 'ndji bhɔlɔ nagbogbo bhɔsɔ omabhuka bhɔtsibhɔtsi na bini, mɔ mbe bhú 'ndji ani bhɔtsibhɔtsi na bhisí, amba pipíta ani dje mɔ de-e, mɔ de gbe ani bhú ká uo magbe. <sup>11</sup> Mɔ mbila ndjindji me, ngua kpála bhomɔ-o ayie li ngbili kpadji ayie. Ani atsia a'o lie bhú mangimbo ngae makpe, ka ani azi 'ndji e lie bhú namene siti 'ngú-o.

#### *Polo aha olíli na soso pi Tito*

<sup>12</sup> Ma ngatima Alatemasi pi mɔ. I dɔ ani de-e, li ma atíma Tisike. Nedhinga ani akólo lie, mɔ de mene ne kpéke ngú nago nabhaka ma bhú gɔdhɔ na Nikopolisi. Padhá de, anga ma apa me nedhinga na zini-e ané ma me, ma nde oo ko. <sup>13</sup> Tsia 'kpí li 'ngú na dhɔkɔ gba avɔka Djenasi, ngauo ne Apolosi-e ndjindji, amba u adú bhú ndibhili 'he bini de. <sup>14</sup> A ayo di me okpála gba ní-e mbila lio ne namene ongú na babadha ngɔbula me u dɔ ne oehe ngɔbula nateteke okpála inde ne gɔgɔmɔ-o ne di. U mene mo-o, kulu gba uo-o tsia zú nguwa.

<sup>15</sup> Ndɔ okpála hana inde bhú dabilí bini ne ma-a apa me, o yi mɔ mayi. Pa pi ondaise ní na mɔkɔnda, inde ní nde ne o bhú 'bu nabhuka me, ya yi uo mayi. A ayo me, Ebhe tuko bisagu pí ndɔ yi hana!

## Balua gba Polo pi Filemo Eli na kalanu

Filemo nani ne makilisito na kpekpeke, a mana me a ko nani suka okpála na Dadjua gba Ebhe na Kolosai. La die, adu nani ka ani ne bali bini inde adu 'li e me Onedjime. Bali ango-o, akpe nani makula e, ani anu au li e ne Polo me ani nde bhú tikpu. Ani adje Bádha Ngali gba Kilisito ka Polo, ani atsia akolo makilisito. Abhomu-o, Polo atsia aye balua pi Filemo ne nayo ka ani me, a ayo me u dje lio ne bali gba e-o. Polo atsia atima Onedjime agba Filemo ne nakikiliki li e pi Filemo me, ani sia ani ne bádha bua, ani asia bha ani maka bali inde u ambu li e de. Engú bini, ani sia ani maka ndai e inde makilisito.

### **Ongbengbe ongú inde bhú bhuku inde-e ngae inde:**

Eli na kalanu 1-3

Napa 'ngú ndjindji li kate Filemo 4-7

Nakikiliki lie ngubula Onedjime 8-22

Eli na soso 23-25

### *Polo ne Timoté yi Filemo ne obi e mayi*

<sup>1</sup> Ma aye balua inde-e pi mu ngama Polo. Ngama-a, ma bhú tikpu kabula 'li Yesu Kilisito . Ya aye pi mu ngaya bhú dabili bini ne ndai ní na mukunda Timoté. Ya aye pi mu ndai ya Filemo, ngamu kpála inde ngakpokpo Bádha Ngali bhú dabili bini ne ya-o. <sup>2</sup> Ya aye di balua ango-o pi ndai ní na eole Apia, ne pi Alisipe inde ngagu gbele bhú dabili bini ne ní-o. Ya aye di pi ondaise ní inde ayoyo Ebhe bhú 'ti gba mu-o. <sup>3</sup> A ayo me Ebhe 'Dyi ní, bhú dabili bini ne Ngámá Yesu Kilisito suno bádha bhú 'bu pi yi, amba u ha di guo 'ngú pi yi.

### *Polo agie heni pi Ebhe ngubula Filemo, ani atsia ayo di Ebhe pi ani*

<sup>4</sup> Ndu nedhinga hana ma ngayo Ebhe lie-e, ma ngabundja mu Filemo. Ma la di ngagie heni pi ani ngubula mu ndu 'kpi hana. <sup>5</sup> Padhá de, anga ma ngadje me mu ne mukunda naali pi ndu omabhuka hana, mu la di ne nabhuka bhú Ngámá

Yesu. <sup>6</sup> Ma ngayo Ebhe ngubula me nabhuka inde ní akpotsé liní ne mu bhú e-e, zu obabadha nguwa, amba mu ke mboli obabadha ndu 'ngú hana inde li Ebhe aha e pi ní-e má kpulukutu! Li mu mene mo-o, ndu okpála hana dhégo Kilisito. <sup>7</sup> Ndai ma, mukunda mu nde ne e pi ondaise ní-e aha djali mama naali, atsia ato di masi bhú ma, anga mo oké bua omabhuka koko-o.

### *Polo ayo ka Filemo me ani sia Onezime ndjindji*

<sup>8</sup> Kaka-a, abana ma nde lie ne angu nayo 'he ka mu maka li bua ma akunda lie bhú 'bu nabhuka ní nde ne mu bhú e, <sup>9</sup> ma ayó ka mu mo-o de. La-a, ma ayó mangbo 'he ka mu kabula mukunda ní nde ne mu bhú e ko. Ma ngapa 'ngú bhomu pi mu ngama bhele kpála Polo, ma la di mbia inde-e bhú tikpu kabula Yesu Kilisito. <sup>10</sup> Ma ngakikiliki lima pi mu ngubula Onezime, ndili gba ma bhú 'bu nabhuka. Ani abhuka Yesu sa 'kpa ma ei, nedhinga ma nde lie bhú tikpu-o. Kaka-a, ani maka ndili gba ma, ma maka 'dyi ani. <sup>11</sup> Nako kalanu-o, ani du pi mu li kulu bini de, engú bini mbia inde-e, ani akolo pi ndu ní bhisi hana li kulu.

<sup>12</sup> Ngaani-e, a ko kpukpú na bua ma. Mbia inde-e, ma ngagie ani pi mu. <sup>13</sup> Ma nde lie bhú tikpu ei kabula Bádha Ngali-e, bua ma apa mama me ani du de ma si ngú nateteke ma mada mu. <sup>14</sup> Engú bini, ma kunda nako namene mo-o padhá de me mu nde ziba de-e de. Padhá de, anga ma kunda nagbite mu li namene mo-o ne ekpu de. Ma akunda mangbo me mu mene engú ango-o ne bádha bua.

<sup>15</sup> Nedhinga koko-o, Ebhe amene me Onezime nu li bili koko ngubula nedhinga bedi, amba pipita-a, ani gie lie agba mu, ngú nadu ne mu bhú dabili bini ndu 'kpi hana. <sup>16</sup> Padhá de, anga mbia inde-e, a ko matá bali de, engú bini ani ane bali mane. A ko ndai ní na mukunda. Ngama Polo-o, ma kunda ani naali. La ngamu-o, mukunda gba mu pi ani-e ané la matá mane, anga a ko kpála-kuti, a ko la di ndai mu makilisito.

<sup>17</sup> Kaka-a, i dɔ me mɔ nde ngau ma maka ndai mɔ-o, mɔ de sia anɔ mɔgito me mo osia ma makpe. <sup>18</sup> Li anɔ mene mɔ sisiti-e, i dɔ di me anɔ nde ne bopulu nagigie pi mɔ-o, ma agie pi mɔ ngama. <sup>19</sup> Ngama Polo-o, ma aye pi mɔ ne 'kpa ma makpe me: «Ma agie pi mɔ ngama.» La-a, mɔ ti da nayo ehe bini li ma de, anga mukobho na dɔdɔma inde mo osia e-e, mo odje 'ngú ang-o ka ma. <sup>20</sup> A moko ndai ma, mene engú bhomɔ-o mɔma kabula mukunda gba Ngámá gba ní-o. Teteke bua ma, anga ní akpetse liní bhú 'bu Kilisito.

<sup>21</sup> Nedhinga ma ngaye balua inde-e pi mɔ lie, ma aziba na paká me mo oméne engú ma ngayo e ka mɔ-o mamene. Ma ambila la di me mo oméne belegu ané bhende ma ngayo e ka mɔ-o mane. <sup>22</sup> Nedhinga inde mo osia Onezime lie agba mɔ-o, mɔ de leke di dabili mɔma ngú nasi ka ma tété. Padhá de, anga ma abhundja me Ebhe asúno bádha bhú 'bu bhú mayo gba yi-e masuno. Anɔ tsia bhúlu kpadji mɔma me ma kolo li yi oo ko.

### *Oeli na soso*

<sup>23</sup> Epafalasi, inde bhú tikpa bhú dabili bini ne ma kabula Yesu Kilisito-o yi mɔ mayi. <sup>24</sup> Maloko, ne Alisitaluka, ne Demasi di ne Luka ndɔ uo hana ngamene kulu ne ma bhú dabili bini. U apa di me o yi mɔ mayi. <sup>25</sup> A ayo me bádha bhú 'bu gba Ngámá gba ní Yesu Kilisito-o dɔ ne yi.

## Balua u aye e pi omaEbele Eli na kalanu

Balua inde u aye nani e pi omaEbele, u aye nani pi limbi omakilisito inde akolo masikpe de na'o ká nabhuka gba o bhú Kilisito ka nato mbolo li uo adu anu bha ne kalanu-o. Kpála inde aye balua ango-o, adu ato masi bhú uo ane mane bhú nabhuka ne nasuno pi uo me, Yesu Kilisito ne polofeta na kukulu, a ko la di polofeta na soso inde li Ebhe apana lie bhú e pi okpála gba e-o.

Bhú 'ngú na Ebhe gba omaYuda-a, odi-mandø adu amene mayo ne natsulu onu ngubula me Ebhe mbu li siti 'ngú gba okpála. Engú inde u adu amene bhomu-o, adu kulu Yesu inde Ndili na duduma gba Ebhe, inde aha lie ngae makpe maka enu inde natsulu matsulu. Kaka-a, Ebhe a'o ani ngbéngbé ane opolofeta, ane oandjelu, ane Moidje ngae makpe, Ebhe atsia pa me a ko dimandø na duduma. Li pápá gba ani-e, ndu omabhuka hana asia mukobho li tsulu u adu ne e li pápá na siti 'ngú gba o ne li pápá na kuo.

### Ongbengbe ongu inde bhú bhuku inde-e ngae inde:

Eli na kalanu: Ebhe ngasuno li e mbámábá bhú Kilisito 1:1-3

Kilisito ngbéngbé ane opolofeta, ane oandjelu, ane Moidje, ane Djodjue, ane odimandø, ane gandja a la di-e makiso 1:4 - 10:39

Engú na ngbéngbé a ko nabhuka 11:1 - 12:29

Nanga li Ebhe 13:1-19

Mayo na soso 13:20-21

Eli na soso 13:22-25

### Yesu Kilisito ne Ndili gba Ebhe makpe

<sup>1</sup> Nani kalanu-o, Ebhe akpokpo 'ngú pi onguo ogbi ní bhutsibhutsi di ne li okpadji bhelé bhú 'li opolofeta. <sup>2</sup> La bhú oekpí na soso inde-e, ani akpokpo 'ngú pi ní bhú 'li Ndili gba e inde ani a'o e ngámá pí

'ndji ndu 'he hana, di u abho nani ndu 'he hana bhú dabili bini ne e-o. <sup>3</sup> Ani aha bha 'Dyi e hana, kaka-a, kpála bhende au sangu gba Ndili-e au bhomu-o sangu gba Ebhe makpe. Ani abi ndu 'he hana ne 'li e na angu-o. Pita ani agbegbe okpála lie bhú siti 'ngú gba o-o, ani atsia atapa abhúlá ngú nadu li bili na ngámá li pá 'kpa na kokpa gba Ebhe Angbamili.

### Ndili gba Ebhe-e ane oandjelu mane

<sup>4</sup> Ndili gba Ebhe-e ane oandjelu mane, kaka Ebhe agisila 'ili li ani inde ane bhende gba uo-o mane.

<sup>5</sup> Padhá de, anga Ebhe pa nga pi andjelu bini de me:

«Ngamu-o, mu ne Ndili gba ma, naki inde-e, ma asuno 'ngú ango-o mbámábá.» †

Ani pa di li 'ngú gba andjelu bini de me:

«Ma adú ne 'dyi ani, ani tsia dú ne Ndili gba ma-o.» †

<sup>6</sup> Li nedhinga li Ebhe adu natima gina Ndili gba e lie píla doto-o, ani apa me:

«A ayo me ndu oandjelu gba ma-a hana dhøgø ani.» †

<sup>7</sup> Ani atsia apa li 'ngú gba oandjelu-o me:

«Oandjelu gba ma-a ngamene kulu muma maka anvi, u ngateteke ma maka djua inde ngatsi matsi.» †

<sup>8</sup> La-a, ani atsia apa li 'ngú gba Ndili-e me:

«Mu ne Ebhe! Nau gba mu-o adú duduma ne duduma.

Mu ngau pí 'ndji okpála gba mu-o ne ngbili 'ngú .

<sup>9</sup> Mu kunda ngbili 'ngú, mo oyala engú na sisiti.

Kaka-a, Ebhe gba mu-o, a'o mu kpi pi e,

ani abhu mu bhú ká obi mu, ani atsia atuko emu na djali pí 'ndji mu.» †

<sup>10</sup> Ebhe atsia apa matá me:

«Ngámá, mo obho doto nayie li lilita ngamu,

kokpí ne nganda 'kpa mu.

<sup>11</sup> Ndu 'ngú bhomu-o hana angíta mangíta, la ngamu-o, mo otígala matigala.

† 1:5 1:5 Tsia bhú Ets. 2:7. † 1:5 1:5 Tsia bhú 2 Sam. 7:14. † 1:6 1:6 Tsia bhú Det. 32:43. † 1:7 1:7 Tsia bhú Ets. 104:4. † 1:9 1:9 Tsia bhú Ets. 45:7-8.

Ndũndũ hana akádha maka bongo .

<sup>12</sup> Mo onúnu uo maka u anunu koti lie,  
u tsia yípa di maka li bongo ayiyipa  
lie.

La ngamũ-o, mũ yiyipa de, kalanga gba  
mũ-o ndjia la di-i de.†»

<sup>13</sup> Ebhe pa nga belegũ pi andjelu bini de  
me:

«Ngamũ-o, go dũ kuto li pa 'kpa ma  
na kokpa,

ma abú obhũlũ yala gba mũ-o

dabili na sa 'dhũ mũ.†»

<sup>14</sup> Oandjelu bha ne obua inde ngamene  
kulu pi Ebhe. Aní ngatima uo me u  
nũ nateteke okpála inde ayo me u sia  
mũkobho-o.

## 2

*Mũkobho inde u akpokpo 'ngú na e-e, a  
ko kũkũlũ mũkobho*

<sup>1</sup> Kaka-a, a ayo me ní gbite liní kpekpeke  
li kũkũlũ 'ngú inde ní adje e-o, amba ní  
ambú li kpadji-e de. <sup>2</sup> Engú inde li Ebhe  
akpokpo e bhú 'li oandjelu-o , asuno lie  
me a ko kũkũlũ 'ngú. Okpála bhende i  
lila eli ango-o de-e, inde agũmũ líli-e, u  
asia ke 'ngú inde ati ne uo-o. <sup>3</sup> La nganí-  
e, ní ti da naneke ke 'ngú-o lele pi, i dũ  
me ní nde 'o 'to ní 'to kũkũlũ mũkobho-o  
de-e? Ngámá ngae makpe akpokpo 'ngú  
na mũkobho ango-o kalanũ ngae. Pipita-  
a, okpála bhende adje-e atsia apa pi ní  
me a ko kũkũlũ 'ngú. <sup>4</sup> Abhomũ-o, Ebhe  
atsia asuno me engú u akpokpo e-e, a ko  
kũkũlũ 'ngú ne ongú na ngangamba, di  
ne ndũ okiaka 'ngú hana. Ebhe apana  
ongú ango-o bhú naha Bu Bhobua maka  
aní akũnda lie-o.

*Yesu akpi ngũbula nakobho ndũ okpála  
hana*

<sup>5</sup> Ebhe ha angu pi oandjelu ngú nako  
pí doto inde ngago ya ngakpokpo 'ngú na  
e inde-e de. <sup>6</sup> Engú bini, bhú Bhuku gba  
Ebhe-e , kpála bini apa me:

«Kpála-kuti ne da, ngũbula me mũ  
bhundja engú gba aní-e?

Ndili gba kpála-kuti ne da me mo 'o  
'to mũ 'to aní-e?

<sup>7</sup> Mo o'o nani aní sa oandjelu ngũbula  
nedhinga bedi.

Mo otsia ato ndata na asasaua ne  
mazima bhú 'ndji aní.

<sup>8</sup> Mo otsia a'o ndũ 'he hana sa aní.†»

Ebhe a'o nani kpála-kuti ngámá pí 'ndji  
ndũ 'he hana. A kũnda napa me, aní 'o  
nani ehe bini de me aneke nadũ sa aní-  
e de. La mbia inde-e, ní u de me kpála  
ne ngámá pí 'ndji ndũ 'he hana-a de.†

<sup>9</sup> Engú bini, ní ngau me Yesu adũ nani  
sa oandjelu ngũbula nedhinga bedi, amba  
ka bádha bhú 'bu gba Ebhe-e , aní ti da  
nakpi pi ndũ okpála hana. Ní ngau mbia  
inde-e me, aní adyi ndata na asasaua ne  
mazima, anga aní asia nani likabhu bhú  
nakpi ka e. <sup>10</sup> Padhá de, anga Ebhe abho  
ndũ 'he hana ngae, ndũ 'he hana la di  
ne naani. Aní akũnda me ongisi gba ni-  
e bhelé sia di sangu gba ni-o. I nde lie me  
Yesu Kilisito ngasuno kpadji na mũkobho  
pi uo ngae, a ayo nani me aní dũ bedhe  
hana li kpadji nazũ likabhu.

<sup>11</sup> Yesu ngagbegbe okpála bhú siti 'ngú  
gba o-o ngae. La di-e, 'dyi ndũ okpála  
hana inde aní agbegbe o bhú siti 'ngú-o  
bha bini. Kaka-a, nũmũ li aní ade ngú  
na'í uo me ondaise ni. <sup>12</sup> Aní apa pi Ebhe  
me:

«Ho Ebhe! Ma apá engú gba mũ-o pi  
ondaise ma.

Ma atóko mũ kala ndũ okpála hana.†»

<sup>13</sup> Aní apa di me:

«Ma a'ó nabhuka gba ma-a bhú Ebhe.†.»

La di me:

«Tsia ya bhú dabili bini ne ongisi inde li  
Ebhe aha o mũma-o.†»

<sup>14</sup> La di-e, ongisi gba Ebhe-e, a ko  
okpála-kuti inde bhú kute, a la di bhú  
uo ne ngute. Yesu ngae makpe akolo  
bhadi maka uo, aní asia di kute ne ngute  
maka uo. Abhomũ-o, bhú nakpi ka aní-e,  
aní atsia aha angu djabũlũ inde li angu  
na kuo nde ka e-o. <sup>15</sup> Yesu amene di  
mo-o ngũbula nakobho okpála inde akolo  
maka obalise gba kuo bhú mũkobho gba o  
libhomu. <sup>16</sup> Padhá de, anga a na paká me  
aní go nani nateteke oandjelu de. Engú

† 1:12 1:12 Tsia bhú Ets. 102:26, 28. † 1:13 1:13 Tsia bhú Ets. 110:1. † 2:8 2:8 Tsia bhú Ets. 8:5-7. † 2:8  
2:8 Tsia bhú Ets. 8:5-7. † 2:12 2:12 Tsia bhú Ets. 22:23. † 2:13 2:13 Tsia bhú Iša. 8:17. † 2:13 2:13 Tsia  
bhú Iša. 8:18.

bini, ani ago mangbo ngú nateteke piga gba Abalahama. <sup>17</sup> Kaka-a, a ayo nani me ani kolo bhú ndu 'ngú hana maka ondaise e, amba ani du 'ngbé dimandø . A ayo nani me ani kolo 'ngbé dimandø inde abedhe ne ndjinga, inde di ngamene kulu gba Ebhe-e li lelele, ngubula mambu na siti 'ngú gba okpála-o. <sup>18</sup> Mbia inde-e, ani ti da nateteke okpála inde ngali bhú nale-o, anga ngaani makpe-e, ani apu bhú nale, ani atsia azu di likabhu.

### 3

#### *Yesu ane Moidje mane*

<sup>1</sup> Kaka-a, ondaise ma omakilisito, ngayi okpála inde li Ebhe a'i o-o, yi 'o mabhundja gba yi-e pí Yesu. Padhá de, anga Ebhe atima ani ngubula me ani du bhulu titima di ne 'ngbé dimandø gba ní-o, ní atsia abhuka la bhadi ka ani. <sup>2</sup> Ani amene kulu kala Ebhe inde abhu ani ngú kulu ango-o ndjindji. Ani amene kulu ango-o li lelele maka li Moidje amene nani lie bhú Piga gba Ebhe-e libhomu-o.† <sup>3</sup> Kpála inde ayiki eti-e, sisia nadhøgø nane eti inde ani ayiki e-o. A moko, a ayo me u dhøgø Yesu nane Moidje mane. <sup>4</sup> Ayiyiki eti hana ne kpála bini. La-a, kpála inde abho ndu 'he hana-a ne Ebhe. <sup>5</sup> Moidje ngae makpe amene nani kulu li lelele bhú Piga gba Ebhe-e libhomu. Ani adu nani kpála na kulu inde adu nakpokpo 'ngú li Ebhe adu nakunda napa e sidi-o. <sup>6</sup> Engú bini, Kilisito ne Ndili inde ngamene kulu li lelele. Ani maka nepanda li Ebhe a'o e li eti gba e-o. Eti ango-o, a ko ní, i du me ní nde abhuka na paká paká, i du la di me ní nde ne gindaginda li 'ngú ní nga'o 'to ní 'to e-o.

*Bili naguo inde li Ebhe aleke e pi okpála inde ngamanga ani-o*

<sup>7</sup> Kaka-a, a maka li Bu Bhobua apa lie me:

«I du me yi nde adje 'li Ebhe naki inde-e,

<sup>8</sup> yi agbíte bua yi de, maka yi agbe nani kpéke 'ndji lie li ani, ekpí inde yi ale ani lie abhú mili bili-o.

<sup>9</sup> Bhú 'gu oo, onguo ogbi yi ale nani ma ngubula nambila 'ndjá bua gba ma-o,

abana u au ndu 'ngú ma amene e, ngubula kalanga ndjikpa badha lie hana-o.

<sup>10</sup> Kaka-a, bua ma atsia ake ne uo. Abhomu-o, ma atsia apa me:

«Uo ngadji 'ngbu o li ma ndu nedhinga hana bhú mabhundja gba o.

U mbila engú inde ma akunda e pi uo-o belegu de bini.»

<sup>11</sup> Li bua ma ake lie, ma atsia atu silika me:

«U lí li bili ma aleke e ngú naguo pi uo-o belegu de bini!†»

<sup>12</sup> Ondaise ma, yi lila liyi ngubula me kpála bini bhú ká yi adú ne siti bua de. Ani adú di ne bua na nabhuka de-e de, inde nga'e okpála li kpadji gba Ebhe na mukobho-o. <sup>13</sup> Ani nga'i yi ndu 'kpí hana. Ka 'ngú ango-o, li ekpí na naki inde li Bhuku ngapa 'ngú e nde nga bha ngabhue lie, yi teteke liyi sunda yi nedhinga yi ngadje e'i ango-o lie-o. I du mo-o, siti 'ngú píte yi de, kpála bini bhú ka yi yála la di namanga Ebhe de. <sup>14</sup> Padhá de, anga ní ne okpála gba Kilisito, i du me ní nde alila nabhuka inde ní asia nani e li lilita kpekpeke akolo ali soso-o.

<sup>15</sup> Bhuku gba Ebhe-e apa me:

«I du me yi nde adje 'li Ebhe naki inde-e, yi agbíte bua yi de, maka yi agbe nani kpéke 'ndji lie li ani-o.†»

<sup>16</sup> La-a, a ko okpála bhedho inde adje 'li Ebhe, atsia agbe nani kpéke 'ndji li ani-e? A ko ndu okpála hana inde li Moidje agbe o bhú Edjipeto-o. <sup>17</sup> La-a, Ebhe ake 'ngú lie pi oda ngubula kalanga ndjikpa badha-a? Ani ake 'ngú lie pi okpála inde amene siti 'ngú, u atsia amu abhú 'gu. <sup>18</sup> Ebhe atu nani silika me: «U lí li bili ma aleke e ngú naguo pi uo-o belegu de bini.†» Ani atu nani pi oda? Ani atu pi okpála inde agbe nani kpéke 'ndji li ani-o. <sup>19</sup> Ní au me, u li nani li bili naguo bhomu-o de, anga u bhuka nani-i de.

† 3:2 3:2 Tsia bhú Nom. 12:7. † 3:11 3:7-11 Tsia bhú Ets. 95:7-11. † 3:15 3:15 Tsia bhú Ets. 95:7-8. † 3:18 3:18 Tsia bhú Nom. 14:1-35; di ne bhú Ets. 95:11.



## 4

1 Ebhe apa nani me ní alí li bili naguo inde ni aleke e mali. Kaka-a, 'e-e! Yi lila liyi, amba kpála bini bhú ka yi anéke nali li bili ango-o de. 2 Ní asia eli gba Ebhe-e bhadi maka okpála bhende adu nani abhu 'gu-o. La-a, u sia eli ango-o ne tata de. Padhá de, anga li u adje eli ango-o lie, u sia ne nabhuka de. 3 Ngani okpála bhende abhuka-a, ní alí li bili naguo bhomu-o mali, li Ebhe apa 'ngú e me:

«Li bua ma ake lie,  
ma atsia atu silika me:

«U lí li bili inde ma aleke e  
pi uo ngú naguo belegu de bini!†»

Abhomu-o, kulu gba ni-e atsia andjia nayie li ani abho doto lie-o. 4 Padhá de, anga bhú Bhuku gba Ebhe-e, u apa pindji ekpi na mananika-a me: «Ebhe aguo bhú 'kpi na mananika, li ani amene ndu kulu gba e lie hana-o.†» 5 Ebhe atsia apa mata di me: «U lí li bili inde ma aleke e pi uo ngú naguo belegu de bini.†»

6 Okpála bhende asia nani Bádha Ngali gba Ebhe-e kalanu-o, li nani li bili naguo ango-o de. Padhá de, anga u ayala nani namene líli gba Ebhe. Abhomu-o, Ebhe atsia ade kpadji pi okpála koko ngú nali li bili ango-o. 7 Kaka-a, Ebhe a'o mata ekpi koko, ekpi inde u a'i e me: «Naki inde.» Ani apa nani engú na ekpi ango-o sidi naali bhú 'li Davidi, bhú lukuluku inde u apa 'ngú li e kalanu-o me:

«I du me yi nde adje 'li Ebhe naki inde-e,  
yi agbite bua yi de.†»

8 Padhá de, anga i dú me Djodjue dhuku nani ne okpála li bili naguo ango-o, Ebhe de pa mata 'ngú na 'kpi koko naguo de. 9 Kaka-a, naguo maka ekpi naguo na mananika-a, atigala pi okpála gba Ebhe-o. 10 Padhá de, anga kpála bhende ali li bili naguo inde li Ebhe aleke e, ngaguo li okulu gba e maka li Ebhe aguo lie li obhe gba e-o. 11 Kaka-a, ní mene ne kpeke me ní li li bili naguo ango-o. Ní mene me kpála bini bhú ká ní atí ka kpeke 'ndji

de maka onguo ogbi ní inde adu nani ne kpeke 'ndji-e, li lie li bili ango-o de-o.

12 Padhá de, anga eli gba Ebhe-e bhú mukobho, a la di ne angu. A dhédhé ane mbotia inde u adyi 'te e ne pasu bhisi hana. A adudu kpála, i tsia kólo makolo li bhobua ani. A ngadu kpála akólo makolo li bili li biki di ne mbilika akó lio lie-o. Eli ango-o ngasuno engú inde awo lie li bua kpála ne bhende ani ngabhundja e-o. 13 Ehe bini nabho mabho inde awo lie kala Ebhe-e ade. Ndu 'he hana inde ani abho e ngau lie mbámhá kala ani. La di-e, ní akpókpo ndu 'ngú gba ní-e hana kala ani.

*Yesu ne 'ngbé dimandø gba Ebhe*

14 Kaka-a, ní lu kpekpeke bhú nabhuka inde ní ngakpokpo 'ngú na e-o. Padhá de, anga a ka ní ne 'ngbé dimandø na angu inde anu akolo makolo abhúhá kala Ebhe. A ko Yesu, Ndili gba Ebhe. 15 'Ngbé dimandø gba ní-e ne angu ngú nadge likabhu bhú dabili bini ne ní bhú bhuku gba ní-o. Ani ali bhú nale ne ndu kpadji hana maka ní, engú bini, ngaani-e, ani mene siti 'ngú belegu de bini. 16 Kaka-a, ní dyudyo liní de kiti na ngámá gba Ebhe-o, li bili na bádha bhú 'bu gba ani-o. Oo, ní asia mambu, ani tsia súno bádha bhú 'bu gba e pi ní ngubula nateteke ní bhú nedhinga ayo lie-o.

## 5

1 U bhubhu 'ngbé dimandø gba Ebhe-e bhú ká okpála ngubula me ani mene kulu gba Ebhe-e bhú ka uo. Ani tsutsulu enu maka makiso pi Ebhe ngubula siti 'ngú gba uo-o. 2 'Ngbé dimandø gba Ebhe-e ngae makpe di bhubhuku. Kaka-a, ani ti da nadge ndjinga okpála inde li imbilangu nde bhú 'ndji o ade, inde di ambu li kpadji-o. 3 Li 'ngbé dimandø gba Ebhe-e ngae makpe nde lie bhubhuku-o, ani tsutsulu enu na makiso pi Ebhe bha bini ngubula siti 'ngú gba okpála de. Engú bini, ani tsutsulu di ngubula siti 'ngú gba e makpe. 4 Kpála bini ti da nato ndata

† 4:3 4:3 Tsia bhú Ets. 95:11. † 4:4 4:4 Tsia bhú Dje. 2:2. † 4:5 4:5 Tsia bhú Ets. 95:11. † 4:7 4:7 Tsia bhú Ets. 95:7-8.

na 'ngbé dimandø gba Ebhe-e bhú 'ndji e ngae makpe de. Kpála kokolo bha 'ngbé dimandø gba Ebhe-e me Ebhe nde a'i ani ngae, maka ani a'i nani Alona lie-o.

<sup>5</sup> A bhadi pi Kilisito moko. Ani to nani ndata na 'ngbé dimandø gba Ebhe bhú 'ndji e ngae makpe de. Engú bini, Ebhe aha nani pi ani ngae, Ebhe atsia apa pi ani me:

«Ngamũ-o, mũ ne Ndili gba ma,  
naye pi naki inde-e, ma ne 'Dyi mũ.†»

<sup>6</sup> Ani atsia apa di li bili koko me:

«Mũ ne dimandø gba ma dũdũma ne dũdũma,  
maka Malekisedeke.†»

<sup>7</sup> Nedhinga li Yesu adũ lie pĩla doto-o, ani adũ nayo Ebhe di ne nakikiliki lie pi ani ne nasusula kpekpeke la di ne ngala bhú djila e. Ani ayo Ebhe inde i ti da nani nakobho ani bhú kuo-o. Abhomũ-o, Ebhe atsia adje ani, anga ani a'o nani lie ne kuto kala Ebhe. <sup>8</sup> Abana ani adũ nani lie Ndili gba Ebhe-e, ani ambila lie ne namanga Ebhe bhú likabhu inde ani azũ e-o. <sup>9</sup> Pita ani andjia kulu gba e lie hana ndjindji kala Ebhe-e, ani atsia akolo kpongu na mukobho na dũdũma pi ndũ okpála hana inde ngamanga ani-o. <sup>10</sup> A moko, Ebhe a'o ani 'ngbé dimandø gba e maka Malekisedeke.

### *A ayo me yi bhele bhú nabhuka gba yi-o*

<sup>11</sup> Ya ne engú bhelé napapa pĩndji 'ngú bhomũ-o. Engú bini, da nambamba tata-a kpekpeke, anga yi ti da nakpokpo kúkú má gala de. <sup>12</sup> Yi adũ nako ne nedhinga bhelé ngubula me yi kolo omũsuno. Engú bini, yi matá ne gumũ me u suno ongú na kalanũ na eli gba Ebhe-e pi yi ne toto. Yi nga bha ne gumũ nandji miliki bhú da nazũ ezũ na kpekpeke. <sup>13</sup> Padhá de, anga kpála bhende nga bha ngandji miliki-e ne ndili. Ani mbila nga nagbogbo bhũsũ bádha 'ngú ne siti 'ngú de. <sup>14</sup> La-a, ezũ bhe na kpekpeke-e pi obhelesi okpála. A ko okpála inde ambila lio ne nagbogbo bhũsũ siti 'ngú di ne bádha 'ngú ka okulu inde u amene e-o.

## 6

<sup>1</sup> Kaka-a, ní kodho 'kpí li nasuno bhende ati ne obhelesi okpála-o. Ní dji 'ngbũ ní li nasuno na lilita gba omakilisito. Ní a'ó matá 'dhũ nasuno inde-e ne toto de: nadji bua o di ne na'o okulu inde ngato kpála bhú kuo, <sup>2</sup> nasuno pĩndji obatisimo di ne na'o 'kpa o pí 'ndji kpála, nakpokpo 'ngú pĩndji nazuku ka okpála inde amu, di ne nakodho 'ngú na dũdũma. <sup>3</sup> A bhomũ-o ongú inde a ayo me ní 'o e-o, i dũ me Ebhe nde akũnda-o.

<sup>4-6</sup> Padhá de, anga engú gba okpála bhende ngagie lio bhú siti 'ngú gba o-o, lele pi? U asia nani zi 'ke gba Ebhe-e asia. U ale bádha 'ngú inde li Ebhe ngaha e pi omaha e pí 'mi o. U atsia asia di Bu Bhobua bhú dabili bini ne okpála koko. U ambila ndjindji me eli gba Ebhe-e babadha. U ambila angu na doto inde ngago-o. Pipita-a, u atsia a'o ká nabhuka gba o-o! U ti da matá namene de me u dji bhobua o bhũtsibhũtsi na bhisi-e de. Padhá de, anga u ngagie matá Ndili gba Ebhe-e li kulusi ne toto. U la di ngaka kpadji pi okpála me u dũ nasobho ani.

<sup>7</sup> Li doto dũ nandji ngubha inde ngadhi pépé ndũ nedhinga hana-a, li i dũ la di me a nde ngagbe ezũ pi okpála inde alu edyi ango-o ndjindji-e, li Ebhe túko bisagu pí doto ango-o. <sup>8</sup> La-a, i dũ me doto ango-o nde azu ulu na eti ne bhe na sisiti-e, tata dũ tété de. Doto ango-o masikpe me Ebhe tũ pedje tété. Pipita-a, u tsia bú bhú djua.

<sup>9</sup> Abana ya pa mo-o, ondaise ma na mukũnda, ya ambila ndjindji me yi li bádha kpadji, kpadji na mukobho. <sup>10</sup> Ebhe ne kpála na ngbingbili. Ani 'fli 'to e li kulu gba yi-e de. Ani 'fli la di 'to e li mukũnda yi asuno e pi ani li kulu inde yi amene e, inde la di yi matá ngamene e pi omakilisito koko de. <sup>11</sup> Gumũ gba ya-a me ndũ yi hana bini ne bini, yi suno ngua mukũnda bhomũ-o nakolo makolo ali soso, ngubula me ndũ 'ngú hana inde yi nde ne 'to yi 'to e-e, tsia mene lie hana. <sup>12</sup> Yi andála de. Engú bini, yi kpata nganda okpála bhende ngabhuka

† 5:5 5:5 Tsia bhú Ets. 2:7. † 5:6 5:6 Tsia bhú Ets. 110:4.

ne kekele, inde la di ngasia ehe inde li Ebhe apa me ni ahá e-o.

*Ní 'o 'to ní 'to ehe inde li Ebhe apa me ni ahá e pi ní-o*

<sup>13</sup> Li Ebhe apa nani lie pi Abalahama me ni ahá ehe pi ani-e, ani apa 'ngú ang-o ne natu silika ne 'li e makpe. Ani amene mo-o, anga kpála koko inde ngebéngbé ane ani ade. <sup>14</sup> Ani apa nani me:

«Ma atu silika me ma atúko bisagu pí mu, ma tsia méne me odi mu kolo bhelé.†»

<sup>15</sup> Abalahama adjeke ne 'ndjá bua, ani atsia asia ehe inde li Ebhe apa nani me ni ahá e pi ani-o. <sup>16</sup> Li okpála du natu silika-a, u tutu ne 'li okpála inde ane uo mane. La di-e, natu silika ngandjia kpekebhe sunda okpála. <sup>17</sup> Ebhe asuno bhomu mbámbá pi okpála inde ayo me u sia ehe inde ani apa me ni ahá e-e, a anéke belegu de bini. Kaka-a, ani atsia atu silika pí 'ngú ang-o.

<sup>18</sup> A ne ongu bhisi inde u ti da nadjie de, a ko natu silika di ne ehe inde li Ebhe apa me ni ahá e-o. Bhú ongu bhisi ang-o, Ebhe ti da napa eu belegu de bini. Ngani okpála inde awo liní bhú Ebhe-e, ní alu kpekpeke, ní a'o la di 'to ní na paká paká 'to ehe inde ani apa me ni ahá e pi ní-o. <sup>19</sup> 'To ní inde ní nga'o e ang-o ngamene me ní lu kpekpeke maka kalase inde ahoholo zabu-o. 'To ní ang-o kukulu, a la di kpekpeke. A ngamene me ní gulu 'ngbé pála bongo inde ngabuku tina 'ti na bubu na 'ngbé 'ti Ebhe gba omaYuda inde abhúlá-o, amba ní kolo makolo bhú tina 'ti ang-o. <sup>20</sup> Oo, Yesu ali nani pi ní kalanu, la di ngubula ní. Ani akolo 'ngbé dimandø gba Ebhe-e pi ní duduma ne duduma maka Malekisedeke.

## 7

*Malekisedeke adu nani ne dimandø gba Ebhe*

<sup>1</sup> Malekisedeke ang-o adu nani 'ngbé ngámá na Saleme, ani atsia adu di nani dimandø gba Ebhe Apí 'Kpí. Li Abalahama adu agie lie lie bhú egú inde ani agboko ongbengbe ongámási bhú e lie,

Malekisedeke anu nakø lio ne ani, ani atsia atuko bisagu pí ani. <sup>2</sup> Abalahama atsia aha bini bhú ká ndjikpa bhú ndu 'he hana inde ani agbulu e-e pi ani. Ta 'ili na Malekisedeke apa ngaiza kalanu me: «'Ngbé ngámá na ngbili 'ngú.» La di-e, ani adu nani ngámá na Saleme, inde akunda napa me: «'Ngbé ngámá na guo 'ngú.» <sup>3</sup> U mbila 'dyi ani ne 'hi ani de. U mbila la di onguo ogbi ani de. U kpo belegu engú bini pindji ekpi u azu ani lie ne ekpi ani akpi lie de. Ani maka Ndili gba Ebhe, kulu gba ani na dimandø gba Ebhe-e duduma ne duduma.

<sup>4</sup> Yi tsia nga maka li Malekisedeke nde lie ngebéngbé-o! Abalahama ogbi omafsalaele aha nani bini bhú ká ndjikpa na ndu 'he hana inde ani asia nani e bhú egú-o pi ani. <sup>5</sup> La-a, okpála na piga gba Levi-e, inde ne odimandø gba Ebhe-e, ne angu ngú nayo bini bhú ká ndjikpa na ndu 'he hana inde ka ongisi na fsalaele, maka li líli apa lie-o. A kunda napa me u ngayoyo li ondaise o makpe, inde la di ne odi Abalahama. <sup>6</sup> Malekisedeke du nani bhú piga gba Levi de. Engú bini, ani asia bini bhú ká ndjikpa sakpa Abalahama bhú ndu 'he hana inde ani agbulu e bhú 'gú-o. La di-e, Malekisedeke atuko bisagu pí Abalahama, kpála inde li Ebhe apa nani me ni ahá oehe pi e-o.

<sup>7</sup> Kpekebhe belegu ade bini me kpála bhende ngatuko bisagu pi kpála-a ngebéngbé ane kpála bhende ngasisia-o. <sup>8</sup> Okpála inde na piga gba Levi-e, inde ngasia bini bhú ká ndjikpa-a, a ko okpála-kuti inde amú mamu. Engú bini, pi Malekisedeke inde u aha bini bhú ká ndjikpa pi e ne kpála inde i kpikpi de, maka li Bhuku gba Ebhe-e apa lie-o. <sup>9</sup> Ngú nabu tata-a, u ti da napa me, li Abalahama aha nani bini bhú ká ndjikpa na ohe gba e lie, Levi inde li odi e ngasia bini bhú ká ndjikpa na ndu 'he hana-a, atsia aha di. <sup>10</sup> Padhá de, anga Levi inde u zu nga nani e de-e, adu bhú 'bu ogbi e Abalahama, nedhinga inde u akø lio lie ne Malekisedeke-o. Bhobhomu-o asuno me Malekisedeke ane Levi mane.

† 6:14 6:14 Tsia bhú Dje. 22:16-17.

11 Ebhe aha nani líli pi omaɪsalaele me, u dɛ nabhɛ odimandɛ gba ni-e bhú piga gba Levi. U adú odimandɛ gba Ebhe maka Alona. Engú bini, kulu na dimandɛ gba Ebhe bhú piga gba Levi-e ti nani da nabedhe 'bhɛ kulu gba Ebhe-e de. Padhá de, anga li kulu gba uo-o tí nani da nabedhe 'bhɛ kulu gba Ebhe-e uu-o, u de dɛ nani ne gɛmɛ dimandɛ koko maka Malekisedeke de. 12 La di-e, li u yipa dimandɛ gba Ebhe-e, a ayo bhadi me líli-e yipa. 13 Padhá de, anga Ngámá gba ní inde u ngakpokpo ongú inde-e pindji e-e, naae bhú piga koko kpi. Bhú piga angoo, kpála bini mene nga belegɛ kulu na dimandɛ gba Ebhe li bíli u atsutsulu 'he lie pi Ebhe-e de. 14 Ní mbila ndjindji me Ngámá gba ní-e adɛ nani bhú piga gba Yuda. Piga angoo, Moidje gama 'ngú tété de, nedhinga ani agama 'ngú lie pindji odimandɛ gba Ebhe-o.

### *Yesu ne dimandɛ gba Ebhe maka Malekisedeke*

15 Engú inde ngasuno nayipa ka dimandɛ la matá mbámbá-a ngae inde: dimandɛ koko akoto, ani maka Malekisedeke. 16 Ani kolo dimandɛ gba Ebhe li lele líli gba okpála-kuti de. Ani akolo mo-o bhú angu na mukobho inde i ndjia de. 17 A maka li Bhuku gba Ebhe-e apa li me:

«Mɛ ne dimandɛ gba ma dɛdɛma ne dɛdɛma,  
maka Malekisedeke.†»

18 Kaka-a, u atsia a'e líli na kalanɛ-o, anga líli angoo adɛ bhɛbhukɛ, tata tsia dɛ la di tété de. 19 Padhá de, anga líli gba Moidje ti nani da namene de me okpála kolo ngbingbili kala Ebhe-e de. Engú bini, ní asia engú bini inde ane ne bádha naali, inde ní nga'o 'to ní 'to e-o. Padhá de, anga engú angoo ngamene me ní dyudyo liní de Ebhe masikpe.

20 La di-e, Ebhe atɛ nani silika. Engú bini, okpála koko akolo nani odimandɛ me u nde tɛ silika de. 21 La pi Yesu-o, Ebhe atɛ nani silika nedhinga li ani apa lie pi ani me:

«Ngámá atɛ silika-a, ani dji 'li e de:  
«Mɛ ne dimandɛ gba ma Ebhe  
Ngámá,

dɛdɛma ne dɛdɛma.†»»

22 Kaka-a, Yesu di ne kpála inde ngamene me ní dɛ bhú gandja na babadha naali.

23 Engú koko inde kpi-e ngae inde: odimandɛ koko adɛ nani bhelé naali, anga kuo adɛ nani kpadji pi uo me u adú odimandɛ dɛdɛma de. 24 Engú bini, Yesu bhú mukobho dɛdɛma ne dɛdɛma, kulu gba ani na dimandɛ-o ti da nandjia de.

25 Kaka-a, ani ti da nakobho okpála inde ngadyudyo lio de Ebhe li kpadji gba ani-e ngubula dɛdɛma ne dɛdɛma. Padhá de, anga ani ndɛ 'kpí hana bhú mukobho ngú nayo Ebhe pi uo.

26 Kaka-a, Yesu ne 'ngbé dimandɛ inde ati ne ní-o. Ani bubu, pɛlɛ 'ngú bhú ani ade, siti 'ngú la di bhú ani ade. Ani agbo bhɛsɛ e ne obhɛlɛ mugwe. Ebhe atsia a'e'e ani tsutsu abhúlá. 27 Ani maka ongbengbe odimandɛ koko ade. Ani ne gɛmɛ natsulu 'he pi Ebhe ndɛ 'kpí hana ngaiza ngubula siti 'ngú gba e makpe, pipita ngubula bhende gba okpála koko ade. Ani amene nani bhɛtsibhɛtsi bini má kpikili, li ani aha lie lie ngae makpe-o. 28 Líli gba Moidje adɛ nani na'o maka ongbengbe odimandɛ li okpála-kuti inde i dɛ ngbingbili hana ade-o. Engú bini silika li Ebhe atɛ e-e, líli-e atsia a'o maka 'ngbé dimandɛ Ndili inde adɛ ndjindji hana libhomu maka li Ebhe akɛnda lie, ngubula dɛdɛma ne dɛdɛma.

## 8

### *Yesu ne 'ngbé dimandɛ gba ní-e ngae*

1 Engú na ngbéngbé bhú ká ongú inde ní ngapa e ngae inde: a bhomɛ-o ngua 'ngbé dimandɛ gba Ebhe inde ka ní-o. Ani adɛ abhúlá li pápá na kokpa de kiti na ngámá gba Ebhe na angu na ngbéngbé-o. 2 Ani ngamene kulu na 'ngbé dimandɛ gba e bhú tina 'ti na bubu, a akɛnda napa me bhú 'ti ngbangbali na kɛkɛlɛ. Ayiki ne Ngámá, ayiki ne kpála-kuti de.

† 7:17 7:17 Tsia bhú Ets. 110:4. † 7:21 7:21 Tsia bhú Ets. 110:4.

<sup>3</sup> U bhúbhú ongbengbe odimandø gba Ebhe-e hana ngubula natsulu enu maka makiso pi Ebhe. Kaka-a, a ayo me adu di ka 'ngbé dimandø gba ní-e ne ehe natsutsulu maka makiso pi Ebhe. <sup>4</sup> † dú nani me ani dú píla doto-o, ani de ne dimandø gba Ebhe-e ade. Padhá de, anga a ne odimandø gba Ebhe koko inde ngatsulu ehe maka makiso pi Ebhe maka li líli gba omaYuda apa lie-o. <sup>5</sup> Kulu inde li odimandø ango-o ngamene e-e, a ko lele kulu ongu inde ngamene lie abhúlá-o. Engú ango-o viti bini ne ehe inde li Ebhe apana nani e pi Moidje-o. Li Moidje adu akunda nayiki 'ti ngbangbali lie, Ebhe apa pi ani me: «Tsia ndjindji ngubula me mu mene ndu 'ngú hana li lele bhende ma asuno e pi mu api 'ta-o.†»

<sup>6</sup> Engú bini, mbia inde-e, Yesu asia kulu inde kpi, ane bhende gba odimandø koko gba Ebhe-e mane. A ko ludu sunda ní ne Ebhe bhú gandja na babadha naali. Gandja ango-o ala di pí oehe na babadha naali inde ní nga'o 'to ní 'to e-o.

### *Ebhe apa me ni akódho gandja na mbia ne okpála gba ni*

<sup>7</sup> † dú nani me gandja na kalanu-o mene me okpála kolo ngbingbili kala Ebhe-e, u de yipa ne koko de. <sup>8</sup> Engú bini, li Ebhe au lie me gandja na kalanu-o du ndjindji hana de-e, ani atsia ambembe bhú 'ndji okpála gba e me:

«Ngámá apa me: oekpí akólo makolo,  
li 'kpí ma akódho gandja na mbia lie  
bhú dabili bini ne piga gba Isalaele  
di ne bhende gba Yuda-o.

<sup>9</sup> A adú maka bhende ma akodho nani e ne onguo ogbi uo-o de,  
li 'kpí inde ma agbe uo lie bhú doto  
na Edjipito-o.

Bhú gandja ya akodho e ne uo-o, u kpata líli ango-o de.

Kaka-a, ma adjí 'ngbu ma li uo,  
Ngámá apa mo-o.

<sup>10</sup> Ngámá atsia apa matá me:

a bhomu-o gandja inde ma akódho e ne ongisi na Isalaele pita oekpí bhomu-o.

Ma ató olíli gba ma-a bhú imbilangu gba uo-o.

Ma ayé olíli ango-o li bua uo.

Ma adú ne Ebhe gba uo, u tsia dú okpála gba ma.

<sup>11</sup> Kpála bini bhú ká uo dú matá ne gumu nasuno 'ngú pi ndili na kuti gba e, di ne pi ndai e de me ani mbila ma-a de-e de.

Padhá de, anga ndu okpála hana ambila ma,

nayie li okpála na padhá nakolo makolo li okpála na kukalu.

<sup>12</sup> Ma ambú li ndanda 'ngú gba uo-o.

Ma abhúndja matá osisiti 'ngú gba uo-o de.†»

<sup>13</sup> Li nedhinga li Ebhe ngagama 'ngú lie pindji gandja na mbia-a, ani a'o bhe na kalanu-o me akolo didili. A na paká me, li ehe de akolo didili akolo-o, i du la di me a nde akadha-a, ehe ango-o masikpe de nangita.

## 9

### *Olíli na gandja na kalanu*

<sup>1</sup> A adu nani bhú gandja na kalanu-o ne olíli ngú nayo Ebhe. La di-e, bili nayo Ebhe atsia adu di píla doto. <sup>2</sup> U ayiki nani 'ti ngbangbali bini ne tina 'ti bhúbhú bhisí. Bhú titina na kalanu-o, u a'i e me dabili na bubu-o, u a'o misa u a'o'o tala pí e bhúbhú. U atsia a'o di misa ne mapa inde u aha e pi Ebhe-e bhúbhú. <sup>3</sup> Kele 'ngbé pála bongo-o, adu tina 'ti bhe u a'i e me bili na bubu naali-o.

<sup>4</sup> Li bili ango-o, u a'o nani misa na olo inde u adu atsulu mungotsi pí e, di ne sanduku na gandja\* inde u abuku nani kute e ne olo libhomu-o. Bhú sanduku ango-o, adu bhúbhú ne lusa inde u amene e li olo, mana atsia adu bhúbhú. Bhú sanduku ango-o, adu di bhúbhú ne ndula gba Alona inde agbe nani felele, a la di-e opapala teme inde li u aye nani líli na gandja-a pí e-o. <sup>5</sup> Pí sanduku ango-o, u

† 8:5 8:5 Tsia bhú Eki. 25:40. † 8:12 8:8-12 Tsia bhú Djlm. 31:31-34. \* 9:4 9:4 Sanduku na gandja: A ko sanduku inde u abu nani opapala teme inde u aye olíli ndjikpa gba Ebhe-e bhú e-o.

a'o nani okulu kelube. Okelube angoo adu asuno me Ebhe li bili bhomu-o. Kulu zini na mbudha uo adu abuku bili inde li 'ngbé dimandø gba Ebhe-e aha ngute maka makiso pi Ebhe lie ngú nambu li siti 'ngú gba okpála-o. La mbia inde-e, a ko nedhinga nagama 'ngú li 'ngú angoo bini bini de.

<sup>6</sup> U aleke nani bili bhú 'ti ngbangbali angoo me, bhú tina 'ti na kalanu, odimandø gba Ebhe-e du nali ndu 'kpi hana ngú namene kulu gba o-o. <sup>7</sup> La-a, bhú titina bhe na bhisi-e, a adu bha bini nali ne 'ngbé dimandø gba Ebhe-e ngae kpi e kpi. Sunda kalanga bini-e, ani adu nali bhutsibhutsi bini. A ayo di nani me ani li bhú dabili bini ne ngute enu, inde ani adu aha e pi Ebhe ngubula siti 'ngú gba e, di ngubula siti 'ngú li okpála amene e me u nde mbila de-o. <sup>8</sup> Bu Bhobua asuno me kpadji na tina 'ti bhe u a'i e me bili na bubu naali bhulu nga nani lie de, i du me 'ti ngbangbali na kalanu-o nde ngabha u-o.

<sup>9</sup> 'Ti ngbangbali angoo ne kulu ongu inde ngamene lie bhú onedhinga inde-o. Bhobhomu-o asuno me oehe natsulu matsulu maka makiso pi Ebhe-e ti da navulu bhobua kpála inde ngamemene-e de. <sup>10</sup> Omakiso angoo, a ko bha bini ongu nazu 'he, ne nandji 'he di ne ngangá mayo navulu lio ngú nakolo bubu kala Ebhe. Ndu olili bhomu-o hana nani ne bhe gba okpála-kuti, atsia adu la bhadi ngubula nedhinga bedi nakolo li nedhinga li Ebhe ayipa ndu 'ngú hana lie ndjindji-o.

*Kilisito agbegbe ní bhú siti 'ngú gba ní-e ne ngute e makpe*

<sup>11</sup> Engú bini, Kilisito ago maka 'ngbé dimandø gba Ebhe ngubula naha obabadha 'ngú inde ngago-o. 'Ti ngbangbali inde ani amene kulu gba e bhú e ngbéngbé naali, a la di babadha naali ane bhende na kalanu-o mane. A yiki 'ti ngbangbali angoo ne okpála-kuti de, a akunda napa me, a ko 'ti ngbangbali na doto inde-e de. <sup>12</sup> Kilisito ali nani bhutsibhutsi bini má kpikili li bili na bubu naali angoo-o.

Ani ha nani ngute meme de, ani ha la di ngute ndili bagala de. Engú bini, ani aha nani ngute e makpe. Kaka-a, ani atsia agbegbe ní bhú siti 'ngú gba ní-e duduma ne duduma.

<sup>13</sup> Ngute meme, i du di-e ngute bhoko bagala di ne mbi bagala inde u atsutsulu e, u tsia bála e pí okpála bhende bubu kala Ebhe ade-e ti da namene me u kolo bubu kala ani li pápá na kute. <sup>14</sup> I nde lie mo-o, ngute Kilisito ane la matá ne angu! Ani aha lie pi Ebhe kabula Bu Bhobua na duduma maka makiso inde ndjindji libhomu. Ngute ani avulu bua nakpokpo kú 'ngú gba ní-e bhú ndu 'ngú hana inde ngato kpála bhú kuo-o, ngubula me ní mene kulu pi Ebhe inde bhú mukobho-o.

*Kilisito ne ludu sunda ní ne Ebhe bhú gandja na mbia*

<sup>15</sup> Kaka-a, Kilisito ne ludu sunda ní ne Ebhe bhú gandja na mbia, amba okpála inde li Ebhe a'i o-o, ti da nasia babadha 'ngú na duduma inde li Ebhe asuno nani e pi okpála gba e-o. U ti da nasisia anga Kilisito akpi ngubula nagbegbe uo bhú siti 'ngú inde u amene e-o. U amene nani siti 'ngú angoo li nedhinga u adu lie bhú gandja na kalanu-o.

<sup>16</sup> Ní mbila ndjindji me li kpála ziba me u gbogbo bhusu ohe gba ni-e pita nakpi ka ni-e, kala me u gbogbo bhusu ohe angoo, a ayo ngaiza me u u mbámbá me kpála angoo akpi. <sup>17</sup> Padhá de, anga i du me kpála inde aziba nagbogbo bhusu ohe gba e nde nga bha u-o, tata li nagbogbo bhusu ohe inde ani aziba me u gbogbo bhusu e ade. Tata li nagbogbo bhusu ohe bha bini me kpála angoo nde akpi. <sup>18</sup> Kaka-a, gandja na kalanu-o asia bha bini angu li ngute atuko lie-o.

<sup>19</sup> Moidje atanga ngaiza nani olili kala ndu okpála hana maka u aye lie-o. Pipita-a, ani atsia aha ngute ndili bagala di ne ngute meme bhú dabili bini ne engu, ani ato ndjiga inde u agbite e ne mbe bongo bhú ngute ne engu-o. A adu ndjiga ndula inde u a'i e me idjope.† Pipita-a, ani

† 9:19 9:19 Idjope: A ko saka ondula na gba omaYuda. Epondje nani u ato e bhú kpongadha pandi inde u aha nani e pi Yesu me ani ndji-e, nedhinga ani adu lie li kulusi-e, u agbite nani li Idjope.

abobolo pí bhuku na líli-o, di ne pí ndu okpála hana. <sup>20</sup> Aní atsia apa me: «A inde-e ngute na gandja li Ebhe apa me yi manga e-o.†» <sup>21</sup> Abhomu-o, Moidje abolo di ngute-e pí 'ti ngbangbali di ne pí ndu ohe hana inde u adhedhoge Ebhe ne e-o. <sup>22</sup> Maka li líli apa lie, masakpe de ndu 'he hana kokolo bubu kala Ebhe bha ka ngute. La di-e, Ebhe mbumbu bha li siti 'ngú me ngute nde atuko bha ngae.

*Kilisito aha lie ngae makpe maka makiso ngú na'e siti 'ngú gba ní-o*

<sup>23</sup> Ma apa pi yi me ndu 'ngú hana inde na kukulú li Moidje asuno nani e pi okpála-a, a ko okulu okukulú 'ngú na abhúlá. Kaka-a, a ayo la bhadi me ongú ang-o kolo bubu kala Ebhe bhú ngute onu. Engú bini, ongú na kukulú na abhúlá makpe ne gumu enu natsulu matsulu inde ane ne bádha. <sup>24</sup> Padhá de, anga Kilisito li nani bhú 'ti ngbangbali inde li okpála amene e ne kpa o-o de. 'Ti ngbangbali ang-o ne kulu 'ti ngbangbali na kukulú-o. Aní alí abhúlá makpe, li bíli inde aní ngagama 'ngú lie mbia inde-e kala Ebhe ngubula ní-o.

<sup>25</sup> 'Ngbé dimandø gba Ebhe gba omaYuda líli nani li bíli na bubu naali-e ndu kalanga hana bhú dabilí bini ne ngute 'nu. Engú bini, Kilisito li nani ngú naha lie ngae makpe bhutsibhutsi bhelé de. <sup>26</sup> I dú nani mo-o, aní de azu likabhu bhutsibhutsi, nayie maka li Ebhe abho nani doto lie-o. Engú bini, aní akoto bhutsibhutsi bini má kpikili li nedhinga na sokpí ngú na'e siti 'ngú gba ní li kpadji naha lie ngae makpe maka makiso pi Ebhe. <sup>27</sup> Ndu okpála-kuti hana kpikpi bha bhutsibhutsi bini. Pipita-a, li Ebhe tsia kódho 'ngú gba uo-o. <sup>28</sup> A bhadi moko, Kilisito aha lie maka makiso bhutsibhutsi bini, ngubula na'e siti 'ngú gba okpála bhelé. Aní akóto lie bhutsibhutsi na bhisi-e, a adú matá ngubula na'e siti 'ngú de. Engú bini, a adú ngubula me okpála inde ngadjeke nago ka aní-e sia mukobho.

## 10

*Makiso gba Yesu Kilisito ane ndu omakiso na kalanu-o hana*

<sup>1</sup> Líli gba Moidje ngasuno kukulú 'ngú hana má kpulakutu ade. A ko mangbo kulu ongú na babadha inde ngago-o. Lele pi li makiso inde li ngua e nde bha ndu 'kpí hana bini, inde u ngaha e ndu kalanga hana ti da lie namene me, okpála bhende ngadyudyo lío denge Ebhe-e kolo ndjindji kala aní-e? <sup>2</sup> I dú me okpála inde ngaha ngua makiso bhomu-o pi Ebhe-e dú bubu kala aní-e, u de 'ó nabhundja siti 'ngú gba o-o. U tsia 'ó la di naha makiso ang-o. <sup>3</sup> Engú bini, naha makiso ngamene me okpála du nabhundja siti 'ngú gba o-o ndu kalanga hana. <sup>4</sup> Padhá de, anga ngute bhoko bagala ne ngute meme ti da na'e siti 'ngú belegu de bini.

<sup>5</sup> Kaka-a, li Kilisito adu ago lie píla doto-o, aní apa pi Ebhe me:

«Mu kunda nani ehe natsulu matsulu,  
i du di-e makiso de,  
engú bini, mo oha kute muma  
ngubula me ma mene kulu gba mu-o  
nedi.

<sup>6</sup> Enu inde u atsulu e pí misa inde u atsutsulu 'he pí e,  
di ne ehe natsulu matsulu koko inde u aha e ngubula na'e siti 'ngú-o nga nani li mu de.

<sup>7</sup> Abhomu-o, ma atsia apa me:

«O Ebhe! Tsitsia,  
ma ngago ngama makpe  
ngú namene engú inde mo okunda e-o,  
maka u aye engú gba ma-a lie bhú bhuku  
na líli-o.†»

<sup>8</sup> Kilisito apa ngaiza pi Ebhe me: «Mu kunda nani ehe natsutsulu matsulu de, i du di-e makiso de. Enu u atsulu e pí misa inde u atsutsulu ehe pí e, di ehe koko inde u atsulu e ngú na'e siti 'ngú-o nga nani li mu de.» Engú bini, u haha makiso bhomu-o nakpata lele maka li líli apa lie ko. <sup>9</sup> Pipita-a, aní atsia apa me: «Ma ngago ngama makpe ngú namene engú inde mo okunda e-o.» Kilisito a'e omakiso na kalanu-o hana, aní atsia ayipa

† 9:20 9:20 Tsia bhú Eki. 24:8. † 10:7 10:5-7 Tsia bhú Ets. 40:7-9.

ne bhe gba e-o. <sup>10</sup> Yesu Kilisito amene mukunda gba Ebhe-o. Aní atse kúte e ngae makpe maka makiso bhútsibhútsi bini má kpíkíli, abhomu-o, ní atsia aze bhú siti 'ngú gba ní-o.

<sup>11</sup> Dimandø gba Ebhe-e bini ne bini lùlù ndu 'kpí hana ngubula namene kulu gba e-o. Aní ngaha piko piko koli ngua omakiso bini. La-a, omakiso ango-o tí da na'e osisiti 'ngú belegu de bini. <sup>12</sup> Engú bini, Kilisito aha koli makiso bini má kpíkíli ngú osisiti 'ngú gba okpála duduma ne duduma. Pipita-a, aní atsia anu adu lí pá 'kpa na kokpa gba Ebhe. <sup>13</sup> Mbia inde-e, aní ngadjeke me Ebhe 'o obhulu yala gba ni-e dabili na sa 'dhu ni. <sup>14</sup> Abhomu-o, ne koli makiso bini inde aní aha e, aní adji okpála inde aní avulu o bhú siti 'ngú-o me, u kolo bubu kala Ebhe ngubula duduma ne duduma.

<sup>15</sup> Bu Bhobua la bhadi ngapapa pí ya moko, aní apa ngaiza lie me:

<sup>16</sup> «Yi tsia nga gandja inde ma akódho e ne uo pita oekpí bhomu-o, Ngámá apa mo-o. Ma ayé olíli gba ma-a lí bua uo, ma tsia tó olíli ango-o bhú imbilangu gba uo-o. †»

<sup>17</sup> Pipita-a, aní atsia apa matá me: «Ma abhúndja matá opupulu 'ngú di ne osisiti 'ngú gba uo-o de.†» <sup>18</sup> La-a, i du me Ebhe nde ambu lí siti 'ngú ambu-o, gumu naha makiso matá ngú na'e'e ade.

### *Ní a'ó ká nabhuka gba ní-e de*

<sup>19</sup> Kaka-a, ondaise ma, ní ambila ndjindji me ní alí lí bili na bubu naali-e kabula ngute Yesu inde atuko-o. <sup>20</sup> Aní abhulu kpadji na mbia pí ní, inde di na mukobho lí pápá na kpadji na 'ngbé pála bongo na 'ngbé 'tí Ebhe gba omaYuda, akunda napa me, bhú kúte e makpe. <sup>21</sup> A ka ní ne 'ngbé dimandø inde ngatsia 'kpí lí eti gba Ebhe-o. <sup>22</sup> Kaka-a, ní dyudyo liní de Ebhe ne bua ní bini di ne nabhuka hana. Padhá de, anga osisiti bua nakpokpo ku 'ngú adji lie akolo bubu kala Ebhe, kúte ní atsia avulu lie bhú engu

inde lí siti 'he nde bhú e ade. Ndu 'ngú bhomu-o hana amene lie bhú ngute Yesu.

<sup>23</sup> Ní lila engú inde ní nga'o 'to ní 'to e, inde ní nde ngakpokpo e kpekpeke-o. Padhá de, anga Ebhe améne engú inde aní apa me ní améne e mamene. <sup>24</sup> Ní tsia 'kpí liní sunda ní ngú nandu ne mukunda na kukulu di ne namene obabadha kulu. <sup>25</sup> Ní a'ó ka dadjua gba ni-e de maka lí okpála koko ambila lío lie ne namemene-o. A ayo mangbo me ní to masi bhú ní sunda ní. Padhá de, anga yi ngau me ekpí gba Ngámá-a akolo bha ndju masikpe.

<sup>26</sup> Padhá de, anga pita nambila kukulu 'ngú-o, i du me ní nde ngamene siti 'ngú bhú gandji-e, makiso inde u tí da naha e ngubula na'e osisiti 'ngú-o matá ade. <sup>27</sup> Engú bini, ehe inde atigala pí ní-e, a ko bha nadjেকে ne tsulu hana nakodho 'ngú gba Ebhe di ne dingidhi djua inde atsúlu obhulu yala gba aní-o. <sup>28</sup> Ndu okpála hana inde adu agumu líli gba Moidje-e, u adu abhili uo. U du nadjেকে ndjinga uo de, i du me okpála bhisi, i du di-e okpála bata nde apa me a ko kukulu 'ngú-o. <sup>29</sup> La-a, kpála bhende ngau Ndili gba Ebhe-e bhú djila e padhá-a, aní asia ke 'ngú inde ane la matá mane. A mo-o adi? Padhá de, anga kpála ango-o manga ngute na gandja na mbia inde avulu aní bhú siti 'ngú-o de. Aní ngasobho Bu Bhobua inde ngasuno bádha bhú 'bu gba Ebhe-e pí ní-o. <sup>30</sup> A na paká me ní mbila ndjindji me, a ko kpála inde apa me:

«Ma agie siti 'ngú inde u amene e ngama.

Ma ahá pí kpála ne kpála ehe inde

ati ne aní-o. †»

Aní atsia apa di me:

«Ngámá akódho 'ngú gba okpála gba e makodho.†»

<sup>31</sup> A ko siti 'ngú na kuo kuo ngú nati bhú 'kpa Ebhe na mukobho.

<sup>32</sup> Yi bhundja nga engú inde akolo nani lí yi lí nedhinga inde yi asia zì 'kpí gba Ebhe-e lie-o. Bha kolo pipita-a, yi azu likabhu naali. Engú bini, yi alu kpekpeke bhú nagu egú ango-o. <sup>33</sup> U asobho okpála koko bhú ka yi, u atsia amene uo sisiti

† 10:16 10:16 Tsia bhú Djlm. 31:33. † 10:17 10:17 Tsia bhú Djlm. 31:34. † 10:30 10:30 Tsia bhú Det. 32:35.

† 10:30 10:30 Tsia bhú Det. 32:36.



kala ndu okpála hana. Engú bini, okpála koko adu bedhe ngú nateteke okpála inde u adu ato mbolo lio bhomu-o. <sup>34</sup> Yi azu likabhu bhú dabilí bini ne okpála inde adu bhú tikpu-o. Li u agbulu ohe gba yi-e lie, yi aziba ne djali hana me u nu nedi. Padhá de, anga yi ambila ndjindji me a ka yi ne tia inde ndjindji naali, inde ngadu duduma ne duduma. <sup>35</sup> Kaka-a, yi adú ne tsulu de. Padhá de, anga yi asia makalá na ngbéngbé kaka. <sup>36</sup> A ayo me yi du ne kekele ngubula namene engú inde li Ebhe akunda e, di ne nasia ehe inde ani apa me ni ahá e-o. <sup>37</sup> Padhá de, anga u aye bhú Bhuku gba Ebhe-e me:

«A tigala nedhinga bedi, belegu bedi naali,  
li kpála inde a ayo me ani go-o tsia gó.  
Ani bhúe de.

<sup>38</sup> La-a, kpála inde ngbingbili bhú djila ma-a  
tsia sia mukobho na duduma kabula nabhuka.  
Engú bini, i du me ani nde agie lie ne sidi-e,  
bua ma ngá matá ne ani de.»  
<sup>39</sup> Nganí-e, ní bhú ká okpála bhende ngagie lio ne sidi, inde di ngangita-a ade. Engú bini, ní ne okpála bhende ngabhuka, inde di li kpadji na mukobho-o.

## 11

*Ní le nadu ne ngua nabhuka gba onguo ogbi ní-o*

<sup>1</sup> Na'o nabhuka gba o bhú Ebhe-e, a ko naziba me ní asia ehe inde ní nde nga'o 'to ní 'to e asia. A ko nadu ne nabhuka me ehe inde ní u e ne djila ní de-e uu. <sup>2</sup> Ebhe aziba nani okpála na kalanu-o ka nabhuka gba o-o.

<sup>3</sup> Ka nabhuka-a, ní ambila me Ebhe abho nani doto ne 'li e. Abhomu-o, ohe inde ní ngau e ne djila-a, abho lie li ohe inde ní u e ne djila de-o.

<sup>4</sup> Ka nabhuka-a, Abele aha makiso na babadha naali pi Ebhe, inde ane bhe gba Kaina mane. Ka nabhuka ango-o, Ebhe au ani bhú djila e ngbingbili. Padhá de, anga

Ebhe ngae makpe aziba makiso gba ani-o. Ka nabhuka gba Abele-e, ani bha bini ngagama 'ngú, abana ani akpi lie-o.

<sup>5</sup> Ka nabhuka-a, Enoka kpi nani-i de. Engú bini, Ebhe aha ani abhúlá. Kpála bini ti da nani nau ani de, anga Ebhe aha nani ani ngú na'o ani de e. Bhuku gba Ebhe-e apa me, kala me Ebhe ha ani abhúlá-a, ani amene nani engú inde anga li Ebhe. <sup>6</sup> La-a, i du me nabhuka nde bhú kpála ade-e, ani ti da namene engú inde anga li Ebhe-e de. Padhá de, anga kpála inde ngadyudyo lie de Ebhe-e, a ayo me ani bhuka me: Ebhe uu, ani la di ngaha makalá pi okpála inde ngagili ani-o.

<sup>7</sup> Ka nabhuka-a, Nua adje engú inde li Ebhe apa nani e pi ani pindji onguú inde agó, inde u u nga nani e de. Ani au me Ebhe pa eu de, ani atsia abho 'ngbé zabu inde ani akobho piga gba e bhú e-o. Namene ka ani mo-o, ani a'o mangimbo pi 'ndji okpála na píla doto. Ka nabhuka gba ani-e, Ebhe atsia au ani bhú djila e me a ko kpála na ngbingbili.

<sup>8</sup> Ka nabhuka-a, Abalahama amene líli gba Ebhe li nedhinga inde ani a'i nani ani lie-o. Ani anu bhú doto inde li Ebhe apa nani lie me ni ahá e pi ani, amba akolo naani-o. Ani ayie bhú doto gba e padhá me ani nde mbila de me, ni adji bhú doto bhedho-ie de. <sup>9</sup> Ka nabhuka-a, ani anu adu maka gandji kpála bhú doto inde li Ebhe apa nani me ni ahá e pi ani-o. Ani adu nadu bhú 'ti ngbangbali, Isaka ne Yakobho atsia adu di nadu bhú 'ti ngbangbali. A bhomu-o okpála inde li Ebhe apa di nani pi o me ni ahá di doto ango-o pi o-o. <sup>10</sup> Padhá de, anga Abalahama adu nadjike gudhu inde li 'dhu e alu kpekpeke. Ebhe amene lele maka li gudhu ango-o adú lie ngae, ani atsia ayiki bhadi ngae.

<sup>11</sup> Ka nabhuka-a, Abalahama asia nani angu ngubula nazu ndili bhú nedhinga ani akolo lie ne kalanga bhelé, belegu li Sala adu lie ne i zu de-o. Ani adu ne nabhuka me engú li Ebhe apa me ni améne e-e, ani améne mamene. <sup>12</sup> Kaka-a, koli ogbi ní bini Abalahama, inde adu

de kuo masakpe-e, azu opiga bhelé. Ongisi inde li opiga ango-o azu o-o bhelé maka ikupala inde abhúlá. Uo bhelé di maka sike inde lingo 'ngbé 'ngu, inde li kpála ti da natanga e de.

<sup>13</sup> Ndu okpála bhomu-o hana amu bhú nabhuka me, u nde sia oehe inde li Ebhe apa nani me ni ahá e pi uo-o de. Engú bini, u au oehe ango-o tsutsu, u atsia akpi djali. Abhomu-o, u atsia ambila ma kpulukatú me o ne ogomago, o la di ne okpála na dhuku píla doto ei. <sup>14</sup> Okpála inde ngapa ngua engú bhomu-o ngasuno mbámbá me o ngagili doto gba o makpe. <sup>15</sup> I dú me u dú nakina doto inde u aze nani bhú e-e, u de agie lio bhú doto ango-o agie. <sup>16</sup> A na paká me, u adu ne gumu doto inde babadha naali. A akunda napa me doto inde abhúlá ko. Kaka-a, Ebhe ne numu ade me, u 'i ni me ni ne Ebhe gba uo-o. Padhá de, anga ani aleke gudhu bini pi uo.

<sup>17</sup> Ka nabhuka-a, Abalahama aha Isaka maka makiso, li Ebhe ale ani lie-o. Abalahama li Ebhe apa nani me ni ahá 'he pi e-e, adu bedhe ngú naha koli ndili gba e bini-e maka makiso. <sup>18</sup> Ebhe apa nani pi ani me: «Li kpadji gba Isaka-a, mo osia opiga inde ma apa nani me ma ahá o pi mu-o.†» <sup>19</sup> Engú bini, Abalahama adu abhundja me Ebhe ne angu nazuku Isaka. Kaka-a, Ebhe atsia agie ndili gba ani-e pi ani maka kpála inde u azuku e me ani nde akpi.

<sup>20</sup> Ka nabhuka-a, Isaka atuko bisagu pi ongisi gba e bhisi-o, Yakobho ne Esau, natsia lele ongú inde abháka uo sidi-o.

<sup>21</sup> Ka nabhuka-a, Yakobho atuko bisagu pi ongisi bhisi gba Djodjefu-o, kala me ani kpi. Ani ateke lie li dukú gba e, ani atsia adhogè Ebhe.

<sup>22</sup> Ka nabhuka-a, Djodjefu apa li ani akolo lie masakpe de nakpi ka e me, omafalaale azé bhú Edjipeto maze. Ani atsia asuno engú inde a ayo me u mene e ne biki ni-o.

<sup>23</sup> Ka nabhuka-a, li u azu Moidje lie, okpála inde azu ani-e awo ndje ani ngubula epe bata. U au nani me ani

babadha naali, u tsia dje tsulu ka líli gba 'ngbé ngámá-a de.

<sup>24</sup> Ka nabhuka-a, li Moidje abhele lie-e, ani ayala me okpála 'i ni me ndili gba ndili na elè gba Falao. <sup>25</sup> Ani aziba nazu likabhu bhú dabili bini ne piga gba Ebhe-o. Ani atsia ayala nakpi djali inde ngubula nedhinga bedi-e bhú siti 'ngú. <sup>26</sup> Padhá de, anga ani adu abhundja me li kpála zu likabhu kabula Masiya-a, bhobhomu-o pi ani ne tia na ngbéngbé ane bhende na Edjipeto mane. Kaka-a, ani a'o nani djila e li makalá inde ani asia e bhú oekpi inde ngago-o.

<sup>27</sup> Ka nabhuka-a, Moidje ayie nani bhú Edjipeto me ani nde kpe ke 'ngú gba 'ngbé ngámá-a de. Ani atsia alu kpekpeke mugito me ani ngau Ebhe inde u uu e de-o. <sup>28</sup> Ka nabhuka-a, Moidje aha nani líli me u leke anokomia na Pasika. Ani atsia aha líli me u pulu ngute li obhe bhoti, amba andjelu na kuo abhili ongisi na kalanu gba omafalaale de.

<sup>29</sup> Ka nabhuka-a, omafalaale agulu nani 'ngbé 'ngu na Mbembe-e mugito me u ngadholo pí doto inde a'ulu má kekele! Engú bini, li omaEdjipeto ale di lie me ogulu 'ngu-o maka uo-o, engu-o atsia abuka uo. <sup>30</sup> Ka nabhuka gba omafalaale, aga inde asa nani gudhu na Djeliko-o agumu pita nadi ngongo ngubula 'kpi mananika. <sup>31</sup> Ka nabhuka-a, Lahaba, elè na zabhe-e akobho nani. Ani kpi bhú dabili bini ne okpála inde adu agu Ebhe-e de. Padhá de, anga ani asia nani omafalaale, inde u atima nani o ngú natsia lele gudhu-o ne guo 'ngú.

<sup>32</sup> Ma ti da napa matá pi? Nedhinga ka ma ade ngú nakpokpo 'ngú gba Djedeo, gba Balaka, gba Samisona, gba Djefete, gba Davidi, gba Samuele, di ne bhe gba opolofeta-o. <sup>33</sup> Ka nabhuka-a, u agboko ongbengbe ongámási na okuti bhelé bhú 'gú. U amene ongú inde adu ngbingbili, u asia 'he inde li Ebhe apa nani me ni ahá e pi uo-o, u atsia agbite 'bhe okingbi. <sup>34</sup> U abulu odjua inde adu nade má ka ka ka! U akobho bhú nakpi sakpa mbotia. U adu bhuhuku, la-a, u atsia akolo kpekpeke. U

† 11:18 11:18 Tsia bhú Dje. 21:12.

adu kpekpeke bhú egú, u atsia aha angu osudha na gandji gandji. <sup>35</sup> Ka nabhuka-a, olisi au matá okpála gba o inde amu-o. Padhá de, anga okpála ango-o azuku.

U ato mbolo li okoko nakolo masakpe de nakpi. U ayala me u gbegbe o sakpa okpála adu ato mbolo li o-o. U amene mo-o ngubula me o zuku ngú nasia mukobho na ndjindji naali. <sup>36</sup> U amu okoko, u atsia abhi di uo ne fimbo. U agbigbite okoko ne gbindjili, u atsia amba di uo bhú tikpa. <sup>37</sup> U abhili okoko ne teme. U akokodho bhusu okoko bhisi ne sii. U atsia abhili okoko ne mbotia. Okoko adu anu ne ndu bili hana me u nde ato ko kandelo, i du di-e ko meme. U adu obhulu ndibhili. U adu nato mbolo li uo, u atsia adu namene uo kpekpeke. <sup>38</sup> U ti nani da nadu pala doto inde-e de. U adu nadjakadha abhu 'gu, di ne api oeta. U adu nadu bhú oedu di ne bhú ogudho teme.

<sup>39</sup> Ebhe aziba nani ndu okpála bhomu-o hana ka nabhuka gba o-o. La-a, u sia ehe inde li Ebhe apa nani me ni aha e pi u-o de. <sup>40</sup> Padhá de, anga Ebhe aleke nani ehe na babadha naali pi ni. Ani kunda nani de me u kolo ndjindji hana mandi ni-e de.

## 12

*Yi lu kpekpeke bhú olikabhu inde yi ngazu e-o*

<sup>1</sup> Pi ni-e, ndu ndindi okpála bhomu-o hana inde abhuka nani Ebhe-e, asa deno ni ngbalina u ngau 'ngú inde ni ngamene e ne djila o. Kaka-a, ni gbe lini li ongu bhende ngagbigbite ni me ni aduku ndjindji de-e magbe. A ane la mane pi siti 'ngú bhende ni ngali bhú e má gala gala-o! Holo inde li Ebhe apa me ni gu e-e, ni gu akólo makolo ali soso. <sup>2</sup> Ni banga djila ni li Yesu inde li nabhuka gba ni-e alu pi e, nayie li lilita akólo makolo ali soso-o. Ani aziba nakpi li kulusi. Nakpi li kulusi-e, a ko nakpi na numu. Engu bini, ani dje numu tété de. Padhá de, anga ani adu nau djali inde ani asia e-o. Mbia inde-e, ani adu li pa 'kpa na kokpa deno kiti na ngamá gba Ebhe-o.

<sup>3</sup> Yi bhundja nga Yesu maka ani akibila yala inde li okpála namene siti 'ngú-o adu nayala ani ne e-o. Kaka-a, yi a'ó de me ndala ha angu yi-e de. <sup>4</sup> Padhá de, anga bhú gbele inde yi ngagu e ne siti 'ngú-o, yi gu nga nakolo bhú nakpi ka yi-e de. <sup>5</sup> 'To yi a'ili li lili inde li Ebhe aha e pi yi maka ongisi gba e-e a'ili? Lili ango-o me:

«Ndia ma, i du me Ngamá nde ngali mu-o, mo oboyo de.

I du me ani nde ngambembe bhú 'ndji mu-o,

bua mu abí la di ndala de.

<sup>6</sup> Padhá de, anga Ngamá ngali kpála inde ani akunda e-o.

Ani ngabhi kpála inde ani ambila me a ko ndili gba ni-o.†»

<sup>7</sup> Kaka-a, yi kibila okpekpeke da 'ngú inde li Ebhe ngali yi ne e-o. Ani ngamene yi maka ongisi gba e. A ko ndili bhedho li 'dyi e lili e de-e? <sup>8</sup> I du me Ebhe nde li yi maka ndu ongisi koko gba e hana de-e, a akunda napa me yi ne kukulu ongisi gba ani-e ade. Yi ne ongisi inde u mbila 'dyi o de. <sup>9</sup> A li ni pala doto inde-e ne odyidi. U adu nani nali ni. Ni atsia adu di namanga uo. A ane la matá mane me ni manga 'Dyi ni inde abhúla, ngubula me ni sia mukobho. <sup>10</sup> Odyi ni adu nali ni ngubula nedhinga bedi, maka u adu abhubhundja lie-o. Engu bini, Ebhe ngali ni ngubula badha 'ngú gba ni-o. Ani akunda me ni du bubu maka ni. <sup>11</sup> Nedhinga u ngali ni lie mbia inde-e, a ngau lie maka u de ngaha pi ni likabhu, a ha djali pi ni de. La-a, pipita-a, okpála inde akodho 'kpí li ngua kpadji bhomu-o ngasia nguwa na guo 'ngú inde akpotsə lie ne mukobho na ngbingbili-o.

<sup>12</sup> Kaka-a, yi 'e 'kpa yi inde andala-a ne bhúla. Yi mene la di me 'dhu yi inde andala-a, a kolo kpekpeke! <sup>13</sup> Yi dhuku li okpadji inde ngbingbili, amba 'dhu kpála bhende ndjindji ade-e agumu de. Ani kobho mangbo makobho.†

*Yi du nagbo 'dje yi ndu 'kpí hana li Ebhe*

<sup>14</sup> Yi gili nadu ne guo 'ngú ne ndu okpála hana. Yi du la di bubu. Padhá de,

† 12:6 12:5-6 Tsia bhú Gbt. 3:11-12. † 12:13 12:13 Tsia bhú Isa. 35:3; di ne bhú Gbt. 4:26.

anga li kpála dɔ bubu de-e, ani ú Ngámá de. <sup>15</sup> Yi lila liyi me kpála bini ayíe sa bádha bhú 'bu gba Ebhe-e de. Kpála bini akólo la di bhú ká yi maka ndula inde sɔsɔ-o de. Ndula ango-o akɔ lie, a asiti mukobho gba okpála bhelé ne sɔngɔ inde bhúbhú-o. <sup>16</sup> Kpála bini bhú ká yi adú nakúnda olisi, i dɔ di-e obhosi ngangá de. Kpála bini bhú ká yi aú oehe gba Ebhe-e bhú djila e padhá de, maka Esau. Ani atsindji nani nadɔ ka e ndili na kalanɔ ngɔbula koli sani 'zɔ bini. <sup>17</sup> Yi ambila ndjindji me sidi-e, ani adɔ ne gɔmɔ me 'dyi ni tuko bisagu pí ni. Engú bini, 'dyi ani abebe ani. Padhá de, anga abana nani ani ale nadjí engú inde ani amene e lie ne naku 'gbá-a, ani sia kpadji de.

### *Nau inde i ti da nadyiki de*

<sup>18</sup> Yi kolo nga dengo eta bini de inde u ti da nabu 'kpa lie maka eta na Sinai, inde adɔ nani ne dingidhi djua-o. A adɔ ne biti, di ne anvi na kpekpeke naali. <sup>19</sup> Eta ango-o adɔ di ne tolo toti, di ne tolo nagama 'ngú. Li omaɪsalaele adje eli bhomɔ-o lie, u ayo me Ebhe agáma matá engú koko pí bhobhomɔ-o de. <sup>20</sup> U ti nani da nakibila líli inde-e de. Líli ango-o me: «Kpála inde abú 'kpa e li kute eta-a, abana i dɔ di-e enɔ-o, u abhéle ani ne teme.†» <sup>21</sup> Engú inde u adɔ nau e adɔ na tsulɔ tsulɔ. Belegɔ Moidje atsia apa kaka me: «Ma ngadje tsulɔ naali, ma la di ngagukɔ magukɔ.†»

<sup>22</sup> Engú bini, yi akolo dengo eta na Siona , dengo gɔdhɔ gba Ebhe na mukobho-o. A ko Yelusalema na abhúlá bhú dabili bini ne oandjelu gba e inde kɔtɔ ne kɔtɔ apo bhúla o bhú anokomia-o. <sup>23</sup> Yi akolo dengo ongisi na gígina inde apo bhúla o, inde u aye 'li o abhúlá-o. Yi akolo dengo Ebhe, kpála nakodho 'ngú gba ndɔ okpála hana-o. Yi akolo dengo okpála inde ngbingbili, li Ebhe amene me u kolo ndjindji hana kala ni-o. <sup>24</sup> Yi akolo dengo Yesu, kpála inde ne lɔdɔ sɔnda ní ne Ebhe bhú gandja na mbia inde li Ebhe akodho e ne ní-o. Yi akolo dengo ngute ani inde

atuko, inde ngaha bádha 'ngú pí ní inde ane bhe gba Abele mane-o.

<sup>25</sup> Yi lila liyi! Yi ayála nadjé kpála inde ngagama 'ngú pí yi-e de. Padhá de, anga okpála inde ayala nani nadjé kpála inde adɔ naha líli pí o píla doto-o, neke nasia ke 'ngú de. A adú bhadi pí ní moko. A ne la matá mane, i dɔ me ní nde ayala nadjé kpála inde ngagama 'ngú pí ní nayie abhúlá-o. <sup>26</sup> 'Li ani adyiki nani doto. Engú bini, mbia inde-e, ani apa pí ní me: «Ma adyiki matá doto bhútsibhútsi bini. A dú bha bini doto de, ma adyiki di ne abhúlá hana.†» <sup>27</sup> Eli inde me «matá bhútsibhútsi bini», akúnda napa me oehe inde u abho e mabho-o adyiki, i tsia ngíta, amba ehe bhende i ti da nadyiki de-e tígala bha ngae.

<sup>28</sup> Ní ngasia nau inde i ti da nadyiki de. Kaka-a, a ayo me ní gie heni pí Ebhe. Ní mene la di pí ani kulu inde anga li ani ne tsulɔ hana di ne namanga ani. <sup>29</sup> Padhá de, anga Ebhe gba ní-e, a ko djua inde ngade made.†

## 13

### *Yi mene engú inde ngangá li Ebhe*

<sup>1</sup> Mukúnda inde sɔnda yi-e nɔ bha ne kalanɔ maka ondaise . <sup>2</sup> 'To yi a'íli nasia ogomago de. Padhá de, anga bhú namene mo-o, okpála koko asia nani oandjelu me u nde mbila de. <sup>3</sup> Yi bhundja okpála bhende bhú tikpɔ-o mɔgito me, yi ne uo bhú tikpɔ bhú dabili bini. Yi bhundja okpála bhende u ngato mbolo lío-o, mɔgito me u ngato mbolo ango-o li yi.

<sup>4</sup> A ayo me ndɔ okpála hana manga kava mamanga. A ayo me bhoko lila kute e pí wala e, amba ɔlɔ lila di kute e pí 'ko e. Padhá de, anga Ebhe akódho 'ngú gba okpála inde ngakúnda olisi, i dɔ di-e obhosi ngangá-a makodho. Ani akódho di engú gba okpála inde ngakúnda olisi di ne obhosi ngangá, a la di-e okpála inde ngakúnda olisi, i dɔ di-e obhosi koko.

† 12:20 12:20 Tsia bhú Ekí. 19:12, 13. † 12:21 12:21 Tsia bhú Det. 9:19. † 12:26 12:26 Tsia bhú Adj. 2:6.  
† 12:29 12:29 Tsia bhú Det. 4:24.

<sup>5</sup> Gümü tia ahá angu yi bhú mukobho gba yi-e de. Yi kpi djali li ehe bhende ka yi-o. Padhá de, anga Ebhe apa me:

«Ma 'ó ka mü de,  
ma bála 'kpa li mü  
belegü de bini.†»

<sup>6</sup> Kaka-a, ní ti da napa ne nabhuka hana me:

«Ngámá ne kpála inde ngateteke ma,  
ma djé tsulü li 'ngú bini de.

Okpála ti da namene ngú ma  
mangua 'ngú dho?†»

<sup>7</sup> Yi bhundja nga okpála inde adü nani pí 'ndji yi kalanü-o, inde akpokpo eli gba Ebhe-e pí yi-o. Yi bhundja nga lele maka u akpata nani Ebhe lie, di ne maka u amu lie-o. Yi bhuka maka u abhuka nani lie ko.

<sup>8</sup> Yesu Kilisito yiyipa de, lili, naki, dädüma ne dädüma. <sup>9</sup> Yi a'ó de me nasuno na gandji gandji 'e yi li kpadji-e de. A ndjindji me bua ní sia angu ka bádha bhú 'bu gba Ebhe , a alú pí olíli inde atsia ezü-o de. Padhá de, anga okpála bhende ngamene ngua olíli bhomü-o sía bádha 'ngú tété belegü de bini.

<sup>10</sup> Odimandö gba Ebhe inde ngamene kulu bhú 'ti ngbangbali-e ti nani da nazü enü inde u atsutsulu e pí misa gba ní natsulu enü-o \* de. <sup>11</sup> 'Ngbé dimandö gba Ebhe nganü ne ngüte onü li bili na bubu naali, ngübula nahaha maka makiso ngú na'e siti 'ngú. Engú bini, u tsutsulu kuo onü ango-o li ngongo, a adüdü bhú ká okpála de. <sup>12</sup> Kaka-a, Yesu akpi di lingo güdhü na Yelusalema ngübula na'e siti 'ngú gba okpála ne ngüte e makpe. <sup>13</sup> A ayo me ní nü kə liní ne aní alí ngongo, ní kibila ngua pádha inde u apadha aní ne e-o. <sup>14</sup> Padhá de, anga píla doto eie, güdhü inde ní ngadü bhú e dädüma ne dädüma ade. Engú bini, ní mangbo ngagili güdhü inde adú galikpe ko. <sup>15</sup> La li kpadji gba Yesu-o, ní dhögö Ebhe ndü nedhinga hana maka makiso, a akünda napa me, ní dhögö 'li aní ne 'bhö ní. <sup>16</sup> 'To yi a'íli li namene bádha 'ngú, di ne nateteke liyi sündá yi de. Padhá de, anga

ngua makiso bhomü-o nganga li Ebhe ngae.

<sup>17</sup> Yi manga okpála inde pí 'ndji yi-e mamanga. Yi mene la di líli gba uo-o. Padhá de, anga u ngatsia 'kpí li yi ndü nedhinga hana ne nambila ndjindji me ekpí bini, o kpókpo kú kulu inde o amene e kala Ebhe. Yi 'o me u mene kulu gba o-o ne djali hana. U améne ne nalopolo lío de, anga u mene ne nalopolo lío-o, bhobhomü-o tétéke yi de.

<sup>18</sup> Yi yo Ebhe pí ya. Ya ambila me bua nakpokpo kú 'ngú gba ya-a ndjindji. Padhá de, anga ya ngagili ndü 'kpí hana namene engú inde li lelele. <sup>19</sup> Ma ngayo ka yi ne kekele me yi yo Ebhe ngú ma, amba aní bhulu kpadji me ma gie líma de yi má gala!

<sup>20</sup> Ebhe inde li guo 'ngú ngayie ka e, azuku Ngámá gba ní Yesu bhú ká okpála inde amu-o.

Aní akolo 'ngbé müli gba okandölö ne ngüte e

i nde aní aha e maka makiso.

Aní amene me gandja na dädüma-a lü pí ngüte ango-o.

<sup>21</sup> A ayo me Ebhe ango-o mene me yi kolo ne angu

ngú namene 'ngú

inde ndjindji ngübula namene mukünda gba aní-o.

A ayo me Ebhe 'o bhú ní engú inde ndjindji kala e

li pápá gba Yesu Kilisito.

A ayo me u dhögö aní dädüma ne dädüma.

A adü moko!

### *Engú na soso*

<sup>22</sup> Ondaise ma, ma ngayo ka yi me yi dje eli inde ma ngato masi bhú yi ne e bhomü-o ne 'ndjá bua. La di-e, balüa ma aye e pí yi inde-e ndjándjá ade. <sup>23</sup> Ma akünda napa pí yi me u atse 'kpa li ndai ní Timoté atse. Í dü me aní nde akolo má gala-a, ya anú natsia yi bhú dabili bini ne aní.

<sup>24</sup> Yi yi ndü okpála hana inde pí 'ndji yi-e mayi. Yi yi la di ndü okpála gba Ebhe-e hana mayi. Ondaise ní na Itali yi yi mayi.

† 13:5 13:5 Tsia bhú Det. 31:6, 8. † 13:6 13:6 Tsia bhú Ets. 118:6. \* 13:10 13:10 Enü inde u atsulu e pí misa si-e, a ko makiso inde u apa 'ngú e bhú olukuluku 15-16.

<sup>25</sup> A ayo me bádha bhú 'bu gba Ebhe-e dũ  
bhú dabilì bini ne ndũ yi hana.

## Balua gba Djaki Eli na kalanu

Balua gba Djaki-e, apo bhúlá ongú inde a ayo me u mene e. Aní aye pí ndu okpála gba Ebhe inde atsambala pílá doto libhomu. Djaki agama 'ngú ne bádha 'li pindji ongú inde atsia imbilangú, engú inde a ayo me u mene e bhú dasundu gba omakilisito.

Balua ango-o ngalú kpekpeke pindji bádha 'ngú inde bhú okulu di ne nabhuka , ne pindji namene 'ngú na Ebhe maka makilisito.

**Ongbengbe ongú inde bhú bhuku inde-e ngae inde:**

Eli na kalanu 1:1

Nabhuka, a la di-e imbilangú 1:2-8

Nadu bhú ndibhili ne nadu ne tia bhelé 1:9-11

Nali bhú nale 1:12-18

Nadje 'kpí, a la di-e okulu 1:19-27

Nagbele 'dje kpála pindji nagbogbo bhusu o 2:1-13

Nabhuka, a la di-e okulu 2:14-26

Makilisito ne 'mi e 3:1-18

Makilisito, a la di-e ongú na doto 4:1 - 5:6

Olíli ngangá 5:7-20

*Djaki yi okpála gba Ebhe-e mayi*

<sup>1</sup> Ngama, Djaki, bali gba Ebhe, bali di gba Ngámá Yesu Kilisito-o , ma yi ndu okpála gba Ebhe hana inde atsambala pílá doto libhomu-o mayi.

*Yi du ne kpéke bua bhú okpekpeke da 'ngú*

<sup>2</sup> Ondaise ma, li okpekpeke da 'ngú du abhaka yi ne li okpadji ngangá-a, yi de du bhúbhú ne djali naali. <sup>3</sup> Padhá de, anga yi mbila ndjindji me, i du me nabhuka gba yi-e nde alu kpekpeke bhú okpekpeke da 'ngú-o, nabhuka ango-o tsia há pí yi kpéke bua. <sup>4</sup> Kaka-a, yi lila liyi uu! Padhá de, anga a ayo me kpéke bua gba yi-e kolo bha bini ali soso, ngubula me yi bhele li

bua yi, amba yi a'ó ká saka bádha 'ngú bini de.

<sup>5</sup> I du la me kpála bini bhú ká yi nde aneke imbilangú-o, a ayo me ani yo ka Ebhe, amba Ebhe ha pí ani. Padhá de, anga Ebhe ngahaha pí ndu okpála hana ne bádha bua, la di ne bua na keke de.

<sup>6</sup> Engú bini, a ayo me ani yo ne nabhuka. Aní adú ne bua na bhisi bhisi de. Padhá de, anga kpála inde ne bua na bhisi bhisi-e, ani maka ngbo 'ngu inde li anvi ngatumba e pí djila 'ngbé 'ngu. <sup>7</sup> Kpála ango-o a'ó 'to e de me ni asía 'he ka Ebhe Ngámá-a de, <sup>8</sup> anga ani ne bua na bhisi bhisi. Aní mbila la di de me bhú ká ondu 'ngú gba ni-e hana-a, ni améne pí-ie de.

*Engú inde akólo li obhulu ndibhili ne obhulu tia*

<sup>9</sup> A ayo me mabhuka inde bhú ndibhili-e kpi djali. Padhá de, anga Ebhe nga'e'e ani abhúlá. <sup>10</sup> La di-e, mabhuka inde ne bhulu tia-a, a ayo me ani kpi djali, anga Ebhe ngakø ani ne kuto. Padhá de, anga ani akódho 'kpí maka felele na ulu inde abhú bili. <sup>11</sup> Ela ngakoto ne kpéke djua gba e, i tsúlu ulu, li ulu-o 'úlú. Li ulu a'ulú lie, li felele felele tí kuto. Abhomu-o, li bádha gba ulu ango-o tsia kólo padhá. A bhadi moko pí bhulu tia. Padhá de, anga kpála ango-o akólo padhá bhú ká ondu 'he gba e hana inde ani ngamene e-o.

*Ebhe ti da nato kpála bhú nale de*

<sup>12</sup> A ko djali pí kpála inde ne kpéke bua bhú okpekpeke da 'ngú. Padhá de, anga pita ani ane okpekpeke da 'ngú lie, ani tsia sía makalá inde li Ebhe apa nani me ni ahá e pí okpála bhende akunda ni ko. Makalá ango-o, a ko mukobho na duduma. <sup>13</sup> Li nale\* bhaka kpála-a, ani apá de me: «Ebhe ngato ma bhú nale-e ngae» de. Padhá de, anga mabhundja nale kpála bhú Ebhe ade. La di-e, Ebhe ngae makpe-e, ti da nale kpála bini de. <sup>14</sup> Kpála ngali bhú nale ka gumu na sisiti inde li bua e-o. Gumu na sisiti ango-o gbéle ani, i tsia tó ani bhú nale. <sup>15</sup> Pipita-a, gumu na sisiti-e bí 'bhi, i zú siti 'ngú. Siti 'ngú ango-o bhele-e, i tsia zú nakpi.

\* **1:13** 1:13 Bhú eli na giliki-e, kpéke da 'ngú ne nale-e, a ko bha koli 'he bini.

16 Ondaise ma na mukunda, yi apite liyi de. 17 Ndu 'ngú na babadha hana, la di ne ndu tia inde ane ne bádha hana ngayie ka Ebhe, inde abho ndu 'he na zizi inde abhúlá-a† hana ngae-o. La pi ani-e, zi ani djidji lie de, ani yie la di bhú da e 'kpí bini de. 18 Ebhe akunda nani ngae makpe naha mukobho pi ní li kpadji na eli gba e na kukulu-o. A ko ngubula napa me ní du ogina nguwa bhú ká ondu 'he hana inde ani abho e-o.

*Nadje eli gba Ebhe, di ne namene maka li eli ango-o apa lie-o*

19 Ondaise ma na mukunda, yi mbila engú inde-e ndjindji: kpála ne kpála du adje 'ngú má gala! La-a, ani adu agama 'ngú má gala gala de! Ani adú di ake 'ngú lie má gala gala de! 20 Padhá de, anga ke 'ngú gba kpála-a, ngagbe ngbili 'ngú kala Ebhe ade. 21 Kaka-a, yi yala ndu 'ngú bhende na sisiti-e hana. Yi yala di ndu kulu na sisiti-e hana. Yi sia eli inde li Ebhe ngalu e li bua yi-e ne nakò liyi ne kuto. Padhá de, anga eli ango-o ne angu ngú nakobho yi.

22 Yi mene engú inde li 'li Ebhe ngapa me yi mene e ko. Yi adú bha nadjedje madje de. I du mo-o de-e, amba yi ngapite bhomu-o liyi ngayi makpe. 23 Padhá de, anga kpála bhende ngadje eli, ani tsia mene maka li eli ango-o ngapapa lie de-e, ani maka kpála bhende ngatsia bhúla e bhú bitolobi. Ani ú maka ani nde lie-o. 24 Pita ani atsia bhúla e lie, ani há lie, ani tsia tápa. La-a, bha kolo má gala, ani mbíla matá de me bhúla ni de igini pi-ie de. 25 Engú bini, kpála koko ngazi 'ndji e bhú líli inde babadha na kuo kuo inde ngagbegbe kpála bhú bali-e ndjindji. Ani la di ngadhede tété. Ani ngadje eli-e lie, ani 'líli 'to e tété de. Bhú namene maka li eli-e ngapapa lie, kpála bhomu-o adú ne djali.

26 I du me kpála nde ngabhundja me ni ngamene engú na Ebhe, engú bini, ani mbíla nalila 'mi e de-e, kpála ango-o ngapite lie ngae makpe. Engú na Ebhe inde li kpála ango-o ngamene e, a padhá.

27 Engú na Ebhe inde kukulu-o, inde la di babadha bhú djila 'Dyi ní Ebhe-e, a ngae inde: a ko nanu nateteke otsulosi di ne oekesi bhú likabhu gba o-o, a la di-e nalila lie, amba engú na doto inde-e asiti ni de.

## 2

*Yi aú okpála koko ngbéngbé ane okoko de*

1 Ondaise ma, yi abhuka Ngámá gba ní Yesu Kilisito , inde abedhe ne sangu bedhe-o. Kaka-a, yi aú okpála koko ngbéngbé ane okoko de. 2 Ní pa nga me: bhulu tia bini inde adyi kati na olo, di ne obabadha bongo na kuo kuo, ali li bili inde yi apokobho bhúla yi lie-o. Pipita-a, li bhulu ndibhili inde adyi nae okakadha bongo lí di oo. 3 Yi tsia ú bhulu tia inde adyi obabadha bongo na kuo kuo ngbéngbé ane mane. Kaka-a, yi tsia pá pi ani me: «Ngamu-o, du si, li bádha bili inde!» Yi tsia pá la nae pi bhulu ndibhili-e me: «Ngamu-o, lu malu», ne me: «Du kuto bhú doto bhú li 'dhu ma si!» 4 I du me yi nde amene mo-o, amba yi ngau okpála koko ngbéngbé ane okoko mane. Yi la di ngakodho 'ngú ne mabhundja na sisiti.

5 Ondaise ma na mukunda, yi djedje nga: Ebhe alo okpála bhende naao ne obhulu ndibhili bhú djila okpála na doto-o. Ani akunda me u du ne nabhuka naali, ngubula me u li bhú Nau gba ni inde ni apa me ni ahá e pi okpála bhende ngakunda ni ko. 6 Engú bini, yi ngau obhulu ndibhili-e bhú djila yi padhá! La-a, a ngato mbolo li yi-e da? A la di ngagbe yi bhú ngbanga da? A ko obhulu tia di? 7 A ko matá bhadi uo di inde ngasobho 'li na babadha inde li Ebhe aha e pi yi-e?

8 Bhuku gba Ebhe-e apa me: «Kunda kilí mu maka mo okunda limu lie ngamu makpe ko.» A bhomu-o líli inde bhú Nau gba Ebhe ko. I du me yi nde ngalila líli ango-o, amba yi ngamene bhomu-o ndjindji. 9 Engú bini, i du me yi nde ngau okpála koko ngbéngbé ane okoko mane-e, amba yi ngamene siti 'ngú. La di-e,

† 1:17 1:17 Ndu 'he na zizi inde abhúlá: A akunda napa me ela, epe ne oikupala. † 2:8 2:8 Tsia bhú Lev. 19:18.



líli-e agbite yi, anga yi ngagumú bhomú-o líli. <sup>10</sup> Padhá de, anga i dū me kpála bini nde agumú té líli-e, ani nde la ngamene dudu-o hana ndjindji-e, amba ani agumú bhomú-o líli-e libhomu. <sup>11</sup> Padhá de, anga Ebhe inde apa me: «Mo okúnda bhoko, i dū di-e ełe gba kpála koko de», ani apa di ngae me: «Mo obhólé kpála de.» Kaka-a, i dū me mú nde kúnda bhoko, i dū di-e ełe gba kpála koko de-e, engú la bini, mú bhelé kpála-a, amba mo ogumú líli-e agumú.†

<sup>12</sup> Ka 'ngú bhomú-o, yi gama 'ngú, yi mene di 'he me yi nde ngambila ndjindji me líli akódho 'ngú gba yi-e makodho, líli ango-o, a ko bhende ngagbegbe kpála bhú bali-o. <sup>13</sup> Padhá de, anga bhú nedhinga nakodho 'ngú-o, pí kpála bhende i dje nani ndjinga okpála koko de-e, Ebhe djé di ndjinga ani de. Engú bini, kpála bhende ngadje ndjinga okpála koko-o, ekpí nakodho 'ngú gba okpála-a 'ó tsulú li ani de.

#### *Nabhuka inde ne kulu ade-e, a kukuo*

<sup>14</sup> Ondaise ma, kpála bini ti da napa me ni ne nabhuka. Engú bini, i dū la me ani nde suno kulu kulu-o de-e, nabhuka ango-o tí da nakobho ani uu? <sup>15</sup> Ní pa nga me: ndai yi bini na bhobhoko, i dū di-e bhe na ełe, u ne bongo ade, u di ne ezú ngú ekpí bini bini ade. <sup>16</sup> Li kpála bini bhú ká yi pa pí uo me: «Yi nū ne guo 'ngú ! Yi nū dyi bongo, amba yi zū 'he, yi 'u'u ma'u'u!» Oeli bhomú-o améne pí uo mangua bádha 'ngú dho, i dū me yi nde ha ehe inde u nde bhú ndibhili e pí uo de-e? <sup>17</sup> A si maka nabhuka. I dū me mú nde abhuka-a, engú bini, mú suno kulu kulu-o de-e, amba nabhuka gba mú-o kukuo.

<sup>18</sup> Engú bini, kpála ti da napa me: «Okpála koko aha lío pí nabhuka, okoko aha lío pí kulu.» Li kpála pa mo-o, ma gíe pí ani me: «Suno múma, lele pí mú ti da nadú lie ne nabhuka me mú nde mene kulu kulu-o de-e! Ngama la di-e, ma asúno nabhuka gba ma-a pí mú bhú namene kulu ango-o.» <sup>19</sup> Ngayi-e, yi ngabhuka me kolí Ebhe bha bini.

A ndjindji naali. Osisiti bua ngabhuka bhadi moko. La di-e, u ngagukú ne tsulú.

<sup>20</sup> Yi ne ongingi! Yi akúnda me u suno pí yi me nabhuka inde li kulu kulu nde lie ade-e padhá-a? <sup>21</sup> Lele pí li ogbi ní Abalahama akolo nani lie ngbingbili bhú djila Ebhe-e? A ko nani li pápá na okulu gba ani-e di? Li nedhinga inde ani aha ndili gba e Isaka lie, ani atsia a'o ani li bili natsulu enú pí Ebhe-e? <sup>22</sup> Yi ngau me nabhuka, di ne okulu gba ani-e, adú nani adholo bhú dabili bini. Ka okulu gba ani-e, Ebhe atsia au me nabhuka gba ani-e abhele. <sup>23</sup> Abhomú-o, eli inde li Bhuku gba Ebhe-e apa e-e, atsia amene lie. A ko eli inde apa me: «Abalahama abhuka Ebhe. Kaka-a, Ebhe atsia au ani me, a ko ngbili kpála .†» Ebhe atsia a'i la di ani me olia ni. <sup>24</sup> Yi ngau me Ebhe ngaziba me kpála inde-e ngbingbili li pápá na okulu gba e-o. A ko bha bini ka nabhuka kpi e kpi de.

<sup>25</sup> A bhadi si maka Lahaba, ełe inde adú akúnda obhosi ngangá-o. Ebhe aziba nani me a ko kpála na ngbingbili ka okulu gba ani-o. Padhá de, anga ani asia nani okpála inde li omatsalaele atima nani o agba e. Ani atsia amene la di me u gie lío li kpadji koko.

<sup>26</sup> A moko. Maka li ewo dū lie bhú kute de-e, amba kute bhomú-o kukuo, a bhadi moko, li nabhuka dū ne kulu bhú e de-e, amba nabhuka ango-o kukuo.

## 3

### *Ní lila 'mi ní malila*

<sup>1</sup> Ondaise ma, bhelé na okpála bhú ká yi agíli nadú omúsunu de. Padhá de, anga a ayo me yi mbila ndjindji me Ebhe akódho 'ngú gba ní omúsunu-o kpekpeke naali ané okpála koko mane. <sup>2</sup> Ndú ní hana ní ngati bhú ongú bhelé. I dū me kpála nde ti bhú engú inde ani ngagama e de-e, amba kpála ango-o abhele. Ani ti da nadú ne angu pí 'ndji kute e libhomu. <sup>3</sup> I dū me ní nde ato mboye kalase bhú 'bhé opunda ngubula me ní to bhúla uo li pápá inde ní ngakúnda e, ní ti da namene di ne kute uo libhomu maka ní akúnda lie. <sup>4</sup> Yi tsia

† 2:11 2:11 Tsia bhú Eki. 20:13, 14; di ne bhú Det. 5:17, 18. † 2:23 2:23 Tsia bhú Dje. 15:6.

nga ongbengbe zabu. A ngbengbengbe. Anvi na kpekpeke ngatutumba ngae. Laa, mboye 'he masudha inde ngalili bhúla 'ngbé zabu-o ngadjidji ngae. Li zabu-o tsia nú li pápá inde li kpála nadjedjele ngakanda e ko. <sup>5</sup> A bhadi moko pi emi. A ko mboye ehe masudha bhú kute. Engú bini, a ngabhi 'kpa e pí 'ka e li ongú na ngbengbengbe.

Yi tsia nga me ne mboye dhegu djua masudha, u ti da natsulu 'ngbé gbøndo na ngbéngbé! <sup>6</sup> Emi bhadi maka djua, a ko dabili gba siti-o. A ko suka yá ní, a la di ngasiti kute ní libhomu. Djua na likabhu na duduuma pí 'mi ní. 'Mi ní la di ngatsulu mukobho gba ní-e libhomu ne djua angoo. <sup>7</sup> Kpála-kuti ne angu ngú na 'o mboli li ndu djua oenu na bili hana, abana oedhu, onu inde ngagbele lio ne 'bu o, abana osungu. Aní a'o la bhadi mboli li uo a'o. <sup>8</sup> Engú bini, kpála-kuti ne angu ade ngú na 'o mboli li 'mi e. Emi ne ehe na sisiti. A tili naali. A abedhe la di ne sili na bhøle kpála bhú e bedhe!

<sup>9</sup> Bha ne emi bini bhomu-o, ní ngadhøge Ngámá inde 'Dyi ní-o. La bhadi ne emi bini bhomu-o, ní sosobho okpála inde li Ebhe abho o maka e makpe ko. <sup>10</sup> Oeli na dhøge di ne oeli natu pedjø-o, a ngaze bha bhú koli ebhe bini. Ondaise ma, a ayo mo-o de. <sup>11</sup> Koli kpongu bini ti da nagbe engu na babadha, di ne engu na susu de. <sup>12</sup> Ondaise ma, ndula na figi ti da nali lí ndula na olive uu? Ne me 'lá ndula na vino ti da nali lí ndula na figi uu? Kpongu na 'ngu ngutu ti da nagbe engu na babadha de.

### *Imbilangu inde ayie abhúla*

<sup>13</sup> Kpála bhende na imbilangu, inde di akø mboli 'ngú bhú ká yi uu? A ayo me aní suno bhú dasundu gba e na babadha. Aní suno di bhú kulu inde aní ngamene e ne nakø lie ne kuto di ne imbilangu. <sup>14</sup> Engú bini, i du me yi nde ne 'ngbé bua naali-e, di ne bua me o one okpála koko mane-e, yi 'o nabhi 'kpa yi pí 'ka yi ma'o. Yi asíti engú na kukulu-o ne eu gba

yi-e de. <sup>15</sup> Ngua imbilangu bhomu-o yie abhúla de, a ko bhe na doto. A ko bhe na kute, a ko bhe gba kpála inde bhú e ne siti bua. <sup>16</sup> Padhá de, anga bili inde li okpála nde lie ne 'ngbé bua-a, bili u nde lie ne gumu nane okpála koko mane-e, oo-o, nadje lio dú-u de. A adú bha bini oo ne ondu 'ngú hana bhe na sisiti.

<sup>17</sup> Engú bini, imbilangu inde ayie abhúla-a, a naae kpi hana. La di-e, a ne guo 'ngú, a ne bua na bhubhuku, di ne namanga kpála. A abedhe di ne nadje ndjinga okpála koko, a ngazu obabadha nguwa. A ngau okpála koko ngbéngbé ane okoko mane ade, a la di ne kali bhú e ade. <sup>18</sup> Okpála bhende akunda guo 'ngú-o, maka okpála alulu 'dyi. Nguwa inde u alulu e, a ko guo 'ngú, a ngazu pi uo ngbili 'ngú.

## 4

### *Mu kunda engú na doto-o, amba mu ne bhulu yala gba Ebhe*

<sup>1</sup> Okpekebhe di ne ogbele-e ngayie bhú ká yi su? A ngayie bhú osisiti gumu na ndu 'ngú ngangá inde ngagu gbele bhú kute yi-o. <sup>2</sup> Yi kukunda nasia ehe bini, engú bini, yi ti da nasisia de. Kaka-a, yi bedhe ngú nabhili okpála. Yi dudu ne gumu na sisiti ngú nasia ehe bini, engú bini, yi ti da nasisia de. Kaka-a, yi ngamene kpekebhe, yi la di ngagu gbele. Yi sisia ehe inde yi akukunda e de. Padhá de, anga yi yoyo ka Ebhe de. <sup>3</sup> Belegu yi ayoyo lie, yi sisia de anga yi yoyo maka ayo lie de. Yi yoyo bha bini ehe inde i nganga li yi-o. <sup>4</sup> Ngayi obambakuya inde-e! Yi mbila de me nakunda engú na doto-o, a ko nadu bhulu yala gba Ebhe-e di? Kpála bhende akunda engú na doto-o, aní nga'o lie bhulu yala gba Ebhe. <sup>5</sup> A aye nani lie padhá de me: «Ebhe akunda bua gba e inde aní a'o nani e bhú ní-e naali.»\* <sup>6</sup> Engú bini, bádha bhú 'bu inde li Ebhe nde ne e pi ní-e, ane ne engbé. Kaka-a, u aye bhú Bhuku gba aní-e me:

\* 4:5 4:5 Ebhe akunda bua gba e inde aní a'o nani e bhú ní-e naali: U ti da napa matá me: «Bua inde li Ebhe a'o e bhú ní-e abedhe ne osisiti gumu 'he.»

«Ebhe ne bhulɔ yala gba okpála na 'ngbé 'ndji,  
engú bini, ani ne bádha bhú 'bu pi  
obhende ngakɔ lio ne kuto ko.†»

<sup>7</sup> Kaka-a, yi manga Ebhe. Yi holo bhú 'dhu yi ka Djabulɔ kpekpeke, amba ani kpe yi tsutsu. <sup>8</sup> Yi dyudyo liyi de Ebhe masikpe, amba ani dyudyo di lie de yi masikpe. Ngayi okpála na siti 'ngú, yi vɔlɔ 'kpa yi! Ngayi okpála li bua o agbolo ngangá-a, yi vɔlɔ bua yi! <sup>9</sup> Yi mbila ndjindji me yi bhú likabhu. Yi ku 'gbá, amba yi lopolo liyi. A ayo me ezo gba yi-e dji lie, a akolo egbá, amba djali gba yi-e dji lie, a akolo likabhu. <sup>10</sup> Yi kɔ liyi bhú djila Ngámá ne kuto, amba ani tsia 'e'e yi ne abhúlá.

#### *Mo okódho 'ngú gba kpála koko de*

<sup>11</sup> Ondaise ma, yi adú apa siti 'ngú li yi sɔnda yi de. Kpála bhende ngapa siti 'ngú li ndai e, i dɔ di-e nakodho 'ngú gba ani-e, ani ngapa siti 'ngú bhomu-o li líli gba Ebhe, di ne nakodho 'ngú tété. Bhú nedhinga bhomu-o, ani ngamene líli ade, ani mangbo ngakodho 'ngú tété. <sup>12</sup> La-a, Ebhe aha líli ngae makpe. Ani tí la bhadi da nakodho 'ngú tété ngae kpi e kpi. Ngaani kpi e kpi, ani tí da nakobho kpála, di ne na'o me kpála kpi. Ngamu-o, mu la naamu ne da, mu ngakodho 'ngú gba kpála koko lie?

#### *Yi adú ne 'ngbé 'ndji de*

<sup>13</sup> Yi dje nga ma mbia inde, ngayi okpála bhende ngapa me: «Naki, i dɔ di-e mambi, ya anú bhú gudhu bhe. Ya así oo kalanga bini. Ya atsíndji 'he, ya tsia sía falanga.» <sup>14</sup> La-a, yi mbila de me mukobho gba yi-e adú mambi pi-ie de! Padhá de, anga yi maka nguwa inde ngau lie ngubula nedhinga bedi, pipita-a, u u matá-a de ko! <sup>15</sup> A ayo mangbo me yi pa me: «† dɔ me Ngámá nde akúnda-a, ya adú bhú mukobho. Ya tsia méne engú inde, i dɔ mo-o de-e, ya méne engú koko.» <sup>16</sup> Engú bini, mbia inde-e, yi ne okpála na 'ngbé 'ndji. Yi la di ngabhi 'kpa yi pí 'ka yi. Ndu ngua ongbengbe 'ndji

bhomu-o hana sisiti. <sup>17</sup> Kaka-a, li kpála mbila namene bádha 'ngú-o, engú bini, ani mene la bádha 'ngú ang-o de-e, amba ani amene siti 'ngú.

## 5

#### *Ngayi obhulɔ tia-a, yi ku 'gbá*

<sup>1</sup> Ngayi obhulɔ tia-a, yi dje nga ma mbia inde! Yi ku 'gbá, amba yi tɔ di 'ue ka olikabhu inde akólo li kute yi ko! <sup>2</sup> Tia gba yi-e azi. Okokó azu la di obongo gba yi-e azu. <sup>3</sup> Olo gba yi, la di ne aladja gba yi-e agba mbelende. Mbelende ang-o a'ó 'ngú pí yi ngae. Mbelende azú la di kute yi maka djua. Yi apo ibili bhúla tia gba yi-e mbia inde-e ali sokpí! <sup>4</sup> Yi ayala naha tia pi okpála na kulu inde ngamene kulu bhú 'dyi gba yi-o. Kaka-a, u ngalopolo lio. La di-e, Ngámá na abhúlá, Angbamili adje nalopolo lie gba uo-o adje. <sup>5</sup> Píla doto-o, yi adu bhú ká tia, yi atsia adu akobho ndjindji naali. Yi akolo ne tsikpa maka oenu inde akolo ne tsikpa ngubula ekpí inde u abhéle uo lie ko. <sup>6</sup> Yi a'o mangimbo pí kpála na ngbingbili-o. Yi atsia abhéle la di ani. La-a, ani lu kala yi ne gbele de.

#### *Yi dɔ ne 'ndjá bua, anga Ngámá ngago*

<sup>7</sup> Kaka-a, ondaise ma, yi dɔ ne 'ndjá bua akólo bha bini li 'kpí inde li Ngámá agó lie ko. Yi tsia nga kpála inde ngalu 'dyi-o. Ani ngadjeke nguwa inde ane ne bádha-a ne 'ndjá bua. Ani ngadjeke bhadi nedhinga inde li ebha na kalanu, di ne bhende na soso-o adhi lie-o. <sup>8</sup> Ngayi di-e, yi dɔ ne 'ndjá bua. Yi dɔ ne masi. Padhá de, anga nago gba Ngámá-a akolo masikpe. <sup>9</sup> Ondaise ma, yi apá siti 'ngú li yi sɔnda yi de, amba u akódho 'ngú gba yi-e de. Padhá de, anga kpála nakodho 'ngú-o alu li obhɔbhoti. <sup>10</sup> Ondaise ma, opolofeta inde akpokpo nani 'ngú ne 'li Ngámá-a, abi nani likabhu ne 'ndjá bua. Yi kpata engú inde u amene e-o. <sup>11</sup> Ní ngapa me okpála bhomu-o, a ko okpála na djali. Padhá de, anga u adu bhú likabhu ne kpéke bua. Yi adje maka li Djobe abi nani likabhu lie ne kpéke bua-o. Yi atsia

† 4:6 4:6 Tsia bhú Gbt. 3:34.

au la di ehe inde li Ngámá aha e pi ani ali soso-o. Padhá de, anga Ngámá abedhe ne ndjinga, la di ne bua na babadha.

<sup>12</sup> A ane la mane ondaise ma, yi atú silika de. Yi atú silika ne 'li kokpí de. Yi atú silika ne 'li doto de. Yi atú di silika ne 'li 'he koko belegu de bini. I du me a nde mo-o, yi de pa bha me: «A moko.» I du la di me a nde mo-o ade-e, yi de pa bha me: «A mo-o ade», ngubula me yi asía mangimbo ka Ebhe de.

*Nayo gba kpála na ngbingbili-e, a ne angu naali*

<sup>13</sup> Bhú ká yi-e, kpála bini bhú likabhu uu? A ayo me ani yo Ebhe. Bhú ká yi-e, kpála bini ne djali uu? A ayo me ani dhogè Ngámá bhú oetsi. <sup>14</sup> A li kpála bini bhú ká yi ne kuo uu? A ayo me ani 'i obhelesi okpála na Piga gba Ebhe . U yo Ebhe ngubula ani, amba u tuko la di emu pí 'ndji ani ne 'li Ngámá. <sup>15</sup> I du me u nde ayo bhú dabili bini ne nabhuka-a , li nayo ang-o kóbho kpála na kuo-o, li Ngámá 'é ani bhúlá. I du me ani nde amene siti 'ngú-o, li Ebhe tsia 'é siti 'ngú ang-o. <sup>16</sup> Kaka-a, yi mbamba ta osisiti 'ngú gba yi-e sunda yi. Yi yo Ebhe ngú yi sunda yi, amba okuo gba yi-e yie. Nayo gba kpála na ngbingbili-e, a ne angu naali. <sup>17</sup> Eliya nani ne kpála-kuti maka ní. Ani ayo nani Ebhe ne bua e hana ngubula me ebha adhi-i de. Ebha tu pála doto belegu de bini, ngubula kalanga bata ne epe madhia. <sup>18</sup> Pipita-a, ani ayo matá Ebhe. Abhomu-o, ekpi atse 'kpa li ebha kuto, doto atsia aholo di nazu nguwa gba e-o.

*Yi gie kpála inde a'o ká ngbili kpadji-e li kpadji na kukulu*

<sup>19</sup> Ondaise ma, kpála bini bhú ká yi ti da na'o ká ngbili kpadji. Pipita-a, li kpála koko tsia gie matá ani li kpadji na kukulu. <sup>20</sup> Yi mbila ndjindji me kpála inde agie kpála bini na siti 'ngú, inde a'o ká ngbili kpadji li kpadji na kukulu-o, ani akóbho bua kpála bhomu-o bhú kuo, ani tsia méne me u mbu li bhiti osisiti 'ngú gba kpála bhomu-o.

## Balua na bini gba Piele Eli na kalanu

Piele aye nani balua na bini gba e pi omakilisito inde u a'i o li bili inde me okpála inde nani li Ebhe abhu o. Okpála angoo atsambala nani bhú Adji Minele, ali pápá na abebe. Engú na ngbéngbé inde bhú balua inde-e, a ko nato masi bhú okpála inde ngatatanga. Padhá de, anga u adu nani ato mbolo li uo, kabula nabhuka gba o-o. Aní aye balua angoo ngubula naha Bádha Ngali gba Yesu Kilisito pi uo, inde nakpi, ne nazuku gba e ngaha pi okpála na'o 'to o 'to engú inde ani apa me ni améne e nedhinga nago ka ni ko. Nau ongú bhomu-o, uo ne kpadji koko ade, a ayo bha me u ziba nakibila olikabhu ne nambila ndjindji me, a ko nale inde u ngale uo ne e bhú nabhuka gba uo na kukulu-o. A ko la di me, u asía makalá li 'kpí inde li Yesu Kilisito ago lie (1:7).

Bhú nato masi inde li Piele ato e bhú okpála bhú nedhinga na likabhu-o, ani aha di líli pi okpála inde ngatanga balua inde me: u kobho maka okpála gba Kilisito.

### **Ongbengbe ongú inde bhú bhuku inde-e ngae inde:**

Eli na kalanu 1:1-2

Nagama matá 'ngú ne toto pindji mukobho inde li Ebhe ngaha e 1:3-12

Líli pindji mukobho na bubu 1:13 - 2:10

Ongú inde a ayo me makilisito mene e bhú nedhinga na likabhu 2:11 - 4:19

Namene kulu ne nakə li o ne kuto ka makilisito 5:1-11

Eli na soso 5:12-14

*Piele yi omabhuka inde agbongbolo ne bili-e mayi*

<sup>1</sup> Ma aye balua inde-e pi yi ngama Piele, ma ne bhulu titima gba YesuKilisito . Ma aye pi yi okpála inde li Ebhe abhu o, ngayi okpála inde ngadu maka ogandji okpála bhú kuti koko, ngayi inde atsambala bhú

ondu doto na Pote, ne Galatia, ne Kapadose, ne Adjia di ne Bitinia-o. <sup>2</sup> Ebhe 'Dyi ní abhu nani yi bhutode maka ani aleke nani engú angoo lie-o. Aní alo yi li kpadji gba Bu Bhobua , ani a'o yi kpi ngú nadu piga gba e, ngubula me yi du namanga Yesu Kilisito, amba ngate ani vulu yi ngú nadu bubu kala ni. A ayo me bádha bhú 'bu gba Ebhe-e du ne yi, amba ani ha di guo 'ngú pi yi ane mane.

*Piele adhəgə Ebhe, anga ani akóbho omabhuka makobho*

<sup>3</sup> A ayo me ní dhəgə Ebhe, 'Dyi Ngámá gba ní Yesu Kilisito. Padhá de, anga ani abedhe ne ndjinga pi ní bedhe, ani atsia aha mukobho na mbia pi ní bhú nazuku Yesu Kilisito bhú ká okpála inde amu-o. Kaka-a, ní abhele djila ní li ani me ní azúku di mazuku. <sup>4</sup> Ní ti la di da na'o 'to ní 'to tia inde li Ebhe awo e pi ní opiga gba e-o. Aní awo tia angoo pi ní abhúlá. Tia angoo zizi de, a sisiti de, a pádha la di-i de. <sup>5</sup> Nganí okpála inde abhuka Ebhe-e, ani ngalila ní ne angu gba e, ngubula me ní sia mukobho na duduma angoo. Mukobho angoo asúno lie li sokpi.

<sup>6</sup> Ka ongú angoo, yi kpi djali, abana ayo lie me yi zu olikabhu mbia inde-e li okpadji ngangá ngú nedhinga bedi-o. <sup>7</sup> Belegu olo inde asisiti masiti-e, okpála tsutsulu ngaiza bhú djua ngú naleleke me a kolo ndjindji. A si la masi maka nabhuka gba yi-e ane olo lie mane-e? Yi ngazu olikabhu bhomu-o ngubula me okpála mbila me a li nabhuka gba yi-e ne tata. A bhadi moko ne nabhuka gba yi-o. Ebhe améne mo-o ngú namene me, kabula nabhuka gba yi-e, ani toko yi, ani dhəgə di yi, ani mene di me 'li yi kolo ngbéngbé li 'kpí li Yesu Kilisito asúno lie lie bhú sangu gba e-o. <sup>8</sup> Belegu yi u ani lie de-e, yi ne mukunda pi ani. Abana yi nde lie ngau ani ade-e, yi ngabhuka ani. Kaka-a, yi ngakpi djali naali, djali inde li kpála ti da nakpokpo lele e de, <sup>9</sup> anga yi asía makalá na nabhuka gba yi-e masia. Makalá angoo, a ko li bua yi akóbho lie-o.

<sup>10</sup> Nani kalanu-o, opolofeta agili má bhotobhoto me o mbila kpadji li Ebhe

akóbho okpála lie-o. U adu akpokpo 'ngú kalanu pi okpála pindji bádha bhú 'bu inde li Ebhe a'o nani e pi yi-o. <sup>11</sup> Bua gba Kilisito inde adu bhú uo-o apa pi uo kalanu me, Kilisito azú likabhu. Pipita-a, ani tsia sía sangu gba Ebhe-o. Opolofeta ang-o agili nambila me ongú bhomu-o akódho 'kpí nadho. U atsia agili di nambila me a adú lele pi. <sup>12</sup> Ebhe atsia asuno pi opolofeta bhomu-o me ongú ang-o kódho 'kpí bhú nedhinga gba uo-o de, engú bini, akódho mangbo 'kpí bhú 'kpí gba yi. Mbia inde-e, okpála inde ngakpokpo Bádha Ngali-e, akpokpo ongú bhomu-o pi yi akpokpo. U akpokpo pi yi ne angu gba Bu Bhobua inde li Ebhe atima e-o. Belegu oandjelu, u akunda nau ongú ang-o.

*Piele apa pi omabhuka me u du bubu kala Ebhe*

<sup>13</sup> Kaka-a, yi du bedhe ndu 'kpí hana. Yi bhulu djila yi, yi 'o 'to yi libhomu 'to bádha bhú 'bu inde li Ebhe ahá e pi yi li 'kpí li Yesu Kilisito asúno lie lie bhú sangu gba e-o. <sup>14</sup> Yi manga Ebhe maka ongisi na babadha. Yi akpáta matá kpadji na sisiti inde nani yi adu nakpata e kala me yi nde mbila Yesu Kilisito de-e de. <sup>15</sup> Engú bini, yi du bubu bhú mukobho gba yi-e libhomu, maka li Ebhe inde a'i yi-e nde lie bubu-o. <sup>16</sup> Padhá de, anga u aye bhú Bhuku gba Ebhe-e me: «Yi du bubu, anga ma bubu.†»

<sup>17</sup> Nedhinga yi ngayo Ebhe lie, yi nga'i ani me «'Dyi ní». Padhá de, anga ani ngakodho 'ngú gba okpála nakpata lele kulu gba kpála ne kpála. Ani tsia la di bhúla kpála bini de. Kaka-a, nedhinga yi nde nga bha lie píla doto-o, yi manga ani bhú ndu 'ngú hana inde yi ngamene e-o. <sup>18</sup> Yi mbila ndjindji maka li Ebhe agbegbe yi lie li kpadji ndu ongú hana na padhá padhá inde li odyi yi apana e pi yi-o. Ebhe kala yi ne ehe inde ngasiti masiti maka aladja, i du di-e olo de. <sup>19</sup> Engú bini, ani akala yi ne ngute Kilisito inde ane ndu 'he hana-o. Kilisito maka ndili kandole inde aha mukobho gba e, u atsia abhøle e-o. Ani bubu kala Ebhe, ehe na sisiti

bhú ani belegu ade bini. <sup>20</sup> Ebhe abhu nani ani ngú nakpi li 'ngú gba okpála kala me ani bho doto, la mbia inde-e, ani atsia asuno ani bhú onedhinga na soso inde-e mbámbá ngubula me ani kobho yi. <sup>21</sup> Kabula Kilisito-o, yi abhuka Ebhe inde azuku ani bhú ká okpála inde amu-o, ani atsia aha sangu pi ani. Kaka-a, yi nga'o nabhuka gba yi-e bhú Ebhe, yi la di nga'o 'to yi 'to ani.

<sup>22</sup> Yi avulu bua yi avulu ngú nadu ne mukunda na kukulu sunda yi. Yi avulu bua yi ang-o li kpadji nakpata ongú na kukulu inde li Ebhe asuno e pi yi-o. Ka 'ngú ang-o, ma apa pi yi me, yi du ndu 'kpí hana ne mukunda na kukulu sunda yi di ne bádha bua. <sup>23</sup> Yi mbila ndjindji me Ebhe aha mukobho na mbia pi yi li kpadji na eli gba e na duduma, inde di ngaha mukobho pi okpála-o. Ebhe inde i kpikpi de-e aha mukobho ang-o pi yi ngae makpe. Yi sia mukobho ang-o ka odyi yi inde amú mamu-o de. <sup>24</sup> Padhá de, anga u aye bhú Bhuku gba Ebhe-e me:

«Ndu okpála hana ngamu maka ulu a'u'ulu lie-o.

Bádha gba kpála-kuti ngandjia maka bádha gba felele andjindjia lie, i du me a nde anuku-o.

<sup>25</sup> Engú bini, eli gba Ngámá-a ngadu duduma ne duduma.†»  
Eli ang-o, a ko Bádha Ngali inde u akpokpo e pi yi-o.

## 2

*Piele apa me omabhuka du maka teme na mukobho*

<sup>1</sup> Yi bala ndu sisiti 'ngú hana kabula mukobho na mbia inde li Ebhe aha e pi yi-o. Yi apíte kpála bini de, yi adú amene engú na kali de, yi adú ne gumu 'he gba kpála de, yi adú di apa 'ngú li okpála koko sisiti de. <sup>2</sup> Yi du maka ongisi u azu o na mbia, inde ndu 'kpí hana ne gumu nandji 'ka. Yi du bhadi ne gumu Eli gba Ebhe-e moko ngubula me yi bhele, akólo li ekpi li Ebhe akóbho yi lie libhomu-o. <sup>3</sup> Yi du bha ne gumu eli ang-o na paká paká, anga yi

† 1:16 1:16 Tsia bhú Lev. 19:2. † 1:25 1:25 Tsia bhú Isa. 40:6-8.

ambila bádha 'ngú inde li Ngámá ngaha e li bua yi ambila.

<sup>4</sup> Yi dyudyo liyi de Ngámá Yesu Kilisito masakpe, a ko teme na mukobho, inde li okpála abhike nani e ne 'ili me a li kulu ade-o. La-a, bhú djila Ebhe inde alo nani teme ango-o, ani atsia au me a li kulu ane ndu oteme koko hana. <sup>5</sup> Ngayi makpe-e di-e, yi du maka teme inde na mukobho, amba Ebhe ha yi, ani tsia yiki eti gba Bu Bhobua ne yi maka 'ngbé 'ti Ebhe gba omaYuda-o. Bhú 'ti ango-o, yi akólo piga gba odimandø inde aha lio pi Ebhe, ngubula naha makiso na Bu Bhobua, inde ndjindji pi Ebhe li kpadji gba Yesu Kilisito. <sup>6</sup> Padhá de, anga u aye bhú Bhuku gba Ebhe-e me:

«Yi gbo nga 'dje yi, ma alo teme bini na mase,  
ma a'ó bhú gudhu na Siona

maka teme inde abi eti-e libhomu.

Kpála inde aziba teme ango-o sia numu belegu de bini.†»

<sup>7</sup> Pi yi okpála inde abhuka-a, teme ango-o pi yi li kulu ane ndu oteme koko hana. Engú bini, pi okpála bhende i bhuka de-e, a mo-o ade. Padhá de, anga u aye bhú Bhuku gba Ebhe-e me:

«Teme inde li okpála nayiki eti-e abhike e-e,  
akolo teme inde abi eti-e libhomu ngae.†»

<sup>8</sup> U aye matá di bhú Bhuku gba Ebhe-e me:

«Okpála ngado 'dhu o li teme ango-o,  
i tsia méne me u gu 'i o kuto.†»

U ngado 'dhu o tété, anga u ayala nakpata 'li Ebhe, Ebhe apa nani bhutode me a méne lie mo-o.

<sup>9</sup> La pi yi-e, yi ne piga inde li Ebhe abhu o-o. Yi ne piga gba odimandø inde ngamene kulu pi 'ngbé Ngámá Ebhe. Yi ne piga okpála inde li Ebhe a'o o kpi pi e. Ani abhu yi ngubula me yi kpokpo ongbengbe 'ngú inde ni amene e pi okpála. Ani a 'i yi me yi ze bhú biti, amba yi go li zi 'ke gba ni inde ngatsi ane ndu 'he hana-o. <sup>10</sup> Nani kalanu-o, yi du ne

okpála gba Ebhe de, engú bini mbia inde-e, yi akolo okpála gba ani. Nani kalanu-o, yi sia ndjinga gba Ebhe-e de, engú bini mbia inde-e, yi asia ndjinga gba ani asia.

*Piele aha líli pi omabhuka pindji lele namanga lio, di ne namanga Ebhe*

<sup>11</sup> Ondaise ma na mukunda, yi mbila ndjindji me yi pila doto ei ne ogomago. Kuti gba yi-e pila doto inde-e ade. Kaka-a, ma ayo ka yi me, yi adú améne osisiti 'ngú li gumu e nde li bua yi-e de, anga ongú bhomu-o ngazu bili li bhobua yi ngae.

<sup>12</sup> Yi mene ehe liyi bhú ká omupagano ndjindji ngubula me, abana u du apa 'ngú li yi sisiti-e, u de u obabadha 'ngú inde yi ngamene e-o, amba ekpi li Ebhe asuno lie pi uo lie, u de dhøø ani.

<sup>13</sup> Yi kò liyi ne kuto kala ndu okpála hana inde ngau pila doto, kabula Ngámá gba ní Yesu Kilisito inde yi ngakpata nganda e-o. Yi kò liyi ne kuto kala ongbengbe ongámási na doto inde ngau pi ndu okpála hana-o. <sup>14</sup> Yi kò liyi ne kuto kala oguvelenele inde li 'ngbé ngámá a'o o-o. Ani a'o uo ngubula me u mene okpála inde ngamene siti 'ngú-o kpekpeke, di ne me u dhøø obhende ngamene bádha 'ngú-o. <sup>15</sup> Padhá de, anga Ebhe akunda me yi gbite 'bhø ngingi 'ngú gba okpála inde ayala nambila Ebhe-e ne namene bádha 'ngú. <sup>16</sup> Yi mene ehe liyi maka okpála inde bhú bali ade. Engú bini, yi apá de me, o nde lie bhú bali ade-e, o mene siti 'ngú bhú gandji-e de. Yi mene mangbo liyi maka obalise gba Ebhe. <sup>17</sup> Yi manga ndu okpála hana. Yi du ne mukunda pi ondaise yi bhú 'bu nabhuka. Yi manga ongbengbe ongámási mamanga. Yi dhøø Ebhe.

<sup>18</sup> Ngayi obalise-e, yi kò liyi kala omakulasi yi ne kuto. Yi manga uo ndjindji. Yi amanga bha bini obhende na bhuku 'ngú-o de, inde ngamene yi ndjindji-e de, yi manga di obhende ngamene yi sisiti-o. <sup>19</sup> Padhá de, anga Ebhe ngasuno bádha bhú 'bu pi kpála inde ngazu likabhu sakpa okpála koko

† 2:6 2:6 Tsia bhú Isa. 28:16. † 2:7 2:7 Tsia bhú Ets. 118:22. † 2:8 2:8 Tsia bhú Isa. 8:14.

padhá me aní nde mene siti 'ngú de, li aní tsia kíbila likabhu ango-o kabula 'li Ebhe. <sup>20</sup> Yi dũ azũ bhikpa ka siti 'ngú yi amene e, a dhégo yi tété da? Engú bini, i dũ me yi nde ngazũ likabhu sakpa okpála koko kabula bádha 'ngú inde yi amene e, li yi kibila likabhu ango-o, a ko bádha 'ngú bhú djila Ebhe. <sup>21</sup> Aní a'i yi me yi mene moko, anga Kilisito azũ bhadi likabhu pi yi moko. Aní apana kpadji pi yi, amba yi mene bhadi maka ni.

<sup>22</sup> Ngaani-e, aní mene siti 'ngú de.

Aní pa eu belegu de bini.†

<sup>23</sup> Li okpála asobho aní lie, aní gie sobho pi uo de.

Abana u ato mbolo li aní lie, aní gũ okpála ango-o de.

Aní a'o mangbo lie sakpa Ebhe inde ngakodho 'ngú ngbingbili-o.

<sup>24</sup> Aní abha sisiti 'ngú gba ní-e, aní atsia abi li kute e.

Aní abi siti 'ngú ango-o nedhinga u abhelo aní lie li kulusi ngubula me, ní dũ maka okpála inde amu li pápá na siti 'ngú amu,

di ne me ní dũ mangbo bhú mukobho inde ngbingbili.

Yi akobho ka oeka li aní abi e-o.

<sup>25</sup> Padhá de, anga yi dũ nani maka okandelo inde angita.

Engú bini, mbia inde-e, yi agie liyi agba mulila, inde ngalila bua yi-o.

### 3

#### *Lele dasundu sũnda olisi ne obhosi*

<sup>1</sup> Ma ngapa di pi yi olisi moko, yi ko liyi kala obhosi gba yi-e ne kuto da napa me abana li bini bini bhú ká uo bhuka 'li Ebhe de-e, u de dji bua o ka nau lele mukobho gba yi, abana yi pa 'ngú pi uo pindji eli gba Ebhe-e de-e, <sup>2</sup> u de bhuka kabula nau me lele dasundu gba yi-e ndjindji, yi la di ngamanga uo. <sup>3</sup> Yi adũ bha bini aleke kute yi akilidjo de, abana i dũ bhú napulu sundjo yi, abana i dũ nadyi omagege na olo, abana i dũ di-e bhú nadyi obongo bhe na mase naali. <sup>4</sup> Engú bini, yi leke mangbo liyi bhú naleke bua yi. Yi ko liyi ne kuto, yi dũ di ne guo 'ngú

. Padhá de, anga a bhomu-o bádha bhe i zizi de-o, a nganga li Ebhe naali. <sup>5</sup> Olisi na kalanu inde adũ akpata Ebhe-e, inde adũ di na'o 'to o 'to aní-e, adũ nani aleke lio ne ngua bádha kulu bhomu. U adũ la di namene líli gba obhosi gba o-o. <sup>6</sup> Yi bhundja nga pindji Sala. Aní adũ amene nani líli gba 'ko e Abalahama ndjindji. Aní adũ a'i aní me ngámá gba ni. Yi ne ongisi na olisilisi gba Sala na paká paká, i dũ me yi nde ngamene bádha 'ngú, yi nde 'o la di de me tsulu ha angu yi de-o.

<sup>7</sup> A bhadi moko pi yi obhosi, a ayo me dasundu gba yi ne olisi gba yi-e dũ ndjindji. Yi mbila ndjindji me uo bhubhuku ane yi. Yi manga uo mamanga, anga mukobho inde li Ebhe ahá e pi yi bhú bádha bhú 'bu gba e-e, aní ahá pi ndũ yi ne uo hana. Yi mene mo-o, ehe bini ní kpadji kala mayo gba yi-e de.

#### *Lele dasundu gba omabhuka*

<sup>8</sup> Ngú nabu tata-a, yi dũ ndũ yi hana ne bua bini, yi dũ amene bádha 'ngú li yi sũnda yi, yi dũ ne mukunda sũnda yi maka ondaise . Yi dũ ne ndjinga sũnda yi, yi ko la di liyi sũnda yi ne kuto. <sup>9</sup> Yi agie siti pi siti de, i dũ di-e sobho pi sobho de. Li kpála sobho yi-e, yi agie sobho pi aní de, engú bini, yi yo mangbo Ebhe me aní tuko bisagu pi aní. Padhá de, anga nedhinga li Ebhe a'i yi lie me yi dũ piga gba ni-e, aní apa nani pi yi me ni atũko bisagu pi yi. <sup>10</sup> A maka u aye lie bhú Bhuku gba Ebhe-e me:

«Li kpála kũnda me mukobho gba ni-e dũ ndjindji-e,

aní kũnda la di me ni dũ bhú djali-e, a ayo de me aní dũ apa siti 'ngú-o de, a ayo la di de me aní dũ apa eu-o de.

<sup>11</sup> A ayo me aní dji 'ngbu e li siti 'ngú, aní mene mangbo bádha 'ngú.

Aní gili guo 'ngú ne kekele hana.

<sup>12</sup> Padhá de, anga Ngámá ne djila e li okpála inde ngamene ngbili 'ngú , aní bedhe ngú nadjé mayo gba uo.

Engú bini, aní ngadji 'ngbu e li okpála bhende ngamene osisiti 'ngú-o.†»

† 2:22 2:22 Tsia bhú Isa. 53:9. † 3:12 3:10-12 Tsia bhú Ets. 34:13-17.



*Piele apa me omabhuka kibila likabhu me u nde ngamene bádha 'ngú*

<sup>13</sup> I dũ me yi nde nga'o bua yi hana li namene bádha 'ngú-o, a ko da inde améne yi sisiti-e? <sup>14</sup> Yi dũ ne djali nedhinga yi ngazũ likabhu lie ka bádha 'ngú inde yi ngamene e-o. Ka 'ngú ango-o, yi adũ ne tsulũ okpála inde ngakũnda namene yi sisiti-e de, bua yi abáka di-i de. <sup>15</sup> Yi dhogẽ mangbo Kilisito li bua yi maka Ngámá gba yi. Yi dũ bedhe ndũ 'kpí hana ngú nakpokpo 'ta yi nga'o 'to yi lie 'to Kilisito pi okpála bhende ngayi yi tété-o. <sup>16</sup> Engú bini, yi kpokpo ne bhũkũ bua, amba yi manga la di uo mamanga. Yi mene ndũ 'kpí hana engú inde yi au e li bua yi me a ndjindji-o, amba okpála bhende ngapa 'ngú li yi sisiti-e, sia nũmũ nedhinga u ngasobho bádha kulu yi ngamene e kabula 'li Kilisito lie-o. <sup>17</sup> Padhá de, anga yi sia likabhu ka siti 'ngú inde yi ngamene e, engú tété ade. La-a, yi sia likabhu kabula bádha 'ngú inde yi ngamene e, i dũ me Ebhe nde azĩba mo-o, bhobhomũ-o ane ne bádha ngae.

<sup>18</sup> Padhá de, anga Kilisito adje di likabhu kabula siti 'ngú gba ní-e bhũtsibhũtsi bini má ngbi! Ngaani kpála inde i mene siti 'ngú de-e, ani akpi ngũbula nakobho ní okpála inde ngamene siti 'ngú-o, ngũbula me ani mba bhũla ní agba Ebhe. Okpála abhẽlẽ ani bhũ kũte, engú bini Ebhe atsia azuku ani li kpadji gba Bu Bhobua .

<sup>19</sup> Ka angu gba Bu Bhobua bhomũ-o, ani atsia anũ belegũ di nakpokpo Bádha Ngali gba Ebhe-e pi obua inde amu inde bhũ tikpũ-o. <sup>20</sup> A ko bua okpála inde ayala nani nadi bua o nedhinga li Nũa adũ abho 'ngbé zabũ lie-o. La-a, Ebhe adjeke nani uo ne 'ndjá bua. Okpála inde li engu-o akobho nani o-o, u dũ bhelé de. A adũ bha nani okpála madjina padhá inde a'ũ'ũ nani bhũ zabũ-o. <sup>21</sup> Engu bhomũ-o, a ko kulu batisimo. Ebhe ngakobho yi mbia inde-e li kpadji na batisimo bhomũ. Batisimo ango-o ngũbula na'e zĩbotũ na kũte ade, engú bini, a ngũbula naha lio libhomu pi Ebhe ne bua nambila ngbili

'ngú. Ebhe ngakobho yi li kpadji na batisimo ango-o ka li Yesu Kilisito azuku lie-o. <sup>22</sup> Ani atapa abhũlálá, ani adũ de Ebhe li pápá na kokpa. Ani ngau pí 'ndji oandjelu di ne pí 'ndji ndũ obua hana inde ne angu abhũlálá oo-o.

## 4

*A ayo me omabhuka mene engú li lele mukobho na mbia*

<sup>1</sup> Ní mbila ndjindji me Kilisito adje likabhu bhũ kũte. Kaka-a, ngayi di-e, yi dũ bedhe ngú likabhu maka ani. Padhá de, anga kpála inde adje likabhu bhũ kũte-e, a'o namene siti 'ngú a'o. <sup>2</sup> Nayie pi mbia inde-e, nedhinga hana inde yi améne e píla doto-o, a ayo me yi mene bhũ mukobho gba yi-e engú inde li Ebhe akũnda e-o. Yi améne engú na sisiti inde li bua yi ngakũnda e de. <sup>3</sup> Padhá de, anga yi abala nako nedhinga gba yi-e bhelé bhũ namene engú li omũpagano amemene e-o. Yi améne matá mo-o de. Yi adũ nani akũnda olisi di ne obhosi ngangá, gumũ kũte aha di nani angu yi maha. Yi adũ abhẽlẽ kuo yi ne pandi, yi adũ apo bhũla yi ngú nandji pandi, yi adũ adho 'bi na sisiti. Yi adũ di amene engú inde ayo la ndjũ nako de me yi mene e de-o, anga yi adũ adhogẽ oebhe na eu.

<sup>4</sup> La mbia inde-e, omũpagano ngangamba, u la di ngasobho yi, anga yi kũ matá nganda uo bhũ siti 'ngú inde u ngamene e na mũgwe mũgwe-e de. <sup>5</sup> Engú bini, ekpi akólo makolo. Li 'kpí ango-o, u akpókpo 'ngú gba o-o kala Ebhe inde bedhe ngú nakodho 'ngú gba okpála inde uũ, di ne okpála bhende amu-o. <sup>6</sup> Ka 'ngú ango-o, Kilisito anũ nani belegũ nakpokpo Bádha Ngali pi okpála inde amu-o. Ani akpokpo pi uo ngũbula me, maka li Ebhe akodho 'ngú gba okpála hana lie, ngauo di-e, Ebhe akódho 'ngú gba uo-o nakpata lele maka u adũ nani lie píla doto, amba u dũ bhũ mukobho maka Ebhe li kpadji gba Bu Bhobua .

*Piele apa me omabhuka mene kulu ne makalá u asia e ka Ebhe-o*

<sup>7</sup> Sokpí akolo masakpe. Kaka-a, yi dɔ ne bádha mabhundja, yi bhulu djila yi, amba yi dɔ nayo Ebhe. <sup>8</sup> Kala ndɔ 'ngú hana-a, yi dɔ ne mukunda na paká paká sɔnda yi, anga bhobhomu-o méne me yi mbu li bhiti osisiti 'ngú li okpála koko ngamene e-o. <sup>9</sup> Yi sia okpála inde ngago agba yi-e ndjindji. Yi asía uo ne nadi mutokono de. <sup>10</sup> A ayo me yi teteke liyi ne makalá inde li Ebhe aha e pi yi bhú bádha bhú 'bu gba e-o. Yi mene mo-o, yi dú maka obabadha okpála inde ambila namene kulu ne makalá li Ebhe aha e pi yi kpi kpi kpi-o. <sup>11</sup> A ayo me kpála inde asia makalá nagama 'ngú-o, kpokpo oeli gba Ebhe-o. A ayo me kpála inde asia makalá namene kulu pi okpála koko-o, mene ne angu li Ebhe aha e pi ani-e hana, amba bhú ndɔ 'ngú hana-a, okpála dhege Ebhe ka Yesu Kilisito. Padhá de, anga ndɔ okpála hana ngadhège Ebhe, ndɔ angu hana sakpa ani dɔdɔma ne dɔdɔma. A adɔ moko!

*Piele apa me omabhuka kibila likabhu ka 'li Kilisito*

<sup>12</sup> Ondaise ma na mukunda, yi angamba ka okpekpeke da 'ngú yi ngali bhú e de. Ongú bhomu-o ngakolo li yi ngubula nambila lele nabhuka gba yi-e nde lie-o. Yi abhúndja de me a ko ongú koko kpi-e de. <sup>13</sup> Engú bini, yi kpi djali, anga yi ngabi bhomu-o té likabhu inde li Kilisito adje e, amba li 'kpí ani asúno sangu gba e lie pi ndɔ okpála hana-a, yi de bedhe di ne djali na kuo kuo. <sup>14</sup> Yi dɔ ne djali nedhinga li okpála nde ngasobho yi lie kabula 'li Kilisito-o. Padhá de, anga Bua na asasaua gba Ebhe-e ngadɔ bhú dabili bini ne yi. <sup>15</sup> I dɔ me sɔka yi nde ngazɔ likabhu-o, adú de me ani amene siti 'ngú-o de. A ayo di de me ani zɔ likabhu anga ani abhɔlɔ kpála de, ne me ani azi 'he-e de, i dɔ di-e me ani ali bhú 'ngú gba kpála koko-o de. <sup>16</sup> Engú bini, i dɔ me kpála nde ngadje likabhu anga a ko makilisito-o, a ayo de me ani dje numu tété-e de. Ani gie mangbo heni pi Ebhe, anga a ko kpála ka Kilisito.

† 4:18 4:18 Tsia bhú Gbt. 11:31.

<sup>17</sup> Nedhinga akolo, nedhinga inde li Ebhe akódho 'ngú gba okpála lie-o. Yi mbila la me, ani akpó lita nakodho 'ngú ango-o li okpála gba e makpe. I dɔ la mo-o, bhende gba okpála inde ngayala naziba Bádha Ngali gba Ebhe-e adú la ibili naae lele pi? <sup>18</sup> U aye bhú Bhuku gba Ebhe-e me:

«I dɔ me da nakobho ka okpála inde ngbingbili-e nde kpekpeke-e, engú bhe gba okpála inde ngayala Ebhe, inde la di ngamene siti 'ngú-o, adú la ibili lele pi?»

<sup>19</sup> Kaka-a, okpála bhende ngadje likabhu anga Ebhe aziba mo-o, nɔ ne namene bádha 'ngú ne kalanu. U 'o la di lio makpe sakpa kpála inde abho ní, inde amemene 'ngú maka ani apa lie-o.

## 5

*A ayo nalila okandɔlɔ gba Ebhe-e malila*

<sup>1</sup> Ma ngagama 'ngú mbia inde-e pi okpála bhende bhú ká yi ne obhelesi okpála na Piga gba Ebhe-o. Ma di ne bhele kpála na Dadjua gba Ebhe maka uo. Ma au likabhu li Kilisito azɔ e ne djila ma. Ma asía la di té sangu gba Kilisito inde li Ebhe asúno e pi ní-o. Kaka-a, ma ngayo ka yi me: <sup>2</sup> yi lila okpála inde li Ebhe a'o o sakpa yi-e malila. Yi lila uo maka li kpála nalila okandɔlɔ alilila okandɔlɔ gba e lie-o. Yi alíla uo ka napa de me u agbite yi tété ne kpéke-e de. Engú bini, yi lila uo ne bádha bua maka li Ebhe akunda lie-o. Yi améne kulu ngubula nasia tia de, engú bini yi mene me yi nde abedhe ne mukunda bedhe. <sup>3</sup> Yi alíla okpála li Ebhe a'o o sakpa yi-e de me yi nde ako angu yi pí uo mako-o de. Engú bini, yi mene me okpála kpata lele dasundɔ gba yi-o. <sup>4</sup> Li yi mene mo-o, ekpí li Yesu Kilisito inde ngalila ní-e agó lie-e, yi sía makalá na sangu ka ani. Makalá ango-o ngadɔ dɔdɔma ne dɔdɔma.

*Yi kɔ liyi kala Ebhe ne kuto*

<sup>5</sup> A bhadi moko pi yi omakombise, yi ke liyi ne kuto kala obhelesi okpála gba yi-o. Ma ngapa pi ndu yi omabhuka hana me, yi ke liyi ne kuto sũnda yi. Yi teteke liyi sũnda yi, padhá de, anga u aye bhú Bhuku gba Ebhe-e me:

«Ebhe ngadji 'ngbu e li obhulu 'ngbé 'ndji,

engú bini, ani ngaha bádha bhú 'bu pi okpála inde ngakø lio ne kuto.†»

<sup>6</sup> Kaka-a, ma ngapa pi yi me yi ke liyi ne kuto kala Ebhe inde ne angu, amba ani 'e'e yi ne abhulá li nedhinga ani akũnda lie-o. <sup>7</sup> Yi 'o ndu 'ngú hana inde ngato mbolo li yi-e sakpa ani, anga ani ngalila yi.

<sup>8</sup> Yi du bedhe, yi lila liyi, padhá de, anga djabulu bhulu yala gba ní-e ngadji bili maka kingbi inde ngangulumba. Ani ngagili me ni azú da-ie. <sup>9</sup> Yi lu kala ani kpekpeke bhú nabhuka . Yi mbila ndjindji me omabhuka koko pála doto libhomu-o bhadi ngadje likabhu maka yi. <sup>10</sup> Yi adjé nga matá likabhu ngubula nedhinga bedi. Engú bini, Ebhe inde bhulu bádha bhú 'bu-o, a'i yi ngú nali bhú sangu na dũdũma gba e bhú nakpøtø liyi bhú dabili ne Kilisito. Ani aléke yi ngae makpe, ani tsia méne me yi lu kpekpeke bhú ndu 'ngú hana má kpøkøbhø! <sup>11</sup> A ayo me ani u dũdũma ne dũdũma. A adu moko.

### *Oeli na soso*

<sup>12</sup> Silivano ateteke ma li naye mbo ndu balua inde-e pi yi ngae. Ma ambila me a ko ndai ní makilisito inde ngamene 'ngú li lelele. Ma aye balua inde-e ngubula nato masi bhú yi, di ne napa pi yi me a inde-e bádha bhú 'bu na kukulũ gba Ebhe, yi gbite liyi tété.

<sup>13</sup> Omabhuka inde bhú Babilona\* ei, inde li Ebhe abhu o maka ani abhu di yi lie-e, yi yi mayi. Ndili gba ma Maloko yi di yi mayi. <sup>14</sup> Yi yi liyi sũnda yi, yi kama liyi sũnda yi ngú nasuno me yi ne mukũnda sũnda yi. A ayo me guo 'ngú du

bhú dabili bini ne yi okpála inde bhú 'bu Kilisito hana.

† 5:5 5:5 Tsia bhú Gbt. 3:34. \* 5:13 5:13 Babilona: Okpála bhelé ngabhundja me li bili inde-e, a akũnda nasuno gũdhũ na Loma .

## Balua na bhisi gba Piele Eli na kalanu

Piele aye balua gba e na bhisi pi 'ngbé limbi omakilisito na kalanu. Engú na ngbéngbé inde bhúbhú-o, a ko ngubula naga kulu gba omusuno na eu di ne ongu na zabhe inde ngayie bhú ongu angoo. Ngú naha angu engú bhomu-o, a ayo nagbite lio li nambila Ebhe na kakulu di ne Ngámá Yesu Kilisito, ne nasuno inde li okpála inde au Yesu ne djila o akpokpo e-o. Piele alu kpekpeke li nasuno na eu inde li okpála adu apa lie me Yesu go matá de-o. Aní atsia apa me nabhue inde li Yesu ngabhue lie, a ko anga Ebhe kunda de me kpála bini kpi-e de. Engú bini, aní ngakunda me okpála hana koto bhú siti 'ngú (3:9).

### **Ongbengbe ongu inde bhú bhuku inde-e ngae inde:**

Eli na kalanu 1:1-2

Na'i inde li Ebhe a'i makilisito ne e-o 1:3-21

Omusuno na eu 2:1-22

Nago na soso gba Kilisito 3:1-18

### *Simo Piele yi omabhuka mayi*

<sup>1</sup> Ma aye balua inde-e ngama Simo Piele. Ma ne bali gba Yesu Kilisito, ma la di ne bhulu titima gba anio. Ma aye balua inde-e pi okpála bhende asia nabhuka ka ngbili 'ngú gba Yesu Kilisito-o. A ko Ebhe gba ní, a ko di Mukobho gba ní-o. Nabhuka angoo viti bini ne bhe gba ya-o. <sup>2</sup> A ayo me bádha bhú 'bu gba Ebhe di ne Ngámá gba ní Yesu Kilisito-o, du bhú dabili bini ne yi, amba u ha di guo 'ngú pi yi ane mane ka yi ambila uo lie ndjindji-o.

### *Lele nadhuku ka omakilisito*

<sup>3</sup> Yesu Kilisito bhú angu gba e aha ndu 'he hana ní nde ne gumu e ngú nakobho di ne nadu ka ní libhomu pi Ebhe. Aní amene me ní mbila Ebhe inde a'i ní bhú sangu gba e di ne bhú ngamba kulu gba e na paká paká. <sup>4</sup> Ebhe amene mo-o

ngubula me ní sia oehe na mase naali di na ngbengbengbe inde nani aní apa me ní ahá e pi ní-o. Aní aha oehe bhomu-o ngubula me yi kpe osisiti gumu 'he na doto inde ngabhili okpála-o, di ne ngubula me yi kpetse liyi bhú dabili bini ne ní.

<sup>5</sup> Ka 'ngú angoo, yi mene ne kpéke me nabhuka gba yi-e be ndu e ne nadhuku ngbingbili, pi nadhuku ngbingbili-e, yi 'o nambila Ebhe na paká paká, <sup>6</sup> pi nambila Ebhe na paká paká-a, yi 'o naholo bua yi, pi naholo bua yi-e, yi 'o kekele, pi kekele-e, yi 'o naholo lio li Ebhe, <sup>7</sup> pi naholo lio li Ebhe-e, yi 'o nadu ne mukunda sunda yi. Pi nadu ne mukunda sunda yi-e, yi 'o mukunda pi ndu okpála hana. <sup>8</sup> I du me yi nde nganu ne namene ndu ongu bhomu-o hana ne kalanu-o, i tsia méne me yi mene kulu, i méne di me yi zu nguwa bhú nambila Ngámá gba ní Yesu Kilisito-o.

<sup>9</sup> La-a, kpála bhende i mene oehe bhomu-o de-e u 'kpi tsutsu de, aní maka kpála inde i u 'kpi de. Aní a'ili 'to e me Ebhe avulu osisiti 'ngú gba ní nani ní amene e-o. <sup>10</sup> Kaka-a, ondaise ma, yi mene la matá ne kpéke me yi lu ne angu bhú e'i li Ebhe a'i yi lie, di ne maka aní abhu yi lie-o. Li yi mene mo-o, yi lí bhú siti 'ngú 'kpi bini de. <sup>11</sup> Abhomu-o, li Ebhe ká kpadji pi yi ne bua e bini me yi li bhú Nau na duduma gba Ngámá gba ní Yesu Kilisito, inde di Mukobho gba ní-o.

### *Piele apa pi omabhuka me u 'o 'to o li 'li Ebhe*

<sup>12</sup> Kaka-a, a ayo me ma 'o 'ngú bhomu-o bhú 'dje yi ndu 'kpi hana belegu yi ambila nani lie bhutode, yi atsia agbite liyi li kakulu 'ngú inde yi asia e-o. <sup>13</sup> Ma abhundja me nedhinga ma nde nga bha lie uu-o, a ndjindji me ma du na'o 'ngú bhomu-o bhú 'dje yi ngubula me yi alá-a de. <sup>14</sup> Padhá de, anga ma ambila me nedhinga nakpi ka ma-a akolo masikpe maka li Ngámá gba ní Yesu Kilisito apa muma lie-o. <sup>15</sup> Kaka-a, ma améne di ne kpéke me, pita ma akpi lie, 'to yi a'ili 'to ongu bhomu-o de.

16 Nani ya akpokpo 'ngú lie pi yi pindji nago gba Ngámá gba ní Yesu Kilisito bhú angu gba e-e, ya kpokpo pi yi ongú na padhá padhá inde li okpála ngapandja e bhú o-o de. Engú bini ya au ani bhú zi e ne djila ya makpe. 17 Padhá de, anga Ebhe 'Dyi ani adhegø ani nane mane. Abhomu-o, eli ayie agba Ebhe na angu di na asasaua atsia apa me: «Kpála inde-e, a ko Ndili gba ma, ma kunda ani naali, bua ma nga ne ani naali.†» 18 Ya adje eli inde ayie abhúla-a ne 'dje ya makpe, nedhinga ya adu lie ne Ngámá Yesu Kilisito apí 'ta li Ebhe asuno lie pi ya pí e-o.

19 Ka 'ngú angu-o, ya abhuka na paká paká ngali inde li opolofeta akpokpo nani e bhú Bhuku gba Ebhe-o . A ayo me yi gbo 'dje yi tété ndjindji, anga a maka zi 'ke inde ngatsi bhú bití. Yi gbo 'dje yi tété akólo li ekpí ahólo naseke lie-o, ekpí inde li Yesu Kilisito asúno lie lie li bua yi maka zi ikupala na kèkpí asusu lie-o. 20 Kala ndu 'ngú hana-a, yi mbila ndjindji me kpála bini ade inde i ti da nakpokpo ne imbilangú gba e makpe kú oeli inde nani li opolofeta akpokpo e, inde u aye di-e bhú Bhuku gba Ebhe-o. 21 Padhá de, anga 'li opolofeta yiyie ka kpála bini de. Engú bini, Bu Bhobua apa pi okpála ngae makpe me u kpokpo 'ngú ne 'li Ebhe.

## 2

### *Piele agbele 'dje omabhuka li 'ngú gba omusuno na eu*

1 Nani kalanu-o, opolofeta na eu adu bhú ká omaɪsalaɛle. Omusuno na eu azé bhadi bhú ká yi moko. U agó ne kali, u tsia súno ongú na eu inde a'é okpála li kpadji na mukobho-o. U ayála belegu Yesu Kilisito , Musuno gba ní inde agbegbe o bhú bali gba siti 'ngú-o. U améne lie mo-o, u ngagili bhomu-o me kpéke 'ngú na kpekpeke go ti pí o má gala! 2 Okpála bhelé akpáta kpadji na numu gba uo-o. Kaka-a, li okpála tsia sóbho kpadji na kukulu 'ngú inde li Yesu Kilisito asuno e ka uo. 3 Ka gumu 'he-e, omusuno

na eu angu-o apíte yi ne oeli na eu, u tsia gbúlú oehe gba yi-o. La-a, Ebhe akodho 'ngú gba uo-o nani didili, kpéke 'ngú na kpekpeke atí pí uo mbia.

### *Engú inde akodho 'kpí bhú nedhinga gba okpála na kalanu*

4 Padhá de, anga belegu oandjelu inde amene nani siti 'ngú-o, Ebhe dje ndjinga uo de. Engú bini, ani abala uo bhú tsu 'dú má ngbongobho, inde bhú e ne bití má ndundulundu me, u nde agbigbite uo ne gbíndjili akólo li 'kpí ani akódho 'ngú gba okpála lie-o. 5 Abana okpála nani di amene siti 'ngú-o, Ebhe dje di nani ndjinga uo de, engú bini, ani amene me engu si píla doto, amba a bhili okpála inde andjo 'li ni-o. Ani akobho bha bini Nua, inde adu apa pi okpála me u dji bua o, a la di-e okpála mananika koko.

6 Ngabula nasuno ongú inde akólo galikpe li okpála inde ngandjo 'li Ebhe-e, Ebhe atsulu ogudhu na Sodomo ne Gomolo hana má kpekèbhe! 7 Engú bini, Ebhe akobho Loto. A adu nani ngbili kpála . Bua ani adu nani ake ne siti 'ngú li okpála bhomu-o adu amene e bhú poli-e naali. 8 Ani adu nadu bhú ká obhulu poli bhomu. Ndu 'kpí hana, ani adu nau di ne nadje osisiti 'ngú gba uo-o. Ongú angu-o atsia adu nake bua ani na kuo kuo. Padhá de, anga adu ngbili kpála. 9 I du me a nde mo-o, Ngámá mbila kpadji inde ani akóbho okpála inde ngakpata 'li e bhú okpekpeke da 'ngú-o ndjindji. Ani mbila la di kpadji inde ani ahólo okpála inde ngandjo 'li e ngabula me u zu likabhu li 'kpí ani akódho 'ngú gba okpála lie ndjindji. 10 Ebhe ahá likabhu angu-o, ane mane pi okpála inde ambila lio ne nakpata osisiti gumu na kute, inde di ngau angu gba Ebhe-e bhú djila o padhá-o.

### *Engú inde akólo li omusuno na eu*

Tsulú 'ngú li omusuno na eu-o ade. U dje kpála de, u manga la di oandjelu inde li o ne zizi-e\* de. Engú bini, u ngasobho

† 1:17 1:17 Tsia bhú Mat. 17:5; ne bhú Mlk. 9:7; di ne bhú Luk. 9:35.

\* 2:10 2:10 Oandjelu inde li o ne zizi: A

akunda napa me oandjelu inde ngamanga 'li Ebhe.

uo. <sup>11</sup> Belegu li oandjelu ane omusuno na eu-o lie ne angu-o, u sobho oandjelu na ndjondjo bhomu-o kala Ngámá de. <sup>12</sup> Omusuno na eu bhomu-o ngamene 'ngú bhú 'ndji o maka onu inde u azu o ngubula me okpála dhe o li 'kú. U ngasobho oehe inde u mbila e de. U amú maka onu.

<sup>13</sup> U azú likabhu bhomu-o mada siti 'ngú inde u amene e li okpála koko-o. U ne gumu namene siti 'ngú belegu ne ngbikpi. Nedhinga yi nde ne uo lie bhú anokomia, u ngapite yi. Engú angoo ngaha pi uo djali naali, la-a, a ko 'ngú na namu. <sup>14</sup> U abedhe ne gumu nakunda olisi gba okpála koko bhú o bedhe. U ndandala li namene siti 'ngú de. U ngadhe okpála bhende ne kpéke bua ade e li 'kú gba o-o. U ngapite uo masikpe de nato uo bhú siti 'ngú. U abedhe ne gumu 'he bedhe. Ebhe atu nani pedje li uo bhutode. <sup>15</sup> U ayie li kpadji na ngbingbili e ayie, u angita. U ngakpata kpadji gba Balama, ndili gba Bosolo, inde akunda nani namene siti 'ngú ngubula nasia tia-o. <sup>16</sup> Engú bini, Ebhe ambe bhú 'ndji ani kabula siti 'ngú gba e-o. Li nedhinga bhomu-o, punda, enu i gagama 'ngú de e, agama 'ngú maka kpála-kuti. Ani atsia ani kpadji pi polofeta bhomu-o me ani amene matá engú na pele bhomu-o de.

<sup>17</sup> Omusuno na eu-o maka okpongu li engu a'ulu bhú e hana, di maka ndindi inde li anvi ngandjindjimba e. Ebhe aleke dabili gba uo-o bhú biti má ndundulundu! <sup>18</sup> U ngatolo bha bini ne ongbengbe 'ngú na padhá padhá inde li tata nde li e ade. La di-e, u ngato okpála bhende aze nga bha na mbia bhú ká okpála inde ngamene siti 'ngú-o bhú ngita. U ngato uo bhú ngita li kpadji na gumu na kute gba o-o. <sup>19</sup> U ngapa pi okpála angoo me u azé bhú bali maze, engú bini, ngauo omusuno na eu bhomu-o bhú bali na siti 'ngú. Padhá de, anga kpála ne bali pi engú inde ako pi ani-o.

<sup>20</sup> A ne okpála koko inde a'o osisiti 'ngú na doto anga u ambila Ngámá Yesu Kilisito, inde di ne Mukobho gba ní-o. †

† 2:22 2:22 Tsia bhú Gbt. 26:11.

du me u nde agie matá lio bhú namene osisiti 'ngú bhomu-o, li siti 'ngú bhomu-o gaga uo, i ko angu e pi uo-o, u kólo la matá sisiti nane da bhe na kalanu-o mane. <sup>21</sup> Padhá de, anga nako me u nde mbila ngbili kpadji-e de-e, engú du tété de. La mbia inde-e, u ambila, u atsia adji 'ngbu o li líli inde li Ebhe aha e-o. Bhobhomu-o la matá pi uo sisiti ane mane ngae. <sup>22</sup> Engú inde ngakolo li uo-o ngasuno me engú li gbitaku ngapa e-e, a ko paká. Gbitaku apa me: «Bálu gie bha lie ngú nazu zie e.†» U papa di matá me: «Pame inde u avulu kute e mbia inde-e, gie matá bha lie nato lie ne ngbedhø.»

### 3

#### *Ngámá Yesu Kilisito agie galikpe lie magie*

<sup>1</sup> Ondaise ma na mukunda, a inde-e balua na bhisi li ma aye e pi yi-o. Bhú ndu balua bhisi bhomu-o hana-a, ma aye matá pi yi ongu yi ambila e ne toto ngubula nakpo djua li bua yi li kpadji na ngbili 'ngú. <sup>2</sup> Ma akunda me 'to yi a'ili de li ongu li opolofeta gba Ebhe, di ne líli li Ngámá gba ní, inde di Mukobho gba ní e apa nani e pi yi bhú 'bhø obhulu titima inde ani atima o pi yi-o. <sup>3</sup> Kala ndu 'ngú hana-a, yi mbila me li sokpi-e, okpála inde adú namene 'ngú li gumu gba o makpe akunda e azé píla doto. U adú amu yi. <sup>4</sup> U adú napa me: «Mugito me Yesu Kilisito apa nani me ni agie lini magie, ani la dho? Padhá de, anga maka nani li onguo ogbi ya amu lie, ndu 'ngú hana bha bhú da e maka li lilita nani li Ebhe abho kokpi ne doto lie-o!»

<sup>5</sup> Okpála inde ngapa 'ngú bhomu-o ngamemene bhú gandji. U ngamene 'he mugito me u a'ili 'to o li 'ngú bini. Engú angoo me, Ebhe abho nani kokpi ne 'li e. Ani abho doto li kute engu. Ani atsia asa dengo doto ne engu ngbalina. <sup>6</sup> Ani atsia abhø la bhadi doto na kalanu-o ne engu, engu inde asi nani píla doto libhomu-o. <sup>7</sup> Ani apa di ne 'li e makpe me kokpi ne doto na naki inde-e, a adúdu tété, nakolo

li 'kpí ni akódho 'ngú gba okpála lie-o. Ni tsia tsúlu okpála bhende ngamene siti 'ngú-o.

<sup>8</sup> Ondaise ma na mukunda, a ne koli 'ngú bini inde a ayo me 'to yi a'li lie de. Pi Ebhe-e, ekpí bini maka kalanga kutu bini, kalanga kutu bini maka ekpí bini. <sup>9</sup> Okpála koko bhundja naao me, Ebhe ngamene engú inde ani apa me ni améne e má gala ade! A mo-o ade. Ebhe mangbo ne 'ndjá bua pi yi, anga ani kunda de me suka kpála bini ngita-a de. <sup>10</sup> Ngámá Yesu agó galikpe bhú gbilikiti, maka li bhulu 'zi agógo lie me 'to kpála nde 'to ani ade-o. Ekpí ango-o, okpála adjé tolo na mugwe mugwe, li djua gó tsúlu kokpí ne ndu 'he inde abhúla-a hana, li doto tsámbala ka djua má mbu.\*

<sup>11</sup> I nde lie me ndu ohe hana nde andjia mo-o, a ayo me lele nadhuku gba yi-e du ndjindji, yi du di libhomu hana pi Ebhe. <sup>12</sup> Yi 'o 'dje yi li 'kpí li Ebhe a'o e ngú ongu ango-o, amba yi mene ne kpeke me ekpí ango-o go má gala! Li 'kpí ango-o, djua atsúlu kokpí, li ohe na abhúla tsúlu hana má kpekobhe! <sup>13</sup> La-a, Ebhe apa pi ní me ni abhó kokpí di ne doto na mbia. Oo-o, adú bha ne engú na ngbingbili. A bhomu-o engú inde ní ngadjeke e-o.

<sup>14</sup> Kaka-a, ondaise ma na mukunda, i nde lie me yi ngadjeke ongu bhomu-o, yi mene ne kpeke me lele nadhuku gba yi-e du ndjindji, di ne me Ebhe aú engú na sisiti napa mapa li yi de. Yi mene di me bua yi du ne guo 'ngú kala ani. <sup>15</sup> Yi mbila me 'ndjá bua gba Ebhe-e ngubula me yi sia nedhinga ngú nadjia bua yi, amba yi kobho. Ndai ní na mukunda Polo aye bhadi pi yi moko, ne imbilangu maka li Ebhe aha pi ani lie ko. <sup>16</sup> Ani aye bhú ndu obalua gba e hana nedhinga ani ngakpokpo 'ngú lie pindji ongu bhomu-o. Da nambila ta ongu koko inde ani aye e kpekpeke. Okpála inde li imbilangu nde bhú 'ndji o ade, inde di ne kpeke bua ade-e ngakpedhelo tata-a makpedhelo. U di

ngamemene li oli koko inde bhú Bhuku gba Ebhe-e moko. U bhomu-o ngagili kuo ngú o ngao.

### *Oeli na soso*

<sup>17</sup> Pi yi ondaise ma na mukunda, yi ambila ongu bhomu-o ambila. Kaka-a, ma apa pi yi me yi bhulu djila yi ngubula me okpála inde ngayala Ebhe-e apite yi ngú nato bhula yi li pulu kpadji gba o-o de. Yi kpata uo-o, amba yi ayie li kpadji li yi alu lie kpekpeke-e ayie. <sup>18</sup> La-a, yi dhika bha li nakpata Yesu Kilisito inde Ngámá, inde di ne Mukobho gba ní-o, ngubula me ani suno bádha bhú 'bu gba e pi yi ane mane, di ne me yi mbila ani ane mane. A ayo me ndu okpála hana dhogo ani duduma ne duduma. A adu moko.

\* **3:10** 3:10 Doto tsámbala má mbu: Bhú obhuku koko-o, u aye me: doto tsia tsúlu hana. Bhú okoko-o, u aye me: Ebhe tsia kódho 'ngú gba okpála na doto ne ndu 'he inde bhúbhú-o hana. Bhú okoko-o, u aye me: doto dú matá tété de.

## Balua na bini gba Djaa Eli na kalanu

Ngbengbe ongu inde li Djaa aye e bhú balua inde-e bhisi: Engú na bini ani aye e, a pindji nato masi bhú okpála inde ngatanga balua gba ani, ngubula me u du bhú makpøtø na kukulu bhú dabili bini ne Ebhe, di ne Ndili gba ani Yesu Kilisito, la di ne napa me u lila lio ka nasuno nasisiti inde i ti da nabhøle makpøtø ango-o. Nasuno ango-o, alu pí engú inde u ngapa lie me, i du me kpála nde abu 'kpa e li ndu 'ngú hana inde atsia kute kpála-a, ani kólo sisiti. Kaka-a, a ayo nani de me Yesu Ndili gba Ebhe kolo kpála-kuti-e de. Omusuno bhomu adu apa me, a ayo me kpála koto bhú ndu 'ngú hana inde atsia kute-e makoto. U atsia asuno di me, mukobho na duduma tsia engú napa de me kpála du amene bádha 'ngú, ne me ani du ne mukunda pi okpála koko de.

La-a, ngubula napa me engú li okpála bhomu apa e a ko eu-o, Djaa atsia apa mbámhá me, Yesu Kilisito nani ne kpála-kuti. Ani atsia apa di me, ndu okpála hana inde abhuka Yesu-o, inde la di ne mukunda pi Ebhe-e, a ayo me u du ne mukunda sunda o.

### **Ongbengbe ongu inde bhú bhuku inde-e ngae inde:**

Eli na kalanu 1:1-4

Zi 'kpi, a la di-e biti 1:5 - 2:29

Ongisi gba Ebhe, a la di-e ongisi gba Djabulu 3:1-24

Ngbili 'ngú, ne pulu 'ngú 4:1-6

Ongú inde a ayo me u ue bhú mukunda 4:7-21

Nabhuka na kpekpeke 5:1-21

*Eli inde ayie agba Ebhe-e, a ko Eli na mukobho*

<sup>1</sup> Ya ngaye balua inde-e pi yi pindji Eli na mukobho. Eli ango-o adu nani kala ndu 'ngú hana nayie li lilita. Ya adje

Eli ango-o. Ya au Eli ango-o ne djila ya makpe. Ya atsia ne kpéke djila, ya atsia abu di 'kpa ya tété. <sup>2</sup> Li mukobho ango-o apana lie lie, ya au ne djila ya. Kaka-a, ya ngakpokpo 'ngú pi yi tété. Ya la di ngasuno pi yi mukobho na duduma ango-o, inde adu nani agba 'Dyi ní, inde apana la di lie pi ya ko. <sup>3</sup> Ya au engú inde-e ne djila ya, ya atsia adje di ne 'dje ya. Ya ngasusuno pi yi, amba ngayi di-e, yi kpøtø liyi ne ya bhú dabili bini, bhú makpøtø inde ya nde bhú e ne 'Dyi ní, la di ne Ndili gba e, Yesu Kilisito ko. <sup>4</sup> Ya ngaye la di engú ango-o pi yi, ngubula me ni\* bedhe ne djali.

### *Ebhe ne zi 'kpi*

<sup>5</sup> Ngali inde ya adje e ka Yesu Kilisito-o, inde ya asuno la di e pi yi-e ngae inde: Ebhe ne zi 'kpi, biti la di bhú ani belegu ade bini. <sup>6</sup> I du me ní nde apa me: «Ya akpøtø liya ne ani bhú dabili bini» me ní nde ngadholo bhú biti-e, amba ní ngapa eu, ní mene la di engú na kukulu de. <sup>7</sup> Engú bini, i du la me ní nde ngadholo li zi 'kpi maka ngaani Ebhe makpe nde lie li zi 'kpi-e, amba ní akpøtø liní bhú dabili bini ne ondaise ní akpøtø. La di-e, ngate gba Yesu, Ndili gba ani-e, ngavulu ní ne ndu siti 'ngú hana.

<sup>8</sup> I du me ní nde apa me ní mene siti 'ngú de-e, amba ní ngapite liní nganí makpe, kukulu 'ngú la di bhú ní ade. <sup>9</sup> Engú bini, i du me ní nde apandja osisiti 'ngú gba ní-e kala Ebhe-e, ka ani nde lie ne kpála na ngbingbili-e, inde amemene di engú ani apa e-e, ani 'é osisiti 'ngú ango-o, ani tsia vulu ní bhú ndu 'ngú hana inde ngbingbili bhú djila ani ade-o. <sup>10</sup> I du me ní nde apa me ní mene siti 'ngú de-e, amba ní nga'o Ebhe kpála na eu, eli gba ani-e la di bhú ní ade.

## 2

<sup>1</sup> Odi ma, ma ngaye engú inde-e pi yi, amba yi améne siti 'ngú de. Engú bini, i

\* 1:4 1:4 Ní: Bhú obhuku koko-o, u a aye me: «Djali gba yi.»



du la me kpála bini nde amene siti 'ngú-o, a ka ní ne kpála inde ngakpokpo 'ngú gba ní-e pì 'Dyi ní. A ko Yesu Kilisito , kpála na ngbingbili-o . <sup>2</sup> Ngaani makpe-e, ani aha nani mukobho gba e ngubula me Ebhe 'e osisiti 'ngú gba ní ko. La-a, a ko bha bini ngubula osisiti 'ngú bhe gba ní-e de. Engú bini, a ko di ngubula osisiti 'ngú gba okpála na pála doto libhomu.

### *Yi lila olíli gba Ebhe-e malila*

<sup>3</sup> I du la me ní nde ngalila olíli gba Ebhe-e, ní tsia mbíla me ní mbíla Ebhe hana. <sup>4</sup> Li kpála pa me ní mbíla Ebhe hana, engú bini, i du la me kpála ango-o nde lila olíli gba ani-e de-e, amba a ko kpála na eu, kukulú 'ngú la di bhú ani ade. <sup>5</sup> Engú bini, kpála bhende ngalila 'li Ebhe ndjindji-e, a ko kpála bhende akúnda Ebhe kukulú. A bhomu-o engú inde ní ambíla ka e me ní akpètse líni bhú dabilí bini ne Ebhe-o. <sup>6</sup> Kpála bhende ngapa me ní akpètse líni bhú dabilí bini ne Ebhe-e, a ayo me mukobho gba kpála ango-o du di maka bhende gba Yesu adu nani lie ko.

<sup>7</sup> Ondaise ma na mukúnda, líli inde ma ngaye e pì yi inde-e, a ko líli na mbíla de. Engú bini, a ko líli na didili. Yi asia nani líli ango-o nayie lí lilita.\* Líli na didili ango-o, a ko eli inde yi adje e-o. <sup>8</sup> La-a, ma ngaye pì yi inde-e líli na mbíla. Kukulú 'ngú na líli ango-o ngau lie bhú Yesu, la di ne bhú yi. Padhá de, anga bití aholo nandjia aholo, zì 'kpí na kukulú-o aholo la di nasu aholo.

<sup>9</sup> Kpála bhende ngapa me ní bha ndju lí zì 'kpí me ani nde ngayala ndai e-e, kpála ango-o nga bha ngadu bhú bití. <sup>10</sup> Kpála bhende ngakúnda ndai e-e, kpála ango-o ngadu lí zì 'kpí. Kaka-a, engú inde i tí da nato kpála koko bhú siti 'ngú-o bhú ani belegu ade bini. <sup>11</sup> Engú bini, kpála bhende ngayala ndai e-e, kpála ango-o ngadu bhú bití. Ani ngadholo bhú bití, ani mbíla la di de me ní adji ne su-oie de, anga bití anini djila ani manini.

### *Yi lila liyi ka ongú na doto malila*

\* **2:7** 2:7 Nayie lí lilita: A ko nayie lí nedhinga inde u adje nani 'li Ebhe lie ko. Tsia bhú 1 Dja. 2:24, 3:11, di ne bhú 2 Dja. 1:5.

<sup>12</sup> Odi ma, ma ngaye engú inde-e pì yi, anga ka 'li Kilisito-o, Ebhe a'e siti 'ngú gba yi-e a'e.

<sup>13</sup> Odyi ma, ma ngaye engú inde-e pì yi, anga kpála inde adu nani kala ndu 'ngú hana nayie lí lilita-a, yi mbíla ani hana.

Omakombise, ma ngaye engú inde-e pì yi, anga yi aha angu Siti aha.

<sup>14</sup> Odi ma, ma aye engú inde-e pì yi. Padhá de, anga yi mbíla 'Dyi ní hana.

Odyi ma, ma aye engú inde-e pì yi, anga kpála inde adu nani kala ndu 'ngú hana nayie lí lilita-a, yi mbíla ani hana.

Omakombise, ma aye engú inde-e pì yi, anga yi ne angu bhú nabhuka .

La di-e, 'li Ebhe ngadu bhú yi, yi atsia aha la di angu Siti.

<sup>15</sup> Kaka-a, yi akúnda doto inde-e de. Yi akúnda di oehe inde bhúbhú-o belegu de bini. Lí kpála kúnda doto-o, amba ani kúnda 'Dyi ní Ebhe de. <sup>16</sup> Padhá de, anga ndu oehe na doto-o hana maka: gumu na sisiti inde bhú kpála, gumu nasia ndu 'he hana inde lí djila ngau e, a la di-e, nadu ne 'ngbé 'ndji ka otia na doto, ndu 'he bhomu-o hana ngayie ka 'Dyi ní Ebhe ade. Engú bini, a ko ndu 'he na doto. <sup>17</sup> La-a, doto ngakodho 'kpí, di ne ndu 'he inde bhúbhú-o hana. Engú la bini, kpála bhende ngamene engú lí Ebhe akúnda e, ani ngadu bhú mukobho duduma ne duduma.

### *Yi lila liyi ka obhulu yala gba Kilisito malila*

<sup>18</sup> Odi ma, sokpí-e akolo masikpe! Yi adje nani engú inde u apa e adje. U apa nani me: «A ayo me bhulu yala gba Kilisito-o go.» Mbíla inde-e, obhulu yala gba Kilisito aze bhibhiti. Kaka-a, ní ngambíla me sokpí-e akolo masikpe. <sup>19</sup> Okpála ango-o ayie bhú ká ní. Padhá de, anga a ko nani okpála ka ní de. I dú me u dú nani ne okpála ka ní-e, u de adu ne ní bhú dabilí bini. Engú bini, u ayie bhú ká ní, mbíla inde-e, a au lie mbámábá

me ndu okpála bhomu-o hana, a ko nani naao okpála ka ní de.

<sup>20</sup> La pi yi-e, yi asia nani naayi Bua gba Ebhe. A atuko Bua ango-o pí yi ne Kpála na bubu. Kaka-a, yi ambila engú na kukulu-o ndu yi hana. <sup>21</sup> Engú inde ma aye e pi yi-e, a ko de ka me yi mbila engú na kukulu de-e de. Engú bini, ma aye pi yi anga yi mbila engú na kukulu-o hana. La di-e, eu ti da nakoto bhú engú inde kukulu-o belegu de bini.

<sup>22</sup> Kpála na eu-o, a ko da? A ko kpála bhende ngapa me Yesu ne Kilisito ade ko. Kpála ango-o, a ko bhulu yala gba Kilisito. Ani ayala Ebhe, ani atsia ayala di Ndili gba ani-o. <sup>23</sup> Padhá de, anga kpála bhende ayala Ndili-e, ani ayala di bhomu-o 'Dyi ani. Kpála bhende ngapa 'ngú gba Ndili-e mbámbá-a, ani ngapa di bhomu-o engú gba 'Dyi ani.

<sup>24</sup> Kaka-a, eli inde yi adje nani e nayie li lilita-a, a ayo me asi kuti e li bua yi. Padhá de, anga i du me eli inde yi adje nani e nayie li lilita-a nde asi kuti e li bua yi-e, ngayi di-e, yi dú ne Ndili-e kpála bini, yi tsia dú la di ne 'Dyi ani kpála bini. <sup>25</sup> A bhomu-o ehe inde li Kilisito apa nani me ni ahá e pi ní-e, a ko mukobho na duduma.

<sup>26</sup> Ma aye engú inde-e pi yi pindji obhende ngagili napite yi ko. <sup>27</sup> Engú bini ngayi-e, Kilisito atuko Bua gba e pí yi. Bua ango-o ngadu bhú yi. Kaka-a, yi matá ne gumu musuno koko ade. Padhá de, anga Bu Bhobua ngasuno ndu 'ngú pi yi hana. La di-e, engú inde ani ngasuno e, a ko kukulu 'ngú, a ko eu de. Kaka-a, yi du bhú Kilisito maka li Bu Bhobua asuno lie pi yi ko.

<sup>28</sup> A moko odi ma, yi du bhú Kilisito, amba nedhinga inde ani akóto lie, ní adú ne tsulu de, ní adú kala ani ne numu de. <sup>29</sup> Yi mbila ndjindji me Kilisito ngbingbili. Kaka-a, ayo me yi mbila la di me ndu kpála hana inde ngamene engú na ngbingbili-e, kpála ango-o, Ebhe azu ani ngae.

### 3

*Engú inde asuno me ongisi gba Ebhe-e kpi ne obhende gba Djabulu-o*

<sup>1</sup> Yi tsia nga maka li 'Dyi ní asuno mukunda gba e pi ní lie-o. Mukunda ango-o, a ko me ní asia 'ili me ní ne ongisi gba Ebhe. Ní la bhadi mo-o na paká! Kaka-a, okpála na doto mbila ní de, anga u mbila di nani Ebhe de. <sup>2</sup> Ondaise ma na mukunda, mbia inde-e, ní ne ongisi gba Ebhe. Engú la bini, lele maka ní adú lie, asuno nga lie mbámbá de. La-a, ní ngambila me, nedhinga inde li Kilisito akóto lie, ní adú maka ani. Padhá de, anga ní aú ani maka ani nde lie-o. <sup>3</sup> Kaka-a, kpála ne kpála inde nga'o 'to e 'to ani-e, nga'o lie bubu maka ani nde lie bubu ko.

<sup>4</sup> Ndu okpála hana inde ngamene siti 'ngú-o, ngagumu líli gba Ebhe. Padhá de, anga siti 'ngú, a ko nagumu líli. <sup>5</sup> Engú bini, yi mbila hana me Yesu Kilisito ago ngubula na'e ongú na sisiti. La di-e, siti 'ngú bhú ani belegu ade bini. <sup>6</sup> A moko, kpála inde ngadu me ani nde bhú Yesu-o, ani memene siti 'ngú de. La-a, kpála inde amemene siti 'ngú-o, kpála ango-o u nga ani de. Ani mbila la di ani de.

<sup>7</sup> Odi ma, a ayo de me kpála bini pite yi-e de! Kpála inde ngamene ngbili 'ngú, ngaani makpe-e, ani ngbingbili maka li Yesu Kilisito nde lie ngbingbili ko. <sup>8</sup> Kpála bhende adhedhe li namene siti 'ngú-o, a ko kpála ka Djabulu. Padhá de, anga nayie bha bini ali lilita-a, Djabulu bha naae ne kpála na siti 'ngú. Ta nago ka Ndili gba Ebhe-e ngae inde: ani ago ngubula nabholo okulu gba Djabulu-o.

<sup>9</sup> Kpála bhende li Ebhe azu e ngae, ani dhédhe matá li siti 'ngú belegu de bini. Padhá de, anga nguwa\* inde ngayie ka Ebhe-e, ngadu bhú kpála ango-o ko. Ani ti da nadhedhe matá li siti 'ngú belegu de bini, anga Ebhe azu ani ngae. <sup>10</sup> Engú inde-e ngagbogbo bhusu ongisi gba Ebhe ne obhende gba Djabulu-o ngae inde: ndu kpála hana inde i mene 'ngú na ngbingbili de-e, inde i kunda la di ndai e de-e, a ko ndili ka Ebhe de.

\* 3:9 3:9 Nguwa: Nguwa gba Ebhe-e, a ko Bu Bhobua.

*Ní dũ ne mukunda sũnda ní*

<sup>11</sup> Engú inde yi adje nani e nayie li lilita-a, ngae inde: a ayo me ní dũ ne mukunda sũnda ní. <sup>12</sup> Ní adú maka Kaina de, inde adũ nani kpála gba Siti-o. La di-e, ani abhelo ndai e. Ani abhelo la nani ani ngubula ní? Ani abhelo ani anga okulu bhende gba ani-e adũ nani sisiti. Engú bini, obhende gba ndai ani atsia adũ nani ngbingbili. <sup>13</sup> Ondaise ma, i dũ me okpála na doto inde-e nde ngayala yi-e, yi angamba de. <sup>14</sup> Engú bini nganí-e, ní ambila me ní ayie bhú kuo, ngú nali bhú mukobho, anga ní ngakunda ondaise ní. Kpála bhende li mukunda nde bhú e ade-e, ani ngadũ nga bha bhú kuo.

<sup>15</sup> Ndũ kpála hana inde ngayala ndai e-e, a ko bhulũ nabhelo kpála. Yi mbila la di ndjindji me bhulũ nabhelo kpála bini ade inde ne mukobho na dudũma bhú e. <sup>16</sup> Mukunda-a, a ko ní? Ní ngambila mukunda li ehe inde: Yesu Kilisito aha nani mukobho gba e pi ní. Kaka-a, nganí di-e, a ayo me ní ha mukobho gba ní-e pi ondaise ní. <sup>17</sup> Ní pa nga me, kpála bini inde ka e ne oehe, ani au ndai e inde li ehe nde ka e ade, la-a, ani dje ndjinga ani de. Lele pi u ti da napa lie me kpála angoo akunda Ebhe-e? <sup>18</sup> Odi ma, a ayo de me ní dũ bha napa 'ngú na mukunda ne babadha eli-e de. Engú bini, a ayo me ni suno bhú kulu, di ne bhú engú na kukulũ.

*Ní adú kala Ebhe ne tsulũ de*

<sup>19</sup> A bhomũ-o engú inde ní ambila ka e me ní bhú kukulũ 'ngú ko. La di-e, li bua ní tsia dú guguo kala Ebhe. <sup>20</sup> Padhá de, anga i dũ me bua ní nde ngapa pi ní me ní ne engú-o, ní ngambila ndjindji me Ebhe-e, ani ngbéngbé ane bua ní mane. La di-e, ani ambila ndũ 'ngú hana má kpekobho! <sup>21</sup> Ondaise ma na mukunda, i dũ me bua ní nde apa me ní ne engú ade-e, ní dú kala Ebhe ne tsulũ de. <sup>22</sup> Ní ngasia 'he inde ní ngayo e ka ani-e, anga ní ngalila olíli gba ani, ní la di ngamene engú inde ani akunda e-o. <sup>23</sup> Líli gba ani inde ani aha e pi ní-e ngae inde: a ayo me ní bhuka 'li Ndili gba ani Yesu Kilisito. A ayo la di me ní dũ ne mukunda sũnda ní maka li Kilisito aha líli lie pi ní ko.

<sup>24</sup> Kpála bhende ngalila olíli gba Ebhe-e, kpála ango-o ngadũ bhú Ebhe, Ebhe ngadũ la di bhú ani. A inde-e engú inde ní ngambila ka e me Ebhe ngadũ bhú ní-o: ní ngambimbila li Bu Bhobua inde li Ebhe aha e pi ní-o.

## 4

*Yi gbo bhũsũ Bua na kukulũ 'ngú ne bua na eu*

<sup>1</sup> Ondaise ma na mukunda, yi abhúka ndũ okpála hana bhende ngapa me a bhú o ne Bua gba Ebhe-e de. Engú bini, yi le ngaiza uo kalanũ-o male, amba yi mbila ne me bua inde bhú uo-o, ayie ka Ebhe na paká. Padhá de, anga opolofeta na eu, aya naali pála doto. <sup>2</sup> Ehe inde yi ambila Bua gba Ebhe-e ka e, a ngae inde: kpála ne kpála bhende ngapa me Yesu Kilisito ago nani bhú kute na kpála-kuti na paká-a, kpála ango-o, a bhú ani ne Bua bhende ayie ka Ebhe. <sup>3</sup> La-a, kpála bhende ngapa me Yesu Kilisito go bhú kute na kpála-kuti de-e, kpála ango-o, bua bhende bhú ani-e, ayie ka Ebhe de. Engú bini, bua bhende bhú kpála ango-o, a ko mangbo bhende gba bhulũ yala gba Kilisito ko. Yi adje nani adje me, a ayo me bhulũ yala gba Kilisito go. Mbía inde-e, ani pála doto.

<sup>4</sup> Engú bini, odi ma, ngayi-e, yi naayi ne okpála gba Ebhe. Yi aha angu opolofeta na eu-o aha. Padhá de, anga Bua bhende bhú yi-e ne angu naali ane bua bhende bhú okpála na doto-o mane. <sup>5</sup> Opolofeta ango-o, a ko okpála na doto. U ngakpo la bhadi engú na doto. Kaka-a, okpála na doto ngadje uo ndjindji. <sup>6</sup> Engú bini, nganí-e, ní ne okpála gba Ebhe. Kpála bhende ambila Ebhe-e ngadje ní ndjindji. Kpála bhende naae ne kpála gba Ebhe ade-e, ani djé ní de. A bhomũ-o engú inde ní ngambila Bua na kukulũ 'ngú di ne bua na eu-o ka e ko.

*Ebhe-e, a ko mukunda*

<sup>7</sup> Ondaise ma na mukunda, ní dũ ne mukunda sũnda ní, anga mukunda ayie ka Ebhe. Kpála bhende ne mukunda bhú e-e, Ebhe azu ani ngae, ani mbila la di Ebhe hana. <sup>8</sup> Kpála bhende li mukunda

nde bhú e ade-e, ani mbila Ebhe de, anga Ebhe-e, a ko mukunda. <sup>9</sup> Lele maka li Ebhe asuno mukunda gba e lie pi ní-e ngae inde: ani atima koli Ndili gba e bini píla doto, ngubula me ní dū bhú mukobho ka ani. <sup>10</sup> Lele maka li mukunda nde lie ngae inde: ní kunda nani Ebhe nganí de, engú bini, ani akunda mangbo nani ní ngae, ani atsia atima Ndili gba e pi ní maka tia mangimbo, ngubula na'e osisiti 'ngú gba ní ko.

<sup>11</sup> Ondaise ma na mukunda, i dū me Ebhe nde akunda ní naali mo-o, nganí di-e, a ayo me ní dū ne mukunda sūnda ní. <sup>12</sup> Kpála u nga Ebhe belegu de bini. I dū me ní nde ne mukunda sūnda ní-e, amba Ebhe ngadu bhú ní. La di-e, mukunda gba ani inde bhú ní-e bedhe má kpambi!

<sup>13</sup> Ehe inde ní ngambila ka e me ní ngadu bhú Ebhe, Ebhe la di ngadu bhú ní-e, a ngae inde: Ebhe aha Bua gba e pi ní. <sup>14</sup> 'Dyi ní atima Ndili gba e ngubula nadu Mukobho gba okpála. Ní au, ní la di ngakpokpo 'ngú tété. <sup>15</sup> Kpála ne kpála inde apa mbámá me Yesu ne Ndili gba Ebhe-e, Ebhe ngadu bhú kpála angoo. Kpála angoo la di ngadu bhú Ebhe. <sup>16</sup> La di nganí-e, ní ngambila mukunda inde li Ebhe nde ne e pi ní-o. Ní atsia abhuka la di mukunda angoo ko. Ebhe-e, a ko mukunda. Kpála bhende ngadu bhú mukunda-a, ngadu bhú Ebhe, Ebhe la di ngadu bhú ani.

<sup>17</sup> I dū me mukunda inde bhú ní-e nde bedhe-e, ní dū ne tsulu li ekpi inde li Ebhe akódho 'ngú gba okpála lie de. Padhá de, anga píla doto inde-e, mukobho gba ní-e mana lie ne bhende gba Ebhe ko. <sup>18</sup> Tsulu bhú mukunda ade, anga li mukunda dū bedhe-e, a nga'e tsulu hana. A moko, kpála bhende ngadje tsulu-o, a pa me mukunda gba ani-e kolo nga bedhe de. Padhá de, anga kpála bhende ngadje tsulu-o, abhú ani ne mabhundja me u améne ni sisiti.

<sup>19</sup> Engú bini, nganí-e, ní sūnda ní ne mukunda, anga Ebhe akunda ngaiza ní kalanu ngae. <sup>20</sup> I dū me kpála bini nde

apa me: «Ma akunda Ebhe», ani nde la ngayala ndai e-e, amba kpála angoo ne bhulu eu. Padhá de, anga ani ti da nakunda Ebhe inde ani u e de-e de, i dū me ani nde kunda ngaiza ndai e inde ani nde ngau e mau-o de ko. <sup>21</sup> Lili inde li Kilisito aha e pi ní-e ngae inde: kpála inde akunda Ebhe-e, a ayo me ani kunda di ndai e.

## 5

### *A ti da naha angu engú na doto da?*

<sup>1</sup> Ndū kpála hana hana inde ngabhuka me Yesu ne Kilisito-o, Ebhe azu kpála angoo ngae. La di-e, kpála inde ngakunda Ebhe inde azu kpála bhomu-o, ani ngakunda bhadi ongisi inde li Ebhe azu o moko. <sup>2</sup> Ehe inde ní ambila ka e me ní ngakunda ongisi gba Ebhe-e ngae inde: a ko nakunda Ebhe, di ne namene olili gba ani ko. <sup>3</sup> A moko, lele nakunda Ebhe-e ngae inde: a ko namene olili gba ani-o. La di-e, olili gba ani-e pi ní kpekpeke ade. <sup>4</sup> Padhá de, anga ndū kpála hana inde li Ebhe azu e, ani aha angu engú na doto aha. Nabhuka gba ní-e ngaha angu pi ní ngú naha angu engú na doto ngae. <sup>5</sup> A ti da naha angu engú na doto da? A ko bha bini kpála bhende abhuka me Yesu ne Ndili gba Ebhe.

### *Nakpokpo 'ngú pindji Yesu Kilisito*

<sup>6</sup> Yesu Kilisito, a ko kpála inde nani ago-o. Ani ago nani ne engu di ne ngute\* Ani go bha bini ne engu de, engú bini, ani ago ne engu di ne ngute. La di-e, Bua gba Ebhe-e ngakpokpo 'ngú gba ani-e ngae, anga Bua gba Ebhe-e, a ko kakulu 'ngú. <sup>7</sup> A ngakpokpo 'ngú tété ne oehe bata: <sup>8</sup> a ko Bu Bhobua, a ko engu, a la di-e ngute. Ndundu bata hana aziba ne bua bini.

<sup>9</sup> Ní ziziba engú inde li okpála ngakpokpo e ndjindji. La-a, engú bhende li Ebhe akpokpo e ngae-e, ane bhende gba okpála-a mane. A bhomu-o engú bhende li Ebhe akpokpo e pindji Ndili gba e-o. <sup>10</sup> A na paká me kpála bhende abhuka Ndili gba Ebhe-e, kpála angoo asia engú

\* **5:6** 5:6 Engu di ne ngute: Bhelé na okpála ngabhundja me engu-o, a ko batisimo gba Yesu-o, ngute-e, a ko nakpi gba ani-o.

inde akpokpo lie bhomu-o li bua e makpe asia. Engú bini, kpála bhende i bhuka Ebhe de-e, kpála ango-o nga'o Ebhe bhulu eu. Padhá de, anga engú inde li Ebhe akpo e pindji Ndili gba e, kpála ango-o bhuka naae de. <sup>11</sup> Engú ango-o ngae inde: Ebhe aha nani mukobho na duduma pi ní, mukobho ango-o la bhú Ndili gba ani ko. <sup>12</sup> Kpála bhende li Ndili-e nde bhú e, abhú kpála ango-o ne mukobho. Engú bini, kpála bhende li Ndili gba Ebhe-e nde bhú e ade-e, mukobho bhú kpála ango-o ade.

### *Engú pindji mukobho na duduma*

<sup>13</sup> Ma aye balua inde-e pi yi, ngayi okpála bhende abhuka 'li Ndili gba Ebhe-o. Ma aye pi yi, amba yi mbila me yi asia mukobho na duduma asia. <sup>14</sup> Engú ní nde lie ne tsulu kala Ebhe belegu ade bini-e ngae inde: ní ngambila ndjindji me, i du me ní nde ayo 'he ka ani maka ani ngakukunda lie, ani djé ní. <sup>15</sup> I du la me ní nde ambila me ani ngadje ní bhú ndu mayo gba ní-e hana-a, ní ambila di ndjindji me ní asia 'he inde ní ayo e ka ani-e asia.

<sup>16</sup> I du me kpála bini nde au ndai e ngamene siti 'ngú-o, li siti 'ngú ango-o du bhende i tó ani bhú kuo de-e, a ayo me ani yo Ebhe ngú ani, amba kpála na siti 'ngú ango-o sia mukobho. Bhobhomu ndjindji pi kpála bhende ngamene siti 'ngú inde i tó ani bhú kuo de ko. Engú bini, a ne siti 'ngú inde ató kpála bhú kuo, ma pa de me u yo Ebhe ngú bhende bhomu-o de. <sup>17</sup> Ndu 'ngú hana inde ngbingbili bhú djila Ebhe ade-e, a ko siti 'ngú. La-a, ndu 'ngú hana toto kpála bhú kuo de.

<sup>18</sup> Ní ngambila ndjindji me kpála inde li Ebhe azu e ngae dhedhedhe li namene siti 'ngú belegu de bini. Padhá de, anga Yesu Ndili gba Ebhe-e ngalila ani ngae, la di-e, Siti ti da namene 'he ngú ani belegu de bini.

<sup>19</sup> Ní ambila me ní naaní ne okpála gba Ebhe, engú la bini, doto libhomu sa 'kpa Siti.

<sup>20</sup> Ní ambila me Ndili gba Ebhe-e ago, ani atsia aha imbilangu pi ní, amba ní

mbila Ebhe na kukulu-o. Ní akpetse liní ne Ebhe na kukulu-o, li pápá gba Ndili gba ani Yesu Kilisito. Ngaani-e, a ko Ebhe na kukulu, a ko la di mukobho na duduma.

<sup>21</sup> Odi ma, yi lila liyi ka oebhe na eu-o ndjindji.

## Balua na bhisí gba Djaa Eli na kalanu

Bhele kpála Djaa , aye nani balua gba e na bhisí pi òlò bini ne ongisi gba e. A mana m̀gito me, u aye pi Dadjua gba Ebhe inde u adu ayo Ebhe bhú e ne okpála inde bhúbhú. Engú na ndundu inde adu bhúbhú-o, a ko bha me u du ne mukunda sũnda o. Aní atsia apa me u lila lio ka omusuno na eu, ne nasuno gba o-o.

### Ongbengbe ongú inde bhú bhuku inde-e ngae inde:

Eli na kalanu 1-3

Engú na kalanu inde a ayo me mukunda mene e 4-6

Nalila lio ka nasuno na eu 7-11

Eli na soso 12-13

### *Djaa yi okpála inde li Ebhe abhu o-o mayi*

<sup>1</sup> Ngama, Bhele Kpála , ma ngaye balua inde-e pi yi, Ohi ní,\* ngamu kpála inde li Ebhe abhu e di ne ongisi gba e inde ma ngakunda o na kukulu-o. Ma ngakunda bha yi ngama kpi ma kpi ade, ndu okpála hana inde ambila kukulu 'ngú-o akunda bhadi yi moko. <sup>2</sup> Padhá de, anga a ngadu bhú ní ne engú na kukulu. La di-e, kukulu 'ngú ang-o adu bhú dabili bini ne ní ndu 'kpí hana.

<sup>3</sup> A ayo me Ebhe 'Dyi ní, di ne Yesu Kilisito , Ndili gba 'Dyi ní-e, bhú mukunda di ne kukulu 'ngú gba o-o, suno bádha bhú 'bu pi ní, u dje ndjinga ní, amba u ha la di guo 'ngú pi ní.

### *Engú pindji engú na kukulu di ne mukunda*

<sup>4</sup> Ma akpi djali naali, anga ma abhaka ongisi koko gba mu-o ngadholo bhú engú na kukulu, maka líli inde ní asia e ka 'Dyi ní ko. <sup>5</sup> Pi mbia inde-e, Ohi ní, engú inde

ma ngayo e ka mu-o, a ngae inde: ní du ne mukunda sũnda ní. A ko de me ma ngaye pi mu líli na mbia de, a ko líli inde ní asia e nayie bha bini li lilita† ko. <sup>6</sup> Lele li mukunda nde lie ngae inde: a ko namene olíli gba Ebhe-o. La di-e, líli ang-o, a ko bha bhende yi adje nani e nayie li lilita me, a ayo me yi du bhú mukunda.

### *Yi lila liyi ka okpála napite okpála-a malila*

<sup>7</sup> Okpála bhelé inde ngapite okpála atsambala ne bili ngangá pila doto. U ziba naao de me Yesu Kilisito ago nani bhú kute na kpála-kuti-e de. Kpála inde ngapa mo-o, a ko bhulu napite okpála, a ko la di bhulu yala gba Kilisito. <sup>8</sup> 'E-e! Yi lila liyi ngayi makpe-e ndjindji, ngubula me yi anéke makalá na kulu gba ya-a de. Engú bini, a ayo me yi sia makalá-a libhomu.

<sup>9</sup> Kpála ne kpála inde i lila nasuno inde u aha e pi yi pindji Kilisito de-e, inde i nga'o la di engú koko pépé-e, kpála ang-o bhú Ebhe ade. Kpála inde la ngalila nasuno ang-o, kpála ang-o ngadu bhú 'Dyi Ndili-o, di ne Ndili-o. <sup>10</sup> I du me kpála nde ago, aní suno la di pi yi engú koko kpi-e, yi asia aní agba yi de, yi abhia di kúo li aní de. <sup>11</sup> Padhá de, anga kpála inde abhia kúo li aní-e, a asuno bhomu-o me u akpøtsø lio ne aní bhú osisiti 'ngú gba aní-o.

<sup>12</sup> Ma ne engú bhelé ngú napapa pi yi. La-a, ma kunda nayeye maye de, anga ma ne 'to ma 'to nanu agba yi oo, ngubula me ní gama 'ngú ne yi me ní nde ngau liní mau, amba ní kpi djali ndjindji.

<sup>13</sup> Ongisi gba Ndai mu na Øelø, kpála inde li Ebhe abhu e-e‡ apa me, o yi mu mayi.

\* **1:1** 1:1 Ohi ní: Okpála bhelé ngabundja me Ohi ní inde si-e, a ko Piga gba Ebhe, ongisi gba ani-e, a ko omabhuka . † **1:5** 1:5 Nayie li lilita: A ko nayie li nedhinga inde u adje nani 'li Ebhe lie ko. Tsia bhú lukuluku 6, di ne bhú 1 Dja. 2:7, 24, 3:11. ‡ **1:13** 1:13 Ongisi gba Ndai mu na Øelø li Ebhe abhu e-o: A akunda napa me omabhuka na Dadjua na Ebhe li Djaa adu nadu lie-o.

## Balua na bata gba Djaa

### Eli na kalanu

Bhele kpála Djaa , aye balua inde-e pi bhele kpála natsia 'kpí li Dadjua gba Ebhe inde 'li e me Gaiusi. Djaa adu agama 'ngú gba ani-e ndjindji, anga ani adu asia omakilisito inde adu ago agba ani-e ndjindji-e naali. Ani atsia a ayo ka ani me, ani lila li e ka bhoko bini inde a du 'li e me Diotelefe malila.

**Ongbengbe ongú inde bhú bhuku inde-e ngae inde:**

Eli na kalanu 1-4

Nakpo 'ngú ndjindji li kute Gaiusi 5-8

Na'o 'ngú pindji Diotelefe 9-10

Na'o 'ngú pindji Demetiliusi 11-12

Eli na soso 13-15

#### *Djaa yi Gaiusi mayi*

<sup>1</sup> Ngama, Bhele Kpála , ma ngaye balua inde-e pi mu Gaiusi, ngamu ndai ma na mukunda, inde ma kunda e kukulu-o.

<sup>2</sup> Ndai ma na mukunda, gumu gba ma me ndu 'ngú gba mu-o hana dholo ndjindji, mu du ne kute na angu, maka mu nde lie ne angu li bua mu ko.

#### *Gaiusi ngadholo bhú engú na kukulu*

<sup>3</sup> Ma akpi nako djali naali, anga li nedhinga inde li ondaise ní ago lie, u akpokpo muma me mu ngamene engú na kukulu. A moko, mu ngadholo bhú engú na kukulu. <sup>4</sup> Ehe inde la ngaha djali muma ane ndu ongú koko hana-a, a ko nadjé me ongisi gba ma-a ngadholo bhú engú na kukulu.

<sup>5</sup> Ndai ma na mukunda, mu ngamene engú inde na babadha pi ondaise ní, belegu di ne pi obhende mu mbila o de-o.

<sup>6</sup> U akpokpo engú na mukunda gba mu-o kala okpála na Piga gba Ebhe. Mene 'he inde ndjindji bhú djila Ebhe, ne naha ehe inde atéteke uo li kpadji-e pi uo. <sup>7</sup> Padhá de, anga u ngadholo ngubula 'li Kilisito . La di-e, u ti da nasia 'he ka omupagano belegu de bini. <sup>8</sup> Kaka-a, a ayo me nganí

makpe-e, ní teteke ngua okpála bhomu-o nganí, amba ní kpètse di liní ne uo ngú nakpokpo 'ngú na kukulu.

#### *Engú pindji Diotelefe ngauo ne Demetiliusi*

<sup>9</sup> Ma aye nako mboye balua pi okpála na Dadjua gba Ebhe. Engú bini, Diotelefe, kpála inde akunda naae me bhú ndu 'ngú hana u dje bha ni-e, atsia au engú angoo bhú djila e padhá. <sup>10</sup> Kaka-a, ma agó lie, ma ambamba ta engú na sisiti inde ani ngamene e-o. Ani ngapa ongú na sisiti di ne eu li kute ya. Engú bini, ani pise bha bini li bhende bhomu-o de, ani ngayala nasia ondaise ní. Ani ngapa la di pi obhende ngakunda nasia uo me u mene mo-o, ni pándja uo bhú Piga gba Ebhe-o.

<sup>11</sup> Ndai ma na mukunda, mo oméne 'ngú maka okpála na sisiti de. Engú bini, mene mangbo engú maka okpála na babadha. Kpála bhende ngamene badha 'ngú-o, a ko kpála gba Ebhe. Kpála bhende ngamene siti 'ngú-o, kpála bhomu-o mbila Ebhe de.

<sup>12</sup> Ndu okpála hana ngakpo 'ngú pindji Demetiliusi ndjindji. La di-e, engú na kukulu ngae makpe ngakpokpo 'ngú gba ani-o. Nganí di-e, ní bhadi ngakpokpo 'ngú gba ani-e moko. Mu ngambila la di me engú inde ní ngakpokpo e, a ko kukulu 'ngú.

<sup>13</sup> Ma ne ongú bhelé napapa pi mu. La-a, ma kunda nayeye maye de, <sup>14</sup> anga ma akunda nau mu má gala, amba ní gama 'ngú me ní nde ngau liní mau.

<sup>15</sup> A ayo me guo 'ngú du bhú dabili bini ne mu! Ondaise ní inde ei-e apa me, o yi mu mayi. Pa la di pi ondaise ní inde oo me, ya yi kpála bini ne bini mayi.

## **Balua gba Djude Eli na kalanu**

Djude aye nani balua inde-e ngubula napa me, omabhuka lila lio ka omusuno na eu inde adu apa me ni ne omabhuka-a malila. Bhu ndu balua inde-e, ongu inde bhubhu-o, maka bhende bhu balua na bhisi gba Piele-o. Djude ngato masi bhu okpala inde ngatatanga me, u gu gbele ngubula nabhuka inde li Ebhe aha nani e pi okpala gba e ngubula ndu 'kpi hana-o.

### **Ongbengbe ongu inde bhu bhuku inde-e ngae inde:**

Eli na kalanu 1-2

Dasundu, ne nasuno, a la di-e likabhu gba omusuno na eu 3-16

Lili ngubula nalila nabhuka 17-23

Bisagu 24-25

### *Djude yi omabhuka mayi*

<sup>1</sup> Ma aye balua inde-e ngama Djude. Ma ne bali gba Yesu Kilisito, ma la di ne ndai Djaki. Ma aye balua inde-e pi okpala inde li Ebhe, 'Dyi ni a'i o-o. Ani ne mukunda pi uo, ani di ngalila uo bhu 'bu Yesu Kilisito. <sup>2</sup> A ayo me Ebhe dje ndjinga yi, ani ha guo 'ngu pi yi, amba ani bedhe yi ne mukunda gba e ane mane.

### *Yi lila liyi ka omusuno na eu-o malila*

<sup>3</sup> Ondaise ma na mukunda, ma adu nako ne gumu naali me ma ye balua pi yi pindji mukobho inde ngakpotsu ndu ni hana-o. La mbia inde-e, ma au ndjindji me ma ye balua pi yi ngu nato masi bhu yi me yi gu gbele ngu nabhuka inde li Ebhe aha e pi omaha e-o. Nabhuka angoo dji galikpe lie belegu de bini. <sup>4</sup> Padha de, anga okpala koko bhu ka yi sisiti, u ali bhu ka yi bhu pepe. U ngadji ta badha bhu 'bu gba Ebhe gba ni-e ngu nasia kpadji me o mene ndu osisiti 'ngu inde u akunda e hana. U bhomu-o ngayala

koli Musuno inde di Ngama gba ni Yesu Kilisito-o. Okpala angoo, u aye nani mangimbo gba uo-o bhu Bhuku gba Ebhe e bhutode.

<sup>5</sup> Belegu yi ambila nani ndu ongu inde-e lie hana didili-e, ma akunda mata napapa pi yi ne toto me, Ebhe Ngama gba ni-e agbegbe nani okpala na Isalaele bhu bali bhu doto na Edjipeto agbegbe. Ani atsia abhili obhende i bhuka ani de-o. <sup>6</sup> Yi kina nga me oandjelu inde i lila nani kulu gba o-o de-e, inde a'o ka dabili gba o-o, Ebhe agbigbite uo ne gbindjili na duduma, ani atsia abu uo li bili na biti bhe ma ndundundu ngu nadjeke 'ngbe 'kpi nakodho mangimbo gba okpala-o. <sup>7</sup> Yi kina nga me okpala na Sodomo ne Gomolo di ne ogudhu koko na ngo ogudhu bhomu-o amene bhadi nani siti 'ngu maka oandjelu bhomu. U adu amene 'ngu na sisiti inde li kpala-kuti ti da namene e de. Kaka-a, u naki ngazu likabhu bhu djua na duduma ngu nasuno pi okpala me, a ayo namene ngua siti 'ngu bhomu-o de.

<sup>8</sup> Okpala na sisiti inde ali bhu ka yi bhomu-o bhadi ngamene ngua siti 'ngu bhomu-o moko. Ka 'ngu na ngingi inde bhu 'ndji uo-o, u ngasiti kute o. U kunda de me Ebhe u ngama pi 'dji o-o de. U manga la di oandjelu inde li o ne zizi-e\* de. <sup>9</sup> La-a, belegu Mikaele ngama gba oandjelu-o mene nani mo-o de. Bhu nagbe bhayiki gba uo ne Djabulu-o, u adu amene kpeke 'bhe lie ngubula kuo Moidje-e, Mikaele pa 'ngu na numu li kute djabulu de. Engu bini ani apa bha pi ani me: «Ebhe mene bhado mu sisiti!»† <sup>10</sup> Engu bini, okpala na sisiti inde bhu ka yi-e, ngagama 'ngu sisiti li kute engu bhende u mbila e de. Uo maka onu abhu bili, u ngabhubhundja ade. U ngamene bha bini engu bhende akoto bhu 'ndji o. Engu angoo la ngabhili uo ngae. <sup>11</sup> A ko likabhu pi uo! Padha de, anga u akpata kpadji li Kaina akpata nani e-o. U akpata nganda Balama ka gumu tia gba o-o. U amu anga u ngamene kpeke 'ndji pi Ebhe

\* **1:8** 1:8 Oandjelu inde li o ne zizi: A akunda napa me oandjelu inde ngamanga 'li Ebhe. † **1:9** 1:9 Ongu koko inde bhu lukuluku inde-e, a bhu obhuku koko na gandja na didili-e ade. A ko ongu inde li omaYuda adu nani akpokpo e maka tsing. A viti bini ne bhende bhu lukuluku 14-15.



maka li Kole amene nani lie-o.

<sup>12</sup> Uo ngaha nɔmɔ pi yi bhú obili li yi apɛpɛkɛbhɛ bhúla yi li e ngú nazɔ 'he na mukunda sɔnda yi-o. U ngabedhe 'bu o ne ezɔ má kpambi! Nɔmɔ li uo ade, uo bha bini ngabhundja engú gba o makpe. Uo maka ndindi inde li anvi ngandjindjimba e, li ebha nde bhú e ade-o. Uo maka ndula inde i li lílì de bhú nedhinga nali lílì-o, inde u agbe dɔ e, a tsia akpi hana má kpɛkɛbhɛ-o! <sup>13</sup> Uo maka ongbengbe 'ngbo 'ngu na ngade 'ngu. U ngapandja ongú na nɔmɔ gba o-o maka li ngade 'ngu agbegbe efu lie. Uo maka oikɔpala inde ambu li kpadji o. Ebhe aleke dabili na dɔdɔma ne dɔdɔma pi uo bhú biti má ndundulundu!

<sup>14</sup> Enoka, nani ne ogbi ní na mananika nayie li Adamɔ . Aní akpokpo nani maka polofeta li 'ngú gba okpála ango-o me: «Yi tsitsia nga Ngámá ngago bhú dabili bini ne bhiti obubu okpála gba e na bhibhiti-o, <sup>15</sup> ngú nakodho 'ngú gba ndɔ okpála hana. Aní a'ó mangimbo pí ndɔ okpála na sisiti hana ngɔbula ndɔ osisiti 'ngú inde u amene e, nedhinga li u agbe kpéke 'ndji lie li Ebhe, di ne ngɔbula sisiti oeli inde li okpála na mugwe apa e li kute ani-o.»

<sup>16</sup> Okpála ango-o ngadi mutokono di ne nalopolo lio ndɔ 'kpí hana, uo ngadhukɔ bha bini maka li gumɔ gba uo makpe apa lie. U ngapa bha bini ongú inde ane dada mane, u la di ngapa 'li okpála koko ngɔbula me o sia 'he ka uo.

### *Dapo pi omakilisito*

<sup>17</sup> La pi yi ondaise ma na mukunda-a, yi bhundja oeli inde li obhulɔ titima gba Ngámá gba ní Yesu Kilisito apa nani e pi yi-o. <sup>18</sup> U apa nani pi yi me: «Li sokpi-e, adú ne okpála inde amú yi, u tsia dú akpata osisiti gumɔ gba o makpe.»

<sup>19</sup> Okpála ango-o, a ko okpála inde ngagbo bhɔsɔ okpála. A bha bini bhú 'ndji uo ne imbilangu bhe na kute, Bua gba Ebhe e bhú uo ade. <sup>20</sup> La pi yi ondaise ma na mukunda-a, yi mene ne kpéke me yi teteke liyi sɔnda yi ngɔbula me ndɔ yi hana yi lɔ kpekpeke bhú nabhuka inde bubu naali-o. Yi yo Ebhe ne angu gba Bu

Bhobua . <sup>21</sup> Yi dɔ nadhukɔ li lele da napa me Ebhe dɔ nasuno mukunda gba e pi yi. Yi 'o 'to yi li nedhinga li Ngámá gba ní Yesu Kilisito apána ndjinga gba e lie pi yi, aní tsia há mukobho na dɔdɔma pi yi-o. <sup>22</sup> Yi dje ndjinga okpála bhende ne bua na bhisi bhisi bhú ká yi-o. <sup>23</sup> Yi kobho uo, amba u atsúlu bhú djua de. Yi dje ndjinga okpála koko, la-a, yi lila liyi me, belegɔ bongo gba uo inde asiti ne osisiti 'ngú gba uo inde u ngamene e, atɔnɔ lie li kute yi de.

<sup>24-25</sup> Sangu pi koli Ebhe bini inde akobho ní li kpadji gba Yesu Kilisito, Ngámá gba ní-o. Aní ti da nayoko me yi atí bhú siti 'ngú de, aní ti da namene me yi koto kala ní me engú na sisiti nde bhú yi ade, di ne me yi nde abedhe ne djali bedhe. A ayo me okpála dhɛgɛ aní, a ayo me aní ɔ, a ayo me angu di ne ngámá dɔ bhú dabili bini ne aní mbia inde, dɔdɔma ne dɔdɔma. A adɔ moko!

## Apokalipisi Ongú inde u ambamba ta e Eli na kalanu

Djaa aye bhuku na Apokalipisi inde-e bhú nedhinga u adu ato mbolo li omakilisito lie kabula nabhuka bhú Yesu Kilisito maka Ngámá gba o. Engú na ngbéngbé inde bhú bhuku inde-e, Djaa ngapa pi okpála inde ngatatanga me u du ne nabhuka di ne masi. Djaa atsia aha líli pi uo me, u lu kpékpéke bhú 'ngú na kukulú nedhinga na likabhu di ne bhú onedhinga u ngato mbolo li uo lie-o.

Bhú bhuku inde-e, u aye bhúbhú ongú bhelé pindji nambamba ta ongú, di ne pindji nau ongú maka loto li da e nde kpékpéke ngú nambimbila. Engú na ngbéngbé bhúbhú-o mbámábá. A ko ongú inde me: li pápá gba Kilisito Ngámá gba ní-e, a li soso-o, Ebhe ahá angu obhulu yala gba e hana, ani há di angu Satana . Ani há di makalá pi okpála na ngbingbili gba e, ne bisagu na abhúlá na mbia di ne doto na mbia inde ani ako angu e pí ndu 'ngú lie hana-o.

### Ongbengbe ongú inde bhú bhuku inde-e ngae inde:

Eli na kalanu 1:1-20

Balua pi oDadjua mananika gba Ebhe 2 - 3

Malika 4:1 - 8:5

Ototi mananika 8:6 - 11:19

Nau ongú mananika maka loto 12:1 - 15:8

Okópo mananika na ke 'ngú gba Ebhe 16:1-21

Ongú mananika u apa e pindji babilona 17:1 - 19:10

Nabu ta 'ngú pindji nau ongú mananika maka loto 19:11 - 21:8

Yelusalema na mbia, elo gba Ndili Kandlele 21:9 - 22:21

### Lita 'ngú-o

<sup>1</sup> Bhuku inde-e ngakpokpo 'ngú pindji ongú inde li Ebhe ambamba ta e pi Yesu Kilisito-o . Ebhe ambamba tata pi ani

ngubula me ani suno pi obalise gba ni-o, engú inde améne lie mbia inde-o. Abhomu-o, Yesu Kilisito atsia atima andjelu gba e me ani mbamba ta engú angu-o pi bali gba ni Djaa . <sup>2</sup> Djaa akpokpo ndu 'ngú inde ani au e hana. Ndu 'ngú inde ani au e hana-a, a ko 'li Ebhe, a ko la di kukulú 'ngú inde li Yesu Kilisito ambamba ta e pi ani-o. <sup>3</sup> A ko djali pi kpála inde ngatanga bhuku inde, ne obhende i ngadje ongú inde li Ebhe ambamba ta e bhúbhú-o, inde di ngakpata ongú inde aye lie bhú bhuku inde-o. Padhá de, anga nedhinga na ongú angu-o akolo masikpe.

### Djaa yi okpála na oDadjua mananika gba Ebhe-e mayi

<sup>4-5</sup> Ngama Djaa, ma atima balua inde-e bhú oDadjua mananika inde bhú ndu doto na Adjia-o.

A ayo me Ebhe inde uu inde adu nani uu, inde la di ngago-o, suno bádha bhú 'bu ne guo 'ngú gba e pi yi. A ayo di me obua mananika inde kala kiti na ngámá gba Ebhe-e, bhú dabili ne Yesu Kilisito suno bádha bhú 'bu ne guo 'ngú pi yi. Yesu Kilisito-o, a ko kpála inde akpokpo ngbili 'ngú . A ko di kpála na kalanu inde azuku bhú ká okpála inde amu, a ko la di ngámá gba ongbengbe ongámási na doto.

Kilisito ngakunda ní, ani atsia agbegbe ní bhú osisiti 'ngú gba ní-e ne ngute e. <sup>6</sup> Ani amene me ní kolo okpála na Nau gba Ebhe . Ani amene di me ní kolo odimandé ngubula namene kulu liní pi Ebhe, 'Dyi ní. A ayo me sangu di ne angu du pi ani duduma ne duduma! A adu moko.

<sup>7</sup> Yi tsitsia, ani ngago bhú ndindi!

Ndu okpála hana aú ani, belegu obhende adu nani kala ani ne mandambi-o.

Ndu opiga inde píla doto libhomu adú bhú

'gbá li 'ngú gba ani-o.

Heni, a adu moko!

<sup>8</sup> Ebhe Ngámá Apí 'Kpí apa me: «Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana.» Ebhe ne Kpála inde uu, Kpála inde adu nani uu, Kpála inde di ngago.

### *Djaa au Kilisito bhú 'he maka loto*

<sup>9</sup> Ngama Djaa, ma ne ndai yi inde ngakobho bhú dabili bini ne yi bhú likabhú, ne bhú Nau ne nazi kekele bhú nabhuka Yesu. Ngama-a, ma dũ nako bhú kpata bhú kpømø inde u a'i e me Patemosi kabula 'li Ebhe, la di anga ma ngakpokpo kukulũ 'ngú inde li Yesu ambamba ta e-o. <sup>10</sup> Bhú 'kpí gba Ngámá-a, Bu Bhobua abedhe ma, ma atsia adje ne akele ma kpéke eli bini maka mbala. <sup>11</sup> Eli ang-o apa me: «Ehe inde mũ ngau e-e, ye bhú bhuku bini, amba mũ tima bhú oDadjua mananika gba Ebhe inde bhú Efeso, bhú Similine, bhú Pelegame, bhú Tiatile, bhú Salade, bhú Filadelefi ne bhú Laodisé.»

<sup>12</sup> Abhomũ-o, ma adji lima ngú natsia kpála inde adũ nagama 'ngú mũma-o. Ma adji lima lie, ma au otala na olo mananika. <sup>13</sup> Bhú ka otala ang-o, ehe bini adũ maka kpála-kuti. Aní adyi 'ndjá bongo akolo bhú 'dhũ e, aní atsia agbite mbulu e ne mukabha inde u amene e li olo.† <sup>14</sup> 'Ndji aní ne sundjo aní avu má tuu, maka kato! Djila aní adũ nade maka zi djua. <sup>15</sup> 'Dhũ aní adũ nasũ maka kalase na kpéke mase inde u ato e bhú djua, zizi atsia aholo nasũ. 'Li aní adũ maka tolo wowo 'ngu. <sup>16</sup> Aní aholo ikupala mananika ne 'kpa e na kokpa. A adũ akoto bhú 'bhø aní ne mbotia inde adhe ne ndũ pasũ bhisi hana. Bhũla aní adũ asũ maka kpéke zindjila na tulukpe.

<sup>17</sup> Ma au aní lie, ma atí bhú li 'dhũ aní maka kpála inde akpi. Pipita-a, aní a'o 'kpa e na kokpa-a pí ma, aní atsia apa mũma me: «Mo okpé-e de! Ma ne Kpála inde akpo lita ndũ 'ngú hana, ma di ne Kpála inde abú ta ndũ 'ngú hana. <sup>18</sup> Ma la di bhú mukobho. Ma adũ nako me ma nde akpi, la mbia inde-e, ma bhú mukobho na dũdũma. Ma ne angu pí 'ndji kuo di ne pí 'ndji bili gba okpála inde amu. <sup>19</sup> Kaka-a, ye ongú inde mo ou e inde. A ko ongú inde ngakodho 'kpí, di ne ongú inde a ayo me ago pipita ko. <sup>20</sup> Pindji oikupala mananika inde mo ou e sa 'kpa ma na kokpa, di ne otala

† 1:13 1:13 Tsia bhú Dan. 7:13.

mananika na olo-o, gbo nga 'dje mũ, ma mbamba kukulũ tata-a pí mũ. Mbila me, oikupala mananika-a, a ko oandjelu na oDadjua mananika gba Ebhe, otala mananika-a, a ko oDadjua mananika gba Ebhe-o.»

## 2

### *Balũa pi okpála na Dadjua na Efeso*

<sup>1</sup> Kpála inde ma au e apa matá mũma me: «Ye balũa pi andjelu na Dadjua na kuti na Efeso me:

«Kpála inde aholo oikupala mananika sa 'kpa e na kokpa, inde ngadholo bhú ká otala mananika na olo-o apa me: <sup>2</sup> Ma mbila okulu gba mũ-o hana. Ma mbila hana me mo omene kulu kpekpeke, me mũ di ne bua na kekele. Ma mbila hana me mũ tí da naziba osisiti okpála de. Ma mbila hana me mo ole okpála inde ngapa me o ne obhũlũ titima gba ma-a me u nde la mo-o ade-e, mo atsia au me a ko obhũlũ eu. <sup>3</sup> Ma mbila hana me a bhú mũ ne kekele, mo osia likabhú ngũbula 'li ma, mũ tsia ndala de.

<sup>4</sup> La-a, siti 'ngú inde ma au e li pabili gba mũ-o, a ko me mo o'o ká mukũnda inde mo okũnda nani ma ne e a'o. <sup>5</sup> Kaka-a, bhundja nga bili inde mo oti li e-o. Dji bua mũ, amba mũ mene okulu maka mo odũ nako namemene lie kalanũ ko. I dũ mo-o de-e, ma agó li pabili gba mũ, ma a'é tala gba mũ li bili i nde li e-o, i dũ me mũ nde dji bua mũ de ko. <sup>6</sup> Engú bini, bádha 'ngú inde bhú mũ-o ngae inde: mũ ngayala okulu inde li oNikolaite ngasuno e, maka ngama makpe di-e, ma ngayayala lie-o.

<sup>7</sup> A ayo me kpála inde li e ne djedje-e, dje engú inde li Bu Bhobua ngapa e pí oDadjua gba Ebhe ko!

Kpála inde agbóko 'gú bhomũ-o, ma ahá lí ndula na mukobho inde bhú edyi gba Ebhe-e pí aní me aní dũ nazũzũ. Edyi ang-o bhú kuti na mũndeyi gba Ebhe-o.»

### *Balũa pi okpála na Dadjua na Similine*

<sup>8</sup> Kpála inde ma au e apa matá muma me: «Ye balua pi andjelu na Dadjua na Similine me:

«Kpála inde akpo lita ndu 'ngú hana, inde di abú ta ndu ongu hana, Kpála inde akpi nani, engú bini atsia azuku-o apa me: <sup>9</sup> Ma mbila likabhu gba mu di ne ndibhili gba mu-o hana, engú bini, kukulu tia mangbo ngae inde ka mu-o. Ma mbila la di maka li okpála inde ngapa me o ne omaYuda me u nde ne omaYuda ade-e, ngadi mu lie hana. La ngauo-o, a ko omaYuda de, a ko okpála gba Satana ! <sup>10</sup> Mo odjé tsulu ka likabhu inde mo osia e de. Djedje nga, djabulu andi okpála bini bini bhú ká yi bhú tikpu ngú nale yi. U ató mbolo li yi ngubula ekpi ndjikpa. Mo oyála ma de, abana i yo bha me u bhele mu. Pipita-a, ma ahá ndata na 'ngbè ndua pi mu maka makalá gba mu-o. Ndata na 'ngbè ndua ango-o, a ko mukobho na dudama.

<sup>11</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agboko 'gú bhomu-o, ani sia likabhu gba nakpi na bhisi-e belegu de bini.»»

#### *Balua pi okpála na Dadjua na Pelegame*

<sup>12</sup> Kpála inde ma au e apa matá muma me: «Ye balua pi andjelu na Dadjua na Pelegame me:

«Kpála inde ka e ne mbotia inde ngadhe ne ndu pasu bhisi hana-a, apa me: <sup>13</sup> Ma mbila bili inde mu ngadu li e hana, bili ango-o, Satana ne ngamá oo ngae. Mu ngalila 'li ma. Mu ndala 'kpa li nabhuka gba mu bhú ma-a de, abana bha li nedhinga u abhele Atipasi lie agba yi, li bili li Satana ngadu li e-o. Atipasi adu nani nakpokpo 'ngú gba ma mbámbá kala okpála.

<sup>14</sup> La-a, siti 'ngú inde ma au e li pabili gba mu-o, a ko me, a agba mu ne okpála koko inde ngadhedhe li 'ngú li Balama adu nani nasuno e pi Balaka-o. Balama adu nani nasuno pi Balaka me ani to omafalaale bhú siti 'ngú. Ani adu apite uo me u zu oenu inde u aha o

pi oebhe na eu, amba u du di nakunda olisi, i du di-e obhosi ngangá. <sup>15</sup> A bhadi moko, a di bhú ká okpála gba mu-o ne obhende adhedhe li nasuno siti lili maka oNikolaite ngasusuno lie-o. <sup>16</sup> Kaka-a, dji bua mu. Padhá de, anga i du mo-o de-e, ma ngago agba mu má gala, ma tsia gú okpála ango-o ne mbotia inde ngakoto bhú 'bhe ma-o.

<sup>17</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agboko 'gú bhomu-o, ma ahá mana inde awo lie mawo-o pi ani. Ma ahá la di linga pi ani. U aye pi linga ango-o 'ili na mbia inde li kpála bini mbila ta e de, bha bini kpála inde asia linga ango-o ko!»»

#### *Balua pi okpála na Dadjua na Tiatile*

<sup>18</sup> Kpála inde ma au e apa matá muma me: «Ye balua pi andjelu na Dadjua na Tiatile me:

«Ndili gba Ebhe inde li Djila e ngade maka djua, li zi 'dhu e nde ngasu maka kalase na kpeke mase, apa me: <sup>19</sup> Ma mbila okulu gba mu-o hana. Ma mbila mukunda gba mu-o hana. Ma mbila nabhuka gba mu-o hana. Ma mbila kulu mo omemene e pi okpála di ne kekele gba mu-o hana. Ma mbila hana me kulu mu ngamene e mbia inde-e ane bhe na kalanu-o ne bhelé. <sup>20</sup> La-a, siti 'ngú inde ma au e li pabili gba mu-o, a ko me, mu ngaziba Djedjabele, olo inde ngapa me ni ne polofeta gba Ebhe-o. Ani ngapite obalise gba ma-a ne nasuno pi uo engú na zabhe, di ne nazu onu inde u aha o pi oebhe na eu-o. <sup>21</sup> Ma a'o nako nedhinga pi ani me ani dji bua e. Engú bini, ani kunda nadjia bua e de me ni 'o nakunda obhosi ngangá ma'o-o de.

<sup>22</sup> Kaka-a, ma agú 'i ani pi polo na 'ngbé likabhu bhú dabili bini ne obhende ngakunda obhosi, i du di-e olisi gba okpála koko bhú dabili bini ne ani-o, i du me okpála ango-o nde dji 'ngbu o li sisiti kulu gba ani de-o. <sup>23</sup> Ma abhili okpála inde ngakpata nganda ani-o, li ndu okpála na oDadjua

gba Ebhe-e hana mbíla me ma ne kpála inde i ngambila mabhundja di ne gũmũ gba okpála hana. Ma ahá pí kpála ne kpála bhú ká yi makalá nakpata bha lele siti 'ngú inde ani amene e ko. <sup>24</sup> La ngayi okpála na Dadjua na Tiatile, inde i dhedhe li nasuno na sisiti bhomũ-o de, inde i kpata di engú li okpála bhomũ-o nga'i e me, "Engú nawo mawo gba Satana" de-e, ma ne líli koko na'o'o pí yi ade. <sup>25</sup> Engú bini, yi dhedhe bha li engú inde ka yi akólo bha bini li 'kpí inde ma agó lie ko.

<sup>26-28</sup> Kpála inde agbóko 'gú bhomũ-o, inde alíla okulu gba ma nakolo ali soso-o, ma ahá pí ani angu inde ma asia e ngama makpe ka 'Dyi ma-o. Ma a'ó ani ngámá pí 'ndji opiga. Ani aú ngámá pí 'ndji uo. Ani ahólo kalase sa 'kpa e, ani tsia dú agugumũ uo maka u agugumũ omadakpa lie ko.† Ma ahá di ikupala inde asusu kèkpí-e pí kpála ango-o ngú nasuno me ani agboko 'gú-o agboko.

<sup>29</sup> A ayo me kpála inde li e ne djedje-e, dje engú inde li Bu Bhobua ngapa e pí oDadjua gba Ebhe ko!»

### 3

#### *Balua pí okpála na Dadjua na Salade*

<sup>1</sup> Kpála inde ma au e apa matá muma me: «Ye balua pí andjelu na Dadjua na Salade me:

«Kpála inde li obua mananika gba Ebhe, di ne oikupala mananika nde ka e apa me: Ma mbíla okulu gba mũ-o hana. Okpála ngapa me mũ uũ, engú bini, mo okpi. <sup>2</sup> Zuzukũ, mene ne kpéke me mo obúlũ bha má pii de! Padhá de, anga ma au me kulu gba mũ-o kolo nga li lelele de. <sup>3</sup> Kaka-a, bhundja nasuno inde mo osia naní e-o ne lele maka mo odje naní lie-o. Dji bua mũ, amba mũ lila nasuno ango-o malila! I dú la me mũ nde zũkũ de-e, ma gó maka bhũlũ 'zi, ma kóto li mũ bhú gbilikiti, me mũ nde mbíla nedhinga ango-o de.

<sup>4</sup> Engú bini, a bhú ka yi okpála na Salade ne okpála bini bini inde i siti

obongo gba o-o de. U adyí obongo na bububu, ngaya ne uo-o, ya tsia dhólo bhú dabilí bini. Padhá de, anga u ati ne nadhũkũ ne ma bhú dabilí bini ngao. <sup>5</sup> A moko, kpála inde agbóko 'gú bhomũ-o, adyí obubu bongo. Ma búlũ 'li ani bhú bhuku na mukobho-o de. La di-e, ma azíba kala 'Dyi ma, di ne kala oandjelu gba ani-e me, a ko kpála ka ma.

<sup>6</sup> A ayo me kpála inde li e ne djedje-e, dje engú inde li Bu Bhobua ngapa e pí oDadjua gba Ebhe ko!»

#### *Balua pí okpála na Dadjua na Filadelefi*

<sup>7</sup> Kpála inde ma au e apa matá muma me: «Ye balua pí andjelu na Dadjua na Filadelefi me:

«Kpála inde bubu, inde i papa eu de, inde li fũngũla gba Davidi nde ka e-e, inde i 'ũ bhoti-e, kpála bini ti da nanini de, inde i ni la di bhoti-e, kpála bini ti da na'ũ'ũ de-e, apa me:

<sup>8</sup> Ma mbíla okulu gba mũ-o hana. Ma mbíla hana me mũ kpékpéke ade. La-a, mo olila 'li ma ndjindji. Mo opa mbámbá me mũ ne kpála ka ma. Kaka-a, ma a'ũ bhoti kala mũ, bhoti ango-o, kpála bini ti da nanini de. <sup>9</sup> Tsia nga engú inde ma améne e li okpála gba Satana, obhũlũ eu inde ngapa me o ne omaYuda me a nde omaYuda ade-o: ma agbéle uo kala mũ, u tũtũ lipũkũ o kuto kala mũ ngú nadhøgø mũ, amba u mbíla me ma ngakũnda mũ. <sup>10</sup> Mo olila líli gba ma pindji naholo bua o ndjindji. Kaka-a, ngama di-e, ma alíla bhadi mũ moko li nedhinga na kpéke da 'ngú inde agó píla doto libhomu ngú nale okpála na doto ko. <sup>11</sup> Ma agó mbíla! Dhedhe li nasuno inde mo odje e ndjindji, ngubula me kpála bini adhépe ndata na 'ngbø ndua gba mũ-o de.

<sup>12</sup> Kpála inde agbóko 'gú bhomũ-o, ma a'ó ani maka nepanda bhú 'ngbé 'ti Ebhe gba Ebhe gba ma-o. Ehe bini ti da nagbe matá ani oo belegũ de bini. Ma ayé 'li Ebhe gba ma-a li kũte ani, bhú dabilí bini ne 'li gũdhũ gba Ebhe gba ma-o. Gũdhũ ango-o, a ko Yelusalema

† 2:26-28 2:26-28 Tsia bhú Ets. 2:8-9.

na mbia inde ayíe abhúlá, inde li Ebhe atíma galikpe e-o. La di-e, ma ayé 'li gba ma na mbia li kute aní.

<sup>13</sup> A ayo me kpála inde li e ne djedje-e, dje engú inde li Bu Bhobua ngapa e pí oDadjua gba Ebhe ko!»

#### *Balua pí okpála na Dadjua na Laodisé*

<sup>14</sup> Kpála inde ma au e bhomu-o atsia apa muma li soso me: «Ye balua pí andjelu na Dadjua na Laodisé-e me:

«Kpála inde 'li e me "A du moko", kukulu kpála inde ngakpokpo 'ngú me aní nde 'o koko pépé de-e, inde lita ndu 'he li Ebhe abho e hana-a apa me:

<sup>15</sup> Ma mbila okulu gba mu-o hana. Mu kpikpina ade, mu di kpákpá ade. A ayo igini me mu de adu kpikpina, i du mo-o de-e, mu du kpákpá. <sup>16</sup> I nde lie me mu nde yapayapa-a, mu nde kpikpina adí-e, mu la di kpákpá adí-e, ma azíe mu mazie!

<sup>17</sup> Mu ngapa me: "Ma ne bhulu tia, ma asia tia bhelé, ma ne gumu 'he belegu ade bini." Engú la bini, mu mbila de me ni bhú likabhu-o de. Mu mbila de me ni nga'o li ma ndjinga-a de. Mu mbila de me ni ne bhulu ndibhili-e de. Mu mbila de me ni u 'kpí de-e de. Mu mbila la di de me ni ndumbu-o de. <sup>18</sup> Kaka-a, ma ngayo ka mu me, a ayo nakala olo inde li djua aleke e ndjindji-e ka ma, ngubula me mu kolo bhulu tia. Ma ngayo ka mu me, a ayo nakala di obongo na bububu ka ma ngú nadyidyí li kute mu, amba numu améne mu ka ndumbu gba mu-o de. Ma ngayo ka mu me, a ayo nakala la di elá ngú nasese bhú djila mu, amba mu du au 'kpí ndjindji.

<sup>19</sup> La pí ma-a, ndu okpála inde ma akukunda o hana, ma ngambe bhú 'ndji uo, ma di ngasuno oehe inde u mene e ndjindji de-e pí uo. Kaka-a, a ayo me mu dji bua mu, amba mu du kpákpá.

<sup>20</sup> Djedje nga, ma alu li 'bhe bhoti-o, ma ngabhibhi. Li kpála dje 'li ma, aní 'u 'bhe bhoti-e, ma lí agba aní, li gaya ne

ani-e, ya tsia zú 'he ne aní bhú dabili bini.

<sup>21</sup> Kpála inde agboko 'gú bhomu-o, ma aziba pí aní nadu bhú dabili bini ne ma pí kiti na ngámá gba ma maka ngama di ma agboko 'gú lie, ma atsia adu bhú dabili bini ne 'Dyi ma pí kiti gba e na ngámá ko.

<sup>22</sup> A ayo me kpála inde li e ne djedje-e, dje engú inde li Bu Bhobua ngapa e pí oDadjua gba Ebhe ko!»

## 4

### *Abhúlá-a, ndu okpála hana ngadhögö Ebhe*

<sup>1</sup> Pipita-a, ma au engú koko bhú 'he maka loto. Ma au bhoti inde adu baba abhúlá.

Eli ma adje igini e kalanu mugito me u nga'u toti-e, apa muma me: «'U ei, amba ma suno engú inde ngago sidi-e pí mu.»

<sup>2</sup> Kolo me-e, Bu Bhobua abedhe ma. Abhúlá oo, kiti bini na ngámá adu oo, kpála bini atsia adu pépé. <sup>3</sup> Zi kpála ango-o adu nasu maka oteme\* na zizi. Makilima asa dengo kiti na ngámá inde aní adu pí e ne zi e ngbalina. Zizi adu di maka zi teme na zizi. <sup>4</sup> Okiti na ngámá ndjikpa bhisi ne ká badha asa dengo kiti na ngámá ango-o ngbalina. Obhelesi okpála ndjikpa bhisi ne ká badha atsia adulu pépé. U adyidyí obubu bongo , u atsia adyidyí ondata na ngámá inde u amene e li olo-o bhú 'ndji o. <sup>5</sup> Li bili li kiti ango-o adu lie, ekpí adu andjendjengene, mugbálá adu asusula. O'i 'ke mananika inde adu atsi matsi adu kala kiti ango-o. O'i 'ke ango-o, a ko obua mananika gba Ebhe-o. <sup>6</sup> Kala kiti ango-o, ma au 'he bini maka 'ngbé 'ngu inde li píla e adu nasu má ngingingi maka bitolobi. A adu má ngilili maka teme† na zizi.

Lingo kiti na ngámá ango-o, okpála badha na ngangamba‡ adu oo. (A akunda napa me sunda kiti na ngámá di ne bili li obhelesi okpála ndjikpa bhisi ne ká badha adu lie-o.) Djidjila abedhe li bhúla uo di

\* **4:3** 4:3 Oteme: Bhú eli na giliki-e, u aye limbi oteme bata: djasepe, saladuane ne emelode. † **4:6** 4:6 Teme: Bhú eli na giliki-e, u aye me «Teme na kilisitale.» ‡ **4:6** 4:6 Okpála badha na ngangamba: Li bili inde-e, u mbila de me ne me a ko okpála-kuti, ne me a ko oandjelu-o de.

ne li 'ngbɛ uo bedhe. <sup>7</sup> Kpála bhe na bini-e, adɛ maka kingbi. Bhende na bhisi-e, adɛ maka folo bagala na bhobhoko. Bhende na bata-a, bhúla ani adɛ maka kpála-kuti. Bhende na badha-a atsia adɛ maka ndua inde bhú holo. <sup>8</sup> Ndu uo badha hana, u adɛ ne mbumbudha madhia madhia. Djidjila atsia abedhe tété bedhe bedhe, ali ngbungbɛ di ne asabusabu. U ngali 'tsi sukpe ne ngbikpi mandí nago me:

«Ebhe Ngámá Apí 'Kpí, Bubu, ani Bubu, ani Bubu.  
A ko Kpála inde adɛ nani ɛɛ, inde ɛɛ,  
inde di ngago!»

<sup>9</sup> Ndu nedhinga hana li okpála badha bhomu-o ngali 'tsi ngú nadhögö kpála inde adɛ pí kiti na ngámá, kpála inde la di bhú mukobho dɛdɛma ne dɛdɛma, u ngaha sangu di ne nagie heni pí e lie, <sup>10</sup> obhelesi okpála ndjikpa bhisi ne ká badha-a ngatutu lipuku o kuto kala kpála ango-o. U ngadhögö kpála inde bhú mukobho dɛdɛma ne dɛdɛma-o. U ngapandja ndata na ngámá gba o-o, u ngabubu kala kiti na ngámá-a ne napa me:

<sup>11</sup> «Ebhe Ngámá gba ya, mo oti ne napa me okpála toko mu, u dhögö mu,  
amba mu sia sangu kabula ngámá gba mu-o.

Padhá de, anga mo obho ndu 'he hana ngamu.

A atsia amene lie,  
anga mo okunda nani me a amene lie moko.»

## 5

*Ndili Kandөлө-o abhúlu 'kpá balua inde agagala lie magagala-o*

<sup>1</sup> Pipita-a, ma au 'kpá balua bini sakpa kpála inde adɛ pí kiti na ngámá-o, ani aholo li pá 'kpa e na kokpa. U aye 'he pépé ne ndu pasu bhisi hana. U agagala, u atsia ayele ne malika li obili mananika. <sup>2</sup> Abhomu-o, ma au andjelu bini na angu inde adɛ asusula me: «A ti da nasosoko malika li kute 'kpá balua inde-e ngú nabhubhulu-o da?» <sup>3</sup> Engú bini, kpála bini inde ati da nabhubhulu di ne natsia 'kpí bhúbhú-o du de, abana

abhúla, abana píla doto, abana asa doto. <sup>4</sup> Kaka-a, ma aku 'gbá naali, anga kpála inde ati da nabhubhulu di ne natsia 'kpí bhúbhú-o du de. <sup>5</sup> Engú bini, saka obhelesi okpála apa mu me: «Mo okú 'gbá de. Tsitsia nga, kingbi na piga gba Yuda, ndili gba 'ngbé ngámá Davidi-e agboko egú-o agboko. Ani ti da nasosoko malika mananika bhomu-o, ani tsia bhulu di 'kpá balua ango-o.»

<sup>6</sup> Abhomu-o, ma au Ndili Kandөлө bini alu tutu, li bili na kiti na ngámá-o. Okpála badha na ngangamba bhú dabili bini ne obhelesi okpála-a asa ani ngbalina. Ani adɛ mugito me u akodho ngulu ani makodho. A adɛ bhú 'ndji ani ne odidi mananika di ne djidjila mananika. Odjidjila mananika bhomu-o, a ko obua mananika gba Ebhe li ani atima o píla doto libhomu-o. <sup>7</sup> Ndili Kandөлө-o ago, ani atsia aha 'kpá balua sakpa kpála inde adɛ pí kiti na ngámá-o. 'Kpá balua ango-o adɛ sakpa ani li pápá na kokpa. <sup>8</sup> Nedhinga ani aha 'kpá balua lie, okpála badha na ngangamba di ne obhelesi okpála ndjikpa bhisi ne ká badha-a, atuko ne lipuku o kuto kala Ndili Kandөлө-o. A adɛ sakpa ndu uo bini ne bini hana ne damu di ne kópo na olo inde abedhe ne bandele bedhe. Bandele ango-o, a ko mayo gba okpála gba Ebhe-o. <sup>9</sup> U adɛ nali etsi na mbia me:

«Mu ti da naha 'kpá balua-o  
ne nasosoko malika ango-o,

anga u abhөлө nani mu,

mo otsia agbegbe okpála inde adɛ  
bhú bali-e

ne ngute mu pi Ebhe.

A ko okpála na ndu bili hana,

ne ndu opiga hana,

ne ndu okongú hana.

<sup>10</sup> Mo otsia amene me  
u kolo pi Ebhe gba ní-e okpála na kuti-  
ngámá gba ani,

u kolo di odimandö pi ani,

u tsia ɛ píla doto.»

<sup>11</sup> Pipita-a, ma au, ma atsia adje 'li bhiti oandjelu. U adɛ nani oketö ne ketö. U alulu dengo kiti na ngámá-o, ne dengo

okulu 'he badha-o, di ne denge obhelesi okpála-o. <sup>12</sup> U adu asusula kpekpeke me: «Ndili Kandөлө nani inde u abhөлө e ati ne nasia sangu, ani ati ne nasia tia, ne imbilangu, di ne ngámá.

A ayo me okpála toko ani, u manga ani.

A ko kpála na angu.»

<sup>13</sup> Ma atsia adje di ndu ohe na píla doto libhomu ne ohe na abhúlá ne obhe na sa doto, ne obhe na abhú 'ngu-o hana aholo nali etsi me:

«A ayo me duduma ne duduma ní toko, ní dhөгө, amba ní ha di sangu ne ngámá pí kpála inde

ngadu pí kiti na ngámá-a

bhú dabili bini ne Ndili Kandөлө-o.»

<sup>14</sup> Okpála badha na ngangamba-a adu abhuka engú u adu apa e bhomu-o me: «A adu moko!» Obhelesi okpála atsia adu atutu lipaku-o kuto kala kiti na ngámá ne nadhөгө Ebhe bhú dabili bini ne Ndili Kandөлө-o.

## 6

*Ndili Kandөлө-o aholo nasosoko omalika mananika li kute 'kpá balua-o*

<sup>1</sup> Abhomu-o, ma atsia 'kpí, ma au Ndili Kandөлө-o asoko saka omalika mananika li 'kpá balua-o. Ani asoko lie, ma adje saka okpála badha na ngangamba-a ngagama 'ngú kpekpeke mugito me mugbálá ngasusula ngae. Ani me: «Gogo!» <sup>2</sup> Ma me ma tsia 'kpí me-e, ma au punda bini na bubu akoto. A adu sakpa kpála inde adu pí ani-e ne adili. U ato ndata na ngámá bhú 'ndji ani. Ani anu maka kpála inde agboko 'gú ngú nagboko matá egú koko.

<sup>3</sup> Nedhinga ani asoko malika na bhisi-e lie, ma adje kulu 'he na bhisi-e apa me: «Gogo!» <sup>4</sup> Abhomu-o, li punda koko akoto lie-e, kute ani ambe maka djua. U aha pí kpála inde adu pí ani-e angu na'e guo 'ngú píla doto ngubula me okpála bhili lio. U atsia aha di pí ani mbotia na ndjándjá.

<sup>5</sup> Li Ndili Kandөлө-o asoko malika na bata lie, ma adje kulu 'he na bata-a apa

me: «Gogo!» Ma me ma tsia 'kpí me-e, ma au punda na bibili. A adu sakpa kpála inde adu pí ani-e ne kilo. <sup>6</sup> Ma adje 'he mugito me kpála agama 'ngú bhú ká okpála badha na ngangamba-a me: «Li kpála mene kulu ekpí bini libhomu-o, ani de sia tia inde i ti da nakala bha bini koli kilo na ngano bini, i du mo-o de-e, ani de sia tia inde i ti da nakala bha bini koli kilo na olodje bata. \* Engú bini, vino ne emu-o adúla lie de.»

<sup>7</sup> Li Ndili Kandөлө-o asoko malika na badha-a lie, ma adje kulu 'he na badha-a apa me: «Gogo!» <sup>8</sup> Ma me ma tsia 'kpí me-e, ma au punda na 'ngu kpadhi. A adu 'li kpála inde adu pí ani-e me «kuo.» Bili gba okpála inde amu-o adu li 'ngbu ani. U aha nani angu pí uo ngubula nabhili té okpála na píla doto. I du me okpála nde badha-a, u bhөлө kpála bini bhú ká uo. U abhili té okpála bhomu-o ne egú, ne gumu, ne okuo di ne onute.

<sup>9</sup> Li Ndili Kandөлө-o asoko malika na bhuluvue lie, ma au bua okpála inde u abhili nani o sa misa natsulu enu pí Ebhe-o. U abhili nani okpála bhomu-o ka anga u abhuka 'li Ebhe, u atsia akpokpo di mbámá. <sup>10</sup> U adu asusula kpekpeke me: «Ngámá na bubu, mu ne kukulu ngámá ngamu. Mu ngadjeke ni ngú nakodho 'ngú sunda ya ne okpála na doto-o? Ngauo, u abhili nani ya. Kodho 'ngú bhomu-o kokodho, amba mu 'o 'ngú pí uo.» <sup>11</sup> Abhomu-o, u aha pí ndu uo hana bini ne bini lobe na bubu. U atsia apa pí uo me: «Yi djeke nga mbo bedi, alo gba yi-e le nga de. A ne ondaise yi koko inde ngakpata nganda Ebhe. A ayo me okpála na doto bhili nga di uo maka u abhili nani yi lie ko. Pipita-a, u tsia kódho 'ngú gba yi ne uo bhú dabili bini.»

<sup>12</sup> Pipita-a, ma au Ndili Kandөлө-o asoko malika na madhia-o. Abhomu-o adjigidjo na ngbéngbé amene lie. Ela abili bhúla e má mbilili maka bongo na pili. Epe libhomu atsia andju má ngua maka ngute. <sup>13</sup> Oikupala ayie abhúlá, abala kuto maka lí 'lá bhe i mbe de-e ababala lie ka kpeke anvi-o. <sup>14</sup> Kokpí angita maka 'kpá balua

\* 6:6 6:6 Bili inde si-e akunda napa me adyindi adu naali. Mase ezu akpeke na kuo kuo.



inde u agagala e magagala. Ndu oeta hana ne okpeme hana ayie bhú dá o. <sup>15</sup> Ongbengbe ongámási na doto, ne ong-bengbe okpála, ne ong-bengbe ongámási na sudha, ne obhulu tia, ne okpála na angu di ne ndu okpála koko hana, obalise ne okpála inde bhú bali ade, ndu uo hana awowo lio bhú ogudho teme ne bhú oeta. <sup>16</sup> U aholo apa pi oeta di ne pi ong-bengbe teme me: «Yi bala pí ya, amba yi wo ya tsutsu. Yi wo ya me kpála inde adu pí kiti na ngámá-a aú ya de. Yi wo ya ka kpéke ke 'ngú gba Ndili Kandole-o. <sup>17</sup> Padhá de, anga 'ngbé 'kpí na ke 'ngú gba uo akolo. A ti da nalu kakala da?»

## 7

### *Okpála kutu kámá bini ne ndjikpa badha ne ká badha*

<sup>1</sup> Pipita-a, ma au oandjelu badha, u nde alulu li odje doto badha hana. U adu ayoko me anvi bini apé pí doto, i du di-e pí 'ngbé 'ngu ne pí ondula de. <sup>2</sup> Abhomu-o, ma au andjelu koko bini ayie ne andjongu. A adu sakpa ani ne kasé gba Ebhe na u-o. Ani asula ne angu hana pi oandjelu badha inde li Ebhe aha nani angu nabhili doto pi o bhú dabili bini ne angu nasiti 'ngbé 'ngu-o pi o me: <sup>3</sup> «Yi abhili nga doto ne ondula padhá de. Yi asiti nga di 'ngbé 'ngu padhá de. Yi djeke nga me ya tu kasé pidi obalise gba Ebhe gba ní-e paká.»

<sup>4</sup> Ma atsia adje alo gba okpála inde u atu kasé lio-o. A adu okpála kutu kámá bini ne ndjikpa badha ne ká badha bhú ndu opiga gba omafosalaele hana. <sup>5</sup> Bhú piga gba Yuda, okpála bhe u atu kasé lio-o adu okpála kutu ndjikpa ne ká bhisi. Bhú piga gba Lubeni-e, okpála adu kutu ndjikpa ne ká bhisi. Bhú piga gba Gada-a, okpála adu kutu ndjikpa ne ká bhisi. <sup>6</sup> Bhú piga gba Asela-a, okpála adu kutu ndjikpa ne ká bhisi. Bhú piga gba Nefitali-e, okpála adu kutu ndjikpa ne ká bhisi. Bhú piga gba Manase-e, okpála adu kutu ndjikpa ne ká bhisi. <sup>7</sup> Bhú piga gba Simeona-a, okpála adu kutu ndjikpa ne ká bhisi. Bhú piga gba Levi-e, okpála adu kutu ndjikpa ne ká

bhisi. Bhú piga gba Isakala-a, okpála adu kutu ndjikpa ne ká bhisi. <sup>8</sup> Bhú piga gba Djabulona-a, okpála adu kutu ndjikpa ne ká bhisi. Bhú piga gba Djodjefu-o, okpála adu kutu ndjikpa ne ká bhisi. Bhú piga gba Bendjame-e, okpála adu kutu ndjikpa ne ká bhisi. U atu kasé li ndu okpála bhomu-o hana.

### *Libi okpála inde li Ebhe alo o-o*

<sup>9</sup> Pipita-a, ma atsia matá 'kpí, ma au bhiti okpála na bhibhiti inde li kpála bini ti da nako alo gba o-o de. A du okpála na ndu bili hana, ne ndu opiga hana, ne ndu okongú hana. U alulu kala kiti na ngámá di ne kala Ndili Kandole-o. U adyidyí olobe na bububu, adu sakpa uo ne okpá ngulu. <sup>10</sup> U adu asusula ne angu o hana me:

«Mukobho ngayie ka Ebhe gba ní inde adu pí kiti na ngámá-o, di ne ka Ndili Kandole-o!»

<sup>11</sup> Ndu oandjelu hana alulu denge kiti na ngámá-o, ne denge obhelesi okpála di ne denge okpála badha na ngangamba-o. U atu bhula o ne kuto kala kiti na ngámá-o, u atsia adhege Ebhe. <sup>12</sup> U adu apa me: «A adu moko!

A ayo me okpála toko Ebhe gba ní-o. A ko Ebhe na sango, a bhú ani ne imbilangu.

A ayo me okpála gie heni pi ani, u manga ani.

A ko Ebhe na angu. Ani kpekpeke, duduma ne duduma! A adu moko!»

<sup>13</sup> Suka obhelesi okpála bhomu-o ayi ma me: «Okpála inde adyí obubu lobe-e, a ko oda? U ayie la di su?» <sup>14</sup> Ma agie pi ani me: «Bhele kpála-a, mu mbila hana.» Ani atsia apa mu me: «A ko okpála inde apu bhú 'ngbé likabhu na ngbéngbé-o. U avulu olobe gba o-o, u atsia aleke ne ngute Ndili Kandole-o ngubula me akolo bubu.

<sup>15</sup> Ka 'ngú ango-o, u alulu kala kiti na ngámá gba Ebhe-o.

U ngamene kulu lio pi ani sukpe ne ngbikpi hana bhú 'ngbé 'ti gba ani-o.

Kpála inde adu pí kiti na ngámá-a adu bhú dabili bini ne uo ngú nalila uo.

16 U djé matá gũmũ belegũ de bini, u djé di matá gũmũ 'ngu belegũ de bini. Ela, i dũ di-e mangua kpá bili dho-ie tsúlu matá uo de.

17 Padhá de, anga Ndili Kandөлө inde alũ kala kiti na ngámá-a adũ maka mulila gba uo ngae.

Ani ató bhúla uo li bili li okpongu na mukobho nde lie-o. Ebhe tsia kúo ngula sala uo hana.»

## 8

### *Ndili Kandөлө-o asoko malika na mananika-o*

<sup>1</sup> Nedhinga li Ndili Kandөлө-o asoko malika na mananika-a lie, sukpe andjili abhúlá má bulu, masikpe de miniti ndjikpa bata. <sup>2</sup> Pipita-a, ma au oandjelu mananika inde alulu kala Ebhe-o. U aha ototi pi uo mananika.

<sup>3</sup> Andjelu koko bini ago alũ dengo misa natsulu mungotsi pi Ebhe-o. A adũ sakpa ani ne saani na olo ngú natsulu bandele. U aha bandele pi ani bhelé ngú napa me ani tsulu pi Ebhe bhú dabili bini ne omayo gba okpála gba Ebhe-o. Ani tsulu pí misa inde u abho e li olo-o. Misa angoo adũ kala kiti na ngámá-o. <sup>4</sup> Ngúwa bandele li andjelu-o adũ atsulu e-e, a'e'e lie abhúlá bhú dabili bini ne omayo gba okpála gba Ebhe, anũ a'ũ kala Ebhe. <sup>5</sup> Pipita-a, andjelu-o aha saani natsulu bandele-o. Ani abedhe ne djua inde adũ oo-o, ani atsia abhike píla doto. Ekpi andjengene, mũgbálá asula, adjigidjo adhika.

### *Ototi badha na kalanũ-o asula*

<sup>6</sup> Abhomũ-o, oandjelu mananika inde aholo ototi mananika-a aleke lio ngú na'u'u.

<sup>7</sup> Andjelu na bini-e a'u toti gba e-o. Itimeli, ne djua bhú dabili bini ne ngute abala píla doto. A tsia atsulu té doto di ne ondula. I dũ me u nde agbo bhũsũ doto di ne ondula hana bata-a, akũnda napa me bini bhú káká atsulu bhomũ-o ngae.

<sup>8</sup> Pipita-a, andjelu na bhisi-e a'u toti gba e-o. Ehe bini maka 'ngbé 'ta djua ati bhú 'ngbé 'ngu. Engu agbo bhũsũ e bata, bhe bini-e atsia adjí lie ngute. <sup>9</sup> Té ndũ 'he

li Ebhe abho e hana inde ngadũ abhú 'ngbé 'ngu, bhú dabili bini ne ozabũ-o atsia amu. U po bhúla ndũ 'he inde li Ebhe abho e bhú 'ngbé 'ngu, u po di bhúla ozabũ hana-a, u tsia gbo bhũsũ bhũsũ bata-a akũnda napa me akpi bhomũ-o ne bini bhú káká.

<sup>10</sup> Abhomũ-o, andjelu bhe na bata a'u toti gba e-o. 'Ngbé ikũpala bini inde li zi e adũ atsi maka zi 'ké na ngbéngbé ayie abhúlá, ati kuto. A atsia ati pí té ongade 'ngu di ne okpongu-o. I dũ me u nde apo bhúla ongade 'ngu di ne ondjingu hana-a, u tsia gbo bhũsũ bhũsũ bata-a, akũnda napa me ati bhomũ-o pí bini bhú káká.

<sup>11</sup> A adũ 'li ikũpala angoo me «Ehe na sũsũ.» Abhomũ-o, té oengu-o akolo sũsũ. Bhelé na okpála inde andji-e atsia amu, anga akolo sũsũ.

<sup>12</sup> Pipita-a, andjelu na badha-a a'u toti gba e-o. A asũ té ela ne té epe di ne té oikũpala. I dũ me u nde agbo bhũsũ ela ne epe di ne oikũpala ne ndundundu bata-a, akũnda napa me a asũ bhomũ-o bini bhú ká ndũndũ hana. A atsia abili bhúla uo hana li pápá bini bini. Zi ngbikpi dũ matá nasũ libhomu de, abana di zi epe. I dũ me u nde agbo bhũsũ zi ngbikpi ne ndundundu bata, u gbo di bhũsũ zi epe ne ndundundu bata-a, akũnda napa me bini bhú ká ndũ uo bini bini hana dũ matá nasũ-ũ de.

<sup>13</sup> Pipita-a, ma atsia matá 'kpí, ma adje ndua bini me ani nde ngakodho 'kpí abhúlá tsutsu naali. Ani adũ nasũsula me: «A ko likabhu! A ko likabhu! A ko likabhu pi okpála na doto li oandjelu bata bhe koko a'ú toti gba o-o lie ko.»

## 9

### *Andjelu na bhuluvue a'u toti gba e-o*

<sup>1</sup> Abhomũ-o, andjelu na bhuluvue a'u toti gba e-o. Ma au ikũpala bini ayie abhúlá, ati píla doto. U atsia aha lifũngula na 'bhø tsu 'dú-o\* pi ikũpala angoo. <sup>2</sup> Ikũpala bhomũ-o abhulu bhøbhø. Ngúwa bini akoto bhúbhú maka ngúwa na ndingidhi djua. Bhúla ela ne bhúla 'kpí atsia abili ka ngúwa angoo má pi!

\* 9:1 9:1 Tsu 'dú: A ko bili inde li osisiti bua ngadu li e.

<sup>3</sup> Omakilngbo aze bhú ngúwa bhom̄, u atsia ayangba p̄la doto. U aha nani p̄i uo sili maka bhende gba oapekebhe. <sup>4</sup> U aha líli p̄i uo me u améne ulu sisiti de, u améne ondula sisiti de, u améne di ohe inde ngak̄e bhú doto sisiti de. Engú bini, u mene mangbo sisiti bha bini okpála bhende lí kasé gba Ebhe-e nde pidi o ade-o. <sup>5</sup> U ha kpadji p̄i uo ngú nabhili okpála bhom̄-o de, engú bini, u to mbolo lí uo ngú epe bhuluvue. Mbolo ango-o adú ami lí uo maka ngabh̄e apekebhe amimi lie me a nde adho kpála-o. <sup>6</sup> Bhú epe bhuluvue bhom̄-o, okpála aḡili kuo, engú bini, u úu de. U adú ne gum̄a namu, engú bini, kuo akpé de uo tsutsu.

<sup>7</sup> Omakilngbo bhom̄-o adū maka opunda inde bedhe ngú egú. A adū pí 'ndji uo ne ehe maka ndata na ngámá inde u abho e lí olo. Bhúla uo adū maka bhúla okpála-kuti. <sup>8</sup> Sundjo adū bhú 'ndji uo ndjandjandja maka sundjo olisi. 'Te uo adū maka ote okingbi. <sup>9</sup> Mbulu uo adū m̄ugito me u adyi tété bongo na kalase. Gili mbudha uo adū au m̄ugito me a ko gili bhiti opunda inde adji bhú 'gú. <sup>10</sup> A adū lí uo ne soso maka 'so apekebhe, atsia adū bhúbhú ne sili inde u adū ato mbolo lí okpála ne e ngubula epe bhuluvue-o. <sup>11</sup> Ngámá gba uo adū ne andjelu na tsu 'dú. A adū 'lí aní bhú eli gba omaYuda me: «Abadona.» Bhú eli gba oGiliki-e, a adū 'lí aní me: «Apoliona.» A akunda napa me bhul̄u nabh̄e k̄uti.

<sup>12</sup> Likabhu na bini-e akodho 'kpí akodho. 'E-e! Likabhu koko bhisi matá ngago pipita.

### *Andjelu na madhia a'u toti gba e-o*

<sup>13</sup> Pipita-a, andjelu na madhia a'u toti gba e-o. Ma adje eli ayie ne lí odje misa natsulu bandepe p̄i Ebhe-e badha hana. Misa ango-o adū kala Ebhe, u amene lí olo. <sup>14</sup> Eli ma adje e apa p̄i andjelu na madhia inde adū ne toti sakpa e me: «Bhulu oandjelu badha inde u agbigbite o ne ekpú dengo ngade 'ngu na Efalate-o.» <sup>15</sup> U atsia abhulu oandjelu badha-o. Lí nedhinga bhom̄-o, bhú ekpí bhom̄, bhú epe bhom̄ di ne kalanga bhom̄-o,

oandjelu bhom̄-o adū nani bedhe ngú nabhili té okpála na doto. A akunda napa me, i bhaka okpála bata-a, u bh̄e bini bhú ká uo.

<sup>16</sup> U atsia apa di alo na osudha inde adū agū 'gú me u nde ne punda-a m̄ma. A adū osudha k̄e t̄e ne k̄e t̄e. <sup>17</sup> Lele lí opunda di ne osudha inde adū pí uo akoto lí ma lie bhú 'he maka loto-o adū me: u adyidyí ombulu bongo na kalase me a nde andjundju maka djua, bíbili maka kokpí, a adū di ndjendje maka 'kpá bhuḡu. 'Ndji opunda ango-o adū maka ondji kingbi. Adū naze bhú 'bh̄e uo ne djua, ne ngúwa di ne baluti. <sup>18</sup> Té okpála na doto atsia amu ka olikabhu bata inde adū aze bhú 'bh̄e opunda bhom̄-o. A akunda napa me okpála adū amu ka djua, ne ngúwa di ne baluti. I bhaka okpála bata-a, akunda napa me a bh̄e k̄pála bini bhú ká uo. <sup>19</sup> Padhá de, anga angu opunda bhom̄-o bhú 'bh̄e o di ne bhú 'so o, anga 'so uo mana kpul̄u. A tété ne 'ndji 'ndji inde u ngamene okpála ne e sisiti-o.

<sup>20</sup> Dú okpála bhe atigala-a, inde i mu ka olikabhu bata bhom̄-o de-e, u dji bua o lí nadh̄e oeh̄e inde u amene e ne 'kpa o-o de. U 'o nadh̄e osisiti bua de, ne okulu 'he na olo ne aladja di ne bhe na kalase na kpéke mase, ne obhe na teme, i d̄u di-e obhe na ndula-a de. Okulu 'he ango-o u 'kpí de, u dje 'kpí de, u dh̄ek̄u di-i de. <sup>21</sup> Okpála ango-o dji bua o lí nabhili okpála de. U dji di bua o lí kobha gba o-o de. U dji di bua o lí namene zabhe gba o-o de. U dji di bua o lí ezi gba o-o de.

## 10

### *Andjelu inde adū sakpa e ne mboye 'kpá bal̄u-a-o*

<sup>1</sup> Pipita-a, ma au andjelu koko bini na angu ayie abhúlá. Bongo gba aní-e adū maka ndindi, atsia abuku aní má bhelele! Makilima aga 'ndji aní ngbalina, bhúla aní adū maka ela. 'Dh̄u aní adū maka d̄ingidhi djua. <sup>2</sup> A adū sakpa aní ne mboye 'kpá bal̄u inde u abhulu e mabhulu. Aní a'o 'dh̄u e na kokpa-a pí 'ngbé 'ngu, aní atsia a'o bhe na gali-e pí doto. <sup>3</sup> Aní

asula kpekpeke maka kingbi inde ngangulumba. Aní asula lie, mụgbálá mananika atsia asula. <sup>4</sup> Ma di me ye engú inde li omụgbálá mananika bhomụ-o apa e bhú nasula ka o-o. Engú bini, ma adje eli bini ayie abhúlá, atsia apa mụma me: «Wo engú inde li omụgbálá mananika bhomụ-o apa e mawo. Mo oyé-e de.»

<sup>5</sup> Abhomụ-o, andjelu inde ma de au e me aní nde a'o 'dhụ e bini pí 'ngbé 'ngu, koko pí doto-o a'e 'kpa e na kokpa-a ne bhúlá. <sup>6</sup> Aní atsia atụ silika ne 'li Ebhe inde bhú mụkobho dụduma ne dụduma-o, Ebhe inde abho kokpí di ne ndụ 'he hana inde bhúbhú-o, abho doto di ne ndụ 'he hana inde bhúbhú-o, inde abho 'ngbé 'ngu di ne ndụ 'he hana inde bhúbhú-o. Andjelu ango-o apa me: «Nedhinga matá-a ade! <sup>7</sup> Engú bini, nedhinga li andjelu na mananika-a ahólo na'u totí gba e lie, abhomụ-o Ebhe tsia méne engú inde aní awo nani e ko. Aní améne maka aní apa nani pí obalise gba e opolofeta lie ko.»

<sup>8</sup> Abhomụ-o eli ma de adje igini e ayie abhúlá-a apa matá mụma me: «Nụ ha mboye 'kpá balua inde abhulu lie mabhulu-o sakpa andjelu alụ me aní nde a'o 'dhụ e bini pí 'ngbé 'ngu, ne koko pí doto ko.» <sup>9</sup> Ma atuto lima de andjelu-o. Ma atsia ayo ka aní me aní ha mboye 'kpá balua-a mụma. Aní agie mụma me: «Haha, amba mụ zụ. A adú bhú 'bhө mụ kpikpili maka 'mụ eú, la mo obhí lie, a adú bhú 'ndja mụ sụsụ.» <sup>10</sup> Ma aha mboye 'kpá balua sakpa andjelu-o, ma atsia azụ. A adụ bhú 'bhө ma kpikpili maka 'mụ eú. Engú bini, ma azụ lie, a adụ bhú 'ndja ma sụsụ. <sup>11</sup> Abhomụ-o, u atsia apa mụma me: «A ayo matá me mụ kpokpo 'ngú li Ebhe apa me ni améne e pí bhiti okpála na ndụ bili hana-o, engú aní apa me ni améne e pí bhiti okongú, di ne pí bhiti ongbengbe ongámási-o.»

## 11

### *Ebhe atima opolofeta bhisi*

<sup>1</sup> Pípita-a, u aha mbamba mụma bini. A adụ maka ndula u apipima 'he ne e-o. U atsia apa mụma me: «Nụ pima

'ngbé 'ti Ebhe di ne misa natsulu enụ pí Ebhe-o. Mụ tsia ko di alo gba okpála inde ngadhөгө Ebhe bhú 'ngbé 'ti gba anio. <sup>2</sup> Engú bini, 'o mbadhasụ na 'ngbé 'ti Ebhe-e li ngongo. Mo opíma de, anga Ebhe apụ nani bhobhomụ-o pí okpála inde ne omaYuda ade-o. U adédele gụdhụ na bubu gba Ebhe-e ngubula epe ndjikpa badha ne ká bhisi. <sup>3</sup> Ma atima obhulụ nakpo 'ngú gba ma bhisi-e me u nde adyi bongo na talia. Ma atima uo ngú nakpokpo engú gba Ebhe. U akpókpo 'ngú ango-o ngubula ekpí ketө bini, kámá bhisi ne ndjikpa madhia.»

<sup>4</sup> Obhulụ nakpokpo 'ngú bhisi bhomụ-o, a ko ondula na olive bhisi di ne otala bhisi inde ngalụ kala Ngámá na doto-o. <sup>5</sup> Li kpála le namene uo sisiti-e, djua kóto bhú 'bhө uo, i tsia bhili obhulụ yala gba uo-o. A bhomụ-o lele maka u abhөө bhulụ yala gba o lie-o. <sup>6</sup> A bhú uo ne angu nagbite kokpí ngubula me ebha adhí-i de, nakolo li 'kpí inde u andjia nakpokpo engú gba Ebhe-e lie-o. A di bhú uo ne angu nadjji engu me akolo ngute. A bhú uo ne angu natụ pөdjө pí doto me ndụ olikabhu ngangá mene doto li ndụ nedhinga hana inde u akunda lie.

<sup>7</sup> Nedhinga u andjia nakpokpo 'ngú li Ebhe atima uo ne e lie, enụ inde adụ bhú tsu 'dú-o há 'gú ne uo. Aní há angu uo, aní tsia bhili uo. <sup>8</sup> Kuo uo atigala li 'ngbé 'hi kpadji na 'ngbé gụdhụ inde u agi nani Ngámá gba uo lie li kulusi-o. U agisila li gụdhụ ango-o 'ili. U agisila lili me Sodomo, i dụ di-e Edjipeto. <sup>9</sup> U ziba de me okpála zi kuo uo-o de. Okpála na ndụ bili hana, ne ndụ opiga hana, ne ndụ okongú hana adú ago natsia okuo uo ngú okpí bata ne ndundu. <sup>10</sup> Okpála na doto akpí djali li nakpi ka uo-o. U améne anokomia na djali, u tsia dú apụ 'he sunda o. U améne mo-o anga opolofeta bhisi bhomụ-o amene uo kpékpéke naali.

<sup>11</sup> Engú bini, pita ekpí bata ne ndundu bhomụ-o, ewo bini na mụkobho ayie agba Ebhe ali bhú uo, u atsia ayie bhúlá. Abhomụ-o, 'ngbé tsulụ na ngbéngbé ati pí okpála bhende adụ natsia uo-o. <sup>12</sup> Opolofeta bhisi bhomụ-o atsia adje eli

na kpékpéke inde ayie abhúlá. Eli ango-o apa pi uo me: «Yi 'u ei!» U atsia a'u' abhúlá bhú ndindi me obhulú yala gba uo nde ngatsia uo. <sup>13</sup> Bha bhú nedhinga bhomu-o, kpéke adjigidjo adyiki bili, té gúdhú-o atuko. I dū me u nde agbo bhúsú gúdhú-o ne ndundundu ndjikpa-a, akúnda napa me adjigidjo bhomu-o adyiki bini bhú káká. Abhomu-o, okpála kete mananika amu ka adjigidjo ango-o. Obhe atigala-a, tsulú abedhe uo bedhe. U atsia adhégè Ebhe inde abhúlá-o.

<sup>14</sup> Likabhu bhe na bhisi-e akodho 'kpí akodho. 'E-e! Bhe na bata agó mbia inde?

*Andjelu na mananika-a a'u toti gba e-o*

<sup>15</sup> Abhomu-o, andjelu na mananika-a a'u toti gba e-o. Oandjelu atsia asula abhúlá kpekpeke me:

«Nau na doto ibili sakpa ngámá gba ya, ne Masiya gba e-o.

Ngámá gba ya-a aú dūduma ne dūduma!»

<sup>16</sup> Obhelesi okpála ndjikpa bhisi ne ká badha inde adulú pí odabili na ngámá gba o kala Ebhe-e atutú bhúla o ne kuto. U atsia adhégè Ebhe, <sup>17</sup> u apa me:

«Ebhe Ngámá Apí 'Kpí, ngamu kpála inde

uu,  
inde adu di nani uu,

ya ngatoko mu,

anga mo opana angu gba mu,

ndu 'ngú hana agie lie sakpa mu.

Mo otsia au ngámá pépé.

<sup>18</sup> Opiga na doto azi nani mbutu li mu naali,

la mbia inde-e,

ke 'ngú gba mu-o ago pí uo ago.

Nedhinga nakodho 'ngú gba okpála inde amu-o akolo.

A ko nedhinga inde mo ogie bádha 'ngú lie

pi obalise gba mu opolofeta

di ne ndu okpála gba mu-o hana,

inde di ngamanga mu,

ongbengbengbe ne odjedjedje-o.

A ko nedhinga ngú nabhili obhe ngabhèle doto-o.»

<sup>19</sup> Abhomu-o, 'ngbé 'ti Ebhe inde abhúlá-a abhulu lie, u atsia au sanduku

na gandja-o.\* Ekpí andjengene, mughálá asula, adjigidjo di ne itimeli na kpekpeke adhika.

## 12

*Engú na ngangamba inde abhaka elè inde adu nazu*

<sup>1</sup> Pipita-a, ma au engú bini na ngangamba ngamene lie abhúlá: a adu elè bini inde adyi li kute e ela. Epe adu sa 'dhú ani. A adu bhú 'ndji ani ne ndata na ngámá inde li e ne oikupala ndjikpa ne ká bhisi. <sup>2</sup> Elè ango-o adu ne ebhi. Nedhinga ani adu adjeke nazu lie, ani adu natu 'ue ka nazu ka bhú 'bu e-o.

<sup>3</sup> Engú na ngangamba koko amene matá lie abhúlá: a adu 'ngbé kpulú na ngbéngbé. Kute ani adu mbembe má ngua! A adu li ani ne ondji 'ndji mananika, di ne odidi ndjikpa. A adu pí ndu ondji ani hana ne ndata na ngámá.

<sup>4</sup> Ani apo té oikupala ne 'so e, ani atsia abala uo kuto. A akúnda napa me u po bhúla ndu oikupala hana-a, u tsia gbo bhúsú bhúsú bata-a, ani abala kuto bhomu-o bini bhú káká. Ani atsia anu alu kala elè inde adu akúnda nazu-o ngabula me, ni zu ndili li elè bhomu-o azú e bha li nedhinga nakoto ka ani-o. <sup>5</sup> Abhomu-o, elè-o azu ndili na bhobhoko. Ani aú pí 'ndji ndu opiga hana ne angu. Kolo me-e, u atsia a'e ndili bhomu-o anu ne ani dengo Ebhe, di ne dengo kiti na ngámá gba ani-o. <sup>6</sup> Elè-o atsia akpe abhú 'gu li bili inde li Ebhe aleke nani e pi ani, ngú napa me ni ku ani ngabula ekpí kete bini, kámá bhisi ne ndjikpa madhia-o.

<sup>7</sup> Abhomu-o, gbele aka abhúlá. Mikaele ne oandjelu gba e agu 'ngbé kpulú-o. Kpulú ango-o atsia aholo di gbele bhú dabili bini ne oandjelu gba e-o. <sup>8</sup> Engú bini, Mikaele ne oandjelu gba e agboko egú-o. Kaka-a, 'ngbé kpulú-o ne oandjelu gba e sia matá bili da nadu abhúlá de. <sup>9</sup> U atsia abhike 'ngbé kpulú-o kilidjo. A ko kpulú na didili, inde u nga'i e me Djabulú, i dū di-e Satana, bhulú napite okpála na

\* **11:19** 11:19 Sanduku na gandja: A ko sanduku inde u abu nani opapala teme inde u aye olfi ndjikpa gba Ebhe-e bhú e-o.

doto libhomu-o. U abhike ani kuto bhú dabili bini ne oandjelu gba e-o.

<sup>10</sup> Pipita-a, ma adje kpéke eli bini ayie abhúlá. Eli ango-o adu apa me:

«Nedhinga li Ebhe gba ní-e ngakobho okpála lie akolo!

Mbia inde-e, Ebhe gba ní-e asuno angu gba e me ni ne ngbé Ngámá-a asuno!

Mbia inde-e, angu sakpa Masiya gba ani-o.

Padhá de, anga u abhike bhulu napa 'ngú li ondaise ní-e akilidjo,

ngaani kpála inde adu apa 'ngú li uo pi Ebhe gba ní-e ngbikpi ne sukpe-o.

<sup>11</sup> Ondaise ní aha angu ani ka ngute gba Ndili Kandele

di ne ka nakpokpo 'li Ebhe pi okpála.

U kpe kuo de, u atsia atse 'kpa li mukobho gba o ngubula me o mumu.

<sup>12</sup> Kaka-a, ne kokpi ne yi okpála inde ngadulu bhúbhú hana-a,

yi du bhú djali!

A ko la mangua likabhu dho pi yi okpála inde ngadulu pila

doto ne yi obhe ngadulu bhú 'ngbé 'ngu-o, anga djabulu aké agba yi aké.

Ani abedhe ne egú bedhe, anga ani mbila hana me nedhinga atigala pi ni bedi.»

<sup>13</sup> Li 'ngbé kpulu-o au lie me u abhike ni kuto abhike-e, ani aholo nabhike ele inde azu igini ndili na bhobhoko bhomu-o.

<sup>14</sup> Engú bini, u aha mbudha 'ngbé ndua pi ele bhomu-o ngú napa me ani 'ulu, amba ani nu du li bili inde u aleke e pi ani abhú 'gu-o. U atsia adu aké ani oo ngubula kalanga bata ne ndundu me 'ngbé kpulu-o nde to mbolo li ani de.

<sup>15</sup> Abhomu-o, kpulu-o atsia azie engu bhelé nganda ele-o maka ngade 'ngu, da napa me akpe ne ani.

<sup>16</sup> Engú bini, doto ago ateteke ele-o. Doto abhulu 'bhé e, atsia abhi engu li 'ngbé kpulu-o azie e-o.

<sup>17</sup> Li bua kpulu-o ake lie ne ele-o, ani anu aha 'gú ne dú ongisi gba ele-o, obhende ngamanga Ebhe inde di ngalila kakulu 'ngú inde li Yesu ambamba ta e-o.

<sup>18</sup> Pipita-a, 'ngbé kpulu-o anu adu pi sike lingo 'ngbé 'ngu.

## 13

*'Ngbé kpulu-o aha angu gba e pi nute koko*

<sup>1</sup> Pipita-a, ma au enu bini ngakoto abhú 'ngbé 'ngu. 'Di ani adu ndjikpa, 'ndji ani adu mananika. Ani adyi ndata na ngámá ne ndu odi e hana. Ani atsia adyi di o'ili nasobho Ebhe ne pi 'ndji e hana.

<sup>2</sup> Enu inde ma au e adu maka sia. Odu ani adu maka bhe gba onute, 'bhé ani adu maka 'bhé kingbi. 'Ngbé kpulu-o aha angu na ngbéngbé gba e pi enu-o.

Enu-o atsia adu pi kiti na ngámá gba ani-o. <sup>3</sup> Suka ondji ani adu mugito me u abi eka bhe na mugwe mugwe,

engú bini eka na mugwe mugwe ango-o atsia ambe. Engú bhomu-o atsia angamba okpála na doto libhomu. Kaka-a, u atsia akpata enu bhomu-o.

<sup>4</sup> Ndu okpála hana atsia aholo nadhoge 'ngbé kpulu-o, anga ani aha angu pi enu-o. Ndu okpála hana adhoge di enu-o ne napa me: «A ko da inde maka enu inde? Ati da nugu ani da?»

<sup>5</sup> U aha nani kpadji pi enu bhomu-o me ani du napa oeli na 'ngbé 'ndji, amba ani du di nasobho Ebhe. U aha angu pi ani ngú namene engú bhomu-o ngú epe ndjikpa badha ne ká bhisí.

<sup>6</sup> Ani aholo napa osisiti 'ngú li Ebhe, ne nasobho 'li ani di ne nasobho bili inde ani adudu li e, di ne okpála hana inde adudu abhúlá-o.

<sup>7</sup> U aha kpadji pi ani me ani gu okpála gba Ebhe di ne naha angu uo. U aha angu pi ani pi 'ndji okpála na ndu bili hana, ne ndu opiga hana, ne ndu okongú hana.

<sup>8</sup> Ndu okpála na pila doto hana inde u ye nani 'li o bhú bhuku na mukobho-o de-e, adhoge ani. Bhuku ango-o, a ko bhe gba Ndili Kandele inde u abhele e-o. U ye nani 'li uo bhúbhú de, nayie maka li Ebhe abho doto lie-o.

<sup>9</sup> Yi dje ndjindji, i du me a nde li yi ne djedje naje 'kpi ko.

<sup>10</sup> Kpála inde ayo me ani nu bhú tikpu-o, anu bha bhú tikpu.

Kpála inde ayo me ani kpi li mbotia-a, akpi bha li mbotia.

Kaka-a, a ayo me okpála gba Ebhe-e dũ ne  
 'ndjá bua,  
 di ne nabhuka .

*Enũ koko akoto bhú doto*

<sup>11</sup> Pipita-a, ma au enũ koko ngakoto bhú doto. Adũ bhú 'ndji ani ne didi bhisi maka ndili kandøø. Ani atsia adũ agama 'ngú maka 'ngbé kpulũ. <sup>12</sup> A adũ di bhú ani ne angu maka angu inde adũ bhú enũ bhende akoto bhú 'ngbé 'ngu-o. Ani adũ amene 'he ne di kala enũ bhe na 'ngbé 'ngu-o. Ani adũ apa pi ndũ okpála na doto hana me, u dhøø enũ na 'ngbé 'ngu li eka na muge muge gba e ambe-o.

<sup>13</sup> Enũ bhe na bhisi inde-e adũ amene ongamba 'ngú na ngbengbengbe. Ani adũ belegũ nagbele djua nayie abhúlá nakø pí doto. Ani adũ amemene li djila ndũ okpála hana. <sup>14</sup> Ani adũ apipite ndũ okpála na píla doto hana inde u ye nani 'li o bhú bhuku na mokobho-o de-o. Ani adũ apipite uo ne ongamba 'ngú inde ani adũ amene e li djila enũ na 'ngbé 'ngu-o. Ani adũ akata uo me u bho kulu enũ inde abi nako eka na muge muge li mbotia, eka ang-o atsia ambe-o.

<sup>15</sup> Enũ na bhisi-e asia angu ngú nato ewo bhú kulu enũ na bini-o, ngubula me a dũ nagama 'ngú, amba a dũ nabhili ndũ okpála hana inde i dhøø ni de-o. <sup>16</sup> Enũ ang-o aye tele li ndũ okpála hana. Ani aye li okpála koko li 'kpa o na kokpa, ani aye li okpála koko pidi o, abana i dũ mboye ndili, abana i dũ bhele kpála, abana i dũ bhulũ tia, abana i dũ bhulũ ndibhili, abana i dũ bali, abana i dũ kpála inde bhú bali ade. <sup>17</sup> Kpála bini ti da nakala 'he de, i dũ di-e natsindji 'he de, i dũ me tele nde li kute ani ade-o. Tele ang-o, a ko 'li enũ bhomũ, i dũ di-e alo na 'li ani-o. <sup>18</sup> A inde-e nedhinga inde ayo ne imbilangu. Kpála inde ne imbilangu-o tí da nambila ta alo gba enũ-o, anga alo ang-o viti bini ne 'li kpála-kuti. Alo ang-o kámá madhia, ndjikpa madhia ne ká madhia.

**14**

*Okpála inde li Ndili Kandøø-o akala o*

<sup>1</sup> Ma atsia matá 'kpí, ma au Ndili Kandøø-o me ani nde alũ pí eta na Siona . Okpála køtø kámá bini, ndjikpa badha ne ká badha inde u aye 'li Ndili Kandøø di ne 'li 'Dyi ani pidi o alulũ de ani. <sup>2</sup> Pipita-a, ma adje eli ayie abhúlá. Eli ang-o adũ mugito me a ko gili wowo 'ngu, maka gili mugbálá na kpekpeke. Eli inde ma adje e adũ maka gili dumũ, nedhinga li obhuhulũ-o abhibhi lie-o. <sup>3</sup> Bhiti okpála bhomũ-o adũ ali etsi na mbia kala kiti na ngámá, di ne kala okpála badha na ngangamba ne obhelesi okpála-o . Kpála bini ti da nale etsi ang-o de, bha bini okpála køtø kámá bini, ndjikpa badha ne ká badha li Ndili Kandøø-o akala o píla doto-o. <sup>4</sup> Ngauo-o, u siti lio ne olisi de. U alila lio bubu kala Ebhe. U ngakpata Ndili Kandøø-o ne ndũ bili hana ani nganũ li e-o. Ani akala nani uo bhú ká okpála-kuti ngubula napũ uo pi Ebhe di ne pi e bhuhulũ maka gina ngua. <sup>5</sup> Eu koto nani bhú 'bhø uo belegũ de bini. Engú na sisiti napapa li uo ade.

*Oandjelu bata akpokpo 'ngú pindji lele maka li Ebhe akódho 'ngú lie-o*

<sup>6</sup> Pipita-a, ma au andjelu koko. Ani adũ akodho 'kpí abhúlá tsutsu naali maka edhu. Adũ ka ani ne Bádha Ngali na dũdũma inde ani adũ akpokpo e pi okpála na píla doto, okpála na ndũ bili hana, ne ndũ opiga hana, ne ndũ okongú hana. <sup>7</sup> Ani adũ nasusũla kpekpeke me: «Yi kpe Ebhe, amba yi dhøø di ani! Padhá de, anga nedhinga me ani kodho 'ngú gba okpála na doto akolo. Yi dhøø kpála inde abho kokpí ne doto ne 'ngbé 'ngu di ne okpongu-o.»

<sup>8</sup> Pipita-a, andjelu na bhisi-e akpata bhe na kalanũ-o. Ani adũ apa me: «Babilona na ngbéngbé-e ati! A ati na paká paká! Ani ase ndũ opiga hana ne siti vino gba e-o. Vino ang-o, a ko zabhe inde ani ngamene e-o!»

<sup>9</sup> Pipita-a, andjelu na bata akpata obhe bhisi bhomũ-o. Ani adũ asusũla me: «Li kpála dhøø enũ-o, ne kulu ani-e, li u aye di tele gba enũ-o pidi e, i dũ di-e li 'kpa e, <sup>10</sup> kpála ang-o ndjí bhadi vino na ke

'ngú gba Ebhe-o! Ebhe atúko ngili vino ango-o bhú kópo na ke 'ngú gba e-o! Ngua kpála bhomu-o asía likabhu bhú djua na baluti kala oandjelu na bububu di ne kala Ndili Kandələ-o. <sup>11</sup> Ngúwa na djua inde ngato mbolo li uo-o nga'ụ abhúlá ndu 'kpí hana. Ndu okpála hana inde ngadhөгө enu, inde di ngadhөгө kulu ani, inde u aye tele gba ani-e li o-o, ngazu likabhu ngbikpi ne sukpe. U guguo de.» <sup>12</sup> Kaka-a, a ayo me okpála gba Ebhe inde ngakpata líli gba ani-e, inde di ngalila nabhuka gba o bhú Yesu-o du ne 'ndjá bua.

<sup>13</sup> Pipita-a, ma adje eli bini ayie abhúlá, a atsia apa muma me: «Ye me: <A ko djali pi okpála inde amu nayie pi mbia inde-e me u nde abhuka Ngámá-o!> Bu Bhobua apa me: <A na paká, u guo ka bhiti kulu u amene e guguo. Padhá de, anga kulu gba uo-o ngakpata uo.»»

#### *Nedhinga na'e nguwa na píla doto*

<sup>14</sup> Pipita-a, ma atsia matá 'kpí, ma au ndindi bini na bubu. A adu pí ndindi ango-o ne ehe maka kpála. A adu pí 'ndji ani ne ndata na ngámá inde u abho e li olo. A adu sakpa ani ne dhádha bini na dhedhe.† <sup>15</sup> Abhomu-o, andjelu koko bini akoto bhú 'ngbé 'ti Ebhe inde abhúlá-o. Ani atsia asula pi kpála inde adu pí ndindi-e me: «Ha dhádha gba mu-o, amba mu holo na'e nguwa abhiye. Padhá de, anga nedhinga na'e-e-e akolo. Nguwa na píla doto abhele ngú nakoko abhele!» <sup>16</sup> Abhomu-o, kpála inde adu pí ndindi-e apu ne dhádha gba e píla doto. Nguwa na píla doto atsia a'e lie.

<sup>17</sup> Pipita-a, andjelu koko akoto bhú 'ngbé 'ti Ebhe inde abhúlá-o. A adu di ka ani ne dhádha na dhédhé.

<sup>18</sup> Pipita-a, andjelu koko akoto li bili natsulu enu pi Ebhe-o. A adu bhú ani ne angu pí djua. Ani asula pi bhe adu ne dhé dhádha sakpa e me: «Ha dhé dhádha gba mu-o, amba mu ko vino inde píla doto-o nedi. Líli-e ambe.» <sup>19</sup> Andjelu-o atsia apu ne dhádha gba e píla doto. Ani atsia ako vino na píla doto-o. Ani atsia abu bhú

'ngbé ngbengələ na ke 'ngú gba Ebhe-o. <sup>20</sup> U agbe ngbengələ-o bhú gudhu-o kilidjo, u atsia api lí vino-o. Abhomu-o, ngute atsia aze bhú ngbengələ-o. Ngute ango-o anu a'ụ nakolo li 'bhө opunda. A atsia ayangba masikpe de kilometele kámá bata.

## 15

### *Oandjelu mananika ago ne olikabhu mananika*

<sup>1</sup> Pipita-a, ma atsia 'kpí, ma au matá engú na ngangamba koko akoto abhúlá. A adu engú na ngbéngbé inde di na tsulu tsulu. Ma au oandjelu mananika, a adu sakpa uo ne gba olikabhu mananika. Pipita-a, likabhu koko matá ade, anga a ngasuno ke 'ngú inde li Ebhe apana e li soso-o ngae.

<sup>2</sup> Pipita-a, ma au ehe bini maka 'ngbé 'ngu i mana bitolobi, a atsia amata lie ne djua. Ndu okpála hana inde aha nani angu enu-o, inde aha di angu kulu ani bhú dabili bini ne alo inde ngasuno 'li ani-e, alulu pí 'ngbé 'ngu ango-o. A adu sakpa uo ne odumu li Ebhe aha e pi uo-o. <sup>3</sup> U adu ali etsi gba Moidje , bali gba Ebhe-o, di ne etsi gba Ndili Kandələ-o . Etsi ango-o adu me:

«Ebhe Ngámá Apí 'Kpí,  
okulu gba mu-o ngbengbengbe.

A di na ngangamba.

'Ngbé Ngámá gba okpála,  
okpadji gba mu-o ne okukulu kpadji,  
a la di ngbingbili.

<sup>4</sup> A mánga mu de da, Ngámá?

A adhөгө mu de da?

Padhá de, anga mu bubu ngamu kpi mu kpi.

Ndu opiga hana agó atutu lipuku o kala mu.

Padhá de, anga mo opana ngbili 'ngú gba mu-o pi uo apana.»

<sup>5</sup> Pipita-a, ma atsia 'kpí, ma au 'ngbé 'ti Ebhe inde abhúlá-a abhulu lie. A adu bhúbhú ne 'ti ngbangbali li Ebhe adu asuno lie bhú e-o. <sup>6</sup> Abhomu-o, oandjelu mananika inde adu ne gba olikabhu mananika sakpa o-o akoto bhú

† 14:14 14:14 Tsia bhú Dan. 7:13. \* 15:6 15:6 Bongo na kpéke mase: U abho nani bongo ango-o li lene.



'ngbé 'ti Ebhe-o. U adyidyí obongo inde na kpéke mase,\* inde avuvu má tuu tuu! U agbigbite di mbulu o ne mukabha na olo. <sup>7</sup> Suka okpála badha na ngangamba-a aha kópo na olo mananika pí oandjelu mananika-o. Okópo ango-o adu bedhe bedhe ne oke 'ngú gba Ebhe inde bhú mukobho duduma ne duduma-o. <sup>8</sup> Abhomu-o, 'ngbé 'ti Ebhe-e abedhe ne ngúwa bedhe ka zi Ebhe di ne angu gba ani-o. Kaka-a, kpála bini ti da nali bhú 'ngbé 'ti Ebhe-e de, nakolo li nedhinga li olikabhu mananika li oandjelu-o adu ne e amene lie lie-o.

## 16

### *Okópo na ke 'ngú gba Ebhe*

<sup>1</sup> Pipita-a, ma adje kpéke eli ayie ne bhú 'ngbé 'ti Ebhe . Eli ango-o apa pí oandjelu mananika-a me: «Yi nunu, amba yi tuko okópo na ke 'ngú mananika gba Ebhe-e píla doto!»

<sup>2</sup> Andjelu na bini-e anu, ani atsia atuko ke 'ngú inde adu bhú kópo gba e píla doto. Abhomu-o, oeka na sisiti, inde di nake make atsia aze li kute ndu okpála hana inde adu ne tele gba enu-o, inde adu di natoko kulu ani-o.

<sup>3</sup> Andjelu na bhisi-e atuko ke 'ngú inde adu bhú kópo gba e pí 'ngbé 'ngu. 'Ngbé 'ngu-o akolo maka ngute kpála inde akpi. Abhomu-o, ndu ohe hana inde adu bhú 'ngbé 'ngu-o me a nde nu-o atsia amu.

<sup>4</sup> Andjelu na bata-a atuko ke 'ngú inde adu bhú kópo gba e bhú ongade 'ngu, ne bhú okpongu. A atsia adji lie ngute. <sup>5</sup> Ma atsia adje andjelu inde adu ne angu pí ongu-o ngapa me:

«Ngamu kpála na bubu, inde nu, inde adu di nani nu-o, mu ne ngbili kpála ,

anga mo opana ngbili 'ngú gba mu-o.

<sup>6</sup> Padhá de, anga okpála abhili okpála gba mu-o di ne opolofeta .

Mo oha bhadi pí uo ngute me u ndji. U asia engú inde ati ne uo-o!»

<sup>7</sup> Pipita-a, ma adje eli akoto pí misa natsulu mungotsi pí Ebhe-o. Eli ango-o adu apa me:

«A ko paká, Ebhe Ngámá Apí 'Kpí,

ndu 'ngú mo okodho e hana-a, mo okodho li lelele, a la bhadi ngbingbili.»

<sup>8</sup> Andjelu na badha-a atuko ke 'ngú inde adu bhú kópo gba e píla ela. Ani atsia aha kpadji pí ela me a atsulu okpála ne djua gba e-o. <sup>9</sup> Abhomu-o, bili akpa na mugwe mugwe, okpála atsia atsulu kaka. U asobho 'li Ebhe inde adu bhú e ne angu ngú natima ngua oke 'ngú bhomu-o. Engú bini, u dji bua o ngú nadhoge Ebhe de.

<sup>10</sup> Andjelu na bhuluvue atuko ke 'ngú inde adu bhú kópo gba e pí kiti na ngámá li enu-o adu nadu pí e-o. Abhomu-o, biti agba kuti-ngámá gba enu-o. Okpála atsia adu nazu 'mi o ka likabhu. <sup>11</sup> U adu asobho 'li Ebhe abhulá ka olikabhu gba o di ne ka oeka inde adu li uo-o. Engú bini, u dji bua o li osisiti 'ngú inde u adu namene e de.

<sup>12</sup> Andjelu na madhia-a atuko ke 'ngú inde adu bhú kópo gba e pí ngade 'ngu na Efalata. Engu-o atsia a'ulu hana ngú naka kpadji pí ongámási inde ngayie ne ndjongu-o. <sup>13</sup> Abhomu-o, ma au osisiti bua bata ngakoto bhú 'bhó 'ngbé kpulu-o ne bhú 'bhø enu-o, di ne bhú 'bhø polofeta na eu-o. Osisiti bua ango-o adu maka omabianga. <sup>14</sup> A ko osisiti bua inde li djabulu atima o-o. U adu amene ongamba 'ngú . U adu nanu agba ong-bengbe ongámási na doto libhomu ngú napo bhúla uo ngubula gbele na 'ngbé 'kpí gba Ebhe Apí 'Kpí-o.

<sup>15</sup> Ngámá Yesu apa me: «Tsitsia! Ma ngago maka bhulu 'zi! A ko djali pí kpála inde li zuku, inde ngalila obongo gba e li kute e ngú napa me ni anú ndumbu de, me ni asia namu de ka nakoto bhú djila okpála ndumbu-o.»

<sup>16</sup> Osisiti bua apo bhúla ong-bengbe ongámási li bili inde u a'i e bhú eli gba omaYuda me Alamagedo.

<sup>17</sup> Andjelu na mananika-a atuko ke 'ngú inde adu bhú kópo gba e atu 'kpí. Kpéke eli bini atsia akoto abhú 'ngbé 'ti Ebhe. A ayie li pápá na kiti na ngámá-o. A apa me: «A amene lie amene!» <sup>18</sup> Abhomu-o, ekpí andjengene, mugbalá asula, adjigidjo

na kpekpeke adhika. Ngua 'ngú bhomu-o mene nga nani lie kalanu de, nayie maka li Ebhe abho kpála píla doto lie-o! <sup>19</sup> 'Ngbé gudhu na Babilona agugumu bhusu e ne ndundundu bata. Abhomu-o, ndu ogudhu na okuti hana atuko kuto. Abhomu-o, Ebhe atsia a'o nga la 'to e 'to 'ngbé gudhu na Babilona. Ani atsia aha pi ani kopo na vino na ke 'ngú gba e na sisiti inde adu adula bhú e madula me ani ndji. <sup>20</sup> Ndu okpeme hana atsia angita, ndu oeta hana atsia angita di. <sup>21</sup> Ongbengbe itimeli na titili masikpe de kilo ndjikpa badha atsia abala pí okpála. Abhomu-o, okpála atsia asobho Ebhe ka likabhu na itimeli-o. Padhá de, anga likabhu ango-o adu kpekpeke na kuo kuo.

## 17

### *Nakodho 'ngú gba okpála na Babilona*

<sup>1</sup> Abhomu-o, suka oandjelu mananika inde i de ne okopo na ke 'ngu-o sakpa o ago apa muma me: «Gogo, ma asúno pi mu lele maka li Ebhe akodho 'ngú gba 'ngbé bhulu zabhe-e lie-o. A ko 'ngbé gudhu inde u ayiki e lingo ongbengbe ongade 'ngu bhelé. <sup>2</sup> Ongbengbe ongámási na doto amene zabhe ne ani. Okpála na doto atsia alangba ne vino gba ani na zabhe-o.»

<sup>3</sup> Abhomu-o, Bu Bhobua abedhe ma, Andjelu-o atsia anu ne ma abhú mili bili. Ma au elo bini inde adu pí enu na mbembe má ngua! Enu ango-o abuku kute e libhomu ne o'ili inde ngasobho Ebhe, 'ndji 'ndji adu li ani mananika di ne didi ndjikpa. <sup>4</sup> Elo ango-o adyi obongo na mbembembe na tia naali. Ani atsia adyi omagege na olo ne obhe na teme na mase naali di ne omayaka li kute e bedhe. A adu sakpa ani ne kopo na olo inde abedhe ne zibotu bhú e bedhe ka zabhe gba ani-o. <sup>5</sup> U aye pidi ani 'ili bini inde li ta e awo lie mawo. 'Ili ango-o me: «BABILONA NA NGBÉNGBÉ, 'HI OBHULU ZABHE DI NE OSISITI 'NGÚ NA DOTO-O.» <sup>6</sup> Ma au me elo ango-o alangba ne ngute okpála gba Ebhe-o, ngute obhe u abhili o ka u abhuka Yesu lie-o. Ma au ani lie, ma angamba naali.

<sup>7</sup> Abhomu-o, andjelu-o apa muma me: «Mu ngangamba ka ni? Ngama-a, ma ambamba ta 'ngú gba elo bhomu-o ne enu inde abi ani-e pi mu, enu inde li e ne 'ndji 'ndji mananika di ne odidi ndjikpa-o. <sup>8</sup> Enu inde mo ou e bhomu-o, adu nani tété. La-a, ani matá ade. Ani akoto bhú tsu 'dú-o, ani tsia nú bhú ngita gba e-o. Okpála na doto inde u ye nani 'li o bhú bhuku na mukobho-o de nayie maka nani li Ebhe abho doto lie, angamba li nau enu-o. Padhá de, anga ani adu nani tété, la-a ani matá ade. Engú bini, ani akoto matá ne toto.

<sup>9</sup> A ayo mbia inde-e nandu ne imbilangú di ne bua nakpokpo kú 'ngú. Ondji 'ndji mananika-a, a ko oeta mananika inde li elo-o ngadu pí e-o. A ko di ongbengbe ongámási mananika-o. <sup>10</sup> Obhe bhuluvue bhú ká uo-o, kulu gba uo-o andjia, bhe na madhia ngabha bhú kulu, bhe na mananika-a go nga de. Ani agó lie, ani améne bha nedhinga masudha. <sup>11</sup> Enu inde adu nako tété-e, inde matá tété ade bhomu-o, ngaani makpe-e, a ko 'ngbé ngámá na madjina. Ani bhú ká ongbengbe ongámási mananika-o. Ani adji bhú ngita gba e-o.

<sup>12</sup> Odidi ndjikpa inde mo ou e bhomu-o, a ko ongbengbe ongámási ndjikpa inde i 'u nga pí kiti na ngámá de-o. Engú bini, u asia angu ngú nau bhú dabili bini ne enu-o ngú saa bini. <sup>13</sup> Ndu ongámási ndjikpa bhomu-o hana bha ne koli mabhundja bini. U ne gumu naha angu di ne ngámá gba o ngú namene kulu lio pi enu-o. <sup>14</sup> U agú gbele ne Ndili Kandelo-o , la-a, Ndili Kandelo-o ahá angu uo. Padhá de, anga a ko Ngámá gba ongámási, a ko 'Ngbé Ngámá gba ongbengbe ongámási. Omaha Ndili Kandelo inde ani a'i o-o, ani atsia alo o-o, u ahá bhadi angu uo bhú dabili bini ne ani. U ngakpata Ndili Kandelo-o ne bua o bini.»

<sup>15</sup> Pipita-a, andjelu-o apa matá muma me: «Oengu inde mo ou e li bili inde li elo na zabhe alu li e bhomu-o, a ko okpála na ndu bili hana, a ko bhiti okpála, a ko opiga di ne okongú. <sup>16</sup> Odi 'nu ndjikpa ne enu inde mo ou e bhomu-o, ayála elo

na zabhe-o. U bhá 'he li ani hana, u a'ó ká ani ndumbu, u azú mbilika ani, u tsia bú dú ani bhú djua. <sup>17</sup> Padhá de, anga Ebhe a'o li bua uo me u mene mukunda gba ani-o. U améne ne bua bini me o ha angu na ngámá gba o me o mene kulu lio nedi pi enu-o, nakolo li nedhinga li 'li Ebhe améne lie lie-o. <sup>18</sup> La di-e, ɔlɔ inde mo ou e-e, a ko 'ngbé gũdhũ inde ngau pí ongámási na doto-o.»

## 18

### *Natì ka gũdhũ na Babilona*

<sup>1</sup> Pipita-a, ma au andjelu koko ayie abhúlá ngakɔ kuto. A adũ bhú ani ne angu na ngbéngbé. Abhomu-o zi ani abha doto libhomu. <sup>2</sup> Ani asula kpekpeke me:

«'Ngbé Babilona ati-e ngae! 'Ngbé Babilona ati-e ngae!

A akolo ibili bili li odjabulu ngadulu li e,  
bili inde li ndũ osisiti bua hana ngadulu li e.

A bhomu-o bili li odhu ne onu inde kala Ebhe sisiti-e ngadulu li e-o.

<sup>3</sup> Padhá de, anga ndũ okpála na doto hana andji siti zabhe gba ani-e maka okpála andjindji vino lie-o.

Ongbengbe ongámási na doto amene zabhe ne ani,  
obhulu natsindji 'he na pɩla doto atsia akpo di li angu na bhiti tia gba ani-o.»

<sup>4</sup> Pipita-a, ma adje eli koko ayie abhúlá. A adũ apa me:

«Ngayi okpála gba ma-a, yi ze bhú Babilona zeze,  
amba yi améne siti 'ngú bhú dabili bini ne ani de,

ngú napa me yi asia olikabhu inde abháka ani-e bhú dabili bini ne ani de.

<sup>5</sup> Padhá de, anga osisiti 'ngú gba ani-e apo 'ta e akolo makolo abhúlá. Ebhe atsia abhundja osisiti 'ngú gba ani-o.

<sup>6</sup> Yi mene ani maka ani amene okpála koko lie-o.

Yi gie siti 'ngú ani amene e pi ani bhutsibhutsi bhisi.

Yi ha pandi inde ane bhe gba ani-e ne kpéke bhutsibhutsi bhisi-e pi ani

bhú kópo inde ani adũ a'o pandi gba e bhú 'bhɔ okpála ne e ko.

<sup>7</sup> Ani adũ akpi ndjili naali bhú asasaua na tia gba e-o.

Kaka-a, yi gie di likabhu ne mulopolo pi ani li lelele.

Padhá de, anga ani ngapa li bua e me:

«Ma adũ pí kiti na ɔlɔ gba ngámá, ma ne ɔkɔ ade,

ma adũ galikpe bhú talia de.»

<sup>8</sup> Kaka-a, ndũ okpekpeke da 'ngú inde a'o lie pi ani-e agó galikpe atí pí ani li koli 'kpí bini ndũndũ hana.

Okpekpeke da 'ngú angu-o ngae inde: nakpi ka okpála, talia di ne gumu, li djua tsia tsulu di ani hana má kpəkəbhə!

Padhá de, anga Ngámá Ebhe inde akodho 'ngú gba ani-e, ne kpála na angu.»

<sup>9</sup> Abhomu-o, ongbengbe ongámási na doto inde-e amene zabhe bhú dabili bini ne ani. U akpi ndjili ne ani li bhiti tia gba ani-o. Li u aú ngúwa djua atsulu ani-e lie, u kú 'gbá, u tsia lópolo di lio ngú ani. <sup>10</sup> U alulu de ani tsutsu ka nakpe likabhu inde abhaka ani-o. U tsia pá me:

«A ko likabhu na ngbéngbé pi mu, Babilona!

Mu ne 'ngbé gũdhũ, mu la di ne angu. La-a, Ebhe akodho 'ngú gba mu-o bha bhú saa bini padhá!»

<sup>11</sup> Obhulu natsindji 'he di ngaku 'gbá, uo di bhú talia li 'ngú gba ani-o. Padhá de, anga kpála bini ngakala matá ehe gba uo-o ade. <sup>12</sup> Abana i dũ di-e olo, ne oaladja, ne oteme na mase ne omayaka, kpála bini ngakakala ade. Abana i dũ obongo na kpéke mase, ne ombembe obongo na zizi, ne obongo inde u abho e li dele gba okéké, kpála bini ngakakala ade. Abana i dũ ndũ djua ondula na babadha sese hana, abana i dũ ndũ djua oehe inde u abho e li 'te 'ya hana di ne obhe u abho e li ondula na mase hana, ne obhe u abho e li teme, kpála bini ngakakala ade. Abana i dũ di-e ndũ djua kalase hana, kpála bini ngakakala ade. <sup>13</sup> Abana i dũ oehe ne okpálá koko inde u aleleke se bili abhú 'ti ne e, ne mila di ne omungotsi koko, ne bandele, kpála bini ngakakala ade. Abana

i dɔ pandi, ne emɔ, ne fufú, kpála bini ngakakala ade. Abana i dɔ obagala, ne okandələ, ne opunda, ne okpulukpulu, kpála bini ngakakala ade. Abana i dɔ 'lá kpála-kuti, kpála bini ngakala sɔsɔka ade.

<sup>14</sup> Obhulɔ natsindji 'he bhomɔ-o apa pi gɔdhɔ bhomɔ-o me:

«Ndɔ oehe inde mo okukunda e hana andjia gba mɔ andjia!

Ndɔ otia gba mɔ di ne obabadha 'he gba mɔ-o

andjia ka mɔ andjia,

u ú matá gba mɔ belegɔ de bini!»

<sup>15</sup> Obhulɔ natsindji 'he inde akpo li tia na gɔdhɔ ango-o alúlɔ de ani tsutsu ka nakpe likabhu inde abhaka ani-o. U adú aku 'gba, u tsia lópolo di lio ngú ani. <sup>16</sup> U adú apa me:

«A ko likabhu na ngbéngbé pi yi, okpála na 'ngbé gɔdhɔ-o!

Yi adyi li kute yi babadha bongo inde na kpéke mase.

Yi atsia adyi di li yi obongo na mase naali inde na mbembe má ngua, inde li e ne zizi.

Yi adyi di omagege na olo bhú dabili bini ne oteme na kpéke mase di ne omayaka.

<sup>17</sup> Ndɔ 'he bhomɔ-o hana angíta bha li saa bini má kpikili!»

Abhomɔ-o, ndɔ obhulɔ nadjele zabɔ hana, bhú dabili bini ne okpála inde u abi o, okpála nadhukɔ pí 'ngbé 'ngu bhú dabili bini ne obhulɔ nagili tia pí 'ngbé 'ngu-o alúlɔ mbo tsutsu. <sup>18</sup> U atsia adɔ asusula ka nau ngúwa adɔ aze ka natsi ka gɔdhɔ-o me: «A akpo 'ndji e li 'ngbé gɔdhɔ inde-e ne bhedho?» <sup>19</sup> U adɔ aba embi bhú 'ndji o, u adɔ aku 'gbá, u atsia adɔ alopola lio me:

«A ko likabhu na ngbéngbé pi yi, okpála na 'ngbé gɔdhɔ-o!

Bhiti tia gba yi-e ngae inde li okpála inde ngamene kulu pí 'ngbé 'ngu-o

akpo ka e ko.

La-a, ndɔ 'he bhomɔ-o hana andjia bha li saa bini má kpikili!»

<sup>20</sup> Ngayi okpála inde abhúlá-a, yi kpi ndjili li nakpi ka gɔdhɔ ango-o!

Ngayi omaha Ebhe, ne yi obhulɔ titima gba Ebhe, di ne yi opolofeta , yi kpi ndjili!

Padhá de, anga Ebhe akodho 'ngú gba ani-e ka siti 'ngú inde ani amene e li yi ko!

<sup>21</sup> Abhomɔ-o, andjelu bini na angu aha teme bini maka 'ngbé teme nadyi ngano, ani atsia atumba bhú 'ngbé 'ngu ne napa me:

«U atumba bhadi ngbé gɔdhɔ na Babilona ne kpéke me,

kpála bini ú matá galikpe ani de.

<sup>22</sup> Obhulɔ nabhi dɔmɔ bhí matá galikpe agba mɔ de.

Obhulɔ na'u toti 'ú matá galikpe agba mɔ de.

Obhulɔ nali 'tsi lí matá galikpe agba mɔ de.

Obhulɔ ikalana dú matá di agba mɔ de.

Okpála dyi di matá ngano agba mɔ de.

<sup>23</sup> Zi tala dú matá di agba mɔ de.

U djé matá di 'li okpála inde aha lio agba mɔ de.

Padhá de, anga obhulɔ natsindji 'he inde adɔ bhú gɔdhɔ gba yi-e, adɔ ongbengbe kpála na doto.

Obhulɔ kobha gba yi-e apite ndɔ okpála hana.

<sup>24</sup> Okpála na Babilona abhili opolofeta, ne okpála gba Ebhe di ne ndɔ okpála hana inde u abhili o píla doto-o.»

## 19

### *Etsi ngú nadhögö Ebhe*

<sup>1</sup> Pipita-a, ma adje eli kpekpeke ayie abhúlá. Eli ango-o adɔ mɔgito me bhiti okpála ngagama 'ngú. U adɔ apa me:

«Aleluya! Yi toko Ebhe, Ngámá gba ní-o!

A ko mukobho, a ko Ebhe na sangu , a ko Ebhe na angu!

<sup>2</sup> Engú ani ngakodho e hana-a, ani ngakokodho li lelele, a la bhadi ngbingbili.

Padhá de, anga ani akodho 'ngú gba 'ngbé bhulɔ zabhe inde adɔ nako

asiti 'ndji okpála na doto ne zabhe gba e ko.

Ani atsia agisila engú nabhili obalise gba e li ani.»

<sup>3</sup> U atsia apa matá me:

«Aleluya! Yi toko Ebhe, Ngámá gba ní-o!  
Ngúwa inde ngakoto bhú gúdhú-o  
nga'u abhú alá dúdúma ne dúdúma.»

<sup>4</sup> Obhelesi okpála ndjikpa bhisi ne ká badha bhú dabilí bini ne okpála badha na ngangamba-a atutu lipúku o kuto, u atsia adhögö Ebhe inde ngadu pí kiti na ngámá-o. U adu apa me:

«A du moko! Aleluya! Yi toko Ebhe,  
Ngámá gba ní-o!»

### *Anokomia gba Ndili Kandele-o*

<sup>5</sup> Abhomu-o, eli bini ayie ne li pápá na kiti na ngámá-o. Eli ango-o apa me:

«Yi toko Ebhe gba ní-o, ndu yi obalise gba  
ani-e hana,  
ngayi okpála inde ngamanga ani-o,  
abana ngayi ongbengbe okpála ne yi  
odjedjedje!»

<sup>6</sup> Pipita-a, ma adje tolo mugo me a ngagama 'ngú ne bhiti okpála. Tolo ango-o adu mugo me a ko gili wowo 'ngu, mugo me kpéke mughála ngasusula ngae. A adu apa me:

«Aleluya! Yi toko Ebhe, Ngámá gba ní-o!  
Padhá de, anga a ko Apí 'Kpí.  
Ani ngaú maka ngámá.

<sup>7</sup> Ní kpi ndjili, amba ní du di bhú djali!  
Ní dhögö ani!

Padhá de, anga nedhinga na anokomia na  
kúva  
gba Ndili Kandele-o akolo,

wala\* ani aleke lie aleke.

<sup>8</sup> U aha bongo inde na kpéke mase pi  
ani.

Zi bongo ango-o ngasu masu, zibotu bini  
tété ade.»

(Bongo na kpéke mase bhomu-o ngasuno me okpála gba Ebhe-e amene obabadha kulu lio pi ani.)

<sup>9</sup> Abhomu-o, andjelu-o apa muma me:  
«Ye engú inde-e me: «A ko djali pi okpála  
inde u a'i o bhú anokomia na kúva gba  
Ndili Kandele-o!»» Ani atsia apa matá  
muma me: «A bhomu-o okukulu eli inde  
ayie ka Ebhe-o.»

<sup>10</sup> Abhomu-o, ma atutu lipúku ma kuto  
bhú li 'dhu ani ngú nadhögö ani. Engú

bini, ani apa muma me: «Mo oméne mo-  
o de. Ma ne bali gba Ebhe maka mu. Ma  
bhadi maka ondaise mu inde ngakpokpo  
kukulu 'ngú inde li Yesu ambamba 'ta e-o.  
Tutu mangbo lipuku mu kala Ebhe.»

Padhá de, anga ngbili 'ngú inde li Yesu  
akpokpo e ngaha angu pi opolofeta ngae.

### *Kpála inde adu pí punda na bubu-o aha 'gú ne obhulu yala gba e*

<sup>11</sup> Pipita-a, ma au kokpí abhulu lie. Ab-  
homu-o, punda bini na bubu akoto. Kpála  
inde adu pépé-e, adu 'li ani me: «Kpála  
inde ngamene kulu lie pi Ebhe ne bua e  
bini.» Ani ngakodho 'ngú ngbingbili, ani  
di ngagu egú bhú ngbili 'ngú. <sup>12</sup> Djila ani  
adu nade maka zi djua. Adu di bhú 'ndji  
ani ne ondata na ngámá bhelé. U aye 'ili  
bini li kute ani. Ani ambila bha bini 'ta  
'ili ango-o ngae.

<sup>13</sup> Ani adyi koti bini inde u azi e bhú  
ngute-e li kute e. Adu 'li ani me: «'Li  
Ebhe.» <sup>14</sup> Osudha na abhú alá adu akpata  
ani me u nde a'u'u pí opunda na bububu.  
U adyidi obongo na kpéke mase. Bongo  
ango-o adu bubu, zibotu bini du tété de.  
<sup>15</sup> Mbotia inde li 'bhö e adu bebedhe-e  
adu akoto bhú 'bhö ani. Mbotia ango-o  
adu ngubula nabhili opiga ne di. Ani aú  
pí 'ndji uo ne angu e hana. Ani tsia pí  
vino bhú 'ngbé ngbengöle na ke 'ngú gba  
Ebhe Ngámá Apí 'Kpí-o. Ke 'ngú ango-o  
adú nadula madula.† <sup>16</sup> U aye 'ili bini li  
koti gba ani di ne pí 'ku ani. U aye 'ili  
ango-o me: «'NGBÉ NGÁMÁ GBA ONGBENGBE  
ONGÁMÁSi, NGÁMÁ GBA ONGÁMÁSi.»

<sup>17</sup> Pipita-a, ma au andjelu bini, alu  
tu ela. Ani asula kpekpeke pi ndu  
odhu hana inde adu adholo abhú alá tsutsu  
naali-e me: «Yi go po bhúla yi ngú  
'ngbé anokomia gba Ebhe-o! <sup>18</sup> Yi  
go zu mbilika ongbengbe ongámási ne  
ongámási gba osudha di ne osudha. Yi go  
zu mbilika opunda di ne mbilika osudha  
inde adhudhuku ne di-o. Yi go zu mbilika  
okpála, abana i du obhende bhú bali ne  
obhe bhú bali ade-o, abana i du odjedjedje  
ne ongbengbengbe.»

\* **19:7** 19:7 Ndili Kandele ne wala e: Ndili Kandele-o, a ko Kilisito, wala ani-e, a ko Piga gba Ebhe. Tsia bhú Efe. 5:25, 32. † **19:15** 19:15 Tsia bhú Ets. 2:9.

<sup>19</sup> Abhomu-o, ma au enu inde i de akoto bhú 'ngbé 'ngu-o, ne ongbengbe ongámási na doto, bhú dabili bini ne osudha gba o me u nde apo bhúla o ngú naha 'gú pi kpála inde adu pí punda ne osudha gba e-o. <sup>20</sup> Abhomu-o, kpála inde adu me ani nde a'u pí punda aholo enu-o bhú dabili bini ne polofeta na eu inde adu nani amene ongamba 'ngú li djila ani-o. Ani adu nani amene ongamba 'ngú bhomu-o ngú nato okpála inde u aye nani tele gba ani-e li kute o bhú ngita, inde adu di adhögö kulu ani-o. Kpála bhomu-o abhike enu-o bhú dabili bini ne polofeta na eu-o bhú dé djua na baluti. Ani abhike uo bhúbhú me u nde mu de. <sup>21</sup> Ani atsia abhili osudha gba uo ne ngise inde adu akoto bhú 'bhö ani-o. Abhomu-o, ndu odhu hana azu mbilika uo. U atsia a'u'u ne di.

## 20

### *U agbite Satana ngú kalanga koto bini*

<sup>1</sup> Pipita-a, ma au andjelu bini ayie abhúla, ani atsia akö píla doto. A adu sakpa ani ne lifungula na tsu 'du-o. A adu di sakpa ani ne 'ngbé gbíndjili na ngbéngbé. <sup>2</sup> Ani ago aholo 'ngbé kpulu na didili-o. 'Ngbé kpulu ango-o, a ko Satana inde djabulu. Andjelu ango-o agbite ani ngubula kalanga koto bini. <sup>3</sup> Ani abhike ani bhú tsu 'dú. Ani adho bhöbhö nganda ani, ani atsia aye balua pépé. Balua ani aye e adu me, ngubula kalanga koto bini-e, ani ngbngi matá 'ndji okpála de. Pipita-a, u atsé mbo 'kpa li ani ngú nedhinga bedi.

<sup>4</sup> Pipita-a, ma au okiti na ngámá. Okpála inde adulu pépé-e, u aha pi uo angu nakodho 'ngú gba okpála. Ma au di bua okpála bhende u ava nani ngulu o ka u abhuka kukulu 'ngú inde li Yesu ambamba ta e di ne 'li Ebhe lie-o. U dhögö nani enu-o de. U dhögö di kulu ani-e de. U ye di nani tele gba ani-e pidi uo, i du di-e li 'kpa uo de. U azuku matá, u atsia au ngámá bhú dabili bini ne Kilisito ngubula kalanga koto bini. <sup>5</sup> A

bhomu-o bhutsibhutsi na bini me Ebhe zuku okpála-o. Okpála bhe koko adjéke ngaiza me kalanga koto bini-e le paká, li Ebhe tsia zuku uo. <sup>6</sup> A ko djali pi okpála inde azuku bhú ká okpála inde li Ebhe azuku o kalanu bhomu-o. A ko okpála gba Ebhe, la di-e, nakpi na bhisi-e ne angu pí uo ade. U adú odimandö gba Ebhe di ne gba Kilisito. U aú ngámá bhú dabili bini ne ani ngubula kalanga koto bini.

### *Satana ati*

<sup>7</sup> Li kalanga koto bini-e de ale-e, u gbé Satana bhú tikpu gba e-o. <sup>8</sup> Ani tsia nú napite opiga inde agbolo píla doto libhomu. A akunda napa me nayie bhú Gogo nakolo bhú Magogo.\* Ani apó bhúla uo ngubula gbele. U tsia dú bhelé nane sike lingo 'ngbé 'ngu mane. <sup>9</sup> U abha doto libhomu, u atsia asa bili li omaha Ebhe apo bhúla o lie-o. U atsia asa di gudhu gba okpála li Ebhe akunda o-o. Engú bini, djua ayie abhúla, atsia ago atsulu uo hana. <sup>10</sup> Abhomu-o, Ebhe atsia atumba djabulu, kpála inde adu nako napite uo, bhú dé djua na baluti nganda enu-o bhú dabili bini ne polofeta na eu-o. U adú nazu likabhu oo ngbikpi ne sukpe duduma ne duduma.

### *Lele maka li Ebhe akodho 'ngú na soso-o lie-o*

<sup>11</sup> Pipita-a, ma au 'ngbé kiti na ngámá bini me kpála bini nde adu pépé. Kiti ango-o adu bubu. Kokpi ne doto akpekpe de ani tsutsu. Kpála tsia u matá uo de. <sup>12</sup> Abhomu-o, ma au okpála inde amu-o, ongbengbengbe ne odjedjedje, alulu kala kiti na ngámá-o. U abhulu obhuku. U atsia abhulu di bhuku koko, a adu bhuku na mukobho-o. Abhomu-o, Ebhe atsia akodho 'ngú gba okpála inde amu-o nakpata lele kulu gba uo-o, nakpata engú inde u aye e bhú obhuku-o. <sup>13</sup> 'Ngbé 'ngu azie okpála inde amu inde adu bhúbhú-o. Kuo ne kuti gba okpála inde amu-o azie di okpála inde adu agba uo-o. Abhomu-o, Ebhe atsia akodho 'ngú gba kpála ne kpála nakpata lele kulu gba e-o. <sup>14</sup> Abhomu-o, Ebhe atsia atumba kuo

\* **20:8** 20:8 Gogo ne Magogo: A ko 'ili ngú nasuno obhulu yala gba omafsalaale.

bhú dabili bini ne kuti gba okpála inde amu-o bhú dé djua-o. Dé djua bhomu-o, a ko nakpi na bhisi. <sup>15</sup> Abhomu-o, ndu kpála hana inde u ye 'li e bhú bhuku na mukobho-o de-e, u abhike ani bhú dé djua bhomu-o.

## 21

### *Ebhe abhó ndu 'he hana ne toto*

<sup>1</sup> Pipita-a, ma au kokpi na mbia ne doto na mbia, anga kokpi na kalanu ne doto na kalanu-o andjia. 'Ngbé 'ngu du matá di-i de. <sup>2</sup> Ma atsia au gudhu na bubu-o ngayie abhúla. Gudhu angu-o, a ko Yelusalema na mbia. Ebhe atima gudhu angu-o ngae. A adu akè kuto me a nde bedhe maka èlè inde aleke lie ngu nanu nakè lie ne 'ko e. <sup>3</sup> Ma adje kpála bini ngatobhila kpekpeke li pápá li kiti na ngámá-a adu li e me: «Mbia inde-e dabili nadu gba Ebhe-e bhú ká okpála. Ani adú ne uo, u tsia dú omaha ani. Ebhe ngae makpe adú bhú dabili bini ne uo, ani adú Ebhe gba uo. <sup>4</sup> Ani akúo ndu ngula sa kula uo hana, okpála mú matá-a de. Engú na da kuo dú matá-a de, egba dú di-i de, likabhu dú di-i de, anga doto na kalanu-o nde andjia.»

<sup>5</sup> Abhomu-o, kpála inde adu pí kiti na ngámá-a atsia apa me: «Mbia inde-e, ma ngabho ndu 'he hana na mbia.» Pipita-a, ani apa muma me: «Ye 'ngú inde, anga eli ma ngapa e-e, a ko kukulu 'ngú, inde a ayo la di me okpála bhuka e ko.» <sup>6</sup> Ani atsia apa matá muma me: «A amene lie amene! Ngama-a, ma ne Alafa di ne Omega. Ngama-a, ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana. Kpála inde lie ne gumu 'ngu-o, ma ahá engu nandji mandji pi ani padhá bhú kpongu inde ngaha mukobho. <sup>7</sup> Kpála inde agbóko egú-o, ma ahá ndu 'he bhomu-o hana pi ani, ma adú ne Ebhe gba ani, ani tsia dú ndili gba ma. <sup>8</sup> La pi okpála bhende ngamene siti 'ngú-o, dá uo abhú dé djua na baluti na duduma ne duduma. A

bhomu-o nakpi na bhisi. A ko okpála namene ngua siti 'ngú inde: obhulu tsulu, okpála ayala nabhuka, obhulu namene zabhe, obhulu nabhèlè kpála, obambakuya, obhulu kèlè, obhulu nayo oebhe na eu, ne obhulu eu.»

### *Yelusalema na mbia*

<sup>9</sup> Abhomu-o, saka oandjelu mananika inde adu sakpa o ne okópo mananika, inde abedhe ne olikabhu mananika na soso-o ago apa muma me: «Gogo, ma nu suno èlè na kava-a pi mu. A ko wala Ndili Kandèlè-o.»

<sup>10</sup> Bu Bhobua ago abedhe ma, abhomu-o andjelu-o anu a'o ma pí 'ndjá 'ta. Eta angu-o adu ngbéngbé. Ani asuno gudhu na bubu-o muma. Gudhu angu-o, a ko Yelusalema li Ebhe atima e ngae-o. A ayie abhúla, a atsia adu akè kuto. <sup>11</sup> Zizi adu asu ka sangu gba Ebhe-o. Zi gudhu angu-o adu nasu má ngingingi mugito me a ko teme\* na mase. <sup>12</sup> Aga inde u asa e li kukute-e adu ngbéngbé, di ndjándjá. Bhèbhè adu tété ndjikpa ne ká bhisi, oandjelu ndjikpa ne ká bhisi atsia adu nalilila. U atsia aye 'li opiga ndjikpa ne ká bhisi na Isalaele-e tété. <sup>13</sup> Ne ndu pasu hana bhèbhè adu tété bata: bata ne ndjongu, bata ne kati, bata li pápá na abebe, bata li pápá na yoyoko. <sup>14</sup> U ayiki aga bhomu-o pí oteme ndjikpa ne ká bhisi. U atsia aye 'li obhulu titima ndjikpa ne ká bhisi gba Ndili Kandèlè-o tété.

<sup>15</sup> Andjelu inde adu apa 'ngú muma-a, adu sakpa ani ne mbamba na olo inde ani adu napima ne e gudhu-o, ne obhèbhè, di ne aga angu-o. <sup>16</sup> Gudhu angu-o adu ne odjedje badha. A aviti bhú 'ndjá ne bhú bá, ne bhú 'ngbé-e bini. Li andjelu-o apima gudhu-o lie ne mbamba gba e-e, mbamba-a ali bhúbhú bhutsibhutsi kètè 12† ne ká bhisi ne ndu pasu hana. <sup>17</sup> Ani apima di aga-o, mbamba gba ani-e ali bhúbhú bhutsibhutsi kètè 144‡ bhú 'ndjá abhúla. Ani apima bha maka li okpála apipima 'he lie-o.

\* **21:11** 21:11 Teme: Bhú eli na giliki-e, u aye me «Teme na djasepe ne kilisitale.» † **21:16** 21:16 Mbamba bhutsibhutsi kètè 12: Gudhu bhomu-o adu bhú 'ndjá-a masikpe de kilometele kètè bhisi ne 'he pépé ndu pasu hana. ‡ **21:17** 21:17 Mbamba bhutsibhutsi kètè 144: A ko masikpe de metele ndjikpa mananika ne ká bhisi.

<sup>18</sup> U ayiki nani aga ne teme inde u a'i e me djasepe. Gũdhũ-o libhomu adũ ngililí olo. A atsia adũ má ngililí maka tsupa na bubu. <sup>19</sup> Oteme inde u amene 'dhũ aga na gũdhũ-o ne e, u aye nani tele tété ne ndũ djua oteme na mase hana: bhe na bini-e adũ teme na djasepe, bhe na bhisi-e adũ teme na safile, bhe na bata-a adũ teme na kalasedũane, bhe na badha-a adũ teme na emelode, <sup>20</sup> bhe na bhuluvue adũ teme na saladũane, bhe na madhia adũ teme na kolonaline, bhe na mananika adũ teme na kilidjolute, bhe na madjina adũ teme na belile, bhe na odukpabini-e adũ teme na topadje, bhe na ndjikpa-a adũ teme na kilidjopaladje, bhe na ndjikpa ne ká bini-e adũ teme na yasete, bhe na ndjikpa ne ká bhisi-e adũ teme na ametisite. <sup>21</sup> Obhoti ndjikpa ne ká bhisi-e adũ omayaka ndjikpa ne ká bhisi. U abho nani bhoti bini ne bini li lí mayaka bini má kpikili! 'Ngbé 'hi kpadji na gũdhũ-o adũ nani ngililí olo. A atsia adũ má ngililí maka tsupa na bubu.

<sup>22</sup> Ma u belegũ 'ngbé 'ti Ebhe bhú gũdhũ bhomu-o de, anga Ebhe Ngámá Apí 'Kpí ngae makpe bhú dabili bini ne Ndili Kandølo-o ne 'ngbé 'ti Ebhe ang-o ngao. <sup>23</sup> Gũdhũ ang-o dũ ne gumũ ela abana di epe ngú naha zi kpí oo de, anga sangu gba Ebhe-e ngasũ zi e oo ngae, Ndili Kandølo-o la di ne tala ang-o ngae. <sup>24</sup> Opiga na doto adũ adhũkũ li zi gũdhũ ang-o. Ongbengbe ongámási na doto tsia gó di ne tia gba o bhú gũdhũ ang-o. <sup>25</sup> Obhø bhoti na gũdhũ ang-o adũ ndũ nedhinga hana bábá, u ní galikpe-e de, anga ekpí bí galikpe oo de. <sup>26</sup> Opiga na doto adũ nali bhúbhú ne sangu di ne obabadha tia gba o-o. <sup>27</sup> Ehe bini na sisiti lí oo de, abana okpála namene engú inde li Ebhe ayala e, abana obhũlu eu. A alí bha bini oo ne okpála inde u aye 'li o bhú bhuku na mukobho-o, bhuku gba Ndili Kandølo-o.

## 22

<sup>1</sup> Pipita-a, andjelu-o asuno mũma ngade 'ngu inde ngaha mukobho pi okpála-o. Ngade 'ngu ang-o adũ má ngililí maka

tsupa na bubu. A adũ ayie li bili li kiti na ngámá gba Ebhe ne Ndili Kandølo-o adũ li e-o. <sup>2</sup> Engu ang-o atsia adũ akpe li 'ngbé 'hi kpadji na gũdhũ na bubu-o. Ne ndũ pasũ bhisi na ngade 'ngu-o hana adũ tété ne ndula inde ngaha mukobho. Ndula ang-o ngali lílí bhũtsibhũtsi ndjikpa ne ká bhisi bhú kalanga bini. A ngali lílí bhũtsibhũtsi bini ndũ epe bini ne bini hana. Kpákpá-a atsia adũ nateteke ngũbula nakobho okuo gba opiga.

<sup>3</sup> Ohe inde li Ebhe tú matá pødjo li e, lí bhú gũdhũ ang-o de. Kiti na ngámá gba Ebhe ne uo ne Ndili Kandølo-o adũ bhú gũdhũ-o. Obalise gba Ebhe-e tsia dú nadhøgø ani. <sup>4</sup> U aú bhúla ani, u tsia yé 'li ani pidi uo. <sup>5</sup> Sukpe dú matá-a de, u dú di matá ne gumũ zi tala abana zi ela de, anga zi Ebhe Ngámá asú pi uo ngae, u tsia ú ngámá dũdũma ne dũdũma.

### *Nago ka Yesu*

<sup>6</sup> Pipita-a, andjelu-o apa mũma me: «Ongú inde ma apa e, a ko kũkũlu 'ngú inde ayo me okpála bhuka e. Ebhe Ngámá inde ngato 'li e bhú opolofeta-a, atima andjelu gba e ngú nasuno pi obalise gba e engú inde ayo me akolo mbia inde-o.»

<sup>7</sup> Yesu apa me: «Gbo 'dje mũ, Ma ngago mbia inde! A ko djali pi kpála inde ngalila ongú inde li Ebhe ambamba ta e bhú bhuku inde-o!»

<sup>8</sup> Ngama Djaa, ma adje ongú bhomu-o ne 'dje ma, ma atsia au di ne djila ma. Pita nadjedje ne nauu-o, ma ati bhú li 'dhũ andjelu inde asuno ongú bhomu-o mũma-a ngú nadhøgø ani. <sup>9</sup> Engú bini, ani apa mũma me: «Mo oméne mo-o de! Ma ne bali gba Ebhe-e maka mũ. Ma bhadi maka ondaise mũ inde ngakpokpo kũkũlu 'ngú inde li Yesu ambamba ta e-o. Ma maka ndũ okpála hana inde ngalila engú inde u aye e bhú bhuku inde. A ayo mangbo me mũ dhøgø Ebhe!»

<sup>10</sup> Pipita-a, andjelu-o apa mũma me: «Mo owó ongú inde li Ebhe ambamba ta e bhú bhuku inde-e de, anga nedhinga ngú namene lie ka ongú ang-o akolo masikpe. <sup>11</sup> A ayo me kpála bhende ngamene siti 'ngú-o nũ bha nedi ne



kalanu, kpála bhende ngamene engú inde li Ebhe ayala e nu bhadi nedi ne kalanu. Kpála bhende ngamene ngbili 'ngú nu bhadi nedi ne kalanu, amba kpála bhende ngamene engú inde nganga li Ebhe-e nu bhadi ne di ne kalanu.» <sup>12</sup> Yesu apa me: «Gbo 'dje mu, ma ngago mbia inde! Ma ngago sakpa ma ne makalá inde ayo me ma ha e pi kpála ne kpála nakpata lele kulu inde ani amene e-o. <sup>13</sup> Ngama-a, ma ne Alafa di ne Omega, a kunda napa me ma ne kpála na kalanu, ma la di ne kpála na soso. Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana.»

<sup>14</sup> A ko djali pi okpála inde ngavulu obongo gba o-o. Ebhe Ngámá ahá kpadji pi uo me, u li li obhoti na gudhu na bubu-o, amba u zu di li 'lá inde ngaha mukobho-o. <sup>15</sup> Engú bini, ndu okpála bhe koko hana, u li bhú gudhu-o de. Okpála ango-o ngao inde: okpála inde li Ebhe atu pedje li o, obhulu kole, obhulu zabhe, obhulu nabhili okpála, okpála inde ngadhoge oebhe na eu, di ne ndu okpála hana inde ngakpi ndjili li eu, inde di ngapa eu-o.

<sup>16</sup> «Ngama Yesu-o, ma atima andjelu gba ma-a ngú nago nambamba ta ongu bhomu-o pi yi bhú oDadjua gba Ebhe-o. U azu ma bhú piga gba 'ngbé ngámá Davidi.

Ma ne ikupala inde asusu kekpi-o.»

<sup>17</sup> Bu Bhobua ngauo ne elø na kuva apa me: «Gogo!»

A ayo me kpála inde adje engú inde-e pa di me: «Gogo!»

A ayo me kpála inde li e ne gumu 'ngu-o gogo.

A ayo me kpála inde li e ne gumu engu inde ngaha mukobho-o sia padhá.

### *Engú na soso*

<sup>18</sup> Ngama Djaa, ma ngagbele 'dje ndu okpála hana inde ngadje ongu inde li Ebhe ambamba ta e bhú bhuku inde-e me, li kpála bini 'o engú koko pépé-e, Ebhe 'ó bhadi ndu olikabhu hana inde u aye e bhú bhuku inde-e pi ani! <sup>19</sup> Li kpála bini 'e la di ehe bini bhú ká ongu inde li Ebhe ambamba ta e bhú bhuku inde-e, Ebhe 'é makalá gba ani inde u akpokpo 'ngú e bhú bhuku ango-o. Makalá ango-o, a ko li 'lá inde ngaha mukobho pi okpála, a ko la di nali bhú gudhu na bubu-o.

<sup>20</sup> Kpála inde alu pi ndu 'ngú inde-e hana apa me a ko kukulu 'ngú-o apa me: «A moko, ma ngago mbia inde!»

Ngama Djaa, ma atsia apa me: «A adu moko! Gogo, Ngámá Yesu.»

<sup>21</sup> A ayo me Ngámá Yesu suno bádha bhú 'bu gba e pi ndu yi hana.